


Bëngbe Bëtsa  
Cabëngaftaca  
Entsoyebuambna



New Testament in Camsá

**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 18 Apr 2025 from source files dated 29 Jan 2022  
19104c0e-9046-5ff3-82fb-eb838c88dcf9

## Contents

San Mateo . . . . .	1
San Marcos . . . . .	73
San Lucas . . . . .	117
San Juan . . . . .	190
Hechos . . . . .	244
Romanos . . . . .	313
1 Corintios . . . . .	351
2 Corintios . . . . .	387
Gálatas . . . . .	410
Efesios . . . . .	424
Filipenses . . . . .	437
Colosenses . . . . .	446
1 Tesalonicenses . . . . .	455
2 Tesalonicenses . . . . .	462
1 Timoteo . . . . .	466
2 Timoteo . . . . .	477
Tito . . . . .	484
Filemón . . . . .	489
Hebreos . . . . .	491
Santiago . . . . .	521
1 San Pedro . . . . .	530
2 San Pedro . . . . .	540
1 San Juan . . . . .	546
2 San Juan . . . . .	555
3 San Juan . . . . .	557
San Judas . . . . .	559
Apocalipsis . . . . .	562

## San Mateo

### *Jesusbe bëts taitanga*

*(Lc 3.23-38)*

<sup>1</sup> Quemënga imnamna Jesucristbe bëts taitanga: Jesucristna Rey David y Abrahámbentšana entsá inamna.

<sup>2-6</sup> Abraham yojamna Isaacbe taitá;

Isaacna Jacobëbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y choca imo-  
janëtámena ora, Josías chë básenga yojánabamna.

<sup>12-16</sup> Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadochbe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana Uabuayaná, chë Cristo  
ca uabainá.

17 Chcasna, Abrahámbentsana Davidbentscoñe bnétsana canta bēts pamíllanga imojéftsemna. Davídbentsana y chē israelitēnga Babilonioca imojanētamenēntscuana inye bnétsana canta bēts pamíllanga; y inye bnétsana canta bēts pamíllanga chē Israeloca entsanga imojanētamenentsana, chē Cristo tojanonýnántscóñe.

### *Jesucristo tojanonýná*

(Lc 2.1-7)

18 Jesucristo jónýnanamna mēntśá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomamaná yojoquéda chē Uámana Espíritbe obenánaca.

19 José, Mariybe boyá, canye nyetsca soyēnguiñe tśabá jamama bośá inamna. Cha ndoñe yontseboše entsangbe delante cha mal jaquédana; chíyecna tojanjuabó nye iytēcana Mariybentsana jtsojuánañana.

20 Y chca yojtsejuabnantscuana, mo otjenayoquécá canye Bēngbe Bētsabe ángel tbojáninye y chana Josébioye tbojaniyana: “José, Davídbentsana entśá, ndoñe matenócochinýenana Mariáftaca jobouamayama, er chē bochántsebmna šešona chē Uámana Espíritbe obenánaca cha bochántsebmna.

21 María canye šešona bochántsebmna y cha Jesús ca cochjuabaye. Chca echantsabaina er cha chabe entsanga chēngbe bacna soyēnguentšana echanjátsebacaye ca” —chē ángel tbojaniyana.

22 Lempe chca tojanochnēngo, cachcá chaotsemnama ntśamo Bēngbe Bētsá chabe juabna oyebuambnayēngbiajana tojanayancá. Chē oyebuambnayá mēntśá tojánayana:

23 Chē cabá boyabása nduabuatmá ngomamaná echanjoquéda y canye šešona boyabásetema bochántsebmna, y cha mochanjuabaye Emanuel ca. (Emanuel endayana “Bēngbe Bētsá bēngaftaca ca”.)

24 José chē otjénayentsana tojanofšená ora, tojanma ntśamo chē Bēngbe Bētsabe ángel tbojanmandacá y Mariáftaca tojanobouamá.

25 Pero ndoñe cánýiñe ibontsaniyena, sinó nye chē šešonatema tojanonýná orscana. Chē šešonatema tojanonýná orna, José chábioye Jesús ca tbojanabaye.

## 2

### *Reyes Magos Jesúsbioye tmojána*

1 Herodes judiēngbe rey yojamna ora, canye pueblo Judeoca, Belén ca uabáinentše Jesús tojanonýná. Chentsana, báseftanga, estrellēnga uat-sjéndayēnga, magos ca uabáinēnga, canye bēts puebloye Jerusalén ca uabáinoye tmojánashjajna. Chēnga tmojánabo shinýe bocanoye luarēngocana.

2 Jerusalenocna chēnga, Heródesbioye tmojána y tmojanēnoticiá: “¿Ndayentše yojtsemna chē judiēngbe rey jtsemnama tojonýná cha ca? Bēngbe luarēngoca shinýe bocanoye chabe onýnana estrella fsēnjinye y as muentše cha jaboadorama tifjabo ca.”

3 Rey Herodes chca tojanuena ora, corente yojtsenócochinýena, y nyetsca chē Jerusalenentše oyenēngnaca.

4 Chentsana chē rey tojánachembo nyetsca chē judiēngbe bachnangbe amēndayēnga y chē judiēngbe ley abuátambayēnga jenoyeunayēngama. Mēntśá tojanatjá: —¿Ndayentše chē Bēngbe Bētsabe Uámana Uabuayaná, chē Cristo ca uabainá, jónýnama ibomna ca?

5 Chēnga tmojanjuá: —Judeoca, Belén pueblentše ca. Bayté entsemna chē Bēngbe Bētsabe juabna oyebuambnayá Miqueas mēntśá tojánábema:

<sup>6</sup> Y tšëngaftanga, Judeoca Belenentše oyenënga, canye mandayá tšëngaftangbentsana echanjabo.

Cha nyetsca chë Judeoca mándayëngbiama más uamaná echántsemna, y atšbe entšanga Israeloca echántsanýena.

Chíyeca tšëngaftangbe pueblo ndoñe nye batšá uámana pueblo quenátsmëna ca.

<sup>7</sup> Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninýama.

<sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tšabá chë šešona šmochjánguango. Chašmojinýena ora, šmochjabëuenaye, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinýe chë chëngbe luarëngoca tmojáninýe estrella y yojtsanebnatsana chë šešona yojtsemnëntscoñe. Chentsa juatsbuacá chë estrella yojójaiye.

<sup>10</sup> Chë maguënga chë estrella tmojáninýe orna, corente oyejuayënga imojtsemna.

<sup>11</sup> Chë yebnoye tmojánamashjna ora, chë šešona tmojáninýe chabe mamá Mariáftaca. Chorna, tmojanoshamentsé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canye botamana uanguëtše soye, mirra ca uabáiniye.

<sup>12</sup> Chentsana, mo canye otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentsana inýe benachëjana cachëngbe luarëngoye tmojésanshëcuana.

### *Egiptó luaroye tmojtsanachá*

<sup>13</sup> Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninýe y cha mëntšá tbojaniyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atšbe chacbochjábuaenantscuana ca.”

<sup>14</sup> As José tojantsbaná, chë šešonatema y chabe mamá tojesanëbiatše y ibeta Egiptó benache tojéftsanbocna.

<sup>15</sup> Y choca imojtsanomñe Herodes tojanóbanëntsacuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabijana tojanayancá. Chë oyebuambnayá mëntšá tojánayana: “Egiptocana atšbe uaqiñá sënjanchembo ca.”

### *Herodes tojanmandá basetémënga jtsëbáyama*

<sup>16</sup> Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninýama.

<sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canye oyebuambnayana tmojanuena, ngménaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntśá tbojaniyana:

<sup>20</sup> “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanébiatše.

<sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josená Galilea ca uabáina luaroye tojána.

<sup>23</sup> Choye tojánashjango ora, José tojána canye pueblo Nazaret ca uabáinoye chentše joyénanama. Chca tojanochñëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### 3

#### *Juan chë Ubayaná entsanga yojanabuayiná (Mc 1.1-8; Lc 3.1-9, 15-17; Jn 1.19-28)*

<sup>1</sup> Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama.

<sup>2</sup> Mëntśá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiama chë Bëngbe Bëtsabe juabna oyebuambnayá Isaías mëntśá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entsá jashjanguama, tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” –cha tojánayana.

<sup>4</sup> Juanbe entsáyá inauapormana camellbe stjënasheca y bobache yojanasnana. Cha inasaye chapulínatémënga y tjoca tjouangbe méloye.

<sup>5</sup> Jerusalenoca entsanga, nyetsca Judea luarentša entsanga y chë Jordán ca uabáina béjaye béconana oyenënga imojánbocana Juan joyeunayama.

<sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entsanga! ¿Nda tcmënjáyana chë echanjóshjango uabouana castigüentšana šmochjotsbocá ca?”

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtajbanama.

<sup>9</sup> Y ndoñe šmattsejuabnaye cach tšëngaftangbiama jayanama: ‘Abrahábentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahábentšana entsanga nanjábiana.



<sup>10</sup> Chë tatsnía ya entsaprontana chë betiyeshënga tbëtëjëngocana jtse-shatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tsëngaftangaftácna cachcá, tsabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše merecido taitatobuajoñe ni mo chabe shecochëtjonëshe jtsámabána. Chë chabe benache aiñe chamojtishachëngbiana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá.

<sup>12</sup> Canye entšá chabe mëtštá cucuatšíñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoserverna shácuanëngna iñoye jtsatmetšana. Cachcá, chë atšbe ústonoye echanjabana, chë tsabe entšanga echanjúbuaja, y chë bacna entšangna canye iñeshiñe echantsacastigaye, y chë iñe ndocna te queochátsfsana ca” —cha tojanéyana.

*Juan, Jesúsbioye tbojanabaye  
(Mc 1.9-11; Lc 3.21-22)*

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuábayama.

<sup>14</sup> Pero Juan ndoñe yontseboše Jesús juabáyama, y mëntšá tbojaniana: —Atše šontsemna aca chašcuabaye, y ¿más atše aca cbochjuabaye ca?

<sup>15</sup> Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama.

<sup>16</sup> Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiye y tojáninye chë celoca atëfjniñe y chë Uámana Espíritu mo canye palomatemcá chábioye yojsastjajuana.

<sup>17</sup> Chora celocana Bëngbe Bëtsá mëntšá tojánayana: “Mua atšbe bonshana uaquiñá endmëna. Chabiana corente sëntsoyejuá ca.”

## 4

*Jesús tojanobená Satanás jayënjanama  
(Mc 1.12-13; Lc 4.1-13)*

<sup>1</sup> Chentšana chë Uámana Espíritu entšanga ndoyena luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëtsena.

<sup>3</sup> As Satanás tbojanobobeconá y tbojaniana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> Pero Jesús tbojanjuá: —Bëngbe Bëtsabe uabemana palabrënguñe mëntšá endayana: “Entšá nye tandëseca ndoñe vida ntsebomnana, sinó entšá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá.



<sup>6</sup> Chentše Satanás mēntšá tbojaniyana: —Aca ndegombre Bēngbe Bētsabe Uaquiñá tcomnēse, muentšana fshantsoye montsēnja, er Bēngbe Bētsabe uabemana palabrenguiñe endayana:

Bēngbe Bētsá chabe angelēnga echanjichamuá, chacmotsinýenama.

Chēnga buacuatšēngaca cmochanjishache, shecuatše ndētšbeñe ndocá chacodomama ca —cha tbojaniyana.

<sup>7</sup> Chora Jesús tbojanjuá: —Cach Bēngbe Bētsabe uabemana palabrenguiñe mēntšá endayana: “Ndoñe matsbošana acbe Bētsá chē Útabná bacna soyēngama jacochēnguama ca.”

<sup>8</sup> Cabana, Satanás tbojanánatse canye bēts tjoye y betesco nyetsca quem luarentša amēndayēngbenache y chentša nyetsca uámana soyēnga Jesúsbioye tbojaninýinýe.

<sup>9</sup> As Satanás tbojaniyana: —Aca chacojoshēntsamentšé y chašcojadorase, lempe chē soyēnga cbochjatštaye ca.

<sup>10</sup> Y Jesús tbojanjuá: —¡Satanás, átšbentšana mojuaná! Bēngbe Bētsabe uabemana palabrenguiñe mēntšá endayana: “Bēngbe Bētsá cochtsadorana y nye cha cochtseservena ca.”

<sup>11</sup> As Satanás cachcá tbojanonýá. Cachora Bēngbe Bētsábiocana angelotēmēnga tmojánabo Jesús jtseservénama.

*Jesús tojanontšé Galileoca chabe trabajo jamana*

*(Mc 1.14-15; Lc 4.14-15)*

<sup>12</sup> Juan chē Ubayaná cárceloye tmojanētámíama Jesús tojanuena ora, Galilea luaroye cha tojtaná.

<sup>13</sup> Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chē uámana bēts taitata Zabulón y Neftalibe luariñe.

<sup>14</sup> Chca tojanochnēngo, cachcá chaotsemnana ntšamo chē Bēngbe Bētsabe juabna oyebuambnayá Isaías tojanayancá. Isaías tojánayana:

<sup>15</sup> Zabulón y Neftalibe luare, Jordán bėjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

<sup>16</sup> Chē mo ibetiñe cuaftsiyencá imojoyena entšanga, Bēngbe Bētsabe soyēnga nduabuatma causa, tmojinýe canya entšangbe juabnēnga binýnayá.

Chē chēngbe juabnēnga binýnayá entsebuashinýinýana chē Bēngbe Bētsábioye nduabuatmēngbíama,

y chē causa chabíama imomna mo obanēngcá, ndoñe binýniñe jtsiyenēse ca —cha tojanábema.

<sup>17</sup> Cach orscana Jesús tojanontšé entšanga jábuayenama: “Bēngbe Bētsabe amēndayana ya echanjóshjango. Ngménaca šmochtenójuaboye tšēngaftangbe bacna soyēngama y chca amana šmochtsajbaná ca.”

*Jesús tojánachembo canta boyabásenga beonga ashebuánayēnga cha chamuastama*

*(Mc 1.16-20; Lc 5.1-11)*

<sup>18</sup> Canye te, Jesús chē Galilea uafjajónaye tsachajana yojtsaye y ndeolpe uta boyabásata tojanýe: canya yojamna Simón, chē Pedro cánaca uabainá, y chabe uabentsá Andrés. Chatna atarraíeshangá ibnetsashbuétsetšañe, er beonga ashebuánayata ibnamna.

<sup>19</sup> Jesús tojanéyana: “Atšeftaca mabata; atše cbochanjábíama Bēngbe Bētsabíama entšanga anguayata, y morscana nye beonga ashebuánayata ya ndoñe quešochátmēna ca.”

20 Cachora chatbe atarraiešhangá cachcá tbojésanaboshjuana y Jesús tmojanasto.

21 Y más chcoye, Jesús inye uta catšátata tojánanýe: Santiago y Juan, chë Zebedeobe uaquiñata. Chata ibojtsomñe canýe barquëshañe, chatbe taitáftaca, chëngbe atarraiešhangá atapórmayiñe. Jesús tojánachembo,

22 y cachora chë barquësha tbojésanaboshjona, chë taitá cachentše imojéseboshjona y Jesús tmojanasto.

### *Jesús ba entsanga yojanabuatambá y yojánashnaye*

*(Lc 6.17-19)*

23 Jesús nýets Galilea luarējana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe amëndayama entsanga yojanabuayiyiná y nýetsca šocanëngama y tsetšanëngama yojánashnaye.

24 Nýets Siria luarējana entsanga cha imojtsebáyana. As entsanga nýetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nýetscanga yojánashnaye.

25 Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chengunoicana Jesús imojústona.

## 5

### *Ndayá Jesús tjoca tojanabuatambá*

1 Jesús chë mallajta entsanga tojánanýe ora, batsjoye tojántsjua y tojanótbema. Chabe ústonënga tmojanobobconá y

2 Jesús tojanontsé mëntšá jabuátambana:

### *Ndëmuanýënga imomna chë ndegombre oyejuayana bomnënga*

*(Lc 6.20-23)*

3 “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mochtsiyenënga.

4 “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

5 “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjóyëngacñe.

6 “Puerte oyejuayënga mochántsemna chë nýetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nýetsca soyënguiñe tšabá jamama bošënga mochanjobenaye jëftsinýana lempe ntšamo tmojtsebošcá.

7 “Puerte oyejuayënga mochántsemna chë ínýëngbiana ongmiayënga, er Bëngbe Bëtsá chëngbiana bochanjóngmia.

8 “Puerte oyejuayënga mochántsemna chë nýe tšabe juabnënga ainaniñe bomnënga; chënga Bëngbe Bëtsá mochanjinýe.

9 “Puerte oyejuayënga mochántsemna chë nýetscanga natjëmbana chamot-siyenama amënga, er chënga Bëngbe Bëtsabe básenga ca mochantsabaina.

10 “Puerte oyejuayënga mochántsemna chë ínýënga tmojama chamot-sesufrinënga, ntšamo Bëngbe Bëtsá yobošcá bétsamama; chca entsanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyánguango y chacmojtsëcamena ora y nyetscna soyëngaca chacmojtsëbuayatsenaye ora, atšbe ústonënga bëtsemnama.

12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjanienëngbioye entšanga monjanëcamena ca” —Jesús tojánayana.

*Ošbuáchiyënga jtsemnana mo tamocá y binÿnayënga quem luarentša entšangbiana*

*(Mc 9.50; Lc 14.34-35)*

13 “Tšëngaftanga, quem luarentša entšanga jtsëjabuáchanëse šmojtseyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondónbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntsoservénana; chíyeca chë tamó tsáshenoye jtsëtšenana y entšanga jtsebotájayana.

14 “Tšëngaftanga, ntšamo tšabá yomncá šmojtseyenëse, as quem luarentša entšangbiana šmochántsemna mo chë ibetiñe tojtsebínÿna soycá. Canÿe bëtš pueblo batsjo juatsbuañe tomnëse, ndoñe ntsopodénana iytëmencá jtsemnama.

15 Canÿe uajuinÿanësha tcojuajuinÿena ora, ndoñe cajonëshe tajsoye jtsabuájuama, sinó tšbanánoca juajájuama, chca, nyetsca entšanga chë yebnentše tmojtsemnëngbiana chaotsebínÿnama.

16 Cachcá tšëngaftanga, entšangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bëtsemnama ca” —Jesús tojánayana.

*Chë Moisesbe leyama Jesús tojanabuatambá*

17 “Ndoñe šmattsejuabnaye, ntšamo Moisesbe leyinë iuayancá y chë Bëngbe Bëtsabe juabna oyebuambnayënga tmojanayancá jabëtseepochocama atše tijabo ca. Atše ndoñe chiyátabo chë soyënga jabëtseepochocama, sinó jabábuayenama ndayá chë soyënga ndegombre bëtšayanama.

18 Ndegombre šcuayana: Celoca y quem luare chaojtsemnëntscuana, ndocná queochatobenaye ni canÿe punto, ni canÿe letra chë leyënguentshana jtsejuánana, lempe ntšamo jochnënguama yomncá chaojtsemnëntscuana.

19 Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabu-atambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna.

20 Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

*Ndayá chë ínÿengaftaca tbojetnama Jesús tojanabuatambá*

21 “Tšëngaftanga šmojouena ntšamo Bëngbe Bëtsá tšëngaftangbe bëtš taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca.’

22 Pero atše šcuayana, nda cachabe catsátaftaca tbojetna, chánaca bontsemna jobuambayana chë entsangbiama tšabá o ndoñe tšabá tmonjamama endbayanabe delante, ndáyeca chca ca. Nda cachabe catsátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catsatbiama opjema ca tojayana, ntšamo cha bétsamama, cha bontsemna chë infiernoca íñeshoye jama.

23 “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catsata ácaftaca etonaná yojtsemna ca,

24 as chë tcojiyëbo soye chë altarentša natsanoica cochjéseboshjona, cochtá y acbe catsátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

25 “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšiñe cmochanjáboshjona y chënga cárceloye cmochanjutame.

26 Ndegombre cbëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

### *Chë boyá o shémbioye ínÿaftaca íngñayama Jesús tojanabuatambá*

27 “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’

28 Pero atše cbëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbioye tbojtseingñé.

29 “Chíyeca, nderado acbe catsábioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtšena. Nÿets cuerpo jtsebomnana y lémpca infiernoje jama chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé.

30 Nderado acbe catsábioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nÿets cuerpo jtsebomnana y lémpca infiernoje chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

### *Chë bouamnata enëtšanama Jesús tojanabuatambá (Mt 19.9; Mc 10.11-12; Lc 16.18)*

31 “Mëntšánaca leyíñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiiyana, ndayëchañe chaotsayana cha ya ndoñe chabe shema yontsemna ca.’

32 Pero atše cbëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útsena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

### *Chë entsanga júrayama Jesús tojanabuatambá*

33 “Tšëngaftanga šmojouena ntšamo tšëngaftangbe bëts taitángbioye tmonjanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’

<sup>34</sup> Pero atše cbéyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna.

<sup>35</sup> Ni quem luarama, er Bëngbe Bëtsabiamama mo tšenëtemcá endmëna, chiñe chabe shecuatsënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo.

<sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjénashe ftsenguëshe o fjantsëshe jabemana.

<sup>37</sup> Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe. Ndayá chentšana más šmojatichamo soye, Sataanásbocana jtsóbocanana ca” —Jesús tojánayana.

*Chë entsanga mondbátenachnënguama Jesús tojanabuatambá  
(Lc 6.29-30)*

<sup>38</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuhjatsëca, ácnaca derecho contsebmna canyebé cha jëtsbuchjátsëcama ca; y nderado nda canye juatsaše tcmojtsásiye, ácnaca derecho contsebmna cányëse cha jtašiyama ca.’

<sup>39</sup> Pero atše cbéyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catšbioica tcmojajuebjantšetase, cochjomiye chë ínñoica cachcá chacmomama.

<sup>40</sup> Nderado nda tcmojademanda y tojtseboše acbe shabuanguanëjua jtsabocñama, cha molesenciá acbe quëfsaiyanaca chauetsácñama.

<sup>41</sup> Nderado nda tcmojuasmá y tcmojamanda bnëtsana cuadroca juyambama, inye bnëtsana cuadro cochjuyamba.

<sup>42</sup> Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtsoye catjaquéda ca” —Jesús tojánayana.

*Chë uayayëngbiama bonshánana jtsebmnanana  
(Lc 6.27-28, 32-36)*

<sup>43</sup> “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’

<sup>44</sup> Pero atše cbéyana: Tšëngaftangbe uayayënga šmochtsababuányëshana, y chë cmëcamenëngbiama Bëngbe Bëtsá šmochtseimpadana.

<sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entsángbeñe chabe shinye chaotsebinýnayama, y endbëtsama chë nyetsca soyënguiñe tšabá jamama bošënga y ndoñe chca entsángbeñe chauaftema.

<sup>46</sup> Tšëngaftanga nye chë tšëngaftanga tcmojtsababuányëshanënga šmojttsababuányëshanëse, ¿Bëngbe Bëtsábocana ndayá šmochjuacaná? Romocama crocénana entsángbioye atjanayëgnaca chca monduamana.

<sup>47</sup> Y nye chë amiguëngbioye šmojttsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama.

<sup>48</sup> Tšëngaftangbe Taitá, Bëngbe Bëtsá celoca endmëná, nyetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

## 6

*Jesús tojanabuatambá ntšamo tšabe soyënga ínýengbiama jamana*

<sup>1</sup> “Cuedado šmochtsebmna ndoñe ntsamama entsángbeñe tšëngaftangbe tšabe soyënga, nye chënga chca chamuinýama. Chca šmojamëse,



tšëngaftangbe Taitá, Bëngbe Bëtsá, celoca endmënë ndocna uacanana soye quecmochtétatšataye.

<sup>2</sup> “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyetscanga chamotsetatšëmbuama, mo canye trompetëfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinjinynayënga, chë judiëngbe enefjuana yebnënguenache y tsáshenañe. Ndegombre cbéyana, chë chca amënga ya chëngbe uacanana soye tmojóyëngacñe, ntšamo chënga tmojamama entšanga tšabá chëngbiama tmojtsoyebuambná ora.

<sup>3</sup> Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catsbioica cucuatše tojtsamama,

<sup>4</sup> chca, acbe caridá iytëcana chaotsemnama. As, tšëngaftangbe Taitá, nda bominye endbëtsequëcnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

*Jesús tojanabuatambá ntšamo Bëngbe Bëtsáftaca jencuéntana  
(Lc 11.2-4)*

<sup>5</sup> “Bëngbe Bëtsáftaca šmojtsencuénta ora, ndoñe šmattsama chë bacna entšanga ntšamo ndegombre tmojuabnacá ndinjinynayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tséntsaca Bëngbe Bëtsáftaca jtsencuéntayana, chca, nye entšanga chë soye chamuinjama. Ndegombre šcuayana: chënga nye morscama ya montsábouacanana, chënga tšabá imojtsama ca entšanga tmojayana ora.

<sup>6</sup> Pero aca Bëngbe Bëtsáftaca jencuéntama orna, acbe tsoye cochtamáshëngo, bësáša cochtatame y cháftaca cochjencuénta. Chánaca chë iytëmentšë ácaftaca echántsemna. Bëngbe Taitá lempe bominye endetsequëcná, masque cányënga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bëngbe Bëtsáftaca šmojtsencuénta ora, ndoñe nye cachcá ndoservena palabrënga ba soye šmattsichamo. Chca mondbétsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca.

<sup>8</sup> Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá.

<sup>9</sup> Chamna tšëngaftanga mëntšá cmontsëtocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

<sup>10</sup> Acbe amëndayana chaóshjango.

Celoca yojtsemna ntšamo icobošcá;  
quem luariñnaca cachcá chaotsemna.

<sup>11</sup> Mënté šmiyatšatá cada te šnetsëjaboto tandëse.

<sup>12</sup> Bacna soyënga bënga fsënjama: šmotsaperdónaye;

cachcá ntšamo chë bëngbiama bacna soyënga amënga fsëndbetsaperdonaycá.

<sup>13</sup> Bacna soyënga jamama šojocohëngo ora, šcochjubahuache chca nde-nobuíyama.

Nyetsca bacna soyënguentšana šmatsebacaye.

<sup>14</sup> “Chë tšëngaftangbiama bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

15 Pero chë tšëngaftangbiana bacna soyënga amënga ndoñe šmointsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

*Chë Bëngbe Bëtsáftaca jencuéntama tondaye ntjascá*

16 “Y nderado tšëngaftanga inye ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinýinýnayënga mondbetsamcá, as chca, chënga imojsayúnama entšanga chamuinýama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora.

17 Aca nderado tcojtsayúna ora, cochtsojuebjabebye y aceitíyeca botamana cochtenochquëca,

18 as chca, entšanga ndoñe chamondëtsetatsëmbo aca tondaye ntjascá cojtsemnama. Nye acbe Taitá, lempe chë mo iytëmencá yomna soyëngama tatsëmbuá, chama echántsetatsëmbo. Y cha, chë iytëmencá tcojama soye bominye endbetsequëcjayá, acbe uacanana soye cmochántatštaye ca” —Jesús tojánayana.

*Chë celoca bomnana  
(Lc 12.33-34)*

19 “Bomnana quem luarentše ndoñe šmattsëjuabaye. Muentšna chë mejojón y inye pochócaye soyënga lempe jtsendbiamana, chë atbëbanënga jtsamashjana y chë juabana soyënga jesatbëbana.

20 Más tšabá tšëngaftangbiana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inye pochócaye soyënga acbe soyënga quemochat-spochóca, ni atbëbanënga quemochátamashjna jatbëbama.

21 Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

*Chë cuerpama uajuinýanësha  
(Lc 11.34-36)*

22-23 “Acbe bominye tšabá totsomñëse, mo canye uajuinýanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominyëca jtsonýayana. Chë bominye ndoñe tšabá tontsemnësna, chë bominye tondaye ntsoobenana jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

*Chë Bëngbe Bëtsabiama bonshánana o chë nye quem luarentša soyënga jtsebošana*

*(Lc 16.13)*

24 “Ndocná ntsoobenana uta mandayata jtsaservénana: cánýabioye bochantśaboyënja y chë ínýabioyna bochántsebobonshana, o cánýabiana tšabá echántsetrabajaye y chë ínýabiamna ndoñe tšabá. Ndoñe quecátobena Bëngbe Bëtsá jtsebobonshánana, nye quem luarentša soyënga jtsebomnama yapa tcojtsebošëse ca” —Jesús tojánayana.

*Bëngbe Bëtsá chabe básenga jtsanýenana  
(Lc 12.22-31)*



25 “Chcasna atse šcuayana: Ndoñe šmattsenócochinÿena ndayá smochjase o smochjofsiye vida jtsebomnama, ni ndaye entsáyá smochjuíchëtjuama cach ndoñe. Ndegombre, vida chë sanama más enduámana y cuerpo chë entsáyama más.

26 Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnat-squëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšetëmëngbiana puerte más šmonduámana!

27 Masque chca endmëna, canÿa masque tša tojtsenócochinÿena, ¿ntšamo nanjobenaye jamana chë ntsachetšá vida yochtsebomnentšana, canÿe hora vida más jabotiyana?

28 “Y ndayá smochjuíchëtjuama, ¿ndáyeca šmojtsenócochinÿena? Smochjinÿe chë jajañe lirio uantšëfjushangá jtsajuajnana: ndoñe ntsetrabájayana, ni ntsheshabiannayana.

29 Pero atse cbéyana, ndegombre ni mo Rey Salomón nÿetsca chabe bomnánaca nÿetšá botamana mo chë lirio uantšëfjushangacá quenjat-spormana.

30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámnaca Bëngbe Bëtsá echanjama entsáyá chašmotsábomnama, jentsanga nÿe batšá Bëngbe Bëtsábeñe ošbuáchiyënga!

31 Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’

32 Chë soyëngama, chë Bëngbe Bëtsábioye nduabuátmënga mondbëtsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endëtatšëmbo.

33 Chiyeca, tšëngaftangna natsana smochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá smochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátšataye.

34 Ndoñe matenócochinÿenana ndayá yëfse yochjochnënguama. Yëfse luare cochántsebomna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

## 7

### *Ndoñe ntsichámuana chë ínÿënga tšabá o ndoñe tšabá tmonjamama (Lc 6.37-38, 41-42)*

1 “Ndocá ínÿëngbiana šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca.

2 Chë ntšamo tšëngaftanga ínÿëngbiana šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiana chë ntšamo šmojamama echántichamo. Y ntšamo ínÿëngbioye chašmojábiana, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiana.

3-5 “Nderado canÿa chabe bominiñe canÿe niñëfja tojtsebomnëse, cha ndoñe ntsoebenana chabe catšata jauyanama: ‘Acbe bominiñentšana canÿe polvështema jtsebujátsëcana šmolesenciá ca’. Natsana cha bontsemna cachabe bominiñentšana chë niñëfja jtsenobuchjátsëcana tšabá jinÿama jobenayama, chabe catšatbe bominiñentša polvështema jtsebujátsëcana. Cachcá entsemna acbiana, ¡bacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojauyana ora,

cach aca tša bēts bacna soyēnga cojtsamama ntjenajuaboycá; y chca, aca jamana canye bacna soye. Natsana cmontsemna chē cach aca ndoñe tšabe soyēnga cojtsamama ngménaca jshatenójuaboyana y chca amana jtsajbanana, y chentsana cocayé cochantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chē Bēngbe Bētsabe soyēngama josértama ndēboše entsānga ndoñe šmattsabuayiyayē. Aíñese nántsemna mo chē Bēngbe Bētsabe bēts yebnoca uátšēmbona mēntšena quešēnga cuaftsēbuajocá; chorna chēnga jobuértanana, jobotjajuana y jtsáshantsana. O mo chē uámana ndētšētémēnga cotsēngbioye cuaftsētšancá, chēnga nye jtsebotájayana ca” —Jesús tojánayana.

*Smochjotjañe, smochjánguango y smochjachembo*  
(Lc 11.9-13; 6.31)

<sup>7</sup> “Smochjotjañe y Bēngbe Bētsá cmochanjátšataye; smochjánguango y smochanjínñena; smochjachembo y bēsásā cmochanjébētafjo.

<sup>8</sup> Er ndánaca tojtsotjanañá, jóyēngacñana; y nda tojtsenguá cha, jónñenana; y nda tojtsechembuanábioye jebiatēfjuana.

<sup>9</sup> “¿Ndēmuanñe boyabása tšēngaftanguentšá, canye tandēse chabe uaquiñá tbojtsotjanañe ora, canye ndētšbé chábioye buanjatštaye?

<sup>10</sup> ¿O canye mētšcuaye buanjatštaye, beona tbojtsotjanañe ora?

<sup>11</sup> Y chca, tšēngaftanga, bacna soye amēnga, tšēngaftangbe basetémēnga tšabe soyēnga jatšatayama šmojtsamanēse, ¡más tšēngaftangbe Taitá, Bēngbe Bētsá celoca endmēná, chē tmojtsotjanañēnga tšabe soyēnga echanjátšataye!

<sup>12</sup> “Inyēngaftaca smochtsama ntšamo chē ínñyēnga tšēngaftangftaca chamot-samama šmojtsebošcá. Chca endmēna ntšamo Moisesbe leyíñe y chē Bēngbe Bētsabe juabna oyebuambnayēngbe buatēmbana soyēnguiñe endayancá ca” —Jesús tojánayana.

*Chē base utēntšá bēsásā*  
(Lc 13.24)

<sup>13</sup> “Chē base utēntšá bēsásajana smochjámashjna. Chē utēntšá bēsásajana y chē paselo jóyēnama benache, infiernoye cmochanjuánatse y banga chējana monámashjuana.

<sup>14</sup> Chē tšabe vida binñnoye jamna base utēntšá bēsásajana endmēna y ndoñe paselo jóyēnama benache, y chiñe báseftanga mondbínñena.

*Chē Bēngbe Bētsabe ndoñe ndegombre juabna oyebuambnayēnga*  
(Lc 6.43-44)

<sup>15</sup> “Cuedado smochtsebomna chē Bēngbe Bētsabe ndoñe ndegombre juabna oyebuambnayēngbiama. Chēngna mo oveshēngcá tšēngaftangbioye mochanjabo, pero ndegombre chēnga mondmēna mo tšátjaye tjañe quešēngcá.

<sup>16</sup> Tšēngaftanga betiyēnga jtsabuatmana ntšamo cada ona tojtseshajcá; cachcá tšēngaftanga chcanga smochantsēbuatma, ndayá chēnga mochtsamama. Uchmašēshe betiyentšana ndoñe uvas ntjuátatabiana, ni higuēbé cardo betiyentšana.

<sup>17</sup> Chca, nyētsca tšabe betiyíñe tšabe soye jashájonana; y chē ndoñe tšabeshiñna podesca soye.

<sup>18</sup> Canye tšabe betiyíñe quenátopodena podesca soyēnga jashájonana, ni canye ndoñe tšabe betiyíñe tšabe soyēnga jashájonana.

<sup>19</sup> Ndaye betiye podesca shajuanēshe jtseshatētšana y iñnoye jtsatmetšana.

<sup>20</sup> As chca tšēngaftanga chēnga smochantsēbuatma, ndayá chēnga mochtsamama ca” —Jesús tojánayana.

*Bëngbe Bëtsabe amëndayoye ndoñe nyetscanga jamashjnana*  
(Lc 13.25-27)

<sup>21</sup> “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe.

<sup>22</sup> Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, áceñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentšana fsëndëtabocana, y ácbeyeca bëts soyënga fsëndama ca.’

<sup>23</sup> Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’ ” —Jesús tojánayana.

*Chë uta ucuatjoniñe*  
(Mc 1.22; Lc 6.47-49)

<sup>24</sup> “Chcasna, nda atše šojoyeuná y chë ntšamo sëntsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna yojajebo.

<sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtšbeñe inajéboyeca.

<sup>26</sup> Pero nda atšbe palabra tojouena y ntšamo sëntsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo.

<sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entšanga ojanánënga imojtsemna ntšamo cha tojánabuatambama.

<sup>29</sup> Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

## 8

*Jesús, canya bacna nguayanánaca šocábioye tbojanshná*  
(Mc 1.40-45; Lc 5.12-16)

<sup>1</sup> Jesús tjoicana tojtantsmá ora, ba entšanga tmojanasto.

<sup>2</sup> Chora canye boyabása bacna nguayanánaca šocá Jesúsbioye tojanobeconá, chabe delante yojoshamentsiye y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

<sup>4</sup> Jesús chë shnanábioye tbojaniyana: —Mouena, ndocnábeñe cattse-cuëntaye; nye chë Jerusalenoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatšëmbona mora aca ya ndoñe šocá contsemnama ca —Jesús tbojaniyana.

*Jesús canye Romano soldadëngbe amëndayabe bochichnayábioye tbojanshná*  
(Lc 7.1-10)

<sup>5</sup> Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama.

<sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniana: —Señor, atše mercedo tait-satobuajoñe atšbe yebnentše chacuamashënguama; nÿe mayana y atšbe bochichnayá tšabá echántsatsmëna.

<sup>9</sup> Atšbioye mándayënga atše sëndábamna y átsnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjaná y chë ústonënga tojanëyana: —Ndegombre cbëyana, ni mo nÿets Israelentše ni canÿa quem boyabasacá Bëngbe Bëtsábeñe nÿetsá ošbuachiyá chiyátinÿena.

<sup>11</sup> Y šcuayana, shinÿe bocanoicana y shinÿe uenatjëmbambanoicana bëtscá entsanga mochanjabo, y Abraham, Isaac y Jacob, chë judiëngbe temp-sca uámana bëtš taitángaftaca mochanjotbiana Bëngbe Bëtsabe amëndayoca, cánÿiñe juasama.

<sup>12</sup> Ba Israeloca entsanga, chë ndëmuanÿengbiana Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infiernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojaniana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojsatsmëna.

*Jesús, Pédrëbe uambén mamábioye tbojanashná*  
(Mc 1.29-31; Lc 4.38-39)

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracca yojtsejutsnajona.

<sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšë chënga jobuácuedana.

*Jesús ba šoquënga tojanashná*  
(Mc 1.32-34; Lc 4.40-41)

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná.

<sup>17</sup> Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

*Chë Jesús juastama bošënga*  
(Lc 9.57-62)

<sup>18</sup> Jesús tojánanÿe mallajta entsanga chabe shëconana; as tojanmandá uafjajónaye chenguana jama.

<sup>19</sup> Chorna, canÿe ley abuatambayá Jesúsbioye tbojanobobeconá y tbojaniana: —Buatëmbayá, atše sëntseboše aca juastama, ndëmoye chacojtsá choye ca.

<sup>20</sup> As Jesús tbojaniana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

<sup>21</sup> Chora inÿa, cach uatsjendayënguentsá, Jesúsbioye tbojanianyana: —Bëngbe Utabná, šmolesenciá atšbe taitá chjshesabotbontsañe ca.

<sup>22</sup> Chora Jesús tbojanjuá: —Nÿe šmasto. Chë Bëngbe Bëtsabiamama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

*Jesús chë binÿia y chë béjaye bonguana yojëtsbema*  
(Mc 4.35-41; Lc 8.22-25)

<sup>23</sup> Chentšana Jesús canÿe barquëshoye tojánamashëngo y chabe uat-sjëndayënga imojtsetjëmbambnaye.

<sup>24</sup> Ndeolpe tša jabuache binÿia chë uafjajónaye béjajiñe yojóshjango; nÿetsá jabuachana yojtsemna, chë olëshënga barquëshama imojtsëtsbotsana. Y Jesús chora inétsomañe.

<sup>25</sup> As chabe uatsjëndayënga tmojána Jesús jetsefšenama y tmojanianyana: — ¡Bëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanëyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë búyeshe bonguana chaotsatsmënema, y lempe natjëmbana yojsatsmëna.

<sup>27</sup> Chabe uatsjëndayënga ojnanánënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

*Chë Gadara luaroca entšata, bacna bayëjbe juabna uambayata*  
(Mc 5.1-20; Lc 8.26-39)

<sup>28</sup> Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entšanga ndoñe ntšobenana chëjana jtsachnjëuanana;

<sup>29</sup> y chora tbojanontsé chë bacna bayëjëngbeyeca mëntsá uayebuáchana: — ¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufriima, chama cabá ndoñe chë tempo yontsemna ora ca?

<sup>30</sup> Chentša béconana ba cotšënga imnajena y chënga imnétsosañe.

<sup>31</sup> Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanëyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojsatajo.

<sup>33</sup> Chora chë cotšënga anÿenënga tmojtsanacheta, y chë puebloye tmojánashhajna ora, tmojanontsé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca.

<sup>34</sup> Chora nÿetsca entšanga chë pueblentšana tmojánbocana y Jesús yojsatsemnoye tmojána. Chë entšanga Jesús tmojáninÿe ora, tmojanimpadá chë luarentšana chaueseboconama.

## 9

*Jesús, canÿe jama ndobenábioye tbojanshná*  
(Mc 2.1-12; Lc 5.17-26)

<sup>1</sup> Chca tojanopasá chentšana, Jesús canÿe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango.



<sup>2</sup> Chora, canye jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninye chënga tša imojtsošbuáchema chë šocábioye jáshnama cha bétsobenama; as chë šocábioye tbojaniana: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuátambayënga chentse imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamá; mo chábioye cuafjoyenguangá entsemna ca.”

<sup>4</sup> Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndáyeca nyetsá bacna juabnënga ainaniñe šmojtsebmoma ca?”

<sup>5</sup> ¿Tšëngaftangbiamá ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’?”

<sup>6</sup> Atše cbochanjínÿanÿiye ntšamo chë Bëngbe Bëtsá Entšá tbojanbemá quem luarentse mando yobomnama, entšanga bacna soyëngama jáperdonama ca” — Jesús tojanëyana.

As chë jama ndobenábioye tbojaniana: “Matëtsbaná, acbe tjuashe mesocñe y acbe yebnoye motsatoñe ca.”

<sup>7</sup> Chorna chë jama ndobená tojtantsbaná y cachabe yebnoye yojtsatoñe.

<sup>8</sup> Chca tmojáninÿama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

*Jesús, Matéobioye tbojanchembo chabuastama  
(Mc 2.13-17; Lc 5.27-32)*

<sup>9</sup> Jesús chentšana tojtsanoñe y canye entšábioye tbojáninÿe, Mateo ca uabainá, chë Romocama impuesto entšángbioye atjanayentse inétsotbemañe. Chora Jesús tbojaniana: “Smasto ca.” As Mateo chentšana tojëftsantsbaná y tbojanasto.

<sup>10</sup> Jesús cach Mateobe yebnentse yojtsesaye ora, banga Romocama impuesto entšángbioye atjanayënga y ínÿenga bacna soye amënga tmojánashjajna y mesëshentse Jesús y chabe uatsjëndayëngaftaca imojotbiamá.

<sup>11</sup> Chë fariseunga chca tmojáninÿe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga aíñe.

<sup>13</sup> Smochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuëntama tondaye saytescama  
(Mc 2.18-22; Lc 5.33-39)*

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

<sup>15</sup> As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga

tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

<sup>16</sup> “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana.

<sup>17</sup> Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chiyeca comna, chë tojtseshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma Jairëbe bembetema cháuatayenama*

*(Mc 5.21-43; Lc 8.40-56)*

<sup>18</sup> Jesús entsanga yojsëtsësnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojoshamentsiye. Chë mandayá tbojanianyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentšana Jesús y chabe uatsjëndayënga chë mandayá tmojanasto.

<sup>20-21</sup> Imojtsaye ora, canye shembása stëtsoicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nÿe mo chabe entsáyá sibiájua chaijuábojajo, salud chantinÿena ca.” Chentšana chë šocá Jesusbe entsáyá tojanábojajo.

<sup>22</sup> Tojanábojajo ora, Jesús tojanobuértana, chë shembásabioye tbojáninÿe y tbojanianyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatmëna ca.” Y cach orscana cha tšabá yojsatsmëna.

<sup>23</sup> Chënga tmojtëtanontsé ayana y chora chë mandayábioca chënga tmojánashjajna. Chentše Jesús tojánanÿe, ínÿengna chë veloriana imojtsanflautaye y ínÿengna tša imojtsošachiye.

<sup>24</sup> Chora Jesús tojanëyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entsanga Jesúsbioye nÿe imojtsáfchaye.

<sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná.

<sup>26</sup> Y nÿets chë luarëjana ndayá Jesús yojamama nÿetsca entsanga imojátatsëmbona.

*Jesús uta jtanata tojanashná*

<sup>27</sup> Jesús chentšana tojëftsanbocna ora, uta jtanata tbojanasto y mëntšá ibojtsaiuáyebuache: —¡Davídbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatsëmbo ca.

<sup>31</sup> Pero chata chentšana tbojëftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.



*Jesús, canye ndëbiábioye tbojanshná*

<sup>32</sup> Chë jtanata ibojtsebocanëntscuana, básefta entsanga canye ndëbiá, bacna bayëjbe juabna uambayá, Jesúsbioye tmojanamba.

<sup>33</sup> Jesús chë bacna bayëja chábentšana tbojtánabocna y cachora chë ndëbiá tojtanontsé oyebuambnayana. Entsanga ojnánánënga imojtsichamo: “¡Ndocna te Israelentse chca bëts soye chemuáisinÿe ca!”

<sup>34</sup> Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjenga entsángbentšana jtëbuacanama ca.”

*Jesús entsangbiama tbojanongmé*

<sup>35</sup> Jesús nÿetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entsanga yojtsabuátambaye. Yojanabuayiná chë tsabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye.

<sup>36</sup> Y chë entsanga tojánanÿe ora, puerte tbojanongmé. Er chënga imojtsemna mo abujajënÿa ndbomna oveshëngcá, puerte uamëntsnayënga ba soyëngama padecena causa, y chaujúbuachama ndocná ntsebomncá.

<sup>37</sup> Chora chabe uatsjëndayënga tojanëyana: “Canyë bëts jajañe bëtscá játbanama entsemna, pero peonga nÿe báseftanga. Cachcá quem luarentse, bëtscá entsanga Bëngbe Bëtsábioye nduabuátmënga montsemna, y chëngbioye chabiamá abuyayinayënga nÿe báseftanga.

<sup>38</sup> Peonga tmojtsashbenëse chë nduñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuyayinayënga chauichamoma, quem entsanga chábioye chamúbuajama ca” —Jesús tojanëyana.

**10***Jesús chë bnëtsana uta uatsjëndayënga tojanabacacá*

(Mc 3.13-19; Lc 6.12-16)

<sup>1</sup> Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entsángbentšana jtabocnama y nÿetsca šocanëngama y tsetšanama jashnayama.

<sup>2</sup> Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata;

<sup>3</sup> Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo;

<sup>4</sup> Simón, chë celote ca uabobainá y Judas Iscariote, chë uayayëngbe cucu-atšinë Jesúsbioye boshjuaná.

*Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama*

(Mc 6.7-13; Lc 9.1-6)

<sup>5</sup> Jesús chë bnëtsana uta boyabásenga tojanichamó chë tsabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentse Samaria luaroca ndoñe šmatjéftsamashjna.

<sup>6</sup> Nÿe Israeloca pueblëngoye šmochjá. Choca entsanga mo ótsena oveshëngcá montsemna, Bëngbe Bëtsábioye corente nduabuatma causa.

<sup>7</sup> Smochjá y entsanga šmochjábuayenaye Bëngbe Bëtsabe amëndayana echanjóshjanguama.

<sup>8</sup> Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entšángbentsana šmochtábocna. Chë obenana šmonjójëngacñe tondaye ntjëtsjajuacá; cachcá, chë soyënga šmojtsamama tondaye entšanga šmattsayëngacaye.

<sup>9</sup> “Ndoñe šmattsambaye crocénana uasnanëchiñe.

<sup>10</sup> Ni shecnaja sanaca benachiñama, ni inye entšayá jtsenomódama, ni shecohëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jójëngacñama.

<sup>11</sup> “Nderado canye bëts pueblentse o base pueblentse chašmojášhjajna ora, šmochjánguango canye tšabe entšá, ínëngbioye ndaingñayá, y chabe yebnentse šmochtsoquedañe, inye puebloye játantscuana.

<sup>12</sup> Canye yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

<sup>13</sup> Chë yebnentša entšanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nye cach tšëngaftangftaca chaotsomñe.

<sup>14</sup> Y nderado canye pueblentse o bëts pueblentse chë entšanga ndoñe tcmonjúbuaaja y ndoñe tcmonjójyaunase, chentšana šmochjésebecana y chë shecuatšentša polvëshe šmochjésenstoto. Chca, chë entšanga mochántsetatsëmbo chënga tšëngaftangftaca ndoñe tšabá tmonjamama.

<sup>15</sup> Ndegombre šcuayana, quem luare jopochócama te, chë ndoñe chacmonjúbuaaja y ndoñe chacmonjójyauná entšanga Bëngbe Bëtsá puerte jabuache echantsacastígaye, y chë bacna entšanga Sodoma y Gomorra luaroquëngna ndoñe nja nyetšá jabuache queochatacastígaye ca” —Jesús tojánayana.

### *Ntšamo chë uatsjëndayënga mochjansúfria*

<sup>16</sup> “Šmochjouena. Atše cbontsachamná mo oveshënga cuenta tjañe quešëngbeñe. Chýeca studio bomnënga mo mëtscuayëngcá šmochtsemna y uamanënga mo palomatemëngcá.

<sup>17</sup> Entšangbiamama cuedado šmochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye.

<sup>18</sup> Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamama šmotatšëmbcá jójëbuambayama.

<sup>19</sup> Pero chë mandadëngbe cucuatšinë chacmojábashejuana ora, ntšamo o ndayá šmochjayanama ndoñe šmattsenócochinjëna. Chca orna, Bëngbe Bëtsá tšëngaftanga cmochanjabuayená ntšamo o ndayá jójëbuambayama.

<sup>20</sup> Tšëngaftanga ndoñe chë oyëbuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsójëbuambnaye.

<sup>21</sup> “Y canye entšá cachabe catšátbioye uayayëngbe cucuatšinë bochanjáboshjona chamotsóbama; y canye taitá cachabe uaquiñábioynaca. Y chë básënga chëngbe bëtsëtsangbe contra mochántsemna y uayayëngbe cucuatšinë mochanjábashhejuana chamotsëbáyama.

<sup>22</sup> Tšëngaftanga atšbe ústonënga bëtsemnama, nyetsca entšanga cmochantsëbuayënja; pero nda nyets tempo átšbeñe ošbuachiyá chaotsomñá, atsbocaná echántsemna.

<sup>23</sup> Canye pueblentse chacmojtsécamena ora, inye puebluye smochtsacheta. Ndegombre cbéyana, Israelentša nyetsca pueblëngoye cabá nda ora, chë Bëngbe Bëtsá Entsä tbojanbemá ya quem luaroye echanjabáshjango.

<sup>24</sup> “Ni canye uatsjendayá chabe buatëmbayabiama más uamaná ntsemnana, ni chë oservená chabe nduiñbiama más uamaná.

<sup>25</sup> Chë uatsjendayá ya cachabe buatëmbayacá jtsemnana tojashjáchëse, ndayá más nanjásboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntsamo chënga tšëngaftanga cmochtsëbobuatma ca?” —Jesús tojanëyana.

*Nda ndegombre cuantsebiauatja  
(Lc 12.2-7)*

<sup>26</sup> “Chíyeca entsangbiama ndoñe matauatjëngana. Chë yoiytëmena soyentšana tondaye ntjinýcá queochaisoquéda, y chë ndótatsëmbo soye, ntsotatsëmbcá queochaisoquéda.

<sup>27</sup> Chë mora cbontsëtsëtsná soyënga, chë entsangbiama mo ibetiñe cuaftsemncá soyënga, tšëngaftanga smochjama entsanga botamana chama chamotsetatsëmbuama. Y chë iytëcana cbontsëtsëtsná soyënga nyetsca entsanga smochtsabuayiynaye, mo nda canye yebnentša tsbanánocana noticiënga tojtsayebuachcá.

<sup>28</sup> Ndoñe matauatjëngana nye chë tšëngaftangbe cuerpo japochócama imobenëngbiama y ainana jtsepochócama ndoñe ntsobenana. Más smochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infernoca.

<sup>29</sup> “Uta jaja shloftsetémata nye canye denario crocenánama mondbétsena. Masque chca, ni cányetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse.

<sup>30</sup> Y tšëngaftangbiama, Bëngbe Bëtsá botamana jtsantješnana, y chca, cha lempe tšëngaftangbiama jtsetatsëmbuana, bueta stjënashënga tšëngaftangbe bestšašinë yomnámna.

<sup>31</sup> Chíyeca ndoñe matauatjëngana, tšëngaftanga ba jaja shloftsetémëngbiama corente más šmonduámna ca” —Jesús tojanayana.

*Ndabiama Jesucristo yochjayana chabe entsá yomna ca  
(Lc 12.8-9)*

<sup>32</sup> “Nda atšbe entsá yomna ca entsangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entsá yomna ca.

<sup>33</sup> Pero nda entsangbe delante atšbe entsá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entsá ndoñe yondmëna ca” —Jesús tojanëyana.

*Jesusbe causa, entsángbeñe más jtsentsjanayana  
(Lc 12.51-53; 14.26-27)*

<sup>34</sup> “Ndoñe šmattsejuabnaye atše quem luaroye tijabo nyetsca entsanga natjëmbana chamotsiyenama. Atše chama ndoñe chiyátabo; atše sënjabo causa, entsanga más mochántsejtsjanaye.

<sup>35</sup> Atše sënjabo chë uaquiñá cachabe taitabe contra chaotsemnana, chë bembé cachabe mamabe contra y chë bebincuá chabe uambén mamabe contra chaotsemnana.

<sup>36</sup> Y chca, ba entsangbe uayayënga cachëngbe pamíllanga mochántsemna.

<sup>37</sup> “Nda cachabe taitá o mamábioye atšbiamá más tbojtsebobonshánëse, cha ndoñe ntsomerecénana atšbe entšá jtsemnama. Nda cachabe uaquiñá o bémbëbioye atšbiamá más tbojtsebobonshánëse, cha cach ndoñe.

<sup>38</sup> Y nda nyetsca chabe quem luare soyënga ndoñe tonjëseboshjona atše juastama, y atšbiamá jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnama.

<sup>39</sup> Nda tojtsentšena quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atše juastama, masque chaóbana, chë nyetsca tescama yomna tšabe vida echántsebomna ca” —Jesús tojánayana.

### *Chë uacanana soyënga*

*(Mc 9.41)*

<sup>40</sup> “Nda tšëngaftanga chacmojúbuaja, átsnaca cha šochanjofja; y nda atše chašojofja, chë nda šojichmóbioynaca cha bochanjofja.

<sup>41</sup> Nda canye Bëngbe Bëtsabe juabna oyebuambnayábioye tbojoyeuná, cha chca bëtsemnama, chábioye Bëngbe Bëtsá canye uacanana soye bochantatšetaye, mo cach Bëngbe Bëtsabe juabna oyebuambnayabe uacanana soycá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšetaye, mo cach nyetsca soyënguiñe tšabá amabe uacanana soycá.

<sup>42</sup> Y ndánaca, tšëngaftanguentšá canye nduamanábioye masque nye mo base búyeshtema tbojuabatšetá, atšbe ustoná bëtsemnayeca, ndegombre Bëngbe Bëtsá canye uacanana soye chábioye bochantatšetaye ca” —Jesús tojánayana.

## 11

### *Juan chë Ubayanabe ichmónënga*

*(Lc 7.18-35)*

<sup>1</sup> Jesús tojanpochocá chabe bnëtsana uta uatsjëndayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

<sup>2</sup> Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó,

<sup>3</sup> mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínñabiamá jatobátmama ca?

<sup>4</sup> Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinýcá.

<sup>5</sup> Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnëjëmëngbioye chë tšabe noticiënga montsabuyayiná ca.

<sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átsbeñe ošbuáchiyana ndoñe tontsajbaná cha ca! —Jesús tojanëyana.

<sup>7</sup> Chënga tmojtsatanoñe ora, Jesús tojanontšë Juanbiamá chë entšanga jáuyanana, mëntšá: “Juan jinýama šmojánbocana ora, ¿ndayá jinýama chë entšanga ndoyena luaroye šmojánbocana? ¿Canyë entšá ainaniñe tondaye añemo ndbomná, mo canye šëše bínýiaca shatiyeynëscá?



<sup>8</sup> Y ndoñese, ¿ndayá jinŷama choye ŷmojánbocana? ¿Canŷe boyabása uámana entŷayaca bopormaná? Ndoñe. Tŷëngaftanga ŷmondétatŷëmbo chë boyabásenga uámana entŷayaca bopormánëngna chë mándayëngbe yebnënguñe mondbëtsiyenama.

<sup>9</sup> Y asna, ¿ndayama choye ŷmojánbocana? ¿Canŷe Bëngbe Bëtsabe juabna oyebuambnayá jinŷama? Ndegombre, aíñe; y cbëyana, ndegombre cha canŷe Bëngbe Bëtsabe juabna oyebuambnayabiama más bëtsá endmëna.

<sup>10</sup> Cha, Juan, endmëna ndabiama Bëngbe Bëtsá chabe uabemana palabrënguñe tojánayana mo chabe ichmonacá, mëntŷá tojánayana ora: Cristo, atŷbe entŷá natsana sënjichmó acbiama chaóyebuambama, entŷanga jábuayenama aca jabama ainaniñe tŷabe juabnëngaca chamotseprontánama ca.

<sup>11</sup> Ndegombre cbëyana: Nŷets tempo entŷángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batŷá uamaná, más bëtsá echántsemna ntŷamo mora Juan yomnama.

<sup>12</sup> “Juan chë Ubayaná tojánabo orscana mëntŷcoñama, bëtsá entŷanga tŷa mondboŷe Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nŷets añémoca montseboŷe chë mándayana jtŷepochócama.

<sup>13</sup> Juan candabëntŷcuana, nŷetsca Bëngbe Bëtsabe juabna oyebuambnayënga y Moisesbe Ley nŷe Bëngbe Bëtsabe amëndayama tmonjanobuambá.

<sup>14</sup> Y tŷëngaftanga chë soyënga jóyëngacñama ŷmojtŷeboŷëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná.

<sup>15</sup> Chë joudenama tmojtŷobenënga, chamouena ca” —Jesús tojánayana.

<sup>16</sup> Mëntŷánaca Jesús tojánayana: “¿Ndayacá morsca entŷanga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbioye jtsayebuáchana

<sup>17</sup> y mëntŷá jtsichámuana: ‘Tŷëngaftangbiamama fsënjaflautá y ndoñe cheŷmatslantsá; ngmënaca fsënjaversiá y ndoñe cheŷmatoŷachna ca.’

<sup>18</sup> Juan tonjánabo, y bëtsá entŷángbeñe ndoñe quenjatamana ni jasana, ni jofŷiyana, y entŷanga montsanichamo chana bacna bayëjbe juabna uambayá yojamna ca.

<sup>19</sup> Morna, chë Bëngbe Bëtsá Entŷá tbojanbemá tonjabo, y chana aíñe entsamana bëtsá entŷángbeñe jtŷesayana y jtŷofŷëŷnayana, y entŷanga montsichamo chana yapa uasayá y vínoye tmoyá entsemna ca y Romocama impuesto entŷángbioye atjanayënga y bacna soye amëngbe amigo ca. Pero Bëngbe Bëtsá endbëtsinŷanŷnaye cha nŷets osertánana bomná yomnama, chë ndayá cha tojama ora ndayá chentŷana tojóbcna soyëngaca ca” —Jesús tojánayana.

### *Chë nduauenana entŷanga*

*(Lc 10.13-15)*

<sup>20</sup> Chentŷana Jesús tojanontŷé jucácanana chë entŷanga, ndëmuanŷënga imojoyena chë pueblënguñe ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntŷá yojtŷichamo:

<sup>21</sup> “¡Tŷa lastema, Corazín puebloca entŷangbiamama! ¡Tŷa lastema, Betsaida puebloca entŷangbiámna! Chë chentŷe sënjama bëts soyënga, Tiro y Sidón bëts pueblënguentŷe matënjochnënguse, chentŷa bacna entŷanga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatŷëmbuama

uajojësha entsayangaca matmëntopormanga y chëngbe bestšašinë jatinjã matmënjenotbótoto.

<sup>22</sup> Pero ndegombre cbëyana, ntšamo entsanga tmojamama, tšabá o ndoñe tšabá bétsemnana jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entsangbe castiguama.

<sup>23</sup> Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe.

<sup>24</sup> Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nyetsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”*

*(Lc 10.21-22)*

<sup>25</sup> Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nÿe batšá tatsëmbënga tcojanÿanyé, chë tša tatsëmbënga y osertánëngbiama tcojaiytëme soyënga.

<sup>26</sup> Aíñe, chama cbontsadorana, Taita, chca chaotsemnana tcojábóšenayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndábioye chë Uaquiñá tojtseboše nda chë Taitá yomnana jinÿanyiyama, chánaca chë Taitábioye bochantsábuatma.

<sup>28</sup> “Atšbioye mabënga nyetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama.

<sup>29</sup> Ntšamo canÿe entsá, uacná yuguëšinë juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentšana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna.

<sup>30</sup> Mo canÿe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyetsca soyënga jamama echántsemna ca” —Jesús tojánayana.

## 12

*Jesusbe uatsjëndayënga ochnayté trigo tmojanátabebe*

*(Mc 2.23-28; Lc 6.1-5)*

<sup>1</sup> Chë tempo, Jesús canÿe ochnayté canÿe jajajana yojtsachnëjuana. Chabe uatsjëndayëngna shëntseca imojtsemna, chíyeca tmojanontsé trigo juatabebiana y chë meshënga jasana.

<sup>2</sup> Chë fariseunga chca tmojáninÿe ora, Jesús tmojanियana: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátslesenciana ca.

<sup>3</sup> As Jesús tojanëyana: —¿Ndoñe šmëndualía y šmondétatšëmbo ndayá David y chabe enutënga tmojanmama, shëntseca imojtsemna ora?

<sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše

nÿe ndánaca jasama ndoñe yonjalesenciana, ni Davidbiama, ni chabe enutëngbiama. Nÿe bachnangbiama belesenciana chë tandëse jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca.

<sup>5</sup> ¿O ndoñe šmëndualía y šmondëtatšëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama?

<sup>6</sup> Y atše šcuayana: Muentše canÿa entsemna, cha chë Bëngbe Bëtsabe bëts yebnentša bachnangbiama más uamaná endmëna y chabe amëndayoca soyënga más entsámána chë bachnangbe mándayentša soyëngama.

<sup>7</sup> Bëngbe Bëtsabe uabemana palabrenguiñe mëntšá endayana: Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca. Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiama.

<sup>8</sup> Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá  
(Mc 3.1-6; Lc 6.6-11)*

<sup>9</sup> Chentšana Jesús tojtsanoñe y chentša judiëngbe enefjuana yebnoye tojánamashëngo.

<sup>10</sup> Chentše yojtsemna canÿe boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnana ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canÿe ochnayté šocá jáshnama ca?

<sup>11</sup> Y Jesús tojanëjua: —¿Nda tšëngaftanguentšá, canÿe oveshá tbojtsebomna y nÿa chë ochnayté canÿe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama?

<sup>12</sup> ¡Entšá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanëyana.

<sup>13</sup> Chora Jesús chë buashana buacuatše bomnábioye tbojanianyana: “Macuenÿanëjaná ca.” Y chë boyabásana tojanacuenÿanëjaná y chora chëtšá tšabá yojtsatamna mo cach inÿetšacá.

<sup>14</sup> Pero chë fariseunga tmojésanbocana ora, tmojanontšé juabnayana ntšamo jamëse Jesús jóbama.

*Ndayá chë Bëngbe Bëtsabe juabna oyebuambnayá Jesusbiama tojánayana*

<sup>15</sup> Jesús chë soye tojántatšëmbona ora, chentšana tojtsanoñe y ba entšanga tmojanasto. Nÿetsca šoquënga tojanashná,

<sup>16</sup> y tojanamëndá chabiama entšángbeñe ndoñe chamondëtsóyebuambnama.

<sup>17</sup> Chca tojanamëndá, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

<sup>18</sup> Muentše atšbe oservená entsemna. Atše cha sënjabocacá, atšbe bonshaná, y atše corente chabiama sëntsoyejuá.

Atše chanjama atšbe Espíritu chabe ainaniñe chaotsemnana y entšanga echanjabuayená, Bëngbe Bëtsá nÿetsca luarënguëntšana entšangbiama yochjayanama chënga tšabá o ndoñe tšabá tmonjamama.

<sup>19</sup> Cha ndoñe queochátayajuatsana, ni queochátšchembumbuana.

Chabe oyebuambnayana tsáshenañe ndocná queochatuena.

<sup>20</sup> Mo nda chë atcana šëse ndoñe más jatsndbemana,



chë ndobenënga cha ndoñe queochátapochocaye.

Mo nda chë quinÿenëfjua nÿe uabojátšena uajuinÿnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojátšangbe obatanana chábeñe, cha ndoñe queochátabuajuanaye.

Cha nÿets añémoca echanjëftsetrabája,

entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

21 Y nÿetsca luarënguentšana entsanga chábeñe mochantsobátmana ca —cha tojánayana.

*Fariseunga tmojánayana Jesús Satanásbentšana obenana tojanóyëngacñe ca (Mc 3.20-30; Lc 11.14-23; 12.10)*

22 Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínÿnama y chabuatauénanama.

23 Y nÿetsca entsanga ojnánänënga imojtsichamo: “¿Mua yojtsemna chë Davídbentšana Uámana Entšá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

25 Y Jesús yojtsetátšëmbo ntšamo chënga imojtsejuabnayama; as tojanéyana: “Canÿe amëndayentše entsanga tmojtsenojatá y tmojtsenáyase, cachënga jenpochócana. Cachcá, canÿe bëts pueblentša entsanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna.

26 Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebo mnana?

27 Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebo mnna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama.

28 Y atšna, chë Bëngbe Bëtsabe Espíritbeyeca chë bayëjënga entsángbentšana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

29 “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nÿe tcojshëtsebatsëquësna aíñe cuanjobenaye cha jefcana. Atše ya chca Satanássoftaca sënjama.

30 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

31 “Chíyecna cbëyana, Bëngbe Bëtsá entsanga echanjáperdonaye nÿetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafoyenguangcá; pero ndoñe queochátaperdonaye chë Uámana Espíritbiama puerte bacá ichámënga.

32 Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

*Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá*

*(Lc 6.43-45)*

<sup>33</sup> “Canye betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá.

<sup>34</sup> ¡Mëtscuaye entšanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entšanga šmojtsemnëse? Er ndayá ainanoca becá tomnana entšá jtsóyebuambnayana.

<sup>35</sup> Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entšana chë ainanoca bacna juabnënga tobomnentsana jtsóyebuambnayana.

<sup>36</sup> Y ndegombre cbëyana, chë entšangbiana tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca.

<sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

*Chë bacna entšanga Jesús tmojanimpadá canye bëts soye chaoma, chabe obenana jinýama*

*(Lc 11.29-32)*

<sup>38</sup> Chentsana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboše aca canye bëts soye chacoma, ace obenana chašcuinýanýema ca.

<sup>39</sup> As Jesús tojanéjua: —Quem puerte bacna entšanga y ndošbuáchiyënga montseboše atše canye bëts soye chaima, atšbe obenana jinýanýiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá.

<sup>40</sup> Ntšamo Jonás unga te y unga ibeta chë bëts beonbe uafsbioye yojëftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna.

<sup>41</sup> Morsca entšanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entšanga mochanjotsaye y morsca entšangbiana mochanjayana ndoñe tšabá tmonjama ca; er chënga, Jonás yojtsabuayiyenaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna.

<sup>42</sup> Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiana más uamaná endmëna ca —Jesús tojánayana.

*Ndayá inopása chë bacna entšángaftaca*

*(Lc 11.24-26)*

<sup>43</sup> Jesús mëntšánaca tojánayana: “Canye bacna bayëja canye entšábentsana tojësebocna ora, chë bayëjna bojojo luarënguenache jtsanana ndayentše jóchnama onguayinýe, y canye luare ndoñe tonjínýena ora cha jenójuaboyana:

<sup>44</sup> ‘Atšbe oyenoye, chë ndayentsana sënjëftsebocnoye chanjesshécona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá.

<sup>45</sup> Chorna chë bayëjna jana y inÿe canÿsëfta bayëjenga chabiamá más opëjenga jobiatšana y nÿetscanga choye jamashjnana chë boyabásabeñe joyéanama. Y chca, chë boyabása tempscama más bacna entśá jtsemnana, chora chë natsanama más bayëjenga abamna causa. Morsca puerte bacna entśángaftaca cachcá echanjochnëngo ca” —Jesús tojánayana.

*Chë Jesusbe ndegombre pamíllanguentsënga*  
(Mc 3.31-35; Lc 8.19-21)

<sup>46</sup> Jesús cabá entśanga yoÿtsëtsësnaye ora, chabe mamá y catśátanga tmojánashjajna y imojtseboşe Jesúseftaca jóyebuambayama. Nÿe shjoca imojtsemna;

<sup>47</sup> asna, canÿe boyabása Jesúsbiyoye tbojanbuayená: —Acbe mamá y acbe catśátanga shjoca montsemna y montseboşe ácaftaca jóyebuambayama ca.

<sup>48</sup> Pero Jesús chë jauenayama tojánabiyoie tbojanianyana: —¿Nda atśbe mamá yomna, y ndëmuanÿenga atśbe catśátanga ca?

<sup>49</sup> Y cachora chabe cucuatşe tojanatsbaná, chabe uatsjëndayënga tojanëñyanÿé y tojánayana: —Quemënga montsemna mo atśbe mamáca y mo atśbe catśatangcá.

<sup>50</sup> Er ndánaca, ntśamo atśbe Taitá, celoca endmëná yoboşcá toÿtsama, jtsemnana atśbe catśata, atśbe uabena y atśbe mamá, atśbe ndegombre pamíllanguentsá ca —Jesús tojánayana.

## 13

*Chë jenabe cuento*  
(Mc 4.1-9; Lc 8.4-8)

<sup>1</sup> Cach te, Jesús yebnentsana tojëftsanbocna y uafjajónaye tsachoca tojanótbema.

<sup>2</sup> Mallajta entśanga choye tmojanobeconá; as Jesús, chë uafjajónayentşe yojanamna canÿe barquëshoye tojánasëngo, tojanótbema; y chë entśangna tsachoca imojtsemna.

<sup>3</sup> Chorna ba soyëngama cuentëngaca chënga tojanabuatambá.

Mëntsá tojanëyana: “Canÿe jená chë jénaye jaujquëshama yojëftsebocna.

<sup>4</sup> Yoÿtsëjquëshaye orna, básefta jénaye benache juachañe yojuatquëcjana, pero chë jaja shloftšënga imojástjajna y lempe imojtsósañe.

<sup>5</sup> Inÿe meshëngna ndëtsbenguiñe yojuatquëcjana, ndoñe yapa fshantse binÿnentşe. Chiñna betscó yojuábocna, fshantse ndoñe jashenocana yonjanmëna causa,

<sup>6</sup> pero shinÿe yojábocna ora, puerte yojojënyána y yoÿtsancta; y yoÿtsábojo, bëtscá tbëtjënga tondaye causa.

<sup>7</sup> Inÿe meshëngna uchemëshangañe yojuatquëcjana, y chë uchemëshangá yojuájua orna, lempe yoÿtsatscué.

<sup>8</sup> Y inÿe meshëngna, uanganëshiñe yojuatquëcjana y puerte botamana chiñe yojuashajo: ínÿenache nÿe canÿe jénayentsana mo patse meshënga yojuashájona, ínÿeña mo chnënguana bnëtsana meshe y ínÿeña mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntsá tojánayana: “Chë jouenama tmoÿtsobenënga, şmochjouena ca.”

*Ndáyeca Jesús cuentëngaca yojánabuatambaye*  
(Mc 4.10-12; Lc 8.9-10)

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndáyeca entśanga cuentëngaca coÿtsabuatambá ca?

<sup>11</sup> As Jesús tojanějua: —Bëngbe Bëtsá tšëngaftanga cmontsinjānā nŷetsca chë mo iytemencá yomna soyënga chabe amëndayama, pero chë ínŷengbioyna ndoñe.

<sup>12</sup> Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca.

<sup>13</sup> Chíyeca atše cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinŷama; y masque becá chë soyënga chamouena, ndoñe tšabá quemochátuenana, ni queochátësertana.

<sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinŷe

<sup>15</sup> Quem entšanga ndoñe quemátsboše botamana jajuaboyana;

chënga uamatsáchtönënga montsemna

y chëngbe bomínŷnaca cachcá.

Chca ndóñesna, chënga muantsobena jinŷama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojéftsanbema.

<sup>16</sup> “Tšëngaftangna oyejuayënga šmochanjoyena, er šmondobomna bominŷe y matscuašënga Bëngbe Bëtsabe soyënga jinŷama y jouenama.

<sup>17</sup> Ndegombre cbëyana, banga Bëngbe Bëtsabe juabna oyebuambnayënga y nŷetsca soyënguiñe tšabá amënga tmonjánbošena chë tšëngaftanga šmontsonŷá soyënga jinŷama, y ndoñe chemátaninŷe; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanéyana.

### *Jesús chë jenabe cuentama tojanabuayená*

*(Mc 4.13-20; Lc 8.11-15)*

<sup>18</sup> “Chcasna, oído šmochajajajo; chë jenabe cuento mëntšá endayana:

<sup>19</sup> Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentsana jabétsabuajuanama, chënga chiñe ndoñe chamondëtsošbuáchema.

<sup>20</sup> Y chë ndëtšbenguiñe yojuatquécjana jénaye entsemna mo chë aíñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá;

<sup>21</sup> pero ndoñe nŷets tempo chana jocochájuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmonsášbuaché causa. Inŷenga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonŷaye.

<sup>22</sup> Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnétjombana y ntšamo cha tojayancá ndoñe ntsamana.

<sup>23</sup> Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canŷe betiye

puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyëngna ínÿengbiana más bëtscá soyënga mochántsama, y chca, ínÿenga jtsemnana mo chë patse meshënga tojanshajo jenaycá, ínÿenga mo chë chnënguana bnëtsancá y ínÿengna mo chë unga bnëtsana meshënga tojanshajo jenaycá ca” —Jesús tojanabuayená.

*Chë tríguañe bacna shacuanama cuento*

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canÿe boyabása chabe jajañe yojáje.

<sup>25</sup> Pero nÿetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe.

<sup>26</sup> Y chë trigo yojuájua y ya yojtseshajuana orna, chë bacna shácuanaenaca yojuábocna.

<sup>27</sup> As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’

<sup>28</sup> Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’

<sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca.

<sup>30</sup> Más tšabana, cachcá mochjonÿaye cánÿiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca’ ” —Jesús tojánayana.

*Chë mostaztiye jenayama cuento*

*(Mc 4.30-32; Lc 13.18-19)*

<sup>31</sup> Jesús mëntšánaca tojanacuntá: “Bëngbe Bëtsabe amëndayana endmëna mo canÿe mostaza betiye jenaycá, canÿe boyabása chabe jajañe yojáje.

<sup>32</sup> Ndegombre, nÿetsca jenayëngama chë mostaza jénaye chë más b́asetema endmëna, pero tojójua orna, chë jajañentse chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

*Chë levadurama cuento*

*(Lc 13.20-21)*

<sup>33</sup> Quem inÿe cuétnaca tojanëyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

*Ndáyeca Jesús entsanga cuentëngaca yojanabuayiná*

*(Mc 4.33-34)*

<sup>34</sup> Jesús nÿetsca chë soyëngama lempe cuentëngaca entsanga jtsëtsëtsnayana, y cuentëngaca ndóñesna ndoñe yonjanoyebuambná.

<sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuentëngaca chanjóyebuambaye;

chanjayana chë iytëmena soyëngama y chë entsanga ndoñe mondëtatšëmbo soyëngámnaca;

Bëngbe Bëtsá quem luare tojanma orscana chë soyënga yomna ca —cha tojánayana.



*Chë tríguañe bacna shácuana cuentama Jesús tojanabuayená*

<sup>36</sup> Chentsana Jesús chë entsanga tojtanichamó y yebnoye tojtanamáshëngo. Chentsna chabe uatsjédayënga tmojanimpadá ndayá chë bacna shacuanama cuento betsayancá chauabuayenama.

<sup>37</sup> As Jesús tojanéyana: “Chë tsabe jénaye jená endmëna chë Bëngbe Bëtsá Entsó tbojanbemá,

<sup>38</sup> y chë jajaña, quem luare. Chë tsabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuana entsemna chë bacna bayéjëngbe amëndayabe entsanga,

<sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga.

<sup>40</sup> Ntšamo chë bacna shácuana jtsejashtsëtsana y iñoye jtsatmetšana jtsejuinýiyama, cachcá echántsemna quem luare jopochócama te.

<sup>41</sup> Chorna, chë Bëngbe Bëtsá Entsó tbojanbemá chabe angelotémënga echanjichamuá chë ínýënga bacna soye chamomama amënga y chë bacna soyënga amënga chabe amëndayentsana chamotsajuanayama.

<sup>42</sup> Y chora chëngbiyoye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftësjojnaye.

<sup>43</sup> Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

*Chë fshantsiñe uaiytëmena bomnanama cuento*

<sup>44</sup> “Bëngbe Bëtsabe amëndayana endmëna mo chë fshantsiñe uaiytëmena bomnancá. Canýe boyabása chë bomnana yojuinýëna y chentsana iytëcana cachentše yojesatbontsá. Corente oyejuayá yojtá, nýetsca chabe bomna soyënga yojetsatobuiye y chentsana chë fshantse yojtobuámiñe ca” —Jesús tojánayana.

*Chë corente uámana fiantse ndëtsëtëmama cuento*

<sup>45</sup> “Mo canýe entsá uámana fiantse ndëtsëtëmënga obuamnañacánaca endmëna chë Bëngbe Bëtsabe amëndayana.

<sup>46</sup> Chana, canýe corente uámana ndëtsëtëma yojinýëna ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

*Chë atarraiëshama cuento*

<sup>47</sup> “Bëngbe Bëtsabe amëndayana endmëna mo canýe atarraiëshacá, buyeshoye jutšenana y nýetsca beonga jashebuáyana.

<sup>48</sup> Chë atarraiëshá jútjena tojtsamna orna, chë beonga ashebuánayënga jt-sashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguiñe juatsuámana y chë ndoñe tsábëngna jtsëtšanana.

<sup>49</sup> Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsabe entsángbentsana bacna entsanga jaluárama,

<sup>50</sup> y chë bacna entsangna chë uabouana íñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftësjojnaye ca” —Jesús tojanacuntá.

*Anteo y tsëm uámana bomnana*

<sup>51</sup> Chora chabe uatsjéndayënga Jesús tojanatjá: —¿Lempe chama quecmo-jtsésertana ca?

Y chënga tmojanjuá: —Arseñor, aíñe ca.

<sup>52</sup> As Jesús tojanéyana: —Canÿe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bétsemnama cha tojtsatsjendá orna, mo canÿe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëgnaca Bëngbe Bëtsabe amëndayama ca —tojanéyana.

### *Jesús Nazaretoca*

*(Mc 6.1-6; Lc 4.16-30)*

<sup>53</sup> Jesús chë soyënga jacuéntama tojanpochocá ora, chentšana tojtsanoñe.

<sup>54</sup> Y cachabe luaroye tojtashjango y chentša judiëngbe enefjuana yebnentše tojanontsé jabuátambama. Entšanga ojnánënga imojtsichamo: —¿Chë lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bëts soyënga jamama ca?

<sup>55</sup> ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata,

<sup>56</sup> y chabe uabénanga ndoñe muentše bëngaftaca mondoyena? ¿Ndayentsana lempe chca mua yojtsebmoma ca? —chënga imojtsichamo.

<sup>57</sup> Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nÿetsquénache canÿe Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

## 14

### *Ntšamo Juan chë Ubayaná tojanóbana*

*(Mc 6.14-29; Lc 9.7-9)*

<sup>1</sup> Chë tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá.

<sup>2</sup> As cha chabe oservénënga tojanéyana: “Mua Juan chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebmoma ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámia. Herodes chca tojanma Herodíasbe causa, chabe catšata Felipbe shema.

<sup>4</sup> Juan Heródesbioye mëntšá ibnauácacana: “Ndoñe quenátslesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca.

<sup>6</sup> Pero Heródesbe cumpleño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye.

<sup>7</sup> Chíyeca Herodes, jajúrase, tbojanšbuachená ndayánaca jatšetayana, ntšamo tbojtjañcá.



<sup>8</sup> Y Herodíasna lempe bémbëbioye ibojabuayená ntšamo Herodes jojuama. As chë bembe tbojaninyana: “Canýe šcneniñe Juan chë Ubayanabe bestšaše šmatšetá ca.”

<sup>9</sup> Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama.

<sup>10</sup> Y as tojanmandá chë Juan yojanëtámenoca chabe bestšaše chamuetséstjanguama.

<sup>11</sup> Chentsana, canýe šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

<sup>12</sup> Chentsana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó*  
(Mc 6.30-44; Lc 9.10-17; Jn 6.1-14)

<sup>13</sup> Jesús chca tojanuena ora, canýe barquëshañe tojtsanoñe canýe bën luaroye, entšanga ndoyena luaroye. Pero entšanga chama imojátatsëmbona y chë pueblënguentsana tmojánbocana shecuátšeca cha juastama.

<sup>14</sup> Chentsana, chë barquëshoicana tojtastjango ora, Jesús ba entšanga tojánanye, chë cha tmojánguanguënga. Chëngbiana tbojanongmé y chë entšanguentsana ba šoquënga tojanashná.

<sup>15</sup> Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaninyana: —Ya jetiñe entsemna y quem luariñe ndocná quenatinyena. Entšanga cuantichamuá, pueblotëmëngoye chamotsoñama, saná chamobuámiñama ca.

<sup>16</sup> As Jesús tojanéjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

<sup>17</sup> Y chënga tmojanjuá: —Muentše tondaye queftsátsbomna; nýe shachna tandëse y uta beónata ca.

<sup>18</sup> As Jesús tojanéyana: —Chë soyënga moye miyëbo ca.

<sup>19</sup> Chentsana Jesús tojanmandá entšanga chamoshëntsijatbiamama. Chorna, chë shachna tandëse y chë uta beónata tojanca, cloye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanējátaye, y chëngna nýetsca entšanga tmojanacaredadó.

<sup>20</sup> Nýetsca entšanga tmojanse jtoshachaye nýetsá y cabá chë ojamnëtëmëngaca bnëtsana uta sbarëcua tmojanajutjé.

<sup>21</sup> Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye*  
(Mc 6.45-52; Jn 6.16-21)

<sup>22</sup> Chentsana, Jesús chabe uatsjëndayënga tojanamëndá chë barquëshoye jtamashjnama y chë uafjajónaye chenguánoica chabe natsana jashjajnana. Chëntsana Jesús entšanga yojtichamuá.

<sup>23</sup> Nýetscanga tojtanichamó orna, Jesús canýe tjoye tojántsjua canýa jtsemnama, Bëngbe Bëtsáftaca jencuëntama. Yojaibétata ora, cha canýa chentše yojtsemna,

<sup>24</sup> y chë barquëshana tsachocana bënoca yojtsamna. Y chë olëshënga chë barquëshaya yojtsájantšetaye, chë binýia chëngbe contra yojtsemna causa.

<sup>25</sup> Ya bínýanoyna, Jesús chëngbioye yojobeconá; béjaye juatsbuacá yojtsaye.

<sup>26</sup> Chabe uatsjëndayënga chca cha tmojáninye orna, tša imojocochauatjaná y puerte auatjanánënga tmojanoyó: —¡Canýe añemëse entsemna ca!

<sup>27</sup> Pero chora Jesús tojaněyana: —¡Añemo šmochtsebomna, atše Jesús sëndmēna; ndoñe matauatjēngana ca!

<sup>28</sup> Chora Pedro, Jesúsbioye tbojaniyana: —Bēngbe Utabná, ndegombre aca tcojtsemnēse, momandá atše bėjaye juatsbuacá ácbioye chayá ca.

<sup>29</sup> Y Jesús tbojaniyana: —Mabo ca.

Chora Pedro chē barquēshoicana tojánastjango y tojanontsé bėjaye juatsbuacá Jesúsbioye jama.

<sup>30</sup> Pero chē binjia tša jabuache yojtsemnana tojáninje ora, Pedro puerte yojtsauatja y tbojanontsé jtsenatjēmbambana. Chiyeca cha jabuache tojanchembo: —¡Bēngbe Utabná, šmatsbocá ca!

<sup>31</sup> Y cachora Jesús tbojtano buácuētēntsiye y tbojaniyana: —¡Tša batšatema ošbuachiyá! ¿Ndáyeca ndoñe bētsca átšbeñe contsošbuaché ca?

<sup>32</sup> Chentšana chē barquēshoye chata tbojtanamáshēngo y cachora chē binjia bonguana yojtsatsmēna.

<sup>33</sup> Y chora, chē barquēshoye imojtsemnēnga Jesusbe shecuatšentše tmojanoshamentšé y tmojaniyana: —¡Aca ndegombre Bēngbe Bētsabe Uaquiñá comna ca!

*Genesaret ca uabáinoca, Jesús ba šoquēnga tojanashná  
(Mc 6.53-56)*

<sup>34</sup> Chē uafjajónaye tmojánenashbuachengo y canje luare Genesaret ca uabáinoye tmojánashjajna.

<sup>35</sup> Chentša entšanga Jesús tmojantēmbá ora, chē luarentša nyetsca entšanga chama tmojántatšēmbona. As chē entšanga chēngbe šoquēnga Jesúsbioye tmojanēnatse.

<sup>36</sup> Y imojtseimpadana nye mo chabe entšayá sibiájuanaca juabojajuama chē šoquēnga chaualesenciama. Y nyetscanga chabe entšayá sibiájua tmojanábojajēnga, shnánēnga imojtsatoquédaye.

## 15

*Ndáyeca canje entšá Bēngbe Bētsabe delante ndoñe tšabia nántsemna  
(Mc 7.1-23)*

<sup>1</sup> Chora básefta fariseunga y judiēngbe ley abuátambayēnga, Jerusalenocana tmojánabēnga, Jesúsbioye tmojanobeconá y tmojaniyana:

<sup>2</sup> —¿Ndáyeca acbe uatsjēndayēnga ndoñe montsama chē ntšamo bēngbe bēts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bēnga chē judiēnga fsēnduamancá, Bēngbe Bētsabe delante tšábenga jtsatsmēnama ca?

<sup>3</sup> As Jesús tojanējua: —¿Y ndáyeca tšēngaftanga ndoñe šmontsama ntšamo Bēngbe Bētsá tojanmandacá, nye cach tšēngaftangbe bētsētsanga imnétsama soyēnga jtsamama ca?

<sup>4</sup> Bēngbe Bētsá mēntšá tojanmandá: “Acbe bētsētsata stētšoye ndoñe catjáquedaye”, y “nda cachabe bētsētsatbiana podessa tojóyebuabase, chana jóbanama jtsemnana ca.”

<sup>5</sup> Pero tšēngaftanga šmondbétsichamo canje entšá canobena chabe taitá o chabe mamá jauyanana: “Lempe ntšamo sēndbomncá Bēngbe Bētsá jaserviama entsemna, chiyeca tondaye quetsátsbomna aca juajabuáchama ca”;

<sup>6</sup> y šmondbétsichamo nye ndánaca chca tojayanēse, ya ndoñe ntsemnana chabe taitá o chabe mamá stētšoye ndoñe ntjaquédana, ni ntjuajabuáchana ca. Y chca, tšēngaftangbiana tondaye ntsámanana ntšamo Bēngbe Bētsá tojanmandacá, y aíñe šmontsama ntšamo tšēngaftangbe bētsētsanga imojanamancá.

<sup>7</sup> ¡Bacna entsanga, ntšamo ndegombre šmojuabnacá ndinÿinÿnayënga! Nÿe tšabá chë Bëngbe Bëtsabe juabna oyebuambnayá Isaías tšëngaftangbiamá tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše atšbiamá ndocna tšabe juabnëngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca; chënga nÿe entsangbe mandënga jtsabuátambayana y Bëngbe Bëtsabe mandënga ndoñe ca” –cha tojánayana.

<sup>10</sup> Chentsana Jesús entsanga tojánachembo y tojanëyana: –Smochjouena y chacmësertá.

<sup>11</sup> Ndayá entšá tojtšesacá, ndoñe quebochátsbema Bëngbe Bëtsabe delante ndoñe tšabia. Inÿetsá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjëndayënga Jesúsbioye tmojanobeconá y tmojanianana: –¿Quéctsetatsëmbo, ntšamo tconjayanama chë fariseunga ndoñe tšabá chenatëuénana ca?

<sup>13</sup> As Jesús tojanëjua: –Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entsangbe buatëmbana soyëngaca.

<sup>14</sup> Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca –Jesús tojánayana.

<sup>15</sup> Chora Pedro, Jesúsbioye tbojanianana: –Ntšamo chë cuento bétsayanama šmabuayená ca.

<sup>16</sup> As Jesús tojanëjua: –¿Tšëngaftángnaca cabá ndoñe cmontsësertana ca?

<sup>17</sup> ¿Cabá ndoñe cmontsësertana lempe ntšamo šmojascá uafsbioye jomashënguana y chentsana cuerpentšana jtabocnana?

<sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana.

<sup>19</sup> Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostérama y ínÿabiamá jtsayátsenayama.

<sup>20</sup> Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsoybenana Bëngbe Bëtsabe delante ndoñe tšabia jabemama ca –Jesús tojánayana.

*Canÿe shembása inÿe luarocana ashjanganá Jesúsbeñe yojtsošbuaché (Mc 7.24-30)*

<sup>21</sup> Jesús chentsana, Tiro y Sidón luarëngoye tojtsanoñe.

<sup>22</sup> Canÿe shembása Caná luarocá chentše inoyena; cha Jesúsbioye yojbeconá y mëntšá yojtsáyebuache: –¡Utabná, Rey Davídbentšana Entšá, šmotselastemá! ¡Atšbe bembe puerta entsesufrina, bacna bayëjbe juabna entsebomna causa ca!

<sup>23</sup> Jesús ndocá tbonjanjuá. As chabe uatsjëndayënga tmojanobobeconá y tmojanimpadá: –Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: –Bëngbe Bëtsá atše šonjichmó jtsanÿenama nÿe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojanijana: —¡Utabná! Diosmanda pavor šmotsebema. ¡Šmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndóñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

<sup>27</sup> As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtsemá ora. Chcasna, Diosmanda šmotsajabuache ca.

<sup>28</sup> Chora Jesús tbojanijana:

—¡Shembása, Bëngbe Bëtsábeñe tša ošbuachiyá comna! Ntsamo cojtsebošcá chca chaotsemna ca.

Y cach orscana chabe bembe tšabá yojtatsmëna.

### *Jesús ba šoquënga tojanashná*

<sup>29</sup> Jesús chentšana tojëftsanbocna y chë Galilea uafjónaye tsachoye tojána. Chentšana, canye batsjoye tojántsjua y choca tojanótbema.

<sup>30</sup> Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nyetscanga tojanashná.

<sup>31</sup> Y chca orna, chë entšanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtšëbinýna; y chama chënga corente ojnánänënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

### *Jesús canta uaranga boyabásenga saná tojanacaredadó*

*(Mc 8.1-10)*

<sup>32</sup> Chentšana Jesús, chabe uatsjëndayënga tojánachembo y tojanëyana: —Quem entšangbiama šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

<sup>33</sup> As chabe uatsjëndayënga tmojantjá: —¿Ntsamo muatjobenaye quem luarentše, ndocna entšá ndoyenentše, chëfta entšangbiama saná jinýenama ca?

<sup>34</sup> Y Jesús tojanatjá: —¿Bueta tandëse šmojtsebmoma ca?

Y chënga tmojanjuá: —Canýsëfta tandëse y básefta beonatëmënga ca.

<sup>35</sup> Chora Jesús tojanamëndá nyetsca entšanga fshantsiñe chamotbiamama.

<sup>36</sup> As chë canýsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentšana nyetsca entšangbioye tmojanacaredadó.

<sup>37</sup> Nyetsca entšanga tmojanse jtoshachaye nyetsá. Y chentšana cabá canýsëfta bëts sbarëcua tmojanajutjé chë tojanójamëtemëngaca.

<sup>38</sup> Chë tmojansënga imojamna canta uaranga boyabásenga, shembásenga y básenga ntjacuntacá.

<sup>39</sup> Chentšana Jesús, chë entšanga tojtanicamó, barquëshoye tojanamashëngo y Magadán luaroye tojtanoñe.

## 16

*Chë fariseunga y saduceunga tmojánbošena Jesús chaoma canye bëts soye  
(Mc 8.11-13; Lc 12.54-56)*

<sup>1</sup> Fariseunga y saduceunga tmojána Jesús jinŷama, y jisháchichiyama imojt-seimpadana canŷe bĕts soye chaoma, as jtsetatšĕmbuama Jesusbe obenana ndegombre Bĕngbe Bĕtsábíocana tainóbocanama.

<sup>2</sup> Pero Jesús tojanĕjua: “Tšĕngaftanga jetiñoŷe šmondbĕtsichamo: ‘Yĕfse tšabe te echántsemna, er celoca buánganiñe entsemna ca.’

<sup>3</sup> Y cachĕse šmondbĕtsichamo: ‘Mĕnté echanjuafté, er celoca buánganiñe y ibetiñe entsemna ca.’ Tšĕngaftanga celoye jontješiyĕse, ntšamo chĕ tempo yochtsemnama tša tšabá jayanama šmojtsobenĕse, ¿ndáyeca ndoñe šmontsobena jtsetatšĕmbuana ndaye bĕts soye Bĕngbe Bĕtsá quem tempo cmojtsinŷanŷnama?

<sup>4</sup> Quem puerte bacna entšanga y ndošbuáchiyĕnga montseboše atše canŷe bĕts soye chaima, obenana jinŷanŷiyama; pero ndoñe chca quemochátinŷe, sinó nŷe chĕ ndayá yomna mo chĕ Bĕngbe Bĕtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojĕsanabashejuana y chentšana tojtsanoñe.

*Jesús tojanabuayená chĕ fariseungbe buatĕmbana soyĕngama*

*(Mc 8.14-21)*

<sup>5</sup> Chĕ uafjónaye chenguanoicana chĕnga tmojtanabo ora, chĕ uat-jéndayĕnga yojĕsebnĕtjomba tandĕše jesocñana.

<sup>6</sup> Chora Jesús tojanĕyana: —Smochtsantješna; cuedado šmochtsebomna chĕ fariseunga y saduceungbe levadurama ca.

<sup>7</sup> Pero chĕ uatsjéndayĕngna imojtsenatsĕtsnaye: —Chca entsichamo, bĕnga tandĕše ndoñe tmonjesocñana ca.

<sup>8</sup> Jesús chĕ soye yojtsetátšĕmbo; chíyeca mĕntšá tojanĕyana: —¿Ndáyeca tandĕšama šmojtsenatsĕtsná ca? ¿Tša batšatema ošbuáchiyana šmobomna!

<sup>9</sup> ¿Cabá ndoñe cmontsĕsertana y ndoñe šmontsabouínŷna chĕ shachna tandĕšentšana shachna uaranga entšanga sĕnjanĕjuatšema y bnĕtsana uta sbarĕcua šmonjánajutjema?

<sup>10</sup> ¿Y ndoñe šmontsabouínŷna chĕ canŷsĕfta tandĕšentšana canta uaranga entšanga sĕnjanĕjuatšema y canŷsĕfta sbarĕcua šmonjánajutjema?

<sup>11</sup> ¿Ndáyeca ndoñe cmontsĕsertana atše tandĕšama ndoñe sĕntsóyebuambnama? Cuedado šmochtsebomna fariseunga y saduceungbe levadurama ca —Jesús tojanĕyana.

<sup>12</sup> As chora chĕ uatsjéndayĕnga tojanĕsertá, Jesús ndoñe tonjánayana chĕ tandĕšentša levadurama cuedado jtsebomnana ca, sinó ndayá chĕ fariseunga y saduceungbe buatĕmbana soyĕngama.

*Pedro tojánayana, Jesús chĕ Cristo bĕtsemnama*

*(Mc 8.27-30; Lc 9.18-21)*

<sup>13</sup> Jesús, Cesarea de Filipo luaroye tojánashjango ora, chabe uatsjéndayĕnga tojanatjá: —¿Nda ca entšanga imojtsichamo chĕ Bĕngbe Bĕtsá Entšá tbojanbemá yojtsemna ca?

<sup>14</sup> Chĕnga tmojanjuá: —Báseftanga montsichamo Juan chĕ Ubayaná ca, ínŷengna Elías ca, ínŷengna Jeremías y ínŷengna tempsca inŷe Bĕngbe Bĕtsabe juabna oyebuambnayá ca.

<sup>15</sup> As Jesús tojanatjá: —Y tšĕngaftangna, ¿nda atše bĕtsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chĕ Bĕngbe Bĕtsabe Uámana Uabuayaná condmĕna, chĕ Bĕngbe Bĕtsá Ainabe Uaquiñá ca.



<sup>17</sup> Y Jesús tbojaniyana: —Simón, Jonasbe uaquiñá, oyejuayá cochanjoyena. Ndocna quem luarentša entsá chë soye checmatinýinýé, sinó atšbe Taitá, celoca endmëná.

<sup>18</sup> Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëtš yebna chanjajebo, y ni Satanás, chabe obenánaca entsá jóbanama, queochatobenaye jtsepochócama.

<sup>19</sup> Atšbe cbochanjátšetaye obenana, mo llavëfjá, entsanga Bëngbe Bëtšabe amëndayoye jamashënguama chamobenama. Bëngbe Bëtšáftaca chacojtsencuénta ora, canýe soye ndoñe chaondëtsemna ca chacojayanëse, Bëngbe Bëtšá cachcá echanjayana. Y cháftaca chacojtsencuénta ora, canýe soye aíñe chaotsemna ca chacojayanëse, Bëngbe Bëtšá echanjayana aíñe chca chaotsemna ca —Jesús tbojaniyana.

<sup>20</sup> Chentsana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtšabe Uámana Uabuayaná, chë Cristo bëtsemnama.

*Jesús tojánayana cha ibojamna jóbanana y jtayenana ca  
(Mc 8.31-9.1; Lc 9.22-27)*

<sup>21</sup> Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerta chaopadecema ca. Tojanëyana cha mochjanóba, pero unga tianoye yochtanayena ca.

<sup>22</sup> Chora Pedro, Jesúseftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtšá ndoñe chaondëlesenciá chca chaopasama! ¡Ndocna te quenausopodena chca ácaftaca jopásana ca!

<sup>23</sup> As Jesús tojanobuértana y Pédrëbioye tbojaniyana: —¡Satanás, átšbentšana mojuaná! ¡Aca contseboše atšbe canýe bacna soye chašócochënguama! Pedro, acbe juabnënga Bëngbe Bëtšábiocana ndoñe quenatóbocana, sinó nýe entsángbentšana ca.

<sup>24</sup> Chentsana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nýe Bëngbe Bëtšá yobena sempre chabe vidiñe jtsemándayana ca, chabe quem luarentša soyënga cachcá chauesonýá atšbe juastama, y atšbiamá jasúfriama chaotseprontana y cruciñe jobanámnaca.

<sup>25</sup> Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nýetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atšbe juastama, masque chaóbana, chë nýetsca tescama yomna tšabe vida echántsebomna.

<sup>26</sup> ¿Ndayama entsá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida tojtsoperdese? Ndegombre, canýe entsá chë nýetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnama.

<sup>27</sup> Chë Bëngbe Bëtšá Entšá tbojanbemá, chabe Taitabe obenánaca y puerta buashinýinýaniñe echanjabe chabe angelotémëngaftaca, y chora cada canýabioye bochantatšetaye cachcá ntšamo cada ona tojëftsemcá.

<sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtšá Entšá tbojanbemá amëndayacá jabana ntjëftsinýcá ca —Jesús tojánayana.

## 17

*Jesús inyetšá tojanobinýná*  
(Mc 9.2-13; Lc 9.28-36)

<sup>1</sup> Chentšana chnėnguana tianoye, Jesús tojėftsanėbiatše Pedro, Santiago y chabe catsata Juan, y ínŷoye tojanėnatse nŷe chėnga, canŷe bėts tjoye.

<sup>2</sup> Chentše, chėngbe delante inyetšá cha tojanobinýná. Chabe jubiá shinŷcá yojtsebuashinŷinŷana, y chabe uichėtjonėjuangana mo binŷnińcá uafjantsėjuangá yojtsamna.

<sup>3</sup> Chca orna, chabe uatsjėndayėnga tmojáninŷe Moisés y Elías tbojanobinýná, Jesúseftaca encuéntaye.

<sup>4</sup> Chora Pedro, Jesúsbioye tbojanianyana: “Bėngbe Utabná, ĵtsa tšabá bėngbiamana cuanmėna muentše ĵtsemnana ca! Tcojtsebošėse, unga tambotėmėnga atše chjapórma: cánŷetema acbiamana, ínŷetema Moisesbiamana y ínŷetemna Elíasbiamana ca.”

<sup>5</sup> Pedro chca yojtsóyebuambnantscuana, canŷe buashinŷinŷana jantšetėshe nŷetscanga yojáutšbotse. Y chė jantšetėshoicana canŷe oyebuambnayana tmojanuena mėntšá: “Mua atšbe bonshana Uaquińá endmėna, atše chabiamana sėntsoyejuá. Cha šmochtseyeunana ca.”

<sup>6</sup> Y chė uatsjėndayėnga chca tmojanuena ora, tmojanoshamentšé y jubiaca fshantsóntscońe tmojanotsejbėna, puerte auatjanánėnga.

<sup>7</sup> Chora Jesús chabe uatsjėndayėngbioye tojanobeconá, tojánabojajo y tojanėyana: “Matėtsbananga; ndońe matauatjėngana ca.”

<sup>8</sup> Y tsbanánoye tmojanontješé ora, Jesús nŷe canŷa tmojáninŷe, ndocná inŷa más.

<sup>9</sup> Chė tjocana imojtsatstsmaye ora, Jesús tojanamėndá: —Bėngbe Bėtsá Entšá tbojanbemá obanėnguentsšana candėtayenėntscuana, ndocnábeńe chė šmonjinŷe soyama šmattsecuéntaye ca.

<sup>10</sup> As chė uatsjėndayėnga Jesús tmojantjá: —¿Ndáyeca chė ley abuátambayėnga mondbėtsichamo, canmėna Elías jabana chė Bėngbe Bėtsabe Uámana Uabuayanabe natsana ca?

<sup>11</sup> Chora Jesús tojanėjua: —Ndegombre canŷa Eliascá natsana echanjabo y ntšamo ĵtsemnama yomncá, lempe echánjabatsma ca.

<sup>12</sup> Pero atše chėyana, canŷa mo Eliascá ya tonjabo, entšanga ndońe chematanotėmbá y cháftaca entšanga tmonjanma lempe ntšamo tmojanbošencá. Y cachcá, chė Bėngbe Bėtsá Entšá tbojanbemá entšangbe cucuatšĩne echanjasúfria ca —Jesús tojánayana.

<sup>13</sup> Chora chė uatsjėndayėnga tojanėsertá, Juan chė Ubayanabiamana Jesús chca yojtsėtsėtsnama.

*Jesús, canŷe bacna bayėja tbojanbojuaná*  
(Mc 9.14-29; Lc 9.37-43)

<sup>14</sup> Entšanga imojtsemnoye chėnga tmojtanashjajna ora, canŷe boyabása tojanobeconá, Jesusbe natsanoica yojoshamentšiyey tojanianyana:

<sup>15</sup> —Utabná, atšbe uaquińá motselastemá. Cha ataque bontsėsháchichana y puerte entsesufrina, er cha inŷe ora inŷoye ĵtseshajayana y inŷe orna, buyeshoye ĵtsoshbuetšana.

<sup>16</sup> Acbe uatsjėndayėngbioye cha sėnjuánatse y ndońe chematobená ĵtseboshnama ca —cha tbojanianyana.

<sup>17</sup> As Jesús tojánayana: —¿Nŷetšá ndošbuáchiyėnga y bacna entšanga ca! ¿Buetayté šojtsemna tšėngaftangaftaca ĵėftsemnana? ¿Buetayté uantado tšėngaftangaftaca chjėftsemna? Moye chė bášetema mánatse ca.

18 Chora Jesús, chë basetémbeñe bacna bayëjbioye tbojanácacana y chábensana cha tojésanbocna. Cach orscana chë básetema tšabá yojsatsmëna.

19 Chentsana, chë uatsjéndayënga luaroca Jesúseftaca tmojanoyebuambá y tmojanianana: —¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanëyana: —Tšëngaftanga tša batsatema ošbuáchiyana bomna causa. Ndegombre šcuayana: tšëngaftanga batsatema ošbuáchiyana šmojtsebomnëse, masque nÿe mo canÿe mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena.

21 Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemnëse ca —Jesús tojanëyana.

*Jesús cachiñe tojánayana cha ibojamna jóbanana y jtayenana ca*  
(Mc 9.30-32; Lc 9.43-45)

22 Jesús y chabe uatsjéndayënga cánÿiñe Galilea luaroye imojétsaye ora, cha tojanëyana: “Chë Bëngbe Bëtsá Entšá tbojanbemá entsangbe cucuatšinë mochanjáboshjona,

23 mochanjóba, pero unga tianoye echántayena ca.” Chë causa chë uatsjéndayënga puerte ngménaca imojtsemna.

*Chë Bëngbe Bëtsabe bëts yebnama impuesto jtsatsquëcjnyama*

24 Jesús y chabe uatsjéndayënga Capernaumoye tmojánashjajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquëcjnyaye ca?

25 Y Pedro tojanëjua: —Aíñe, cha endbetsatsquëcjnyaye ca.

Chentsana, Pedro chë yebnoye tojánamashëngo ora, Jesús natsana mëntšá chábioye tbojanianana: —Simón, ¿ntšamo catjájuaoye? ¿Quem luarentša reyënga ndémuanÿengbioye impuesto inmëtsayëngacaye y crocénana inmëtsatjanaye: cach luarentše oyenëngbioye o chë inÿe luarocana ashjajnëngbioye ca?

26 As Pedro tbojanjuá: —Chë inÿe luarocana ashjajnëngbioye ca.

Y Jesús tbojanianana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca.

27 Pero ndocná mal chabonduínÿnanamna uafjajónayoye motsa, anzuelëfjua cochjútsena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiana y acbiana jëtsjájua. Cochjëftsejatsëca y cochjatsboshjona ca —Jesús tbojanianana.

## 18

*¿Nda chë más uamaná yomna?*  
(Mc 9.33-37; Lc 9.46-48)

1 Chentsana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

2 Chora Jesús canÿe basetëmbioye tbojanchembo y chëngbe tsëntsaca tbojanatsá.

3 Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama.

4 Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna.

<sup>5</sup> Y nda átsbeñe ošbuachiyá bétsemnayeca, tbojofja canya mo quem basetem-bioycá, chana atše jofjana ca — Jesús tojánayana.

*Resjo yomna, nderado bacna soyënga cuanjama*

*(Mc 9.42-48; Lc 17.1-2)*

<sup>6</sup> “Nda canye bássetema átsbeñe ošbuachiyábioye tbojaingñé bacna soye jamama, chabiamama más tšabá nántsemna canye bétš nantsnëbé chamotseta-mošëntsšbua y chë mar bėjaye shbuatsëntssoye chamotsashbuetše chabotsen-atjëmbama.

<sup>7</sup> ¡Tša lastema quem luarentša entsangbiamama, chë ínÿenga bacna soye jamama chaócochënguama tmojtsamëngbiamama! Nÿets tempo chca amënga mochanjëftsemna. Pero, ¡payajema chë ínÿa bacna soye chaomama tojtsamá ca!

<sup>8</sup> “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiamama más tšabá nántsemna celoye jamashënguana chë nÿetsca tescama yomna tšabe vida jtsebomnana, cucu-atše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe íñeshoye chacmotsëtšjango.

<sup>9</sup> Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënoye cochtsëtšena. Acbiamama más tšabá nántsemna, celoye jamashënguana nÿe canye bomínÿeca, y ndoñe nÿets uta bomínÿeca infierno y chacmotsëtšjango, chë bétš íñeshoye ca” — Jesús tojánayana.

*Chë ótsena oveshabiamama cuento*

*(Lc 15.3-7)*

<sup>10</sup> Mëntsánaca Jesús tojánayana: “Ni mo cánÿabioye quem tsëm ošbuáchiyënguentshana, chë mo basetemëngcá mondmënënga, mo nduamanacá šmattsonÿaye. Ndegombre cbëyana, chëngbe angelotëmënga celoca, sempre atšbe Taitá celocáftaca mondetsemna ca.

<sup>11</sup> Er chë Bëngbe Bëtsá Entšá tbojanbemá tonjabo chë pochocánënga jtsemnana imojtsajnënga jabátsebacama.

<sup>12</sup> “¿Ntsamo tšëngaftanga šmatjájuaboye? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachcá nanjesënÿaye, jama chë ótsena oveshá jetsenguanguama?

<sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsena oveshabiamama, y ndoñe nÿa chca chë inÿe esconëfta bnëtsana y esconëfta oveshëngbiamama chë ndoñe tmonjanotšëngbiamama.

<sup>14</sup> Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátšboše ni canya quem basenguentshana mo otšenacá chaotsemna, bacna soyënga jtsamëse oyena causa ca” — Jesús tojánayana.

*Ntsamo cuanjama inÿa japerdónama*

*(Lc 17.3)*

<sup>15</sup> “Nderado acbe catšata, bacna soye tcmojaborlase, cochjá, cánÿata šochjencuënta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántatsmëna.

<sup>16</sup> Pero ndoñe tcmonjóyeunasna, inÿe útata cochjáchembo chacmotjëmbambama, chca, chata chabouena ntsamo cochjauyanama y chamuayana ndegombre chca yomnana.

<sup>17</sup> Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya



Bëngbe Bëtsábiöye nduabuatmacá, mo canÿe ndoñe judiycá ca o canÿe bacna entšá mo canÿa Romocama impuesto entšángbiöye atjanayacá yomna ca.

<sup>18</sup>“Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canÿe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye aíñe chaotsemna ca, Bëngbe Bëtsá echanjayana aíñe chca chaotsemna ca.

<sup>19</sup>“Mëntšánaca cbëyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye.

<sup>20</sup> Ndayentše útata o únganga tmojënefna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

<sup>21</sup> As Pedro tojána y Jesúsbiöye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canÿsëfta soye ca?

<sup>22</sup> Y Jesús tbojanjuá: —Ndoñe nÿe canÿsëfta soyama quecbatatsëtsná, sinó canÿsëfta bnëtsana soye canÿsëfta ca.

### *Ndayá inopása chë japerdónama ndëbošëngaftaca*

<sup>23</sup> Mëntšánaca Jesús tojanëyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canÿe réyefraca tojanopasacá. Cha yojábošena chabe oservénënga crocénana jtsëtjañana.

<sup>24</sup> Jtsëtjañama yojóntša orna, canÿe boyabása imojuánatse, chë réybiöye mallajta crocénana ibnandebena.

<sup>25</sup> Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nyets tempo nÿe ínÿabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama.

<sup>26</sup> Chora chë oservená chë reybe shecuatsentše yojoshamentsiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntšabuachiye ca.’

<sup>27</sup> Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

<sup>28</sup> “Chë oservenana chentšana yojésebocna y benachiñe inÿe oservenáftaca ibojenbetše, cach mandadbiama trabajayá. Chë inÿe oservenana nÿe batšatema crocénana chábíöye ibnandebena. Chora chë oservená chë enutábíöye tamošajentšana ibojishache y ibojóntša jtsëtajuashbebiana y mëntšá ibojauyana: ‘¡Ndebénana šmatsëntšabuaché ca!’

<sup>29</sup> Chora cha chë oservenabe shecuatsentše yojoshamentsiye y ibojtseimpáda: ‘Diosmanda šmotsëuantajema. Atše lempe cbochanjëtsëntšabuachiye ca.’

<sup>30</sup> Pero chë oservená ndoñe yonjábošena, sinó yojama chë inÿe oservenábíöye cárcelöye chamotsëtámíama, chë ndebénana candëtsjájëntscuana.

<sup>31</sup> Chë inÿe oservénënga chca imojinÿe ora, puerte yojóngmia y imojá lempe ntšamo yojopasacá chëngbe rey jacuéntama.

<sup>32</sup> As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná.

<sup>33</sup> Acnaca cachcá cmondmëna chë cach aquécá muentša trabájayabiama jóngmiana, ntšamo atše acbiama šonjongmecá ca.’

<sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájuantscuana ca” —Jesús tojanacuntá.



<sup>35</sup> Chora Jesús tojánayana: “Atšbe Taitá, celoca endmēná, cachcá tšëngaftangafaca echanjama, tšëngaftangbe catšata ndoñe ndegombre nyets ainánaca šmonjaperdonase ca.”

## 19

*Ndayá Jesús tojanabuatambá chë bouamnënga tmojtsenëtsenama  
(Mc 10.1-12; Lc 16.18)*

<sup>1</sup> Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica.

<sup>2</sup> Ba entšanga tmojanasto y chentše šoquënga tojanashná.

<sup>3</sup> Básefta fariseunga Jesúsbioye tmojanobeconá y jisháchichiyama mēntsá tmojantjá: —¿Queojtselesenciana canye boyá nye ndayámnaca chabe shémbioye cachcá jesonýayama ca?

<sup>4</sup> As Jesús tojanējua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora “boyá y shema tojánabiamama”?

<sup>5</sup> Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canýacá bochántsemna ca.”

<sup>6</sup> Y chca, ya ndoñe útata quebochátsmēna, sinó mo nye canýacá. Chcasna, entšá ndoñe chaondéndbema ndayá Bëngbe Bëtsá mo canýiñcá tojéftsema soye ca —Jesús tojánayana.

<sup>7</sup> Chora chë fariseunga tmojanianana: —¿As, ndáyeca Moisés tojanmandá, chë shémbioye canye uabemana tsbuanácha juiyiyana jtsenëtsenama y cachcá jesonýayana ca?

<sup>8</sup> Y Jesús tojanéyana: —Tšëngaftanga Bëngbe Bëtsabe mandënga jójëngacñama ndoñe quešmátsboše causa, Moisés tmojanalesenciá shémbioye jesëtsenana. Pero quem luare jobojátšama orna, ndoñe chca quenjatsmēna.

<sup>9</sup> Atše cbëyana, nda chabe shémaftaca tbojtsenëtsena y chca tojopasá ndoñe chë shema chabe boyábioye ínýaftaca tbontseingñé causa, y chë boyá ínýaftaca tojtóbouamasna, cha chë natsana shémbioye ínýaftaca jtseingñayana ca —Jesús tojánayana.

<sup>10</sup> Chora chabe uatsjëndayënga tmojanianana: —Chca chë boyá y shémaftaca tojtsemnësna, ndoñe tšabá yontsemna jobouamayana ca.

<sup>11</sup> Y Jesús tojanéyana: —Nyetscanga ndoñe quemátobena chë palabrenga jójëngacñana, nye chë Bëngbe Bëtsá tojama jójëngacñama chamobenama, chëngna aiñe.

<sup>12</sup> Ba soyënga comna ndaye causa chë boyabásenga ndoñe ntsoybenana jobouamayana. Inyënga jónýnana jobouamayama ndobenënga, ínýëngbioye cach entšanga jábiamana jobouamayama ndobenënga y ínýëngna, nyets tempo nye Bëngbe Bëtsabe amëndayama oservena causa ca —tojanéyana.

*Jesús, basetëmëngbiama Bëngbe Bëtsábioye tbojanimpadá  
(Mc 10.13-16; Lc 18.15-17)*

<sup>13</sup> Entšanga basetëmënga Jesúsbioye tmojanënatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjëndayënga tmojanontsé chë basetëmënga unachayënga jtsëcácanana.

<sup>14</sup> Chora Jesús tojanéyana: “Cachcá mónýaye chë basetëmënga átšbioye chamuabo y ndoñe matëuyanana; er Bëngbe Bëtsabe amëndayana endmēna mo quem basetëmëngcá imomnëngbiama ca.”

<sup>15</sup> As chë basetëmënga tojánabojajo, Bëngbe Bëtsá jaimpádase; y chentšana cha tojtsanoñe.

*Canje bomna bobontse Jesúsbiöye tojána  
(Mc 10.17-31; Lc 18.18-30)*

<sup>16</sup> Chentšana, canje boyabása tojána Jesús jinýama y mëntsá tbojantjá: —Buatëmbayá, ¿ndaye tšabe soye chjama chë nyetsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nýe canya endmëna: Bëngbe Bëtsá. Aca chë nyetsca tescama yomna tšabe vida jtsebomnama tcojtsebošëse, mandënga cochtsobedecena ca.

<sup>18</sup> Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena.

<sup>19</sup> Acbe bëtsëtsata stëtšoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojaniana.

<sup>20</sup> Chora chë bobontse tbojanjuá: —Atše lempe chca nyets tempo sëndocumplina. ¿Ndayá más šojtsebuáshbena ca?

<sup>21</sup> As Jesús tbojaniana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjémënga cochtsatšataye; chca, bëts uacanana soye celoca cochántsebomna. Chentšana cochjabo y šcochjuasto ca.

<sup>22</sup> Chë bobontse chca tojanuena ora, ngmënaca yojsatoñe, cha corente bomná bemna causa.

<sup>23</sup> Chora Jesús chabe uatsjëndayënga tojanëyana: —Ndegombre cbëyana, puerte totcá entsemna canje bomnabiama Bëngbe Bëtsabe amëndayoye jamashënguama ca.

<sup>24</sup> Chë bomnabiama cachiñe šcuatayana: Más paselo entsemna canje camello chë coshufjentša atëfjnëjana chauachnëngo, y ndoñe canje bomná Bëngbe Bëtsabe amëndayoye jamashënguana ca.

<sup>25</sup> Chabe uatsjëndayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbočaná jtsemnama ca?

<sup>26</sup> Jesús chënga tojanëñyanýe y tojanëyana: —Entšanga ndoñe quemátobena jamama canya atsbočaná chaotsemnama, pero Bëngbe Bëtsá aíñe, er cha nyetsca soyënga jamama endobena ca.

<sup>27</sup> Chora Pedro tbojaniana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjóyëngacñe ca?

<sup>28</sup> As Jesús tojanëyana: —Ndegombre cbëyana, nyetsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entsá tbojanbemá chabe buashinýinýana bëts tšenëšiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentša entsangbiama jayanama tšabá o ndoñe tšabá tmonjama.

<sup>29</sup> Y ndëmuanýënga, atše jaserviama tmojëftseboshjona cachëngbe yebna, catšátanga o uabënanga, befta o bebmá, básenga o fshantsënga, chë soyëngama patse soye más mochanjóyëngacñe y chë nyetsca tescama yomna tšabe vídnaca.

<sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnënga, uámanënga mochántsemna ca —Jesús tojanayana.

## 20

*Chë trabájayëngbiama cuento*

<sup>1</sup> Měntsánaca Jesús tojánayana: “Běngbe Bětsabe aměndayana endmēna mo canye bēts jajañe nduiñcá. Chē nduiñna canye te cabá cachēse yojábocna peonga janguanguama, chabe uvas betiyēnga jajañe chamotrabajama.

<sup>2</sup> Chē nduiño peonga yojányena orna, imojenóyeunaye canye tescama canye denario crocénana jtēbuénayama. As chora yojichamuá chē uvas betiyēnga jajoye jatrabajama.

<sup>3</sup> Mo base mošenana ora, chē nduiño cachiñe yojábocna y plazoca atsanēnga ínŷenga yojanŷe, tondaye ntsamcá.

<sup>4</sup> As yojáuyana: ‘Tšēngaftángnaca atšbe uvas betiyēnga jajoye motsajna jatrabajama y ntšamo chašmojamcá cbochtēbuénaye ca.’ Y chē entsanga imojá.

<sup>5</sup> Nŷetsto ora y bēts mošenana ora, chē nduiño cachiñe yojábocna y cachiñe cachcá vojopása.

<sup>6</sup> Mo la cinco ora, chē nduiño cachiñe yojábocna y chenache ínŷenga yojányena, tondaye ntsamcá. As yojátjaye: ‘¿Ndáyeca tšēngaftanga nŷets día ntjatrabajacá muentše šmotsomñe ca?’

<sup>7</sup> Y chēnga imojojuá: ‘Ndocná bēnga chešnataimpadá causa ca.’ As chē nduiño yojáuyana: ‘Tšēngaftángnaca atšbe uvas betiyēnga jajoye motsajna jatrabajama y cbochtēbuénaye ca.’

<sup>8</sup> “Y ya bien jetiñe yojtsemna orna, chē nduiño chabe caporálbioye ibojauyana: ‘Peonga metsachembo y cochtēbuénaye. Chē ústonoye tmojáshjajnēnguentšana cochjabojátša y chē natsana tmojáshjajnēnga ústonoye ca.’

<sup>9</sup> Y chē mo la cinco ora imojáshjajnēnga imojobeconá, y cada ona canye denario crocénana yojtáyentsbuachiye.

<sup>10</sup> Chentsana, chē natsana jatrabajama imojáshjajnēnga yojtsamna jobéconama y chēnga imojétsejuabnaye más crocénana mochjanóyēngacñe ca. Pero chēngnaca cach canye denario crocénana yojtēbuénaye.

<sup>11</sup> Chca imojóyēngacñe orna, chēnga imojóntša chē nduiñbiama bacá ichámuana,

<sup>12</sup> mēntšá: ‘Quemēnga chē ústonoye tmonjáshjajnēnga nŷe canye horatema tmonjatrabajá; ntšamo bēnga šcontēbuenacá, cachcá chēnga contēbuená y bēngna nŷets día jabuache fsēnjatrabajá y corente jēnyá fsēnjauantá ca.’

<sup>13</sup> “Pero chē nduiño canya chca yojtsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca?’

<sup>14</sup> Chcasna, acbe uacanana crocénana mesocñe y motsatoñe. Atše sēntseboše chē ústonoye jatrabajama tojashjanguá jtabuénayana, cachcá ntšamo aca tcojtabuenacá.

<sup>15</sup> Chca entsemna, er atše sēndobena atšbe crocenánaca nŷe ndayánaca jamana. ¿O aca envidia cojtsebomna, atše tšabia tsmēnama ca?’ ” —cha yojayana.

<sup>16</sup> Chora Jesús tojánayana: “Y chca, chē mora nduámanēnga imomnēnga, uámanēnga mochántsemna; y chē mora uámanēnga imomnēngna, nduámanēnga mochántsemna ca.”

*Jesús cachiñe tojánayana cha jóbanama y jtayenama  
(Mc 10.32-34; Lc 18.31-34)*

<sup>17</sup> Chēnga Jerusalenoye imojtsaye ora, Jesús barie tojánachembo chabe bnētsana uta uatsjéndayēnga y tojanēyana:

<sup>18</sup> “Tšēngaftanga šmontsonyá mora bēnga Jerusalenoye montsajnama. Chocna chē Běngbe Bětsá Entšá tbojanbemá, chē bachnangbe aměndayēnga

y ley abuatambayengbe cucuatshiñe mochanjáboshjona, y chënga mochanjayana jóbanama cha ibojtsemna ca,

<sup>19</sup> y chë ndoñe judiëngbe cucuatshiñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye*

*(Mc 10.35-45)*

<sup>20</sup> Chentšana, Zebedeobe uaquiñatbe mamá chabe uaquiñataftaca Jesúsbioye tojanobeconá, chabe shecuatšentše yojoshamentšiyé canye pavorama jaimpádama.

<sup>21</sup> As Jesús tbojantjá: —¿Ndayá cojtseboše ca?

Y chë shembása tbojaniyana: —Aca reycá chacojtsemánda ora, coch-jamánda atšbe uaquiñata chabótbema canya acbe catsbioica y chë inya acbe uañicuayoica, ácaftaca chabotsemándama ca.

<sup>22</sup> Y Jesús tojanējua: —Ntšamo šmontsotjanañama, tsëndata ndoñe quešnátstatsëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjúá: —Aíñe, fchanjobenaye ca.

<sup>23</sup> Chora Jesús tojanējua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catsbioica o atšbe uañicuayoica chaótbemama. Chë útentše entsemna ndëmuanjengbiamá atšbe Taitá to-japrontacá ca.

<sup>24</sup> Chë inye bnëtsana uatsjédayënga chca tmojanuena ora, chë uta catsátaftaca tmojanotjayaná.

<sup>25</sup> Chora Jesús chë uatsjédayënga tojánachembo y tojanéyana: —Tšëngaftanga šmondétatsëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inye entsanga sempre chamotsayau-nanama.

<sup>26</sup> Pero tšëngaftangbeñna ndoñe chca chaondëtsemna. Inyetsá; masna, nda tšëngaftanguentše chë más uamaná jtsemnama tojtsebošá bontsemna chë inyënga jtsaservénana.

<sup>27</sup> Y ndánaca tšëngaftanguentsá chë más uamaná jtsemnama tojtsebošá bontsemna jtsemnana mo nye inyabiamá nyets tempo oservenacá.

<sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviama. Y mo nda inyënga játsbacama cuafjëtsajocá, cha echanjóbana, ba entsanga atsebácanënga chamotsemnana ca —Jesús tojánayana.

*Jesús uta jtanata tojanashná*

*(Mc 10.46-52; Lc 18.35-43)*

<sup>29</sup> Chënga, Jericó bëts pueblentšana tmojánbocana ora, ba entsanga Jesús imojtsëstona.

<sup>30</sup> Uta jtanata benache juachañe ibnatbemana. Jesús chëjana yojt-sachñëjuanama chata tbojanuena ora, tbojanontsé uayebuáchana: —¡Utabná, Davídbentšana Entšá, šmotsalastemá ca!

<sup>31</sup> Entšanga chë jtanátbioye tmojtšanëcácana iytëca chabotsemnana, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

<sup>32</sup> As Jesús yojtsaye, chë jtanata tojánachembo y tojanatjá: —¿Ndayá šojtseboše atše tsëndatbiamá chjamama ca?

<sup>33</sup> Y chata tbojanjúá: —Utabná, bëndata chabuatëbínynama ca.

<sup>34</sup> Jesús chatbiama tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

## 21

*Jesús Jerusalenoye tojánashjango  
(Mc 11.1-11; Lc 19.28-40; Jn 12.12-19)*

<sup>1</sup> Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjédayata tojanichamó,

<sup>2</sup> y mēntšá tojanéyana: “Tsēndatbe natsana entsemna base pueblotémoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuafjoná y šochjuánatse.

<sup>3</sup> Nderado nda ndayánaca chacmojáuyanëse, šochjauyana: ‘Bēngbe Utabná bontsájaboto y chentšana camuentše echanjabáisabashejuana ca.’”

<sup>4</sup> Chca tojanopasá, cachcá chaotsemnama ntšamo chë Bēngbe Bētsabe juabna oyebuambnayá tojanayancá. Cha mēntšá tojanábema:

<sup>5</sup> Jerusalén bēts pueblentše oyenēnga mēyana:

“Minÿēnga, tšēngaftangbe Rey chentše tšēngaftangbioye entsabó, ndoñe mo canÿa cachá bētsá enobiamnayacá; canÿe búrrbeñe enjaquená; canÿe burrotémiñe, canÿe uatrabájaye bayabe šešónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamēndacá.

<sup>7</sup> Chë uatsjédayatna chë burrá y chë burrotema tmojanēnatse, entšayējuangá chátbeñe tbojanájatse y chora Jesús chábeñe tojanenoyayé.

<sup>8</sup> Bētscá entšanga chēngbe entšayá chë benachējana imojtsētētsatsana, y inÿengna betiyeshēnguiñe buacuafjēnga imojtsetcoye y chiñe imojtsequēcjná.

<sup>9</sup> Y chë natsana imojtsajnēnga y chë ústonoyēnga mēntšá imojtsaiuáyebuache: “¡Rey Davídbentšana Entšá matschuanga ca! ¡Corente bendición bomná, chë Bēngbe Utabnabe obenánaca tojabá! ¡Bēngbe Bētsá celocá matschuanga ca!”

<sup>10</sup> Jesús Jerusalenoye tojánamashēngo ora, nÿetsca entšanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entšanga imojtsējuana: —Chë Bēngbe Bētsabe juabna oyebuambnayá Jesús, chë Galileoca pueblo Nazaretocá ca.

*Jesús, Bēngbe Bētsabe bēts yebnentšana enēnga y obuámnyēnga tojtanēbuacna  
(Mc 11.15-19; Lc 19.45-48; Jn 2.13-22)*

<sup>12</sup> Chentšana Jesús, Bēngbe Bētsabe bēts yebnoye tojánamashēngo y chë entšanga chentše imojtsena y imojtsobuámnañēnga chentšana tojtanēbuacna. Chéntšnaca imojtsemna entšanga canÿe crocénana enēnga, y chë crocénana nÿe Bēngbe Bētsabe bēts yebnentšama inoservenana. Chēngbe mesēshangá tojtsanenásatajchquēca y chë palomatema enēngbe tšenēšēngnaca.

<sup>13</sup> Y tojanéyana: “Bēngbe Bētsabe uabemana palabrenguiñe cha mēntšá tojánayana: ‘Atšbe bēts yebna echantsabaina átšeftaca encuéntaye yebna ca’; pero tšēngaftangna, atbēbanēngbe oyeniñe chë yebna šmojtsebema ca” —Jesús tojanéyana.

<sup>14</sup> Chentšana, Jesús yojtsemnoye Bēngbe Bētsabe bēts yebnentše, jtanēnga y coshetēnga tmojanobeconá, y cha tojanashná.

<sup>15</sup> Chë bachnangbe más uámana amēndayēnga y ley abuátambayēnga, Jesús bēts soyēnga yojsamama tmojáninÿe ora, y chë basetémēnga Bēngbe Bētsabe bēts yebnentše imojtsayebuáchama tmojanuena ora, tša tmojanotjáyananga. Chë basetémēnga mēntšá imojtsáyebuache: “¡Chë Rey Davídbentšana Entšá matschuanga ca!”



<sup>16</sup> As Jesús tmojanayana: —¿Ntšamo chë basetémenga montsichamcá quect-suenana ca?

Y Jesús tojanéjua: —Aíñe, sentsuenana. Pero, ¿tsëngaftanga Bëngbe Bëtsabe uabemana palabrenguiñe chë soyama ndoñe šmëndualía? Chiñe mëntšá endayana:

Chë basetémenga y ochóchaye šešonatémengbe canténgaca aca tcojama entšanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalenentšana Betania puebloye tojtsanoñe; y chentše chë ibeta tbojánbobinÿna.

*Jesús tojánayana canÿe higo betiye ndoñe más chaondëshájona ca*  
(Mc 11.12-14, 20-26)

<sup>18</sup> Chë te cachëse, Jesús cach bëts puebloye yojtésa ora, tbojánishëntsena.

<sup>19</sup> Chora canÿe higo betiye benache juachaca yojinÿe; as choye yojobeconá, pero nÿe ena tsbuanáchënga chiñe yojinÿena. As Jesús chë higo betiyoye tojánayana: “¡Ndocna te más chaondëshájona ca!” Y betesco chë higo betiye tojtsanbuashá.

<sup>20</sup> Chë uatsjéndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

<sup>21</sup> Y Jesús tojanéjua: —Ndegombre cbëyana, tsëngaftanga Bëngbe Bëtsábeñe ošbuáchiyana šmojtsebmna y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana.

<sup>22</sup> Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

*Jesusbe obenana*  
(Mc 11.27-33; Lc 20.1-8)

<sup>23</sup> Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

<sup>24</sup> As Jesús mëntšá tojanéjua: —Atšnaca canÿe soye sëntsebmna tsëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama.

<sup>25</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanéyana.

Chama chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tmojanabuayená soyënguiñe ndoñe šmonjanošbuaché ca?’

<sup>26</sup> Pero ndoñe quemuátobena jayanana ‘entšanga ca’; muentša entšangbiama bënga montsauatja, er nÿetscanga mondëjuabná Juan ndegombre Bëngbe Bëtsabe juabna oyebuambnayá yomna ca.”

<sup>27</sup> Chcasna chënga Jesús tmojanjuá: —Bënga ndoñe queftsátstatsëmbo ca.

Y as Jesús tojanéyana: —Atše cach ndoñe quechchatéyana ndaye deréchoca chca stsama ca.

*Chë uta uaquiñátbiama cuento*

<sup>28</sup> Chora Jesús entšanga tojanatjá: —¿Ntšamo tsëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.”

29 Chë uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá.

30 Chentsana chë taitá chë inye uaquiñábioye cachcá ibojauyana. As cha ibojojuá: “Arseñor, aíñe chanjá ca.” Pero ndoñe yonjá.

31 ¿Chë útatentsana ndëmuanyá tojanma ntšamo chë taitá yojabošcá ca? – Jesús tojanatjá.

Y chënga tmojanjuá: –Chë natsaná ca.

Chora Jesús tojanéyana: –Ndegombre cbéyana, chë Romocama entšángbioye impuesto atjanayënga y chë bacna vida bomna shembásenga, tsëngaftangbiana más montseprontana Bëngbe Bëtsabe amëndayoye jamashënguama.

32 Juan chë Ubayaná tonjánabo tsëngaftanga jábuayenama ntšamo jtsiyenana cmamnama, ntšamo Bëngbe Bëtsá yobošcá, y tsëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aíñe chábeñe montsanošbuaché. Y tsëngaftanga, masque ntšamo chënga Bëngbe Bëtsábeñe imojtsošbuáchema lempe šmojinýese, chë juabnayana ndoñe šmonjatrocá, chábeñe jtsošbuáchiyama ca –cha tojanéyana.

### *Chë puerta bacna trabájayëngbiana cuento*

*(Mc 12.1-12; Lc 20.9-19)*

33 Mëntsánaca Jesús tojánayana: “Inye cuento šmochjatuena chašmuatsjinyama: Canye jajañe nduiño uvas betiyënga yojáje y chë shëconana yojajétja. Chë uvasëšangá juantsëtetjamna canye base luare yojajutjo y canye tsbanana jebna soye yojapórma chentse jtsaishanyama. Chentsana, inye trabájayënga chë jajañe yojárrendaye y chana inye luaroye yojtsoñe.

34 Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama.

35 Pero chë arréndayëngna chë oservénënga imojishëche: ínýengbioyna imojtsajantšetaye, ínýengbioye imojtsëbaye y chë ínýengbioyna ndëtšbéngaca imojtsatëchënganja.

36 As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

37 “Cabana, chë jajañe nduiño cachabe uaquiñá ibojíchmua; as mëntsá yojtsejuabnaye: ‘Atšbe uaquiñá cocayé mochanjóyeunaye ca.’

38 Pero chë arréndayënga chë uaquiñá imojinýe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiana echanjoquéda ca.’

39 As chë uaquiñá imojishache, chë uvas betiyënga jajañentsana imojtsábocna y imojtsóba.”

40 Chca jacuéntama tojanpochocá orna, Jesús tojánayana: –Y morna, chë jajañe nduiño chaojabo ora, ¿ntšamo šmojtsejuabná chë arréndayëngaftaca cha yochjama ca?

41 Y chënga tmojanjuá: –Chë puerta bacna arréndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

<sup>42</sup> Chora Jesús tojánayana: —¿Tšëngaftanga ndocna te Bëngbe Bëtsabe uabem-ana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtsbé,  
mora chë más bëts uashacuanësentše entsejájona.

Chë soye Bëngbe Utabná, Bëngbe Bëtsá chca tojama,  
y bënga chama ojnanánënga fsëntsemna ca.

<sup>43</sup> Ntšamo chë nduiño chë arrëndayënga chë fshantse echántsabaca y ínÿënga echantsatšataye y chënga chabiama bëtsá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿëngbioye mochántsatšataye. Chënga Bëngbe Bëtsabe soyëngama mochanjouena y chë soyëngama ínÿëngbioye mochanjabuayená, Bëngbe Bëtsabe amëndayoye jamashënguama.

<sup>44</sup> Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojótatsë, polvëshe bochántsebema ca —Jesús tojánayana.

<sup>45</sup> Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatsëmbona chëngbiana chca yojtsóyebuambnama.

<sup>46</sup> Chora chënga tmojánbošena Jesús jishachana, pero entsangbiana imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

## 22

### *Chë casamento fiesta cuento*

*(Lc 14.15-24)*

<sup>1</sup> Chentšana Jesús tojanontšé cachiñe cuentëngaca chënga jabuátambana. Mëntšá tojánayana:

<sup>2</sup> “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefraca tojanopasacá. Chë rey yojamánda canÿe bëts fiesta jamama, chabe uaquiñabe casamentama.

<sup>3</sup> Chora chë rey chabe oservënënga yojichamuá chë ófjanënga jobiatšama, pero chë ófjanëngna ndoñe imonjouena jama.

<sup>4</sup> As chë rey ínÿe oservënënga yojichamuá y mëntšá yojámëndaye: ‘Chë ófjanënga šmochjáuyana, ya saná stseboprontana ca. Sëñjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiesta ca.’

<sup>5</sup> “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe;

<sup>6</sup> y ínÿëngna, chë reybe oservënënga imojishëche, jabuache imojtsatsetšenaye y imojtsëbaye.

<sup>7</sup> Y chë rey chë soyama yojouena ora, corente ibojtsetna. As chabe soldadënga yojichamuá chë oservënënga obánayënga chamuetsëbáyama y chëngbe bëts pueblo jetsángbotjuama.

<sup>8</sup> Chora chabe oservënënga yojáyuyana: ‘Lempe entseprontana chë casamento fiesta, pero chë ófjanënga ndoñe quenjatëmerecena moye jabama.

<sup>9</sup> Motsajna tsashenangoye y ndëmuanyëngnaca chašmojánÿenënga, chë casamento fiesta šmochjúbuaja ca.’

<sup>10</sup> As chë oservënënga tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entsanga, y chca, chë tsbocnanoica jútjena yojtsemna entsángaca.

11 “Chë ófjanënga jányama chë rey yojámashëngo ora, chentše cánÿabioye ibojinye y chana ndoñe yontsemna ntšamo canÿe casamento fiestama endbetsemncá uichëtjoná.

12 As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna.

13 As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ –cha yojayana.”

14 Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnana nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

*Chë Romoca bëts mandadbiama impuesto jtsatsquëcjnyama  
(Mc 12.13-17; Lc 20.20-26)*

15 Chentsana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama.

16 Chama chënga tmojanichamá básefta cachëngbe usetonënga y ínÿengna Heródesbe ústonënga, Jesús jauyanama: –Buatëmbayá, bënga fsëndëtatsëmbo aca ndegombre soyënga cnetsabuátambama y contsabuatambá ndegombre tšabe vida jtsebomnana, ntšamo Bëngbe Bëtsá yomandacá, y ndoñe jatuenanana nÿe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana.

17 Chcasna, ¿ntšamo catjájuaboje? ¿Tšabá tayojtsemna, César, chë Romoca bëts mandadbiama, bënga impuesto jtsatsquëcjnyana o ndoñe ca?

18 Jesús yojtsetátšëmbo chëngbe bacna juabnëngama; chíyeca tojanëyana: –Bacna entsanga, ntšamo ndegombre šmojuabnacá ndinÿinÿayënga. ¿Ndáyeca tšëngaftanga šmojtseboše chë sóyeca atše jisháchichiyama?

19 Chë šmatsquëcjná crocénana šminÿinÿé ca.

As canÿe crocénana tmojanoyé.

20 Jesús tojanatjá: –¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

21 Y chënga tmojanjuá: –Césarbe jubiá; cha chca enduabaina ca.

As Jesús tojanëyana: –Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

22 Chënga chca tmojanuena ora, ojanánënga imojtsemna. As chënga cachcá Jesús tmojanonÿá y tmojtsatanoñe.

*Obanënga jtayenama Jesús tmojantjá  
(Mc 12.18-27; Lc 20.27-40)*

23 Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá:

24 –Buatëmbayá, Moisés tojánayana nderado canÿe boyá tojóbana básenga ntjëftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnana ca.

25 Chcase, canÿe bëngbentše canÿsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá.

26 Y cháftaca cachcá tonjanopasá, chë inÿe uabentsáftaca cachcá, y cachcá chë ínÿengaftaca y chë ústonoca uabentsáftacnaca.

27 Y chentsana chë shembásanaca tontsanóbana.

28 Y morna, chë obanënga chamojtayena ora, ¿ndabe chë canÿsëfta catšatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

29 As Jesús tojanëjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obe-nanama ndoñe quecmátësertana causa.

30 Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá.

31 Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguifne tojánayanama? Cha tonjánayana:

32 “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

33 Chë entsanga chca tmojanuena ora, ojnánënga imojtsemna ntšamo Jesús yojsabuátambama.

*Chë más bëts uámana mando  
(Mc 12.28-34)*

34 Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna,

35 y canÿa chënguentsá, ley abuatambayá, Jesúsbioye jisháchichiyama tbojan-tjá:

36 —Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.”

38 Chë soye endmëna chë más bëts uámana mando y nÿetsca mandëngama chë natsanoca entsemna.

39 Y quem inÿe soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.”

40 Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mond-betsabuatabacá ca —Jesús tbojaniana.

*¿Cristo, ndabe entšábentšana yomna?  
(Mc 12.35-37; Lc 20.41-44)*

41 Chë fariseunga cabá cachentše imojtsemnëntscuana,

42 Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

43 As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crísbioye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crísbioye tbojaniana:

atšbe catšbioica mótbema,

atšbe obenánaca acbe uayayënga acbe cucuatšifne chamoquedama ch-jamëntscuana ca.



<sup>45</sup> ¿Ntsámose Cristo, Davídbentsana Entśá nántsemna, cach David “Utabná ca” chábioye tbojtsabobuátmese ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñémua Jesús más jatstjanayama.

## 23

*Jesús chë fariseungbiana y ley abuátambayëngbiana tojánayana, chënga ndoñe tśabá montsama ca*

(Mc 12.38-40; Lc 11.37-54; 20.45-47)

<sup>1</sup> Chora Jesús, entsanga y chabe uatsjédayënga mentsá tojanéyana:

<sup>2</sup> “Chë fariseunga y chë ley abuátambayënga cmondbétsabatambaye ntšamo Moisesbe leyënguiñe iuayancá.

<sup>3</sup> Chcasna, tšëngaftanga cmontsamna chënga joyaunayana y ntšamo tcmo-jauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabatambacá.

<sup>4</sup> Mo canye entsá, couáybioye uauta uasmanëshu juasmayana y cachá tondaye tontasamancá, chënga entsanga jtsamëndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama.

<sup>5</sup> Chënga lempe jtsamana nye entsanga chamotsënyama. Chënga chë ínÿengbiana más Bëngbe Bëtsá imobobonshana ca chamotsejuabnama, chënga monduamana tëntsa sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšinë chëjënga jenábatsëcana y sibiajana nya tëntsa uasebtotonanëjuangá jtsichëtjonana.

<sup>6</sup> Chënga jtsebošana chë fiestënguiñe nya quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe.

<sup>7</sup> Chënga jtsebošana tsáshenañe entsanga nya respétoca chamotsacheuana, y ‘abuátambayënga ca’ chamotsachembuanámna chënga jtsebošana.

<sup>8</sup> “Pero tšëngaftangna ndoñe šmattseboše entsanga ‘abuátambayënga ca’ chacmotsachembuanama, er nyetsca tšëngaftanga mo catšatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá.

<sup>9</sup> Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentśá ‘taitá ca’ šmattsechembuana; tšëngaftanga nye canye Taitá šmondmëna, chë celoca endmëna.

<sup>10</sup> Ndoñe šmattseboše entsanga ‘mandayënga ca’ chacmotsachembuanama; er nye canye Mandayá endmëna y cha Cristo endmëna.

<sup>11</sup> Nda tšëngaftangbeñe chë más uamaná tojtsemná bontsemna chë ínÿenga jtsaservëna.

<sup>12</sup> Nda cachá bëtscá tojtsenobiamná, nduamaná mochántsebema; y nda cachá nduamaná tojtsenobiamnana, más bëtscá mochanjábema.

<sup>13</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga šmontsama entsangbiana puerte totcá chaotsemna Bëngbe Bëtsabe amëndayoye jamashënguama, mo bësáca cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana.

<sup>14</sup> ¡Tša lastema tšëngaftangbiana, ntšamo ndegombre šmojuabnacá ndinÿinÿayënga fariseunga y ley abuátambayënga! Tšëngaftanga chë viudángbioye chë tmobomna soyënga jtsabacayana, y entsangbe

delante tsabá chacmotsénŷama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tsëngaftanga más jabuache ínŷengbiamama cmochanjácastigaye.

15 “¡Tša lastema tsëngaftangbiamama, bacna entsanga ntšamo ndegombre šmojuabnacá ndinŷinŷnayënga fariseunga y ley abuatambayënga! Tsëngaftanga ba luarënguenache jtsajnana canŷa tsëngaftangbe ustoná onguayiñe, y šmojínŷena ora, tsëngaftanga jamana cha chaotsemna tsëngaftangbiamama uta soye más merecido buajoná infernoye chaotsama.

16 “¡Tša lastema tsëngaftangbiamama; tsëngaftanga šmondmëna mo jtanënga entsanga unachayëngcá! Tsëngaftanga šmondbëtsichamo: ‘Nda ínŷabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

17 ¡Obëjëmënga y nduabínŷnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiamama josérviamama jtsemnana, nŷe Bëngbe Bëtsabe bëts yebnocama chë castellano tojtsemnayeca.

18 Tsëngaftanga mëntsánaca šmondbëtsichamo: ‘Nda ínŷabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiamama altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’

19 ¡Nduabínŷnënga! ¿Ndayá más uámana soye yomna, chë Bëngbe Bëtsabiamama tmojacjá soyënga o chë altar? Chë tmojacjá soyënga Bëngbe Bëtsabiamama josérviamama jtsemnana, nŷe chë altaroca chë soyënga tmojacjáyeca.

20 Nda chë altarama tojajurá, ndoñe nŷe chë altarama ntsejúraryana. Lempe chë altar juatsboca tojtsemnámncama cha jtsejúraryana.

21 Nda Bëngbe Bëtsabe bëts yebnama tojajurá, ndoñe nŷe Bëngbe Bëtsabe bëts yebnama ntsejúraryana. Bëngbe Bëtsabiamama cha jtsejúraryana, cha chë chentše oyená.

22 Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámncama, chentše yotbemanabiamama.

23 “¡Tša lastema tsëngaftangbiamama, bacna entsanga ntšamo ndegombre šmojuabnacá ndinŷinŷnayënga fariseunga y ley abuatambayënga! Tsëngaftanga Bëngbe Bëtsabiamama jtsequëcñayana chë jajañentša sananga bnëtsanentsana canŷe soye; chë binche matatëmënga menta, anis y chë cominentša sanángnaca. Pero tsëngaftanga nŷe batsá jtsamana chë leyentša más uámana soyënga, mo chë nŷetsca entsanga cachca derechënga chamotsebomnama, ínŷenga jtsalastemánana y chë tsabe soyënguñe jtsiyenana, chca, entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inŷe tsabe soyënga amana ntjajbanacá.

24 ¡Jtanënga entsanga unachayënga! Tsëngaftanga chë base soyënga jamama puerta jtsenócochinŷenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canŷe entsá ndayá tojtsabuchetjácama bayëfjama jtsejuánama, ndoñe ntjasama, jasama ndoñe yondëlesenciana ca chë leyñe iuayana causa. Pero šmondmëna mo entsangcá ndëmuanŷënga camellbe mëntsëna jasana, y chë leyñe endayana chcana jasama ndoñe yondëlesenciana ca.

25 “¡Tša lastema tsëngaftangbiamama, bacna entsanga ntšamo ndegombre šmojuabnacá ndinŷinŷnayënga fariseunga y ley abuatambayënga! Tsëngaftanga

šmondmëna mo entsangcá ndëmuanyënga platillëjënga y tazësënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jt-sentsénana entsangbiana mo tšabengcá jtsinÿnama, pero tšëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebomnama juabnéngaca.

<sup>26</sup> ¡Nduabinÿna fariseo! Cochshetsajbaná ainaniñe bacna soyënga bomnana. Chamna nÿe tšabe juabnénga chentše cochtsebomna, y lempe ntšamo chacojtsamcá y entsanga chamojtsónÿacá tšabá echántsemna.

<sup>27</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevēshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca.

<sup>28</sup> Tšëngaftanga chca šmondmëna: entsangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entsanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

<sup>29</sup> “¡Tša lastema tšëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnana, chëngbe cuevēshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse;

<sup>30</sup> y chentšana šmondbétsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmënjanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana.

<sup>31</sup> Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentšana šmomnana. Y mora cach tšëngaftangbe bëts taitangcá tšëngaftanga šmontsama.

<sup>32</sup> ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

<sup>33</sup> “¡Mëtscuayënga, mëtscuaye entsanga! ¿Ndayá šmochjama chë infiernoca uabouana castigüentšana jótsbocama?

<sup>34</sup> Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetsenaye y nÿetsca bëts pueblënguenache chënga šmochandúcamena.

<sup>35</sup> Chíyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe.

<sup>36</sup> Ndegombre cbéyana, lempe chë soyëngama castigo morsca entsangbiana echántsemna ca” —Jesús tojánayana.

*Jesús tojanošachna Jerusalenoca entsangbiana  
(Lc 13.34-35)*

<sup>37</sup> Mëntsánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga

jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atše sënjábošena tsëngaftanga átšbioye júbuajana, mo canye tuamba chabe bolletotémënga chabe juatëngmiáša tajsoye cuaftajayecá, pero tsëngaftanga ndoñe chešmátsbošena.

<sup>38</sup> Y šmochjinýe, atše mora cachcá cbochanjesënýaye, y chca, atšna enánanga cbochanjésabashejuana, mo canye yebna cachcá tcojesonýá y énañe tcojeseboshjoncá.

<sup>39</sup> Y atše cbëyana, ndegombre tsëngaftanga morscana atše ndoñe más quešmochátinýe; y atše šmochántinýe mëntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

## 24

*Jesús tojánayana chë Bëngbe Bëtsabe bëts yebna lempe mochjánpochocama (Mc 13.1-2; Lc 21.5-6)*

<sup>1</sup> Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjéndayënga chábioye tmojanobeconá y tmojanontšë nýetsca chentša bëts yebnënga cha jinýinýiyana.

<sup>2</sup> Chora Jesús tojanéyana: “Tsëngaftanga lempe šmontsonýá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canye ndëtsbé inýe ndëtsbé juatsboye. Lempe mochantsepocho ca.”

*Ntšamo yochtsemna quem luare jopochócama tempo chaojtsobeco ora (Mc 13.3-23; Lc 21.7-24; 17.22-24)*

<sup>3</sup> Chentšana chënga Olivos tjashoye tmojána. Jesús choca yojtsetbemana; as, chë uatsjéndayënga tmojanobobeconá nýe chëngbiana jatjayama, mëntšá: —Sméyana. ¿Mocna ora chë soyënga Bëngbe Bëtsabe bëts yebnocayochjochnëngo ca? ¿Ndayá yochjochnëngo bënga jinýanýiyama aca jésabama ora ya yojtsemnama y quem luare jopochócama tempo yojtsobecuama ca?

<sup>4</sup> As Jesús tojanjuá: —Cuedado šmochtsebomna ndocná chacmondáingñema.

<sup>5</sup> Banga mochanjabo y mochantsabíchamo chënga atše imomna ca. Mochánttsichamo: “Atše chë Cristo sëndmëna ca” y chca, ba entšángbioye mochanjáingñaye.

<sup>6</sup> Tsëngaftanga šmochanjouena canye luarentša entšanga inýe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna.

<sup>7</sup> Canye luarentša entšanga inýe luaroca entšángaftaca mochánttsentsjanaye, y canye amëndayábentša entšanga inýe amëndayábioca entšángaftácnaca; y ba luarënguiñe shëntsana echanjóshjango y chentša fshantsënga echanjuangmëmana.

<sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entšanga inýengbe cucuatšinë cmochanjábashejuana chacmatsetšenama y cmochantsëbaye; y atšbe ústonënga bëtsemnayeca nýetsca luarënguentša entšanga cmochantsëbuayënja.

<sup>10</sup> Chë tempo, banga mora átšbeñe ošbuáchiyënga, ošbuáchiyana mochantsajbaná y mochantsenáboyënja y jóbanama inýengbe cucuatšinë mochántsenboshjuana.

<sup>11</sup> Banga Bëngbe Bëtsabe ndoñe ndegombre juabna oyebuambnayënga mochanjábocana y ba entšanga mochanjáingñaye.

<sup>12</sup> Nýetšá bacna juabnënga entšangbe ainaniñe echanjésemna, y chë causa banga ndoñe quemochátenbobonshana.



13 Pero nda nyets tempo átsbeñe ošbuachiyá totsomñe, atsbocaná echántsemna.

14 Y quem tsabe noticiënga Bëngbe Bëtsabe amëndayama nyets quem luariñe entšángbioye mochántsabuyaynaye, chca, chë ndegombre soyënga Bëngbe Bëtsabiamá chënga chamotsetatsëmbuama. Chentšana cocayé quem luare jopochócama tempo echántsemna.

15 “Chë Bëngbe Bëtsabe juabna oyebuambnayá Daniel chë puerte uabouana soye tojëftsanabema chë pochócaye soyama. Tsëngaftanga chë puerte uabouana soye chë uámana ca uabaina luarentse chašmojinýe ora (nda tojtsalía, chabosertá), šmochántsetatsëmbo chë puerte ngménana tempo tojóshjanguama;

16 entšanga Judeoca chamojtsemnënga, batsjabengoye chamotsacheta.

17 Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jëftsábocnama.

18 Y nda jajoca chaojtsemna, yebnoye ndoñe chaondëta ni mo chabe quëfsalíya jesácñama.

19 ¡Tša lastema chë tempo ngomámanënga chamojtsemnëngbiama o ochóchaye šešonga chamojtsabamnëngbiama!

20 Bëngbe Bëtsá šmochtseimpadana chë tsëngaftanga jachetama, uaftena tempo ora o canýe ochnayté ndoñe chaondëtsemnama.

21 Chca, chora puerte ngménana echántsemna. Tša jabuache ngmenancá, quem luare jabojátšama orscana y mëntscoñama y más chcoye, cachcá ngménana ndoñe ntjamnana.

22 Chë puerte ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanýeshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minýënga, muentse chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

24 Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinýanýiyama, entšanga jáingñama, y tmojobenase, chë Bëngbe Bëtsabe bocacánëngnaca.

25 Atše ya chama tcbonjabuayená chë tempo cabá ndóshjango ora.

26 Chíyeca, nderado chënga chacmojáuyana: ‘Minýënga, chentse chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canýe tsoca entsemna ca’, chama ndoñe šmattsayaunana.

27 Er ntšamo chë tojatcuinýe ora, shinýe bocanoicana y shinýe ue-natjëmbambanëntscoñe jabuashinýinýenancá y ba luarënguenache entšanga jobenayana jinýama, cachcá, Bëngbe Bëtsá Entšá tbojanbemá quem luaroye chaojésabo te, entšanga nyets luarentse mochanjobenaye cha jinýama.

28 Canýe obanabe cuerpo tojtsemnama chë gallinacënga tmojátatsëmbona y cachora chë béconana jojtana. Cachcá, chë castigo echántsemna nýa chama chë tempo chaojtsemna ora ca” —Jesús tojánayana.

*Bëngbe Bëtsá Entšá tbojanbemá quem luaroye echanjésabo  
(Mc 13.24-37; Lc 21.25-33; 17.26-30, 34-36)*

29 Mëntsánaca Jesús tojánayana: “Chë puerte ngménana tempo chaojchnëngüentšana, shinýe ndoñe queochátsbuashinýinýana, juashcona ndoñe



queochátsbinýnaye, celocana estrellënga echanjatquécjana y quem luarentsa tsbanánoca espíritënga obenana bomnënga echanjángmëmana.

<sup>30</sup> Chora canýe soye celoca echanjónýna entsanga jinýanýiyama Bëngbe Bëtsá Entsó tbojanbemá ya iuaisaboma, y nýets luarenache entsanga mochanjenóbošachna, y Bëngbe Bëtsá Entsó tbojanbemábiöye mochanjinýe celoca jantšetëshiñe echántsaboje, puerte obenánaca y corente buashinýinýaniñe.

<sup>31</sup> Y canýe trompetëfjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nýets luarëngocana, celoca cánýoica juachoicana y chë ínýoica juachóntscoñe.

<sup>32</sup> “Ntšamo higo betíyeca endbëtsopasanama šmochjuatsjinýe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatsëmbuana.

<sup>33</sup> Cachcá, lempe chë ndayama tšëngaftanga tcbonjauyancá chašmojinýe ora, šmochántsetatsëmbo Bëngbe Bëtsá Entsó tbojanbemá ya jésabama yojtsemnama.

<sup>34</sup> Ndegombre cbëyana, lempe chca echanjochnëngo, morsca entsanga cabá ndóbana ora.

<sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> “Pero ndayté y ntseco ora Bëngbe Bëtsá Entsó tbojanbemá yochjésabama, ndocná quenátstatsëmbo, ni chë celoca angelotëmënga, ni Bëngbe Bëtsabe Uaquiñá. Nýe chë Taitá chama yotátstatsëmbo.

<sup>37</sup> “Ntšamo Noé yojëftsiyena ora tojanopasacá, cachcá echanjopása chë Bëngbe Bëtsá Entsó tbojanbemá chaojésabo ora.

<sup>38</sup> Noebe tempo, chë uabouana uaftena cabá nduáshjango ora, entsanga imnasaye, imnofšësnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana.

<sup>39</sup> Chënga tondaye imonjántatsëmbo, nýe chë uabouana uaftena tojánashjango y nýetscanga tojtsanëyamba ora cocayé. Cachcá echántsemna Bëngbe Bëtsá Entsó tbojanbemá chaojésabo ora; ya chaojochnëngo ora, entsanga chama mochanjátatsëmbona.

<sup>40</sup> Chora uta boyabásata jajoca bochántsemna; canýa mochanjesbetše y chë ínýana ndoñe.

<sup>41</sup> Uta shembásata bochántsejanýcoje; canýa mochanjesbetše y chë ínýana ndoñe.

<sup>42</sup> “Chíyeca cuedado šmochtsebmna y yejuana šmochtsantješna, er ndoñe quešmátstatsëmbo ndayté tšëngaftangbe Utabná yochjésabama.

<sup>43</sup> Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatsëmbëse, cha nantsefšna y ndocnábiöye buanjaleséncia jushañe chaotsendbemama tsoje jtsamashënguama y jt-satbëbama.

<sup>44</sup> Chíyeca, tšëngaftángnaca šmochtseprontana, er Bëngbe Bëtsá Entsó tbojanbemá echanjésabo, entsanga chama tondaye chamontsejuabná ora ca” — Jesús tojánayana.

### *Chë tšabe oservená y chë ndoñe tšabe oservená*

*(Lc 12.41-48)*

<sup>45</sup> “¿Nda yomna chë oservená ntšamo chë nduiño tojtsebošcá amá y nýets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanýenama y jasama tojtsemna ora chaújuatšema.

<sup>46</sup> Chë nduiño tojtashjango ora, chë oservenábiöye tbojínýena ntšamo ibomncá jtsamëse, chë oservená puerte oyejuayá echántsemna.

<sup>47</sup> Ndegombre cbéyana, chë nduiño chábioye bochanjaimpáda lempe chabe soyënga chabotsinýeñama.

<sup>48</sup> Pero chë oservená bacna entsá tomnésna, jajuaboyana chë nduiño ndoñe betsko yochantabo ca,

<sup>49</sup> y as, cha jóntšana chë inýe oservénënga jtsajantsetayana, becá jtsesana y jtsetmuana inýe tëmiëngaftaca.

<sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango.

<sup>51</sup> Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinýinýnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšëjójnaye ca” —Jesús tojánayana.

## 25

### *Chë bnëtsana tobiašëngbiama cuento*

<sup>1</sup> Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canýe casamento fiestentše tojanopasacá. Mëntsá yojopása: Bnëtsana tobiašënga chëngbe querosine uajuinýanëshangá imojëftsájaca y imojábocana chë casamentero boyabása jajébenguama.

<sup>2</sup> Chë bnëtsana tobiašënguentsana, shachnënga sempre enójuabnayënga imnamna, y chë inýe shachnënga, ndenójuabnayënga.

<sup>3</sup> Chë ndenójuabnayëngna chëngbe uajuinýanëshangá imojëftsájaca, pero querosine ndoñe imonjuabuyamba chë uajuinýanëshangañe cachiñe jtaftsuámama.

<sup>4</sup> Pero chë sempre enójuabnayëngna chëngbe uajuinýanëshangá imojëftsájaca y querosinënaca botellëšënguiñe imojuabuyamba.

<sup>5</sup> Chë casamentero boyabásana ndoñe betsko yonjabo, chíyeca nyetsca tobiašënga ocnayana yojubuache y imojtsomaná.

<sup>6</sup> Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajébenguama mobocana ca!’

<sup>7</sup> Asna, nyetsca tobiašënga imojotsbaná y imojóntša chë uajuinýanëshangá juabopróntana.

<sup>8</sup> Chorna, chë shachna ndenójuabnaye tobiašënga chë inýe shachnënga siempre enójuabnayëngbioye imojáuyana: ‘Diosmanda tsëngaftangbe querosinentšana baseytema šmëbuatšatá, bëngbe uajuinýanëshangá tojontšë jtsafsanana ca.’

<sup>9</sup> Pero chë siempre enójuabnayëngna imojayana: ‘Ndoñe. Tchojubuatšatase, tsëngaftangbiama y bëngbiámnaca querosine echántasshbe. Más tsabá entsemna, chë querosine mondbétsenoye chašma y tsëngaftangbiama chašmauábuamiñe ca.’

<sup>10</sup> “Chorna, chë shachna ndenójuabnaye tobiašënga imojá chë querosine jauabuámiyama; pero chëntscuana chë casamentero boyabása yojáshjango y chë siempre enójuabnayënga cháftaca chë casamento fiestoye imojámashjna, y chentsa bësása imojtatame.

<sup>11</sup> Chentsana chë inýe tobiašënga imojáshjajna y mëntsá imojtsichamo: ‘¡Taita, Taita, šmëbëtafjo ca!’

<sup>12</sup> Pero chë casamentero boyabása yojójua: ‘Ndegombre cbéyana, tsëngaftanga ndoñe quecbatëbuatma ca.’

13 “Cachcá echántsemna Bëngbe Bëtsá Entśá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatsëmbo ndayté, ni mocna ora chca yochjopásama ca” —Jesús tojánayana.

*Chë crocenánama cuento  
(Lc 19.11-27)*

14 “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama.

15 Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

16 Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye.

17 Chë uta uaranga yojoyëngacñá cachcá yojama y inÿe uta uaranga yojábotiye.

18 Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentšana baytese chë oservénëngbe amëndayá yojtashjango y yojóntša chë crocenánama chënga jatjyana.

20 Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntśá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’

21 As chë mandayá ibojauyana: ‘Tša tšabá, tšabe oservená y ntšamo tsboščá amá. Aca quem base soyiñe lempe ntšamo tcojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

22 Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’

23 As chë mandayá ibojauyana: ‘Tša tšabá, tšabe oservená y ntšamo tsboščá amá. Aca quem base soyiñe lempe ntšamo tcojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átšeftaca cochjóyejuaye ca.’

24 “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatsëmbo aca canÿe tšátjaye entśá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana.

25 Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’

26 As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse,

27 aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyëngacñe y chë chentšana tojoboté crocénanënaca ca.’

28 Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca.

29 Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

30 “Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftësjojnaye ca’ ” —Jesús tojanëyana.

*Ntsamo chë quem luare jopochócama ora, nyetsca entsangbiana mochjayana*

31 Mëntsánaca Jesús tojánayana: “Chë Bëngbe Bëtsá Entsó tbojanbemá chabe obenánaca, buashinÿinÿaniñe y nyetsca chabe angelotémëngaftaca chaojésabo ora, chë reybiama puerte buashinÿinÿana tbemaniñe echanjótbema.

32 Chora nyets luarëngoca entsanga chabe natsanoica mochanjénefjna, y cha, entsanguentsana ínÿenga echanjábacacaye, mo chë oveshënga abujajëña oveshënga chivëngbentsana endbetsabacacaycá.

33 Chë abujajëña, oveshënga chabe catsbioica echanjáchembo y chivëngna chabe uañicuayoica. Bëngbe Bëtsá Entsó tbojanbemá cachcá echanjama: chë ubuáyanënga chabe catsbioica echanjúbuaja y chë bacna entsangna chabe uañicuayoica echanjátsaye.

34 “Chorna chë Rey, Bëngbe Utabná, chabe catsbioica chamojtsemna entsanga echanjáuyana: ‘Tšëngaftanga, Atšbe Taitá tšábeñe cmëtabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana.

35 Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafšë; inÿe luarocana ashjargonacá sënjánana y posada šmonjanántšame.

36 Enaşá sënjánana y entsáyá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámëna y jabëuatsëtsayama šmonjánabo ca.’

37 “As chë Bëngbe Bëtsá chabe bominÿiñe tšábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjanajuatšë? ¿Ntseco uajuendayá tcbënjáninÿe y tcbënjanaafšë?

38 ¿O ntseco inÿe luarocana ashjargonacá tcbënjáninÿe y posada tcbënjanaántšame, o enaşá y entsáyá jtichëtjuama tcbënjanaëtšetá?

39 ¿O ntseco šocá o cárceloca utamená tcbënjáninÿe y jauatsëtsayama tifjana ca?’

40 “As chë Utabná echanjóju: ‘Ndegombre cbëyana, lempe ntšamo chë atšbe catsátanguentsana chë más batšá uámanëngaftaca šmojamcá, cach átšeftaca šmonjanma ca.’

41 “Chentsana chë Utabná chabe uañicuayoica chamojtsemna entsanga echanjáuyana: ‘Atšbentsana mojuánanga atšbe Bëtsabe uabotëñënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiana.

42 Er atše shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanaafšë;

43 inÿe luarocana ashjargonacá sënjánana y ndoñe posada chešmatanaántšame. Enaşá sënjánana y ndoñe entsáyá chešmatanaëtšetá; šocá sënjanájona y cárceloca sënjanëtámëna y ndoñe chešmatanatsëtsá ca.’

44 “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjargonacá, o enaşá, o šocá o cárceloca utamená y ndoñe tcbënjanajabuache ca?’

45 “Y chë Utabná echanjóju: ‘Ndegombre cbëyana, tšëngaftanga ntšamo chë atšbe catsátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmátanma ca.’

<sup>46</sup> “Chëngna infiernoye nÿetsca tescama mochantsësetjango, y chë Bëngbe Bëtsá chabe bominjíñe tšábenga tojábiamëngna chë nÿetsca tescama yomna tšabe vida mochántsebomna ca” —Jesús tojánayana.

## 26

*Entšanga tmojanjuabó ntšamo jamëse Jesús jishachama*  
(Mc 14.1-2; Lc 22.1-2; Jn 11.45-53)

<sup>1</sup> Lempe chca tojánayanentšana, Jesús chabe uatsjëndayënga tojanëyana:

<sup>2</sup> “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ínÿengbe cucuatšíñe mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefna, Caifás, chë bachnangbe más uámana amëndayabe bëts yebnentše.

<sup>4</sup> Tmojanenojuabó y tmojanenoyeuná jtseíngñase Jesús jishachama, y jtsóbama.

<sup>5</sup> Pero imojtsichamo: “Quem fiestëntscuana ndoñe, entšanga yapa muanjótša enbouenanana ca.”

*Canÿe shembása botamana uanguëtše béjaye Jesusbe bestšašíñe tbojanbuešcja*

(Mc 14.3-9; Jn 12.1-8)

<sup>6</sup> Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše.

<sup>7</sup> Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtše béjayeca. Jesús mesëshentše yojtsemnëntscuana, chë shembása chabe bestšašíñe chë botamana uanguëtše béjaye tbojanbuešcja.

<sup>8</sup> Chë uatsjëndayënga chca tmojáninÿe orna, tmojanotjayaná y tmojanontšë ichámuana: —¿Ndáyeca nÿe bonamente chë soye chca yojtsemna ca?

<sup>9</sup> Chamna, matmënjobenanga chë béjaye becá crocenánama juiyana y chánaca ndbomnjëmënga matmënjújabuache ca.

<sup>10</sup> Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonyaye ca? Ntšamo tonjamcá tšabá entsemna.

<sup>11</sup> Er chë ndbomnjëmëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quicháisemna.

<sup>12</sup> Ntšamo chë shembása tojamcá, chë botamana uanguëtše béjaye atšbe cuerpiñe jabuéšcjëse, cha šontseprónta atše juatbontsa tescama.

<sup>13</sup> Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entšanga chabiamama chamotsenójuabnama ca —Jesús tojanëyana.

*Judas tojána bachnangbe amëndayëngbioye, Jesús chamuishachama*  
(Mc 14.10-11; Lc 22.3-6)

<sup>14</sup> Canÿa chë bnëtsana uta uatsjëndayënguentšá, Judas Iscariote ca uabainá, tojána bachnangbe amëndayëngaftaca jencuéntama.

<sup>15</sup> Y tojanatjá: “¿Ntsachetšá šmatjtabuénaye y Jesús tšëngaftangbe cucuatšíñe chochjayentšbashejuana ca?”

As chëngna, unga bnëtsana ralbenga tmojtanabuená.



16 Y cach orscana Judas yojtsenguaye ntšámose y ntseco ora, Jesús chëngbe cucuatšíñe jayentšbáshejuanama.

*Jesús chabe uatsjédayëngaftaca Bashco saná tojanse  
(Mc 14.12-25; Lc 22.7-23; Jn 13.21-30; 1 Co 11.23-26)*

17 Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjédayënga Jesúsbioye tmojanobeconá y tmojantjá: — ¿Ndémoca aca cojtseboše bënga fchaiprontama Bashco saná chacosama ca?

18 Y Jesús tojanéyana: —Chë bëts puebloye motsajna canýe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atšbe acbe yebnoye sëntsá, Bashco fiesta jamama atšbe uatsjédayëngaftaca ca.’”

19 As chë uatsjédayënga tmojanma ntšamo Jesús tojanamëndacá y chë Bashco fiesta saná tmojanprontá.

20 Y tojanibétata orna, Jesús chë bnëtsana uta uatsjédayëngaftaca mesëshentše yojtsemna.

21 Y imojtsesantscuana, Jesús tojanéyana: —Ndegombre cbéyana, canýa tšëngaftanguentšá uayayëngbe cucuatšíñe šochanjáboshjona ca.

22 Chora chë uatsjédayënga puerta ngménaca imojtsemna y tmojanontsé canýánýa Jesús jatjayama: —Bëngbe Utabná, ¿nderado atšbe cha chtsemna ca?

23 As Jesús tojanéjua: —Canýa nda chabe tandëse entsefchecuacná cach atšbe sëntsefchecuacná šcnenentše, cha uayayëngbe cucuatšíñe šochanjáboshjona.

24 Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrënguiñe chabiamana iuayancá; pero, itša lastema chë bochjáboshjonabiamana! Más tšabá chabiamana manjamna ndoñe ntjónýnana ca.

25 As Judas, chë boshjuaná, Jesúsbioye tbojantjá: —Buatëmbayá, ¿nderado atšbe chtsemna ca?

Y Jesús tbojanjuá: —Ndegombre tcjayana ca.

26 Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjédayënga tojanatšatá. Y mëntšá tojánayana: “Mocñënga, mosënga. Atšbe cuerpo entsemna ca.”

27 Chentšana, canýe coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëfšasé. Y mëntšá tojánayana: “Nýetscanga quem coptémentšana mofšenga.

28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aíñe yochjochnënguama. Chë buiñe bëtsá entšangbiamana echanjuábuashana, chëngbe bacna soyëngama perdonánënga chamotsemnana.

29 Y ndegombre cbéyana, morscana atšbe ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

*Jesús tojánayana, chábioye ndoñe bonjanabuátma ca Pedro yochjánayanama  
(Mc 14.26-31; Lc 22.31-34; Jn 13.36-38)*

30 Bëngbe Bëtsá jëtschuayama tmojancantá chentšana, Olivos tjashoye tmojëftsanbocana.

31 Choca Jesús tojanéyana: —Tšëngaftanga nýetscanga quem ibeta átšbeñe ošbuáchiyana šmochantsobuetše y šmochántšacheta, er Bëngbe Bëtsabe uabemana palabrënguiñe, cha mëntšá tojánayana: “Chë oveshëngbe abuaijénýa

chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

<sup>32</sup> Pero obanënguentšana chaitayenentshana, tšëngaftangbe natsana Galileoye chanjá ca —cha tojanëyana.

<sup>33</sup> Chora Pedro tbojanjuá: —Masque nÿetscanga ábeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

<sup>34</sup> As Jesús tbojanianyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

<sup>35</sup> Pero Pedro tbojanianyana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nÿetsca uatsjëndayëngnaca cachcá imojtsichamo.

*Getsemaní luarentše Jesús Bëngbe Bëtsáftaca tbojanencuentá  
(Mc 14.32-42; Lc 22.39-46)*

<sup>36</sup> Chentshana, Jesús chabe uatsjëndayëngaftaca canÿe luare Getsemaní ca uabáinoye tojána. Choca tojanëyana: “Muentše motbiama, chëntscuana atše choye chanjá Bëngbe Bëtsáftaca jencuéntama ca.”

<sup>37</sup> Y Pedro y chë Zebedeobe uta uaquiñata tojëftsanëbiatše. Choca yojóntša puerte ngménaca y corente cochtsetšenaná jtsemnama.

<sup>38</sup> Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

<sup>39</sup> Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>40</sup> Chentshana, Jesús chabe unga uatsjëndayëngbioye tojtanabo y chëngna innétsomañe. Chca tojánanyëna ora, Pédrëbioye tbojanianyana: “¿Ni mo canÿe horatema tšëngaftanga šmonjobená átšeftaca jtsefšnana ca?”

<sup>41</sup> Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanëyana.

<sup>42</sup> Uta soyama tojtesaná y mëntšá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondëtsemnama jamama ndoñe jopódianësna, nÿe ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjëndayënga cachiñe innétsomañe; yapa ocnaye causa nÿe imojtsefshétana.

<sup>44</sup> As Jesús cachcá yojëftsënÿaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

<sup>45</sup> Chora chë uatsjëndayëngbioye tojtanabo y tojanëyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucuatšine mochanjáboshjona.

<sup>46</sup> Motsbananga, cuajna. Minÿënga, chë boshjuaná ya entsebeconá ca.”

*Uayayënga Jesús tmojánishache  
(Mc 14.43-50; Lc 22.47-53; Jn 18.2-11)*

<sup>47</sup> Jesús cabá yojtsóyebuambnantscuana, Judas, canÿe chë bnétsana uta uatsjëndayënguentšá, tojánashjango, y cháftaca imojtsemna ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga.

<sup>48</sup> Judas, chë boshjuaná, tojanjuabó ntšamo jamana entsanga jinÿanÿiyama ndëmua Jesús bétsemnana. Chíyeca yojáuyana: “Nda chajauámocho, cha echántsemna. Smochjishache ca.”

<sup>49</sup> Cachora Judas Jesúsbioye tojanobeconá y tbojanchuá: —Buajtana, Buatëmbayá ca.

Y tbojtanámocho.

<sup>50</sup> Jesús tbojaniyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

<sup>51</sup> Chca orna, canÿe enutá Jesúsfeftaca yojtsemná, chabe espadéja tojanenosëngbotëntšena, y chë bachnangbe más uámana amëndayabe oservenábioye canÿe matscuaše tbojtsanëštjango.

<sup>52</sup> As Jesús tbojaniyana: “Espadéja matosëngbuajonÿá. Nda espadéjaca tbojóba chana, cach espadéjaca echanjóba.

<sup>53</sup> ¿Aca ndoñe condétatsëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca?

<sup>54</sup> Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entsanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canÿe bacá uamana entsá cuaftsemncá ca? Atše cada te Bëngbe Bëtsabe bëts yebnocá tšëngaftangaftaca sënjántbemana abuátambaye, y choca ndoñe chešmátanishache.

<sup>56</sup> Pero lempe quem soyënga chca entsopasana, cachcá chaotsemnana ntšamo Bëngbe Bëtsabe uabemana palabrënguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nyetsca uatsjëndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonÿá.

*Jesús tmojanánatse chë judiëngbe más uámana amëndayëngbioye*

*(Mc 14.53-65; Lc 22.54-55, 63-71; Jn 18.12-14, 19-24)*

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefjna.

<sup>58</sup> Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnocá josticiëngaftaca yojótbema, chca, jtsetatsëmbuama ntšamo yochjopásama.

<sup>59</sup> Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama,

<sup>60</sup> pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango,

<sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

<sup>62</sup> As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>63</sup> Pero Jesús nÿe iyteca yojtsemna. Chíyeca chë bachnangbe más uámana amëndayá tbojaniyana: —Bëngbe Bëtsá Ainabe mándoca cbomandá

chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entšanga šochjátëjaboto Jesusbe contra chamuayanama?

<sup>66</sup> ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entse-bomna; jóbanama bontsemna ca.

<sup>67</sup> Chora tmojanontšé Jesús juebëbuashëtjnayana, jabuache jantšetayana y inÿengna imojtsejuëbjantšetaye,

<sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oye-buambnaya tcomnëse, ¡momalisiá nda tcmënjjantšetá ca!”

*Pedro tojánayana Jesúsbioye ndoñe bonjanabuátma ca*  
(Mc 14.66-72; Lc 22.55-62; Jn 18.16-18, 25-27)

<sup>69</sup> Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobconá y tbojanianana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

<sup>71</sup> Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanëyana: —Cha, Jesús chë Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mëntšá yojtsejúrayer: —¡Chë boyabása ndoñe quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobconá y tmojanianana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontšé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta.

<sup>75</sup> Y Pedro yojenójuaboye ntšamo Jesús tbojanianama. Cha mëntšá tbojanianana: “Cabá ngallo ndëcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngménaca yojt-senóbošachna.

## 27

*Jesús, Pilátbioye tmojanánatse*  
(Mc 15.1; Lc 23.1; Jn 18.28-32)

<sup>1</sup> Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama.

<sup>2</sup> As, Jesús tmojanëcuëbatsëca y tmojanánatse, y chca, Pilato, chë Judeoca Romano mandadbe cucuatšhiñe tmojánboshjona.



### *Ntšamo Judas tojanóbana*

<sup>3</sup> Judas, chë boshjuaná, Jesús jóbanama ibojtsemnama tojanuena ora, puerte yojtsenócochinýena ntšamo tojánchjanguama, y chë unga bnétsana ralbenga chë bachnangbe amëndayënga y bëtsëjemëngbioye tojtanamba,

<sup>4</sup> y mëntsá tojanëyana: —Puerte bacna soye tijama. Atše canýe bacna soye ndbomná tšëngaftangbe cucuatšifne tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca cochátotatsëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtšana, y yojá y yojétsentsešaye.

<sup>6</sup> Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buifne echanjuábuashana; ntšamo leyifne endayancá, bënga ndofne quemuátobena chë Bëngbe Bëtsabiana soyënga quëcjnyëtémiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canýe luare jtsebomnama ndayentše chë inýe luarëngocana entšanga áshjajnënga jutabuantsama.

<sup>8</sup> Chíyeca, chë fshantse mëntscoñama Buiñe Luare ca iuabaina.

<sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oye-buambnayá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnétsana ralbenga tmonjanca, ntsachetšá chë Israeloca entšanga cha tmojanamananacá,

<sup>10</sup> y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

### *Jesús Pilatbe delante*

*(Mc 15.2-5; Lc 23.2-5; Jn 18.33-38)*

<sup>11</sup> Chentšana Jesús, chë mandado Pilátbioye tmojanánatse y cha mëntsá tbojtantjá: —¿Aca chë judiëngbe rey cojtsemna ca?

Y Jesús tbojanjuá: —Aifne, aca ndegombre yomncá tcjayana ca.

<sup>12</sup> Chë bachnangbe amëndayënga y chë bëtsëjemënga Jesús mal imojtse-quédantscuana, cha ndocá ntjojuana.

<sup>13</sup> Chíyeca Pilato tbojtantjá: —¿Ndoñe contsuenana lempe ntšamo acbe contra montsichamcá ca?

<sup>14</sup> Pero Jesús ni canýe palabra ndofne ntjojuana. Chë causa, chë mandado ndofne yontsetátšëmbo ntšamo jajuaboyana.

### *Jesús chaóbana ca tmojánayana*

*(Mc 15.6-20; Lc 23.13-25; Jn 18.38-19.16)*

<sup>15</sup> Bashco fiesta ora, chë mandado yojanamana canýe utamená jëtsboshjonana, nda entšanga tmojuabuayaná.

<sup>16</sup> Chë tempo canýe uachuana utamená inamna, Jesús Barrabás ca uabainá.

<sup>17</sup> Nýetsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšifne tmojánboshjonama.

<sup>19</sup> Pilato chë tribunal ca uabáinentše yojtsetbemanëntscuana, chabe shema canýa tbojanichmó mëntsá cha jauyanama: “Chë nýetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe amëndayënga y chë bëtsëjemënga entšanga tmojanayënaná, Barrabás jëtsboshjonama y Jesús chaóbana ca chamuayanama.



21 Chora chë mandado cachiñe tojanatjá: —¿Chë útatentšana nda smojtseboše atše chjëtsboshjonama ca?

Y chënga tmojánayana: —¡Barrabás ca!

22 Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

23 Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

24 Ndocá jamama yontsobenama y entšanga más jabuache enbouenanama tmojanontšema Pilato tojáninye ora, cha tojanmandá búyeshe juabuýyëboñana y nyetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe smonjama ca.

25 Chora nyetsca entšanga tmojanjuá: —¡Quemuá yochjóbanama, bënga y bëngbe básengbiana castigo chaotsemna ca!

26 As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinë tbojánboshjona chamocrucificama.

27 Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyetsca soldadënga chabe shëconana tmojanójoto.

28 Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo.

29 Canye coronësha tmojanapormá uchmašëfjangaca y tmojanabestšajó, y catsbioica cucuatšinë canye niñëfja. Chorna, chabe shecuatšentše imojtsfshëntsamentšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

30 Chëngnaca imojtsanbuashëtjnaye y cach niñëfjaca bestšašentše imojtsétsjanjnaye.

31 Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

### *Jesús tmojanrucificá*

*(Mc 15.21-32; Lc 23.26-43; Jn 19.17-27)*

32 Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

33 Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”),

34 Jesúsbioye vínoye hiéloyeca enájubniye tmojanabuiyé chaofšema; pero yojaftántia y ndoñe yonjábošena chiye jofšiyama.

35 Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama.

36 Y chora chënga chentše tmojanotbiama Jesús jtsebojanýama.

37 Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

38 Utata bacna soye ochjajnayátnaca chënga chentše tmojanrucificá, canya Jesusbe catsbioica y chë ínýana chabe uañicuayoica.

39 Y chëjana imojtsachnëjuana entsangna, Jesús imojtsóyenguaye, imojt-sobestšfshanenaye

40 y imojtsatsaye: “¡Aca chë icobena Bëngbe Bëtsabe bëts yebna jt-senásatajhcana y nÿe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

41 Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo:

42 “Cha ínÿenga tojëftsatsebacá, pero cachá jëntsbecama ndoñe quenátobena. Cha Israeloca entsangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye.

43 Cha tojayana Bëngbe Bëtsábeñe puerta yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

44 Y chë bacna soye ochjajnayata, Jesús eftaca ibojtsecrucificanánaca cachcá ibojtsóyenguaye.

### *Jesús tojanóbana*

*(Mc 15.33-41; Lc 23.44-49; Jn 19.28-30)*

45 Nÿetsto orscana las tresëntscoñe, nÿets quem luare yojtseibétata.

46 Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonÿá ca?”)

47 Chca tmojanuena ora, báseftanga chentše imojtsemna entsanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

48 As chora, chentša canÿa tojëftsánótjajo canÿe esponjëshe janguanguama, untja vínoyeca chëshe tojanfchecuacué, canÿe niñëfjiñe tojananguësëtjo y Jesús bioye tojanbeconá chaofšema.

49 Pero ínÿengna tmojánayana: “Cachcá mochjonÿaye, er Elías tayochjabo jabátsbocama ca.”

50 Pero Jesús cachiñe jabuache tojanoyó y tojanóbana.

51 Y cachora, Bëngbe Bëngbe Bëtsabe bëts yebnoca yojújonÿana entsëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonÿana. Fshantse yojuangmëmëmana, ndëtsbënga yojt-sashtëtšana,

52 y chë cuevëshënga obanëngaca yojtsëtëfjo y banga Bëngbe Bëtsabe entsanga tmojtanayena.

53 Y chënga, Jesús tojtanayenentšana, chë cuevëshënguentšana tmojánbocana, y Jerusalén, chë uámana bëts pueblo ca uabáinoye tmojánamashjna y ba entsángbioye tmojánëbëbuacana.

54 Chë soldadëngbe amëndayá y chë ínÿenga, Jesús jtsebojanÿama cháftaca tmojanoquedanga, chë fshantse yojuangmëmëmanama tmojáninÿe ora, y nÿetsca chë yojtsëchnëjuana soyëngama, puerta auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

55 Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana.

56 Chë shembásengbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### *Jesús tmojanatbontsá*

*(Mc 15.42-47; Lc 23.50-56; Jn 19.38-42)*

57 Ya yojtseibétatana ora, canÿe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná.

<sup>58</sup> José tojána Pilato jinýama, Jesusbe cuerpo jotjañama. As Pilato tojan-  
mandá chë cuerpo chamontšabuáchema.

<sup>59</sup> José chë cuerpo tojanca y canýe nduatsenga lino entsëjuaca tbojanand-  
maná.

<sup>60</sup> Y canýe chabe tsëm cuevëshiñe tbojanjajó. Tempo cha inamánda chë  
cuevëshna ndëtšbenguiñe chamopormama. Canýe bëts ndëtšbé tojansjoná y  
chë cuevëshoye amashjuanentše tojánachto; y chentšana José yojtsatoñe.

<sup>61</sup> Pero María Magdalena y chë inýe Mariyna chentše tbojtsanoquedañe y  
chë cuevëshe ndirichiñe tbojanótbema.

### *Soldadënga tmojána Jesús yojtsatbontsánentše jtsebojanýama*

<sup>62</sup> Yëfsana, chë ochnayté, chë bachnangbe amëndayënga y chë fariseunga  
cányiñe tmojána Pilato jinýama.

<sup>63</sup> Tmojaniyana: —Taita, bënga fsëntsejuabná ntšamo chë bostero cabá ainá  
ora tonjánayanama, chë unga tianoye cha jtayenama ca.

<sup>64</sup> Chýyeca, momandá chë cuevëshe soldadënga chamotsashanyá unga  
tentscuana. Chca, chabe uatsjédayënga ndoñe ibeta chamondabo chabe  
cuerpo jabétsatbëbama, y chentšana chënga entsanga chamúyana, Jesús toj-  
tayena ca. Y chca, chabiamá quem ústonoye bostero soye, chë cachabiamá  
tojánayana soyëngama puerte más bacá nántsemna ca —chënga tmojaniyana.

<sup>65</sup> As Pilato tojanéyana: —Tšëngaftanga cach tšëngaftangbiama soldadënga  
šmondábamna. Motsajna y chë cuevëshe cuedádoca šmochtsashanyá, ntšamo  
šmondétatšëmbcá ca.

<sup>66</sup> Chora chënga tmojána chë cuevëshe jtsashanyama; chë  
ndëtšbena, tsengájašeca imojuinýnaná, ntsotatšëmbcá ndocná choye  
chaondámashënguama, y soldadënga chentše tmojëftsanabashejuana.

## 28

### *Jesús tojtanyena*

*(Mc 16.1-8; Lc 24.1-12; Jn 20.1-10)*

<sup>1</sup> Ochnayté chentšana, chë inýe semana bojatsenté yojtsebínýana ora, María  
Magdalena y chë inýe María tbojána cuevëshoye jarrepárama.

<sup>2</sup> Ndeolpe fshantse tojanangmëmmana, er Bëngbe Bëtsabe canýe ángel celo-  
cana tojántsma, chë cuevëshoye tojanobeconá, chë atamiana ndëtšbé tojtsan-  
juaná y chiñe tojanótbema.

<sup>3</sup> Chë ángelna mo canýe tcuinýejcá yojtsebuashinýinýana, y chabe  
uichëtjonëjuangá uafjantsëjuangá mo jantšetëshcá yojtsamna.

<sup>4</sup> Chë soldadënga chca tmojáninýe ora, de auatja yojtsangmëmnye y mo  
obanëngcá imojtsemna.

<sup>5</sup> Chora chë ángel chë shembásatbioye tojanéyana: “Ndoñe batauat-  
jana. Atše sëntsetatšëmbo tšëngaftanga Jesús, chë tmonjancrucificá cha  
šmojtsenguama.

<sup>6</sup> Cha muentše ndoñe quenátsmëna; cha tontayena, ntšamo cachá ton-  
janayancá. Mabata y šochjinýe cha endëtsesegoranentše.

<sup>7</sup> Betsco motsata y chë uatsjédayënga šochjáuyana: ‘Jesús tontayena y  
tšëngaftangbe natsana Galileoye echanjá; choca šmochanjinýe ca.’ ” Y chora  
cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata  
pero puerte oyejuayata, y tbojëftsanotjajo chë soye chë uatsjendayëngbeñe  
jobuambayama.

<sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbo-  
janobéconata, tbojtanadorata y chabe shecuatše shëconana imojtbojcuá.

10 Y Jesús tojanéyana: “Ndoñe batauatjana. Motsata atšbe uatsjédayënga, atšbe catšátanga jáuyanama Galileoye chamotsá y choqa atše šmochjinýe ca.”

*Ntsamo chë soldadënga tmojánayana ndayá tojanochñënguama*

11 Chë shembásata ibojtsayëntscuana, básefta soldadënga chë bëts puebloye tmojána y ntsamo tojanopasacá lempe chë bachnangbe amëndayëngbeñe tmojanobuambá.

12 As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá,

13 y mëntsá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjédayënga tmojabo y chabe cuerpo tmojabétsatbëba ca.

14 Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

15 As chë soldadënga chë crocénana tmojanóyëngacñe y tmojanma ntsamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

*Jesús chë uatsjédayënga tojanichamó, Bëngbe Bëtsabe soyëngama nyëtsquénache jábuayenama*

*(Mc 16.14-18; Lc 24.36-49; Jn 20.19-23)*

16 Chentsana, chë bnëtsana canýe uatsjédayënga Galileoye tmojána, chë ndëmua tjoye Jesús chënga tojanabuayená choye.

17 Y Jesús tmojáninýe ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca.

18 Jesús chëngbioye tojanobeconá y tojanéyana: “Bëngbe Bëtsá nyëts mando atše šonjatšetá celoca y quem luarentše.

19 Chcasna, motsajna, nyëts luarënguenache oyenënga atšbe uatsjédayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca,

20 y šmochjabuatambá lempe ntsamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.

## San Marcos

*Juan chë Ubayaná entsanga yojanabuayiyná  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Měntšá tojanoboatsé chë tsabe noticiënga Běngbe Bětsabe Uaquiñá Jesu-cristbiamá.

<sup>2</sup> Ntšamo bayté entsemna, chë Běngbe Bětsabe juabna oyebuambnayá Isaías chabe librěšaňe yojěftsayancá, ntšamo Běngbe Bětsá chabe Uaquiñábioye ibojauyanama cha tojanábema ora:

Minýe, atšbe abuyaiynayá acbe natsana sěntsichamná, chë aca jabama lempe echanjaprónta cha.

<sup>3</sup> Entšanga ndoyena luaroca cha enduáyebuache měntšá:

“Běngbe Utabná echanjabo ca;

mo nda canýe benache tojtseprontacá canýe uámana entšá jashjanguama, cachcá tsěngaftanga, cha jabama ainaniňe tsabe juabněngaca šmochtseprontana ca” –cha tojanábema.

<sup>4</sup> Chcase, Běngbe Bětsá Juan tbojanichmó, y cha tojánbocna entsanga ndoyena luaroca, Běngbe Bětsabe soyěngama abuyaiynaye y entsanga ubáyana. Cha entsanga yojanětsěsnaye: “Tsěngaftangbe bacna soyěngama ngmėnaca šmochtenójuaboje, chca amana šochtsajbaná, y Běngbe Bětsabe benache šmochtishache. Chora chochjúbaye, y Běngbe Bětsá tsěngaftangbe bacna soyěngama cmochanjáperdonaye ca.”

<sup>5</sup> Nýets Judea luarocana chábioye entsanga imojánbocana, y Jerusale-nentšana nýetsca entšágnaca, y Běngbe Bětsábioye chěngbe bacna soyěngama jaimpáda chentšana, Juan Jordán ca uabaina bėjayiňe chěnga yojaněbáyana.

<sup>6</sup> Juanbe entsáyá inauapormana camellbe stjėnasheca y bobache yojanas-nana; chapulinatémėnga y tjaňe méloye inasaye.

<sup>7</sup> Y měntšá entsanga yojanětsěsnaye: “Atšbe ústonoye inýa echanjabo, atšbiamá más obenana bomná; chíyeca atše merecido taitatobuajoňe, ni mo jotsejbiyana chabe shecochětjoněshentša corriēja jajafjonama.

<sup>8</sup> Atšna búyeshca cbondėubáyana, pero chë echanjabábeyecna, Běngbe Bětsá bochanjíchmua chë Uámana Espíritu tsěngaftangbe ainaniňe cháumashěnguama ca.”

*Juan, Jesúsbioye tbojanabaye  
(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblentšana Jesús yojěftsebocna, y Juan yojtsemnoye tojána; y Jordán bėjayiňe Jesúsbioye cha tbojanabaye.

<sup>10</sup> Bejajoicana yojtashěbėbocna orna, tojáninýe celoca atěfjniňe, y chë Uámana Espíritu chábioye mo palomatemcá yojtsastjajuana.

<sup>11</sup> Y celocana Běngbe Bětsá měntšá tbojanianyana: “Acna atšbe bonshana Uaquiñá condmėna; acbiamá corente sěntsoyejuá ca.”

*Jesús tojanobená Satanás jayěňjanama  
(Mt 4.1-11; Lc 4.1-13)*

<sup>12</sup> Chentšana chë Uámana Espíritu Jesúsbioye entsanga ndoyena luaroye tbojanánatse.

<sup>13</sup> Canta bnětsana te chë entsanga ndoyena luaroca tbojanjėtana, y Satanasna yojanabó jisháchichiyama. Chë luarentše tsátjaye bayěnga imnajena; chentšana, Běngbe Bětsabe angelěnga cha imojtseserverna.



*Jesús tojanontsé Galileoca chabe trabajo jamana  
(Mt 4.12-17; Lc 4.14-15)*

<sup>14</sup> Juan cárceloye tmojanétámentšana, Jesús Galileoye tojesaná; y chiñe cha yojanabuayiyá chë tsabe noticiënga Bëngbe Bëtsabiama.

<sup>15</sup> Jesús entšanga yojanëtsëtsnaye: “Ora tocjobuache, Bëngbe Bëtsabe amëndayana echanjóshjango. Tsëngaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiama šmochjóyëngacñe ca.”

*Jesús tojánachembo canta boyabásenga beonga ashebuánayënga cha chamuas-tama*

*(Mt 4.18-22; Lc 5.1-11)*

<sup>16</sup> Galilea uafjajónaye tsachajana Jesús yojtsaye ora, cha tojánanýe Simón y chabe uabentsá Andrés; chatna atarraiešhangá ibnetsashbuëtsetsañe, er beonga ashebuánayata chata ibnamna.

<sup>17</sup> Chora Jesús tojanëyana: “Atseftaca mabata. Atse cbochanjábiamá Bëngbe Bëtsabiama entšanga anguayata; y morscana, nýe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiešhangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanýe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraiešhangá atapórmayíne.

<sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesús seftaca tbojtsanoñe.

*Jesús, bacna bayëjbe juabna cánýabioye tbojanbojuaná  
(Lc 4.31-37)*

<sup>21</sup> Chentšana, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama.

<sup>22</sup> Entšanga imojtsenjanaye ntšamo Jesús yojtsabuatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuatambayënga imojanabuatambacá.

<sup>23</sup> Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana:

<sup>24</sup> —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatsëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayëjbioye tbojtsanácacana, y tbojanianyana: —¡lytëca móbema y chábentšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna.

<sup>27</sup> Chama, nýetsca entšanga ojanánënga imojtsemna, y mëntšá imojtsenjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjenga cha jtsamëndayana y chëngnaca joyeunayana ca!”

<sup>28</sup> Y betesco nýets Galilea luarentša pueblënguenache Jesusbiamá yojtsótatsëmbo.

*Jesús, Simón Pédrëbe uambén mamábioye tbojanshná  
(Mt 8.14-15; Lc 4.38-39)*

29 Chentšana, chë enefjuana yebnentsšana tmojánbocana y Santiago y Juánoftaca Jesús tojána, Simón y Andresbe yebnoye.

30 Simonbe uambén mamá šocá inajájona, jabuache calentóracá, y Jesúsbioye chë šocabiama tmojanianyana.

31 As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

*Jesús ba šoquënga tojanashná  
(Mt 8.16-17; Lc 4.40-41)*

32 Chë te jetiñe, shinÿe ya yojuenatjëmbe ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse;

33 y nÿetsca entšanga bëšoye imojobeconá.

34 Jesús banga tojanashná, nÿetsca šocana bomnënga, y ba bacna bayëjënga entšanguentsšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátsëmbo cha chë Cristo bétsemnama.

*Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiná  
(Lc 4.42-44)*

35 Yëfsana cabá cachëse, cabá ibetcá, Jesús tojëftsantsbaná, chë pueblentsšana tojëftsanbocna y entšanga ndoyena luaroye tojtsanoñe, choca Bëngbe Bëtsáftaca jencuëntama.

36 Pero Simón y chabe enutëngna tmojána jetsenguanguama;

37 y tmojtsaninÿena ora tmojanianyana: —Nÿetscanga cmontsenguá ca.

38 Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

39 Y chentšana, Jesús yojánana Bëngbe Bëtsabiama entšanga abuayinaye chë judiëngbe enefjuana yebnënguenache, nÿets Galileiñe, y entšángbentsšana bacna bayëjënga yojtëbuacana.

*Jesús, canÿa bacna nguayanánaca šocábioye tbojanshná  
(Mt 8.1-4; Lc 5.12-16)*

40 Chentšana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntsá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

41 Jesús chabiama tbojanongmé; cucuátšeca tbojánbojajo y tbojanianyana: —Aíñe sëntseboše. ¡Šocana cbotsebojuaná ca!

42 Y cachora chë šocana tbojtsanóbojuanañe y tšabá yojtsatsmëna.

43 Chora Jesús chábioye tbojtanichmó, pero puerte mëntsá tbojanmandá:

44 —Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entšanga chamotatšëmbona mora ya tšabá cojtsatsmënama ca.

45 Pero chë boyabásana, chentšana tojëftsanbocna y cachora yojóntša nÿetsquënache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena luarënguñe yojánana; pero nÿets luarëngocana chábioye entšanga imojánashjajuana.

## 2

*Jesús, canÿe jama ndobenábioye tbojanshná*  
(Mt 9.1-8; Lc 5.17-26)

<sup>1</sup> Chentšana, Jesús Capernaumoye tojtashjango; y entšanga imojátatsëmbona, Jesús yebnentše yojsatsmënema.

<sup>2</sup> Mallajta entšanga chentše tmojanójoto; chë causa chë yebnentše ya tondaye más luare entšangbiana yontsemna, ni mo chë amashjuanentše, y Jesús Bëngbe Bëtsabe soyëngama yojsabuayiyaye.

<sup>3</sup> Chora tojanopasá, canta boyabásenga tmojánashjango, canÿe entšá jama ndobená imojtsaismana.

<sup>4</sup> Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango.

<sup>5</sup> Jesús tojáninÿe chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniana: “Sobreno, mouena; acbe bacna soyënga tcbontseboperdoná ca.”

<sup>6</sup> Chentše báseftanga judiëngbe ley abuátambayënga imnatbemana; chënga chora mëntsá imojtsejuabnaye:

<sup>7</sup> “¿Ntšámoyeca quem boyabása chca yojsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdónana; nÿe Bëngbe Bëtsana aiñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná?”

<sup>9</sup> ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’?

<sup>10</sup> Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniana:

<sup>11</sup> “Atše cbëyana, matëtsbaná, acbe tjuashe mesocñe y acbe yebnoye mot-satoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebcna. Chama nÿetsca entšanga imojenjnaná y Bëngbe Bëtsábioye imojtsatschuanaye, y mëntsá imojtsichamo: “Nÿa ndocna te tša bëts soye chemuáisinÿe ca.”

*Jesús, Levíbioye tbojanchembo chabuastama*  
(Mt 9.9-13; Lc 5.27-32)

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojsabuátambaye.

<sup>14</sup> Chentšana yojsataye orna, Jesús tbojáninÿe Levíbioye, Alfeobe uaquiñá, yojsanotbemañe, entšanga impuesto atjanayacá inëtsotrabajañe. Chora Jesús tbojaniana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojtseyaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjëndayëngaftaca; er ba entšanga cha imojústona.

16 Chë fariseunga y chë ley abuátambayënga, chë entsángaftaca Jesús yojtsesama tmojáninye ora, chabe uatsjédayëngbioye tmojanatjá: —¿Ndáyeca tsëngaftangbe buatëmbayá, entsanga impuesto atjanayëngaftaca y bacna soye amëngaftaca yojtsesá ca?

17 Jesús chca tojanuena; as mëntsá tojanējua: —Chë salud tmotsobomñënga, ashnayá ndoñe ntsëjabótana, pero chë shoquëngna aíñe. Y atse ndoñe chiyátabo chë Bëngbe Bëtsabe bominyiñe tsabá amënga jabáchembuama, ndayá chë bacna soye amënga imomna ca juabnayënga átsbioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*  
(Mt 9.14-17; Lc 5.33-39)

18 Canye, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entsanga Jesúsbioye tmojanobeconá y mëntsá tmojaninyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjédayënga ndoñe chca ca?

19 As Jesús tojanējua: —Chë casamento fiestentse, chë ófjanënga saná ndoñe ntsabuáshebenana. ¿Ntsamo chca ndoñe nántsemna? Chë tojobouamá entsá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana.

20 Pero ora echanjobuache y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá boyabása y chë ofjanëngaftaca endmëncá, cachcá endmëna atse y atšbe uatsjendayëngaftacnaca.

21 “Ndocná, canye tanguá entsáyá, base tsëm entsëjuaca jtarmëndana; chca tcojamëse, chë tsëm entsëjua jtsabéconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana.

22 Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

*Jesusbe uatsjédayënga canye ochnayté trigo tmojanátabebe*  
(Mt 12.1-8; Lc 6.1-5)

23 Canye ochnayté, Jesús canye jajajana yojtsaye; y chabe uatsjédayënga chëjana imojtsachñëjuana ora, tmojanontsé trigo juatabebiana.

24 Chë fariseunga chca imojinye ora, Jesúsbioye tmojaninyana: —Minye. ¿Ntsamo acbe uatsjédayënga montsamcá, ndoñe quenátslesenciana ochnayté jtsamama ca?

25 Pero cha tojanējua: —¿Ndoñe šmëndualía y šmondëtatšëmbo ntsamo Rey David y chabe enutënga tmojanmama shëntseca imojtsemna ora y jasama yojtsëjaboto ora?

26 Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentse Bëngbe Bëtsá yojamnama inyinynaye tandëšënga yojase; y chë cháftaca imojánajna entsángnaca yojátataye. Y chë tandëšna nye bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

27 Y Jesús más tojánayana: —Bëngbe Bëtsá ochnayté entsabiama tojama y entsá ndoñe tbonjánbema nye chë ochnayté ndoñe chaondëtrabajama.

<sup>28</sup> Chíyeca, Bëngbe Bëtsá Entśá tbojanbemá, ndayá entśá ochnayté tojtsama sóynaca jtsemándayana ca.

### 3

#### *Chë buashana cucuatše bomna entśá* (Mt 12.9-14; Lc 6.6-11)

<sup>1</sup> Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná.

<sup>2</sup> Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana.

<sup>3</sup> Chora Jesús chë buashana cucuatše bomnábioye tbojanianyana: —Chentše, entšangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nýe iytëca imojbiamama.

<sup>5</sup> Chora Jesús rábiaca y ngménaca chë fariseunga tojanënyanýé, chënga ainaniñe josértama ndoñe montseboše causa; y chë buashana cucuatše bomnábioye tbojanianyana: —Macuenýanëjaná ca.

As chë boyabása tojanacuenýanëjaná, y chora tšabá chëtša yojtsatamna cach inýetšacá.

<sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontśé juabnayana ntšamo jamëse Jesús jóbama.

#### *Mallajta entšanga Jesúsbioye tmojanobeconá*

<sup>7</sup> Chentšana, Jesús chabe uatsjëndayëngaftaca tojanoluaré mar bėjaye tsa-choye, y Galileocana bëtscá entšanga tmojanasto.

<sup>8</sup> Inýe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán bėjaye chenguanoicana, Tiro y Sidón pueblëngocana. Chënga tmojanobeconá, Jesús tša bëtš soyënga yojtsamama tmojanuena ora.

<sup>9</sup> Jesús chabe uatsjëndayënga tojanënyana: “Motsajna y canye barquësha atšbiamama šmochjuapróna, tša entšanga ndoñe chašmondëtsatsëntšnama ca.”

<sup>10</sup> Er cha banga tojanashná, y chë causa, nýetscanga šocana bomnënga chábioye tmojanojuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinýe ora, betscó chabe shecuatšentše imojtsofshëntsaméntšenaye, y chë bacna bayëjëngbeyeca mëntśá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

#### *Jesús chë bnëtsana uta uatsjëndayënga tojanabacacá* (Mt 10.1-4; Lc 6.12-16)

<sup>13</sup> Chentšana, Jesús canye batsjoye tojántsjua, y ndëmuanýënga tšabá tbojanínýnanënga tojánachembo. Y chëngna chábioye tmojanobeconá.

<sup>14</sup> Chora, chënguentšana bnëtsana útata tojanëbuáyana, chamot-setjëmbambnama, y Bëngbe Bëtsabe soyëngama entšanga chámabuayenama;

<sup>15</sup> y chënga obenana tojanatšatá entšángbentšana bacna bayëjënga jtëbuacanama.



<sup>16</sup> Mënga mondmëna chë bnëtsana uta bocacánënga: Simón, chë ndábioye Pedro ca Jesús tojanabayey;

<sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”;

<sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;

<sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšifne bochjanboshjoná.

*Ley abuátambayënga tmojánayana, Jesús Satanásbentšana obenana tojanóyëngacñe ca*

*(Mt 12.22-32; Lc 11.14-23; 12.10)*

<sup>20</sup> Chentšana, Jesús yebnoye tojtanamáshëngo, y tša entsanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebonna.

<sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuëntaye cha opá tojtsanóbema ca.

<sup>22</sup> Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entsángbentšana bacna bayëjënga chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontšé jáuyanana, jinýanýiyama chënga canýe ndoñe ndegombre soyifne imojtsemnama, mëntšá: “¿Ntšamo Satanás nantsobena cachá jtenábocnama ca?”

<sup>24</sup> Canýe amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana.

<sup>25</sup> Cachcá, canýe yebnentše pamíllanga tmojtsenojatá y tmojtsenáyase, chë pamíllanga ndoñe tšabá nýets tempo quemochátsmëna.

<sup>26</sup> Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

<sup>27</sup> “Ndocná quenátobena canýe corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nýe tcojshétsebatsëquëse cocayé cuanjobenaye cha jefcana.

<sup>28</sup> “Ndegombre cbëyana, Bëngbe Bëtsá entsangbe nýetsca bacna soyënga echanjáperdonaye, y ntšamo Bëngbe Bëtsabiana y ínýengbiana ndoñe tšabá tmontsichamo soyëngnaca;

<sup>29</sup> pero chë Uámana Espíritbiana ndoñe tšabá ichámëngna ndocna te queochátaperdonaye, er nýetsca tescama castigánënga jtsemnama chënga jt-samnana ca” —Jesús tojánayana.

<sup>30</sup> Jesús chca tojanëyana, er chënga imojtsichamo cha bacna bayëja ibojt-sambá ca.

*Chë Jesusbe ndegombre pamíllanguentšënga*

*(Mt 12.46-50; Lc 8.19-21)*

<sup>31</sup> Chëntscuana, Jesusbe mamá y catšátanga choye tmojánashjajna, pero nýe shjoca imojtsemna; y canýa tmojanichmó cha jachembuama.

<sup>32</sup> Chë ba entsanga chentše chabe shëconana imojtsetbiámanëngna, chora tmojaniana: —Acbe mamá, acbe catšátanga y uabëngana shjoca montsemna; aca cmontsenguá ca.

<sup>33</sup> Chora cha tojanějua: —¿Nda atšbe mamá yomna, y ndëmuanyënga atšbe catšátanga ca?

<sup>34</sup> Chentšana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catšátanga.

<sup>35</sup> Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

## 4

### *Chë jenabe cuento* (Mt 13.1-9; Lc 8.4-8)

<sup>1</sup> Chentšana, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjajónayentšë yojanamna canýe barquëshoye Jesús tojánasëngo y tojanótbema; y chë entsanga tsachoca imojtsemna.

<sup>2</sup> Chora cuentëngaca ba soyëngama tojanabuatambá.

Mëntsá tojanéyana:

<sup>3</sup> “Smochjouena; canýe jená chë jénaye jaujquëshama vojëftsebozna.

<sup>4</sup> Yojtsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe.

<sup>5</sup> Inýe meshëngna ndëtsbenguñe yojuatquécjana, ndoñe yapa fshantse binýnentšë. Chiñna betscó yojuábocna, ndoñe yapa jashenocana fshantse yojanmëna causa;

<sup>6</sup> pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa.

<sup>7</sup> Inýe meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jénayentšana tondaye yonjuashájona.

<sup>8</sup> Pero inýe meshëngna, uanguaniñe yojuatquécjana, y bëtscá tšabe shajuanënga chiñe yojóbozna: ínýenache, canýe meshentšana unga bnëtsana meshënga yojóbozna; ínýenachna, chnënguana bnëtsana meshënga; y ínýenachna patse meshënga ca” —cha tojánayana.

<sup>9</sup> Y chentšana, Jesús más tojánayana: “Chë jouenama tmojtsobenënga, smochjouena ca.”

### *Ndáyeca Jesús cuentëngaca yojánabuatambaye* (Mt 13.10-17; Lc 8.9-10)

<sup>10</sup> Chentšana, Jesús canýa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bëtsayanama.

<sup>11</sup> As Jesús tojanějua: “Bëngbe Bëtsá tšëngaftanga cmontsinýanýná nyetsca chë mo iytëmencá yomna soyënga chabe amëndayama, pero chë ínýengbioye ndoñe; chë soyëngama chënga lempe cuentëngaca sëntsëtsëtsná.

<sup>12</sup> Chca, masque becá chamotsafšna, ndoñe chamondobená chë Bëngbe Bëtsabe soyënga jinýama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobëconama, y cha ndoñe chaondáperdonama ca.”

### *Jesús chë jenabe cuentama tojanabuayená* (Mt 13.18-23; Lc 8.11-15)

<sup>13</sup> Chentšana, Jesús tojanéyana: “¿Quem cuentama ndoñe tcmónjósertase, ntšamo chcase nyetsca cuentëngama cmochjóserta ca?

<sup>14</sup> Chë jená endmëna chë tšabe noticiëngama abuayiynayá.

<sup>15</sup> Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiama soyënga jouenana; pero chora Satanás betso jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema.

<sup>16</sup> Inye entsanga mondmëna mo chë ndëtšbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana;

<sup>17</sup> pero ndoñe nyets tempo chana jocháchuana; y chca, ndoñe bayté Bëngbe Bëtsáftaca ntjëtsemnëngana, ndoñe yapa tmontsašbuaché causa. Inyënga mochantšëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye.

<sup>18</sup> Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena,

<sup>19</sup> pero quem luarentša soyëngaca oyejuayënga jtsemnana yapa mochantseboše, y nye bomnana jëftsebomnana yapa mochanjésenojuabnaye. Chë soyama y inye ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá.

<sup>20</sup> Pero ínýënga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochantseprontana chiñe jtsošbuáchiyama. Mo canye betiye becá tšabá tojtseshajuancá, chënga bëtscá tšabe soyënga Bëngbe Bëtsabiama mochantšama. Inyënga ínýëngbiama más bëtscá soyënga mochanjama; y chca, ínýënga mochantsemna mo chë unga bnëtsana meshe tojanshajo jenaycá, ínýënga mo chë chnënguana bnëtsancá, y ínýëngna mo chë patse meshënga tojanboté jenaycá ca” —Jesús tojánayana.

### *Chë uajuinýanëshama cuento*

*(Lc 8.16-18)*

<sup>21</sup> Mëntšánaca Jesús tojánayana: “Ndocná juiyëbana canye uajuinýanëshama cajonësho o jutsnësho tajsoye juajájuama. Ndoñe; uajuinýanëshama juiyëbana tsbanánoca juajájuama, lempe chaotsebinýnama.

<sup>22</sup> Ndocna yoiytëmena soye ntjinýencá queochaisoquéda, y chë ndótatsëmbo soye ntsotatsëmbcá queochaisoquéda.

<sup>23</sup> Chë jouenama tmojtsobenënga, šmochjouena ca.”

<sup>24</sup> Y mëntšánaca Jesús tojanéyana: “Tšabá šmochjájuaboye ntšamo šmojtsuenanama. Nye batšatema šmojouenëse, nye batšatema cmochanjósertaye; pero aiñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama.

<sup>25</sup> Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nye batšá ibosertana soyëngama bochantsebnatjëmba ca” —cha tojánayana.

### *Chë ojuajna jenayama cuento*

<sup>26</sup> Jesús mëntšánaca tojanéyana: “Bëngbe Bëtsabe amëndayana endmëna mo ntšamo canye boyabása jénaye tojuatbontsá ora ehandbopasacá:

<sup>27</sup> masque cha cada ibeta jtsojájuana y bnëté jotsbanama, ibeta o bnëté, chë jénayentsana juabocnana y juájuana, ntšamo chca yojtsájuañama chë boyabása ntjatstatšëmbcá.

<sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtama jóbocnana, chentšana chë espiga, y chentšana chë meshënga jashájonana.

29 Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento*  
(Mt 13.31-32; Lc 13.18-19)

30 Jesús mëntsánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama?

31 Endmëna mo canye mostaza jénaye jajoca tcojajecá. Ndegombre, nyetsca quem luarentsa jenayëngama, mostaza jénaye chë más básetema endmëna;

32 pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

*Ndáyeca Jesús cuentëngaca entsanga yojanabuayiyná*  
(Mt 13.34-35)

33 Chca Jesús Bëngbe Bëtsabe soyëngama entsanga yojanabuatambá, ba cuentënguentsana, mo chë tmonjouena cuentcá, ntsachetšá chë entsanga josértama tmojobenacá.

34 Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cányënga tmojtsemna ora.

*Jesús chë binýia y chë béjaye bonguana yojëtsbema*  
(Mt 8.23-27; Lc 8.22-25)

35 Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

36 Chorna, chë entsanga jesabáshejuanëse, chë uatsjëndayënga Jesús tmojtsanánatseñe, cach yojánenjaquena barquëshañe; y inye entsángnaca inye barquëshangañe tmojanasto.

37 Chentsana, chë uafjajónaye béjayiñe tša jabuache binýia yojóshjango; olëshënga chë barquëshá imojtsëtsbotsana, y chë causa chë barquëshá yojóntša búyesheca jtsobuajútjiana.

38 Y chëntscuana, barquëshá stëtsoica, tsëntsenëshañe Jesús yojtsomañe. Chora chë uatsjëndayënga tmojtsanfšená y tmojanianyana: —¡Buatëmbayá! ¿Tondayana cmontsentšamna bënga chašotsënatjëmbama ca?

39 As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna.

40 Chora chabe uatsjëndayënga tojanëyana: —¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

41 Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

## 5

*Chë Gerasa luaroca bacna bayëja uambayá*  
(Mt 8.28-34; Lc 8.26-39)

1 Chentsana, uafjajónaye chenguánoica tmojánashjajna, Geraseno ca uabaina entsangbe luaroye.

2 Jesús barquëshoicana tojánastjango, y cachora, chë obanëngbe cuevëshënguentsana canye entšá, bacna bayëjbe juabna uambayá, tojánbocna y tbojanjébingo.

<sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca;

<sup>4</sup> er ba soye cadenëjuangaca y inye soyëngaca cha nyëtsá tmojanbatsëca, pero cha nyëtsca soye yojsátabebe y yojsenájaca, y ndocná yonjobenaye cha bonguana chaotsemnama.

<sup>5</sup> Nyëts tempo, bnëté y ibeta, obanëngbe cuevëshënguenache y tjañenache yojánana yoye, y ndëtšbëngaca enotsetšenaye.

<sup>6</sup> Jesúsbioye bënocana tbojáninye ora, chábioye tojanótjajo y chabe natsanoica yojoshëntsamentšiyë;

<sup>7</sup> y mëntsá yojsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

<sup>8</sup> Chca tbojanianyana, er Jesús chábioye tbojanianyana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntsamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama.

<sup>11</sup> Chentša béconana ba cotšënga imnajena, batsjoca imnëtsosañe;

<sup>12</sup> as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

<sup>13</sup> Y Jesús aíne tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojsatajo.

<sup>14</sup> Chora, chë cotšënga anyënenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinýama.

<sup>15</sup> Jesús yojtsemnoye chë entšanga tmojánashjajna ora, tmojáninye chë tempo bacna bayëjënga uambayá, inëtsoybemañe, entšayá uichëtjoná y chabe nyëts juábnaca. Y chë entšanga chama imojtsëuatjaná.

<sup>16</sup> Chë tmojáninyënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca.

<sup>17</sup> Chora chë entšanga tmojanontsé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca.

<sup>19</sup> Pero ndoñe tbonjanlesenciá, sinó mëntsá tbojanianyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tmojalastemama ca.”

<sup>20</sup> Chentšana, chë entšá yojsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyëtscanga imojtsenjanaye.

*Jesús canye shembásabioye tbojanshná y Jairëbe bembetëmbioye tbojtanayená (Mt 9.18-26; Lc 8.40-56)*

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna.

<sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentšé,



<sup>23</sup> y tša ibojtseimpadana, mēntšá: —Atšbe bembetema ya echantsóbana; Diosmanda mabo, acbe cucuatšēnga chábeñe cochjájua, salud chauat-inyēnama y cháuatayenama ca.

<sup>24</sup> As Jesús cháftaca tojána; pero bētská entšanga imojtsēstona, chábioye imojtsenatsēntšenaye.

<sup>25</sup> Chē entšanguentše yojtsaye canye shembása šocá; cha ya bnētsana uta uata oboftjajuanánaca inapadecena.

<sup>26</sup> Cha puerte tojansufrí, ba ashnayēngbe cucuatšīne, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nye más peor ibojtsobiamnaye.

<sup>27</sup> Chē shembása yojouena ntšamo Jesús ba šoquēnga tojánashnama, y as stētsoicana entšangbe tsēntsajana yojobeconá, y Jesusbe entšayá yojauábojajo.

<sup>28</sup> Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.”

<sup>29</sup> Y cachora chē oboftjajuanana ibojtsobojuána; y chabe cuerpiñe iboje-biónana ya tšabá yojtsatsmēnama.

<sup>30</sup> Chora Jesús yojaséntia chábentšana obenana yojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

<sup>31</sup> Chabe uatsjēndayēnga tmojanjuá: —Aca contsonyá chē entšanga cmontsatsēntšená, y cabá cochjátsnoticiaye nda entšayá tojuabojajo ca.

<sup>32</sup> Pero Jesús cátoye yojtserreparana jinýama nda tbojánbojajuama.

<sup>33</sup> As chē shembása, chē ntšamo cháftaca yojopásama jtsetatšēmbēse, tojanobeconá ngmēmnyá y auatjananá, chabe natsanoica tojanoshēntsamentšé, y lempe ntšamo ndegombre cháftaca tojanopasacá Jesúsbioye tbojanianyana.

<sup>34</sup> Chora Jesús tbojanianyana: —Bembe, Bēngbe Bētsábeñe icošbuachéyeca shnaná contsatsmēna. Natjēmbana motsatoñe; acbe šocana tontsopochocá ca.

<sup>35</sup> Jesús cabá yojtsóyebuambnantscuana, báseftanga tmojánashjajna chē judiēngbe enefjuana yebnentša mandayabe yebnocana, y chē shembásetembe taitá tmojanianyana: —Acbe bembe tontsóbana; ¿ndayama más Buatēmbayá chama cochjátebēyaboma ca?

<sup>36</sup> Y Jesús, ntšamo chēnga imojtsichamcá ntjatuenancá chē judiēngbe enefjuana yebnentša mandayábioye tbojanianyana: —Ndoñe matauatjana. Nye Bēngbe Bētsábeñe cochtsošbuáchiye cha tšabá chaotsatsmēnama ca.

<sup>37</sup> Y Jesús ndoñe tonjanalesenciá Jairēbe yebnoye banga chamuastama; nye Pedro, Santiago y Juan, Santiagbe uabentsana, añe.

<sup>38</sup> Chentsana, chē mandayabe yebnoye tmojánashjajna ora, Jesús tojánanyē entšanga tša imojtsenbouenana, entšanga imojtsošachiye y puerte ngménaca imojtseyoye.

<sup>39</sup> As chē yebnoye tojánamashēngo y chē entšanga tojanēyana: “¿Ndayama tša šmojtsenbouenana y tša šmojtsendēntjana? Chē shembásetema ndoñe chenatóbana, nye endētsomañe ca.”

<sup>40</sup> Pero entšanga nye imojtsáfchaye. As Jesús nyetsca entšanga shjoye tojtānēbuacna, y tojēftsanēbiatše chē basetembe bētsétsata y chabe enutēnga; y chē shembásetema yojtsemnoye tojánamashēngo.

<sup>41</sup> Chora Jesús tbojanábuacueshache y cachēngbe biyañe tbojanianyana: “Talita, cum ca.” (Chca endayana “Shembásetema, matētsbaná ca”.)

<sup>42</sup> Cachora, chē bnētsana uta uata bomna shembásetema tojtantsbaná y yojtsobena jama. Y chē entšanga chama imojtsenjnanaye.

<sup>43</sup> Pero Jesús corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

## 6

### *Jesús Nazaret puebloca* (Mt 13.53-58; Lc 4.16-30)

<sup>1</sup> Chentsana Jesús tojëftsanbocna y cachabe luaroye tojtanashjango, y chabe uatsjéndayënga cháftaca tmojána.

<sup>2</sup> Ochnayté tojanobuache ora, Jesús tojanontsé chë judiëngbe enefjuana yebnentse entsanga jabuátambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndémoca quem boyabása lempe chca tojuatsjinýe? ¿Ndaye osertánana mua tmojatsetá, y ntšámoyeca cha yojtsobena chca bëts soyënga jtsamana ca?”

<sup>3</sup> ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabëngnaca muentse ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboşe joyeunayana.

<sup>4</sup> As Jesús tojanëyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentse, ni cachabe pamílangbenache, ni cachabe yebnentse ca.”

<sup>5</sup> Chë entsanga chentse chábeñe ndoñe montsanoşbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentse jëftsemana; nýe básefta şoquëngbeñe cucuatšënga tojanjajó y tojanashná.

<sup>6</sup> Jesús ojnananá yojtsemna cachábentša entsanga chábeñe ndoñe montsanoşbuaché causa.

### *Jesús, chabe uatsjéndayënga tojanichamó Bëngbe Bëtsabe amëndayama jábuayenama*

(Mt 10.5-15; Lc 9.1-6)

Chentsana, chë chaboye base pueblënguenache Jesús yojánana, Bëngbe Bëtsabe soyëngama abuátambaye.

<sup>7</sup> Y chë bnëtsana uta uatsjéndayënga Jesús tojánachembo, y utáta ínýoye tojanichamó, entsángbentsana bacna bayëjënga jtëbuacnama obenana jatšatayëse;

<sup>8</sup> y mëntšá yojáuyana: “Benachiñama tondaye şmattsambaye, nýe canýe jatjonëfja; ndoñe şmattsambaye saná, ni shecnaja, ni crocénana uasnanëchiñe.

<sup>9</sup> Nduámanëshe şmochjesóshecochëtjo, y nýe canýájua şmochjesíchëtjo ca.”

<sup>10</sup> Mëntšánaca tojanëyana: “Posada chacmojúyentsame yebnentse şmochtsoquedañe inýe puebloye játantscuana.

<sup>11</sup> Canýe luaroye chaşmojáshjajna y ndocná posada chacmonjuyentsame, y joyeunayama ndoñe chamontseboşëse, chentsana şmochjésebocana, y shecuatšentša polvëshe şmochjésenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

<sup>12</sup> Chentsana, chë uatsjéndayënga tojëftsanbocana y entsanga imojánabuayiyayey, chë tšabe benache chámuatishachama, bacna soyënga amana jtsajbanase.

<sup>13</sup> Entsángbentsana ba bacna bayëjënga tmojtanëbuacna, y ba şoquënga aceitíyeca tmojananëttojto y tmojanashná.

*Ntšamo Juan chë Ubayaná tojanóbana  
(Mt 14.1-12; Lc 9.7-9)*

<sup>14</sup> Rey Herodes Jesusbiamá vojátatsëmbona, er nÿetsquénache nÿetsca entšanga chabiamá imojtsóyeuambnaye. Entšanga Jesusbiamá imojtsichamo: “Juan chë Ubayaná obanënguentsana tojtayena, chíyeca cha chca obenana yojtsebomna ca.”

<sup>15</sup> Inÿengna imojtsichamo: “Cha entsemna chë Bëngbe Bëtsabe juabna oyeuambnaya Elías ca.”

Y ínÿengna: “Muana canÿa Bëngbe Bëtsabe juabna oyeuambnaya, mo chë tempsquëngcá ca.”

<sup>16</sup> Heródesna ntšamo entšanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipe shema. Herodes chë shémaftaca tojanobouamá, Felipe cabá ainá ora.

<sup>18</sup> Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

<sup>19</sup> Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena,

<sup>20</sup> er Herodes yojántatsëmbo, Juan canÿe nÿetsca soyënguiñe tšabá amá, nÿe Bëngbe Bëtsábioye sempre oservená inamnana. Chama cha yojánauatja y ndoñe yonjanalesencia cha chamóbama. Y Juan Bëngbe Bëtsabe soyëngama Heródesbioye tbojtsebuayiyná ora, ntšamo jajuaboyana ndoñe yontsetátsëmbo, pero masque chca, oyejuayá Juánbioye ibnayeunana.

<sup>21</sup> Pero Herodías tojáninÿena mocna ora Juan chamóbama. Heródesbe cumpleañó oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga.

<sup>22</sup> Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófanënga chama tša imojtsóyejuaye. As chë rey, chë tobiášbioye tbojanianana: —Ndayánaca šmotjañe y atše cbochjátsetaye ca.

<sup>23</sup> Y jajúrase, mëntsá tbojanšbuachená: —Ntšamo chašcojotjañcá cbochjátsetaye, masque atšbe amëndayentša bomnantšana tsëntsañnaca ca.

<sup>24</sup> Chentšana, chë tobiášbe yojëftsebocna y chabe mamábioye ibojatjaye: —¿Ndayá chjotjañe ca?

Y chabe mamá ibojuá: —Juan chë Ubayanabe bestšaše ca.

<sup>25</sup> Cachora chë tobiášbe betscó chë rey yojtsemnoye tojtanamashëngo, y tbojanianana: —Atše sëntseboše, cam ora Juan chë Ubayanabe bestšaše canÿe šcnenësiñe chašcuatsetá ca.

<sup>26</sup> Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojanianancá jebëbuetámenana.

<sup>27</sup> Cachora chë rey canÿe soldado ibojíchmua, Juanbe bestšaše chauiyëbama.

<sup>28</sup> As chë soldado cárceloye tojána, Juánbioye bestšaše tbojtsanëstjango, y canÿe šcnenësiñe tojanamba. Chë tobiášbioye tbojanëntsabuaché, y chana, chabe mamábioye.

<sup>29</sup> Juanbe ústonënga chama imojátatsëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó  
(Mt 14.13-21; Lc 9.10-17; Jn 6.1-14)*

<sup>30</sup> Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuatambama cha tmojancuentá.

<sup>31</sup> Chora Jesús tojanéyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebmna.

<sup>32</sup> As cánÿenga barquëshañe tmojtsanoñe, entšanga ndëbínÿnoye.

<sup>33</sup> Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo; chcasna, chë entšanga shecuátšeca betscó tmojána, nÿetsca pueblënguentsana, y chëngbe natsana choye tmojánashjajna.

<sup>34</sup> Chentšana, chë barquëshoicana tojánastjango ora, Jesús ba entšanga tojánanÿe; chëngbiama tbojanongmé, er imojtsemna mo abujénÿa ndbmna oveshëngcá; y tojanontsé ba soyëngama jabuátambana.

<sup>35</sup> Ya jetiñe yojtsemna orna, chabe uatsjëndayënga tmojanobobconá y tmojaniana: —Ya jetiñe entsemna, y quem luariñe ndocná quenatiyena.

<sup>36</sup> Entšanga cuantichamuá, pueblotémëngoye y inÿe luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: —Tšëngaftanga saná chëngbioye šmochjacaredádaye ca.

Chora chënga tmojaniana: —Crocénana queftsátšbmna, uta patse denario nÿetšá, chëfta entšangbiama saná jabuámiyama ca.

<sup>38</sup> As Jesús tojanéyana: —¿Bueta tandëse šmojtsebmna? Marrepárange ca.

Ya imojtsetátšëmbo ora, tmojaniana: —Shachna tandëse y uta beónata fsëntsebmna ca.

<sup>39</sup> Chora Jesús entšanga tojanamëndá ínÿoca ínÿoca chamoshëntsjatbiamama.

<sup>40</sup> As chënga tmojanotbiamama patse patsënga y shachna bnëtsátšanënga.

<sup>41</sup> Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjëndayënga tojanayentšbuaché chë entšanga jatšatayama. Y chë uta beónatnaca nÿetscanga tojanëjáyate.

<sup>42</sup> Nÿetscanga tmojanse jtoshachaye nÿetšá.

<sup>43</sup> Y chentšana, chë tandëse y chë beonentsana ojamnëtemënga tmojanatbaná, y bnëtsana uta sbarëcua tmojanajutjé.

<sup>44</sup> Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye  
(Mt 14.22-27; Jn 6.16-21)*

<sup>45</sup> Chentšana, Jesús chabe uatsjëndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entšanga yojtichamuá.

<sup>46</sup> Nÿetscanga tojtanadiošoftá ora, tjoye cha tojtsanoñe Bëngbe Bëtsáftaca jencuéntama.

<sup>47</sup> Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca.

<sup>48</sup> Jesús tojáninÿe chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna.

49 Y chënga, chë béjaye juatsbuacá cha yojtsayama tmojáninÿe ora, tmojan-juabó cha canÿe añemëse yojtsemna ca, y tmojanontsé yoyana;

50 er nÿetscanga chca tmojáninÿe y cochauatjanánënga imojtsemna. Pero Jesús cachora tojanëyana: “¡Añemo šmochtsebomna; atše Jesús sëndmëna; ndoñe matauatjëngana ca!”

51 Chorna, chënga imojtsemna barquëshoye cha tojánashëngo, y chë jabuache binÿia tojanëjbana, y nÿetscanga puerte auatjanánënga y ojanánënga imojtsemna.

52 Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba šoquënga tojanashná  
(Mt 14.34-36)*

53 Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshsha tmojanëtsbua.

54 Chë barquëshhoicana tmojánastjajna y cachora entsanga Jesús tmo-jantëmbá.

55 Chíyeca, chë luariñe yebnënguenache betesco chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye.

56 Y ndayentse cha tojámashëngüentse, pueblënguiñe, bëts pueblënguiñe y base pueblotëmënguiñnaca, chë šoquënga benachoye imojtsëbuacana, y Jesús corente imojtseïmpadana chë šoquënga chaualesenciá, nÿe mo chabe entsayá sibuájua juabojajuana. Y nÿetscanga tmojuábojajënga tšabá imojt-satsmëna.

## 7

*Ndáyeca canÿe entsá Bëngbe Bëtsabe delante ndoñe tšabia nántsemna  
(Mt 15.1-20)*

1 Chentšana, fariseunga Jesúsbiyoye tmojanobeconá y báseftanga ley abuátambayëngnaca, Jerusalenocana áshjajnënga.

2 Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá.

3 Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jt-satsmënama ca.

4 Chë sananga enocana tmojtashjango ora, ba soye ndoñe tmonsacuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá.

5 Chë causa, chë fariseunga y chë ley abuátambayënga Jesús tmojantjá: — ¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

6 Chora Jesús tojanëyana: —Nÿe tšabá chë Bëngbe Bëtsabe juabna oye-buambnayá Isaías tšëngaftangbiama tojánayana, bacna entsanga chë ntšamo ndegombre šmojuabnacá ndinÿinÿnayënga ca, mëntšá enduabemanentse:

Quem entsanga mondbëtsichamo Bëngbe Bëtsá tša tšabia yomna ca; chca nÿe uayásaca,  
pero chëngbe ainanentse ndocna tšabe juabnëngaca.



7 Pero chënga nÿe bonamente mondbétsichamo Bëngbe Bëtsá tša tšabia yomna ca;

chënga nÿe entsangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

8 Chora Jesús tojanéyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nÿe ntšamo entsanga monduamancá jtsamama ca.

9 Y mëntšánaca tojanéyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora.

10 Moisés tonjánayana: ‘Acbe bëtsétsata ndoñe stëtsoye catjáquedaye’, y ‘nda chabe bëtsétsatbiama ndoñe tšabá tonjoyebuambá chana, jóbana jtsemnana ca.’

11 Pero tšëngaftanga šmondbétsichamo, canÿe entsá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”).

12 Tšëngaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiama ndayánaca jamama ca.

13 Chca, tšëngaftanga šmontsama entsanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsángbeñe tempšana y mëntscoñama yochñëjuancá. Y ba soyënga tšëngaftanga cachcá šmontsama ca” —Jesús tojánayana.

14 Chora Jesús, cachiñe entsanga tojtanachembo y tojanéyana: “Nÿetscanga šmochjouena y chacmësertá.

15 Ndayá entsá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetsá comna: ntšamo entsá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.

16 Chë jouenama tmojtsobenënga, šmochjouena ca” —cha tojánayana.

17 Jesús entsanga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama.

18 As cha tojanéyana: “¿Tšëngaftángnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entsá tojascá ndoñe ntsobenana chábioye jabemana ndoñe tšabia Bëngbe Bëtsabe delante;

19 er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entsá bacna soye chaotsamama ca.

20 Y mëntšánaca tojánayana: “Ntšamo chë entsá tojtsejuabná y tojtsoyebuambnacá, chë soye cocayé endobena entsá jabemana ndoñe tšabia Bëngbe Bëtsabe delante.

21 Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,

22 bacna juabnënga boyá o shëmbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsoencá jtsiyenama, ínÿabioye jtsántšabošama, ínÿabiama jtsayátsenayama, jtsenábotamnayama y nÿe opënga jtsobiamnayama.

23 Nÿetsca quem bacna soyënga entsabe ainanocana jóbocnana, y cha jabe mana ndoñe tšabia Bëngbe Bëtsabe delante ca” —cha tojánayana.

*Canÿe shembása inÿe luarocana ashjanganá Jesúsbeñe yojtsošbuaché  
(Mt 15.21-28)*

<sup>24</sup> Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana.

<sup>25</sup> Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiana oyebuambnayana yojouena ora, chábioye tojánabo y chabe shecuatšentše tojanoshëntsamentšé.

<sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabu-atábocnama.

<sup>27</sup> Pero Jesús tbojaniana: —Atše šondmëna natsana judío entsangbiana chë soyënga jamana; chentšana cocayé chanjobenaye chca inÿe entsangbiana jamana. Atše acbiana, canÿe ndoñe judiá, soyënga stjamëse, nántsemna mo chë básengbe saná quešënga cuaftsëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëngnaca mondbase chë básenga tmojtsesá ora tmojatquëcjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojaniana: —Tšabá tcjayana; chcasna, acbe yebnoye motatoñe. Chë bacna bayëja acbe bembetëmbentšana tonjësebocna ca.

<sup>30</sup> Chentšana, chë shembása chabe yebnoye tojtaná, y tbojáninÿena chë bembetema jutsnéshentše yojtsojajoñe, y chë bacna bayëja ya ndoñe chábeñe yontsemna.

*Jesús, canÿe boyabása tësmá y ndëbiábioye tbojanshná*

<sup>31</sup> Tiro pueblentšana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango.

<sup>32</sup> Cha chentše yojtsemna ora, chábioye tmojanánatse canÿe entšá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama.

<sup>33</sup> Chorna Jesús entsángbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo.

<sup>34</sup> Chentšana, Jesús celoye tojanontješé, jabuache yojáshachna, y hebreo palabriñe tbojaniana: “¡Efata ca!” (Chca endayana “¡Chacmotsauenana ca!”)

<sup>35</sup> Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye.

<sup>36</sup> Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojtsamëndaye, entsanga más chabiana imojtsencuëntaye.

<sup>37</sup> Chama chë entsanga puerte imojtsenjnanaye, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

## 8

*Jesús canta uaranga entsanga saná tojanacaredadó  
(Mt 15.32-39)*

<sup>1</sup> Chë tempo, ba entsanga Jesúsbioye cachiñe tmojanobeconá, y jasama tondaye imontsebomna. As Jesús chabe uatsjëndayënga tojánachembo y tojanëyana:

<sup>2</sup>—Quem entsangbiana šontsengmena, er ya unga te átšeftaca montsemna y mora jasama tondaye quemátsbomna.

<sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuâtëcja; y báseftanga bën luarocana tmojabo ca.

<sup>4</sup> As chabe uatsjëndayënga tmojaniana: —¿Ntšamo nda nanjobenaye quem luarentše, ndocna entšá ndoyenentše, chëfta entšangbiana saná jinÿenama ca?

<sup>5</sup> Chora cha tojanatjá: —¿Bueta tandëse šmojtsebmna ca?

Y chënga tmojanjuá: —Canÿsëftaše ca.

<sup>6</sup> Chentsana, Jesús tojanamëndá entšanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentsana tojanatá, chabe uatsjëndayënga tojanëjatá, y chëngna chë entšangbioye.

<sup>7</sup> Básefta beonatémëngnaca imnabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entšanga jujátayama.

<sup>8</sup> Nÿetscanga tmojanse jtoshachaye nÿetšá. Chentsana cabá canÿsëfta bëts sbarëcua tmojanajutjé chë ojamnëtémëngaca.

<sup>9</sup> Chë tmojansënga imojamna mo canta uaranga nÿetšá. Chentsana Jesús chë entšanga tojtanadiošoftá.

<sup>10</sup> Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

*Chë fariseunga tmojánbošena, Jesús chaoma canÿe bëts soye, chabe ndegombre obenana jinÿyama*

*(Mt 16.1-4; Lc 12.54-56)*

<sup>11</sup> Chentsana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama.

<sup>12</sup> Y Jesús ngmënaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entšanga ndocna chca soye quemochátinÿe ca.”

<sup>13</sup> Chorna chë entšanga cachcá tojesanënÿá, chë barquëshoye yojtamáshëngo, y uafjajónaye chenguana yojtsoñe.

*Jesús tojanabuayená fariseungbe buatëmbana soyëngama*

*(Mt 16.5-12)*

<sup>14</sup> Chë uatsjëndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebmna.

<sup>15</sup> Jesús tojanëyana: —Smochtsantješna; cuedado šmochtsebmna fariseunga y Heródesbe levadurama ca.

<sup>16</sup> Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

<sup>17</sup> Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama?

<sup>18</sup> Bominÿe šmondobomna, pero ndoñe quešmátobena jinÿyana; jouenama šmondobena, y ndoñe quešmátuenana, y ndayá tijamama ndoñe quešmatsjuabná.

19 Chë shachna uaranga entsanga shachna tandësentsana sënjanëjatá chentsana, ¿bueta sbarëcua chë ojamnëtemëngaca šmëñjanajutjé ca? —cha tojanatjá.

Y chënga tmojanjuá: —Bnétsana utácua ca.

20 —Y chë canÿsëfta tandësentsana canta uaranga entsanga sënjanëjatá chentsana, ¿bueta bëts sbarëcua chë ojamnëtemëngaca šmëñjanajutjé ca?

Y chënga tmojanjuá: —Canÿsëftácua ca.

21 As Jesús tojanëyana: —¿Y cabá ndoñe cmontsësertana ca?

*Jesús canÿe jtanábioye tbojanshná, Betsaida puebloca*

22 Chentsana tmojánashjajna Betsaida puebloca; y chora, entsanga canÿe boyabása jtaná Jesúsbioye tmojanánatse, y tmojanimpadá cha jabojuana chabotseshnama.

23 As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajúa, y tbojantjá nderado ndayá jinÿama tayojtsanobena ca.

24 As chë jtaná yojontješiyey y tojánayana: —Boyabásenga sentsënÿa; mo betiyëngcá montsemna, pero montsobonjná ca.

25 Chora Jesús, chë jtanabe fšnebeñe cachiñe cucuatšënga yojajúa. Y chë boyabása yojtsobena lempe tsabá jinÿama; ya shnaná yojtoquéda. Y yojtsobena nÿetsca soyënga botamana jinÿana.

26 Chentsana, Jesús cachabe yebnoye tbojtanichmó y mëntsá tbojanianana: —Chë puebloye ndoñe catjëftsamashëngo ca.

*Pedro tojánayana, Jesús chë Cristo bétsemnama  
(Mt 16.13-20; Lc 9.18-21)*

27 Chentsana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atše bétsemnama ca entsanga imojtsichamo ca?

28 Y chënga tmojanianana: —Inÿenga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnayá ca.

29 As Jesús tojanatjá: —Y tsëngaftangna, ¿nda atše bétsemnama ntšamo smochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

30 Chentsana Jesús corente chënga tojanamëndá, chë nda cha yojamnama ndocnábeñe ntsecuëntayana.

*Jesús tojánayana cha ibojamna jóbanana y jtsayenana ca  
(Mt 16.21-28; Lc 9.22-27)*

31 Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca.

32 Nÿetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana.

33 Pero Jesús yojobuértana, chabe uatsjëndayënga tojanënÿanÿé, y Pédrëbioye mëntsá tbojtsanbochembo: “¡Satanás, átsbentsana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entsángbentsana ca.”

<sup>34</sup> Chentsana, Jesús chabe uatsjéndayënga y chë inÿe entšanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámnaca.

<sup>35</sup> Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonÿá atše juastama, y chë tšabe noticiënga atšbiana abuatambaye causa, masque chaóbana, chë nÿetsca tescama yomna tšabe vida echántsebomna.

<sup>36</sup> ¿Ndayama entšá buanjosérvia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese?

<sup>37</sup> Er canÿe entšá chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebomnama.

<sup>38</sup> Chcasna, nda mora atšbiana y atšbe buayenana soyëngama tojtsëuatja entšángbeñe, chënga chë Bëngbe Bëtsabiana nduauenanënga y bacna soye amënga, chë Bëngbe Bëtsá Entšá tbojanbemánaca chabiana echantsëuatja, chabe Taitabe bëtš obenánaca y chabe angelëngaftaca chaojésabo ora ca” — cha tojanëyana.

## 9

<sup>1</sup> Mëntšánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinÿcá ca.”

### *Jesús inÿetšá tojanobinÿná* (Mt 17.1-13; Lc 9.28-36)

<sup>2</sup> Chentsana chnënguana tianoye, Jesús tojëftsanëbiatše Pedro, Santiago y Juan, y inÿoye tojanënatse nÿe chënga, canÿe bëtš tjoye. Y chëngbe delante Jesús inÿetšá tojanobinÿná;

<sup>3</sup> chabe uichëtjonëjuangá tša yojtsabuashinÿinÿana; corente uafjantsëjuangá yojtsamna; nÿa chca juafjantsama ndocná quem luarentše quentatobenaye.

<sup>4</sup> Chca orna, chë uatsjéndayënga tmojáninÿe, Moisés y Elías tbojanobinÿná Jesúsftaca encuéntaye.

<sup>5</sup> Chora Pedro, Jesúsbioye tbojanianana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotémënga: cánÿetema acbiana, inÿetema Moisesbiana y inÿetema Elíasbiana ca.”

<sup>6</sup> Chca tojánayana, chë uatsjéndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

<sup>7</sup> Chora canÿe jantsetëshe yojóbema, y chëngbioye yojáutsbotse; y chë jantsetëshoicana canÿe oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeunana ca.”

<sup>8</sup> Y ndeolpe, chëngbe shëconana tmojanrrepará ora, ya ndocná más tmonjáninÿe; nÿe Jesús canÿa chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjéndayënga tojanamëndá: —Bëngbe Bëtsá Entšá tbojanbemá obanënguentsana candétayenëntscuana, chë mënté tjoca šmonjinÿe soyama ndocnábeñe šmattsecuéntaye ca.

<sup>10</sup> Chë uatsjéndayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora.



11 Y Jesúsbioye imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

12 As cha tojanējua: —Ndegombre, canya Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrënguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca.

13 Ndegombre cbëyana, canya Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrënguiñe endayancá.

*Jesús, canye basa bayëjbe juabna uambayábioye tbojanshná  
(Mt 17.14-21; Lc 9.37-43)*

14 Chentšana, chënga tmojtaná chë inÿe uatsjëndayëngbioye. Chora, Jesús tojáninÿe ba entšanga chë uatsjëndayëngbe shëconana imojtsemnama, y básefta ley abuátambayëngna chëngaftaca imojtsenatsëtsnaye.

15 Nÿetsca entšanga cha tmojáninÿe ora, imojenjnaná y tmojanótjajo cha jachuayama.

16 Chora Jesús chënga tojanatjá: —¿Ndayama chëngaftaca šmenatsëtsná ca?

17 Y canya entšanguentšá tbojanjuá: —Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

18 Nÿe ndayéntšnaca cha tojtsemnentše, chë bayëja chábioye jishachana y jtseñajuáchesënjana; chentše uayoicana shashiye jtsabocanana, jtseñoftéšfjojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniyana.

19 As Jesús tojánayana: —¡Nÿetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

20 Chora chë básetema chábioye tmojanánatse; y chë bayëja Jesúsbioye tbojáninÿe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana.

21 As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca;

22 ba soye, chë bayëja chábioye inoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

23 Chora Jesús tbojaniyana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiama lempe endopodena ca.

24 Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

25 Y bëtscá entšanga imojtsótotoma Jesús tojáninÿe ora, chë bacna bayëja tbojtsanbochembo mëntšá: —¡Bacna bayëja, chë básetema tësmá y ndëbiá bi-amnayá; chábertšana maisebocna y ndocna te más chábeñe catjésamashëngo ca!

26 Y chë bayëja chábertšana yojésebocna, yojtseyoye y chë básabioye jabuache ibojeshatituyé; y chë básana mo obanacá tojanoquedá, y chë causa banga imojtsichamo cha obaná yojtsemna ca.

27 Pero Jesús tbojanábuacueshache y tbojtanatsbaná; y chë básana yojtëtsaye.

<sup>28</sup> Chentsana, Jesús canye yebnoye tojánamashëngo, y chabe uatsjëndayëngna luaroca cha tmojantjá: —¿Ndayeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanëjua: —Chca bayëjënga jtëbuacanamna jobenayana nÿe Bëngbe Bëtsáftaca jencuëntase, chabuájabuachama jaimpádase ca.

*Jesús cachiñe tojánayana cha ibojamna jóbanana y jtayenana ca*  
(Mt 17.22-23; Lc 9.43-45)

<sup>30</sup> Chentsana tmojëftsanbocna ora, Galilea luarëjana imojtsajna; y Jesús yojtseboşe chama ndocná chaondëtsetatšëmbuama,

<sup>31</sup> er cha chabe uatsjëndayënga yojtsabuátambaye. Mëntsá cachabiana yojanëtsësnaye: “Bëngbe Bëtsá Entsá tbojanbemá entsangbe cucuatšifne mochanjáboshjona; mochanjóba, pero chentsana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsësnacá, y chama jatstjanayamna chënga imojtsauatja.

*¿Nda chë más uamaná yomna?*  
(Mt 18.1-5; Lc 9.46-48)

<sup>33</sup> Chora Capernaum puebloye chënga tmojánashjajna; y cach yebnentše imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsësnaye ca?”

<sup>34</sup> Chëngna nÿe iyteca tmojanobiama, er benachëjana chënga innayénatsësnaye, chënguentšá nda chë más uamaná bëtsemnama.

<sup>35</sup> As Jesús tojanótbema, chabe bnëtsana uta uatsjëndayënga tojánachembo y tojanëyana: “Ndánaca nÿetscangbiama chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.”

<sup>36</sup> Chora Jesús canye básetema tbojánishache, chëngbe tsëntsaca tbojanatsá, tbojantbá y chënga tojanëyana:

<sup>37</sup> “Ndánaca, átšbeñe ošbuachiyá bëtsemnayeca, tbojofja canÿa mo quem basetemcá, chana atše jofjana; y nda atše šojofja, chora cha nÿe atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngaftaca jtsemnana*  
(Mt 10.42; Lc 9.49-50)

<sup>38</sup> Juan, Jesúsbioye tbojanianyana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entsángbentšana endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentsana atšbe contra jatóyebuambnayana.

<sup>40</sup> Ndegombre, nda ndoñe bëngbe contra tontsemná, bëngaftaca jtsemnana.

<sup>41</sup> Y ndánaca, masque nÿe búyeshtema tšëngaftanga tcmojubuatšatá, tšëngaftanga átšbënga bëtsemnayeca, chábioye Bëngbe Bëtsá canye uacanana soye bochantatšetaye, cha chë tšabe soye tojamama ca.

*Resjo yomna, nderado bacna soyënga cuanjama*  
(Mt 18.6-9; Lc 17.1-2)

<sup>42</sup> Chentsana Jesús tojánayana: “Canÿa átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canye bëts nantsnëbé chamotsetamošëntšbua y mar béjayoye asentoye chamotsashbuetše chabotsenatjëmbama.

<sup>43</sup> Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nÿetsca tescama vida jtsebomnama, nÿe canÿe cucuatše bomná, y ndoñe nÿets útatšeca infiernoye chacmotocá jama, chë ndocna te yochanjáfsana íñeshoye;

<sup>44</sup> choca útsenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>45</sup> “Nderado acbe shecuátšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nÿetsca tescama vida jtsebomnama, y ndoñe nÿets útatšeca infiernoye chacmotsétšena;

<sup>46</sup> choca útsenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>47</sup> “Nderado acbe bomínÿeca bacna soye tcojinÿe y cachca soye tcojama, más tšabá nántsemna chë bominÿe chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nÿe canÿe bominÿe bomná, y ndoñe nÿets útabeca infiernoye chacmotsétšena;

<sup>48</sup> choca útsenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>49</sup> “Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngaftangbiana tšábenga chašmotsemnama, chë átšbeñe betsošbuáchema šmojtsepapadecena ora šmojuantase.

<sup>50</sup> Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nÿetscángaftaca natjëmbana šmochtsiyena ca” –cha tojánayana.

## 10

### *Ndayá Jesús tojanabuatambá bouamnënga tmojtsenëtšenama (Mt 19.1-12; Lc 16.18)*

<sup>1</sup> Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá.

<sup>2</sup> Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canÿe boyá chabe shémbioye cachcá jesonÿayama ca?

<sup>3</sup> Chora cha tojanëjua: —¿Ntšamo Moisés chë soyëngama tcmënjanamëndaye ca?

<sup>4</sup> Y chënga tmojánayana: —Moisés tojanalesenciá chë boyá chabe shémbioye chabuiyé canÿe tsbuanácha, ndayëchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

<sup>5</sup> Chora Jesús tojanëyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga tcmojëftsanamëndá.

<sup>6</sup> Pero quem luare jobojátsama orna, “Bëngbe Bëtsá canÿe boyabása y canÿe shembása tonjánabiama.

<sup>7</sup> Chíyeca, chë boyabása chabe taitá y chabe mamá echanjébasashejuana, chabe shémaftaca jenútanama,

<sup>8</sup> y chë útatna mo canyáca bochántsemna.” Y chca, ya ndoñe útata quebochátsmëna, sinó nýe mo canyáca.

<sup>9</sup> Chcasna, entsá ndoñe chaondéndbema ndayá Bëngbe Bëtsá mo canyíñcá tojëftsema soye ca —cha tojánayana.

<sup>10</sup> Ya cach yebnoca imojtsatsmëna ora, chabe uatsjédayënga cach soyama imojtétstjaye.

<sup>11</sup> Y Jesús tojanëyana: “Nda chabe shémbioye cachcá tbojesonýa y ínÿaftaca tojtóbouamase, cha chë natsana shémbioye ínÿe shembásaftaca jtseíngñayana; chana canýe uabuatmá jtsebomnana.

<sup>12</sup> Y chë shema chabe boyábioye cachcá tbojesonýa, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canýe uabuatmá jtsebomnana ca” —Jesús tojánayana.

*Jesús, basetémëngbiana Bëngbe Bëtsábioye tbojanimpadá*

*(Mt 19.13-15; Lc 18.15-17)*

<sup>13</sup> Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjédayëngna tmojanontsé chë basetémënga unachayënga jtsécácanana.

<sup>14</sup> Jesús chca tojáninýe ora, tbojánetna y chë uatsjédayënga tojanëyana: “Cachcá mónýaye chë basetémënga átšbioye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetémëngcá imomnëngbiana.

<sup>15</sup> Ndegombre cbëyana, nda Bëngbe Bëtsabe soyënga ndoñe tonjójyëngacñe mo canýe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tsabe bendicionënga chëngbeñe chaotsemnama.

*Canýe bomna entsá Jesúsbioye tojana*

*(Mt 19.16-30; Lc 18.18-30)*

<sup>17</sup> Jesús jama tojtëtanontsé ora, canýe boyabása chábioye tojanótjajo, chabe shecuatšentse tojanoshëntsamentsé, y mëntsá tbojantjá: —Tsabe Buatëmbayá, ¿ndayá šojtsemna jamana chë nýetsca tescama yomna tsabe vida jtsebomnama ca?

<sup>18</sup> Y Jesús tbojanjúá: —¿Ndáyeca “tsabia ca” šcjauyana? Tsabia nýe canýa endmëna: Bëngbe Bëtsá.

<sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena, ínÿengbioye ndoñe catjáingñaye ndayánaca jabacama, y acbe bëtsétsata ndoñe stëtšoye catjáquedaye ca.”

<sup>20</sup> Chora chë boyabása tbojanjúá: —Buatëmbayá, atse lempe chë mandënga básetema orscana sëndocumplina ca.

<sup>21</sup> Jesús bonshanánaca tbojanonýinýe y mëntsá tbojanianana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnjëmënga cochtsatšataye; chca, celoca canýe bëts bomnana cochántsebomna. Chentšana, cochjabo y šcochjuasto ca.

<sup>22</sup> Pero chë bobóntšbioye ínÿetšá ibojtsínýnana Jesús chca tbojanianama; y puerte ngménaca yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjédayënga tojanëyana: —¡Puerte totcá entsemna bomnëngbiana Bëngbe Bëtsabe amëndayoye jamashënguama ca!



<sup>24</sup> Chca imojouena ora, chë uatsjéndayënga ojnánënga imojtsemna, pero Jesús cachiñe tojanoyebuambá y mëntsá tojanéyana: —Atsbe básenga; ipuerte totcá entsemna Bëngbe Bëtsabe amëndayoye jamashënguama!

<sup>25</sup> Ndegombre, más paselo endmëna chë coshufjentša atëfjnëjana canye camello chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayënga nÿe más imojtsenjnanaye y imojtsentjanaye: —¿As, nda yochjobenaye atsboaná jtsemnana ca?

<sup>27</sup> Chora Jesús tojanënyanÿe y tojanéyana: —Entšanga ndoñe quemátobena jamana canya atsboaná chaotsemnana, pero Bëngbe Bëtsá aíñe; er Bëngbe Bëtsá lempe jamama endobena ca.

<sup>28</sup> Chora Pedro tbojaniyana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna ca.

<sup>29</sup> As Jesús tojánayana: —Ndegombre cbëyana, ndánaca átšbioye jaserviama y chë tsabe noticiënga jábuayenama, tojëseboshjona chabe yebna, catšátanga o uabénanga, bebmá o befta, o básenga, o fshantsënga,

<sup>30</sup> cha mora quem luarentše echanjójyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínÿenga mochántsama; y chë inÿe luarocna, chë nÿetsca tescama yomna tsabe vida echanjónÿena.

<sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

### *Jesús cachiñe tojánayana cha jóbanama y jtayenama*

*(Mt 20.17-19; Lc 18.31-34)*

<sup>32</sup> Chentsana Jerusalenoye imojtsaye, y Jesús yojtsebnatsana. Chë uat-sjéndayënga puerte ojnánënga imojtsemna, Jesús ndauatjca choye yojt-sayama; y inÿe beca entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontsé jáuyanana ntšamo cháftaca jopásama yojtsemnana.

<sup>33</sup> Mëntsá tojanéyana: “Tsëngaftanga šmontsonÿá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bach-nangbe amëndayënga y ley abuátambayëngbe cucuatšñe mochanjáboshjona, y chënga mochanjayana cha chaóbana ca; y ndoñe judiëngbe cucuatšñe mochanjáboshjona.

<sup>34</sup> Chënga mochantsáboyejuana, mochántsebuashëttojo, mochántsetjanja y mochanjóba, pero chentsana unga tianoye cha echántayena ca.”

### *Santiago y Juan, Jesús tmojanimpadá canÿe pavor cháuabiamama*

*(Mt 20.20-28)*

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobconá y tmojaniyana: —Buatëmbayá, bëndata fsëntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsëndatbiama chjamama ca?

<sup>37</sup> Y chata tbojaniyana: —Aca reycá chacojtsemánda ora, cochjaleséncia bëndata fchayobená jótbemana, canya acbe catšbioica y inÿa acbe uañicuayoica ca.

<sup>38</sup> As Jesús tojanéjua: —Ntšamo šmontsotjanañama tsëndata ndoñe quešnátstatsëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

<sup>39</sup> Y chata tbojaniyana: —Aíñe fchanjobenaye ca.



Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria.

<sup>40</sup> Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndëmuanÿengbiana atšbe Taitá tojaprontacá ca.

<sup>41</sup> Chë inÿe bnëtsana uatsjëndayënga chca tmojanuena ora, tmojanontšé Santiago y Juánoftaca jotjáyanana.

<sup>42</sup> Pero Jesús nÿetsca uatsjëndayënga tojánachembo y tojanéyana: “Tšëngaftanga šmondëtatšëmbo, quem luarentša amëndayënga lempe jtsemándayana, nÿa mo nduiñënga cuaftsemncá; y chë bëtsetša entšanga chëngbe obenánaca jtsemándayana, ntšámnaca jtsamëse, chë inÿe entšanga sempre chamotsayaunanama.

<sup>43</sup> Pero tšëngaftangbeñe ndoñe chca chaondëtsemna. Inÿetšá; masna, nda tšëngaftangbeñe chë más uamaná jtsemnama tojtseboše, cha bontsemna chë inÿenga jtsaservénana;

<sup>44</sup> y ndánaca tšëngaftanguentšá chë más uamaná jtsemnama tojtsebošá, bontsemna jtsemnana nÿetscangbiana, mo nÿe inÿabiana nÿets tempo oserve-nacá.

<sup>45</sup> Cachcá, Bëngbe Bëtšá Entšá tbojanbemá ndoñe chenátabo cha chamot-seservénama, ndayá inÿenga jabáserviama. Y mo nda, inÿenga játsebacama cuafjopagacá, cha echanjóbana ba entšanga atsebácanënga chamotsemnama ca” —cha tojánayana.

*Jesús canÿe jtanábioye tbojanshná  
(Mt 20.29-34; Lc 18.35-43)*

<sup>46</sup> Chentšana, Jesús y chabe uatsjëndayënga Jericó uabaina puebloye tmojánashjajna. Y Jesús chabe uatsjëndayëngaftaca y bëtscá entšángaftaca Jericó pueblentšana yojtsaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana.

<sup>47</sup> Y Jesús Nazaretocá chëjana yojtsachñëjuanama cha yojátatšëmbona ora, tojanontšé mëntšá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga chë jtaná imojtsácacana iytëca chaótbemama. Pero cha más yojtsáyebuache: —¡Davídbentšana Entšá, šmotselastemá ca!

<sup>49</sup> Chora Jesús tojantsá y chë inÿenga tojanéyana: —Chë jtaná mochembo ca. As chë jtaná tmojanchembo, y mëntšá tmojaniyana: —¡Añemo cochtse-bomna; motsbaná! Jesús cmontsechembuana ca.

<sup>50</sup> Y chë jtaná, quefsaiya jtsenátsejquëse, yojontsënja y betesco Jesúsbioye yojobeconá.

<sup>51</sup> Chora, Jesús chë jtanábioye tbojantjá: —¿Ndayá cojtseboše atše acbiana chjamama ca?

Y chë jtaná tbojanjuá: —¡Buatëmbayá, šmolesenciá atše chašuatábínÿnama ca!

<sup>52</sup> As Jesús tbojaniyana: —Motsatoñe. Tšabá jtsatsmënema Bëngbe Bëtšábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

## 11

*Jesús Jerusalenoje tojánashjango  
(Mt 21.1-11; Lc 19.28-40; Jn 12.12-19)*

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjéndayata tojanichamó,

<sup>2</sup> y mëntśá tojanéyana: “Tsëndatbe natsana entsemna base pueblotémoye motsata. Chaşojáshjango y cachora şochanjínýena canýe burrotema utsbuaná; chábeñe cabá ndocná tonjenojayé. Sochjuajafjoná y şochjuánatse.

<sup>3</sup> Nderado nda, ¿ndáyeca şmojtsanachá ca? chacmojátjase, şochjojuá: ‘Bëngbe Utabná bontśájaboto y chora bochantabáiseboshjona ca.’ ”

<sup>4</sup> As chata tbojána, y tbojáninýena chë burrotema tsáshenañe, canýe bësásañe utsbuaná, y imojuajafjoná.

<sup>5</sup> Y básefta entşanga chiñe imojtsemnënga, chátbioye tmojanéyana: “¿Ndayá şojtsama? ¿Ndáyeca chë burrotema şojtsajafjná ca?”

<sup>6</sup> As chata tbojanjuá ntşamo Jesús tojanéyancá; y chë entşanga tmojanalesenciá chë burrotema chamuánatsama.

<sup>7</sup> Chentşana, chë burrotema Jesúsbioye tmojanánatse; chë burrotëmbeñe chatbe entşayá tbojanátatse, y Jesús chábeñe tojanenojayé.

<sup>8</sup> Bëtscă entşanga chëngbe entşayá chë benachëjana imojtsanëtëtsatsana, y inýengna chë jajoca imojuatëtsetşe buacuashangá chiñe imojuacjaye.

<sup>9</sup> Y chë natsana imojtsajnënga y chë ústonoyënga mëntśá imojtsaiuáye buache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá!

<sup>10</sup> ¡Tşa tşabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe şhëconana lempe yojëftserrepárase, y ya yojtseibétatana causa, chabe bnëtsana uta uatsjéndayëngaftaca tojëftsanbocna, Betania puebloye.

*Jesús tojánayana canýe betiye ndoñe más chaondëshájona ca (Mt 21.18-19)*

<sup>12</sup> Yëfsana, Betaniocana Jerusalenoye chënga imojtésajna ora, Jesús tbojánishëntsena.

<sup>13</sup> Bënocana canýe higo betiye yojinýe; as tojána jontjeşiyama tainashajo o ndoñe. Pero nýe tsbuanáchënga chiñe yojínýena, chora ndoñe shajo tempo bëtsemna causa.

<sup>14</sup> As Jesús chë higo betiyoye tojánayana: “¡Ndocna te más chacondëshájona entşanga chamosama ca!”

Y chabe uatsjéndayënga imojouena ntşamo cha tojanayancá.

*Jesús, Bëngbe Bëtsabe bëts yebnentşana enënga y obuámnayënga tojtanëbuacna (Mt 21.12-17; Lc 19.45-48; Jn 2.13-22)*

<sup>15</sup> Jerusalenoye tmojánashjajnentşana, Jesús Bëngbe Bëtsabe bëts yebnoye tojánamashëngo, y tojanontşé chentşana jtëbuacnana chë chentşe imojtsena y imojtsobuámnañënga. Chéntşnaca imojtsemna entşanga canýe crocénana enënga, y chë crocénana nýe Bëngbe Bëtsabe bëts yebnentşama inoservenana. Chë entşanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tşenëşëgnaca;

<sup>16</sup> y ndoñe tonjanalesenciá ndocná Bëngbe Bëtsabe bëts yebnejana chë soyënga chaotsëchnëjuanama.

<sup>17</sup> Y tojanontşé entşanga mëntśá jabuátambana: “Ndegombre, Bëngbe Bëtsabe uabemana palabrenguiñe cha mëntśá tojánayana: ‘Atşbe bëts yebna echantsabaina nýetsca luarentşa entşangbiamana átşeftaca encuéntaye yebna

ca'; pero tsëngaftangna atbëbanëngbe oyeniñe chë yebna šmojtsebema ca" — Jesús tojanëyana.

<sup>18</sup> Chë bachnangbe más uámana amëndayënga y chë ley abuátambayënga tmojántatsëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nýetsca entšanga imojtsenjnanaye ntšamo cha yojanabuátambama.

<sup>19</sup> Pero yojtseibëtatana ora, Jesús chabe uatsjëndayëngaftaca chë bëts pueblentšana yojesóbocñe.

*Chë higo betiye tojtsanbuashá*  
(Mt 21.20-22)

<sup>20</sup> Yëfsana cachëse, cachëjana imojtësachnëjuana ora, tmojáninýe chë higo betiye parejo tbëtëjëngaca yojtsebuashá.

<sup>21</sup> Chora Pedro yojenójuaboye ntšamo yojopásama; as Jesúsbiyoye tbojaniyana: —¡Buatëmbayá, minýe; chë tconjayana ndocna te más tsábe betiye chaotsemnama betiye tojtsebuashá ca!

<sup>22</sup> Y Jesús tbojaniyana: —Bëngbe Bëtsábeñe šmochtsošbuáchiye.

<sup>23</sup> Ndegombre cbëyana, nderado nda quem tjoye tojayana, "¡chentsána mojuaná y bëts uafjajónayoye motsëshbuetše ca!" y chca tojayana ainaniñe inýetsá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo.

<sup>24</sup> Chýeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmoma.

<sup>25</sup> Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tsëngaftangbiamama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tsëngaftangbe bacna soyëngama chacmotsaperdonama.

<sup>26</sup> Pero inýa ndoñe šmonjaperdonasna, Bëngbe Taitá, celoca endmëná, cach ndoñe tsëngaftanga quecmochátaperdonaye ca —cha tojánayana.

*Jesusbe obenana*  
(Mt 21.23-27; Lc 20.1-8)

<sup>27</sup> Chca tojanopasá chentsána, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga,

<sup>28</sup> y mëntsá tmojantjá: —¿Ndaye deréchoca chë contsama soyënga aca cojt-sama ca? ¿Chca jtsamama nda obenana tcmënjatšetá ca?

<sup>29</sup> As Jesús tojanëyana: —Atšnaca sëntsebmoma canýe soye tsëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama.

<sup>30</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Smëyana ca.

<sup>31</sup> Chora chënga tmojanontsé mëntsá enatsëtsnayana: " 'Bëngbe Bëtsá ca' chamojojuase, cha šochanjáuyana: 'As ¿ndáyeca chë cha tmojanabuayená soyënguiñe ndoñe šmonjanošbuaché ca?'"

<sup>32</sup> Pero ndoñe quemuátobena jayanana 'entšanga ca.'" Chca tmojánayana, er chënga entšangbiamama imojánauatja, er nýetscanga imojanjuabná, Juan ndegombre Bëngbe Bëtsabe juabna oyebuambnayá yojamnama.

<sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanéyana: —As atše cach ndoñe quebochatéyana ndaye deréchoca atše chca stsama ca.

## 12

### *Chë puerte bacna trabájayëngbiama cuento*

(Mt 21.33-46; Lc 20.9-19)

<sup>1</sup> Chora Jesús tojanontsé cuentëngaca jabuátambana. Mëntsá tojanéyana: “Canye entsá bëtská uvas betiyënga yojáje, y chë shëconana yojajétja. Chë uvasësangá juantsëtetjiamna canye base luare yojajutjo; y canye tsbanana jebna soye yojapórma chiñe jtsashanýama. Chentsana, inye trabájayënga chë jajañe yojúyentsame, y chana inye luaroye yojtsoñe.

<sup>2</sup> Chë uvasësangá juashacama tempo yojobuache orna, chë jajañe nduiño canye oservená ibojíchmuá chë arrëndayënga jáuyanama ntsachetsá chë nduiño ibojtsotocánama.

<sup>3</sup> Pero chëngna, cha imojishache, imojtsejantsetaye, y tondaye ntajatacá imojtichmuá.

<sup>4</sup> Chentsana, chë nduiño inye oservená ibojíchmuá; pero chana, bestsaše imojtselísia y podesca imojtsóyenguango.

<sup>5</sup> Chentsana inya ibojatichmuá, y chana chë arrëndayënga imojtsóba. Y bángnaca yojichamuá; pero chëngna, inyëngna imojtsajantsetaye y inyëngna imojtsëbaye.

<sup>6</sup> “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmuá y mëntsá yojtsejuabnaye: ‘Atsbe uaquiñá cocayé mochanjóyeunaye ca.’

<sup>7</sup> Pero chë arrëndayënga cha imojinye ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbangá, y lempe chabe otocana soyënga bëngbiama echanjoquéda ca.’

<sup>8</sup> Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjësëbaye, y inye trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé,  
mora chë más bëts uashacuanësentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinýanýiyama chënga mo chë puerte bacna trabájayëngcá imojanmënama. Pero entsangbiama imojtsauatja, chíyeca cachcá tmojanonýá y chentsana imojtsóñenga.

### *Chë Romoca bëts mandadbiama impuesto jtsatsquëcjnayama*

(Mt 22.15-22; Lc 20.20-26)

<sup>13</sup> Chentsana chënga, básefta fariseunga y Heródesbe ústonënga Jesúsbiroye tmojanichamó, ndayá cha tojayaniñe jisháchichiyama, as chca jtseboznama ndaye sóyeca mandadëngbeñe cha mal jaquédana.

<sup>14</sup> Chënga tmojána y Jesús tmojanianya: —Buatëmbayá, bënga fsëndëtatšëmbo aca ndegombre soyënga cnetsabuátambana, y ndoñe

jatuenanana n̄ye ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bēngbe Bētsá yomandacá. Chcasna, ¿tšabá tanántsemana, César, chē Romoca bēts mandadbiana bēnga impuesto jtsatsquēcjnayana? ¿Fchtsatsquēcjnaye o ndoñe ca? —chēnga tmojantjá.

<sup>15</sup> Jesús yojtsetátšēmo, chēnga bacna entšanga ntšamo ndegombre tmojuabnacá ndin̄yin̄nayēnga imojamnama; chíyeca tojanéyana: —¿Ndáyeca tšēngaftanga šmojtseboše chē sóyeca atše jisháchichiyama? Can̄ye denario crocénana šmiyēboñe, atše chayobená jin̄yama ca.

<sup>16</sup> As can̄ye crocénana tmojanoyé y Jesús tojanéyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chēnga tmojanjuá: —Césarbe jubiá; cha chca enduabaina ca.

<sup>17</sup> Chora Jesús tojanéyana: —Chcasna, César šmochtoyiye cha ibotocana soye; y Bēngbe Bētsana cha ibotocana soye ca.

Y n̄yetscanga chama imojenjaná.

### *Obanēnga jtayenama Jesús tmojantjá*

*(Mt 22.23-33; Lc 20.27-40)*

<sup>18</sup> Chentšana, báseftanga saduceo ca uabaina entšanga tmojána Jesús jin̄yama. Chēnga imojanjuabná obanēnga ndocna te ntayenana ca. Chíyeca, Jesús mēntšá tmojaniana:

<sup>19</sup> —Buatēmbayá, Moisés tojēftsanabema, nderado can̄ye boyá tojóbana y básenga ndoñe tonjēftsabáshejuanēsna, canmēna chē uabentsá chē shémaftaca jtobouamayana, chca, chabe uabochená obanabiama básenga jtsabamnama ca.

<sup>20</sup> Y chcase, can̄ye, can̄ysēfta catšátanga monjamna. Chē natsaná tonjanobouamá y tontsanóbana básenga ntjēftsabashejuancá.

<sup>21</sup> Chentšana, chē ústona uabentsá chē shémaftaca tonjanobouamá, pero chana tontsanóbana, básenga ntjēftsabashejuancá; chē in̄ye uabentsáftaca cachcá tonjanopasá.

<sup>22</sup> Chca, n̄yetsca can̄ysēfta catšátangaftaca cha tonjanobouamá, pero ndocná básenga ntjēftsabáshejuanana. Y chentšana chē shembásanaca tontsanóbana.

<sup>23</sup> Y morna, chē obanēnga chamojtayena ora, ¿ndabe chē can̄ysēfta catšatanguentsabe shema chē shembása yochtsemna, n̄yetscanga cháftaca tmojanobouamase ca? —chēnga tmojantjá.

<sup>24</sup> As Jesús tojanéyana: —Ntšamo Bēngbe Bētsabe uabemana palabrēnguiñe endayancá ndoñe tcmonjosertá, ni Bēngbe Bētsabe obenanama. Chíyeca ntšamo ndoñe yondmēncá šmontsichamo.

<sup>25</sup> Er obanēnga chamojtayena ora, ni boyabásenga ni shembásenga quemochatóbouamnaye, y chca, chēnga mochántsemna mo celoca angelotemēngcá.

<sup>26</sup> Y chē obanēnga jtayenama, ¿Moisesbe librēšañe ndoñe šmēndualía ntšamo Bēngbe Bētsá tbojanianama, chē betiyetema yojtsángbototjuana ora? Bēngbe Bētsá mēntšá tbojaniana: “Atše sēndmēna Abraham, Isaac y Jacobēbe Bētsá ca.”

<sup>27</sup> Bēngbe Bētsá chca tojánayana ora, entsichamo cha ndoñe yondmēna obanēngbe Bētsá, sinó aina entšangbe Bētsá ca, er masque chēnga tmojanóbana, chēnga cabá Bēngbe Bētsáftaca mondoyena. Tšēngaftanga can̄ye ndoñe ndegombre soyiñe šmontsemna ca —tojanéyana.

### *Chē más bēts uámana mando*

*(Mt 22.34-40)*



<sup>28</sup> Chentše yojtsemna canje ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanëjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

<sup>29</sup> Y Jesús tbojanjuá: —Chë más uámana mando mëntsá endmëna: “Israeloquënga šmochjouena, Utabná, Bëngbe Bëtsá endmëna, y nje canje Bëngbe Utabná endmëna, ndocná más.

<sup>30</sup> Utabná Bëngbe Bëtsá cochtsebobonshana nyets acbe ainánaca, nyets espíritoca, nyets juábnaca y nyets añémoca.”

<sup>31</sup> Y chentšana quem inje mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chë ley abuatambayá Jesúsbioye tbojanijana: —Buatëmbayá, puerte tšabá tcjayana. Ndegombre yomncá contsichamo, nje canje Utabná endmëna y ndocná más.

<sup>33</sup> Y cha jtsebobonshánana nyets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nyetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

<sup>34</sup> Cha nyets juábnaca tbojanjuama Jesús tojáninje ora, tbojanijana: —Batšatema cmontsebuáshbena jtseprontánama, Bëngbe Bëtsá chacolesseniamia acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entsábentšana yomna?*

*(Mt 22.41-46; Lc 20.41-44)*

<sup>35</sup> Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca?

<sup>36</sup> Cach David, chë Uámana Espíritbe mándoca mëntsá tojánayana:

Bëngbe Bëtsá, atšbe Utabná Crístbioye tbonjanijana:

atšbe catšbioica mótbema,

atšbe obenánaca, acbe uayayënga acbe cucuatšinë chamoquedama chjamëntscuana ca.

<sup>37</sup> ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanëyana.

Y chë bëts cá entsanga, oyejuayënga imojtsuenana.

*Jesús chë ley abuátambayëngbiama tojánayana, chënga ndoñe tšabá montsama ca*

*(Mt 23.1-36; Lc 11.37-54; 20.45-47)*

<sup>38</sup> Mëntsánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entsayangaca jtsajnana y jtsebošana tsáshenañe entsanga nja respétoca chamotsacheuanama.

<sup>39</sup> Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nja quëfseroca.

<sup>40</sup> Pero chënga, viudángbioye chë tmobomna soyënga jtsabacayana, y entsangbe delante tšabá chamotsënyama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínëngbiama más chënga echanjácastigaye ca” —Jesús tojánayana.

*Jesús yojtsénýaye chë crocénana quëcjnáyënga*  
(Lc 21.1-4)

<sup>41</sup> Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjnáyëtema ndirichiñe; y chë crocénana quëcjnáyënga yojtsénýaye. Bëtscá bomnëngna becá crocénana imojtse-quëcjnaye.

<sup>42</sup> Chora, canýe viudá ndbomnjémnaca yojobeconá y nýe uta crocénana chëtémiñe yojaftsesegóra.

<sup>43</sup> Chora Jesús chabe uatsjéndayënga tojánachembo chamobéconama, y mëntšá tojanéyana: “Ndegombre cbéyana, quem viudá ndbomnjëma, Bëngbe Bëtsabiama nýetscangbiama más tonjëftseseGORÁ.

<sup>44</sup> Chë bomnëngna chë yojtsóyentsjamentšana tmonjëftseseGORÁ, y cabá bomnana imotsóbomñe; y chë viudana tonjëftseseGORÁ lempe ntsachetšá yobomncá; masque tša ndbomnjëma, chë vida jtsebomnama lempe ntsachetšá yobomncá tonjëftseseGORÁ ca.”

## 13

*Jesús tojánayana chë Bëngbe Bëtsabe bëts yebna lempe mochjánpochocama*  
(Mt 24.1-2; Lc 21.5-6)

<sup>1</sup> Jesús Bëngbe Bëtsabe bëts yebnentšana tojëftsanbocna ora, canýe chabe uatsjendayá tbojaniyana: —Buatëmbayá, minýe, itša bëts ndëtsbënga, y tša botamana bëts yebnënga ca!

<sup>2</sup> Chora Jesús tbojaniyana: —Tšabá cochjinýe tša botamana bëts yebnënga. Pero muentše ndoñe queochaisoquéda ni mo canýe ndëtsbé inýebé juatsboye. Lempe mochantsepochóca ca.

*Ntšamo yochtsemna quem luare jopochócamá te chaojtsobeco ora*  
(Mt 24.3-28; Lc 21.7-24; 17.22-24)

<sup>3</sup> Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá,

<sup>4</sup> ntšamo cha tojanayancá ntseco yochjanopásama, y chca jopásama ya tojt-sobecuama entšanga chamotsetatsëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema.

<sup>6</sup> Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócamá tempo cabá ndoñe queochátsmëna.

<sup>8</sup> Canýe luarentša entšanga inýe luaroca entšángaftaca mochántsejtsjanaye, y canýe amëndayábentša entšanga inýe amëndayábioca entšángaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tšëngaftangna cach tšëngaftangbiama šmochtsantješna; entšanga cmochanjíshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiama šmotatšëmbcá chašmuayanama.

10 Er entseyta, quem luare cabá ndopochóca ora, Bëngbe Bëtsabe tšabe noticiënga nÿetsca luarënguentsä entsängbioye chaóshjanguama.

11 Y ínÿengbe cucuatsiñe jabáshejuanama chacmojtšénachá ora, ndoñe šmattsenócochinÿena ntšamo chora šmochjayana. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

12 “Canÿe catsata cachabe catsata ínÿengbe cucuatsiñe bochanjáboshjona chamotsóbama, y bëtsétsanga cachëngbe básenga mochanjábashesjuana chamotsébáyama; y chë básengna chëngbe bëtsétsangbe contra mochántsemna y chamotsébáyama mochanjábashesjuana.

13 Atšbe ústonënga bétsemna causa, nÿetsca luarënguentsä entsanga cmochantsébuayënja; pero nda nÿets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, cha-bosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta;

15 chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama;

16 y nda jajoca chaojtsemna, yebnoye ndoñe chaondéta ni mo chabe quëfsaíya jesácñama.

17 ¡Tša lastema chë tempo ngomámanënga o ochóchaye šešonga chamojtsabamna shembásengbiama!

18 Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora,

19 er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngménana ndoñe ntjamnana.

20 Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

21 “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

22 Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca.

23 ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo  
(Mt 24.29-44; Lc 21.25-36)*

24 Mëntšánaca Jesús tojanëyana: “Pero chë tempo, entsanga puerte chamojasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye,

<sup>25</sup> celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana.

<sup>26</sup> Y chora, entsanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe.

<sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

<sup>28</sup> “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaiséjotsana, jtsotatsëmbuana chë tšabe tempo ya tojtsaisobecuama.

<sup>29</sup> Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama.

<sup>30</sup> Ndegombre cbëyana, lempe chca echanjochnëngo, morsca entsanga cabá ndóbana ora.

<sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>33</sup> “Chíyeca, cuedado šmochtsebomna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo.

<sup>34</sup> Echántsemna mo canÿe entsacá; chana inÿe luaroye ya jëftsebocnama ora, chabe oservënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama.

<sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tsëntseto ora, bínÿanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo;

<sup>36</sup> ndoñe cuedado šmontsebomnëse, nderado cha nÿe ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta.

<sup>37</sup> Chíyeca, ntšamo tšëngaftanga cbochanjauyancá, nÿetscanga chanjáuyana: ¡Puerte cuedado šmochtsebomna ca!” —Jesús tojánayana.

## 14

*Entšanga imojtsejuabnaye ntšamo jamëse Jesús jishachama  
(Mt 26.1-5; Lc 22.1-2; Jn 11.45-53)*

<sup>1</sup> Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama.

<sup>2</sup> Báseftanga imojtsichamo: “Quem fiestëntscuana ndoñe, er nderado entsanga yapa muanjóntša enbouenanana ca.”

*Canÿe shembása botamana uanguëtse béjaye Jesusbe bestšašñe tbojanbuešcja*

*(Mt 26.6-13; Jn 12.1-8)*

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema

jújtjena canýe becá uámana y botamana uanguëtse béjaye, ena nardana uanguëtziye; chana chë jarrëtema yojátsba y chë béjaye Jesusbe bestšasiñe tbojanbuešcja.

<sup>4</sup> Chca tmojáninýe ora, báseftanga chentse imojtsemnënga tmojanotjayaná y mëntsá imojtsenatsëtsnaye: —¿Ndáyeca nýe bonamente chë soye yojtsemna ca?

<sup>5</sup> Chamna, matmënjobenanga chë béjaye unga patse denario crocenánama juiyana, y chánaca ndbomnjëmënga matmënjújabuache ca.

Y chë shembásabiama podessa imojtsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonyaye ca? ¡Ndocá matatsana! Atšbiama tšabe soye tonjama.

<sup>7</sup> Er ndbomnjëmënga nýets tempo tšëngaftangbeñe mochanjëftsemna, ndayénaca šmojábošena ora, šmatjobenaye tšabe soye chëngbiana jamana; er atše tšëngaftangaftaca ndoñe nýets tempo quichásemna.

<sup>8</sup> Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora.

<sup>9</sup> Ndegombre cbéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyná chentse, ntšamo quem shembása tojamámnaca becá mochanjëftsóyebuambaye, chca, entšanga chabiama chamotsenójuabnama ca —cha tojanéyana.

*Judas tojána bachnangbe amëndayëngbioye, Jesús chamuishachama  
(Mt 26.14-16; Lc 22.3-6)*

<sup>10</sup> Chentšana, Judas Iscariote, canýe chë bnëtsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšiče jaboshjonama.

<sup>11</sup> Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšiče jaboshjonana.

*Jesús chabe uatsjëndayëngaftaca Bashco saná tojanse  
(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uatsjëndayënga Jesús tmojantjá: —¿Ndëmoca cojtseboše bënga fchauptontama, Bashco saná chacosama ca?

Chca te chë judiënga imoanamana, Bëngbe Bëtsá jëtschuayamna canýe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjëndayata tojanichamó y mëntsá tojanéyana: —Chë bëts puebloye motsata. Chašojáshjango ora, canýe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanýe yebnentse yochjámashënguama;

<sup>14</sup> y chë yebna nduiño šochjauyana: “Buatëmbayá tonjayana: ¿Ndayentse chë tsañe yojtsemna, Bashco saná atše atšbe uatsjëndayëngaftaca jasama ca?”

<sup>15</sup> As cha cmochanjínýanýiye canýe bëts tsañe, tsbanana pisoca, lempe prontániñe; chentse šochjapronta bënga mochasama ca.

<sup>16</sup> As chë uatsjëndayata tbojána y tbojáninýena lempe ntšamo Jesús tojanéyancá; y chentse chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjango, chabe bnëtsana uta uatsjëndayëngaftaca.



18 Y mesëshentše imojtsesaye ora, Jesús tojaněyana: —Ndegombre cběyana, canya tšëngaftanguentsá, átšeftaca entsesá cha, uayayëngbe cucu-atšinë šochanjáboshjona ca.

19 Chorna chë uatsjéndayënga ngménaca imojtsemna, y tmojanontsé canyánya cha jatjayana: —¿Atše chtsemna ca?

20 Y Jesús tojanějua: —Canya chë bnětsana utatentšá entsemna. Chabe tanděse cach atše sěntsefchecuacná šcnenentše cha entsefchecuacná.

21 Ndegombre, Bëngbe Bětsá Entšá tbojanbemáftaca echanjopása ntšamo chabiamá Bëngbe Bětsabe uabemana palabrënguiñe endayancá. Pero, jtša lastema chë bochjáboshjonabiamá! Chabiamá más tšabá manjamna ndoñe ntjónynana ca —Jesús tojánayana.

22 Imojtsesantscuana, tanděse tojanca, Bëngbe Bětsábioye chama tbojtanchuá, tojanjataye y chabe uatsjéndayënga tojanějatá, y měntšá tojánayana: “Mocñënga, mosënga, atšbe cuerpo entsemna ca.”

23 Chentšana, canye coptema vínoyeca tojanaca, Bëngbe Bětsábioye tbojtanchuá, chabe uatsjéndayënga tojaněšasé, y nyetscanga tmojanofšé.

24 Měntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bětsá entšanga tojašebuachenacá ndegombre yochjochnënguama. Chë buiñe bětsá entšangbe tšabiamá echanjuábuashana.

25 Y ndegombre cběyana, morscana ya ndoñe más chë uvasěsentšana obocniye quichaisofšiye. Chë tsëm vínoye tšëngaftangaftaca chanjofšiye, Bëngbe Bětsabe amëndayoca chamojtsemna ora ca” —tojánayana.

*Jesús tojánayana, chábioye ndoñe bonjanabuátma ca Pedro yochjánayanama (Mt 26.30-35; Lc 22.31-34; Jn 13.36-38)*

26 Bëngbe Bětsábioye jětschuayama tmojancantá chentšana, Olivos tjashoye tmojěftsanbocana.

27 Jesús tojaněyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bětsabe uabemana palabrënguiñe, cha měntšá tojánayana: “Chë oveshënga abujěnyá chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

28 Pero obanënguentsšana chaitayenentsšana, tšëngaftangbe natsana Galileoye chanjá ca —cha tojaněyana.

29 Chora Pedro tbojanianyana: —Masque nyetscanga ábeñe ošbuáchiyana chamotsobuetše y chamotsacheta, atše nya ndocna te ca.

30 Chora Jesús tbojanianyana: —Ndegombre cběyana, cam ibeta, ngallo cabá uta soye ndécánta ora, aca unga soye cochanjayana ndoñe šconduabuatma ca.

31 Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

*Getsemaní luarentše Jesús, Bëngbe Bětsáftaca tbojanencuentá (Mt 26.36-46; Lc 22.39-46)*

32 Chentšana, canye luare Getsemaní ca uabáinoye tmojána. Chocna Jesús tojaněyana: “Muentše motbiamá, chěntscuana atše choye chanjá, Bëngbe Bětsáftaca jencuéntama ca.”

33 Y tojěftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná.

34 Chëngbioye tojaněyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentsana, Jesús más natsanoye tojána, tojanoshentsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama.

<sup>36</sup> Mëntsá yojsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

<sup>37</sup> Chentsana, chabe unga uatsjéndayëngbioye tojtanabo, y chëngna imnétsomañe. Chca tojánanyëna ora, Pédrëbioye tbojaniyana: “Simón, ¿cotsomañe? ¿Ni mo nÿe canÿe hora jtsefšnama ndoñe tconjobená?”

<sup>38</sup> Smochtsefšna y Bëngbe Bëtsáftaca šmochtsencuëntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse.

<sup>40</sup> Yojtabo orna, chë uatsjéndayënga cachiñe imnétsomañe; chënga imojtsefshétana ocnyaye causa, y ndoñe imontsobena ntšamo jojuana.

<sup>41</sup> Chentsana, tojtesaná y tojtanabo ora tojanéyana: “¿Cabá šmotsomañe y šmotsochnañe? Nÿe nÿetsá; hora tocjobuache, Bëngbe Bëtsá Entšá tbojanbemá bacna soye amëngbe cucuatšinë mochanjáboshjona.

<sup>42</sup> Motsbananga, cuajna. Minÿënga, atše boshjuaná ya entsebeconá ca.”

#### *Uayayënga Jesús tmojánishache*

*(Mt 26.47-56; Lc 22.47-53; Jn 18.2-11)*

<sup>43</sup> Jesús cabá yojsóyebuambnantscuana, Judas, canÿe chë bnétsana uta uatsjéndayënguentsá, tojánashjango y cháftaca ba entsanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga.

<sup>44</sup> Judas, chë boshjuaná, tojanjuabó ntšamo jamana entsanga jinÿanyiyama ndëmua Jesús bétsemnana. Chíyeca, yojáuyana: “Nda chaijauámocho, cha echántsemna; smochjishache y cuedádoca smochjuánatse ca.”

<sup>45</sup> Chcasna, Judas Jesúsbioye tojanobeconá y tbojaniyana: “¿Buatëmbayá ca!” Y tbojanámocho.

<sup>46</sup> Chora chë entsanga tmojánishache y tmojanánatse.

<sup>47</sup> Pero canÿa chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canÿe matscuaše tbojtsanéstjango.

<sup>48</sup> Y Jesús chë entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entsá cuaftsemncá ca?”

<sup>49</sup> Atše cada te tšëngaftangbeñe sëndétsemna Bëngbe Bëtsabe bëts yebnoca abuátambaye, y ndocna te choca chešmátanishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” –tojánayana.

<sup>50</sup> Chorna, nÿetsca uatsjéndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonÿá.

<sup>51</sup> Canÿe bobontse Jesúsbioye ibojtsëstona, nÿe canÿe uafjantse entsëjua uichëtjoná. Cha chë entsanga tmojánishache,

<sup>52</sup> pero chëngbe cucuatšinë chë entsëjua jesáboshjonëse, chë bobontsna enasá yojsachá.

*Jesús tmojanánatse chë judiëngbe uámana amëndayëngbioye  
(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna.

<sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanouedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninyana.

<sup>56</sup> Er masque banga Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

<sup>57</sup> Báseftanga imojtsaye y mëntšá Jesusbe contra, ndoñe ndegombre betsemncá tmojánayana:

<sup>58</sup> “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormana yebna, chantsepochóca; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtsjebo ca.’ ”

<sup>59</sup> Pero masque chca imojtsichamo, nyetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojotsbaná, nyetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nye iyteca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjuá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catšbioica chantsetbemana, y celoca jantsetëshiñe chántsaboye ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsanga šochjätëjaboto Jesusbe contra chamuayanama ca?

<sup>64</sup> Tsëngaftanga šmonjouena ntšamo chë entšá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontšé Jesús buashëtjnayana; jubiá imojútsbotse, imojtsejantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebjantšetaye.

*Pedro tojánayana Jesúsbioye ndoñe bonjanabuátma ca  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango;

<sup>67</sup> y Pédrëbioye tbojáninye ora, cha iñe juachaca yojtsanšbonena, yejuana ibojonýinye y tbojaninyana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmo, ni quešnátësertana ca.

Y shjoye, amashjuanóntscoñe yojábocna; y chora canye ngallo yojacánta.

69 Chë oservená cachiñe Pédrëbioye tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentśá entsemna ca.

70 Pero chana cachiñe tojánayana Jesúsbioye ndoñe bonjanabuátma ca. Chentsana, chë chentse imojtsemnënga Pedro tmojátaniyana: —Ndegombre aca chënguentśá contsemna; ácnaca Galileocá contsemna ca.

71 Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntśa júrayana— ¡Atśe chë entśá ndoñe quetsatabuatma, ndabiamama tšëngaftanga šmonsatsëtsná ca!

72 Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndëcánta ora, aca unga soye cochanjanya ndoñe šconduabuatma ca.” Y tojanontsé enóbošachiyana.

## 15

### *Jesús Pilátbioye tmojanánatse*

(Mt 27.1-2, 11-14; Lc 23.1-5; Jn 18.28-38)

1 Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentśe tmojánenefjna, nÿetsca chë luarentśa más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatśiñe tmojánboshjona.

2 Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

3 Chë bachnangbe amëndayënga bëtscá soyënga Jesusbe contra imojtsichamo;

4 chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

5 Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

### *Jesús chaóbana ca tmojánayana*

(Mt 27.15-31; Lc 23.13-25; Jn 18.38-19.16)

6 Cada Bashco fiesta ora, Pilato yojanamana canÿe utamená jëtsboshjonana, ndánaca entśanga tmojuabuayaná.

7 Chë tempo yojamna canÿa Barrabás ca uabainá; cárceloye inautámëna chabe enutëngaftaca. Chëngna entśanga tmojtsanëbaye, mandadëngbe entśángaftaca imojentsjaná ora.

8 Chora, entśanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama.

9 Y Pilato tojanëjua: —¿Tšëngaftanga šmojtseboše tšëngaftangbe rey atśe chjëtsboshjona ca?

10 Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatśiñe tmojánboshjonama.

11 Pero chë bachnangbe amëndayëngna entśanga tmojanañëmó chamuenbouénanama, Pilato jauyanama chëngbiama Barrabás chabuatsboshjona ca.

12 Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

13 Y chënga tmojanáyebuachena: —¡Motsecrucificá ca!

14 Y Pilato entśanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añëmoca tmojtëtanayebuachena: —¡Motsecrucificá ca!



15 As Pilato, entsángaftaca tšabá joquédama yojtsebóšeyecna, Barrabás tbojtanboshjona. Yojámëndaye soldadēnga jabuache Jesús chamotsetšenama; y chentsana soldadēngbe cucuatšišne tbojánboshjona, chamocrucificama.

16 Chentsana, chē soldadēnga Jesús tmojanánatse chē mandadbe bēts yebnentša chashjoye, y nýetsca soldadēnga tmojánachembo chamobéconama.

17 Shbuenda uafjatsenga uinýna entsáyá mo reycá tmojanichētjo; canýe coronēsha tmojanapormá uchmašēfjangaca y tmojanabestšajó.

18 Y chentsana tmojanontsé jachuyana: “¡Bayté judiēngbe Rey cochtsemna ca!”

19 Canýe niñēfjaca Jesús bestšašišne imojtsétsjanjnaye, imojtsebuashētjnaye, y chabe delante imojtsofshēntsaméntšenaye.

20 Y chca imnaftsáboyejuanentsana, chē shbuenda uafjatsenga entsáyá tmojtsanabotsca y cachabe entsáyá tmojtanichētjo, y pueblo chaboje tmojanánatse jacrucificama.

### *Jesús tmojancrucificá*

(Mt 27.32-44; Lc 23.26-43; Jn 19.17-27)

21 Chora, canýe entsá chējana yojtsatashjajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnējuana; y chē soldadēngna imojuatária Jesusbe cruz jēftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”);

23 y tmojanabuiyé vínoye mírraca enájuañe, pero Jesús ndoñe yonjuáyēngacñe.

24 Y chentsana tmojancrucificá; y chabe entsayangamna, tsbanánoye tmojanētšena jinýama ndayá cada ona yochjēftsanácñama.

25 Cachēse, base mošenana ora Jesús tmojancrucificá.

26 Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojancrucificama, mēntšá: MUA CHĒ JUDIĒNGBE REY ENDMĒNA ca.

27 Y cháftaca útata bacna soye ochjajnayátnaca tmojanacrucificá, canýa chabe catšbioica, y ínýana chabe uañicuayoica.

28 Chca cháftaca tmojanma, chaochnēnguama ntšamo Bēngbe Bētsabe uabemana palabrenguiñe chabiamana iuayancá, mēntšá: “Y chábioye tmonjáninýe mo chē puerte bacna soye amēnguentsá canýa cuaftsemncá ca.”

29 Y chējana imojtsachnējuana entsanga, Jesús imojtsóyenguaye, imojtsobestšfshanenaye y imojtsatsaye: “¡Aca chē Bēngbe Bētsabe bēts yebna cochtsánenasatajchca y nýe unga tese cochtanjebo,

30 cach aca mentsbocá y cruzocana matastjango ca!”

31 Cachcá chē bachnangbe amēndayēnga y chē ley abuátambayēnga imojtsáboyejuana, y chēnga imojtsenatsētsnaye: “Cha ínýenga tojēftsatsebaca, pero cachá jēntsbocama ndoñe quenátobena.

32 ¡Chē Cristo, chē Israeloca Rey! ¡Cruzocana chauatastjango, bēnga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

### *Jesús tojanóbana*

(Mt 27.45-56; Lc 23.44-49; Jn 19.28-30)

33 Nýetsto orscana y las tresēntscōñe, nýets quem luare yojtseibétata.

34 Chca orna, Jesús chabe biyañe tojanáyebuachena: “Eloi, Eloi, ¿lema sabac-tani ca?” (Chca endayana “Atšbe Bētsá, atšbe Bētsá, ¿ndáyeca cachcá šcojonýá ca?”)



<sup>35</sup> Chca tmojanuena ora, báseftanga chentše imojtseemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

<sup>36</sup> As chora, canya tojanótjajo, untja vínoyeca canye esponjëshe tojanfchecuacuá, canye niñëfjiñe tojananguësëtjo y Jesúsbioye tojanbeconá chaofsema; y tojánayana: “Cachcá mochjonýaye, er Elías tayochjabo jabátëstjanguama ca.”

<sup>37</sup> Pero Jesusna, jabuache tojanoyó y tojanóbana.

<sup>38</sup> Y chë Bëngbe Bëtsabe bëts yebnocá yojújonýana entsëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana.

<sup>39</sup> Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>40</sup> Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé.

<sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

### *Jesús tmojanatbontsá*

*(Mt 27.57-61; Lc 23.50-56; Jn 19.38-42)*

<sup>42</sup> Chë yëfsana ochnayté yojtsëmnayeca, cach te yojánamna saná japróntana chë yëfsana jasama. Ya yojtseibétatana ora,

<sup>43</sup> Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjá Pilátbioye Jesusbe cuerpo tbojanotjañe.

<sup>44</sup> Pilato yojenjaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsëmnama.

<sup>45</sup> Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama.

<sup>46</sup> Chora, José canye uafjantse lino entsëjua tojanabuamé, Jesusbe cuerpo cruzocana tbojanëstjango, chë lino entsëjuaca tbojanandmaná, y canye cuevëshiñe ndëtsbeñe pormánëshiñe tbojanajó; chentšana canye ndëtsbé tojansjoná, y chë cuevëshoye amashjuanentše tojánachto.

<sup>47</sup> María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanájoma.

## 16

### *Jesús tojtanayena*

*(Mt 28.1-10; Lc 24.1-12; Jn 20.1-10)*

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtse bëjaye tmojanabuamé, chíyeca jama Jesusbe cuerpo janëtjuama;

<sup>2</sup> y tmenguse, chë semana bojatšéntena, cabá cachëse, shinýe yojábocna ora, chë cuevëshoye tmojána.

<sup>3</sup> Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

<sup>4</sup> Pero imojontješiyeye ora, tmojáninýe chë cuevëshoye amashjuanentša bëts ndëtšbé, chentsana juanániñe.

<sup>5</sup> As chënga choye tmojánamashjna y choye tmojáninýe canýe bobontse bën uafjantse entsëjua uichëtjoná, chë cuevëshentša catsbioica inétsotbemañe; y chë shembásenga imojouatjaná.

<sup>6</sup> Pero chë bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minýënga cha enjëftsejajonentše.

<sup>7</sup> Motsajna, y Pedro y chë inýe uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinýe, ntšamo cachá tmojanéyancá ca.’ ”

<sup>8</sup> As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyayënga imojtsemna; y chë causa, chë soyama ndocná tmonjaniyana.

*Jesús, María Magdalébioye tbojánëbëbocna  
(Jn 20.11-18)*

<sup>9</sup> Jesús tojtanayenentšana, chë semana bojatsenté, Jesús natsana María Magdalébioye tbojánëbëbocna. Tempo Jesús chábentšana canýsëfta bacna bayëjënga tojtanëbuacana.

<sup>10</sup> Cha Jesúsbioye ainá tbojáninýentšana, tojána Jesúseftaca imojánajnënga chama jaúnayama; chëngna ngmënaca y sachénaca imojtsemna.

<sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

*Uta ustonata Jesúsbioye tbojáninýe  
(Lc 24.13-35)*

<sup>12</sup> Chentsana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inýa cuaftsemncá.

<sup>13</sup> Chora chata tbojésanshëcona chë inýënga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama  
(Mt 28.16-20; Lc 24.36-49; Jn 20.19-23)*

<sup>14</sup> Cabana, Jesús chë bnëtsana canýe uatsjëndayënga tojánëbëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nyëts ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjëndayënga tmojánayana.

<sup>15</sup> Chentsana Jesús tojanéyana: “Nyëts luarëngoye motsajna, y nyëtsca entsanga chë tšabe noticiëngama šmochtsabuayiynaye.

<sup>16</sup> Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyëts tempo castiganá echántsemna.

<sup>17</sup> Chë átsbeñe ošbuáchiyënga ndegombre soyënga imojtsabuayiynama, entsanga mëntsá mochántsetatšëmbo: atše jótšëmbonëse, átsbeñe betsošbuachéyeca, entsángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye.

<sup>18</sup> Masque nderado cucuatšíñe mëtscuayënga tmojishache o veneno tmojofšënga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántsatmëna ca” —Jesús tojanéyana.

*Jesús Bëngbe Bëtsábioye tojtaná*  
(Lc 24.50-53)

<sup>19</sup>Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentse, Bëngbe Bëtsabe catsbioica yojtóbema jtsemándayama.

<sup>20</sup>Y chë uatsjédayëngna tmojánbocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bétsemnama, chë uatsjédayënga bëts soyënga jamama obenana chamotsebonnama cha jtsamëse.

## San Lucas

### *Jabojátšama*

<sup>1</sup> Ba entšanga Jesusbe historia tmojuábema, ntšamo bəngbeñe ndegombre tojopasacá.

<sup>2</sup> Chə historia juabemamna, chənga tmojanuena ntšamo Jesusbe uat-sjəndayənga y inye entšanga chabiamna immencuentaycá. Chə entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiənga entšəngbioye tmojanabuayená.

<sup>3</sup> As, átšnaca sənjointšé cuedádoca juanotíciana lempe ntšamo Jesusbiamna imojtsichamcá, tojanobojatšentšana mentscoñe. Mora šontsinyana tšabá yojtsemna acbiamna juabemana ntšamo ndegombre yomncá, uámana taitá Teófilo, chə tijuannoticiá soyəngama, ntšamo ndegombre bəngbeñe tojopasacá.

<sup>4</sup> Ba soyənga Jesusbiamna tcmojabuátəmbanga, y atše səntseboše aca chacot-setátšəmbo, ntšamo tcojouencá ndegombre yomnana.

### *Canye ángel tojanabuayená Juan chə Ubayaná jónynama*

<sup>5</sup> Herodes Judea luaroca rey inamna ora, yojamna canye judiəngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chə más uámana bachnangbe natsana aməndayá).

<sup>6</sup> Chatna tšabá amata ibnamna Bəngbe Bətsabe bominyiñe, y ntšamo Bəngbe Bətsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca.

<sup>7</sup> Bəsənga tondaye ibonjánabamna, Isabel šešona jtsebomnana ndobena causa, y chatna ya bətsanánata ibojtsemna.

<sup>8-9</sup> Chə bachnanga Bəngbe Bətsabe bəts yebnentše tmojtsoservena ora, sempre imojanamana jabocacayana, nda tšabá tbojtsonyená, Bəngbe Bətsábioye atschuanaye luaroye cháuama incienso jajuinyiyama. Canye, Zacaríasbe entšanga Bəngbe Bətsabe bəts yebnoca, Bəngbe Bətsábentše imojtsoservena orna, Zacaríasbioye tšabá ibojonyena; y chca, cha ibojotóca jana incienso jajuinyiyana.

<sup>10</sup> Zacarías, incienso yojtsejuinyənantscuana, ba entšanga shjoca imojtsemna, Bəngbe Bətsáftaca encuəntaye.

<sup>11</sup> Nye ndeolpe, Bəngbe Utabnabe canye ángel tojanonyná chə incienso jajuinyiyama altarentša catšbioica.

<sup>12</sup> Zacarías chábioye tbojáninye ora, tojanenjananá y corente uatjana tbojanábuache.

<sup>13</sup> Chora chə ángel tbojanianana: —Zacarías, ndoñe matauatjana. Bəngbe Bətsá tonjouena ntšamo tconjaimpadacá. Acbe shema Isabel canye šešona bochántsebmna, boyabásetema, y chana Juan ca cochjuabaye.

<sup>14</sup> Chama aca corente oyejuayá cochántsemna, y bətscá entšanga mochanjóyejuaye acbe uaquiñá tojonynama.

<sup>15</sup> Er cha, Bəngbe Bətsabiamna canye uámana entšá echántsemna. Ndocna te queochaisofsiye vínoye, ni jabuáchiye. Chə Uámana Espíritu chabe ainaniñe echantsemádaye, cha cabá ndonyna orscana.

<sup>16</sup> Banga Israeloca entšanga, ntšamo cha chaojayanama mochanjontšé joyeunayana Bəngbe Bətsá, chəngbe Utabná.

<sup>17</sup> Cha echanjášhango chə Bəngbe Bətsabe Uámana Uabuayanabe natsana, y echántsebmna obenana y canye espíritu ntšamo chə Bəngbe Bətsabe juabna

oyebuambnayá Elías inabomncá. Chabe natsana echanjáshjango, bêtsétsanga chéngbe básengaftaca ndoñe chamondétsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominyiñe tšabá amënga mondbetsejuabnycá. Y chca, entsanga cha echantsapróntaye Bëngbe Utabná jabama orscama ca –chë ángel tbojaniyana.

18 As Zacarías chë ángelbioye tbojantjá: –¿Ntšamo atše stjobenaye jtsetatšëmbuana chë šcontsatsá soye ndegombre bétsemnama? Er atše ya bêtsëjema sëntsemna y atšbe shémnaca cachcá ca.

19 Chora chë ángel tbojanjuá: –Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y juenayama.

20 Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

21 Chë ángel Zacaríaseftaca yojtsoyebuambnantscuana, entsanga shjoca Zacaríasbiama imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamná ca?”

22 Zacarías tojtanbocna ora, ndoñe yontsobena chë entsángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canye soye tojáninyama, er chéngbioye jatšëmbombonana yojáuyana, ndëbiá yojoquéda causa.

23 Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná.

24 Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinye cach tsoca yebnentše totanoquedá.

25 Cha mëntšá yojtsichamo: “Bëngbe Utabná mora atšbiama tojtenojuabó, entsángbentše atšbe ngménana jtsebojuánama, básenga tondaye béntsabamna causa ca.”

### *Canye ángel tojanabuayená Jesús jónyñama*

26 Isabel chnénguana ishinye ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye,

27 canye shembása María ca uabainá jauatsëtsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davidbentšana entšá inamna.

28 Chë ángel Maríybioye tojána y mëntšá tbojanchuá: –¡Mouena. Bëngbe Bëtsá tšabe bendición acbiama tonjama! ¡Bëngbe Utabná ácaftaca entsemna ca!

29 Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanchuama.

30 Chora chë ángel tbojaniyana: –María, ndoñe matauatjana, Bëngbe Bëtsá entsama tšabe bendicionënga chacotsebomnama.

31 Aca ngomamaná cochanjoquéda y canye šešona boyabásetema cochántsebomna, y chana Jesús ca cochjuabaye.

32 Cha puerta echantsámama, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David yojamncá,

33 y Jacóbëbentšana entsanga nyëtsca tescama echántsamëndaye, y chabe mándayana ndocna te queochaisopochóca ca –chë ángel tbojaniyana.

34 Chentšana María chë ángelbioye tbojantjá: –¿Ntšamo chca yochjopása, cabá ndoñe boyá sëntsebomnëse ca?



<sup>35</sup> Y chë ángel tbojanjuá: —Chë Uámána Espíritu echanjabo nyets ácebeñe, y Bëngbe Bëtsabe obenánaca ngomamaná cochanjoquéda. Chabe obenana mo jantšeteshcá cmochanjaboútsbotse; chíyeca chë echanjónýna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma.

<sup>36</sup> Mouena, Isabel, acbe primá, canýe šešona bochántsebomna, masque ya bëtsananá cha entsemna; chë “šešona ndbomná ca” monjanabobuatmá, mora ya chnënguana ishinýe ngomamaná entsemna,

<sup>37</sup> er Bëngbe Bëtsá lempe jamama endobena ca —cha tojánayana.

<sup>38</sup> Chora María chë ángelbioye tbojanियana: —Bëngbe Bëtsabe oservená atše sëntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

### *María tojána Isabel jabuáchama*

<sup>39</sup> Chentšana, María tojanoprontá y tojanochëmo canýe puebloye, Judeoca tjañenache luariñe.

<sup>40</sup> Chocna cha, Zacaríasbe yebnentše tojánamashëngo y Isabélbioye tbojanchuá.

<sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámána Espíritu Isabélbeñe tojánamashëngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Bëngbe Bëtsá acbiamá más tšabe bendicionënga entsama nyetsca shembásengbiamá, y chë cochántsebomna šešonbiámna cachcá!

<sup>43</sup> Atše merecido taitatobuajoñe, atšbe Utabnabe mamá chašuabobuáchama;

<sup>44</sup> er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó.

<sup>45</sup> ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bëngbe Utabná chantsadorana,

<sup>47</sup> y Bëngbe Bëtsá, atšbe Atsbocayabiamá corente chanjóyejuaye.

<sup>48</sup> Bëngbe Bëtsá atšbiamá tojtenojuabó, atše chabe oservénëjema.

Er morscana muentša entšanga nyetscanga puerte oyejuayá ca šmochantsábobuatma.

<sup>49</sup> Bëngbe Bëtsá, chë nyets obenana bomná, chabe obenánaca bëts soyënga atšbiamá tonjama.

¡Bëngbe Bëtsá puerte Uamaná ca entsabaina!

<sup>50</sup> ¡Morsca entšanga y más chcoyënga, chábioye yeunanëngbiamá, cha sempre bochántsengmena!

<sup>51</sup> Cha, chabe obenánaca bëts soyënga tojama, y chë nye cachënga bëtsëtsanga enobiamnayëngbe juabna tojtsepochozá;

<sup>52</sup> reyëngbioye chëngbe mándayentsána tojtsatsatše;

pero chë nye cachënga bëtsëtsanga ndenobiamnayëngbioye, uámanënga tojábiamá.

<sup>53</sup> Chë shëntseca imomnëngbioye, chamosama bëtscá cha tojatšatá, pero chë bomnëngbioyna tondaye tonjatšatá.

<sup>54</sup> Cha tojanëjabuache chabe entšanga Israeloca, chabe oservénënga, y ndoñe tbonjánebnatjëmbo jtsalastemánana,

<sup>55</sup> nyetsca tescama chë Abraham y chábentšana entšángbioye, ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

<sup>56</sup> Mariyna unga ishinÿe Isabéaftaca tojanoquedá, y chentšana cachabe yebnoye tojtaná.

*Juan chë Ubayaná tojanonÿná*

<sup>57</sup> Isabel jtsesócanama tojanóntsabuache ora, canÿe šešona boyabásetema tojanonÿná.

<sup>58</sup> Isabelbe juachañe oyenënga y chabe pamíllanga tmojántatsëmbona ntšamo Bëngbe Bëtsá chábioye ibojalastemama, y chama corente Isabéaftaca tmojanoyejuanga.

<sup>59</sup> Chë šešona posuftayté yojtsebomna ora, tmojánashjango y chëtëmbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá;

<sup>60</sup> pero chabe mamá tojanëyana: —Ndoñe. Quem šešona echantsabaina Juan ca.

<sup>61</sup> As chënga Isabélbioye tmojanianyana: —Acbe pamíllangbeñe ndocná chca quenatabaina ca.

<sup>62</sup> Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca.

<sup>63</sup> Zacaríasna jatšëmbombonana canÿe tablëbé tojanëyá y chiñe tojanábema: “Cha entsabaina Juan ca”. Y chë causa, nÿetscanga ojnánánënga imojtsemna.

<sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana.

<sup>65</sup> Chë juachañe oyenënga nÿetscanga tmojanëuatjaná, y Judeoca nÿetsca chë tjañenache luariñe entšanga chë soyëngama imojtsencuëntaye.

<sup>66</sup> Nÿetscanga chë soyëngama tmojántatsëmbona ora, chëngnaca corente chama imojtsejuabnaye y mëntšá imojtsichamo: “¿Chë bássetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

*Zacarías, Bëngbe Bëtsábioye jëtschuayama*

<sup>67</sup> Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¿Chë Utabná, chë Israeloca entšangbe Bëtsá matschuanga, er cha tonjabo chabe entšanga jabújabuachama y jabátsebacama!

<sup>69</sup> Cha bochanjíchmuá canÿe atsebacayá puerte obenana bomná, y cha echántsemna Bëngbe Bëtsabe oservená Davídbentšana entšá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana,

chë chábenga imomnëngbiajana bënga šojanašebuachenacá, mëntšá:

<sup>71</sup> Cha canÿa bochanichmuá bëngbe uayayënga y nÿetsca uaboyënjëngbiamá bënga jabátsebacama;

<sup>72</sup> bëngbe bëtsëtsangbioye jálastemama, y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbioye tbojanšbuachenacá.

<sup>74</sup> Cha tbojanšbuachená bëngbe uayayëngbiamá bënga jabátsebacama, chca, bënga ndauatjcá Bëngbe Bëtsá jaserviama,

<sup>75</sup> y chabe entšangcá, nÿetsca soyënguiñe tšabá amënga, Bëngbe Bëtsabe delante nÿetsca te bëngbe vidënguiñe jëftsiyenama.

<sup>76-77</sup> Y aca, atšbe bássetemna, Bëngbe Bëtsabe juabna oyebuambnayá ca cmochantsábobuatma,

entšángbioye Bëngbe Bëtsabe soyëngama cochtsabuayiyama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

78-79 Bëngbe Bëtsá bënga puerte şualastemánayeca, canya bëngbe juabnënga binyñayá bochanjíchmuá, bënga chë bacna soyënga causa mo ibetiñcá y obanëngbe luarentscá vida bomnëngbioye jabátsebacama, y jabuátambama ntşamo natjëmbana jtsiyenana ca” –cha tojánayana.

80 Chë básetema yojontsé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninyanjentscuana. Chentşana, chamuábuatmanamna tojanontsé Israeloca entsángbeñe jóyebuambayana.

## 2

### *Jesucristo tojanonyná (Mt 1.18-25)*

1 Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nyetsca entsanga chamuenábemama.

2 Chë soye tojanochñëngo Cirenio ca uabainá Siroca mandado yojamna ora.

3 Chamna, nyetscanga tojanotocá jtangana jenábemëngama, cada ona ndëmoca chëngbe bëts taitanga imojëftsiyena puebloye.

4 As, Josénaca Galilea luarentşana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentşana entsá inámnayecna, choye jenábemama tojtaná.

5 Maríaftaca tojána jenábemama, y muana tbojanşbuachená Joséftaca jobouamayama. María ngomamaná yojtsemna,

6 y Belenoca ibojtsemnëntscuana, chë ora tbojanóntşabuache jtseşócanama.

7 Y chentşe María ibojtsebomna chabe natsana şeşona, canye boyabásetema. Posadoca tondaye luare yontsemna causna, chata nye uacnëngbe átana tambuentşe tbojanoquedá. Y Jesús tojanonyná orna, María tbojtanëntsacjuá y canye bachetémiñe tbojanajó.

### *Chë angelotëmënga y chë oveshënga abujënyanga*

8 Belén béconana, chë ibeta, oveshënga abujënyanga shëntsjoa cachëngbe oveshëngaftaca imojtsemna.

9 Nye ndeolpe, Bëngbe Bëtsábicocana canye ángel tojánëbëbuacna, y Bëngbe Bëtsábentşana corente yojtsebuashinynyana chëngbe shëconániñe. Chama chënga puerte imojocochauatjaná.

10 Chora chë ángel tojanëyana: “Ndoñe matauatjëngana. Sënjabo tşabe soyënga tonjopasama jábuayenama, nyetscanga chamóyejuama.

11 Mora chë David tonjanonyná pueblentşe canye şeşona tonjonyná. Cha tşëngaftangbe atsebacayá echántsemna y tşëngaftangbe entsángbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná.

12 Ndegombre chca entsemnama mëntşá şmochanjátatşëmbona: canye şeşona ntsacjuaná y uacnëngbe bachetémiñe jajoná şmochanjínnyena ca” –cha tojanëyana.

13 Cachora, celocana mallajta angelënga chë natsana ángelbentşe tmojánbocana y Bëngbe Bëtsábioye mëntşá imojtsatschuanaye:

14 “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tşabá chaotsemna ca.”

15 Chentsana chë angelënga celoye tmojésanshëcuana. Y chora chë oveshënga abujänyënga tmojanontsé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanyé ca.”

16 As betesco tmojána y tmojánanyëna María, José y chë šešonatema ba-chetémiñe jajoná.

17 Chë šešona tmojáninyë ora, chënga tmojanacuntá Jesusbe bëtsëtsata y chë inýengbioye, ntšamo chë šešonbiama chë ángel tojanëyancá.

18 Nýetscanga chë tmojanuenënga tmojanenjaná ndayá chë oveshënga abujänyënga imojtsacúntama.

19 Pero Mariyna nýe cachabe ainanoca quem soyëngama más bën inétsenojuabnañe.

20 Chentsana, chë oveshënga abujänyënga tmojtaná Bëngbe Bëtsá atschuanaye, ndayá tmojáninyënga y tmojanuenama. Nýetsá tojanopasá lempe ntšamo chë ángel tojanëyancá.

### *Bëngbe Bëtsabe bëts yebnoye Jesús tmojanamba*

21 Posufta te tojánashjache ora, chë basetëmbioye chë más delicadentse base bobachtema tmojantëtse, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojanianyancá, María cabá ndoñe ngomamaná yontsemna ora.

22 Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebonmentšana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinýinýiyama,

23 ntšamo chë Bëngbe Utabná Moisésbioye tbojaniyé leyënguiñe iuayancá, mëntsá: “Canýe yebnentse chë natsana šešona boyabása tojtsemnësna, Bëngbe Bëtsábioye cha jinýinýiyana chábioye chabotseservënama ca.” Chcasna, chë básetema Bëngbe Bëtsabe bëts yebnoye tmojanamba.

24 Y tmojanamba janshana uta shloftse, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntsá endayana: “Chë natsana šešona chaojonýná ora, boyabásetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

25 Jerusalenoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebacama. Y chë Uámana Espíritu chabe ainaniñe yojtsemna;

26 chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëfstinýcá.

27 Chë Uámana Espíritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsëtsata chë básetema tmojanamba ora, ntšamo Moisesbe leyiñe iuayancá chabiamama jamama ora,

28 Simeón tbojanocutsá y Bëngbe Bëtsábioye tbojtanchuá. Cha mëntsá tojánayana:

29 “Bëngbe Utabná, mora šmolesenciá, atše acbe oservená natjëmbana jóbanana,

er ya tconjama ntšamo šconjanšbuachenacá;

30 atše chë entšangbe Atsebacayá sënjinýe.

31 Aca cha tcojichmó nýets luarenache entšangbiama.

32 Cha chë ndoñe judiëngbe juabnënga binýnáyá echántsemna;

y chábeyeca, nÿets quem luarentše mochanjátatsëmbona, chë acbe entšangbiamá, Israeloquëngbiamá ca” —cha tojánayana.

<sup>33</sup> José y María ibojenjnanata ntšamo Simeón Jesusbiamá yojtſichámuama.

<sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojaniyana: “Quem soyënga corente cmochanjacochtsetšenaná, mo ainana espadéjaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatsëmbo. Israeloca banga quem básetema mochantsábotena y chabe palabrëngnaca ca” —cha tbojaniyana.

<sup>36</sup> Chéntšnaca yojtsemna canÿe shembása Bëngbe Bëtsabe juabna oye-buambnayá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. Nÿe canÿsëfta uata cha yojëftsebouamna;

<sup>37</sup> y chabe boyá tojanóbanentšana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana.

<sup>38</sup> Simeón, María y Josébioye yojtšetsëtsnaye ora, Ana chëngbioye yojobeconá, y chë Atsebacayá tojanonÿnama Bëngbe Bëtsábioye tbojtanchuá chentšana, Jerusalenoca entšangbioye, chë canÿe atsebacayá Israeloca entšangbiamá imojanobatmanëngbioye tojanéyana, chana Jesús yojëtsemna ca.

### *Jesús Nazaret puebloca*

<sup>39</sup> José y María lempe ntšamo chë Utabnabe leyënguiñe iuayancá tbojanma ora, Galilea luaroye tbojtanata, cachëngbe puebloye, Nazaretoye.

<sup>40</sup> Y chë básetema yojtſobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtská tšabe bendicionënga chaotsebomnama.

### *Jesús Bëngbe Bëtsabe bëts yebnoca*

<sup>41</sup> Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitangbioye Egiptocana tojánatsebacama jtenójuaboyama fiesta.

<sup>42</sup> Jesús bnëtsana uta uata tojánashjache ora, Jerusalenoye tmojána, ntšamo imojanamancá.

<sup>43</sup> Chë fiesta tojanopochocá chentšana, chabe bëtsëtsata yebnoye ibojtsataye, y chata ntsetatsëmbcá, Jesusna Jerusalenoca yojtsoquedañe.

<sup>44</sup> Chata ibojëtsejuabnaye Jesús chë inÿe entšangtaftaca yojtſataboye ca; chcasna, canÿe te nÿetsá benachëjana tbojánata ora, tbojanontsé chabe pamíllangbeñe y ubuatmëngbeñe jtsenguanguana,

<sup>45</sup> pero ndoñe ibonjobenaye jtsinÿenana. As, chata chora Jerusalenoye tbojésanshëcona chocha cha jetsenguanguama.

<sup>46</sup> Unga tianoye chata tbojanobená Bëngbe Bëtsabe bëts yebnentše cha jetsinÿenana. Chana chë Moisesbe ley abuatambayëngbe tsëntsaca inëtsotbemañe, chëngbioye inayaunana, inatjanaye.

<sup>47</sup> Nÿetsca ouenanënga imojtsenjnanaye Jesús tša osertaná inamnana, y tša tšabá jojuama cha yojtſobenama.

<sup>48</sup> Chabe bëtsëtsata chca tbojáninÿe ora, chátnaca ibojenjnaná. Chora, chabe mamá tbojaniyana: —Uaquiñá, ¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

<sup>49</sup> As Jesús tojanéyana: —¿Ndáyeca atše šmonguá? ¿Ndoñe šondëtatšëmbo atše šomna atšbe Taitabe yebnentše jtsemnana ca?



<sup>50</sup> Pero chë bëtsëtsata ndoñe tonjanësertá ntšamo cha tojanëyancá.

<sup>51</sup> Chentšana Jesús chë bëtsëtsataftaca Nazaretoye tojtaná y chata yojt-sayaunana. Y chabe mamana nÿe cachabe ainanoca chë soyëngama más bën inëtsenojuabnañe.

<sup>52</sup> Jesús yojtsobóchaye y más juabna yojtsebomna; y Bëngbe Bëtsá y nÿetsca entšanga corente oyejuayënga chabiamama imojtsemna.

### 3

#### *Juan chë Ubayaná entšanga yojanabuayiyná (Mt 3.1-12; Mc 1.1-8; Jn 1.19-28)*

<sup>1</sup> Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

<sup>2</sup> Anás y Caifás chë bachnangbe más uámana amëndayata ibojamna. Cach tempo, canÿe luare entšanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá.

<sup>3</sup> As Juan nÿetsca luarënguëjana Jordán béjaye béconana tojánachnëngo, entšanga mëntšá utsëtsnaye: “Tšëngaftangbe bacna soyëngama ngmënaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.”

<sup>4</sup> Chë soye tojanopasá, cachcá ntšamo chë Bëngbe Bëtsabe juabna oye-buambnayá Isaías chabe librëšañe yojëftsabemcá. Cha mëntšá tojanábema: Entšanga ndoyena luaroca canÿa enduáye buache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnéngaca šmochtseprontana.

<sup>5</sup> Nÿetsca jachañe echantojútjia, y tjañe y batsjabenga mochantenájachibiaye. Chë scundma benachënga ndirichëjënga echántsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháúashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nÿetsca entšanga mochanjinÿe chë Atsebacayá Bëngbe Bëtsábentšana jabana ca” —cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtscuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca?

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahábentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahábentšana entšanga nanjábiamama.

<sup>9</sup> Tatšniá ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

11 Y Juan tojanějua: —Chë uta quëfsaíya uabomná bontsemna canýiya jutstayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

12 Romocama entšángbioye impuesto atjanayëgnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

13 Y Juan tojanějyana: —Nýe ntšamo chë leyiñe yomandancá entšángbioye crocénana šmochtsayëngacaye ca.

14 Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanějyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchëse; y nýe ntsachetšá šmacaná crocénanaca oyejuayënga šmochtsomñe ca.

15 Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojëtsejuabnaye nderado cha chë Bëngbe Bëtsabe Uámana Uabuayaná nanjamna ca;

16 pero Juan tojanějyana: “Ndegombre, atše béjayeca cbondubáyana. Pero chë echanjabá atšbiama corente más obenana endbomna, y atše merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnama, mo iñeshequécá.

17 Canýe entšá chabe mëtstá cucuatšinë jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcñyaye tsañe jtsabuájuana, y chë ndoservena shácuanëngna iñeshoye jtsatmetšana. Cachcá, chë átsbentsana echanjabá, chë tšabe entšanga echanjúbuaja, y chë bacna entšangna iñeshiñe echantsacastígaye, y chë iñe ndocna te queochátsfsana ca” —cha tojanějyana.

18 Chca y inýe palabrëngaca Juan chë tšabe noticiëngama yojanabuayiyná.

19 Tempo, Juan Heródesbioye tbojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nýetsca bacna soyënga Herodes tojanmámnaca.

20 Pero Herodes Juánbioye joyeunaye luariñna, cabá inýe más bëts bacna soye tojátanma: Juánbioye cárceloye tbojtsanëtame.

### *Juan, Jesúsbioye tbojanabaye*

*(Mt 3.13-17; Mc 1.9-11)*

21 Pero Herodes Juánbioye cabá ndutame ora, Juan ba entšanga tojanëbaye, y Jesúsnaca tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,

22 y chë Uámana Espíritu mo canýe palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Acbiama corente sëntsoyejuá ca.”

### *Jesusbe bëts taitanga*

*(Mt 1.1-17)*

23-38 Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.  
Leví yojamna Melquibe uaquiñá,  
Melqui Janabe uaquiñá  
y Jana Josebe uaquiñá.  
José yojamna Matatíasbe uaquiñá,  
Matatíasna Amosbe uaquiñá.  
Amós Nahumbe uaquiñá,  
Nahúm Eslibe uaquiñá  
y Esli yojamna Nagaiibe uaquiñá.  
Nagai yojamna Maatbe uaquiñá,  
Maatna Matatíasbe uaquiñá.  
Matatías Semeibe uaquiñá,  
Semei Josecbe uaquiñá  
y Josec yojamna Judabe uaquiñá.  
Judá yojamna Joananbe uaquiñá  
y Joanán Resabe uaquiñá.  
Resa Zorobabelbe uaquiñá,  
Zorobabel Salatielbe uaquiñá,  
y Salatielna Neribe uaquiñá yojamna.  
Neri yojamna Melquibe uaquiñá,  
Melqui Adibe uaquiñá.  
Adi Cosambe uaquiñá,  
Cosam Elmadambe uaquiñá,  
y Elmadamna yojamna Erbe uaquiñá.  
Er yojamna Jesusbe uaquiñá  
y Jesús Eliezerbe uaquiñá.  
Eliezer Jorimbe uaquiñá  
y Jorimna Matatbe uaquiñá.  
Matat yojamna Levibe uaquiñá,  
Leví Simeonbe uaquiñá  
y Simeón Judabe uaquiñá.  
Judá Josebe uaquiñá,  
José Jonambe uaquiñá,  
y Jonamna yojamna Eliaquimbe uaquiñá.  
Eliaquim yojamna Meleabe uaquiñá,  
Melea Menabe uaquiñá.  
Mena Matatbe uaquiñá,  
y Matata yojamna Natanbe uaquiñá.  
Natán yojamna Davidbe uaquiñá,  
David Isaíbe uaquiñá  
y Isaína Obedbe uaquiñá.  
Obed Boozbe uaquiñá,  
Booz Salabe uaquiñá  
y Sala yojamna Naasonbe uaquiñá.  
Naasón yojamna Aminadabëbe uaquiñá,  
Aminadab Adminbe uaquiñá  
y Admin Arnibe uaquiñá.  
Arni Esrombe uaquiñá,  
Esrom Fáresbe uaquiñá  
y Fáresna yojamna Judabe uaquiñá.  
Judá yojamna Jacobëbe uaquiñá,  
Jacob Isaacbe uaquiñá

y Isaacna Abrahambe uaquiñá.  
 Abraham Tarebe uaquiñá  
 y Taré yojamna Nacorbe uaquiñá.  
 Nacor yojamna Serugbe uaquiñá,  
 Serug Ragaube uaquiñá  
 y Ragauna Pelegbe uaquiñá.  
 Peleg Heberbe uaquiñá,  
 y Heber yojamna Salabe uaquiñá.  
 Sala yojamna Cainanbe uaquiñá,  
 Cainán Arfaxadbe uaquiñá  
 y Arfaxadna Sembe uaquiñá.  
 Sem Noebe uaquiñá  
 y Noé yojamna Lameche uaquiñá.  
 Lamec yojamna Matusalenbe uaquiñá,  
 Matusalén Enoche uaquiñá  
 y Enocna Jaredbe uaquiñá.  
 Jared Mahalaleelbe uaquiñá,  
 y Mahalaleelna yojamna Cainanbe uaquiñá.  
 Cainán yojamna Enosbe uaquiñá,  
 Enós Setbe uaquiñá,  
 Set Adanbe uaquiñá  
 y Adán Bëngbe Bëtsabe uaquiñá.

## 4

### *Jesús tojanobená Satanás jayënjanama* (Mt 4.1-11; Mc 1.12-13)

<sup>1</sup> Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemándaye. Jesús Jordán bejajoicana tojtaná y chë Uámana Espíritna entsanga ndoyena luaroye tbojanánatse.

<sup>2</sup> Chentše canta bnëtsana te tbojanjëtana, y Satanasna yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

<sup>3</sup> Chora Satanás tojésanabo y tbojanianyana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrenguiñe mëntsá endayana: “Entsá nÿe tandëseca ndoñe vida ntseboamnana ca.”

<sup>5</sup> Chentšana, Satanás canÿe bëts tjoye tbojanánatse y betesco nÿetsca quem luarentsa amëndayëngbenache tbojaninÿinÿé.

<sup>6</sup> Chora Satanás tbojanianyana: —Atše nÿets obenana cbochjätsetaye y lempe quem amëndayëngbenache yobinÿna soyëgnaca. Atše lempe chca sënjóyëngacñe y sëntsobena jatsetayama nda stsebošábioye.

<sup>7</sup> Aca chacojoshëntsamentsé y chašcojadorase, lempe nÿetsá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrenguiñe mëntsá endayana: “Acbe Bëtsá, chë Utabná cochtsadorana y nÿe cha cochtseservena ca.”

<sup>9</sup> Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojanianyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja,

<sup>10</sup> er Bëngbe Bëtsabe uabemana palabrenguiñe endayana: Bëngbe Bëtsá chabe angelënga echanjichamuá, chacmotsinÿenama.

11 Chënga buacuatsëngaca cmochanjishache, shecuatše ndocá ndëtšbeñe chacondomama ca –cha tbojanियana.

12 Chora Jesús tbojanjuá: –Bëngbe Bëtsabe uabemana palabrënguiñe mëntšá endayana: “Ndoñe matsbošana acbe Bëtsá chë Utabná bacna soyëngama jachohënguama ca.”

13 Cabana, Satanás tojanajbaná bošana Jesúsbioye bacna soyëngama jachohënguama, y bënama Jesús bentshana tojtsanojuánañe.

*Jesús tojanontsé Galileoca chabe trabajo jamana*

(Mt 4.12-17; Mc 1.14-15)

14 Chentshana, Jesús Galileoye tojesaná chë Uámana Espíritbe obenánaca, y nyetsca entšanga chë luariñe chabiamama imojtsencuëntaye.

15 Jesús yojtsabuátambaye chë judiëngbe enefjuana yebnënguenache, y nyetscanga cha imojtsatschuanaye.

*Jesús Nazaret puebloca*

(Mt 13.53-58; Mc 6.1-6)

16 Chentshana Jesús Nazaretoye tojtashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama.

17 Chë Bëngbe Bëtsabe juabna oyebuambnayá Isaíasbe librëša tmojaniyé chauliamama. Chë librëša yojutëfjona orna, tojáninýena mëntšá uábemanentše:

18 “Chë Utabnabe Espíritu átšeftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndomnëngbeñe jóyebuambayama.

Cha šonjichmó jábuayenama, chë utámenënga chentshana ya chamuáisebocanama;

jamama chë jtanënga chamobenama tšabá jubínýnama;

jamama chë ínýengbe causa imosufrínënga, tempcá cachcá tšabá chamot-satsmënama;

19 y entšanga jáuyanama ndëmua ora chë Utabná chabe entšanga yochjatsebacye ca.”

20 Jesús jualíama tojanpochocá y chora chë uajabuachanábioye chëša tbojtaniyé y tojtanoíbema. Nyetsca entšanga chë enefjuana yebnentše imojtsemnënga Jesúsbioye imojtsobuáuatja.

21 Chora Jesús tojanontsé mëntšá jayanana: –Camënté tšëngaftangbeñe tonjopasá ntšamo quem librëšanañe iuabemancá ca.

22 Nyetscanga Jesús biamama tšabá imojtsencuëntaye y ojnanánënga imojtsemna tša botamana cha yojtsóyebuambnama. Y chënga imojtsentjanaye: –¿Quem boyabása ndoñe Josebe uaquiñá yondmëna ca?

23 Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanéyana: –Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe pueblëntšnaca cachcá moma ca”.

24 Y cachora Jesús más tojanoyebuambá, mëntšá: “Ndegombre cbëyana, ni canýe Bëngbe Bëtsabe juabna oyebuambnayábioye cachabe pueblentše tšabá quematonýá.



<sup>25</sup> Ndegombre cbéyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsañe nyetsá ndoñe tonjanafté y bëts shëntsana chë luariñe yojtsebinýna.

<sup>26</sup> Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábioye, y aífne tbojanichmó ínýoye, Sarepta ca uabáinoye, Sidón béconana, canýe chentša viudábioye.

<sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábioye tbonjanshná, pero aífne canýe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entšanga chca tmojanuena ora, puerte tojánatëna.

<sup>29</sup> As, chora chënga tmojantsbaná, chë pueblentsana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšifne, y chë entšanga imojtseboše Jesús chocana jtsajuatsëntsana.

<sup>30</sup> Pero Jesusna chëngbe tsëntsajana tojánachnëngo y ínýoye tojtsanoñe.

*Jesús, bayëjbe juabna cánýabioye tbojanbojuaná*  
(Mc 1.21-28)

<sup>31</sup> Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana.

<sup>32</sup> Entšanga imojtsenjnanaye ntšamo Jesús yojtsabuátambama, er chamna mo canýe mando bomnacá yojtsóyebuambnaye.

<sup>33</sup> Chë enefjuana yebnentše, canýe boyabása bacna bayëja uambayá yojtsemna, y chabe causa chë boyabása tojanontsé mëntsá uayebuáchana:

<sup>34</sup> —¡Cachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndëtatšëmbo nda aca comnama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojaniyana: — ¡Iytëca móbema y chábentšana maisebocna ca!

As chora chë bayëja entšanguentše chë boyabásabioye tbojanshajayé, y ndocá ntjëftsemcá chábentšana yojésebocna.

<sup>36</sup> Chë soyama nyetsca entšanga imojénjnanaye y mëntsá imojtsenatsëtsnaye: “¡Tša chca palabrënga! ¡Quem entšá mandayacá y obenacá chë bayëjënga entsamënda, y chënga montsaisébocana ca!”

<sup>37</sup> Y Galileoca nyetsca pueblëngüifne Jesusbiana yojtsótatšëmbo.

*Jesús, Simón Pédrëbe uambén mamábioye tbojanshná*  
(Mt 8.14-15; Mc 1.29-31)

<sup>38</sup> Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojánamashëngo. Simonbe uambén mamá šocá inajájona jabuache calentóraca, y chë chentše imojtsemna entšanga chabiamna Jesúsbioye tmojanimpadá.

<sup>39</sup> Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

*Jesús ba šoquënga tojanashná*  
(Mt 8.16-17; Mc 1.32-34)

<sup>40</sup> Shinýe yojuenatjëmbo ora, banga inýe y inýe šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajáy y tojanashná.

<sup>41</sup> Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtšëcácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

*Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyná*

*(Mc 1.35-39)*

<sup>42</sup> Yëfsana tojanbinýna ora, Jesús chë pueblentšana tojëftsanbocna, y canýe luaroye, entsanga ndoyenoye tojtšanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojëtseboše Jesús cach pueblentše chaotsoquedáñama,

<sup>43</sup> pero Jesús tojanëyana: “Atše šontsemna chë tšabe noticiënga Bëngbe Bëtsabe amëndayama inýe pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentšana, Jesús yojánana Bëngbe Bëtsabiamana entsángbioye abuayiynaye, chë judiëngbe enefjuana yebnënguenache Judeoca.

## 5

*Canýe te mallajta beonga ashebuánaye te*

*(Mt 4.18-22; Mc 1.16-20)*

<sup>1</sup> Canýe te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntšnaye Bëngbe Bëtsabe palabra jouenama.

<sup>2</sup> Jesús, chë uafjajónaye tsachañe bécoñe tojáninýe uta ena barquësha; chë beonga ashebuánayëngna barquëshanguentšana tmojëftsanbocna atarraiëshangá jetsáboshabiamana.

<sup>3</sup> Jesús canýe barquëshañe tojánamashëngo; chësha Simónbeshana inauamna. Chora Simónbioye mëntšá tbojaniyana: “Quem tsacháñentšana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquësha mëyamba y tšëngaftangbe atarraiëshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nyets ibeta fsëndanguá y ton-daye chibiátashebuaye. Pero aca chca tcjayánayecna, cachiñe atarraiësha chantëtëshbuetše ca.

<sup>6</sup> Tmojanëshbuetše orna, bëtscá beonga tmojánishëche y chëngbe atarraiëshangá tojanontsé jtsatanëcanana.

<sup>7</sup> As, chë inýe barquëshañe imojtsemna enutëngbioye tmojánëfjatsëmbó, jabújabuachama chamuábama. Chora chënga tmojánabo, y nyets uta barquësha beóngaca tmojanajutjé. Tša chëftanga causa, tojanontsé chë uta barquësha jtsenatjëmbambana.

<sup>8</sup> Simón Pedro chca tojáninýe ora, Jesús bëntše tojanoshëntsamentšé y tbojaniyana: —¡Bëngbe Utabná, atše bacna soye amá sëndmëna, chíyeca átšbentšana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná.

<sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entsanga Bëngbe Bëtsabiamana cochántanguaye, y nyë beonga ashebuanayá ndoñe quecochátsmëna ca.

11 As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

*Jesús, canya bacna nguayanánaca šocábioye tbojanshná*  
(Mt 8.1-4; Mc 1.40-45)

12 Jesús canye pueblentše yojtsemna ora, chentše tojánashjango canye entšá bacna nguayanánaca šocá. Chë šocá Jesúsbioye tbojáninýe ora, tojanoshëntsamentšé y jubiaca fshantsóntscoñe yojotsejbéna y tbojanimpadá: — Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

13 As Jesús cucuátšeca tbojánbojajo y tbojaniyana: —Aíñe, séntseboše. ¡Šocana cbotsebojuaná ca!

Y cachora chë šocana tbojtsanóbojuanañe.

14 Chora Jesús tbojanmandá: —Ndocnábeñe chë soye cattsecuéntaye; nýe Jerusalemoca báchnëbioye motsa, y cha cochjinýinýiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nýetsca entšanga chamotatsëmbona mora ya tšabá cojtsatsmënama ca.

15 Pero ndayá Jesús yojtsamama más entšanga imojátatsëmbona, y ba entšanga imojtsójotoye chábioye joyeunayama y chëngbe šocanëngama chauashnama.

16 Pero Jesús yojanamana jtsoñana entšanga ndoyena luarëngoye y chocha Bëngbe Bëtsáftaca ibnécuentaye.

*Jesús, canye jama ndobenábioye tbojanshná*  
(Mt 9.1-8; Mc 2.1-12)

17 Canye te, Jesús yojtsabatambá ora, chentše básefta fariseunga y ley abuatambayënga imojtsetbiámána, Galileoca nýetsca pueblënguentšana áshjajnënga, Judeoquënga y Jerusalemnoquënga. Y chora Jesús šoquënga yojtsashnaye, Bëngbe Bëtsabe obenánaca.

18 Chora tojanopasá, básefta boyabásenga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye,

19 pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanëštjango, entšangbe tsëntsaca, Jesusbe natsanoica.

20 Jesús tojáninýe cha chë šocá jáshnama bëtsobenama chënga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyënga tcbontsebojperdoná ca.”

21 Chora chë ley abuatambayënga y chë fariseunga mëntšá tmojanontšé juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inýa japerdonana; nýe Bëngbe Bëtsá aíñe ca.”

22 Pero Jesús yojtsetátšëmbo ntšamo chënga imojtsejuabnayama; as tojanëyana: “¿Ndáyeca tšëngaftangbe ainaniñe chca šmojtsejuabná?

23 ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?

24 Y chca, morna atše cbochanjínýanýiye, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojanianya: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entsangbe delante, chë cha inajájona tjuashe yojescñe y Bëngbe Bëtsábioye atschuanaye chentsana yojtsatoñe.

<sup>26</sup> Chama nyetsca entsanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinÿe ca.”

*Jesús, Levíbioye tbojanchembo chabuastama*  
(Mt 9.9-13; Mc 2.13-17)

<sup>27</sup> Chca yojochnëngüentšana, Jesús chentsana tojëftsanbocna y canÿe entsábioye tbojáninÿe, Leví ca uabainá, chë entsángbioye impuesto Romocama atjanayentše inétsotbemañe. Chora Jesús tbojanianya: “Smasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentsana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inÿe entsángnaca mesëshentše imojtsetbiámana.

<sup>30</sup> Chora, chë fariseunga y chë ley abuátambayënga tmojanontsé chë Jesusbe uatsjëndayëngbiana podesca oyebuambnayana; y chëngbioye mëntšá tmojanëyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojttesá y šmojtsofšëšná ca?

<sup>31</sup> Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aiñe.

<sup>32</sup> Y atše ndoñe chiyátabo chë Bëngbe Bëtsabe bominiñiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

*Jesús tmojantjá chë Bëngbe Bëtsáftaca jencuéntama tondaye saytescama*  
(Mt 9.14-17; Mc 2.18-22)

<sup>33</sup> Chora chënga Jesúsbioye tmojanianya: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nÿe nyets tempo jesosañana y jesofšëšnañana ca.

<sup>34-35</sup> Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntsámo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtská jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ofjanënga echántsamna tondaye ntjascá jtsemnana. Ntsámo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

<sup>36</sup> Jesús mëntšánaca tojanacuntá jabuátambama: “Ndocná queonÿbatatëtše basájua tsëm entsayañe, tanguá entsayá jtarmëndama. Chca tcojamëse, chë tsëm entsayá jtsandbemana, y chë tcojuatëtše entsëjua chë tanguájuañe ndoñe tšabá ntsinÿnana.

<sup>37</sup> Y cach ndoñe, chë tojtseshayana vínoye tanguá jasabenguiñe ntjatuftsúamayana. Tcojuafsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatóservëna.

<sup>38</sup> Chíyeca co, chë tojtseshayana vínoyna tsëm jasabenguiñe juafsuámana.



<sup>39</sup> Ndocná, chë bóchena vínoye tojatëmo y chentšana játsbošana chë tojtshayana vínoye jatofšiyana; cha jayanana: ‘Chë bóchena vínoye tša tšabeyeca’.

## 6

*Jesusbe uatsjédayënga ochnayté trigo tmojanátabebe*  
(Mt 12.1-8; Mc 2.23-28)

<sup>1</sup> Canÿe ochnayté, Jesús canÿe jajajana yojtsaye; chabe uatsjédayënga trigo imojtsaiuatabnaye, imojtsaiúshenëcaye, y imojtsaiuasaye.

<sup>2</sup> Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

<sup>3</sup> Y Jesús tojanējua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjaboto ora?

<sup>4</sup> Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnama inÿinÿnaye tandëšënga yojase, y chë cháftaca imojánajna entšángnaca yojátšataye. Y chë tandëšna nÿe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canÿe bacna soye tojanma ca —Jesús tojanējua.

<sup>5</sup> Y Jesús más tojanëyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

*Chë buashana cucuatše bomna entšá*  
(Mt 12.9-14; Mc 3.1-6)

<sup>6</sup> Inÿe ochnayté, chë judiëngbe enefjuana yebnoye Jesús tojánamashëngo y tojanontšé jabuátambana. Y chentše yojtsemna canÿe entšá, catšbioica cucuatše buashanëtše bomná;

<sup>7</sup> y chë ley abuátambayënga y fariseunga chiñe imojtserrondana jinÿama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana.

<sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojaniyana: “¡Motsbaná y chentše tsëntsaca motsa ca!” Y chë entšá yojotsbaná y entšangbe tsëntsaca yojotsaye.

<sup>9</sup> Chora Jesús chë ínÿengbioye tojanëyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochoćana ca?”

<sup>10</sup> Y nÿetscanga chabe chabuajana imojtsemnënga tojanënÿanÿé, y chë buashana cucuatše bomnábioye tbojaniyana: “Macuenÿanëjaná ca.” Y chë boyabása tojanacuenÿanëjaná, y tšabá chëtša yojtsatamna.

<sup>11</sup> Pero chë ínÿengna puerte tmojanotjayaná, y tmojanontšé enatsëtsnayana ndayá muanjobenaye Jesusbe contra jamana ca.

*Jesús chë bnëtsana uta uatsjédayënga tojanabacacá*  
(Mt 10.1-4; Mc 3.13-19)

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nÿets ibeta cháftaca tbojanencuentá.

<sup>13</sup> Tojanbinÿna ora, chabe ústonënga tojánachembo, y chënguentšana tojanëbuáyana bnëtsana uta uatsjédayënga, chë ndëmuanÿënga “chabe ichmónënga cánaca” tojanëbobaye.

<sup>14</sup> Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé,

<sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá;



16 Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatshiñe bochjanboshjoná.

*Jesús ba entsanga yojanabuatambá y yojánashnaye*  
(Mt 4.23-25)

17 Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsana, Jesúsbioye oído jabuájua y chëngbe šocanëngama chauashnama.

18 Y chábeyeca chë bacna bayëjbe juabna uambayënga tšabá imojtsatsmëna.

19 Nyetsca entsanga tša imojtseboše y ndayánaca imojtsama Jesús jaboja-juama, er chábentšana bëts obenana yojtšóbocana y nyetscanga yojtšashnaye.

*Chë ndegombre oyejuayana bomnënga y ndëmuanyëngbiama tša lastema yochtsemna*

(Mt 5.1-12)

20 Jesús chabe uatsjëndayëngbioye tojanontješé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

21 “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

22 “Puerte oyejuayënga šmochtsemna, entsanga chacmojtšëbuayënja ora, chacmojtšatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtšichamo ora, tšëngaftanga atšbe ústonënga bëtsemnama.

23 Chë te puerta šmochjóyejuaye, er celoca canye bëts uacanánana šmochántsebmna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

24 “Pero ¡tša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

25 “¡Tša lastema tšëngaftanga chë mora shachanëngbiama, er shëntsana šmochántsebmna ca!

“¡Tša lastema tšëngaftanga chë mora oyejuayëngbiama, er ngménama šmochanjenóbošachna ca!

26 “¡Tša lastema tšëngaftangbiama nyetsca entsanga tšabá chamojtsoye- buambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

*Chë uayayëngbiama bonshánana jtsebmna*

(Mt 5.38-48; 7.12)

27 “Pero tšëngaftanga, átšbioye ouenanënga cbëyana: Tšëngaftangbe uayayënga šmochtsababuánjëshana; chë tcmojtšëbuayënjëngbiama tšabe soyënga šmochtsama;

28 chë tšëngaftangbiama bacna soyënga bošëngbiama, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiama, Bëngbe Bëtsá šmochtseimpadana.

29 Nderado ndánaca cányoica tcmojajuebantšetase, cochjomiye chë ínyoica cachcá chacmomama; nderado ndánaca quëfsáya tcmojuábocana, cachcá cochjonýaye acbe shabuanguanëjuanaca chauetsacñama.

<sup>30</sup> Ndánaca chacmojtjañábioyna, jatsetayana; y nda ndayánaca chacmoje-fcábioyna, ndoñe catjontsínýena chacmatoyema.

<sup>31</sup> Inyengaftaca šmochtsama, ntšamo chë ínýenga tsëngaftangaftaca chamot-samama šmojtsebošcá.

<sup>32</sup> “Tsëngaftanga, nýe chë tcmojtsababuánýeshanënga šmojttsababuánýeshanëse, ¿ndaye tsabe soye chca šmattsama?; er chë bacna entšágnaca chca mondbétsama.

<sup>33</sup> O nderado, nýe chë tsëngaftangbiana tsabe soyënga tmojttsamëngbiana tsabe soyënga šmojttsamëse, ¿ndaye tsabe soye chca šmattsama?; er bacna entšágnaca chca mondbétsama.

<sup>34</sup> O nýe chë cmochtëchenanguama šmojtsejuabnángbioye šmojúyentsamëse, ¿ndaye tsabe soye chca šmattsama?; er chë bacna entšágnaca mondbet-senántšamiana, chëngbentsana cachcá jtóyëngacñama jtsobátmanëse.

<sup>35</sup> Pero tsëngaftangna cmontsamna chë uayayënga jtsababuánýeshanana; y tsabe soyënga chëngbiana jtsamana y júyentsamiana, chëngbentsana ndayánaca jtóyëngacñama ntjatobatmancá. Chca, tsëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entšangaftácnaca tsabia comna.

<sup>36</sup> Inyëngbiana lastemadënga šmochtsemna, ntšamo tsëngaftangbe Taitá yomncá ca” —Jesús tojánayana.

*Ndoñe ntsichámuana chë ínýenga tsabá o ndoñe tsabá tmonjamama (Mt 7.1-5)*

<sup>37</sup> “Ndocá ínýëngbiana šmattsichamo chë ndoñe tsabá tmontsamama, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inyëngbiana ndoñe šmattsichamo ndoñe tsabá tmonjama ca, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inyënga šmochjáperdonaye y Bëngbe Bëtsá cmochanjáperdonaye.

<sup>38</sup> Inyëngbioye šmochjatšataye y Bëngbe Bëtsá cmochántatšataye. Mo nda canýe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatšataye. Ntšamo tsëngaftanga ínýëngbioye chašmojábiama, uabouana o ndoñe jabuache soyënga, Bëngbe Bëtsá cachcá tsëngaftangbioye cmochanjábiama ca” —Jesús tojánayana.

<sup>39</sup> Jesús quem cuétnaca tojánayana jabuátambama: “¿Canýe jtaná nantsobena ínýe jtaná jtsanachayama? ¿Chca ndoñe nýets útata ndaye tbuabentse buanjótsatše?

<sup>40</sup> Chë uatsjendayá ndoñe ntsemnana chë buatëmbayabiama más bëtsá. Pero chabe uatsjendayana chaojapochocá ora, cach buatëmbayacá jtsemnana.

<sup>41-42</sup> “Canýa chabe bominyiñe canýe niñëfja tojtsebomnëse, cha ndoñe ntsobenana chabe catšátbioye jauyanana: ‘Acbe bominyentsana canýe polvështema jtsebuchjátsëcama šmolesenciá ca’. Natsana cha bontsemna cachabe bominyentsana chë niñëfja jtsenobuchjátsëcana, tsabá jinýama jobenayama, chabe catšatbe bominyentsana chë polvotema jtsebuchjátsëcama. ¡Cachcá entsemna acbiana, bacna entšá chë ntšamo ndegombre tcojuab-nacá ndinýinýayá! Chë tša bacna soye cojtsama ca acbe catšátbioye tco-jauyana ora, cach aca tša bëts bacna soyënga cojtsamama ntjenojuaboycá; y chca, aca jamana canýe bacna soye. Natsana cmontsemna chë cach aca ndoñe tsabe soyënga cojtsamama ngmëncaca jshatenójuaboyana y chca amana jshétsajbanana, y chentšana cocayé cochantsobena acbe catšata jua-jabuáchana ntšamo tsabá yomncá chaotsamama ca” —Jesús tojánayana.

*Tšabe betiye o ndoñe tšabe betiye tondmënana, jtsotatsëmbuana ntšamo tojashajoncá*

*(Mt 7.17-20; 12.34-35)*

<sup>43</sup> “Ndoñe queonÿbatsmëna, chë canÿe tšabe betiÿiñe podesca soye jashájonana; ni canÿe ndoñe tšabe betiÿiñe tšabe soye jashájonana.

<sup>44</sup> Betiÿënga jtsabuatomana ntšamo cada betiye tojtseshajcá. Uchmašëshentšana quenátópodena higuëbé jocñana; ni uvašëša, shëshëntša betiyentšana.

<sup>45</sup> Chë tšabe entšana, chabe ainanoca tšabe juabnënga bomnentsana jtsóyebuambnayana; y chë bacna entšana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

*Chë uta ucuatjoniñe*

*(Mt 7.24-27)*

<sup>46</sup> “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana?

<sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama:

<sup>48</sup> Cha endmëna mo canÿe entšacá, nda canÿe yebna jajebuamna becá fshantse jashenoye yojajutjo y ndëtšbenguïñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguïñe jabuache yojaúcuatjona.

<sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canÿe entšacá, nda canÿe yebna yojajebo ñye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

## 7

*Jesús canÿe Romano soldadëngbe amëndayabe bochichnayábioye tbojanshná*

*(Mt 8.5-13)*

<sup>1</sup> Entšángbioye chca jáuyanana tojanpochocá ora, Jesús Capernaum puebloye tojána.

<sup>2</sup> Chentše yojoyena canÿe romano soldadëngbe amëndayá. Cha ibnabomna canÿe bochichnayá puerte bonshaná, y chora cha šocá yojtsemna, ya jtsóbanama.

<sup>3</sup> Jesús ba šoquëngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama.

<sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá merecido entsebuájona chacotsájabuachama;

<sup>5</sup> er cha bëngbe luarentša entšángbioye corente endábabuanÿeshana, y cachá chë bëngbe enefjuana posada šonjayentšjebo ca.”

<sup>6</sup> Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinÿenana átšbioye jabama. Atše merecido taitsatobuajoñe aca atšbe yebnoye chacuamashënguama;

<sup>7</sup> chíyeca ni mo añemo chiyatentšetá jama aca jajëbenguama. Morna ñye cochjayana y atšbe bochichnayá tšabá echántsatsmëna.

<sup>8</sup> Er atše sëndábamna átšbioye mándayënga y átšnaca soldadëngbe amëndayá sëndmëna. Atše canÿe soldádbioye stjauyana ‘motsa ca’, cha cachora jana; y

ínÿabioye stjauyana ‘mabo ca’, cha cachora jabana; y nderado atšbe bochich-nayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanëyana: “Ndegombre cbëyana, ni mo nÿets Israelentše, ni canÿa quem boyabasacá tša ošbuachiyá chiyátinÿena ca.”

<sup>10</sup> Y chë ichmónënga yebnoye tmojtaná orna, tmojáninÿena chë bochich-nayá ya tšabá yojsatsmëna.

### *Jesús tojanma canÿe viudabe uaquiñá cháuatayenama*

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjédayënga y ba entšanga imojtsaye.

<sup>12</sup> Chë pueblo amashjuanoye yojtsebeconá orna, entšanga chë pueblentšana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëtsá entšanga chë obanabe mamá imojtsetjëmbambnaye.

<sup>13</sup> Bëngbe Utabná chë viudábioye tbojáninÿe ora, chabiama tbojanongmé y tbojanianyana: “Ndoñe matošachena ca.”

<sup>14</sup> Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbëyana: ¡Matëtsbaná ca!”

<sup>15</sup> Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánatse.

<sup>16</sup> Nÿetsca entšanga tša uatjana yojubuache chca tmojáninÿe ora, y Bëngbe Bëtsá imojtsatschuanaye, mëntšá jayanëse: “Bëngbentše canÿe Bëngbe Bëtsabe juabna oyebuambnayá cuatënjonÿná ca.” Y mëntšánaca: “Bëngbe Bëtsá tojabo chabe entšanga jabújabuachama ca.”

<sup>17</sup> Y nÿets Judea luarëjana y chë chábuañe luarenache entšanga imojátatsëmbona ndayá Jesús tojanmama.

### *Juan chë Ubayanabe ichmónënga (Mt 11.2-19)*

<sup>18</sup> Juan, lempe ntšamo Jesús yojsamama yojátatsëmbona; er chabe ústonënga chama tmojancuentá. As Juan, chënguentšana útata tojánachembo,

<sup>19</sup> y Jesúsbioye yojichamuá jatjayama cha tayojamna chë Cristo, chë jabama ibojanmëná, chë Uámana Uabuayaná, o ínÿabiama jatobátmama tayojsamna ca.

<sup>20</sup> As chë Juanbe ichmónënga Jesúsbioye tmojanobeconá y tmojanianyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiama jatobátmana ca.

<sup>21</sup> Chë ichmónata tbojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinÿna.

<sup>22</sup> Chora Jesús mëntšá tojanëjua: —Motsata y Juánbioye šochjauyana ntšamo šojinÿe y šojouencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjëmëngbioye chë tšabe notiçiënga montsabuayiná.

<sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

<sup>24</sup> Chë Juanbe ichmónata chentšana tbojésanbocnentšana, Jesús tojanontsé Juanbiamama entšanga jáuyanana, mëntšá: “Juan jinÿama šmojánbocna ora,



¿ndayá jinŷama ŝmojánbocana entšanga ndoyena luaroye? ¿Canŷe entšá ainaniñe tondaye añemo ndbomná, mo canŷe šěše bínŷiaca shatiyeynešcá?

<sup>25</sup> Y ndoñese, ¿ndayá jinŷama choye ŝmojánbocana? ¿Canŷe boyabása uámana entšayaca bopormaná? Ndoñe. Tšěngaftanga ŝmondétatšěmbo chě uámana entšayaca bopormáněnga y chě bětscá bomnánaca nŷe tondayama ntsec-ochinŷencá vida bomněngna, reyěngbe yebněnguiñe mondbétsiyenama.

<sup>26</sup> Asna, ¿ndayá jinŷama choye ŝmojánbocana? ¿Canŷa Běngbe Bětsabe juabna oyebuambnayá? Ndegombre; y cběyana, canŷa Běngbe Bětsabe juabna oye-  
buambnayabiama más bětśá.

<sup>27</sup> Cha, Juan, endmēna ndabiama Běngbe Bětśá chabe uabemana pal-  
abrěnguiñe tojánayana mo chabe ichmonacá, mēntśá tojánayana ora:

Cristo, atšbe entśá natsana sěnjichmó acbiama chaóyebuambama,  
entšanga jábuayenama aca jabama ainaniñe tšabe juabněngaca chamotse-  
prontánama ca.

<sup>28</sup> Ndegombre cběyana: Nŷets tempo entšángbeñe, ndocná quenátsmēna Juan  
chě Ubayanabiama más bětśá; masque chca, Běngbe Bětsabe aměndayoca chě  
más batśá uamaná, cha más bětśá echántsemna ntšamo mora Juan yomnama  
ca” —Jesús tojánayana.

<sup>29</sup> “Nŷetsca entšanga chca Juánbioye tmojanóyeunanga y chě Romocama  
entšángbioye impuesto atjanayěngnaca, nŷets ainánaca tmojánayana Běngbe  
Bětśá nŷetsca soyěnguiñe tšabá amá yomna ca; er tmojánenabaye ntšamo  
jubáyama Juan yojanamancá.

<sup>30</sup> Pero chě fariseunga y ley abuátambayěnga, ntšamo jubáyama Juan yojana-  
mancá jójěngacñama ndoñe tmonjánbošena ora, tmojtsanaboté ndayá Běngbe  
Bětśá chěngbiama jamama yojanjuabnacá.”

<sup>31</sup> Jesús mēntśánaca tojánayana: “Cbochanjáuyana ndayacá morsca entšanga  
imomna, y ndayěngcá chěnga imomna.

<sup>32</sup> Chěnga mondmēna mo chě plazěngoca mondbetsetbiámama  
baseteměngcá; chěngna mēntśá jabuache jtseatsayana: ‘Tšěngaftangiama  
fsěnjaflautá y ndoñe chešmatslantsá; ngmēnaca fsěnjaversiá y ndoñe  
chešmatenóbošachna ca.’

<sup>33</sup> Juan chě Ubayaná tonjánabo y ndoñe quenjatamana bětscá entšángbeñe  
jtsemnana, ni tanděše jasana, ni vínoye jofšiyana; y tšěngaftanga  
šmontsichamo chana bacna bayějbe juabna uambayá inamna ca.

<sup>34</sup> Morna, chě Běngbe Bětśá Entśá tbojanbemá tonjabo y chana aíñe  
entsamana bětscá entšángbeñe jtseatsayana y jtsofšěšnayana, y tšěngaftanga  
chabiama šmontsichamo: ‘Chana yapa uasayá y vínoye tmoyá entsemna  
y Romocama entšángbioye impuesto atjanayěnga y bacna soyěnga aměngbe  
amigo ca’.

<sup>35</sup> Pero Běngbe Bětśá endbětśinŷinŷnaye cha nŷets osertánana bomná  
yomnama, chě ndayá cha tojama ora ndayá chentšana inobocna soyěngaca  
ca” —cha tojánayana.

### *Jesús, chě fariseo Simonbe yebnentše*

<sup>36</sup> Canŷe fariseo Jesúsbioye tbojanofja saná jauasama, y Jesús chabe yeb-  
noye tojána y mesěshentše yojótbema.

<sup>37</sup> Chě pueblentše yojamna canŷe shembása, bacna vida bomná. Jesús chě  
fariseobe yebnentše yojtsesama chě shembása yojátatšěmbona; as cha chě  
yebnoye tojánashjango y tojanamba canŷe alabastro botellěše, jútjena canŷe  
botamana uanguětše bėjayeca.



<sup>38</sup> Jesusbe shecuatšentše yojoshentsamentšiye, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojt-satsshéchojuaye. Chabe shecuatšënga yojtonguëtsëntšiye y chë botamana uanguëtše bėjaye ibojtashecbuéscacja.

<sup>39</sup> Chë fariseo Jesúsbiöye ofjaná chca tojáninýe ora, mëntšá Jesusbiama yojtsejuabnaye: “Cha ndegombre canýe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canýe bacna vida bomna shembása ca.”

<sup>40</sup> As Jesús chë fariséobiöye tbojanianyana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canýe entsá crocénana uyentšamianá, uta ndebénata yojánabamna. Canýa shachna patse denario crocénana ibojandebena, y chë inýana, shachna bnëtsana.

<sup>42</sup> Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nyets útata chë ndebénana yojtsaperdónaye.

Chora chë fariséobiöye tbojanianyana: —Mora šmëyana, ¿chë útatentšana nda más chë uyentšamianábiöye buantsebobonshana ca?

<sup>43</sup> Y Simón tbojanjuá: —Atše šontsinýana chë más bëtská ndebená ca.

Y Jesús tbojanianyana: —Ndegombre, ntšamo endmëncá tcjayana ca.

<sup>44</sup> Jesús, chë shembásabiöye jontješiyëse, Simónbiöye tbojanianyana: —Minýe quem shembása. Atše acbe yebnoye sënjamashëngo y aca búyeshe ndoñe chešcatatuatšetá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshechojó.

<sup>45</sup> Ndoñe chešcatámocho, pero cha tonjamashëngo orscana ndoñe ntjájbanana atšbe shecuatšënga onguëtsëntšnaye.

<sup>46</sup> “Aca bestšašifne aceitiye ndoñe chešcatsbuešcja, y chana aíñe botamana uanguëtše bėjaye šonjashecbuešcja.

<sup>47</sup> Chcasna atše cbëyana, cha šonjinýanýe atšbiama corente bonshánana yojtsebomna, er atše chabe bëtská bacna soyënga sëntseboperdoná; pero nda nýe básefta bacna soyëngama stjaperdóna chana, nýe batšatema bonshánana jtsebomnana ca.”

<sup>48</sup> Y chora Jesús chë shembásabiöye tbojanianyana: “Acbe bacna soyëngama perdonaná contsemna ca.”

<sup>49</sup> Chora chë ófjanënga chentše imnatbiámanëngna tmojanontšë enatsëtsnayana: “¿Nda quem entsá yojtsemna, chë bacna soyëngámna entšángbiöye jtsaperdónayana ca?”

<sup>50</sup> Y Jesús más chë shembásabiöye tbojanianyana: “Aca átšbeñe icošbuachéyeca, atsbocaná cochántsemna; natjëmbana motsatoñe ca.”

## 8

### *Chë Jesúsbiöye imojanájabuachana shembásënga*

<sup>1</sup> Chca tojanopasá chentšana, Jesús bëts y base pueblënguëjana yojánana, tšabe noticiënga Bëngbe Bëtsabe amëndayama entsanga abuátambaye y abuayiynaye. Chë bnëtsana uta uatsjëndayëngna cháftaca imojtsajna.

<sup>2</sup> Básefta shembásëngnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayëjënga tojtanëbuacna;

<sup>3</sup> Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

*Chë jenabe cuento*

*(Mt 13.1-9; Mc 4.1-9)*

<sup>4</sup> Ba pueblënguentshana mallajta entsanga tmojánbocana Jesús jinÿama. Ba entsanga jouenama tmojanobeconá ora, Jesús mëntsá tojanacuntá:

<sup>5</sup> “Canÿe, canÿe jená jénaye jaujquëshama yojéftsebocna. Yoÿtsëjquëshaye orna, básipta jénaye benache juachañe yojuatquécjana; chiñna entsanga imojtsebotájaye, y jaja shloftshënga imojástjajna y imojtsósañe.

<sup>6</sup> Inÿe meshëngna ndëtshbenguñe yojuatquécjana. Yojuábocna orna, betscó yoÿtsábojo, chë fshantsiñe ndoñe yapa búyeshe yonjamna causa.

<sup>7</sup> Inÿe meshëngna uchemëshangañe yojuatquécjana y chë uchemëshangá lempe yoÿtsatscué, chë jénayeca cánÿiñe yojuábocna ora.

<sup>8</sup> Inÿe meshëngna, uanguaniñe yojuatquécjana. Yojuájua orna, bëtscá yojuashájona; canÿe jénayentshana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmoÿtsobenënga, smochjouena ca.”

*Ndáyeca Jesús cuentëngaca yojánabuatambaye*

*(Mt 13.10-17; Mc 4.10-12)*

<sup>9</sup> As chora chabe uatsjëndayënga tmojantjá: —¿Ntsamo chë cuento yoÿtsayana ca?

<sup>10</sup> Y Jesús tojanëyana: —Bëngbe Bëtsá tshëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë inÿyëngbioyna ndoñe; chë soyëngama chënga lempe cuentëngaca sentsëtsëtsná. Chca, masque corente chamotsafshna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

*Jesús chë jenabe cuentama tojanabuayená*

*(Mt 13.18-23; Mc 4.13-20)*

<sup>11</sup> “Chë cuento mëntsá endayana: Chë jénaye Bëngbe Bëtsabe palabra entsemna.

<sup>12</sup> Chë benache juachañe yojuatquécjana básipta jénaye endayana chë básipta entsanga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsoshbuáchema y bacna soyënguentshana ndatsebácanënga chamotsemnana.

<sup>13</sup> Inÿe entsanga mondmëna mo chë ndëtshbenguñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jochójuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantsëbuayënja y Bëngbe Bëtsabeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonÿaye.

<sup>14</sup> Inÿe entsanga mondmëna mo chë uchemëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentsá soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebomnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntsamo Bëngbe Bëtsá tojayancá.

<sup>15</sup> Inye entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiamama mochántsama. Chca mochántsama, Bëngbe Bëtsábeñe jtsošbuáchiyëse y nyetsca soyënguiñe puerte uantadënga jtsemnëse ca” —Jesús tojanabuayená.

*Chë uajuinñanëshama cuento*

*(Mc 4.21-25)*

<sup>16</sup> “Ndocná canye uajuinñanëshama juajuinñenana, chentsana ndaye sóyeca chësha jtsëstama o jutsnëshama tajsoye jtsajájuama; juajuinñenana ndayá tsabanánoca juajájuama, chë luarentse amashjuanëngbiamama chaotsebínñyama.

<sup>17</sup> Er ndocna yoiytëmena soye, ntjinycá queochaisoquéda, y chë entsangbiamama ndótatsëmbo soye, ntsotatsëmbcá queochaisoquéda.

<sup>18</sup> “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nye batsá ibosertana soyëngama bochantsebnatjëmbe ca” —Jesús tojánayana.

*Chë Jesusbe ndegombre pamíllanguentsënga*

*(Mt 12.46-50; Mc 3.31-35)*

<sup>19</sup> Chora, chabe mamá y chabe catsátanga chë Jesús yojtsementse tmojánashjajna, pero ndoñe imontsobena chábioye jobéconana, yapa entsanga causa.

<sup>20</sup> As canya Jesúsbioye mëntšá tbojanianana: —Acbe mamá y acbe catsátanga shjoca montsemna y montseboše aca jinñyama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamíllanguentsënga ca.

*Jesús chë binñia y chë béjaye bonguana yojëtsbema*

*(Mt 8.23-27; Mc 4.35-41)*

<sup>22</sup> Canye te, Jesús chabe uatsjëndayëngaftaca canye barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána;

<sup>23</sup> y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binñia yojóshjango y yojontsé béjaye chë barquëshoye jt-sobuajútjiana. Y chca, chëngbiamama puerte resjo yojtsemna.

<sup>24</sup> Chora chë uatsjëndayënga tmojána Jesús jetsefšenama y mëntšá tmojanianana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binñia y chë bëts olëshëngoye tojanmandá: “Bonguana šochtsemna ca.” Y chë binñiayana tojanëjbana y lempe bonguana yojtsatsmëna.

<sup>25</sup> Chentsana Jesús chabe uatsjëndayënga tojanëyana: —¿Bëngbe Bëtsá tsëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binñia y chë béjaynaca joyeunayana ca!

*Chë Gerasa luaroca bacna bayëja uambayá*

*(Mc 8.28-34; Mc 5.1-20)*

<sup>26</sup> Chentsana Gerasa ca uabaina luaroye tmojánashjajna, Galilea ndirichiñe.

<sup>27</sup> Jesús fshantsoye tojánastjango ora, chë pueblcana canye entsá chábioye tojánabo. Cha ya bayté bayëjbe juabna yojtsebomna, ndocna

entsáyá yonjanichétjona; y yebniñe ndoñe yonjaniyena, sinó obanëngbe cuevëshënguenache.

<sup>28</sup> Chë entsá, Jesúsbiöye tbojáninýe ora, chabe natsanoica yojshëntsamentsiye y mëntsá yojsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsëtšená ca!

<sup>29</sup> Chca tbojaniyana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entsá ndoñe tšabá chaotsemnama. Chë entsanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entsanga ndoyena luarëngoye yojánachana.

<sup>30</sup> Jesús chë boyabásabiöye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna.

<sup>31</sup> Y chë bayëjënga Jesús tmojanimpadá, chë corente uabouana tboye ndoñe chaondíchamuama.

<sup>32</sup> Chentša béconana ba cotsënga imnajena, tjoca innétsosañe; as chë bayëjënga Jesús tmojanimpadá chë cotsëngbeñe jamashjna chaulesen-ciam, y Jesús aíñe chca tojanalesenciá.

<sup>33</sup> As chë bayëjënga chë entsábentšana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñëšëjana uaf-jajónayoye imojtsoshbuetše y yojsatajo.

<sup>34</sup> Chë cotsënga anýenënga chca yojopásama tmojáninýe ora, chentšana tmojtsanacheta y tmojána chë soye jacuéntama chë puebloca y chiñe luarenache.

<sup>35</sup> Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninýe chë entsá chë ndábentšana bayëjënga tmojtanbocna, Jesusbe shecuatšentše yojsótbemañe, entsáyá uichëtjoná y chabe nýets juábnaca. Y chë entsanga chama corente imojouatjaná.

<sup>36</sup> Ntšamo yojopasacá tmojáninýëngna entsángbioye tmojanacuntá ntšamo chca chë bacna bayëjbe juabna uambayá chora ya tšabá yojsatsmënana.

<sup>37</sup> Chentšana, nýetscanga chë Gerasa luarentše oyenënga Jesúsbiöye imojtseimpadana chë luarentšana ínýoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe.

<sup>38</sup> Chë entsá chë ndábentšana bacna bayëjënga tmojtanbocana, Jesúsbiöye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntsá tbojaniyana:

<sup>39</sup> “Acbe yebnoye motsatoñe y cochjácuntaye lempe ntšamo Bëngbe Bëtsá acbiam tojamcá ca.”

Chentšana chë boyabása yojsatoñe, y nýets pueblëjana tojanacuntá ntšamo Jesús chabiam tojamcá

*Jesús canýe shembásabiöye tbojanshná y tojanma Jairëbe bembetema cháuatayenama*

*(Mt 9.18-26; Mc 5.21-43)*

<sup>40</sup> Jesús chë uafjajónaye chenguánoica tojtanashjango ora, nýetsca entsanga oyejuayënga tmojtanofja, er nýetscanga chabiam imojanobátmana.

<sup>41</sup> Chora tojánashjango canýe entsá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojshëntsamentsiye y ibojtseimpadana chabe yebnoye cháuama;

<sup>42</sup> er chë nýe canýe bembe cha ibnabomná, bnëtsana uta uata bomná, chora ya jóbanama yojtsemna.



Y Jesús yojsayentscuana, chë entsanga chábioye imojtsojuatsëntsenaye.

<sup>43</sup> Chë entsanguentše yojsaye canye shembása, oboftjajuanánaca šocá; cha ya bnětsana uta uata chca inapadecena. Lempe ntšamo yojanbomncá ash-nayěngbioye atóbocayiñe yojtsepochóca, y ndocná yonjobenaye cha jáshnana.

<sup>44</sup> Chë shembásana stětsoicana Jesúsbioye vojbeconá y chabe entsáyá sibuájua tojanábojajo. Y cachora chë oboftjajuanana ibojtsobojuána.

<sup>45</sup> Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatěmbayá, entsanga cmontsatsëntšená y cmontsayájuatsëntsenaye ca.

<sup>46</sup> Pero Jesús cachiñe tojánayana: —Pronto nda šojábojajo, er atše sěnjasanté obenana átšbentšana jóbocnana, mo nda stjashna orcá ca.

<sup>47</sup> Chë shembása tojáninye Jesús yojtsetátšěmbo cha tbojánbojajuama. As chora, ngměmnayá tojána y Jesusbe shecuatsentše yojshěntsamentšiye; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

<sup>48</sup> Chora Jesús tbojanियana: —Bembe. Běngbe Bětsábeñe icošbuachéyeca shnaná contsatsměna. Natjěmbana motsatoñe ca.

<sup>49</sup> Jesús cabá yojsóyebuambnantscuana, chë judiěngbe enefjuana yebnentša mandayábicana canya tojánashjango, y chë mandayábioye tbojanियana: —Acbe bembe ya tontsóbana; ndoñe más chë Buatěmbayábioye matéběyabomana ca.

<sup>50</sup> Pero Jesús chë soye tojanuena; as chë mandayábioye tbojanियana: —Ndoñe matauatjana. Nye Běngbe Bětsábeñe cochtsošbuáchiye y acbe bembe tšabá echántsměna ca.

<sup>51</sup> Chë yebnoye tmojánashjajna ora, Jesús ndoñe tonjanalesenciá banga choye jamashjnama, nye Pedro, Juan y Santiago y chë shembásetembe bětsětsatna aiñe.

<sup>52</sup> Nyetscanga imojtsenóbošachiye y ngměnaca imojtsóyebuambnaye, pero Jesús tojaněyana: “Ndoñe matenóbošachengana. Cha ndoñe chenatóbana; cha nye endětsomañe ca.”

<sup>53</sup> Chë entsanga Jesúsbioye nye imojtsáfchaye, er chěnga imojtsetátšěmbo chë shembásetema obaná yojětsemnama.

<sup>54</sup> Chora Jesús chábioye tbojanábuacueshache y jabuache tbojanियana: “¡Shembásetema, matětsbaná ca!”

<sup>55</sup> Y cha tojtanayena y cachora tojtantsbaná; y Jesús tojanaměndá chë shembásetema saná chamuajuatšě, chaosama.

<sup>56</sup> Chë shembásetembe bětsětsata puerte ojanánata ibojtsemna; y Jesús tojanaměndá, ndayá tojanopasama ndocnábeñe ntsecuéntayana.

## 9

*Jesús, chabe uatsjěndayěnga tojanichamó, Běngbe Bětsabe aměndayama jábuayenama*

*(Mt 10.5-15; Mc 6.7-13)*

<sup>1</sup> Chentšana, Jesús chabe bnětsana uta uatsjěndayěnga tojánachembo, y mando y obenana tojanatšatá bacna bayějěnga entsángbentšana jtěbuacanama y šocaněngama jashnayama.

<sup>2</sup> Tojanichamó Běngbe Bětsabe aměndayama jábuayenama y entsángbioye jashnayama.

<sup>3</sup> Y měntšá tojaněyana: “Benachiñama tondaye šmattsambaye: ni jatjoněfja, ni shecnaja, ni saná, ni crocénana; ni inye entsějua jenotrócama cach ndoñe.

<sup>4</sup> Canye yebnentše posada chacmojúyentšame ora, chentše šmochjoquéda inye puebloye játantscuana.



<sup>5</sup> Nderado ndayentše posada ndoñe chacmonjuyentšame, chentšana šmochjésebocana y shecuatšentša polvèshe šmochjésenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca” —Jesús tojanabuayená.

<sup>6</sup> Asna chë uatsjéndayënga tmojëftsanbocana y tmojána, nÿetsca chë base pueblotémënguenache chë tšabe noticiënga abuayiynaye y entšanga šocanëngama áshnaye.

### *Herodes y Jesús*

*(Mt 14.1-12; Mc 6.14-29)*

<sup>7</sup> Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanyena ca,

<sup>8</sup> ínÿenga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y ínÿengna canÿa chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanyena ca.

<sup>9</sup> Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiamá chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinÿama.

### *Jesús shachna uaranga boyabásenga saná tojanacaredadó*

*(Mt 14.13-21; Mc 6.30-44; Jn 6.1-14)*

<sup>10</sup> Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese ínÿoye tojtsanoñe, Betsaida ca uabaina puebloye.

<sup>11</sup> Pero chë entšanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

<sup>12</sup> Ya jetiñe yojtsobiamná orna, chë bnëtsana uta uatsjéndayënga Jesusbioye tmojanobeconá y mëntšá tmojanianyana: —Chë entšanga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

<sup>13</sup> Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebomna; nÿetscangbiamá saná jabuámiyama nderado nda tojasna, aíñe cuanjacaredádaye ca.

<sup>14</sup> Er mo shachna uaranga boyabásenga imnamna. Pero Jesusna chabe uatsjéndayënga tojanëyana: —Mamëndá nÿetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nÿetsca entšanga tmojanotbiamá.

<sup>16</sup> Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entšángbioye chamuatšatama.

<sup>17</sup> Nÿetsca entšanga tmojanse jtoshachaye nÿetsá, y cabá bnëtsana uta sbarëco tmojanajutjé chë ojamnëtémëngaca.

### *Pedro tojánayana, Jesús chë Cristo bëtsemnama*

*(Mt 16.13-19; Mc 8.27-29)*

18 Canye te, Jesús canya Bëngbe Bëtsáftaca ibojtsencuéntaye ora, chabe uatsjéndayënga cháftaca imojtsemna. Chora tojanatjá: —¿Nda atše bétsemnama entsanga imojtsichamo ca?

19 Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bëngbe Bëtsabe juabna oyebuambnayá tempscá mora tojtayena ca.

20 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

*Jesús tojánayana cha ibojamna jóbanana y jtayenana*  
(Mt 16.20-28; Mc 8.30-9.1)

21 Pero Jesús corente chënga tojanamëndá ndocnábeñe chama ntse-cuéntayana.

22 Y mëntsá cachabiamna tojánayana: —Chë Bëngbe Bëtsá Entsó tbojanbemá bontsemna puerte jasúfriana, chë judiëngbeñe bëtšëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entsanga mochanjóba, pero unga tianoye cha echántayena ca.

23 Chentsana nÿetsca entsanga tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonÿá atše juastama, y cada te chaotseprontana átšbeyeca jasúfriama, y cruciñe jobanámna.

24 Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nÿetsca tescama yomna tšabe vida echanjobuetše. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna.

25 Er ¿ndayama entsá buanjosería nÿetsca quem luarentša soyënga jtsebomnana, cha pochocaná jtsemnama tojtsá y chë nÿetsca tescama yomna tšabe vida tojtsoperdese?

26 Er ndëmuanÿe entsá, atšbiama o atšbe buayenana soyëngama tojtsëuatja, chë Bëngbe Bëtsá Entsó tbojanbemánaca chabiamna echantsëuatja, cha chabe bëtš buashinÿinÿaniñe chaojésabo ora, chabe Taitabe bëtš obenánaca y chabe angelotëmëngaftaca adoraná.

27 Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjëftsinÿcá ca” —cha tojánayana.

*Jesús inÿetšá tojanobinÿná*  
(Mt 17.1-8; Mc 9.2-8)

28 Mëntsá tojanopasá: Chca palabrënga tojanoyebuambá chentsana posuftaytese, Jesús tojëftsanëbiatše Pedro, Santiago y Juan, y canye tjoye tojántsjua, Bëngbe Bëtsáftaca jencuëntama.

29 Bëngbe Bëtsáftaca ibojtsencuéntantscuana, chabe jubiá inÿetšá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana.

30 Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías;

31 corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana.

<sup>32</sup> Masque Pedro y chabe enutata tša ocnayënga imojtsemna, nÿe imojtsefsña y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna.

<sup>33</sup> Chë uta boyabásata Jesúsbensana ibojoluára ora, Pedro, Jesúsbioye tbojaniyana: “Buatëmbayá, ¡tša tšabá bëngbiama cuanmëna muentše jtsemnana ca! Mora fchanjapórma unga tambotémënga: cánÿetema acbiama, ínÿetema Moisesbiama y ínÿetemna Elíasbiama ca.”

Pero Pedro ndoñe yontsetátšëmbo ntšamo yojtsichámuama.

<sup>34</sup> Y chca yojtsóyebuambnantscuana, canÿe jantšetéshe yojóbema, y chëngbioye yojáutsbotse, y chënga chë tsoye imojtsemnana tmojáninÿe ora, chë uatsjédayënga chama imojtsauatja.

<sup>35</sup> Chora chë jantšetëshoicana canÿe oyeambuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

<sup>36</sup> Chë oyeambuambnayana tmojanuenentsana, tmojáninÿe Jesús canÿa yojtsemna. Chë uatsjédayënga iytëca imojtsemna, y chë tempo ndocnábioye chama imonjuenaye.

*Jesús, canÿe basa bacna bayëjbe juabna uambayábioye tbojanshná  
(Mt 17.14-21; Mc 9.14-29)*

<sup>37</sup> Yëfsana, chë tjocana tmojtantsmá ora, ba entšanga tmojánbocana Jesús jajébenguama.

<sup>38</sup> Chora, chë entsanguentsana canÿe boyabása tojanontsé mëntšá uayebuáchana: —Buatëmbayá, Diosmanda atšbe uaquiñá minÿe. Nÿe cha atšbe uaquiñá endmëna;

<sup>39</sup> y mora, bayëjbe juabna chábioye bontsësháchichana, y nÿe ndeolpe jóntšana yoyana, ataque joshachana y uayoicana shashiye jtsabocanana. Y chábentsana chë bayëja ndoñe betscó ntjésebocnana, y cuerpiñe corente maltrataná jeseboshjonana.

<sup>40</sup> Acbe uatsjédayënga sënjaimpadá chë bayëja chábentsana chamu-atábocnana, pero ndoñe chematobená ca.

<sup>41</sup> As Jesús tojánayana: —¡Nÿetšá ndošbuáchiyënga y bacna entšanga! ¿Bue-tayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioye tbojaniyana: —Moye chë uaquiñá mánatse ca.

<sup>42</sup> Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetëmbioye tbojanshná y chabe taitábioye tbojtanëntregá.

<sup>43</sup> Y nÿetscanga puerte ojanánënga imojtsemna, Bëngbe Bëtsá tša obenana bomná inamnana.

*Jesús cachiñe tojánayana cha ibojamna jóbanana y jtayenana ca  
(Mt 17.22-23; Mc 9.30-32)*

Nÿetsca entšanga, ndayá Jesús yojtsamama ojanánënga imojtsemnëntscuana, chabe uatsjédayënga cha tojanëyana:

<sup>44</sup> “Quem soye tšabá šmochjouena y ndoñe chacmondébnëtjomba: Chë Bëngbe Bëtsá Entšá tbojanbemá entsangbe cucuatšinë mochanjáboshjona ca.”

<sup>45</sup> Pero chënga ndoñe yontsósertana ntšamo Jesús yojtsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

*¿Nda chë más uamaná yomna?  
(Mt 18.1-5; Mc 9.33-37)*

<sup>46</sup> Chë tempo, chë uatsjédayënga tmojanontsé enatsëtsnayana, nda chë más uamaná bëtsemnana.

<sup>47</sup> Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojántbema,

<sup>48</sup> y chëngbioye tojanëyana: “Nda átšbeñe ošbuachiyá bétsemnama, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

*Nda bëngbe contra ndoñe tontsemná, bëngaftaca jtsemnana*  
(Mc 9.38-40)

<sup>49</sup> Juan, Jesúsbioye tbojaniana: —Buatëmbayá, bënga fsënjinÿe canÿe boyabása y cha aca jótšëmbonëse, entšángbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

*Santiago y Juánbioye Jesús tojanëcácana*

<sup>51</sup> Jesús celoye jtama yojtsobeco ora, nÿets añémoca cha yojtsejuabnaye Jerusalenoye jama.

<sup>52</sup> Natsana báseftanga tojanichamó, y chënga tmojána canÿe base pueblotémoye Samaria luaroca, posada chabiana janguangoñama;

<sup>53</sup> pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uámana puebloye.

<sup>54</sup> Chabe uatsjëndayata, Santiago y Juan, chë soye tbojáninÿe ora, Jesús tmojaniana: “Bëngbe Utabná, ¿quectseboše bëndata fchaimandá celocana íñeshe chaótsatše y quem entšanga chaotsapochóca ca?”

<sup>55</sup> Pero Jesús yojobuértana y chátbioye tojtsanëcácana, chca juabna bomna causa.

<sup>56</sup> Chentšana chënga inÿe pueblotémoye tmojtsanoñe.

*Chë Jesús juastama bošënga*  
(Mt 8.19-22)

<sup>57</sup> Benachëjana imojtsajna ora, canÿe boyabása Jesúsbioye tbojaniana: —Atšbe Utabná, atše sëntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

<sup>59</sup> Jesús inÿe entšábioye tbojaniana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojaniana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochjabuayená ca.

<sup>61</sup> Inÿana Jesúsbioye tbojaniana: —Atšbe Utabná, atše sëntseboše aca juastama, pero šmolesenciá natsana atšbe pamíllangbiana jaisodiósoftama ca.

<sup>62</sup> As Jesús tbojaniana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntsošervënana; er cha jtsemnana mo canÿe arayacá, chë tojtsetrabája ora, stëtšoye tojtsaisantješncá ca.

## 10

*Jesús canyësëfta bnëtsana y uta entsanga tojanichamó Bëngbe Bëtsabe soyëngama jábuayenama*

<sup>1</sup> Chë soyënga chentšana, Bëngbe Utabná Jesús inye canyësëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

<sup>2</sup> Mëntsá chënga tojanëyana: “Canye bëts jajañe bëtská játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chë jaja saná játbanama. Cachcá, quem luarentše bëtská entsanga montsemna Bëngbe Bëtsábioye nduabuátmënga, y chëngbioye chabiama abuayiyayënga nye báseftanga. Chíyeca, Bëngbe Bëtsá moimpadanga ba abuayiyayënga chauichamó quem entsanga chábioye júbuajama.

<sup>3</sup> Motsajna; šmochjinye, atše tšëngaftanga cbontsichamná mo oveshënga cuenta, tjañe quešëngbeñe.

<sup>4</sup> Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

<sup>5</sup> “Ndaye yebnentše chašmojá mashjna ora, natsana šmochjayana: ‘Lempe tšabá quem yebnentše chaotsomñe ca’.

<sup>6</sup> Y chë yebnentše chca juabna bomna entsanga tmomnësna, chë tšabiana ndegombre chentše echántsemna; pero ndóñese, chca tšabiana chentše ndoñe queochátsmëna.

<sup>7</sup> Canye yebnentše šmochjoquéda, y šmochjase y šmochjofsiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canye pueblentše nye inye y inye yebnënguenache ndoñe matajnana.

<sup>8</sup> “Ndaye pueblentše chašmojá mashjna y tšabá chacmojú buajentše, šmochjase ntšamo chentše chacmojacaredadaycá;

<sup>9</sup> chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’.

<sup>10</sup> Pero canye pueblentše chašmojáshjango y ndoñe chacmonjú buaja, chentša tsashenangoye šmochjá bocana y mëntsá šmochjayana:

<sup>11</sup> ‘¡Chë tšëngaftangbe pueblentša polvëshe, chë bëngbe shecuatšënguñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetatšëmbo chë Bëngbe Bëtsabe amëndayana tšëngaftangbeñe entsemnama ca.’

<sup>12</sup> Ndegombre cbëyana, quem luare jopochócama te, chë luarentša entsángbioye Bëngbe Bëtsá puerte jabuache echantsacastígaye, y Sodoma puebloca bacna entsángbioye ndoñe nýa nýetsá jabuache ca” —Jesús tojánayana.

*Chë nduauenana entsanga  
(Mt 11.20-24)*

<sup>13</sup> “¡Tša lastema Corazín puebloca entsangbiana! ¡Tša lastema Betsaida puebloca entsangbiana! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngménaca matmëntenó juabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entsayangaca matmëntopormanga y jatinyashiñe matmënjotbiana.



14 Pero ntšamo entsanga tmojamama, tšabá o ndoñe tšabá bétsemnama jayanama chaojobuache ora, tšëngaftanga más bëts castigo šmochántsebmoma, chë Tiro y Sidonoca bacna entsangbe castiguama.

15 Y tšëngaftanga, Capernaum pueblentša entsanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infernoye cmochantsësetjango!

16 “Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

### *Chë canyësëfta bnëtsana y uta entsanga tmojtanashjajna*

17 Chë canyësëfta bnëtsana y útatna Jesús yojtsemnoye tmojtanashjajna, puerte oyejuayënga; y chábioye mëntsá tmojanianana: —¡Bëngbe Utabná, aca jótšëmbonëse, chë bacna bayëjëngnaca šonjoyauná ca!

18 Y Jesús tojanëyana: —Ndegombre. Y tšëngaftanga Satanásbioye chca šmontseyëñjaná ora, entsemna mo Satanás celocana canyë tcuinycá jtsot-satšana stjinycá.

19 Atšna obenana tcbonjatšatá mëtšcuayënga y alacranëngbeñe chašmotsajnama, y bëngbe uayayá Satanabe nyëts obenana jáyëñjanama, tšëngaftanga ndocá ntjapasacá.

20 Pero móyejuanga, ndoñe chë bacna bayëjënga chacmóyaunama obenana šmojtsebmoma, sinó tšëngaftangbe uabaina celoca ya yojtsábemanama, er tšëngaftanga chë nyëtsca tescama yomna tšabe vida šmochántsebmoma ca —cha tojanëyana.

### *Jesús puerte tojanoyejuá (Mt 11.25-27; 13.16-17)*

21 Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nyë batšá tatšëmbënga tconjanyanyé, chë tša tatšëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tcojábosenayeca.

22 “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nyë chë Taitá aíñe. Y chë Taitábioye ndocná corente quebnatábuatma; nyë chë Uaquiñá aíñe, y ndëmuanyëngbioye chë Uaquiñá tojtseboše nda chë Taitá yomnama jinyanÿiyama, chëngnaca chë Taitábioye mochantsábuatma ca.”

23 Chentšana, Jesús chabe uatsjëndayëngbioye tojanobuértana y nyë chëngbioye tojanëyana: “¡Puerte oyejuayënga chë ntšamo tšëngaftanga šmontsonyáca jinÿyama tmojtsobenënga!

24 Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonyá soyënga jinÿyana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

### *Chë Samarioca tšabe entsabiama cuento*

25 Canyë judiëngbe ley abuatambayá yojontšé Jesúsëftaca jóyebuambayama, y jisháchichiyamna mëntsá tbojantjá: —Buatëmbayá, ¿ndayá šojtsemna jamana chë nyëtsca tescama yomna tšabe vida jtsebmoma ca?

26 Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

27 Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nyëts ainánaca, nyëts espíritoca, nyëts añémoca y nyëts juábnaca”;

y “ndēmua entšánaca cochtsebobonshana, ntšamo cach aca cuenobobonshancá ca.”

<sup>28</sup> Chora Jesús tbojaniyana: —Tšabá šconjojuá. Chca cochtsama y chë nÿetsca tescama yomna tšabe vida cochántsebomna ca.

<sup>29</sup> Pero chë ley abuatambayá tšabá jenoquédamna Jesúsbioye tbojantjá: —Y ¿ndase chë ndēmua entšánaca yomna ca?

<sup>30</sup> As Jesús tbojanjuá: —Canÿe, Jerusalenocana Jericó benache canÿe entšá yojtsetsamá, y básefta salteadorënga imojébëbocna. Lempe imojtsefca, chë entšayánaca; imojtsejantsetaye y chentsana imojtsatónënga, y chë entšá batšá obaná imojéseboshjona.

<sup>31</sup> Ndeolpe, chë benachëjana canÿe judiëngbe bachna yojtsachnëjuana. Chë entšábioye ibojinÿe ora, nÿe chabuacá yojtsëchnënguañe.

<sup>32</sup> Cachcá, canÿe Levita, chë canÿe Bëngbe Bëtsabe bëts yebnoca trabajayá chëjana yojtsachnëjuana; y chë entšábioye ibojinÿe orna, nÿe chabuacá yojtsëchnënguañe.

<sup>33</sup> “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia.

<sup>34</sup> Chábioye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayiñe ibojëftsenjayiye, canÿe yebnoye posada uyentsamianoye ibojuánatse, y chentse chábioye ibojëftsinÿena.

<sup>35</sup> Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduiñbioye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiana chacojenábojafjonasna, mëjana chaitísachnëjuana ora, cbochjabáisabuenaye ca.’

<sup>36</sup> Y chcasna, ¿chë unganguentšana nda cmojtsinÿana chë entšabiama yojtsejuabnaye cha cachacá entšá inamnana ca?”

<sup>37</sup> Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniyana: —Asna, motsa y cachcá cochjama ca.

### *Jesús, María y Martbe yebnentse*

<sup>38</sup> Chentsana, Jesús benachëjana yojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentse tbojanofja.

<sup>39</sup> Martna canÿe quenata ibnabomna, María ca uabainá. Cha Jesusbe shecuatšentse yojótbema chabe palabra jouenama;

<sup>40</sup> y chëntscuana Marta ba soyënga yojtsama. Cha Jesúsbioye tojanobeconá y tbojaniyana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

<sup>41</sup> Chora Jesús tbojanjuá: —Marta, Marta, bëtscá soyëngama contsenócochinÿena y contsenomantšná;

<sup>42</sup> pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaot-sajbanama ca.

## 11

### *Ntšamo Bëngbe Bëtsáftaca cuanjencuénta (Mt 6.9-15; 7.7-11)*

<sup>1</sup> Canÿe, Jesús Bëngbe Bëtsáftaca ibojtsencuéntaye canÿe luarentse. Tojanpochocá orna, canÿa chabe uatsjendayënguentšá tbojaniyana: —Bëngbe

Utabná, Bëngbe Bëtsáftaca jencuéntama šmabuatambá, ntšamo Juan chabe uatsjédayëngaftaca tojanmcá ca.

<sup>2</sup> Y Jesús tojanéyana: —Bëngbe Bëtsáftaca chašmojtsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

<sup>3</sup> Mënté šmiyatšatá, cada te šnetsëjaboto tandëše.

<sup>4</sup> Bacna soyënga fsënjama: šmotsaperdónaye;

er bëngnaca nyëtscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocohëngo ora, šochjuyabuache chca nde-nobuíyama.

<sup>5</sup> Jesús mëntšánaca tojanéyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëše šmotsemná,

<sup>6</sup> er canýe atšbe amigo yebnoca tonjáshjango y tondaye quetsátsbomna cha jonánjama ca.’

<sup>7</sup> Ndegombre, cha tsocana tcmojojuá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsojá; ndoñe quetsátobena mora jotsbanana y chë tandëše jámnana ca.’

<sup>8</sup> Ndegombre, chë bacó ndoñe tonjotsbaná chë tandëše jámnama, cháftaca šuenatsëtsnámase, cha pronto jotsbanana chca uébëyabomana ndoñe tconja-jbaná causa, y lempe ntšamo cmojtsajabotcá cha cmochanjoyiye.

<sup>9</sup> Chcasna, atše cbëyana: Smochjotjañe y Bëngbe Bëtsá cmochanjátsataye; šmochjánguango y šmochanjínýena; šmochjachembo y cmochanjébëtafjo.

<sup>10</sup> Er ndánaca ndayá tojtsotjanañá, jóyëngacñana; y tojtsenguá cha, jónýenana; y nda tojtsechembuanábioye jebiatëfjuana ca.

<sup>11</sup> “¿Nda tsëngaftanguentsana nantsobena, taitá tojtsemnëse, cachabe uaquiñábioye canýe mëtšcuaye jatštayana, beona tbojtsotjanañe ora;

<sup>12</sup> o canýe alacránashe joyiyana, shëmnëbé tbojtsotjanañe ora?

<sup>13</sup> Y chca, tsëngaftanga, bacna soyënga amënga, tsëngaftangbe basetemëngbioye tsabe soyënga jatšatayama šmojtsamanëse, ¡más chë celoca Taitá, chë Uámana Espíritu echanjátsataye, chca tmojtsotjanañëngbioye ca!” —Jesús tojánayana.

*Fariseunga tmojánayana Jesús Satanásbentsana obenana tojanóyëngacñe ca (Mt 12.22-30; Mc 3.20-27)*

<sup>14</sup> Jesús canýe entšábentsana canýe bacna bayëja tbojtanábocna. Chë bayëja ndëbiá chë entšábioye tbojánbema, y chábentsana tojésanbocna ora, chë ndëbiá tojtanontšë oyebuambnayana. Y chë entsanga chama imojenjnaná;

<sup>15</sup> pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetá chë bayëjënga chauatëbuacnama ca.”

<sup>16</sup> Y ínýenga, Jesús jisháchichiyamna tmojanimpadá canýe bëts soye chaoma, jinýanýiyama cha celoca obenana inabomna o ndoñe.

<sup>17</sup> Pero Jesús yojtsetátšëmbo ntšamo chëngbe juabna bëtsemnana. As to-janéyana: “Canýe amëndayábentše entsanga tmojtsenojatá y tmojtsenáyase, cachënga jtsenpochócana; y canýe yebnentše oyenënga tmojtsenojatá y tmojtsenáyase, chë pamíllanga tsabá nyëts tempo ndoñe quemochátsmëna.

<sup>18</sup> Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebomnana? Chca sëntsichamo, er tsëngaftanga šmotsichamo Beelzebube obenánaca chë bayëjënga stsatëbuacana ca;

19 pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, cachënga montsinÿinÿná ntšamo ndegombre yomnana, y tšëngaftanga ndoñe ndegombre soye šmotsichámuama.

20 Y atšna, Bëngbe Bëtsabe obenánaca entsángbentsána chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftangbioye tojóshjanguama.

21 “Canÿe corente añemo bomna entsá, bëtscá ármangaca chabe yebna tojtsinÿenëse, chë tsoca tomna soyënga ndoñe ntjotšana.

22 Pero inÿa chabiama más añemo bomná tojabo y tbojabetseyënjaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

23 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndayá inopása chë bacna entsángaftaca  
(Mt 12.43-45)*

24 “Canÿe bacna bayëja canÿe entsábentsána tojësebocna ora, bojojo luarënguenache chë bayëja jtsanana, ndayentše jóchnama onguayíñe. Ndoñe tonjínÿena ora, jenójuaboyana: ‘Atšbe oyenoye, chë ndayentsána sënjëftsebocnoye chanjesshécona ca.’

25 Y choye tojtashjango ora, jinÿenana lempe tšabá cha jtesamashënguama, mo tsajniñe y prontániñe cuaftsemncá.

26 Chora chë bayëja jana y inÿe canÿsëfta bayëjënga, chabiama más opëjënga jobiatšana, nÿetscanga choye jamashjnama, chë boyabásabeñe joyénanama. Y chca, chë boyabása tempscama más bacna entsá jtoquédana, chora chë natsanama más bayëjënga abamna causa ca” —Jesús tojánayana.

*Chë ndegombre oyejuayana*

27 Jesús chë soyënga yojtsichamëntscuana, entsanguentše canÿe shembása yujuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

28 As Jesús tbojanayana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

*Chë bacna entsanga Jesús tmojanimpadá canÿe bëtš soye chaoma, chabe obenana jinÿama  
(Mt 12.38-42; Mc 8.12)*

29 Entšanga más imojtsógotoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canÿe bëtš soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá.

30 Er chca, ntšamo Jonás Nínive pueblaca entsanga canÿe bëtš soye tojaninÿanÿé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama.

31 Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsángbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrénga jouenama, y chë mora muentše entsemnana, Salomonbiama más uamaná endmëna.

<sup>32</sup> Chë entsanga tšabá o ndoñe tšabá tmonjamama jayanama te, chë Nínive bëts puebloca entšágnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayiyayana ora, tmojanoye-uná y chë tšabe benache tmojtanishache, y chë mora muentše entsemnana, Jonasbiana más uamaná endmëna ca” —Jesús tojánayana.

*Chë cuerpama uajuinÿanësha*

*(Mt 5.15; 6.22-23)*

<sup>33</sup> “Ndocná canÿe uajuinÿanësha juajuinÿenana, canÿe iytëmena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiana chaotsebínÿnama.

<sup>34</sup> Acbe bominÿe tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsoobenana, ntšamo tcojtsamcá chë bominÿeca jtsonÿayana. Chë bominÿe ndoñe tšabá tontsemnësa, chë bominÿe tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësa, lempe ntšamo chacojtsamcá ndoñe tšabá queochátsmëna.

<sup>35</sup> Cuedado šmochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana.

<sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanësha puerte tšabá tojtsebinÿnacá ca” —Jesús tojánayana.

*Jesús chë fariseungbiana y ley abuátambayëngbiana tojánayana, chënga ndoñe tšabá montsama ca*

*(Mt 23.1-36; Mc 12.38-40; Lc 20.45-47)*

<sup>37</sup> Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema.

<sup>38</sup> Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábenga jtsatsmënama.

<sup>39</sup> Pero Bëngbe Utabná tbojanianana: “Tšëngaftanga fariseunga šmondmëna mo entsangcá ndëmuanÿenga chë tazëšënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga becá jtsamana entsangbiana mo tšabengcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca.

<sup>40</sup> ¡Juabna ndbomnënga! Tšëngaftanga ndoñe šmondëtatšëmbo, chë tšëngaftangbentsana entsanga ndayá jinÿama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámana ndayá tšëngaftangbe ainanoye yomna soyënga, y chë entsangbe delante šmojama soyënga.

<sup>41</sup> Tšëngaftanga cmontsamna, chë soyënguiñe ndayá ainaniñe yomnentsana inÿengbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcnayana chë jajañentša sananga bnëtsanentsana canÿe soye nÿetsá, y chë binche matatëmënguentsana menta, ruda y nÿetsca binche matatëmënguentsánëna; pero nÿe batšá jtsamana chë nÿetscanga cachca



derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

43 “¡Tša lastema tšëngaftangbiama fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nÿa puerte respétoca entšanga chacmotsacheuanayama ca.

44 “¡Tša lastema tšëngaftangbiama! Smondmëna mo obanënga uatbontsaniñcá, ndoñe ntsinÿnana, y entšanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entšangbiama ndoñe chca quešmátinÿna ca.”

45 Jesús chca tojánayana ora, canÿe ley abuatambayá tbojanayana: — Buatëmbayá, chca palabrenga contsoyebuambná ora, bëngbiámnaca ndoñe tšabá quecátichamo ca.

46 Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canÿe entšá, couáybioye canÿe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšangbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

47 “¡Tša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye.

48 Chca jtsamëse, tšëngaftanga šmontsinÿanÿná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

49 “Chíyeca, Bëngbe Bëtsá chabe bëts osertanánaca tojánayana: ‘Atšë chëngbioye chanjichamuá atšbe juabna oyebuambnayënga y atšbiama abuayinayënga, y báseftangbioye mochantsëbaye y inÿengbioyna mochantsécamiye ca.’

50 Y chca, nÿets castigo morsca entšangbeñe echántsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana;

51 Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entšangbeñe nÿets castigo chaotsemnama ca.

52 “¡Tša lastema tšëngaftangbiama, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiama yapa totcá chaotsemnama. Cach tšëngaftanga ndoñe quešmátobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

53 Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtšaisebocana ora, tmojanontsé chábioye becá tjanayana, y imojtsama ba soyëngama chaóyebuambama,

54 chca, jisháchichiyama jtsebošëse, cachá ntšamo tojayana sóyeca chënga jtsebomnama ndáyeca chábioye mal jaquédana.

## 12

*Jesús, chë bacna entsanga ntšamo ndegombre tmojuabnacá ndinýinýnayëngbiama tojanabuatambá*

<sup>1</sup> Chëntscuana, ba uaranga entsanga chentše tmojanójoto; tša entsanga causa, nýetscanga imojtsenatsëntšenaye. Chora Jesús tojanontsé jóyebuambayama, y natsana chabe uatsjéndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinýinýnayënga. Ntšamo chë levadura jamana nýetsana chauábochema, cachá chëngbe buatëmbana soyëngaca, chë fariseunga montsobena jamana bëtsá entsanga ntšamo ndoñe tšabá tontsemncá chamotsamama.

<sup>2</sup> Er ndocna yoiytëmena soye, ntjinýcá queochaisoquéda; y chë ndótatsëmbo soye, ntsotatsëmbcá queochaisoquéda.

<sup>3</sup> Chiyeca, chë mora nýe tšëngaftangbiama šmojtsichamo soyënga, chë entsangbiama mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nýetsca entsángbioye mochántsabuyiynaye, mo nda canýe yebnentša tsbanánocana noticiënga tojtsayebuachcá ca” —cha tojanéyana.

*Nda ndegombre cuantsebiauatja  
(Mt 10.26-31)*

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nýe chë tšëngaftangbe cuerpo japochócama imobenëngbiama, pero chentšana más jamana ndoñe ntsoberana.

<sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftsetémënga ndoñe nýe uta denario crocenánama mondbétsena? Pero masque chca, Bëngbe Bëtsá chëngbiama sempre jensenójuabnayana.

<sup>7</sup> Y tšëngaftangbiama Bëngbe Bëtsá lempe endëtatsëmbo, y bueta stjënëjënga tšëngaftangbe bestšašiñe yomnámna. As ndoñe matauatjëngana; tšëngaftanga ba jaja shloftšëngbiama corente más šmonduámana ca” —Jesús tojánayana.

*Ndabiama Jesucristo yochjayana chabe entsá yomna ca  
(Mt 10.32-33; 12.32; 10.19-20)*

<sup>8</sup> “Atše cbéyana, nda atšbe entsá yomna ca entsangbe delante tojyanabiama, chë Bëngbe Bëtsá Entzá tbojanbemánaca, Bëngbe Bëtsabe angelëngbe delante echanjayana chë entsá chabia yomna ca;

<sup>9</sup> pero nda entsangbe delante, atšbe entsá ndoñe yondmëna ca tojyanabiama, chë Bëngbe Bëtsá Entzá tbojanbemá, Bëngbe Bëtsabe angelëngbe delante echanjayana, cha chabe entsá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entzá tbojanbemabiama ndoñe tšabá tontsichamuábioye, pero chë Uámana Espíritbiama ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entsanga bëtsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenéuyanama, o ndayá šmochjayanama;

<sup>12</sup> er chë Uámana Espiritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

*Entšabiama resjo yomna, nÿe yapa bomnana jesejuabayana*

<sup>13</sup> Chentšana, canÿa entšanguentšá Jesúsbioye tbojaniana: —Buatëmbayá, atšbe catsata momandá chë átšbioye otocana soyënga chašuatoyé ca.

<sup>14</sup> Y Jesús tbojaniana: —Bacó, ¿nda atše šojábema tsëndatbe ujanayá ca?

<sup>15</sup> Y entšángbioye tojanéyana: —Smochjinÿe y cuedado smochtsebomna chë nÿe yapa soyënga jtsebomnama bošama; er masque bëtscá soyënga chašmotsóboñe, chca ndoñe quešmochátstatšëmbo aíñe tšabe vida taišmochjónÿenama ca.

<sup>16</sup> Y chora mëntšá tojanacuntá: “Inamna canÿe bomna entšá, y chabe fshantsënguiñe tša jaja saná yojtsopodena.

<sup>17</sup> Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’

<sup>18</sup> Y mëntšá yojeniana: ‘Chë grano uaquëcjnaye yebnënga chantsendbiana, y inÿe más bëtš yebnënga chanjëtšjebo, y chiñe nÿetsca atšbe jaja saná chantsóbojaye y nÿetsca atšbe soyëngnaca.

<sup>19</sup> Y chora atše chjeniana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’

<sup>20</sup> Pero Bëngbe Bëtšá chábioye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’ ”

<sup>21</sup> Y Jesús chora tojánayana: “Chca endbopása chë nÿe chabiama bomnana tojtsejuabá y bëtscá Bëngbe Bëtšabe soyënga ndoñe tonjëftsashjacháftaca ca.”

*Bëngbe Bëtšá chabe básenga jtsanÿenana*

*(Mt 6.25-34)*

<sup>22</sup> Chentšana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinÿena ndayá smochjase o smochjofšiyeye vida jtsebomnama, ni ndaye entšayá smochjuíchëtjuama cach ndoñe.

<sup>23</sup> Ndegombre, vida chë sanama más enduámana y cuerpo chë entšayama más.

<sup>24</sup> Chë ftsenga shloftšënga smochjanÿe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtšá chënga saná jtsatšatnayana. ¡Y tšëngaftanga chë ftsenga shloftšëngbiama puerte más šmonduámana!

<sup>25</sup> Masque chca endmëna, masque canÿa tša tojesenócochinÿena, ¿ntšamo nanjobenaye jamana, chë ntsachetšá vida yochtsebomnentšana canÿe hora vida más jabotiyana?

<sup>26</sup> Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama smochjatenócochinÿena?

<sup>27</sup> “Smochjuinÿe chë lirio uantšefjushangá jtsajuajnana: ndoñe ntsetrabájayana, ni ntseshabiamnayana. Pero atše cbéyana, ndegombre ni mo rey Salomón, nÿetsca chabe bomnánaca, chë lirio uantšefjushangacá nÿetšá botamana quenjatspormana.

<sup>28</sup> Bëngbe Bëtšá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámnaca Bëngbe Bëtšá echanjama entšayá chašmotsábomnama, jentšanga Bëngbe Bëtšabeñe nÿe batšá ošbuáchiyënga!

<sup>29</sup> Chíyeca, ndoñe šmattsenócochinÿena ndayá jasama o jofšiyama onguayiñe;

<sup>30</sup> er chë soyëngama quem luarentša entšanga mondbëtšenocochinÿena, pero tšëngaftanga ndoñe. Tšëngaftangna canÿe Taitá šmondbomna, y cha endëtatšëmbo ndayá cmëjabótama.

31 Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsejaboto soyënga nÿe šmochanjóyëngacñe ca” —Jesús tojánayana.

*Chë celoca bomnana*  
(Mt 6.19-21)

32 “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínÿnana chabe amëndayana tšëngaftanga jatšatayama.

33 Lempe ntšamo šmobomncá šmochtsatobuiye y chë ujabotëngbiöye šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca;

34 er chë ndayentše tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

*Bëngbe Utabná yochjésabama jtseprontánana*

35 “Mo chë oservénënga, chë entšayá uichëtjonënga y uajuinÿananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama.

36 Chca, tšëngaftanga šmochántsemna mo chë oservénënga, tšabe entšayaca bopormánënga y uajuinÿananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama.

37 Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservénënga echanjábiamana, y saná echanjuatšiyey.

38 Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínÿanoye.

39 Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama.

40 Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená*  
(Mt 24.45-51)

41 Pedro, Jesúsbiöye tbojanianana: —Utabná, ¿chë tconjayana cuento nÿe bëngbiamana o nÿetscangbiamana yochtsemna ca?

42 Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanÿenama, y jasama tojtsemna ora chaújuatšëma.

43 Puerte oyejuayá chë oservená, chë nduiño tojtashjango ora, cha tbojínÿenana jtsamëse ntšamo tbojtsemncá.

44 Ndegombre cbëyana, chë nduiño chábiöye bochanjaimpáda nÿetsca chabe soyënga chabotsinÿëñama.

45 Pero chë oservená, chabe nduiño betesco ndoñe yochantabo ca tojtsejuabná, y tojontsé chë inÿe oservénënga, boyabásenga y shembásenga jtsajantšëtayana, becá jtsesana, jofšiyana y jtsótmenana,



<sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnama, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja.

<sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonjëbioyna jauyanana, más bëts trabajo chaoma ca.”

*Jesusbe causa, entsángbeñe más jtsentsjanayana  
(Mt 10.34-36)*

<sup>49</sup> “Atše sënjabo quem luariñe jabojuinÿiyama, y ¡tša sëntseboše malaye ya ctsangbototjuana!

<sup>50</sup> Atše šontsemna puerte jasúfriana, y ¡puerte ngménaca sentsobátmana chca chaotsemnama!

<sup>51</sup> ¿Tšëngaftanga šmojtsejuabná atše tijabo quem luarentše entsanga natjëmbana chamotsiyenama? Ndegombre ndoñe chca queochátsmëna; atše sënjabo causa, entsanga más mochántsentsjanaye.

<sup>52</sup> Er mëntescana, canÿe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna.

<sup>53</sup> Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatšëmbo  
(Mt 16.1-4; Mc 8.11-13)*

<sup>54</sup> Mëntšánaca Jesús entsanga tojanëyana: “Tšëngaftanga, chë jantsetëshënga shinÿe uenatjëmbambanoicana tojóboचना šmojinÿe ora šmondbétsichamo ‘echanjuafté ca’, y ndegombre chca jopásana.

<sup>55</sup> Y tsmanoicana tojtsebínÿia orna, tšëngaftanga šmondbétsichamo ‘echan-jojënÿana ca’, y ndegombre chca jopásana.

<sup>56</sup> ¡Bacna entsanga, chë ntšamo ndegombre šmojuabnacá ndinÿinÿayënga! Ntšamo quem luarentše yochtsemnama, ndayá celoca šmojinÿama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinÿanÿayana ca?” —Jesús tojánayana.

*Chë uayayáftaca natjëmbana jtenbemana  
(Mt 5.25-26)*

<sup>57</sup> “¿Ndáyeca cach tšëngaftanga ndoñe šmondbáyana ndayá tšabá bëtsemnana?

<sup>58</sup> Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cuuatšinë cmochanjáboshjona, y chënga cárceloye cmochanjutame.

<sup>59</sup> Ndegombre cbëyana, chentšana ndoñe quecochtëtsbocna, nÿets ndebénana candesopagantscuana ca” —Jesús tojánayana.

## 13

*Bëngbe Bëtsabe benache jtishachana*



1 Cach ora, báseftanga tmojána Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojt-sanëbaye, y chëngbe buíñe yojenajuabó chë Bëngbe Bëtsábioye jëtschuayama tmojanóba bayëngbe buíñeca.

2 Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiama chënga más bacna soye amënga imojamna causa ca?”

3 Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana.

4 O, ¿tšëngaftanga šmnétsejuabnaye, chë Jerusalemntša bnétsana posufta entšanga tmojanóbanënga, chë Jerusalemoca binche uafjajónaye Siloé béconana tsbanana jebna soye tojtšanáshajaye ora, chënga imojamna chë inýenga Jerusalemntše oyenëngbiama más bacna soyënga amënga ca?”

5 Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

### *Chë ndëshajona higo betiyama cuento*

6 Jesús mëntšá tojanacuntá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena.

7 Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinýena; chíyeca, motsetëtše. ¿Ndayama quem jajañe yochjátsjena ca?’

8 Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanganëshe chanjabotboto.

9 Nderado chca jamëse, nanjashájona; y ndóñesna, chora cocayé cuantsetëtše ca.’ ”

### *Jesús canýe ochnayté, canýe tsëštjona shembásabioye tbojanshná*

10 Canýe, canýe ochnayté Jesús yojontšé entšanga jabuátambana, chë judiëngbe enefjuana yebnentše,

11 y chentše yojtsemna canýe shembása; cha ya bnétsana posufta uata yojtsešoca. Canýe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana.

12 Jesús chábioye tbojáninýe ora, tbojanchembo y mëntšá tbojaniana: “Batá, mora ya ndoñe šocá quecátsmëna ca.”

13 Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšé Bëngbe Bëtsábioye jëtschuayama.

14 Pero chë enefjuana yebnentša mándayana tbojáneta, Jesús chë shembása ochnayté tbojanshnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

15 Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinýinýnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama bėjaye chaofšema?

16 Chcasna, quem shembása, canýa Abrahám bentšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canýe ochnayté chë bayëja jtsebojuánana ca?”

17 Jesús chca tojánayana ora, chabe uayayënga imojtsëuatja, y nyëtsca entšanga imojtsóyejuaye Jesús tša bëts soyënga yojtsamama.

*Chë mostaztiye jenayama cuento*  
(Mt 13.31-32; Mc 4.30-32)

<sup>18</sup> Jesús mëntśánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca?”

<sup>19</sup> Endmëna mo canÿe mostaza jénaye, canÿe entsá jajañe tojajecá; chiyna jójuana y canÿe bëts betiye jóbemana; tśa bëtsashe jóbemana, chíyeca chë jaja shloftśënga chë buacuashënguiñe uajajonëtemëngá jauábopormana ca.”

*Chë levadurama cuento*  
(Mt 13.33)

<sup>20</sup> Mëntśánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca?”

<sup>21</sup> Endmëna mo levadurcá; canÿe shembása chana jenájua banga unga medida arninÿañe, nÿetsana chauabo chama ca.”

*Chë base utëntśá bësásá*  
(Mt 7.13-14, 21-23)

<sup>22</sup> Jerusaleno ye benache, Jesús entsanga yojsabuátambaye bëts pueblënguiñe y base pueblotëmënguiñe.

<sup>23</sup> Canÿa chábioye tbojantjá: —Bëngbe Utabná, ¿nÿe báseftanga imomna chë atsebácanënga mochtsemnënga ca?

Y Jesús tbojanjuá:

<sup>24</sup> —Puerte śmochtsentśena chë base utëntśá bësásajana jamashjnama; er ndegombre cbëyana, banga mochántseboşe chëjana jamashjnama, pero ndoñe quemochatobenaye.

<sup>25</sup> Chë yebnentśa nduiño chaojotsbaná y chë bësásá chaojatatámentśana, tśëngaftanga chë shjoca chaśmojtsemnënga, śmochántsechembuana, mëntśá jtsichámëse: “Utabná, śmëbëtafjo ca.” Pero cha cmochanjáuyana, “Atśe ndoñe quetsátstatśëmbo ndëmoquënga tśëngaftanga śmomnama ca.”

<sup>26</sup> Chora tśëngaftanga śmochanjontśé ichámuana: “Acaftaca cánÿiñe fsënjase y fsënjofśé, y aca bëngbe tsáshenañe tconjabuatambá ca.”

<sup>27</sup> Pero cha cmochanjójuaye: “Ya tconjáuyana, ndëmoquënga śmomnama ndoñe tstátśëmbo ca. ¡Atśbentśana mojuánanga, bacna soyënga amënga ca!”

<sup>28</sup> “Chora chentśe puerte śmochanjenóbośachna y tsetśanama juatsaśënga śmochantsenofťëšjojnaye, Abraham, Isaac, Jacob y nÿetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chaśmojinÿe ora, y tśëngaftanga chentśana cmochtëbuacanama.

<sup>29</sup> Y shinÿe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiama Bëngbe Bëtsabe amëndayentśe.

<sup>30</sup> Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalentśa entsangbiama*  
(Mt 23.37-39)

<sup>31</sup> Jesús chë soyënga tojanëyana ora, básefta fariseunga tmojánashjajna y tmojanayana: —Muentśana motsatoñe; Herodes entseboşe aca jtsóbama ca.

<sup>32</sup> Y Jesús tojanëjua: —Motsajna y śmochjauyana chë corente studio bomná, mo tjañe mesetcă: “Minÿe, mënté y yëfse entsángbentśana bacna bayëjënga sëndëtëbuacana y śoquënga sëndáshnaye, y baseftaytesna chanjapochóca ca.”

<sup>33</sup> Pero atše šontsemna mënté y yěfse jtsayana, y baseftaytesna Jerusalenoye jana, er ndoñe tšabá ntsemnana canya Běngbe Bětsabe juabna oyebuambnayá Jerusalenentša chábuañe chaóbana ca.

<sup>34</sup> “¡Jerusalenentša entsanga, Jerusalenentša entsanga, tsěngaftanga chě Běngbe Bětsabe juabna oyebuambnayěnga jtsěbáyana, y chě Běngbe Bětsabe ichmóněngbioye ndětsbėngaca jtsatěchěnganjana jtsěbáyama! ¡Bueta soye atše sěnjábošena tsěngaftanga átšbioye júbuajama, mo canye tuamba chabe bolletotéměnga juatěngmiáša tajsoye cuaftajayecá, pero tsěngaftanga ndoñe chešmátsbošena!

<sup>35</sup> Y šmochjině, mora atše cachcá cbochanjesěnyaye, y chca, atšna enánanga cbochanjėsabashejuana, mo canye yebna cachcá tcojesonyá y énañe tcojeseboshjoncá. Y ndegombre, tsěngaftanga morscana ndoñe más atše quešmochátině; y atše šmochántině, chě: ‘¡Corente bendición bomná, Běngbe Útabnabe obenánaca tojabá ca!’ chašmojtsichamo ora ca” —Jesús tojánayana.

## 14

### *Jesús, canye uafshachanánaca šocábioye tbojanshná*

<sup>1</sup> Canye ochnayté, Jesús tojána jasama fariseungbe canye aměndayabe yebnoye; y chě fariseunga yejuana imojtserreparana, er ndayá Jesús nanjama.

<sup>2</sup> Chěntšnaca, chabe delante yojtsemna canye entsá uafshachanánaca šocá.

<sup>3</sup> As Jesús chě ley abuátambayěnga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

<sup>4</sup> Chěngna ndocá tmonjanjuá. As Jesús chě šocábioye tbojánishache, tbojanshná y tbojanियana chaotsatoñe ca.

<sup>5</sup> Y chě fariseunga tojaněyana: “¿Nda tsěngaftanguentsá, nderado chabe uaquiñá o uacná canye tboye tojtsótsatše, cachora ndoñe nanjá jetsejásęcama, masque ochnayté totsomñěse ca?”

<sup>6</sup> Y chěngna ndocá tmonjanobená cha jojuana.

### *Chě casamentoye ofjaněnga*

<sup>7</sup> Jesús tojánině ntšamo chě ofjaněnga quěfseroye imojtsachnějuana jotbiama; as měntšá chěngna tojanabuayená:

<sup>8</sup> “Canye casamentama nda chacmojojfa ora, quěfseroca ndoñe catjótbema, er nderado ině ofjaná acbiamá más uamaná ústonoye nandaboye;

<sup>9</sup> y nderado chě tsěndatbe ofjajaná nanjabo y cmajtjauyana: ‘Mua chentše chaótbema, maluaré ca’, y chora cmajtjotóca ouatjentše chafjoca jana jatótbemana.

<sup>10</sup> Chamna, nda chacmojojfa ora, chafjoca cochjótbema, chca, chě ofjajaná chaojabo ora chacmėyana: ‘Taita, quěfseroye motsěchněngoñe ca’. Y chca, aca chě chentše tmojtsetbiámaněngbiama uamaná cochántsemna.

<sup>11</sup> Er nda cachá bětsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bětsá mochanjábema ca.”

<sup>12</sup> Y chě tbojanofja entsábioynaca Jesús měntšá tbojanियana: “Fiesta chacojama o sananga chacojtsebomna ora, ndoñe cattšěbuájajana acbe amiguěnga, catšátanga, ni pamíllanga, ni acbe juachañe oyeněnga bomněnga; er chěngnaca, fiesta chamojtsebomna ora, aca cmochantětofja, y chca ya acbe uacanana soye cochántsebomna.

<sup>13</sup> Chamna, canye fiesta chacojama ora, cochjúbuaja ndbomnějéměnga, jama ndobeněnga, coshetěnga y jtaněnga,

<sup>14</sup> y aca corente oyejuayá cochántsemna; er chěngna ndoñe quemochatobeyen cachcá aca jtěttofjana, pero acna acbe uacanana soye cochántsebomna,

chë Bëngbe Bëtsabe bominjïñe tšábenga imomnënga chamojtayena ora ca” — cha tbojaniana.

*Chë bëts sanama cuento*  
(Mt 22.1-10)

<sup>15</sup> Chca tojanuena ora, canya chë mesëshentse tbemaná tojánayana: — ¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

<sup>16</sup> Chora Jesús tbojaniana: —Canye bacó canye bëts saná yojapróna y ba entsanga yojúbuaja.

<sup>17</sup> Juasama ya yojobuache ora, canye oservená ibojíchmua chë ófjanënga jáuyanama chamotsajna, ya lempe yojtseprontana ca.

<sup>18</sup> Pero chorna nyetscanga imojontsé jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.”

<sup>19</sup> Inya yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.”

<sup>20</sup> Y inya yojayana: “Cabá mora sëntsobouamá, y chë causa, ndoñe quichato-benaye jama ca.”

<sup>21</sup> Chora chë oservená yojesshécona y lempe chabe nduñbiöye ibojaue-naye. Chë nduño tša ibojtsetna, y chë oservenáböye ibojauyana: “Cam ora motsa tsashenangoye y benachëngoye, y moye cochjunatse ndbomnjémënga, jama ndobenënga, jtanënga y coshetënga ca.”

<sup>22</sup> Chentša bënëntscose, chë oservená chë nduñbiöye ibojauyana: “Bacó, ya sënjama ntšamo šconjamandacá, y cabá ínÿengbiana luare entsemna ca.”

<sup>23</sup> As chë nduño ibojauyana: “Motsa benachëngoye y betiyetemëngaca jetjaniñëngoye, y entsanga cochjautáriaye moye chamuábama, atšbe yebna chaojtjiana;

<sup>24</sup> er ndegombre cbëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnama*  
(Mt 10.37-38)

<sup>25</sup> Mallajta entsanga Jesús imojtséstoná; as cha tojanobuértana y tojanëyana:

<sup>26</sup> “Nderado nda átšbiöye tojabo, y ntšamo chabe taitá, chabe mamá, chabe shema, chabe básënga, chabe catšátanga y uabëంగా tuababuánÿeshanama, y ntšamo cachá tuenobobonshánama, atšë ndoñe más corente šontsebobonshánëse, cha ndoñe ntšobenana atšbe uatsjendayá jtsemnana.

<sup>27</sup> Y nda, atšbiana ndoñe tontseprontana jasúfriama y cruciñe jobanámnaca, y nyetsca chabe quem luare soyënga ndoñe tonjëseboshjona atšë juastama, cha ndoñe ntšobenana atšbe uatsjendayá jtsemnana.

<sup>28</sup> “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinÿama ntsachetšá crocénana chentšë yochjuába, y japochócama nyetsá crocénana tayojtsebonnama?

<sup>29</sup> Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinÿënga, muantsáfchaye y mëntšá muantsichamo:

<sup>30</sup> ‘Quemëjema jajebuama tonjontsé, y japochócama ndoñe chenatobená ca.’

31 “O ¿ndaye rey inye réyefraca jéntsama tbojotocase, natsana ndoñe nanjót'bema jajuaboyama, nderado nanjobenaye bnétsana uaranga soldadéngaftaca chë ínÿabioye jayénjanana, chë inÿa uta bnétsana uaranga soldadéngaftaca tojtsabose?”

32 Y ndóñesna, chë inye rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

33 “Chcasna, ndánaca tšéngaftanguentšá, lempe ntšamo tobomncá ndoñe cachcá tonjesonÿá, cha ndoñe ntsoebenana atšbe uatsjendayá jtsemnama ca” —Jesús tojánayana.

### *Chë tamó fténana tojtsebozna ora*

(Mt 5.13; Mc 9.50)

34 “Tamó tšabe soye endmëna; pero chë tamó fténana tojtsóbemëse, tšéngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftëna tamó tondayama ntoservénana, cachcá, chë atšbe uatsjéndayënga jtsemnama tmojtsebošënga, pero lempe jéseboshjonama ndoñe tmontseboše, cach ndoñe chama ntoservénana.

35 Chë ftëna tamó ndoñe ntoservénana ni fshantsama, ni uanguanëshama. Nÿe jtsëtšenana. Chë jouenama tmojtsobenënga, šmochjouena ca” —Jesús tojánayana.

## 15

### *Chë ótsëna oveshabiama cuento*

(Mt 18.10-14)

1 Nÿetsca chë Romocama impuesto entšángbioye atjanayënga y inye bacna soyënga amënga, Jesúsbioye imojánajna chabe palabra jouenama;

2 y chë fariseunga y ley abuatambayënga chama Jesusbiama podësca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

3 As Jesús mëntšá tojanacuntá, chënga jabuatambama:

4 —¿Nda tšéngaftanguentšá, canÿe patse oveshënga tojtsabamna, y canÿa tbojtsobuëtsëse, chë inye esconëfta bnétsana y esconëfta oveshënga shëntsjañe ndoñe cachcá nanjesënÿaye, y nanjá chë otšená jetsenguanguama candëtsónÿeñëntscuana?

5 Y tbojtsinÿena ora, oyejuayá chë oveshá jesotantšájuana;

6 y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sëntsanobuetše oveshá sëntsinÿena ca.”

7 Atše cbëyana, cachcá, celócnaca más oyejuayana jtsebínÿnana, canÿe bacna soyënga amá tšabe benache tojtishachabiama, y ndoñe nÿa yapa, esconëfta bnétsana y esconëfta tšabe soyënga amëngbiama, chë ndoñe yondujaboto bacna soyënga amana jtsajbanana ca.

### *Chë crocénana tojtsónÿena shembásabiama cuento*

8 “O mëntšá, ¿ndëmua shembása, bnétsana uámana crocénana tojtsebomna y canÿana tojtsobuëtsëse, chora ndoñe canÿe uajuinÿanësha nanjuajuinÿená, y cuedádoca chë yebna nantsetsjajo y botamana chë crocénana nantsenguango candëtsónÿeñëntscuana?”

9 Y tojtsinÿena ora, chabe amiguënga y juachañe oyena shembásënga jáchembuana, y mëntšá jáuyanana: ‘Atšeftaca móyejuanga, er chë sëntsanobuetše crocénana sëntsinÿena ca.’



10 Atše cběyana, cachcá, chě Běngbe Bětsabe angelotémengbeñe oyejuayana jtsebínynana, nýe canýe bacna soyenga amá chě tšabe benache tojtishachabiama ca” —Jesús tojánayana.

*Chě uaquiñá bacna benachiñe ayá*

11 Jesús mēntśánaca tojanacuntá: “Canýe entśá uta uaquiñata yojánabamna;

12 y canýe, chě ngomēnche uaquiñá chabe taitábioye ibojauyana: ‘Taita, atšbe otocana soyenga šmatatšetá ca.’ As chě befta lempe chě uta uaquiñata yojtjáyate.

13 “Chentśana baseftaytesna, chě más bobontse uaquiñá lempe ntśamo ibojobuachcá yojtsatobuiye y chě crocenánaca bēn luaroye yojtsoñe, y choca, cha nýe ntśamo ibojocochēngcá, mocá yojenobuiye, y chca, lempe yojtsepochoća.

14 Lempe crocénana yojtsoshañe orna, bēts shēntsana chě luarentše yojóshjango, y chě causa cha ibojotóca shēntseca jtsejétanana.

15 As, cha yojá trabajo jonguangoñama y yojínýena chě luarentša canýe entśábentše; chana, chabe jajoye ibojíchmua cotšēnga jtsanýenama.

16 Chě bobontsna yojtseboše chě cotšbe saná jtsesana, pero ndocná ton-daye ibonjanájuatśnaye.

17 “Cabana, botamana yojinýe ntśamo yojtsepasacá, y mēntśá yojenójuaboye: ‘¡Bueta trabájayēnga atšbe taitabe yebnentše bētscá saná mondětsóbomñe, y atše muentše shēntsama chanjóbana ca!

18 Chantá atšbe taitabe yebnoye y mēntśá cha chanjauyana: Taita, šmotseperdoná. Atše tijama ndayá Běngbe Bětsá ndoñe yondbošcá, y ntśamo aca ndoñe condbošcá.

19 Mora ya merecido taitatobuajoñe acbe uaquiñá jtsabáinama; nýe canýe acbe trabajayacá Diosmanda šmatofja ca.’

20 Chca jěftsenójuaboyēse, yojontśe cachabe yebnoye jtana.

“Cabá bēnoca yojtsemna ora, chabe taitá chábioye ibojinýe, y chabe uaquiñabiama ibojóngmia, y jajébenguama betscó yojá; ibojajebengo, ibojtotsejcuá y tša yojtsóyejuayayama chě uaquiñábioye ibojtámochó.

21 Chora chě uaquiñá ibojauyana: ‘Taita, šmotseperdoná. Atše tijama ndayá Běngbe Bětsá ndoñe yondbošcá, y ntśamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’

22 Pero chě Taitana chabe oservēnēnga yojámēndaye: ‘Betsco chě más tšabe entśayá mauaca y matspormanga, montšabuechětjo y matsshēcōchětjo.

23 Mora chě más minýica uacná šmochjuánatse y šmochjášhua. ¡Mochjase y mochjóboyejuaye ca!

24 Quem atšbe uaquiñá mo obanacá endánmēna y mora bēnga montsetátšēmbo cha ainá yotsomñama. Quem atšbe uaquiñá mo otšenacá endánmēna y mora tmontsinýena ca.’ Y chentśana imojontśé joboyejuayama.

25 “Chě yebnoca fiesta yojtsemnēntscuana, chě mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye.

26 As chora cha canýe oservenábioye ibojachembo y mēntśá ibojatjaye: ‘¿Ndayá bēngbe yebnentše yojtsopasana ca?’

27 “As chě oservená ibojajuá: ‘Acbe uabentsá tontashjango y chama acbe taitá šonjutarié chě más minýica uacná jáshbuama, cha tšabá tojtashjanguama ca.’

28 Pero chě uabóchena catśatna corente ibojtsetna y ndoñe yontseboše tsoye jtamashēnguana. As cach befta yojábocna chě catśátbioye jaimpádama chauatamashēnguama.

29 Chora cha chë taitábioye ibojauyana: ‘Taita, aca condétatšëmbo bueta uata cbetsajabuáchanama, nÿets tempo cbetseyeunanama, pero ndocna te ni mo canÿe chivotema chešcaisatštá atšbe amiguëngaftaca joboyeuayama.

30 Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabiamá tcojášbua ca’ –chë uaquiñá ibojauyana.

31 “Chora chë befta ibojojuá: ‘Atšbe uaquiñá, aca sempre átseftaca condétsemna y lempe ntšamo atše tsbomncá acbiámnaca endmëna.

32 Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinÿena ca.’ ”

## 16

### *Chë nduiñbe ndoñe tšabe uajabuachaná biamá cuento*

1 Jesús mëntšánaca chabe uatsjédayënga tojanacuntá: “Inamna canÿe bomna entšá, y cha ibnabomna canÿe uajabuachaná chabe soyënga chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama.

2 Asna, chë nduiño ibojachembo y mëntšá ibojauyana: ‘¿Ntšamo acbiamá šmontsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inÿená quecochátsmëna ca.’

3 Chë uajabuachaná yojontsé jenójuaboyana, y mëntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntsëuatja.

4 Ya sëntsetatšëmbo ndayá chjama, chca, atšbe trabajuentšana chašojtábocna ora, atše jtsabamnama ndëmuanÿenga chëngbe yebnentše chašmofjama ca.’

5 “Chentšana, canÿánÿa chë chabe nduiñbioye ndebënénga yojáchembo. Cánÿabioye ibojatjaye: ‘¿Ntsachetšá atšbe nduiño icondebena ca?’

6 Y cha ibojojuá: ‘Canÿe patse barrilëšangá aceitiye ca.’ As cha ibojauyana: ‘Muentše acbe recibëcha entsamna; mora mótbema y inÿácha nÿe shachna bnëtsana barrilëšangama matapormá ca.’

7 Chentšana inÿabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canÿe patse medida trigo ca.’ As cha ibojauyana: ‘Muentše acbe recibëcha entsamna; chiñe nÿe posufta bnëtsanama mábema ca.’

8 Chentšana, chë nduiño tšabá yojayana chë ndoñe tšabá ama mayordombiamá, cha stúdioca yojamama. Chë nÿe quem luarama enójuabnaye entšanga, cachëngbe soyëngaca puerte studio bomnénga mondmëna; y chë entšangbe juabnénga binÿnayábenga ndoñe nÿa yapa ca.

9 “Atše cbabuayená, quem luarentše, chë bacna soyënga amëngbe luarentša bomnánaca amiguënga šmochjábiamá, inÿenga jtsëjabuáchanëse. Chca, chë bomnana tojtsopochocá ora chašmotsabamna ndëmuanÿenga chë nÿetsca tescama oyenoye chacmúbujama ca.

10 “Nda básefta soyënguiñe lempe tšabá tojama, bëtská soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtská soyënguiñnaca cach ndoñe tšabá queochatsma.

11 Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye?

12 Y chë ndoñe tšëngaftangbe sóyeca ndoñe tšabá šmonjamëse, ¿nda cmoch-jantšabuáchiye ndayá tšëngaftangbiamna yomncá ca?

13 “Ndocná ntsoybenana uta mandayata jtsaservénana; er cánÿabioye bochantšáboyënja y chë ínÿabioyna bochantšebobonshana, o cánÿabiamna tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobotshánana, nÿe quem luarentša soyënga jtsebomnama tcojtsebošëse ca” —Jesús tojánayana.

14 Chë fariseunga, becá crocénana jtsebomnama bošënga imnamna, lempe chca chënga tmojanuena, y Jesúsbiioye imojtsáboyejuana.

15 As Jesús tojanëyana: “Tšëngaftanga entšangbe delante mo tšábenga cuaftsemncá jtsebotiamnayana, pero Bëngbe Bëtsá endétatšëmbo ndayá tšëngaftangbe ainaniñe yomnama; er ndayá entšanga más tojtseboščá, Bëngbe Bëtsá jtsáboyënjana ca.

### *Moisesbe ley y Bëngbe Bëtsabe amëndayana*

16 “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuyaiyná chë tšabe noticiënga Bëngbe Bëtsabe amëndayocama, y nÿetscanga tša montseboše choye jamashënguama ca.

17 “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” —Jesús tojánayana.

### *Ndayá Jesús tojanabuatambá chë bouamnënga tmojtseñtšenama (Mt 19.1-12; Mc 10.1-12)*

18 “Nda chabe shëmbioye cachcá tbojesonÿá y ínÿaftaca tojtóbouamase, cha chë natsana shëmbioye ínÿaftaca jtseíngñayana; y nda chë útsena shembásaftaca tojobouamá chana, canÿe uabuatmá jtsebomnana, y chca, chana canÿe bacna soye jtsamana ca” —Jesús tojánayana.

### *Chë bomná y chë ndbomnëjema Lázaro*

19 “Canÿe bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëts fiestënga yojánama.

20 Canÿe ndbomnëjémnaca inamna, Lázaro ca uabainá, bacna nguayanánaca šocá; y cha yojanamana chë bomnabe bësásentše fshantsiñe jótbemana.

21 Quem ndbomnëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfuama.

22 Canÿe te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infiernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna.

24 As chë bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’

25 Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojaboščá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënnana contsebomna.

26 Y inÿe soye, canÿe bÿets tũañe entsemna tÿÿengaftangbiocana mÿentscoñe; chca, chÿe tÿÿengaftangbioye muentÿana jenachnÿenguama tmojtseboÿÿenga ndoñe chamondÿetsobena, ni chocana bÿengbioye cach ndoñe ca.'

27 "Y chÿe bomná ibojauyana: 'Masque chca, Taita Abraham, Diosmanda Lázaro michmó atÿbe taitabe yebnoye;

28 choca sÿendábamna shachna catsátanga; as chaúyana ntÿsamo moca atÿse stsepasana y ntÿsamo jamÿese chÿenga ndoñe chaondÿetsamna quem ngmÿÿenga luaroye jabama ca.'

29 Chora Abraham ibojauyana: 'Chÿenga ya mondbomna ndayá Moisés y chÿe Bÿengbe Bÿetsabe juabna oyebuambnayÿenga tmojÿÿtsaná bema soyÿenga; ÿchÿengbioye chamoyauná ca!'

30 Chÿe bomná ibojojuá: 'Ndoñe, Taita Abraham; nderado obanÿenguentÿana canÿa chÿengbioye tojase, aíñe chÿe tÿsabe benache muantishache ca.'

31 Pero Abraham ibojauyana: 'Chÿenga ni mo Moisés, ni chÿe Bÿengbe Bÿetsabe juabna oyebuambnayÿengbioye ndoñe tmonjóyaunase, Bÿengbe Bÿetsábeñe ndoñe quemochatoÿÿbuáchiye, masque canÿe obaná chauatayenÿese, chÿengbioye jábuayenama ca' " —Jesús tojancuentá.

## 17

### *Resjo yomna, nderado bacna soyÿenga cuanjama* (Mt 18.6-7, 21-22; Mc 9.42)

1 Jesús chabe uatsjÿendayÿenga tojanÿyana: "Sempre echanjÿÿtsemna juabnÿenga bacna soyÿenga jamama; pero, ÿtsa lastema chÿe entÿsabiama ndabe causa ínÿyenga bacna soyÿenga tmojama!

2 Más tÿsabá chabiama nántsemna canÿe nantsnÿébé chamotsetamoÿÿÿntÿsbua y mar béjayoye chamotsashbuetÿse, y ndoñe chÿe canÿa Bÿengbe Bÿetsábeñe oÿÿbuachiyá bacna soye chaomama juanatsana.

3 Cuedado ÿmochtsebomna.

"Acbe catsáta bacna soye tojamÿese, cochjuácacana; y yochtsajbaná ca cha tojayanÿese, cochtseperdóna.

4 Masque nÿe canÿe te, canÿsÿÿfta soye ntÿsámnaca tcmojaborlá, y canÿsÿÿfta soye 'chca ndoñe más quebochatsbórla ca' tcmojauyanÿese, aca cmontsemna cha jtseperdónana ca" —Jesús tojánayana.

### *Bÿengbe Bÿetsábeñe jtsoÿÿbuáchiyÿese, corente obenana jtsebomnana*

5 Chÿe uatsjÿendayÿenga Bÿengbe Utabnábioye tmojanियana: —Oÿÿbuáchiyana ÿmababuaté ca.

6 Y chÿe Utabná tojanÿjua: —Tÿÿengaftanga oÿÿbuáchiyana, batsatema masque nÿe mo mostaza jenaycá ÿmojtsebomnÿese, quem sicomoro betiyoye ÿmatjauyana: "quemuentÿana mojashtse y mar béjayoca mojó ca", y quem betiye chca nanjama ca.

### *Chÿe oservená ndayá ibomna jamana*

7 "Nderado canÿa tÿÿengaftanguentÿsá canÿe bochichnayá tbojtsebomna, cha jajocana tojtashjango jajañe arayocana o uacnÿenga anÿenocana, ¿chábioye bochjauyana: 'Matabo y mabose ca'?

8 Ndoñe, chamna mÿentsá bochanjauyana: 'Jetiñe juasama cochjuábua, y moprontá atÿse jaserviama atÿse candÿese y candofÿÿentscuana; y chentÿsana aca cochjase y cochjofÿÿiye ca.'

9 Y chÿe bochichnayábioye ndoñe quebochtÿÿtschuaye ndayá tbojuatariecá cha tojamama.

10 Tšëngaftágnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ —Jesús tojánayana.

*Jesús, bnëtsanënga bacna nguayanánaca šoquënga tojanashná*

11 Jerusalenoje benache, Jesús tojánachnëngo Samaria y Galilea luarëjana.

12 Y canÿe pueblotémoye tojánashjango ora, bnëtsana boyabásënga bacna nguayanánaca šoquënga chábioje tmojána; chábentsana bënoca chënga tmojanouedá,

13 y mëntšá imojtsáyebuache: —¡Jesús, Buatëmbayá, šmotsalastemá ca!

14 Jesús chënga tojánanÿe ora, tojanëyana: —Jerusalenoca bachnángbioje motsajna, y chënga šmochjínÿanÿiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye.

15 Canÿa chënguentsá, shnaná yojtsemnama tojáninÿe ora, yojeshëcona Bëngbe Bëtsábioje jabuache atschuanaye;

16 y Jesusbe delante yojoshëntsamentsiye, jubiaca fshantsóntscoñe yojotsejbéna, y chábioje ibojtsatschuanaye; y chë boyabásana Samarioca entšá inamna.

17 Chora Jesús tbojanianyana: —Bnëtsanënga mondmëna chë shnánënga tmontoquedanga. ¿Ndayentse chë inÿe esconëftanga imojtsemna?

18 ¿Nÿe quem boyabása, inÿe luarocana ashjanganá, tojeshëcona Bëngbe Bëtsá jëtschuayama? ¿Ndáyeca chë ínÿenga ndoñe ca?

19 Y chë entšábioje tbojanianyana: —Matëtsbaná y motsatoñe; Bëngbe Bëtsábeñe aca icošbuachéyeca shnaná contsatmëna ca.

*Ntšamo Bëngbe Bëtsabe amëndayana yochjóshjango*

*(Mt 24.23-28, 36-41)*

20 Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quemochatobenaye chca jinÿana.

21 Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

22 Jesús chabe uatsjëndayënga tojanëyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango.

23 Chora báseftanga mochántsihomo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto.

24 Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te.

25 Pero natsana cha bontsemna puerte jasúfriana, y morsca entšangbiana uabotená jtsemnana.

26 “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora.

27 Chë tempo, entšanga imnasaye, imnofšësnaye, imnóbouamnaye; natjëmbana imojtsiyeñe, y chca, natjëmbana imojtsomñe, Noé chë



barquëshoye tojánamashënguëntscuana; pero chora uabouana uaftena tojánashjango y chë entsanga tojtsanapochocá.

<sup>28</sup> Cachcá ntšamo Lot yojaniyena ora tojanopasacá: entsanga imnasaye, innofšëšnaye, innóbouamnaye, imojtsena, sananga innajena y innaje-buana;

<sup>29</sup> pero Lot Sodoma bëts pueblentsana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entsanga tojtsanapochocá.

<sup>30</sup> Cachcá echántsemna chë Bëngbe Bëtsá Entšá tbojanbemá chaojtonýná ora.

<sup>31</sup> “Chë tena, nda cachabe yebnentša tsbanánoca chaojtssemna, y chabe soyënga cach tsoca tojtsebomněse, chocana ndoñe chaondétastjango chë soyënga jesabobocnama; y nda jajoca chaojtssemna, yebnoye ndoñe chaondëta.

<sup>32</sup> Menójuabonga ntšamo Lotbe shémaftaca tojanopasama.

<sup>33</sup> Nda tojtsentšena quem luarentše bëtská jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebomna.

<sup>34</sup> “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe jutsnéshañe bochántsemna; canýa mochanjesbetše y chë ínýana ndoñe.

<sup>35</sup> Uta shembásata cánýiñe bochántsejanýcoye; canýa mochanjesbetše y chë ínýana ndoñe.

<sup>36</sup> Uta boyabásata jajoca bochántsetrabajaye; canýa mochanjesbetše y chë ínýana ndoñe ca” —cha tojanéyana.

<sup>37</sup> Chora chë uatsjédayënga Jesús tmojantjá: —Utabná, ¿ndëmoca chca yochjopása ca?

Y cha tojanjúá: —Chë obanabe cuerpo tojtsemnentše chë gallinacënga jojotana ca.

## 18

### *Chë viudá y chë mandadbiama cuento*

<sup>1</sup> Jesús mëntšá tojanacuntá, entsanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebomnama ndocna te ntjajbanacá.

<sup>2</sup> Mëntšá tojánayana: “Canýe pueblentše canýe mandado inamna; chana ni Bëngbe Bëtsábioye ndoñe bonjánebiauatja, ni entsanga yonjánayaunana.

<sup>3</sup> Chë pueblentše canýe viudánaca inamna; chana canýe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’

<sup>4</sup> Bayté chë mandado ndoñe yonjábošena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entsanga ndoñe quetsátayaunana,

<sup>5</sup> pero quem viudá cada ora endabó causa, aíñe chanjóyeunaye, chabe uayayá chanjacastíga; ndoñesna cada te nandaboye y cabana ya šochanjamëntša ca.’ ”

<sup>6</sup> Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá.

7 Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana?

8 Atše cbéyana, Bëngbe Bëtsá betesco tšëngaftanga cmochanjátsebacaye, tšëngaftanga chë ínÿengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entsanga yochjánÿena ca?” —Jesús tojánayana.

### *Chë fariseo y chë Romocama impuesto atjanayabiama cuento*

9 Báseftanga imojtsanjuabná chënga tšabe entsanga imnamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama:

10 “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entsángbioye impuesto atjanayá.

11 Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënama: atbëbanënga, puerte bacna soye amënga y shémbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama.

12 Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentsana, bnëtsanentsana canÿe soye acbiamana sëndëquëcjná ca.’

13 Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’ ”

14 Chentsana Jesús tojánayana: “Atše cbéyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

### *Jesús, basetémëngbiama Bëngbe Bëtsábioye tbojanimpadá*

*(Mt 19.13-15; Mc 10.13-16)*

15 Entšanga imojanamana Jesúsbioye basetémënga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjëndayënga chca tmojáninÿe ora, tmojanontšé chë basetémënga unachayënga jtsëcácanana.

16 Pero Jesusna chë basetémënga tojánachembo, y mëntšá tojánayana: “Cachcá mónÿaye chë basetémënga átšbioye chamuabo, y ndoñe matëuyanana; er Bëngbe Bëtsabe amëndayana endmëna chë mo quem basetemëngcá imomnëngbiama.

17 Ndegombre cbéyana, nda Bëngbe Bëtsabe soyënga ndoñe tonjójyëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

### *Canÿe bomna entsá Jesúsbioye tojána*

*(Mt 19.16-30; Mc 10.17-31)*

18 Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

19 Y Jesús tbojanjá: —¿Ndáyeca šcjauyana “tšabia ca”? Tšabia nÿe canÿa endmëna: Bëngbe Bëtsá.

20 Aca condétatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, ínÿa ndoñe catjóba, ndoñe catjatbëba, ndoñe catjuaboínÿena y acbe bëtsëtsata ndoñe stëtšoye catjáquedaye ca.”

21 Chora chë boyabása tbojanjuá: —Atše lempe chca básietema orscana sëndocumplina ca.

22 Jesús chca tojanuena ora, tbojaniyana: —Cabá canye soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnjémënga cochtsatsataye; chca, celoca canye bëts bomnana cochántsebomna. Chentsana, cochjabo y šcochjuasto ca.

23 Chë entšá chca tojanuena ora, puerte ngménaca yojtsemna, er cha corente bomná inamna.

24 Chca ngmená tbojáninye ora, Jesús tojánayana: —¡Yapa totcá bomnëngbiamana entsemna Bëngbe Bëtsabe amëndayoye jamashënguama!

25 Ndegombre, más paselo endmëna canye camello chë coshuffjentša atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

26 Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

27 Y Jesús tojanëjua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

28 Chora Pedro, Jesúsbioye tbojaniyana: —Bëngbe Utabná, aca contsonyá, bënga lempe chë fsëndbomna soyënga fsënjéseboshjona, y ácaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábioye jaserviama, chabe amëndayama jtsabuayiynayëse, cachcá tojëftseboshjona chabe yebna, shema, catšátanga, bëtsétsanga o básenga,

30 cha mora quem luarentše chë soyëngama más echanjóyëngacñe, y chë inye luarocna, chë nyetsca tescama yomna tšabe vida ca.

### *Jesús cachiñe tojánayana cha jóbanama y jtayenama*

*(Mt 20.17-19; Mc 10.32-34)*

31 Jesús chabe bnétsana uta uatsjëndayënga barie tojánachembo, y mëntšá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiamana tmojanabemcá;

32 er choca cha chë ndoñe judiëngbe cucuatšinë mochanjáboshjona, y mochantšáboyejuana, mochanjóyenguango, mochantsebuashëttoj;

33 y chamojátjanjentšana, mochanjóba, pero unga tianoye cha echántayena ca.”

34 Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtsëtsëtsnacá, er chëngbiamana yojamna josértama ndopodena soyënga.

### *Jesús, Jericó puebloca canye jtanábioye tbojanshná*

*(Mt 20.29-34; Mc 10.46-52)*

35 Tojanopasá, Jesús Jericó puebloye yojtsebéconaye ora, canye jtaná benache juachañe inatbemana, lemošna otjanañe.

36 Entšanga chëjana imojtsachnëjuanama tojanuena ora, yojanotícia ndayá yojtsopasana ca,

37 y chë entsanga tmojaniyana, —Jesús Nazaretocá entsebeconá ca.

38 As cha yojontsé uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajnënga chë jtaná imojtsácacana, iytëca chaóbmama; pero cha más yojtsáyebuache: —¡Davídbentšana Entšá, šmotselastemá ca!

40 As Jesús tojantsá y tojanmandá cha chamobetsama. Cha ya bécoñe yojtsemna ora, Jesús tbojantjá:

41 —¿Ndayá cojtseboše atše acbiamana chjamama ca?

Y chë jtaná tbojanjuá: –Atšbe Utabná, atše séntseboše chašuatábínýnama ca.

<sup>42</sup> Chora Jesús tbojaniana: –Matinýe, Bëngbe Bëtsábeñe betsošbuachéyeca shnaná contsatsmëna ca.

<sup>43</sup> Y cachora cha tšabá ibojtabinýna, y Jesúsbioye ibojtséstoná, Bëngbe Bëtsá atschuanaye. Y nyetsca entšanga, chca tmojáninýe ora, Bëngbe Bëtsá imojtsatschuanaye.

## 19

### *Jesús y Zaqueo*

<sup>1</sup> Jesús Jericó puebloca tojánashjango ora, chë pueblëjana cha yojtsachnëjuana.

<sup>2-3</sup> Chora, canýe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bëtscá entšanga causa y cha becuá inamna causa.

<sup>4</sup> Chcasna, cha betsco natsanoye tojaftsánótjajo y canýe sicomoro betiyeshoye tojánashjango, chca, Jesús chëjana tojtsachnëjuana ora, jinýama jobenayama.

<sup>5</sup> Jesús chë betiyeshoye tojánashjango ora, tsbanánoye tojanontjeshé y Zaquéobiyye tbojáninýe. As Jesús tbojaniana: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betsco tojtánastjango y chentšana puerte oyejuayá Jesúsbiyye tbojanofja.

<sup>7</sup> Entšanga chca tmojáninýe ora, tmojanontsé Jesusbe contra mëntšá ichámuana: “Jesús tonjá canýe bacna soyënga amabe yebnentše jatema ca.”

<sup>8</sup> Chora Zaqueo tojantsá, Bëngbe Utabná Jesús bentše, y mëntšá tbojaniana: –Mouena, atšbe Utabná, atšbe bomna soyënguentsana tsëntsañe ndbomnjëmënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

<sup>9</sup> As Jesús tbojaniana: –Mënté, aca acbe bacna soyënguentsana atsbocaná contsemna, er Zaqueo, ácnaca Abrahámbentsana entšá condmëna.

<sup>10</sup> Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguanguama y jabátsebacama ca.

### *Chë crocénanama cuento* (Mt 25.14-30)

<sup>11</sup> Entšanga chë soyënga imojtsuenana, y Jesús inýe soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

<sup>12</sup> Jesús tojanéyana: “Canýe luarentša uámana entšá inýe bën luaroye yojá, cachabe luarentša rey chamobemama y chentšana cachábiyye jtama.

<sup>13</sup> Cabá nda ora, chabe bnëtsana oservénënga yojáchembo y bëtscá crocénana cada cánýabiyye yojëftsayentšbuachiye, y mëntšá yojëftséyana: ‘Quem crocénanaca trato šmochjábema atše candëtabëntscuana ca.’

<sup>14</sup> Pero cachabe luarentša entšanga cha imojuáya, as chëngna básefta entšanga imojichamuá chë inýe bën luaroca mëntšá chamuayanama: ‘bënga ndoñe queftsátšboše cha bëngbe rey chaotsemnama ca’.

<sup>15</sup> “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetšá cada ona chë crocénanaca yojongánama.

<sup>16</sup> Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’

17 Y chë rey ibojojuá: ‘Tša tšabá, tšabe oservená. Aca quem base soyiñe ntšamo tchojmandacá tšabá tcojámayeca, bnëtsana pueblentša mandado chacotsemnama chojayé ca.’

18 Chentšana inya yojáshjango y yojayana: ‘Taita, acbe crocénana shachna soye más tonjoboté ca.’

19 Y chë rey ibojauyana: ‘Acnaca shachna pueblentša mandado cochántsemna ca.’

20 “Chorna inya yojobeconá y mëntšá yojayana: ‘Taita, muentse acbe crocénana entsatsmëna; canye pañueléjuañe bonguana sëntsejajo.

21 Atše acbiama uatjana šonjuábuache, er aca canye tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’

22 As chë rey ibojauyana: ‘Bacna oservená, cach acbe palabrëngaca chanjínyaníye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatsëmbëse,

23 ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, maštoyé chë crocénana y chë chentšana tojoboté crocénanënaca ca?’

24 Y chë chentše imojtsemna entsanga yojáuyana: ‘Chë crocénana motseboca y chë bnëtsana soye más tojabotébioye chana motsatšetá ca.’

25 As chënga imojojuá: ‘¡Pero cha ya bnëtsana soye más entsebomna ca!’

26 Y chë rey yojójuá: ‘Atše cbëyana, nda tojtsebomnábioye, más mochanjátsetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca.

27 Y chë atše uayayënga, chë chëngbe rey atše chaitsemnama ndoñe monjánbošëngna, moye mënatsé y atšbe delante šmochtsëbaye ca’ ” —cha chora yojayana.

### *Jesús Jerusalenoye tojánashjango*

*(Mt 21.1-11; Mc 11.1-11; Jn 12.12-19)*

28-29 Chca tojëftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó,

30 mëntšá jáuyanëse: “Tsëndatbe natsana entsemna base pueblotémoye mot-sata. Chašojáshjango ora, canye burrotema utsbuaná šochanjínjena. Chábeñe cabá ndocná tonjenuoyé. Sochjuajafjoná y šochjuánatse.

31 Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

32 Chë uatsjëndayata tbojána y lempe ntšamo Jesús tojanëyancá tbojáninjena.

33 Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

34 Chora chata tbojánayana: —Bëngbe Utabná bontsajabótoyeca ca.

35 Chentšana Jesúsbioye chë burrotema tmojanánatse, y chë burrotémbeñe chatbe entsáyá tbojanájtse, y chábeñe Jesús tmojanenjayé.

36 Y cha yojtsachnějuana ora, entsanga chëngbe entsáyá benachëjana imojtsëtëtsatsana.

37 Olivos tjashe tsmanoye yojtsebeconá ora, chë bëtská entsanga, Jesúsbeñe ošbuáchiyënga, tmojanontšé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama.



<sup>38</sup> Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

<sup>39</sup> Chë entsanguentše básefta fariseunga imojtsemnënga, Jesús tmojanianyana: —Buatëmbayá, acbe ústonënga mécácana chca ndoñe chamondëtsáyebuachama ca.

<sup>40</sup> Pero Jesús mëntšá tojanējua: —Ndegombre cbéyana, mënga iytëca tmojobiamëse, chë ndëtsbënga muanjuayebuáchena ca.

<sup>41</sup> Jesús Jerusalén béconana tojánashjango, y chë bëts pueblo tojáninýe ora, chentša entsangbiama tojánenobošachna.

<sup>42</sup> Y mëntšá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëitëmena.

<sup>43</sup> Er Jerusalenoca bacna tenga echanjóshjango; chora uayayënga chentša shëconánëjana canýe tapiëse mochantsepórma, mochantsejëtja y nýetsca juachocana mochanjontšë tšëngaftanga jtsatsejana,

<sup>44</sup> y lempe mochantseepochóca. Muentša oyenënga mochantšëbaye, y ni mo canýe ndëtsbé inýebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

*Jesús, Bëngbe Bëtsabe bëts yebnentsana enënga y obuámnayënga tojtanëbuacna (Mt 21.12-17; Mc 11.15-19; Jn 2.13-22)*

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontšë chë chentše imojtsenënga chentšana jtëbuacnana,

<sup>46</sup> y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átšeftaca encuëntaye yebna ca’, pero tšëngaftangna, atbëbanëngbe oyeniñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentše Jesús entsanga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana.

<sup>48</sup> Pero ndoñe tmonjáninýena ntšamo, er nýetsca entsanga corente imojtseyeunana ntšamo cha yojtsoyebuambnacá.

## 20

*Jesusbe obenana*

*(Mt 21.23-27; Mc 11.27-33)*

<sup>1</sup> Canýe te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiyiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánýiñe;

<sup>2</sup> y Jesús tmojanianyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatsetá ca?

<sup>3</sup> Chora Jesús tojanējua: —Atšnaca canýe soye sëntsebmna tšëngaftanga jatjayama. Smochjojuanga.

<sup>4</sup> ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca?

<sup>5</sup> Chora chënga tmojanontšë enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

<sup>6</sup> Y ndoñe quemuátobena jayanana ‘entsanga ca’; entsanga ndëtsbéngaca buattsëbaye, er nýetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.”

<sup>7</sup> Chcasna, chënga tmojanjuá ndoñe monjántatsëmbo nda Juan tbojanichmó entsanga jubáyama ca.

<sup>8</sup> Y Jesús tojanëyana: —Asna atse cach ndoñe quebochatëyana ndaye deréchoca chca stsama ca.

*Chë puerte bacna trabájayëngbiama cuento*  
(Mt 21.33-44; Mc 12.1-11)

<sup>9</sup> Chentšana Jesús tojanontsé entsanga jáuyanana, y quem cuéntoca tojanabuatambá: “Canÿe entsá uvas betiyënga yojáje y chë fshantse inÿe trabájayënga yojúyentsame, y baytescama bën luaroye yojtsoñe.

<sup>10</sup> Chë uvasësangá juashacama tempo yojobuache orna, chë jajañe nduiño canÿe oservená ibojícmua chë trabájayënga jáuyanama ntsachetsá cha ibojtso-tocánama. Pero chëngna cha imojtsejantsetaye, y tondaye ntoyiyá imojtichmuá.

<sup>11</sup> Chentšana inÿa ibojícmua; pero chë trabájayënga cha imojtsejantsetaye, imojtsóyenguango, y tondaye ntoyiyá imojtichmuá.

<sup>12</sup> Chë nduiño inÿa ibojatichmuá; pero chánaca chënga imojtsejantsetaye, imojtselisia, y chentšana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeunaye ca.’

<sup>14</sup> Pero chë trabájayënga, chë uaquiñá imojinÿe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquéda ca.’

<sup>15</sup> Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca?

<sup>16</sup> Cha co echanjá y chë trabájayënga echanjetsëbaye, y chë uvas betiyënga jajañe inÿe trabájayënga echanjárrendaye ca.

Chë entsanga chca tmojanuena ora, tmojánayana: —¡Bëngaftaca ndocna te chca chaondopasá ca!

<sup>17</sup> Pero Jesús tojanënÿanÿé y tojánayana: —As ¿ndayama Bëngbe Bëtsabe uabemana palabrënguiñe iuayana?:

Chë yebna jebuanënga tmojtsanaboté ndëtšbé, mora chë más bëts uashacuanësentse entsejájona ca.

<sup>18</sup> Ndánaca chë ndëtšbeñe chaojotsatsá, chëbé bochántsatsacaye; y chë ndëtšbé ndábeñnaca chaojótatsë, polvëshe bochántsebema ca —Jesús tojánayana.

<sup>19</sup> Chë bachnangbe amëndayënga y ley abuatambayënga tmojanenótatsëmbona Jesús chca tojanacuntá jinÿanÿiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entsangbiama imojtsauatja.

*Chë Romoca bëts mandadbiama impuesto jtsatsquëcjnyama*  
(Mt 22.15-22; Mc 12.13-17)

<sup>20</sup> Chentšana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama.

<sup>21</sup> As chënga tmojantjá: —Buatëmbayá, bënga fsëntsetatsëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y achiamo tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá.

22 Chcasna, šmėyana, ųtšabá tayojtsemna bėnga, César, chė Romoca bėts mandadbiama, impuesto jtsatsquėcjayana o ndońe ca?

23 Jesús yojtsetátšėmbo, ntšamo cha tojayanińe jisháchichiyama chėnga imojtsebošama; as tojanėyana:

24 –Chė šmatsquėcjayá crocėnana šminyinyėnga ca; ųndabe jubiá chė crocėnanińe yojtsemna, y ntšamo muentše entsabemancá nda chca iuabaina ca? Y chėnga tmojanjuá: –Césarbe jubiá; cha chca enduabaina ca.

25 Y Jesús tojanėyana: –César šmochtoyiye cha ibotocana soye; y Bėngbe Bėtsana cha ibotocana soye ca.

26 Y chca, chė ichmónėnga ndońe imonjobenaye jisháchichiyana, ndayá cha entsangbe delante tojayanińe. Masna, ntšamo tojanėjuama, ojnánánėnga iytėca imojbiama.

*Obanėnga jtayenama Jesús tmojantjá*  
(Mt 22.23-33; Mc 12.18-27)

27 Chentšana, básietanga saduceo ca uabaina entsanga tmojána Jesús jinỹama. Chėnga imojanjuabná obanėnga ndocna te ntayenana ca. Jesús mėntšá tmojantjá:

28 –Buatėmbayá, Moisés bėngbe leyėnguińe tojėftsanabema, nderado canỹe boyá tojtsóbana y básėnga ndońe tonjėftsabáshejuanėсна, canmėna chė uabentsá chė shėmaftaca jtobouamayana, chca, chė chabe uabochėná obanabiama básėnga jtsabamnama ca.

29 Chcase, canỹe bėngbentše canỹsėfta catsátanga monjamna. Chė natsaná tonjanobouamá y tontsanóbana, básėnga ntjėftsabashejuancá;

30 chentšana chė inỹa chė shėmaftaca tonjanobouamá, y cachcá tonjanopasá.

31 Chė inỹe uabentsá chora cháftaca tonjanobouamá, pero tontsanóbana básėnga ntjėftsabashejuancá; y cachcá, chė inỹe uabentsėngnaca cháftaca tmonjanobouamá, pero nyetscanga tmonjanóbana básėnga ntjėftsabashejuancá.

32 Cabana, chė shembásanaca tontsanóbana.

33 Y chcasna, chė obanėnga chamojtayena ora, ųndabe chė canỹsėfta catsatanguentsabe shema chė shembása yochtsemna, nyetscanga cháftaca tmojanobouamase ca? –chėnga tmojantjá.

34 Chora Jesús tojanėjua: –Quem luarentše boyabásėnga y shembásėnga mondbėtsobouamnaye;

35 pero chė echanjóshjango luaroye jama y obanėnguentšana jtayenama merecido jtsebuájonama chamojobenangna, masque boyabásėnga o shembásėnga, ya ndońe quemochatóbouamnaye,

36 ni queochátotopodena chėnga chamóbanama, y chca, chėnga mochántsemna mo angelėngcá, y Bėngbe Bėtsabe básėnga mochántsemna, obanėnguentšana mochayėnayeca.

37 Y Moisésnaca, chė yojtsángbototjuana betiyetėmama tojanábementše, bėnga šontsinỹanỹná chė obanėnga imnátayenama; chentše Bėngbe Bėtsá tojánayana cha yomna Abraham, Isaac y Jacobėbe Bėtsá ca.

38 Bėngbe Bėtsá chca tojánayana ora, entsichamo cha ndońe yondmėna obanėngbe Bėtsá, sinó aina entsangbe Bėtsá ca, er masque chėnga tmojanóbana, chėnga cabá Bėngbe Bėtsáftaca mondoyena ca –Jesús tojánayana.

39 Chora básėfta ley abuatambayėnga Jesús tmojanियana: –Buatėmbayá, tšabá tcjayana ca.

40 Y ya ndońe más montsenńėmua inỹe soyėngama jatstjanayana.

*¿Cristo ndabe entsábentšana yomna?*

*(Mt 22.41-46; Mc 12.35-37)*

<sup>41</sup> Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davídbentšana iuabó ca?

<sup>42</sup> Er cach David, chabe librëšaňe Salmos ca uabainëšaňe, tojánayana: Bëngbe Bëtsá, atšbe Utabná Crístbioye tbojaniyana:

‘Atšbe catšbioica mótbema,

<sup>43</sup> atšbe obenánaca, acbe uayayënga acbe cucuatšinë chamoquedama ch-jamëntscuana ca.’

<sup>44</sup> ¿Ntšámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

*Jesús chë ley abuatambayëngbiama tojánayana chënga ndoňe tšabá montsama ca*

*(Mt 23.1-36; Mc 12.38-40; Lc 11.37-54)*

<sup>45</sup> Nÿetsca entsanga imojtsuenana, y Jesús chabe uatsjëndayënga tojanëyana:

<sup>46</sup> “Cuedado šmochtsebomna, y ndoňe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenaňe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguïňe jtsetbiámanana, y fiestënguïňe nÿa quëfseroca.

<sup>47</sup> Pero chë viudángbioye chë tmobomna soyënga jtsabacayana; y entsangbe delante tšabá chacmotsënyama y chënga imojtsaíngñama ndoňe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

## 21

*Jesús yojtsënyaye chë crocénana quëcjnyënga*

*(Mc 12.41-44)*

<sup>1</sup> Bëngbe Bëtsabe bëts yebnentše, Jesús yojtsënyaye chë bomnënga crocénana jtsequëcjnyana chë crocénana quëcjnyëtémiňe;

<sup>2</sup> y canÿe viudá ndbomnëjémnaca tbojáninÿe, uta crocénana chëtémiňe yojaftseseğóra.

<sup>3</sup> Chora Jesús tojánayana: “Ndegombre cbëyana, quem viudá ndbomnëjema, Bëngbe Bëtsabiama nÿetscangbiama más becá tonjëftseseğorá;

<sup>4</sup> er nÿetscanga tmonjëftseseğorá chë yojtsóyentsjamentšana, pero chana, masque tša ndbomnëjema, cha vida jtsebomnama lempe ntsachetšá yobomncá tonjëftseseğorá ca.”

*Jesús tojánayana Bëngbe Bëtsabe bëts yebna lempe mochjápochocama*

*(Mt 24.1-2; Mc 13.1-2)*

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtsbéngaca y chë entsanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana:

<sup>6</sup> —Canÿe tempo echanjóshjango, y lempe ntšamo mora muentše šmontsonÿacá tondaye queochatoquëda, ni mo canÿe ndëtsbé ínÿebé juatsboye. Lempe mochantsepochóca ca.

*Ntšamo yochtsemna quem luare jopochócamá te chaojtsobeco ora*

*(Mt 24.3-28; Mc 13.3-23)*

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

8 Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye.

9 Y tšëngaftanga, entšanga imojtsentsjanama y entšanga mandadëngbe contra imojtsemnama chašmojtſuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

10 Y mëntšánaca Jesús tojanëyana: “Canÿe luarentša entšanga, inÿe luaroca entšángaftaca mochántsentsjanaye; y canÿe amëndayábentša entšanga, inÿe amëndayábioca entšangaftácnaca.

11 Ba luarënguïñe jabuache echanjuangmëmëmana, bëts shëntsana, y entšanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entšanga jinÿanÿiyama quem luare ya yochtsopochócama.

12 “Pero cabá ndoñe chca chaondochnëngo ora, tšëngaftanga cmochanjishëche y chašmosufrima mochántsama; bënga judiëngbe enëfjuana yebnëngoye cmochanjunatse játsetšenama y cárceloyñaca cmochanjútame, y reyënga y mandadëngbióynaca cmochanjunatse, atšbe ústonënga bëtsemna causa.

13 Chca šmochanpapása, ntšamo atšbiana šmotatšëmbcá chënga chašmëyanama.

14 Natsana ndoñe šmatjátsjuabnaye jenëuyanama ntšamo chora jóyebuambayana,

15 er atše chanjama puerte tšabá y osertanáncaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye.

16 Pero uayayëngbe cucuatšinë cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentšana báseftanga cmochantsëbaye.

17 Y nÿetsca entšanga cmochantsëbuayënja, atšbe ústonënga bëtsemna causa.

18 Pero tšëngaftangbe bestšašentšana ni mo canÿe stjënëja quemochátabajajo.

19 Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tšabe vida šmochántsebomna ca.

20 “Jerusalén nÿets shëconana soldadënga chašmojanÿe ora, šmochtsetátšëmbo Jerusalén jopochócama tojobuáchama.

21 Chorna, chë Judeoca oyenënga batsjabengoye chamotsacheta; Jerusaleñentše chamojtsemnënga, chentšana chamuaisebocana; y chë jajenache chamojtsemnëngna, Jerusaleñoye ndoñe chamondésamashjna.

22 Er chora echántsemna chë entšangbe jabuache castigo; lempe ntšamo Bëngbe Bëtsabe uabemana palabrenguïñe endayancá chora echanjóchnëngo.

23 ¡Tša lastema chë tempo shembásenga ngomámanëngbiana o ochóchaye básenga chamojtsabamnëngbiana! Er chora corente ngmënanana quem luarentše echántsemna, y quem luarentša entšangbiana chë uabouana castigo.

24 Inÿenga espadëjaca mochanjóbana, y inÿengbioye nÿetsca luarënguëjana utámenënga mochanjunatse; y chë ndoñe judiëngna, Jerusaleñoca entšángbioye mochántsatsëjaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.



*Bëngbe Bëtsá Entśá tbojanbemá quem luaroye echanjésabo  
(Mt 24.29-35, 42-44; Mc 13.24-37)*

<sup>25</sup> Mëntsánaca Jesús tojánayana: “Chora bëts soyënga echantsinÿna shinÿiñe, juashconiñe y estrellënguñe; y quem luarentśa entśanga tśa mochántsauatja, ndayá jamama ntsetatśëmbcá, chë mar béjaye y olëshënga corente echantsefshauenana causa.

<sup>26</sup> Entśanga echantsabuatëcja tśa auatja causa y ndayá quem luariñe yochjopásama enócochinÿena causa; er chë quem luarentśa tsbanánoca espíritënga obenana bomnënga echanjángmëmana.

<sup>27</sup> Y chora entśanga mochanjinÿe, chë Bëngbe Bëtsá Entśá tbojanbemá jantsetëshiñe echántsaboye, puerte obenánaca y corente buashinÿinÿaniñe.

<sup>28</sup> Chë soyënga jochnënguama chaojobojatsé ora, añemo śmochjentsetaye y bestśaşe játsbanase śmochjarrepára, er chora echántsemna chë tśëngaftangbe atsebacayana ca” —Jesús tojánayana.

<sup>29</sup> Mëntsánaca Jesús tojanëyana jabuátambama: “Smochjinÿe canÿe higo betiye o ndaye inÿe betíynaca.

<sup>30</sup> Tojtsaiséjotsanama śmojinÿe ora, jtsetatśëmbuana chë tśabe tempo ya yojtsaisobecuama.

<sup>31</sup> Cachcá, chë soyënga yojtsëchnëjuanama chaśmojinÿe ora, śmochtsetátśëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre cbëyana, lempe chca echanjochnëngo, morsca entśanga cabá ndóbana ora.

<sup>33</sup> Celoca y quem luare echanjopochóca, pero atśbe palabra ndocna te queochaisopochóca.

<sup>34-35</sup> “Cuedado śmochtsebmna y ndoñe śmatjaleséncia tśëngaftangbe ainana bacna juabnëngaca chaotsemnana, jenomándama ntsoencá mocá enobuena causa, tmoye causa y nÿe quem luarentśa soyëngama enócochinÿena causa; y tśëngaftanga prontánënga śmochtsemna, nÿe ndeolpe chë te chaojobuache ora; y tśëngaftanga ndëprontánënga ndoñe chaśmondëtsemna, mo tśëngaftangbiana canÿe uachmaniñe cuaftsemncá. Er nÿetsca quem luarentśa entśangbiana chca echántsemna.

<sup>36</sup> Cuedado śmochtsebmna y yejuana śmochtsantjeśna; nÿe ntseco órnaca Bëngbe Bëtsáftaca śmochtsencuëntaye, chca, chë echanjopása soyëngama jótsbocama chaśmobenama, y chë Bëngbe Bëtsá Entśá tbojanbemabe delante jashjanguama ca” —Jesús tojanëyana.

<sup>37</sup> Jesús, bnëtë Bëngbe Bëtsabe bëts yebnentşe yojánabuatambaye, y ibetna, Olivos uabaina tjashoye yojánaye joquédama.

<sup>38</sup> Y nÿetsca entśanga cabá cachëse Bëngbe Bëtsabe bëts yebnoye imojánajna Jesús joyeunayama.

## 22

*Entśanga tmojanjuabó ntśamo jamëse Jesúsbioye jishachama  
(Mt 26.1-5, 14-16; Mc 14.1-2, 10-11; Jn 11.45-53)*

<sup>1</sup> Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama.

<sup>2</sup> Chë bachnangbe amëndayënga y ley abuátambayënga imojtsenguaye ntśamo jamëse Jesús jóbana, pero entśangbiana imojtsauatja.

<sup>3</sup> Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnëtsana uta uatsjendayënguentsá;

<sup>4</sup> y tojána, chë bachnangbe amëndayënga y Bëngbe Bëtsabe bëts yebnoca soldadëngbe amëndayëngaftaca jencuéntama, ntšamo Jesús chëngbe cucuatšinë jayentšbáshejuanama.

<sup>5</sup> As chënga imojóyejuaye, y Judas tmojanšbuachená crocénana chama jtatšetayana.

<sup>6</sup> Y Júdasna aíñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

*Jesús chabe uatsjédayëngaftaca Bashco saná tojanse*  
(Mt 26.17-29; Mc 14.12-25; Jn 13.21-30; 1 Co 11.23-26)

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canýe oveshá jóbana chora jasama.

<sup>8</sup> As Jesús, Pedro y Juánbioye tojanëyana: —Motsata y saná šochjaprónta Bashco fiestama bënga mochjasama ca.

<sup>9</sup> Chora chata tbojantjá: —¿Ndëmoca cojtseboše chë saná fchjapróntama ca?

<sup>10</sup> Y Jesús tojanëjua: —Jerusalenentše chašojámashëngo ora, canýe bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonýaye ndëmuanýe yebnentše cha yochjámashënguama;

<sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjédayëngaftaca jasama ca?’ ”

<sup>12</sup> As cha cmochanjínýanýiye canýe bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

<sup>13</sup> As chë útata tbojána, y tbojáninýena lempe ntšamo Jesús tojanëyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga.

<sup>15</sup> Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora.

<sup>16</sup> Muentšana ndoñe más quemëntša saná quicháisese, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canýe coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfsenga; y cbëyana,

<sup>18</sup> chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšangftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana.

<sup>21</sup> Pero chë uayayëngbe cucuatšinë šochjaboshjoná, mesëshentše átšeftaca entsemna.

22 Ndegombre, chë Bëngbe Bëtsá Entsá tbojanbemáftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiamá ca!” —Jesús tojánayana.

23 Chorna chë uatsjédayënga tmojanontsé entjanayana, chënguentšá nda chë boshjuaná bétsemnana.

### *Nda chë más uamaná yomna*

24 Chë uatsjédayënga imojtsenatsëtsnaye chënguentšá nda chë más uamaná bétsemnana.

25 As Jesús tojanéyana: “Chë ndoñe judiëngbeñe, chë reyënga chëngbe entšángbioye nýe ntšámnaca jtsamëndayana, y chentša amëndayënga jtsamana, entšanga chëngbioye tšabe soye amënga ca chamotsëboboútmama.

26 Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá.

27 Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tšëngaftangbeñe séntsemna mo chë oservenacá.

28 “Atšbe padecéniñe tšëngaftanga sempre átšeftaca šmondëtsemna.

29 Chíyeca, atšbe bariëna, canýe amëndayana cbochanjátšataye, ntšamo atšbe taitá canýe amëndayana šojatštacá;

30 chca, atšbe amëndayoca mesëshentše átšeftaca šmochanjase y šmochanjofšiyey, y uámana tbemaniñe mo reyëngcá šmochanjotbiama, chë Israeloca bnëtsana uta pamíllanga entšangbiama chašmuayanama tšabá o ndoñe tšabá chënga tmonjamama ca” —Jesús tojánayana.

### *Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)*

31 Jesús mëntšánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangaftaca nýe ntšámnaca jamama, mo chë trigo matënga tcojtsashatiyeynacá;

32 pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nýets ošbuáchiyana átšbeñe chacojtsatsbomna ora, chë inýe ošbuáchiyënga cochjújabuache átšbeñe sempre chamotsošbuáchema ca.

33 Chora Simón tbojanayana: —Bëngbe Utabná, atše séntseprontana ácaftaca cárceloye jámnaca y jobanámnaca ca.

34 Y Jesús tbojanayana: —Pedro, atše cbëyana, cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.

### *Chë más jabuache ora yojtsobeco*

35 Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

36 Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaíya chaotsatábuiye y canýe espadëja chauatobuámiñe.

37 Er cbëyana, entseyta átšeftaca chaopasá, ntšamo Bëngbe Bëtsabe uabemana palabrenguiñe atšbiama iuayancá, mëntšá: “Y chábioye tmonjáninýe mo chë puerte bacna soye amënguentšá canýa cuaftsemncá ca.” Y lempe ntšamo atšbiama iuabemancá, mora ya echanjochnëngo ca —Jesús tojanéyana.

38 As chënga tmojanianana: —Bëngbe Utabná, muentse uta espadëja entsemna ca.

Y japochócamna cha tojánayana: —Nÿe nÿetśá ponto ca.

*Getsemaní luarentse, Jesús Bëngbe Bëtsáftaca tbojanencuentá*  
(Mt 26.36-46; Mc 14.32-42)

39 Chentsana, Jesús tojánbocna y ntšamo yojanamancá Olivos tjashoye tojána, y chabe uatsjédayënga tmojanasto.

40 Choca tmojánashjajna ora, Jesús tojanëyana: “Bëngbe Bëtsá moim-padanga, bacna soye jamama ndoñe chacmondócochënguama ca.”

41 Y chë uatsjédayëngbentsana yojoluára, mo canÿe ndëtsbé jutšenëntscoca nÿetśá, y yojoshëntsamentšiyë Bëngbe Bëtsáftaca jencuëntama.

42 Jesús mëntśá tojánayana: “Taita, aca tcojtsebošëse, moma atšë ndoñe chašondëtsemna chca jasúfriana. Pero ntšamo atšë stsebošcá ndoñe chaondëtsemna, sinó ntšamo aca cojtsebošcá ca.”

43 Chca orna celocana canÿe ángel tbojánëbëbocna, añemo chaotsebomnama juajabuáchama.

44 Jesús tša ngméniñe yojtsemna, y Bëngbe Bëtsáftaca más ibojtsencuëntaye. Y chabe bosesë yojtsemna mo fshantsiñe buiñe cuaftsebuastëtjuancá.

45 Bëngbe Bëtsáftaca jencuëntama tojanpochocá ora, tojtantsbaná y chabe uatsjédayënga imojtsemnoye tojána; y chënga imnétsomañe, tša ngménaca imojtsemna causa.

46 Chora tojanëyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

*Uayayënga Jesús tmojánishache*  
(Mt 26.47-56; Mc 14.43-50; Jn 18.2-11)

47 Jesús cabá yojtsoyebuambnantscuana, ba entšanga chentšë tmojánashjajna. Chë Judas ca uabainá, canÿa chë bnëtsana uta uatsjendayënguentśá, chë entšangbe natsana yojtseye. Cha yojobeconá Jesús juamóchama;

48 pero Jesús tbojanianana: “Judas, ¿canÿe juamochëse chë Bëngbe Bëtsá Entśá tbojanbemá uayayëngbe cucuatšñe cochjaboshjona ca?”

49 Chë Jesúseftaca imojtsemnënga tmojáninÿe ntšamo chora yoch-janopásama; as tmojanianana: —Bëngbe Utabná, ¿espadëjaca fšcotsatsejaye ca?

50 Y canÿa chënguentśá, chë bachnangbe más uámana amëndayabe bochich-nayábioye catšbioica matscuaše tbojtsantëtšë, y tbojtsanëštjango.

51 Chora Jesús tojanëyana: —Cachcá monÿá; nÿe nÿetśá ponto ca.

Y chë bochichnayábioye chë matscuaše tbojánbojajo y tbojanshná.

52 Chentsana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanëyana: “¿Ndáyeca espadëjangaca y ngarotbéngaca šmojabo atšë jishachama, mo atšë canÿe bacá uamana entśá cuaftsemncá ca?”

53 Atšë cada te tšëngaftangaftaca sënjamna Bëngbe Bëtsabe bëts yebnentšë, y ni chešmátanbojajo. Pero ora tojjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanëyana.

*Pedro tojánayana Jesúsbioye ndoñe bonjanabuátma ca*  
(Mt 26.57-58, 69-75; Mc 14.53-54, 66-72; Jn 18.12-18, 25-27)

54 Chentsana Jesús tmojánishache, y chë bachnangbe más uámana amëndayabe yebnoye tmojánánatse. Y Pedro bënocana ibojtsëstona.

<sup>55</sup> Choca, chashja tsëntsaca, canÿe íñeshe tmojanangbotjó y entsanga chë shëconana imojtsetbiámána; y Pédrënaca chentše chëngaftaca yojótbema.

<sup>56</sup> Chora, canÿe shembása chentša oservená, Pédrëbioye tbojaninÿe chë iñe juachaca yojtsetbemana; tbojanonÿinÿé y tojánayana: —Muánaca cháftaca endánmëna ca.

<sup>57</sup> Pero Pedro ndoñe ca tojánayana, y chë shembásabioye mëntsá tbojaniyana: —Sobrená, atše cha ndoñe quetsatabuatma ca.

<sup>58</sup> Ndoñe yapa bën y inÿa chábioye tbojátaninÿe y tbojaniyana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátsmëna ca.

<sup>59</sup> Chentša benëntscosna, inÿa más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canÿe ngallo yojacánta.

<sup>61</sup> Chora Bëngbe Utabná yojobuértana y Pédrëbioye tbojanonÿinÿé; y Pedro chora yojenójuaboje ntšamo Bëngbe Utabná tbojaniyanama: “Cam ibeta bínÿanoje, ngallo cabá ndëcánta ora, aca unga soye cochanjayana ndoñe šconduabuatma ca.”

<sup>62</sup> As Pedro shjoye tojánbocna, y corente ngménaca yojtsenóbošachna.

### *Jesús imojtsáboyejuana*

*(Mt 26.67-68; Mc 14.65)*

<sup>63</sup> Chë Jesús imojtsebojanÿá entsanga cha imojtsáboyejuana y imojtsejantšetaye;

<sup>64</sup> y jtsabuchëntsacjuase, imojtsetjanaye: “¡Momalisiá, nda tcmënjajantšeté ca!”

<sup>65</sup> Y imojtsóyenguaye, nÿe mocá soyënga jtsatsëtsnayëse.

### *Jesús, chë judiëngbe uámana mándayëngbe delante*

*(Mt 26.59-66; Mc 14.55-64; Jn 18.19-24)*

<sup>66</sup> Tojanbinÿna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá:

<sup>67</sup> —Sméyana, ¿aca Bëngbe Bëtsabe Uámana Uabuayaná, chë Cristo comna ca? Y Jesús tojanëjua: —Aíñe ca tcojóáuyanëse, tšëngaftanga chama átšbeñe ndoñe quešmochatošbuáchiye.

<sup>68</sup> Y nderado tcojótjasna, tšëngaftanga ndoñe quešmochatojuá ca.

<sup>69</sup> Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nÿets obenana bomnabe catšbioica echántatsbemana ca.

<sup>70</sup> Chora nÿetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tšëngaftanga chca šmontsichamo; atše cha sëndmëna ca.

<sup>71</sup> As chora chënga tmojánayana: —¿Ndayama más entsanga šochjátëjamoto Jesusbe contra chamuayanama? Er cach bënga chabe uayásentsana chca tmonjouena ca.

## 23

### *Jesús, Pilatbe delante*

*(Mt 27.1-2, 11-14; Mc 15.1-5; Jn 18.28-38)*

<sup>1</sup> Nÿetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse.



<sup>2</sup> Y chentše tmojanontsé cha mal jaquédana, mēntšá: —Bēnga fsēnjínŷena mua entsabuatambá bacna soyēnga, quem luarentša entsangbe amēndayēngbioye ndētsayaunanama. Cha entsichamo bēnga ndoñe šontsamna Césarbiama impuesto jtsatsquécjnayana ca; y entsichamo cha yomna chē Cristo, chē Bēngbe Bētsabe Uámana Uabuayaná, mo canŷe reycá ca.

<sup>3</sup> Chora Pilato Jesúsbioye mēntšá tbojantjá: —¿Aca chē judiēngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chē bachnangbe amēndayēnga y entsanga tojanéyana: —Atše ni mo canŷe soye chiyátinŷena, quem boyabása castiganá chaotsemnama jayanama ca.

<sup>5</sup> Pero chēnga más tmojanáyebuachena: —Nŷets Israel luarējana entsabuatambá, Galilea entsangbe amēndayēngbe contra jtsemnama. Galilea luaroa chca tonjabojatšé y mora moca Judeócnaca cachcá entsama ca.

### *Jesús Rey Heródesbe delante*

<sup>6</sup> As Pilato, Galilea luarama yojouena ora, tojanatjá Jesús Galileocá tayojamnama.

<sup>7</sup> Y Jesús aíñe Galileoca yojamnama cha tojántatšēmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbioye tbojáninŷe ora, corente tojanoyejuá. Chana tempšana inaboše Jesús jinŷama. Cha ba soyēnga Jesusbiama tojanuena, y yojtseboše jinŷama Jesús jamana canŷe bēts soye, Bēngbe Bētsabe obenánaca.

<sup>9</sup> Heródesna ba soyēnga tbojantjá, pero cha ndocá tbojanjuá.

<sup>10</sup> Y chéntšnaca, chē bachnangbe amēndayēnga y judiēngbe ley abuátambayēnga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadēnga Jesúsbioye corente imojtsáboyēnja, y jtsaboyejuanamna, botamana entsayangá tmojanichētjo, mo canŷe reycá; chentšana cachiñe Pilátbioye tmojesanichmó.

<sup>12</sup> Cach te Herodes y Pilato tbojtanenatsētsaye; tempna chata ibojenáyata.

### *Jesusbiama chaóbana ca tmojánayana*

*(Mt 27.15-26; Mc 15.6-15; Jn 18.39-19.16)*

<sup>13</sup> Chentšana Pilato, chē bachnangbe amēndayēnga, chē pueblentša amēndayēnga y nŷetsca entsanga tojánachembo,

<sup>14</sup> y mēntšá tojanéyana: —Tšēngaftanga quem entsá átšbioye šmojuánatse, mo bacna soye entsángbeñe abuatambayacá, mandadēnga ndētsayaunanama ca; tšēngaftangbe delante lempe sēnjatjá, tšēngaftanga ba soyēnga muabiama šmonjayana, pero atšna ni mo canŷe soye chiyátinŷena, quem boyabása castiganá jtsemnama ibojtsemna ca jayanama.

<sup>15</sup> Herodes cach ndoñe, chíyeca cachiñe bēngbioye cha tbojesichmó. Quem boyabása ni mo canŷe ndoñe tonjobuachjanguá jóbanama chabotsemnama.

<sup>16</sup> Chcasna, jabuache chamotsecastigá y chentšana chanjētsboshjona ca — cha tojánayana.

<sup>17</sup> Yojamna canŷe utamená jētsboshjonana, ntšamo Bashco fiesta ora jamana imojanamancá.

<sup>18</sup> Pero chora entsanga cánŷiñe tmojanáyebuachena: —¡Jesús chaóbana! ¡Barrabás matsboshjona ca!

<sup>19</sup> Barrabás inautámena, mandadēngbioye ndētsayaunanama chē bēts pueblentše entsanga tojánenautanama y entsá óbanaye causa.

<sup>20</sup> Pilato cachiñe tojánayana Jesúsbioye jētsboshjonama yojtsanboše ca;

<sup>21</sup> pero entsangna más tmojtétanayebuachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtétanayana: —¿Ntšamo bacna soye mua tojobuachjanguá cá? Ni mo canye bacna soye chiyátinýena, mua jóbanama chabotsemnama. Chcasna, chanjacastíga y chora chanjétsboshjona ca.

<sup>23</sup> Pero chéngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama.

<sup>24</sup> As Pilato tojanmandá ntšamo chë entsanga imojtsotjanañcá chaotsemnama;

<sup>25</sup> as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entsángbioye tojánenautanama y entsá óbanaye causa. Y Jesusna entsangbe cucuatšine tbojánboshjona, ntšamo chënga tmojtsebošcá chamomama.

### *Jesús tmojan crucificá*

*(Mt 27.32-44; Mc 15.21-32; Jn 19.17-27)*

<sup>26</sup> As jacrucificama Jesús tmojanánatse. Chora jajocana inátaboje canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entsanga imojtsëstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama.

<sup>28</sup> As Jesús chëngbioye tojanobuértana y tojanéyana: “Jerusalenentša shembásenga, atšbiamá ndoñe matošachena; cach tšëngaftangbiama y tšëngaftangbe básengbiama šmochjenóbošachna.

<sup>29</sup> Canye te echanjóshjango y chë te šmochántšichamo: “Tša tšabá chë shembásenga šëšona ndbomnëngbiama, chë quem luaroye šëšonga ndoñe tmonjëftsëshejajnëngbiama, y chë šëšonga ndoñe tmonjëftsabachengbiama ca.”

<sup>30</sup> Chora entsanga jetsóitanama mochántseboše y mochanjontšé ichámuana: ‘¡Tjashënga šmotsëtebuantsá y batsjabenga šmotsaitame ca!’

<sup>31</sup> Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betiyeca chca tmojtsamëse, ntšamo chë tojtsebuashá betiyeca mochjama ca?” —cha tojanéyana.

<sup>32</sup> Jesúseftaca cruciñe jóbanama, útata bëts bacna soyënga ochjajnayátnaca imojtsënachaye.

<sup>33</sup> Chë “Obanabe Bestšashe ca” uabaina luaroye tmojánashjajna ora, Jesús tmojan crucificá y chë bëts bacna soyënga ochjajnayátnaca, canya chabe catšbioica y chë ínýana chabe uañicuayoica.

<sup>34</sup> Chora Jesús mëntšá tojánayana: “Taita, mëngbe bacna soye mot-saperdónaye, er ntšamo montsamama chënga ndoñe quemátstatsëmbo ca.”

Chë soldadënga Jesusbe entsayamna, tsbanánoye tmojanëtšena, chënga jtenájatayama.

<sup>35</sup> Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mëntšá imojtsenatsësnaye: “Inyëngna aíñe tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefšësnaye,

<sup>37</sup> y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

<sup>38</sup> Jesusbe bestšaše juatsboicna canye uabemana soye tmojananjo; chiñe mēntšá yojtsanábemana: MUA CHĚ JUDIĚNGBE REY ENDMĚNA ca.

<sup>39</sup> Canye bēts bacna soyēnga ochjajnayá yojtsecrucificaná, Jesúsbioye mēntšá tbojanóyenguango: —Chē Bēngbe Bētsabe Uámana Uabuayaná tcomnēsna, mentsbocá y bēndátnaca šmatsebocá ca.

<sup>40</sup> Pero chē inye bēts bacna soyēnga ochjajnayana mēntšá tbojanácacana: —¿Ni mo Bēngbe Bētsá ndoñe condērrespetana? Bēndátnaca bontsamna chacá jóbanama.

<sup>41</sup> Ndegombre bēndata muentše bontsemna bēts bacna soyēnga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

<sup>42</sup> Y chorna, quem bēts bacna soyēnga ochjajnayá Jesúsbioye tbojanianya: —Jesús, atšbiana cochtenójuaboje aca reycá jabomándama chacojtabo ora ca.

<sup>43</sup> Y Jesús tbojanjuá: —Ndegombre cbēyana, mēnté átšeftaca celoca, chē nyētscanga oyejuayēnga mondbetsemnoca, aca cochantsatsmēna ca.

### *Jesús tojanóbana*

*(Mt 27.45-56; Mc 15.33-41; Jn 19.28-30)*

<sup>44</sup> Nyētsto orscana las tresētscoñe nyēts quem luare yojtseibétata.

<sup>45</sup> Y shinye yojtsajbaná binynayana, y Bēngbe Bētsabe bēts yebnentše yojújonýana entšējua tsēntsaca yojtsenájataye. Chējua bēñjua inauamna y chē tsatsēntsaca inaújonýana.

<sup>46</sup> As Jesús tojanáyebuachena: “Taita, atšbe espíritu acbe cucuatšihne šcoboshjona ca.”

Y chca jayanama tojanpochocá ora, tojanóbana.

<sup>47</sup> Chē romano soldadēngbe amēndayá chca tojáninye ora, Bēngbe Bētsábioye tbojtadorá, mēntšá jayanēse: “Ndegombre, quem boyabása ainaniñe tšabe juabnēnga bomná inamna ca.”

<sup>48</sup> Nyētsca entšanga chē soye jinýama tmojánabēnga, chca tojanopasama tmojáninye ora, tmojanontšé jtangana enocochjantšetaye, ngménama.

<sup>49</sup> Pero Jesusbe nyētsca ubuátmēnga y chē shembásenga Galileocana tmojanastēnga, chaboca tmojanouquedá chē soyēnga onýayiñe.

### *Jesús tmojanatbontsá*

*(Mt 27.57-61; Mc 15.42-47; Jn 19.38-42)*

<sup>50</sup> Yojanmēna canye boyabása, José ca uabainá, canye Judeoca pueblócá, Arimatea ca uabaina; cha inamna canya chē pueblentša uámana amēndayēnguentšá y canye tšabe entšá y nyētsca soyēnguiñe tšabá amá.

<sup>51</sup> Chánaca yojanobátmana chē Bēngbe Bētsabe amēndayana chaóshjanguama, y tondaye tbojanogustá ntšamo chē inye amēndayēnga tmojanjuabó y Jesúsēftaca tmojanmcá.

<sup>52</sup> Cha Pilátbioye tojána y Jesusbe cuerpo tbojanotjañe.

<sup>53</sup> José chē cruzocana Jesusbe cuerpo tbojtanéstjango, canye lino entšējua tbojanandmaná y canye cuevēshiñe, peñēshiñe pormániñe, tbojanjajó. Chentše cabá ndocná mondējajo.

<sup>54</sup> Yēfsana ochnayté bētsemnayecna, cach te yojanotocana saná japróntana chē yēfsana jasama; y chē ochnayté ya yojtsebínýana.

<sup>55</sup> Chē shembásenga, Galileocana Jesús tmojantjēmbambanga, tmojána y chē cuevēshe tmojáninye, y tmojanrrepará ntšamo Jesusbe cuerpo tmojanjajoma.

<sup>56</sup> Yebnoye tmojtaná orna, tmojanprontá botamana uanguētše bėjayēnga y soyēnga chē cuerpiñe janētjuama.

Chë ochnaytena chënga tmojanochná, ntšamo Moisesbe leyíñe yojanmandancá.

## 24

### *Jesús tojtanayena*

(Mt 28.1-10; Mc 16.1-8; Jn 20.1-10)

<sup>1</sup> Y tmengo, chë inye semana bojatšéntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtse soyënga.

<sup>2</sup> Pero choye tmojánashjajna orna, tmojáninýena chë cuevëshoye amashjuanentša ndëtšbé chentsana juanániñe,

<sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninýena.

<sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entšayá uichétjonata chentše tbojabántsaye.

<sup>5</sup> Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndayeca obanëngbentše chë vida totsobomñá šmojsenguá ca?”

<sup>6</sup> Muentše cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana:

<sup>7</sup> ‘Chë Bëngbe Bëtsá Entšá tbojanbemá bontsemna bacna soye amëngbe cucuatšíñe chamoboshjonama, chamocrucificama y unga tianoye cháuatayenama ca’ ” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboye,

<sup>9</sup> y chë cuevëshentsana tmojtaná ora, chë tšabe noticiënga chë bnëtsana canýe uatsjëndayënga y inye entšángbioye tmojanacuntá.

<sup>10</sup> Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga.

<sup>11</sup> Pero chë uatsjëndayëngna mëntšá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

<sup>12</sup> Pero chentsana, Pedro tojëftsantsbaná y ochamanana chë Jesús tmojananjó cuevëshoye tojána. Y choca yojtsemna ora, yojotsejbéna tsoye jontješiyama, pero nýe ena entšëjuangá yojuinýe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

### *Chë Emaús puebloye benachiñe*

(Mc 16.12-13)

<sup>13</sup> Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canýe kilómetroca.

<sup>14</sup> Chata ibojtsayencuëntaye lempe ntšamo tojanopasama.

<sup>15</sup> Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobeconá y chátaftaca cánýiñe yojtsaye;

<sup>16</sup> masque imojtsonýaye, ndoñe ibontsobena cha jótëmbana.

<sup>17</sup> Jesús tojanéyana: —¿Ndayama benachiñe šuabanencuëntaye ca?

As chata ngménaca ibojotsaye,

<sup>18</sup> y canýa, Cleofás ca uabainá, tbojanianyana: —¿Nýe aca cojtsemna, inýe luarocana ashjanganá Jerusalenentše oyená, ndayá chentše quem diënga yopasánama ndëtatšëmbuá ca?

19 Chora cha tojanéyana: —¿Ndaye soyënga ca?

Y chata tbojaníyana: —Chë Jesús Nazaretocáftaca tonjopasá soyëngama. Cha enjamna canýe Bëngbe Bëtsabe juabna oyebuambnayá, puerta obenana bomná ndayá jamama y jayanama, Bëngbe Bëtsabe delante y nyetsca entšangbe delante.

20 Y ntšamo, chë bachnangbe amëndayënga y chentša mandadënga ínýengbe cucuatšíñe tmonjáboshjona, jóbanama ibojtsemna ca entšanga chamuayanama y chamocrucificama.

21 Bënga chabíama fsënjanobátmana, Césarbe cucuatšentsšana Israeloca entšangbe atsebacayá chaotsemnama; pero morna ya unga te entsemna chca tonjopasá.

22 Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevēshoye tmonjá,

23 y chabe cuerpo ndoñe tmonjínýena; as chora chënga bëngbioye tmontabo y montsabíchamo angelënga tmojëftsanyë y chënga catmënjayana cha ainá yojsatsmëna ca.

24 Bëngbentsšana baseftángnaca chentšana chë cuevēshoye tmonjá, y tmojínýena ntšamo chë shembásenga tmonjayancá, pero Jesús ndoñe tmojëftsinyë ca —chata ibojtsichamo.

25 As Jesús chata tojanéyana: —¡Tša juabna ndbomnénga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama!

26 ¿Mo ndoñe yonjamna chë Uámana Uabuayaná chë soyënga chaosufrima, y chentšana nyetsca entšanga corente cha chamuatschuama ca?

27 Chentšana Jesús tojanontsé chata jábuayenana, lempe ntšamo chabíama yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangáñnaca.

28 Chë ibojétsaye pueblöye imojtsebeconá ora, Jesús tojanma mo más chcoye cuaftsacá.

29 Pero chatna tmojanatarié chentše chaotsoquedáñama, mëntsá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe.

30 Chentšana tojanopasá, juasama mesëshentše imojtsetbiámana ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatšatá.

31 As, chora chë uatsjéndayata ibojobenaye Jesús jótëmbana; pero chana nyë ndeolpe yojuenatjëmbe.

32 Chora chata ibojtsenatsësnaye: “Chë benachiñe Bëngbe Bëtsabe uabemana palabrengama šondabuayíyná ora, ndegombre bëngbe ainaniñe más bontseboše cha más chašotsabuayíynama, ¿ndoñe chca ca?”

33 As, cachora tbojëftsantsbanata y Jerusalenoye tbojtanata; choca tmojáninyëna chë bnëtsana canýe uatsjéndayënga cánýentše imojtsemna y chëngbe enutëgnaca;

34 y mëntsá imojtsichamo: —¡Ndegombre Bëngbe Utabná tojtayena; Simónbioye tbojëbëbocna ca!

35 As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjéndayënga tojánebëbuacna  
(Mt 28.16-20; Mc 16.14-18; Jn 20.19-23)*



<sup>36</sup> Chë uatsjédayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntšá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

<sup>37</sup> Pero chënga tša auatjanánënga imojtsemna, y canye añemëse imojétsonyaye ca imojtsejuabnaye.

<sup>38</sup> Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca?”

<sup>39</sup> Atšbe cucuatšënga y atšbe shecuatšënga minyënga; šmobjajo y šmochanjinye. Cach atše sëntsemna. Canye añemësna, ni mëntšena ni betašënga ntsebmomna; pero tšëngaftanga šmontsonyá, atšna aiñe ca” – tojanëyana.

<sup>40</sup> Chca yojsichámëse, chabe cucuatšënga y chabe shecuatšënga tojaninyanyé.

<sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojanánënga imojtsemna causa; as Jesús tojanatjá: “¿Muentšendayá jasama quešmëbmomna ca?”

<sup>42</sup> As canye tabena buana beonbiana tmojanoyé;

<sup>43</sup> Jesús tojanocñe y chëngbentše tojanse.

<sup>44</sup> Chentšana Jesús tojanëyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiamna iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

<sup>45</sup> Y chora chë uatsjédayënga, Jesús beyeca tmojanobená chë Bëngbe Bëtsabe uabemana palabrëngama josértana.

<sup>46</sup> Chentšana Jesús tojanëyana: “Ntšamo atšbiamna iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca.”

<sup>47</sup> Y morna atšbe uabaina jayanëse, átšbeñe betsošbuáchema, nyets quem luarentše šmochjontša entšanga atšbiamna jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalenentše chaobjatšé.

<sup>48</sup> Tšëngaftanga atšbiamna soyënga šmonjinye y šmondétatšëmbo.

<sup>49</sup> Atšbe Taitabe šbuachenaná, tšëngaftangbiamna chanjíchmuá. Pero morna camuentše Jerusalenentše moquedanga, Bëngbe Bëtsabe obenana chašmóyëngacñentscuana ca” – cha tojanëyana.

### *Jesús celoye tojtantsjuá*

*(Mc 16.19-20)*

<sup>50</sup> Chentšana, Jesús chabe uatsjédayënga ínyoje tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama.

<sup>51</sup> Chca yojsamëntscuana, cha chëngbentšana tojanoluaré y tojanontšé celoye játsjuana.

<sup>52</sup> Chë uatsjédayëngna, Jesús tmojtanadorá chentšana, Jerusalenoye oyejuayënga tmojtaná;

<sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

## San Juan

### *Cristo, chë Bëngbe Bëtsabe Uámana Oyebuambnayana ca Uabainá*

<sup>1</sup> Quem luare ndobojátša ora, Cristo, chë Bëngbe Bëtsabe Uámana Oye-  
buambnayana ya yojtsemna; chora cha, chë chca uabainá, Bëngbe Bëtsáftaca  
yojtsanmëna, y cachá Bëngbe Bëtsá inamna.

<sup>2</sup> Ndegombre cha, chë tempscana Bëngbe Bëtsáftaca yojtsanmëna.

<sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo  
mora yomncá, Bëngbe Bëtsá tondaye matënjanna.

<sup>4</sup> Cachábeñe nyets vida inamna, y quem vídaca tojánabo quem luarentša  
entsangbe juabnënga jabuábinynayama.

<sup>5</sup> Cha tonjánabo moye, chë entsangbe juabnënga ndoñe binyniñe yonjam-  
noye, chiñe jacobínynayama. Cha sempre chca yobínyna, y Satanás chë  
entsangbe juabnënga ndoñe binyniñe chaondëtsemnama amá, ndoñe yon-  
dobena chë binynayabe obenana jtsejuánana.

<sup>6</sup> Inamna canye boyabása, Juan ca uabainá; y Bëngbe Bëtsá tbojanichmó,

<sup>7</sup> binynayabiama chaóyeuambama; entsángbeñe binynayabiama cháuyanama,  
chca, ntšamo Juan chë binynayabiama tojayana soyëngaca, nyetscanga  
Jesúsbeñe chamotsošbuáchema.

<sup>8</sup> Juan ndoñe yonjamna chë binynayá. Cha inamna canye ichmoná, chë nda  
binynayá yomnabiama entsángbeñe chauabáyanama.

<sup>9</sup> Chë ndegombrá quem luaroye tonjánabo chë entsangbe juabnënga  
jabuábinynayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojt-  
sanmëna; masque cháftaca Bëngbe Bëtsá quem luare tojanma, nda cha yojam-  
nama muentša oyenënga ndoñe monjántatsëmbo.

<sup>11</sup> Cachabe luare entsángbioye tonjánabo, y entsanga ndoñe tmonjánbošena  
cha jofjana.

<sup>12</sup> Nyetscanga, ndëmuanyënga cha tmojanëbuaja y chábeñe tmojt-  
sošbuáchenga, cha derecho tonjanatsatá jtsobenama Bëngbe Bëtsabe básenga  
ca jtsabáinama.

<sup>13</sup> Quem ošbuáchiyëngna, chca jtsemnama ndoñe tmonjanobená entsangbe  
buiñentsana tmojanonynáyeca, o ndaye entsabe juabnentsana. Nye Bëngbe  
Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema,  
y quem luare bëngaftaca yojëftsiyena. Cha yomna chë Bëngbe Bëtsabe  
nye canye Uaquiñá; chíyeca bënga tifjáninye chabe bëts obenana y chabe  
tšabe juabna, chë Bëngbe Bëtsábentsana tojanóyëngacñana. Cha corente  
jtsababuányëshanëse šojánanyena y yojëftsiyena ntšamo ndegombre inamncá.

<sup>15</sup> Juan mëntšá chabiama yojanáyeuache: “Chabiama sënjanoyebuambná,  
chë ndabiama chora atše sënjanayana, chë átšbentsana jabamana atšbiana  
más uamaná endmëna, er atše cabá ndonyna orna, cha ya yojtsemna ca.”

<sup>16</sup> Cha tša tšabe ainana bómnayeca, bënga nyetscanga mallajta tšabe bendi-  
cionënga tmojóyëngacñe.

<sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga.  
Pero Jesucristbeyeca, Bëngbe Bëtsá tšabe bendicionënga bëngbiama tojama y  
chë ndegombre soyënga bënga tmojëftsashjache.

<sup>18</sup> Ndocná, ndocna te Bëngbe Bëtsábioye tbonjinye. Chë nye canye Uaquiñá  
ibobomná, cach Bëngbe Bëtsá yomna; y cha, Bëngbe Bëtsá chë Taitáftaca

cányiñe mo canyáca yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodénama.

*Juan chë Ubayaná Jesucristbiama tojanabuayená*

(Mt 3.11-12; Mc 1.7-8; Lc 3.15-17)

<sup>19</sup> Canye te, Jerusalemoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnana chamuatjayama.

<sup>20</sup> Chocna, Juan chëngbeñe ndegombre tojanobuambá: —Atse, chë Bëngbe Bëtsabe Uámana Uabuayaná ndoñe quetsátsmëna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanéjua: —Atse cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnana jtsetatsëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

<sup>23</sup> Y Juan mëntsá tojanéjua: —Atse sëntsemna chë ndabiama Bëngbe Bëtsabe juabna oyebuambnayá Isaías mëntsá tojanábema: “Entšanga ndoyenoca canye abuayiynayá echántsemna, y entšanga mëntsá echántabuayiynaye: Bëngbe Utabná echanjabo ca. Mo nda canye benache tojtseprontacá, tšëngaftángnaca cachcá, cha jabama tšabe juabnéngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentšana,

<sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndoñesna, ¿ndáyeca entšanga cojtsëbayana ca?

<sup>26</sup> Chora Juan tojanéjua: —Atsna, béjayeca entšanga sëndëubáyana. Pero tšëngaftangbeñe canya entsemna; cha ndoñe quešmatábuatma;

<sup>27</sup> y cha atšbe ústonoye echanjáshjango. Atse mercedo taitatobuajoñe, ni mo jotsejbiyama, chabe shecochëtjonëshentsa corriëja jajafjonama ca.

<sup>28</sup> Chca tojanopasá, canye pueblo Betania ca uabáinentse, Jordán béjaye chenguana. Cach béjajiñe, Juan entšanga yojanëbáyana.

*Jesús chë Bëngbe Bëtsabe Oveshatema ca uabainá*

<sup>29</sup> Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna.

<sup>30</sup> Atse chabiama cbonjutsëtsná, mëntsá sënjanayana ora: ‘Atšbe ústonoye canya echanjáshjango. Cha atšbiama más uamaná endmëna, er atse cabá ndonýna ora, cha ya yojtsemna ca.’

<sup>31</sup> Tempna, cach atse ndoñe quetsjátantatsëmbo nda cha bëtsemnana. Pero atšna ínýenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

<sup>32</sup> Chentsana Juan mëntsánaca tojanobuambá: “Chabiama mëntsá bominye sënjanajó: chë Uámana Espíritu, mo canye palomatemcá, celocana tonjánastjango y quem boyabásabe juatsbuañe tonjanototoná.

<sup>33</sup> Atse cabá ndoñe quetsjátantatsëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca

atše chanjíchmuá chë Uámana Espíritu entsangbe ainaniñe cháuamashënguama ca.'

<sup>34</sup> Y morna, atše aíñe chca tijinýe, y ndegombre tšëngaftanga cbéyana, cha chë Bëngbe Bëtsabe Uaquiñá entsemna ca" —cha tojanéyana.

### *Chë Jesusbe natsana ústonënga*

<sup>35</sup> Yëfsana, Juan chabe uatsjëndayënguentsana útataftaca cachoca yojtésemna.

<sup>36</sup> Jesús yojtsachnëjuanama, Juan tbojáninýe ora, tojanéyana: "Sochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca."

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto.

<sup>38</sup> Jesús tojesanontjesé y tojánanýe chata imojétsëstonama. As, tojanatjá: —¿Ndayá šojtsenguá ca?

Y chata tbojaniana: —¿Rabí, ndayentše icoyena ca? (Rabí endayana "Buatëmbayá ca".)

<sup>39</sup> Chora Jesús tojanéjua: —Mabo y sochjinýe ca.

As chata tbojána y tbojáninýe ndayentše cha yojaniyenana. Y chentše cháftaca tojéftsanajetana, ya jetiñe mo las cuatro ora yojtsemna causa.

<sup>40</sup> Chë Jesusbiana oyebuambnayana Juánbioye tbojanóyeunata y Jesús tbojanasto útatentšana cánýana Andrés ca yojanabaina; cha yojamna Simón Pédrëbe catšata.

<sup>41</sup> Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojaniana: "Chë Bëngbe Bëtsabe Uámana Uabuayaná, Cristo, fsënjínýena ca."

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninýe ora, tbojaniana: "Aca condmëna Simón, Jonasbe uaquiñá, pero Cefas ca cochantsabaina ca." (Chcana endayana "Pedro o ndëtšbé ca".)

### *Jesús, Felipe y Natanael tojánachembo chamuastama*

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojaniana: "Smasto ca."

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna.

<sup>45</sup> Chentšana Felipe tojána Natanael janguanguama; y tbojaniana: —Chë ndabiana leyënga librëšangañe Moisés tojanábema cha fsënjínýena ca. Cachabiana, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojaniana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinýe ca.

<sup>47</sup> Natanael yojtsebëconama, Jesús tbojáninýe ora tojánayana: —Moye canýe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsingña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinýe, chë higo betiye tēchetsoye condëtsomñe ora ca.

<sup>49</sup> As, Natanael tbojaniana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

<sup>50</sup> Chora Jesús tbojanjuá: —¿Aca átšbeñe cojtsošbuaché, nýe chë higo betiye tēchetsoye tcbonjinýe ca tcbouyanama? Ndegombre, chë soyama más bëts soyënga cochanjinýe ca.

<sup>51</sup> Chentšana Jesús tojaněyana: —Ndegombre šcuayana: Tšěngaftanga šmochanjinye celoca atěfjniñe, y Běngbe Bětsabe angelotéměnga jtsetsjuajnana y jtsastjajuanana Běngbe Bětsá Entšá tbojanbemabe tatsětsoca.

## 2

### *Canye casamento Galilea luaroca, Caná pueblentše*

<sup>1</sup> Chentšana unga tianoye, canye casamento inamna, canye pueblentše Caná ca uabáinentše, Galileoca. Chě oboyejuayoca Jesusbe mamá yojtsemna.

<sup>2</sup> Jesús y chabe uatsjéndayěgnaca chě casamentoca ófjaněnga imojtsemna.

<sup>3</sup> Chě oboyejuayentše, vínoye yojtsopochóca y Jesusbe mamá tbojanianyana: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservéněnga tojaněyana: —Lempe šmochjama, ntšamo cha chacmojuayancá ca.

<sup>6</sup> Chocna, chněnguana ndětsbé matbaja inamna. Chca matbajěnguentša bėjayeca, judiěnga imojanamana jtsacuéntšabiana cabá nděse ora, ntšamo tempo entšanga imojanamancá, Běngbe Bětsabe delante tšábenga jtsatsměnama. Cada matbajiñe, mo shachna o canyěsěfta bnětsanájua bėjaye yojanába.

<sup>7</sup> Chora Jesús chě oservéněnga tojanaměndá: “Quem matbajěnga bėjayeca mobuajutetjé ca.” Y chěnga, chora lempe tmojanbuajutetjé.

<sup>8</sup> Y Jesús tojaněyana: “Morna, báseye mobuatsjo y chě fiesta otocanábioye mabuyamba ca.” Y chěnga chca tmojanma.

<sup>9</sup> Chora, chě fiesta otocaná, chě bėjaye Jesús vínoye tojanbemiye tojanfantiá, ndémocana yojóbcnana ntsetatšěmbcá. Pero chě oservéněngna aíñe imojtsetátšěmbo ndémocana, er cachěnga chě bėjaye tmojanbuatsjo. As, chě fiesta otocanana, chě bobontse bouamnábioye tbojanchembo,

<sup>10</sup> y tbojanianyana: “Nyětscanga monduamana natsana chě más uámana vínoye jusheběcana, y chě ófjaněnga becá tmojatěmo ora, chě más batšá uámaniye. Pero acna, chě más uámana vínoye morscama tcojtsabofjajó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana běts soye Běngbe Bětsabe obenánaca. Y chca, chabe běts obenana y uámanana cha tojaninjanjé; y as, chabe uatsjéndayěnga chábeñe imojtsošbuaché.

<sup>12</sup> Chca tojanopasá chentšana, Jesús canye pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjéndayěnga cha tmojantjěmbambá, y choca baseftatescama tmojanoquedá.

### *Jesús Běngbe Bětsabe běts yebnentšana bacna entšanga tojtaněbuacna (Mt 21.12-13; Mc 11.15-18; Lc 19.45-46)*

<sup>13</sup> Ya canye judiěngbe běts fiesta, chě Bashco fiesta yojětsobeco, chě ntšamo Běngbe Bětsá chěngbe běts taitanga Egiptocana tojánatsebacama jtenójuaboyama. Chě fiestama Jesús Jerusalenoye tojána.

<sup>14</sup> Jerusalenoca, Běngbe Bětsabe běts yebnentše, Jesús tojánanjěna uacněnga, oveshěnga y paloma eněnga, y entšángbioye crocénana atrócyěnga, chěngbe luarěnguenache imojtsetbiámana.

<sup>15</sup> Jesús chca tojánanjě ora, biajěnga tojanaca, tjanjaněja tojanobopormá, y Běngbe Bětsabe běts yebnentšana nyětscanga tojtaněbuacna, chěngbe oveshěnga



y uacnëngaca. Chentsana Jesús, Bëngbe Bëtsabe bëts yebnentsama yojanoser-vena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca.

<sup>16</sup> Chë paloma enëngna Jesús tojanëyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentsë, mo cánÿentšë jiyama luarentšë cuaftsemncá ca!

<sup>17</sup> Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrenguiñe iuayanama: “Bëngbe Bëtsabe yebna jtseboguiyanama juabna, nÿets átšbeñe entsemna ca.”

<sup>18</sup> Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

<sup>19</sup> As Jesús tojanëjua: —Quem Bëngbe Bëtsabe yebna menásatajchca, y atšë unga tese chtëtsbaná ca.

<sup>20</sup> Chora chë judiënga tmojanianyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

<sup>21</sup> Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye.

<sup>22</sup> Chama, Jesús obanënguentšana tojtanayena ora, chabe uatsjëndayënga tmojanenojuabó ntšamo muentšë cha tojanëyanama. Chca ora, Bëngbe Bëtsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

### *Jesús nÿetsca entšangbe juabna iuábuatma*

<sup>23</sup> Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chíyeca, ba entšanga chábeñe imojtsošbuaché.

<sup>24</sup> Pero Jesús chëngbeñe ndoñe yontsošbuaché, cha nÿetscanga yojanëbuatma causa.

<sup>25</sup> Y Jesús ndoñe bonjanájaboto chë entšangbe soyëngama chabotsebuayiyinama, er cachá entšangbe ainaniñe nÿetsca juabnënga yojanábuatma.

## 3

### *Jesús y Nicodemo*

<sup>1</sup> Inamna canÿe boyabása Nicodemo ca uabainá. Cha yojamna farise-unguentšá y judiëngbe canÿe amëndayá.

<sup>2</sup> Chana ibeta Jesúsbioye tojána y tbojanianyana: —Buatëmbayá, bënga fsëntsetatšëmbo aca canÿe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojanianyana.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe ton-tonÿná, cha ndoñe quenátobena Bëngbe Bëtsabe amëndayana jinÿama ca.

<sup>4</sup> Y Nicodemo tbojantjá: —¿Ntšamo, canÿe entšá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsoobenana cachabe mamabe cuerpiñe jtamashënguana cachiñe jtónÿnama ca.

<sup>5</sup> Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe amëndayoye jamashënguama.

<sup>6</sup> Nda bëtsëtsabentsana tojonÿná cha, quem luarentša entšangcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espíritu ainaniñe bomná.

<sup>7</sup> Ndoñe matenjnanana ntšamo tcbonjauyanama: “Nÿetscanga entsamna cachiñe jtónÿnama”.

<sup>8</sup> Chë binÿia ndëmuajana tojtseboše jtsemnama, chëjana jtsanana. Masque entsanga, chë binÿiayama jtsuenanana, ndoñe ntsetatsëmbuana ndëmocana yobama y ndëmoye yojtsoma. Cachcá, tsëngaftanga ndoñe quešmátstatšëmbo ntšamo entsanga chë Uámana Espíritbeyeca tmojtsónÿnama; pero tsëngaftanga šmontsetátšëmbo aiñe chca yomnama ca —Jesús tbojaniana.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatšëmbo ca?

<sup>11</sup> Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinÿe soyëngama ndegombre bëtsemnama fsëntsichamo. Pero tsëngaftangna, chë cbontsëtsëtsná soyënguiñe ndoñe quešmatošbuaché.

<sup>12</sup> Atše, quem luarentša soyëngama sënjoyebuambá y tsëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsëtsnase?

<sup>13</sup> “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aiñe, chë Bëngbe Bëtsá Entšá tbojanbemá.

<sup>14</sup> Y chcase, ntšamo Moisés entsanga ndoyenoca bronce mëtscuaye tsbanánoca tbojananguësëtjicá, šoquënga tsabá chamotsatsmënama; cachcá entsemna, Bëngbe Bëtsá Entšá tbojanbemá entsanga chamuatsbanama;

<sup>15</sup> chca, nÿetscanga chábeñe tmojtsošbuáchenga, chë nÿetsca tescama yomna tsabe vida chamotsebomnama ca” —Jesús Nicodémioye tbojaniana.

#### *Ntsachetšá Bëngbe Bëtsá entsanga iuababuánÿeshana*

<sup>16</sup> Mëntšánaca Jesús tojánayana: —Bëngbe Bëtsá quem luare entsángbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aiñe chë nÿetsca tescama yomna tsabe vida chamotsebomnama.

<sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entsangbiamama jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiamama, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa.

<sup>19</sup> Chca, chë ndoñe tmontsošbuáchengbiamama cha ya tojayana, ntšamo tmojamama castigánënga chamotsemna ca; er chë entsangbe juabnënga binÿnayá quem luaroye tojabo, pero ba entsanga tmojábošena jtsomñana, chë entsangbiamama bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana.

<sup>20</sup> Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana.

<sup>21</sup> Pero nda sempre tojtsiyena ntšamo ndegombre yomncá jtsamëse, chana aiñe chë binÿnayábioye jabana, chë binÿnayá chabiamama chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

*Juan chë Ubayaná cachiñe Jesucristbiana tojanabuayená*

<sup>22</sup> Chca tojanopasá chentšana, Jesús chabe uatsjédayëngaftaca básefta Judeoca pueblëngoye tojtsanoñe. Chiñe, baseftatescama chë uatsjédayëngaftaca tojanoquedá, entsanga ubáyana.

<sup>23</sup> Cach tempo, Juanënaca entsanga yojanëbáyana Enonoca, Salim béconana, er choca bëtscá béjaye inabinýna. Ba entsanga choye imojtsaye, y Juan chënga yojanëbáyana.

<sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontsé inýe judíoftaca enatsëtsnáyana ntšamo tempo judiënga chë jtsacuentsábiana imojanámanama.

<sup>26</sup> Chora, chënga Juánbioye tmojánabo y tmojanianyana: —Buatëmbayá, chë Jordán chenguánoica ácaftaca enjamná, ndabiana tša tšabá conjanoyebuambná, mora entsanga entsëbayana y nyetscanga cha montsëstona ca.

<sup>27</sup> As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase.

<sup>28</sup> Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjanayanama; sinó, Bëngbe Bëtsá atše šojanichmó chë Uabuayanabe natsana, chabiana entsanga jabábuayenama.

<sup>29</sup> Chë tobiase tojtsobouamá ora, chë bobontse chábioye jtsebomnana; y chabe amigna, chabiana jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átsnaca corente oyejuayá séntsemna.

<sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

*Ntšamo yomna chë celocana tojabá*

<sup>31</sup> Mëntsánaca Juan tojánayana: “Chë tsbanánocana tojabá, nyetsca entsangbiana más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyebuambnayana, pero chë celocana tojabana, nyetsca entsangbiana más uamaná endmëna.

<sup>32</sup> Cachá ntšamo tojinýe y tojouencá entsoyebuambná, pero chë entsichamo soyënguiñe ndocná quenatošbuaché.

<sup>33</sup> Nda ntšamo cha tojtsóyebuambnañe tojtsošbuaché y chca tojtsama, jtsinýanýnáyana Bëngbe Bëtsá ndegombre soyënga inetsichámuama.

<sup>34</sup> Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nyets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama.

<sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatsetá nyetsca soyënguiñe jtsemándayama.

<sup>36</sup> Nda chë Uaquiñábeñe tojtsošbuaché, chë nyetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nyetsca tescama chábeñe echántsemna ca” —cha tojánayana.

**4**

*Jesús y chë Samaria luaroca shembása*

1 Chë fariseunga tmojanuena Jesús, Juanbiamá más ústonënga yojsabamnama, y más entšanga yojsëbáyánama.

2 Pero ndegombre, cach Jesús ndocnábioye bonýanábayana, sinó chabe uatsjëndayënga.

3 Bëngbe Utabná Jesús, ntšamo chë fariseunga tmojanuename tojántatšëmbona ora, Judea luarocana tojëftsanbocna y Galileoye tojtaná.

4 Choye jtamna ibojamna Samaria luarëjana jachnënguana.

5 Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojëftsanlargá fshantse béconana.

6 Choca yojamna cánýentšë atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nýetsto ora, chentšë Jesús yojtsemna, aniñe uamëntšnaya, chë atëfjóniñe batsjaca yojótbema.

7-8 Chabe uatsjëndayëngna chë puebloye tmojána saná jobuámiñama. Chora, canýe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuátšetá ca.

9 Y chë shembása tbojanjuá: —Aca canýe judío condmëna y atšna canýe samaritaná. ¿Ntšamo cojtsobena atšë búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtná.)

10 Chora Jesús tbojanjuá: —Aca mo cojtsetatšëmbo nýe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

11 Y chë shembása tbojaniana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tbocha endmëna; y as, ¿ndayentšana cochjobenaye béjaye vida bomniye atšë juabuátšetayama?

12 Bëngbe tempsca bëts taitá Jacob, quem atëfjóniñe bëngbiana tojëftsanboshjona. Cachá, chabe básenga y chabe bayënga muentšana búyeshe tmojëftsanofšé; y ¿aca chabiamá más bëtsá comna ca? —chë shembása yojsichamo.

13 As Jesús tbojanjuá: —Nýetscanga chë quem búyeshentšana tmojofšenga, chënga cachiñe echantëtëjuendaye.

14 Pero chë chanjuabuátšetaye búyeshentšana tojofšé chana ndocna te cachiñe quebochëtajuendaye. Cha chanjuabuátšetaye búyeshna, chábeñe echántsemna mo cánýentšë béjaytema obocaniñcá, chë nýetsca tescama yomna tšabe vida jtsebomnama ca —cha tbojaniana.

15 Chora chë shembása tbojaniana: —Señor, chca búyeshe šmabuátšetá, as atšë ndoñe cachiñe chašondetsajuendama, ni búyeshe jauafcama moye jtsaboyama ndoñe chašondëtsemnama ca.

16 As Jesús tbojaniana: —Motsa acbe boyá jachembuama y cochjésabo ca.

17 Chora chë shembása tbojanjuá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condbomna ca.

18 Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

19 Chë shembása chca tojanuena ora, Jesúsbioye tbojaniana: —Señor, mora atšë sëntsetatšëmbo, aca canýa Bëngbe Bëtsabe juabna oyebuambnayá comnama.

20 Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalemoca chë luare canmëna ca.



21 Chora Jesús tbojanjuá: –Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana.

22 Tšëngaftanga samaritanënga ndoñe quešmatábuatma nda šmetsadoránama; pero bënga aiñe fsënduábuatma, er chë atsebacayá judiënguentšana endabó.

23 Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántadorana. Er chë Taitá entseboše chë chábioye adórayënga chca chamotsamama.

24 Bëngbe Bëtsá, Espiritu endmëna; y chë chábioye adórayënga entsamna, chë Uámana Espiritbeyeca y ndegombre juabnëngaca cha jtsadoránana ca –Jesús tbojaniyana.

25 Chora chë shembása tbojaniyana: –Atše sëndétatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášhjangona, cha nyetsca soyëngama cašochjabuayená ca.

26 As Jesús tbojaniyana: –Atše, chë ácaftaca entsoyebuambná cha, cha entsemna ca.

27 Chëntscuana, Jesusbe uatsjëndayënga tmojtashhajna, y tmojt-sanëuatjaná, Jesús canye shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

28 Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entsanga tojanëyana:

29 “Mabënga canye boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” –cha yojtsichamo.

30 As chë entsanga chë pueblocana tmojánbocana y Jesús yojtsemnoye tmojánashhajna.

31 Chca yojtsopasánëntscuana, chë uatsjëndayënga Jesúsbiocyte imojtseim-padana: –Buatëmbayá, batšatema mose ca.

32 Pero cha tojanëyana: –Atše canye soye jasama sëntsebmoma. Tšëngaftanga chë soyama ndoñe quešmátstatšëmbo ca.

33 Chora chë uatsjëndayënga tmojanontšé entjanayana: –¿Nderado nda jasama chabiamna tojiyëbo ca?

34 Y Jesús tojanëyana: –Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiamna entsemna.

35 Tšëngaftanga šmondbétsichamo: “Cabá canta ishinýe entsashbena jaja saná chaotsebínýnama ca”; pero atše cbëyana: Minýënga tša entsanga moye montsabëbana; chënga montsemna mo jajañe saná játbana tojtseprontancá.

36 Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tšëngaftanga cmontsamna atšbiamna entsanga júbuajana, chë nyetsca tescama yomna tšabe vida chamotsebmomna. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsanga átšbeñe chamojtsošbuaché ora, nyetscanga, chë atšbiamna obuájajanënga y chë atšbiamna trabájayëngnaca cánýiñe oyejuayënga mochántsemna.

37 Quem entsangbe ichámuana, canye ndegombre soye endmëna: “Chë jená canya jtsemnana, y atbanayana inya ca.”

38 Atše tšëngaftanga chonjichamó canye soye játbana, y tšëngaftanga tondaye chešmatsma chca chaotsebínýnama. Inýënga chiñe bëtscá



tmonjëftsetrabája, y tšëngaftangna, chëngbe trabajënguentsana šmojolograñe ca —Jesús tojánayana.

<sup>39</sup> Bëtsca entsanga, Samarioca pueblentsënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.”

<sup>40</sup> As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana.

<sup>41</sup> Y más entsanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

<sup>42</sup> Y chë shembása chë entsanga tmojanianyana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entsangbiama Atsebacayá ca.”

### *Jesús, canýe mandado uajabuachanabe básabioye tbojanshná*

<sup>43</sup> Uta te chentšana, Jesús Samariocana tojáisanbocna y Galileoye tojataná.

<sup>44</sup> Cach Jesús mëntšá tojánayana: “Canýa Bëngbe Bëtsabe juabna oyebuamb-nayá, cachabe luarentše oyenënga ndoñe bëtsá ntjabemëngana ca.”

<sup>45</sup> Galileoca oyenënga Jerusalenoye tmojána, y tmojáninýe nýetsca bëts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtashjango ora, chënga tšabá tmojtanoñja.

<sup>46</sup> Galileocna, Jesús cachiñe Caná puebloye tojésanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum pueblaca šocá yojtsejájona.

<sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca.

<sup>48</sup> As Jesús tbojanianyana: —Tšëngaftanga, Bëngbe Bëtsabe obenana jinýanýiyama bëts soyënga atše jamama ndoñe šmonjinýëse, átsbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbioye tbojanianyana: —Taita, betesco mabo, atšbe uaquiñá cabá ndóbana ora ca.

<sup>50</sup> As Jesús tbojanianyana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojanianyancá y tojtaná.

<sup>51</sup> Cha yojtsataye orna, chabe oservënënga tmojánbocana jajëbenguama y tmojanianyana: —Acbe uaquiñá tšabá entsatsmëna ca.

<sup>52</sup> As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojanianyana: “Acbe uaquiñá ainá endëtsomñe ca”. Y cha y nýetscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinýanýiyama, Galilea luaroca.

## 5

### *Jesús canýe jama ndobenábioye tbojanshná*

<sup>1</sup> Baseftayté chentšana, chë judiënga canýe oboyejuaye te imojtsebomna ora, Jesús Jerusalenoye tojána.

<sup>2</sup> Choca, chë Oveshëngbe amashjuana ca uabáinentše yojamna canÿe binche uafjajónaye, entsangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.

<sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana.

<sup>4</sup> (Nderado nderado, Bëngbe Bëtsábioca canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.)

<sup>5</sup> Chë šoquënguiñe canÿe boyabása inamna, unga bnëtsana y posufta uatama jama ndobená.

<sup>6</sup> Jesús chë jajonábioye tbojáninÿe ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënana ca?

<sup>7</sup> Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inÿa atšbe natsana jtsamashënguana ca.

<sup>8</sup> Y Jesús tbojanijana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna.

<sup>10</sup> Chíyeca, chë tbojanshnábioye chë judiënga tmojanijana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjëmbe.

<sup>14</sup> Chentšana, Jesús Bëngbe Bëtsabe bëts yebnentše chë boyabásabioye tbojáninÿena y tbojanijana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiamu puerté mal echanjopása ca.

<sup>15</sup> Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.

<sup>17</sup> Pero Jesús tojanëyana: “Atšbe Taitá nÿets tempo tšabe soyënga endbétsama; cachcá, átšnaca tšabe soyënga sëntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabiamu tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

### *Bëngbe Bëtsabe Uaquiñabe obenana*

<sup>19</sup> Chentšana Jesús tojanëyana: “Ndegombre šcuayana: Bëngbe Bëtsabe Uaquiñá, nÿe cachabe cuenta tondaye quenátobena jamana. Cha jtsonÿayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.

<sup>20</sup> Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinÿinÿná; y más bëts soyënga bochanjinÿinÿiye, chë soyëngama tšëngaftanga chašmenjanama.

21 Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanyënga cha tojtsebošcá.

22 Chë Taitá ndocnabiamama jatichámuana tšabá o ndoñe tšabá yontsama ca. Chabe Uaquiñábioye nyets obenana tbonjatšetá nyetscangbiamama jayanama tšabá o ndoñe tšabá tmontsamama.

23 Chca, chënga chamuinýinýé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mond-betsinýinýaycá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše sentsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiamama chë Uaquiñá ndoñe queochátayana castigáná chaotsemna ca. Chca, Bëngbe Bëtsabiamama cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castigáná queochátsmëna. Y aíñe, chë nyetsca tescama yomna tšabe vida echántsebomna.

25 “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiamama mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna.

26 Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama.

27 Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nyetscangbiamama jayanama tšabá o ndoñe tšabá tmontsamama.

28 Chama ndoñe matenjnanana. Er canýe tempo echanjobuache, y chora chë Uaquiñá obanënga echántsechambuana; chënga mochanjouena y cach ora, chëngbe oyenocana mochanjésebocana.

29 Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castigánënga jtsemnama ca” —Jesús tojanëyana.

### *Jesús, ndegombre Bëngbe Bëtsabe ichmoná inamna*

30 Mëntšánaca Jesús cachatbiamama tojánayana: “Nyë átšbeyeca tondaye quetsátobena jamama. Chë Taitá šontsemánda ntšamo nyetscangbiamama jayanama tšabá o ndoñe tšabá tmontsamama. Nyë chca atše sentsobena chë soye jamama. Ndoñe quetsátsoše jamana nyë ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbiamama sentsichamo tšabá o ndoñe tšabá tmontsamama; y ntšamo nyetscangbiamama sentsichamcá, ndegombre endmëna.

31 “Ntšamo cach atšbiamama tijayanama, ndegombre entsemna ca stsichámëse, ntšamo stsichamcá, nyetscangbiamama tondaye ntsámanana.

32 Pero inýa entsemna. Cha endétatsëmbo y entsichamo ntšamo ndegombre atšbiamama yomncá; y sëntsetatsëmbo ntšamo cha atšbiamama yojtsichamcá, nyetscangbiamama aíñe yojtsámanama.

33 Tšëngaftanga ínýenga šmojanichamó atšbiamama Juan jatjayama; y ntšamo cha tcmojauyancá ndegombre endmëna.

<sup>34</sup> Masque chë soyënga cha tcmojáuyana, ndoñe quešnatájaboto ndocna entšá atšbiamna chaotsichamo ‘cha aíñe chca endmëna ca’. Atše quem soyënga sentsichamo ndayá nÿe tšëngaftanga atsebácanënga chašmotsemnana.

<sup>35</sup> Juan enjamna mo canÿe uajuinÿanësha tojtsajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábošena rato cháftaca oyejuayënga jtsemnana.

<sup>36</sup> Pero chë atše sënjama soyëngacna más entsinÿinÿena ntšamo atšbiamna ndegombre yomncá, chë ntšamo Juan atšbiamna tojánayanama. Ndayá atšbe Taitá šojabonÿé jamama, ntšamo atše sentsamcá, entsinÿinÿná ndegombre chë Taitá šojichmoma.

<sup>37</sup> Atšbe Taitá, chë šojichmó chánaca entsichamo ntšamo atšbiamna ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe.

<sup>38</sup> Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa.

<sup>39</sup> Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nÿetsca tescama yomna tšabe vida jónÿenama. Y Bëngbe Bëtsabe uabemana palabrënguiñe atšbiamna endayana ntšamo ndegombre yomncá;

<sup>40</sup> pero masque chca, tšëngaftanga ndoñe quešmátsboše atše jtsëstonana, y chca, tšabe vida jtsebomnana.

<sup>41</sup> “Atše ndoñe quetsátsboše entšanga yapa tšabá atšbiamna chamot-sichámuama.

<sup>42</sup> Y inÿe soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondobobonshánama.

<sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inÿa, cachabe cuenta tojabábioye cocayé aíñe šmatjofja.

<sup>44</sup> Tšëngaftanga corente jésebošana, ínÿenga tšëngaftangbiamna tšabá chamot-sichámuama, y ínÿengbiamna tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiamna cachcá chaotsichámuama. Chca šmojtsamëse, ¿ntšamo šmochsobena Bëngbe Bëtsabeñe jtsošbuáchiyana?

<sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jt-sobátmanana atsebácanënga jtsemnana, chë ntšamo Moisesbe leyinÿe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna.

<sup>46</sup> Tšëngaftanga, chë Moisés tojéftsanabema soyiñe šmojtsošbuachese, átšbeñnaca šmattsošbuáchiye, er cha atšbiamna tojanábema.

<sup>47</sup> Pero chë tojanábema soyiñe tšëngaftanga ndoñe šmontsošbuachesna, ¿ntšamo šmochjobenaye chë atše sentsichamo soyënguiñe jtsošbuáchiyana ca?” —Jesús tojanëyana.

## 6

*Jesús shachna uaranga boyabásenga saná tojanacaredadó  
(Mt 14.13-21; Mc 6.30-44; Lc 9.10-17)*

<sup>1</sup> Chë soyënga tojanopasá chentšana, Jesús chabe uatsjëndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina.

<sup>2</sup> Ba entšanga imojtsëstona, er chënga tmojáninÿe cha bëts soyënga jt-samana, šoquënga jtsashnayëse.

<sup>3</sup> As Jesús tjoye tojántsjua, y chocha chabe uatsjëndayëngaftaca tojanótbema.

<sup>4</sup> Ya judiëngbe canÿe fiesta, chë Bashco fiesta, yojétsobeco.



<sup>5</sup> Jesús tojanótbema ora, tojanontjesé y tojánanýe ba entsanga chábioye imojetsebéconaye. As Felípbioye tbojaniyana: —¿Ndayentse saná cuanjabuámiye nyetsca quem entsanga chamosama ca?

<sup>6</sup> Jesús chca tbojaniyana, ana Felípbioye jinýama ntšamo cha tabuanjuama; er cach Jesús tšabá inatátšëmbo ndayá jamama.

<sup>7</sup> Y Felipe tbojanjuá: —Ni mo uta patse denario crocenánaca nanjopódia tandése jabuámiyama, nyetsca entsanga nýe mo batšatémnaca chamuétsesama ca.

<sup>8</sup> Chorna, Jesusbe canýe uatsjendayá, Andrés ca uabainá, Simón Pédrébe catšata, Jesúsbioye tbojaniyana:

<sup>9</sup> —Muentse entsemna canýe básetema y cha shachna cebada tandése y uta beónata entsebomna. Pero, ¿ndayase nýe nyetsatema chëfta entsangbiama ca?

<sup>10</sup> As Jesús tojánayana: —Entsanga méyana chamotbiama ca.

Becá shácuana chë luariñe inamna, y nyetsca entsanga chiñe tmojanoshéntsjatbiama. Chë entsanguentse shachna uaranga boyabásenga imojtsemna.

<sup>11</sup> Chora Jesús, chë tandése chabe cucuatšíñe tojanca, y Bëngbe Bëtsábioye chë tandésama tbojtanchuá; y chabe uatsjéndayënga tojanëjatá, y chë uatsjéndayëngna nyetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojanbošcá tmojanatšatá.

<sup>12</sup> Nyetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtémmënga šmochtsatbananga, tondaye nýe cachcá ntjëftsonýayama ca.

<sup>13</sup> As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua tmojanajutjé.

<sup>14</sup> Chë entsanga quem bëts soye Jesús jamama tmojáninýe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

<sup>15</sup> Jesús yojtsetátšëmbo entsanga chëngbe rey jabemama imojetsebošama. Chíyeca cach tjoye tojtsaisanoñe canýa jtsomñama.

*Jesús béjaye juatsbuacá yojtsaye*  
(Mt 14.22-27; Mc 6.45-52)

<sup>16</sup> Tojanibétata ora, Jesusbe uatsjéndayënga chë uafjajónayoye tmojantsmá;

<sup>17</sup> barquëshañe tmojtanenojayé, y tmojanontsé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana.

<sup>18</sup> Chca imojtsenashbuachnëjuana orna, chë béjayiñe jabuache binýia tojanóshjango y bëts olëshënga chë barquëshoye yojtsójantšetaye.

<sup>19</sup> Shachna o chnënguana kilómetro chënga tmojána ora, tmojáninýe Jesús chëngbioye yojtsebéconaye, béjaye juatsbuacá yojtsaye. Chënga chca tmojáninýe ora tša tmojanocochauatjaná,

<sup>20</sup> pero Jesús tojanëyana: “Atse sëndmëna; ndoñe matauatjëngana ca.”

<sup>21</sup> Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

*Entsanga Jesús tmojáanguango*

<sup>22</sup> Yëfsana, nyetsca entsanga, chë uafjajónaye chenguánoica tmojanoquedanga tmojáninýe, chë inýe yëfsana chë nýe canýe barquëshaya yojuamnëshañe Jesusbe uatsjéndayënga tmojtsanoñama, y Jesús chëngaftaca ndoñe tonjánama.



<sup>23</sup> Pero chëntscuana, Tiberias pueblentsana inye barquëshangá tojanáshjajna canye luarentse, chë Bëngbe Utabná Jesús chabe Taitábioye tbojtanchuá chentsana, entsanga saná tmojanse luare béconana.

<sup>24</sup> Asna, ni Jesús ni chabe uatsjéndayënga chentse ndoñe montsemnama chë entsanga tmojáninÿe ora, chë barquëshangañe tmojtanenojayé y Capernaumoye tmojána Jesús jetsenguanguama.

*Jesús, chë nÿetsca tescama yomna tšabe vida jtsebomnama tandëse*

<sup>25</sup> Chë uafjónaye chenguánoye tmojánashjajna ora, Jesús tmojáninÿena y mëntsá tmojantjá: —¿Buatëmbayá, ntseco ora muentse tcojášhango ca?

<sup>26</sup> Y Jesús tojanëyana: —Ndegombre cbëyana, tšëngaftanga ndoñe atse quešmatsnguá, chë bëts soyënga tijamama, sinó nÿe chë jtoshachaye nÿetsá tandëse šmojasama.

<sup>27</sup> Ndoñe matenángmenana chë nÿe ndoñe bën y jopochócana sanama; chë ndmopochócaye saná, chë nÿetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinÿanÿé, tšabe soyëngaca, cha chábioye tbojuábuayanama ca —tojánayana.

<sup>28</sup> Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanëyana: —Chë Taitá entseboše tšëngaftanga chabe ichmonábeñe chašmotsošbuáchema ca.

<sup>30</sup> Chora chënga tmojanianyana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿëse, ácebeñe fchantsošbuáchiye. ¿Bëngbiamama taicochjama ca?

<sup>31</sup> Bëngbe tempsca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabreñguiñe mëntsá endayana: “Cha celoca tandëse tonjanatšatá chamosama ca” —chënga tmojánayana.

<sup>32</sup> Chora Jesús tojanëyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná.

<sup>33</sup> Er Bëngbe Bëtsábicocana tandëse entsemna chë celocana tojastjanguá; y cha quem luare entsangbiamama entsama chë nÿetsca tescama yomna tšabe vida chamotsebomnama ca —cha tojanëyana.

<sup>34</sup> Chora chënga tmojanimpadá: —Taita, chë tandëse sempre šcochtsatšatnaye ca.

<sup>35</sup> Y Jesús tojanëjua: —Atse sëndmëna entsanga chë nÿetsca tescama yomna tšabe vida jtsebomnama tandëse. Nda atse chašojtsëstona, sempre oyejuayá echanjëftsemna y Bëngbe Bëtsabe soyënga nÿets tempo echanjesóbomñe, mo nda nÿets tempo saná totsobomñcá, y ndocna te tbontsishëntsancá.

<sup>36</sup> Pero ntšamo ya tcbonjauyancá, tšëngaftanga atse šmonjinÿe y cabá ndoñe átšbeñe quešmatošbuaché.

<sup>37</sup> Nda atšbe Taitá atšbiamama tbojabocacá, cha atse šochantsëstona; y nda átšbioye šojtsëstona, átšbentsana quichtëtábocna.

<sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nÿe ntšamo atse stsebošcá.

<sup>39</sup> Y chë šojichmó cha entseboše, ni mo canÿa chë atšbiamama tojabacacá chentsana, atse chailesenciá pochocaná chaotsemnama; y quem luare jopochócama tena, nÿetscanga atšbiamama tojábacacangbiamama chámuatayenama atse chaimama.

<sup>40</sup> Er atšbe Taitá entseboše, nda chabe Uaquiñábioye tbojinýe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

<sup>41</sup> “Atše sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiamama podesca ichámuana.

<sup>42</sup> Chënga mëntśá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiamama ndoñe podesca matichámuana.

<sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atše chanjama cha cháuatayenama quem luare jopochócama te.

<sup>45</sup> Chë tempsquënga Bëngbe Bëtsabe juabna oyebuambnayënga mëntśá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinýe, cha atše šochanjuasto.

<sup>46</sup> “Ndocná atšbe Taitá tbojinýe. Nýe chë Bëngbe Bëtsábiocana tojabá aíñe.

<sup>47</sup> Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna.

<sup>48</sup> Atše sëndmëna entšanga chë nyetsca tescama yomna tšabe vida chamotsebomnana tandëse.

<sup>49</sup> Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana.

<sup>50</sup> Pero atše sëntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana.

<sup>51</sup> Atše sëntsemna entšanga chë nyetsca tescama yomna tšabe vida jtsebomnana tandëse, chë celocana tojóshjanguëse. Nda quem tandëse tojase, nyetsca tescama nýe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nyetsca tescama yomna tšabe vida chamotsebomnana ca” —Jesús tojánayana.

<sup>52</sup> Chora chë judiënga tmojanontsé enatsësnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanéyana: —Ndegombre šcuayana: Tšëngaftanga Bëngbe Bëtsá Entśá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna.

<sup>54</sup> Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama.

<sup>55</sup> Atšbe cuerpo ndegombre saná endmëna, y atšbe buiñe ndegombre ofšësnayiye.

<sup>56</sup> Nda atšbe cuerpo tojase y atšbe buiñe tojofšé, átšeftaca cánýiñe mo canýacá echántsemna, y átšnaca cháftaca.

<sup>57</sup> Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana.

<sup>58</sup> Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nýe nyets tempo vida echanjesóbomñe ca —Jesús tojánayana.

59 Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

*Chë nyetsca tescama yomna tšabe vida jtsebomnana palabrënga*

60 Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

61 Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsësnacá ndoñe tšabá cmontsëuenana ca?

62 Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstjuama šmojinÿëse, ¿ntšamo šmattsejuabnaye?

63 Bëngbe Bëtsabe Espíritu entsama entšanga chë tšabe vida chamotsebomnana. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espíritbe uajabuáchenana y chë tšabe vida.

64 Pero masque chca entsemna, tšëngaftangbentšana banga átsbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatsé orscana, cha inatátšëmbo ndëmuanÿenga chábeñe ndoñe mochanjanošbuáchiye, y nda chë uayayëngbe cucuatšinë yochjéftsayentšbashejuana.

65 Y Jesús yojtëtóntša oyebuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

66 Chë causa, chentšana, ba chabe ústonënga cachcá tmojesanonÿá, y cháftaca ya ndoñe imontsajna.

67 Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jëseboshjonama šmojtseboše ca?

68 Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe aca šcontsëtsësná chë nyetsca tescama yomna tšabe vida jtsebomnana palabrënga.

69 Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

70 Chora Jesús tojanëyana: —Atše tcbonjabacacá, chë bnëtsana útata; pero canÿa tšëngaftanguentsana, mo Satanasbe canÿe trabajayacá entsemna ca.

71 Judas Iscariote, chë Simonbe uaquiñabiama chca Jesús tojánayana. Er chana masque canÿa chabe bnëtsana uta uatsjëndayënguentsá inamna, Jesús uayayëngbe cucuatšinë yochjáftsayentšbashejuana.

## 7

*Jesusbe catšátanga chábeñe ndoñe montsanošbuaché*

1 Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama.

2 Chora, judiëngbe canÿe bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtsiyenana.

3 As chora Jesusbe catšátanga tmojanianyana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminÿama.

4 Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nyetscangbe delante chca cochjama ca —chënga tmojanianyana.

<sup>5</sup> Er ni mo cach Jesusbe catsátanga chábeñe ndoñe montsanošbuaché. Chíyeca chënga chca tmojaníyana.

<sup>6</sup> Chora Jesús tojanějua: —Atšbe ora cabá ndoñe quentóshjango, pero tšëngaftangbiamá mocna órnaca tšabá endëtsomñe.

<sup>7</sup> Chë nÿe quem luarama enójuabnaye entšanga ndoñe quemátobena tšëngaftanga jtsëbuayënjana, pero átšbioyna aíñe, er atše puerte tšabá sentsinÿanÿná ntšamo chënga imojtsamcá ndoñe tšabá yontsemnama.

<sup>8</sup> Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanëyana y cach Galileoca tojtsanoquedañe.

### *Chë tambënguiñe jtsiyenama fiesta*

<sup>10</sup> Chabe catsátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta.

<sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

<sup>12</sup> Entšángbeñe ba soyënga chabiamá iytëcana imojtsichamo. Inÿenga chabiamá imojtsichamo: “Cha tšabia endmëna ca”; pero ínÿengna: “Cha entšanga entsaíngña ca”.

<sup>13</sup> Pero ndocná Jesusbiamá becá añémoca yontsoyebuambná, chë judiëngbe amëndayëngbiamá imojtsauatja causa.

<sup>14</sup> Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana.

<sup>15</sup> Chentše chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtscá ntjuatsjinÿcá, ¿ntšamo nÿetsá nantsetatšëmbo ca?

<sup>16</sup> As Jesús tojanějua: —Atšbe buatëmbayana ndoñe nÿe átšbentšana quenatóbocana, ndayá chë šonjichmó chábentšana.

<sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábiocana yóbocanama o nÿe átšbentšana.

<sup>18</sup> Nda nÿe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

<sup>19</sup> “Ndegombre, Moisés tšëngaftangbiamá ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

<sup>20</sup> Chora entšanga tmojanjúá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanëyana: —Nÿetsca tšëngaftanga ojanánënga atše šmontsonÿá, atše canÿe ochnayté canÿe entšá tijashnama.

<sup>22</sup> Pero, Moisés tcmónjanamëndá básetema base bobachtema chë más delicadentše jatëtsana, chaotsinÿnama (ndoñe nÿe Moisésbeyeca chca, sinó Moisesbiamá más tempsca bëts taitanga chca jamama imojanamánayeca); y tšëngaftanga canÿe básetema base bobachtema chë más delicadentše jatëtsana, masque chë te canÿe ochnayté totsomñe.

<sup>23</sup> Y mora, ntšamo Moisés tcmojëftsanamëndacá ndoñe cachcá ntjonÿayama, canÿe básetema chca jatëtsana masque ochnayté; as, ¿ndáyeca atše šmojtsayaná, atše ochnayté canÿe entšabe nÿets cuerpo tijashnama?

<sup>24</sup> Nÿe batšá jinÿëse, ínÿengbiamá ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnama natsana



lempe tšabá jshétsetatšëmbëse, šmochjayana tšabá o ndoñe tšabá tmonjama ca —Jesús tojánayana.

*Jesús tojánayana ndëmocana cha tojánabama*

<sup>25</sup> Chora báseftanga Jerusalenoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca?

<sup>26</sup> Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca?

<sup>27</sup> Pero bënga mondëtatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentšë Jesús yojtsabuátambayëntscuana, cha jabuache tojánayana: —¿Tšëngaftanga šmojtsejuabná atšë ndegombre šmabuatma, y ndëmocana tijabama šmojtsetátšëmbo ca! Pero nýe atšbe cuenta, ndoñe chiyátabo, ndayá canya šojichmóyeca, nda ntšamo ndegombre yomncá nýetsca soyëngama endbëtsoyebuambnaye; y tšëngaftanga cha ndoñe quešmatábuatma.

<sup>29</sup> Atšna aíñe cha sënduábuatma, er atšë chábentšana sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango.

<sup>31</sup> Banga chentšë Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

*Chë fariseunga tmojánbošena Jesús jishachama*

<sup>32</sup> Chë fariseunga tmojántatšëmbona ntšamo entsanga Jesusbiamia iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama.

<sup>33</sup> Chora Jesús tojánayana: “Muentšana nýe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa.

<sup>34</sup> Chora tšëngaftanga atšë šmochántseguaye, pero ndoñe quešmochátinýena; y ndayentšë chántsemnoca ndoñe quešmochatobenaye jashjanguama ca.”

<sup>35</sup> Chora chë judiënga tmojanontšë entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá?

<sup>36</sup> ¿Ntšamo yojtsentšáyana cha šonjauyancá, chë ‘tšëngaftanga atšë šmochántseguaye, pero ndoñe quešmochátinýena; y ndayentšë chántsemnoca ndoñe quešmochatobenaye jashjanguama ca?’ —chënga imojtsichamo.

*Béjayënga vida bomniye*

<sup>37</sup> Chë fiesta jopochócama te yojamna chë más uámana te. Chë te, Jesús entsángbentšë tojantsá y jabuache tojánayana: “¿Nda tbojtsajuendá, átšbioye chauabo y chaofšé!

<sup>38</sup> Ntšamo Bëngbe Bëtsabe uabemana palabrenguiñe endayancá: ‘Nda átšbeñe tojtsobocancá, cha echántsemna mo ndabe ainanentšana vida bomna béjayënga tojtsobocancá.’ Chca echántsemna átšbeñe ošbuáchiyëngbiamia ca” — cha tojánayana.



<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtšá yojamnana cabá ndoñe tmonjaninñinýe causa.

*Nýetsca entsanga ndoñe cachcá Jesusbiana imontsejuabnaye*

<sup>40</sup> Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

<sup>41</sup> Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínýengna: —Ndoñe, er chë Cristo Galileocana ndoñe queochátabo.

<sup>42</sup> Ndegombre, Bëngbe Bëtsabe uabemana palabrenguiñe endayana, chë Cristna rey Davídbentšana entšá canmëna, y Belenocana caochjabo ca, cach pueblcana ndayentšá David inamna ca —chënga imojtsichamo.

<sup>43</sup> Y chca, ínýengna Jesusbe pavor imojtsemna, y ínýengna chabe contra.

<sup>44</sup> Inýenga imojtseboše Jesús jishachama, pero ndocná tbonjánishache.

*Chë amëndayënga Jesúsbeñe ndoñe montsanošbuaché*

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëtš yebnocá josticiënga tmojtashajna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanějua: —Ndocná quenatoyebuambná ntšamo chë boyabása tonjoyebuambacá ca.

<sup>47</sup> Chora chë fariseunga tmojaněyana: —¿Tšëngaftágnaca šmojalesenciá cha chacmaingñema ca?

<sup>48</sup> ¿Nderado bëngbe amëndayënguentsá o bënga fariseunguentšá nýe mo canya chábeñe tajojtsošbuaché?

<sup>49</sup> Pero quem entsanga, ntšamo leyiñe iuayancá nduabuátmënga, bacna soyëngaca sempre mochanjéftsemna ca —chënga imojtsichamo.

<sup>50</sup> Chora Nicodemo, canya fariseunguentšá, chë Jesúséftaca jencuéntama ibeta tojána cha, tojánayana:

<sup>51</sup> —Ntšamo bëngbe leyiñe endayancá, bënga ndoñe quemuátobena jayanana canye entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

<sup>52</sup> Chora chënga Nicodemo tmojanjuá: —¿Acnaca chábeñe cojtsošbuaché y mo canye Galileoca entšacá cojtsejuabná ca? Bëngbe Bëtsabe uabemana palabrenguiñe cochjuatsjinýe, y cochanjinýe ni canya Bëngbe Bëtsabe juabna oyebuambnayá Galileocana yochjabo ca.

*Chë shema boyábioye ín्याftaca ingñayá*

<sup>53</sup> Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatónënga.

## 8

<sup>1</sup> Pero Jesusna canye tjoye, Olivos ca uabáinoye tojtsanoñe.

<sup>2</sup> Y chë yëfsana cachëse, Jesús cachiñe Bëngbe Bëtsabe bëtš yebnoye tojesaná. Nýetsca entsanga tmojanobeconá jouenama, y Jesús tojanótbema y tojanontšë jabuátambama.

<sup>3</sup> Chorna, báseftanga ley abuátambayënga y fariseunga tmonjánashajna, y canye shembása tmojanëshjango. Chana tmojaninýena chabe boyábioye ín्याftaca ibnetsoíngñañëntscuana; nýetscangbe tsëntsaca tmojanatsá,

<sup>4</sup> y Jesús tmojanianya: —Buatëmbayá, quemuá fsënjínýena chabe boyábioye ín्याftaca bondëtsoíngñañëntscuana.

<sup>5</sup> Leyiñe Moisés šonjanamëndá mēntšá uamana shembásengna ndētšbéngaca jtsēbáyama. ¿Aca ntšamo catjayana ca?

<sup>6</sup> Jesús chca tmojaniyana ana jisháchichiyama, chca chēnga jtsebomnama ndáyeca chabe contra jayanana. Pero Jesús n̄ye fshantsoye yojotsejbéna y yojóntša ntšabuáfjaca fshantsiñe juabemama.

<sup>7</sup> Chēnga n̄ye imojtsetjanaye causa, Jesús tojantsbaná y tojanéyana: —Nda tšēngaftanguentsá tondaye bacna soyēnga tondbomná, chaobojatšé ndētšbeca jatēchēnjama ca.

<sup>8</sup> Chentšana Jesús cachiñe fshantsoye yojtotsejbéna, y yojtētóntša fshantsiñe jtētabemama.

<sup>9</sup> Chca tmojanuena ora, entšanga tmojanontšé canyán̄ya chentšana jésecocanana; natsana chē más bētsanánēnga y chē ín̄yengna ústonoye. Canya Jesús tonjanoquedá y chē shembásanaca.

<sup>10</sup> As, Jesús tojtantsá y tbojantjá: —¿Shembása, ndayentše chē acbe contra ichámēnga imojtsemna? ¿Ndocná acbiama tonjayana castiganá chacotsemna ca?

<sup>11</sup> Ndoñe, Taita, ndocná ca —chē shembása tbojanjuá.

Chora Jesús tbojaniyana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cátsama ca.

*Jesús yomna quem luarentša entsangbe juabna bin̄ynayá*

<sup>12</sup> Jesús cachiñe Bēngbe Bētsabe bēts yebnentše yojtsabuátambaye, y entšanga mēntšá tojanéyana: —Atše sēndbín̄ya quem luare entsangbe juabnēnga. Nda atše chašojtsēstona, cha echantsiyena atše chē bin̄ynayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chē fariseunga Jesús tmojaniyana: —Aca n̄ye cach acbiama chca contsoyebuambná; chcana, chē ntšamo contsichamcá tondaye quenatámana ca.

<sup>14</sup> As chora Jesús tojanéjua: —Ntšamo cach atšbiama sēntsichamcá aíñe entsámama, masque n̄ye atše stsichamo ntšamo atšbiama ndegombre yomncá. Er atše sēndētatsēmbo ndēmocana tijabo y ndēmoye tstsá. Pero tšēngaftanga ndoñe chca quešmatststēmbo.

<sup>15</sup> Tšēngaftanga šmondbétsichamo ín̄yēngbiama tšabá o ndoñe tšabá tmontsamama, chca, n̄ye ntšamo entšanga mondbetsejuabnaycá. Pero atšna ndocnabiama chca quetsátichamo.

<sup>16</sup> Atše ndoñe n̄ye canya quetsátsmēna ín̄yabiama jayanama tšabá o ndoñe tšabá tontsamama; ndayá atšbe Taitá, chē šonjichmó cha, átseftaca chca jayanana. Chíyeca, atše ín̄yabiama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana.

<sup>17</sup> Tšēngaftangbe leyiñe enduábemana, uta entšata ndayámnaca cachcá tbojayanēse, ntšamo chata tbojayancá puerte jtsámanana ca.

<sup>18</sup> Y morna, atše sēntsichamo chē ntšamo cach atšbiama ndegombre yomncá, y atšbe Taitá, chē šonjichmó chánaca entsichamo ntšamo atšbiama ndegombre yomncá ca —Jesús tojánayana.

<sup>19</sup> Chora chēnga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tšēngaftanga ndoñe quešmatábuatma ni atše ni atšbe Taitá. Atše šmojtsábuatmēsna, atšbe Taitánaca šmattsábuatma ca.

<sup>20</sup> Bēngbe Bētsabe bēts yebnoca, chē crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

*“Chë chanjá luaroye, tsëngaftanga ndoñe quešmátobena jama”*

21 Chora Jesús yojtétóntša oyebuambnayana: —Atše chantá, y chora tsëngaftanga atše šmochántseguaye. Masque chca, šmochanjóbana tsëngaftangbe bacna soyëngama ndëperdonánënga. Chë chanjá luaroye, tsëngaftanga ndoñe quešmátobena jama ca —Jesús tojánayana.

22 Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

23 Chora Jesús tojanéyana: —Tsëngaftanga quem luaroquënga šmondmëna; atšna tsbananocá, celocá sëndmëna. Tsëngaftanga nÿe quem luarama enójuabnayënga šmondmëna, pero atše ndoñe.

24 Chíyeca atše chca tcbonjáuyana, chë “tsëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tsëngaftangbe bacna soyëngama ndëperdonánënga šmochanjóbana ca.

25 Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatsé orscana chama tcbonjáuyana.

26 Atše ba soyënga sëntsebmoma tsëngaftangbiamá jayanama, tsëngaftangbe contra jayanama; pero chë šonjichmó cha nÿetsca soyëngama ndegombre endbétsichamo, y atšna ntšamo chábensana tijouencá, cachcá quem luare oyenënga sentsëtsësná ca —cha tojanéyana.

27 Pero chënga ndoñe tonjanësertá Jesús cachabe Taitabiamá chca tojanéyanama.

28 As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bëtsemnama. Cachcá, tsëngaftanga šmochántsetatšëmbo, nÿe cach atšbe juábnaca atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuambná.

29 Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

30 Jesús chca tojánayana ora, banga chábeñe imojtsanošbuaché.

*Bëngbe Bëtsabe básenga y chë nÿe bacna soye jtsamama vida bomnënga*

31 Chora Jesús, chë chábeñe imojtsanošbuaché judiënga tojanéyana: —Ntšamo cbontsëtsësnacá tsëngaftanga sempre šmojtsamëse, ndegombre atšbe uatšëndayënga šmochántsemna.

32 Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

33 Chora chënga tmojanjuá: —Bëngna Abrahámbentsana entšanga fsëndmëna, y ndocná ndocna te chešnáisishëche nÿe chabiamá nÿets tempo jtsoservenama. As, ¿ndáyeca šcojtsëtsësná bënga atsebácanënga fchtsemna ca?

34 Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana.

35 Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá.

36 Y chca, Bëngbe Bëtsabe Uaquiñá chacmojátsebacase, tsëngaftanga ndegombre atsebácanënga šmochántsemna bacna soyënga juabnënguentsana.

37 Atše sëndëtatšëmbo tsëngaftangna Abrahámbentsana entšanga šmomnana; pero tsëngaftanga šmontseboše atše jóbama, ntšamo atše cbontsëtsësnacá ainaniñe jýëngacñama ndoñe quešmátsboše causa.

<sup>38</sup> Ntšamo atšbe Taitábioca tijinyá, cach soyëngama atše sëntsoyebuambná. Tšëngaftángnaca, cachcá ntšamo tšëngaftangbe taitábentšana šmojouencá šmontsama ca –tojanéyana.

<sup>39</sup> Chora chënga tmojanjuá: –Bëngbe uámana bëts taitá, Abraham endmëna ca.

As Jesús tojanéyana: –Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama.

<sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá.

<sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca –Jesús tojánayana.

Chora chënga tmojaniana: –Bënga nýe enaquécana básenga ndoñe queftsátsmëna. Chë nýe canýe taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanéyana: –Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nýe atšbe ponto ndoñe chiyátabo; Bëngbe Bëtsá šonjichmó.

<sup>43</sup> ¿Ndáyeca tšëngaftanga ndoñe šmontsobena atšbe palabrénga josértana? Co, ntšamo cbontsëtsësnacá joyeunayama ndoñe quešmátsboše causa chca.

<sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanabe juabnoca, ndocna tšabe soyënga ni ndegombre soyënga ntsebínýnana. Chíyeca, ndocna te cha ntšamo ndegombre yomncá ntsamana. Cha canýe bostero endmëna, y chábentšana nýetsca bostero soyënga jtsóbocanana. Chíyeca, cha tojtsebostero ora, nýe ntšamo cachá yomnama jtsichámuana.

<sup>45</sup> Atšna sempre ntšamo ndegombre yomncá cbondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché.

<sup>46</sup> ¿Nda tšëngaftanguentsá nanjobenaye jinýanýiyana atše ndaye bacna soye tijamama? Y atše, nýe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché?

<sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsue-nanana. Pero tšëngaftangna ndoñe Bëngbe Bëtsabe entsanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca –Jesús tojanéyana.

### *Cristo Abrahambiana más natsana ya yojtsemna*

<sup>48</sup> Chora chë judiënga tmojaniana: –Ajá, bënga co ndegombre fstsichamo, aca nýe samaritano y bacna bayëjbe juabna uambayá comna ca fstsichamo ora ca.

<sup>49</sup> Y Jesús tojanéjua: –Atše ni mo canýe bayëjbe juabna quetsatambá. Ntšamo atše sëntsamcá, endmëna jinýanýiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinýinýná.

<sup>50</sup> Atše ndoñe quetsátsboše ínýenga atše más uamaná chašmobemama. Pero inýa endmëna; cha aíñe endboše atše bëtsá bëtsemnama chaminýanýema. Y chánaca endmëna chë ínýengbiana tšabá o ndoñe tšabá tmontsamama endbet-sichamuá.

<sup>51</sup> Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca –Jesús tojánayana.



<sup>52</sup> Chora chë judiënga tmojanianya: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nyetscanga Bëngbe Bëtsabe juabna oyeuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”?

<sup>53</sup> ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyeuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanëjua: —Atše nÿe cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiana tšëngaftanga šmondbétsichamo tšëngaftangbe Bëtsá canmëna ca.

<sup>55</sup> Pero tšëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámëse, átšnaca cach tšëngaftangcá canÿe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbétsama.

<sup>56</sup> Tšëngaftangbe uámama bëts taitá Abraham, chë atše jabama te jinÿama yojtsejuabnaye ora, puerte oyejuayá yojtsemna. Y pronto tojëftsaninÿe, y puerte tojanoyejuá ca —Jesús tojánayana.

<sup>57</sup> Chora chë judiënga tmojanianya: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsiniÿe ca?

<sup>58</sup> Chora Jesús tojanëjua: —Ndegombre cbëyana, Abraham cabá ndoñe ainá quenjatsmëna ora, atše ya sënjetsemna ca.

<sup>59</sup> Jesús chca tojanëjua ora, chënga ndëtsbenga tmojanájaca cha jt-satëchënganjama. Pero Jesusna oitanánana, Bëngbe Bëtsabe bëts yebnentsana tojésanbocna.

## 9

### *Jesús tojanma, canÿe boyabása jtaná onÿnaná chabuabínÿnama*

<sup>1</sup> Canÿe luarëjana yojtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna.

<sup>2</sup> Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

<sup>3</sup> Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entšanga jinÿanÿiyama ntšamo Bëngbe Bëtsá yobencá.

<sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye.

<sup>5</sup> Quem luariñe chjëftsemnëntscuana, atše quem luare entsangbe juabnënga binÿnayá chanjëftsemna ca —tojanëyana.

<sup>6</sup> Chca tojánayanentsana, Jesús fshantsiñe tojanbuashëtjo, y chë yebuáyeca batšá ngüiche tojانبema, y chë jtaná chë ngüicheca tbojanbuchanëtjo.

<sup>7</sup> Chora chë jtaná tbojanianya: —Motsa y metsobúchjabebiyë, chë binche uafjajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiyë, y yebnoye tojtaná ora, ya ibojtsabinÿna.



8 Chë juachañe oyenënga y chë jtaná tempo lemošna otjanañana tmojáninyënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

9 Inyënga imojtsichamo: —Cha entsemna ca.

Y ínÿengna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

10 As chë entsanga tmojantjá: —¿Ntsámo chca mora cmojtsabinÿna ca?

11 Y cha tojanëjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiye ca”. Chcasna, atše sënjá, sënjetsobúchjabebiye y cachora šontsabinÿna ca.

12 Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanëjua.

### *Chë jtana shnanábioye fariseunga imojtsetjanaye*

13 Chora chë entsanga, chë jtaná inamná fariseúngbioye tmojanánatse.

14 Chë Jesús batšá yebuáyeca ngüiche tojánbema, y chë jtaná tojanma te, canÿe ochnayté inamna.

15 As chë fariseunga chë boyabása tmojantjá: —¿Ntsámoyeca mora cmojtsabinÿna ca?

Chora cha tojanëjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiye, y cachora šonjuabinÿna ca.

16 As chora básefta fariseunga imojtsichamo: —Chë jtaná chabotsabinÿnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inyënga imojtsichamo: —Cha canÿe bacna soyënga amá tojtsemnëse, ¿ntsámo nantsobena canÿe bëts soye Bëngbe Bëtsabe obenánaca jamama ca?

Y chca, ínÿengna Jesusbe pavor imojtsemna, y ínÿengna chabe contra.

17 Chama chënga cachiñe chë jtaná inamná tmojtëtantjá: —Er aca mora chacmotsabinÿnama cha tojamëse, ¿chabiamama ntsámo catjayana ca?

Chora cha tojanëjua: —Chana canÿa Bëngbe Bëtsabe juabna oyebuambnayá entsemna ca.

18 Pero chë judiënga ndoñe montsanošbuaché, cha chë jtaná inamnama y chora ibojtsabinÿnama. As chënga, ínÿengna tmojanichamó chë boyabásabe bëtsétsata jobiatšama.

19 Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonÿnama? Chcase, ¿ntsámo mora cha ibojtsabinÿna ca?

20 Chora chë bëtsétsata tmojanëjua: —Aíñe fsëndétatšëmbo cha bëndatbe uaquiñá endmënama y jtaná tonjanonÿnama.

21 Pero ndoñe queftsátstatšëmbo ntsámoyeca mora chca ibojtsabinÿnama, ni bëndatbe uaquiñá chabotsabinÿnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

22 Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsétsatna chama ibojtsauatja;

23 chíyeca tmojanëyana: “Cha ya bëtsá entsemna. Cachá motjanga ca”.

24 As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiamama ndegombre mobuambá. Bënga fsëndétatšëmbo chë boyabása canÿe bacna soyënga amá yomnama ca.

25 Chora cha tojanějua: —Cha canye bacna soyenga amá o ndoñe tondmënama, atse ndoñe quetsátstatšëmbo. Atse nye mëntšá sëntsetatšëmbo: Atse jtaná sënjanmëna, pero mora šontsabinýna ca.

26 Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

27 Y cha tojanějua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

28 Chora chënga cha tmojtsanóyenguango y tmojaniyana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna.

29 Bënga fsëndëtatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatšëmbo ni mo ndëmocana cha tojabama ca — chënga imojtsichamo.

30 Chora chë boyabása tojanějua: —¡Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašuabinýnama cha tonjama.

31 Bënga tšabá mondëtatšëmbo, bacna soyenga amënga Bëngbe Bëtsá ndoñe queondbátayaunanama. Chana, nye chábioye adorayá y ntšamo cha tojtsebošcá amábioye joyeunayana.

32 Quem luare jobojátšama orscana ndocna te quenaisótatšëmbo canye jtaná onýnanabiama ndánaca cha chabotsabinýnama tojëftsemama.

33 Quem boyabása, Bëngbe Bëtsabe ichmoná chabe soyenga jamama ndoñe tontsemnëse, tondaye nantsobena jamama ca —chë entšá tojánayana.

34 As chë fariseunga tmojaniyana: —¡Ndayá! Aca tcojanonýná orscana, corente bacna soyenga amá tcomnëse, ¿ntšamo mora bënga šcochjátabuatabaye ca?

Y chora chë judiëngbe enefjuana yebnentšana cha tmojtanábocna.

*Chë Bëngbe Bëtsabe soyëngama mo jtanëngcá imomnënga*

35 Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojaniyana: —¿Aca Bëngbe Bëtsá Entšá tbojanbemábeñe quecojtsošbuaché ca?

36 Y cha tbojanjúá: —¿Taita, nda cha yojtsemna, as atse chábeñe jtsošbuáchiyama ca?

37 As Jesús tbojaniyana: —Aca ya tconjinýe; chë ácaftaca entsoyebuambná cha entsemna ca.

38 Chora, chë boyabása Jesús bentse tojanoshamentšé jëtschuayama y tbojaniyana: —Atšbe Utabná, aíñe sëntsošbuaché ca.

39 Chora Jesús chë entsanga tojanéyana: —Atse quem luaroye tijabo ndayá entsanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyenga atse chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nye batšá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

40 Básefta fariseunga Jesúsëftaca imojtsemnënga chca tmojanuena ora, cha tmojaniyana: —Ndegombre bënga ndoñe mo jtanëngcá queftsátsmëna ca.

41 Chora Jesús tojanějua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuabase, ndayá šmojtsamcá Bëngbe Bëtsá mo bacna soyenga cuenta ndoñe queochátonýaye. Pero tšëngaftanga corente

Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca — Jesús tojanëyana.

## 10

### *Chë oveshënga abujënëya y chabe oveshënga*

<sup>1</sup> As Jesús tojanëyana: “Ndegombre šcuayana: Nda chë oveshëngbe luaroye bësáshajana ndoñe tonjámashëngo, pero aíñe inyájana tojtsamáshëngo, chana canye atbëbaná y abacayá jtsemnana.

<sup>2</sup> Pero chë bësáshajana tojamashënguana, chë oveshënga anyëná jtsemnana.

<sup>3</sup> Chë bësásha ebtafjuaná, chë bësásha jebëtafjuana, y chë oveshënga abujënëya ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujënëya yojtsachembuanama; y chë luarentšana cha jubuacnana.

<sup>4</sup> Nyetsca oveshënga tmojábocana ora, chë abujënëya chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana.

<sup>5</sup> Pero chë tmonduabuatmábioyna chë oveshënga ndoñe ntjuastana; nye chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojanayana.

<sup>6</sup> Jesús entšanga chca tonjanacuntá, pero chënga ndoñe ntjosértana ntšamo yojtsentšayancá.

### *Jesús, chë oveshënga tšabe abujënëya*

<sup>7</sup> As Jesús cachiñe tojanëyana: “Ndegombre cbëyana: Atše sëndmëna chë bësásha oveshënga mondbëtsamashjuanëjana.

<sup>8</sup> Nyetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana.

<sup>9</sup> Atše chë bësásha sëndmëna. Nda quem bësáshajana tojamashënguá, atsbocaná echántsemna. Canye oveshá jamashënguana y jabocnana, y shácuana jónyëna. Cachcá, chë quemëjana tojamashënguá, lempe echanjónyëna.

<sup>10</sup> “Chë atbëbaná jabana nye jatbëbama, jóbama y lempe jtsepochoçama; pero atšna, entšanga vida chamotsebomnama y átšeftaca bëtscá tšabe vida chamotsebomnama tijabo.

<sup>11</sup> “Atše sëndmëna chë oveshënga tšabe abujënëya. Chë oveshënga tšabe abujënëya sempre jtseprontánana chëngbiamá jóbana, chabe oveshënga ababuányëshanayeca.

<sup>12</sup> Pero nda nye crocenánama totrabája y chë oveshënga ndoñe chábënga tmontsemna, cha nderado tojinye canye tjañe queše chë oveshëngbioye tojtsobécocnama, cachora nye cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nye cátoye jtsachetana.

<sup>13</sup> Cha jtsemnana nye crocenánama trabajayá; chabiamá nye chë uacanána más uámana soye jtsemnana, y chë oveshëngbiamá tondayana ntsentšamnana; chíyeca cha jtsachana.

<sup>14</sup> “Atše sëndmëna chë oveshënga tšabe abujënëya. Atše chënga sëndëubuatma, y chëngnaca atše šmonduábuatma.

<sup>15</sup> Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndëtseprontana jóbana, atšbe oveshënga sëndababuanyëshánayeca.

<sup>16</sup> Atše inye oveshënga sëndábamna, pero chënga ndoñe quem luariñe oveshënga quemátmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša

oveshëngaftaca cányiñe mochántsemna, y atšna nyetsca chë oveshëngbiama chë abujénya chántsemna.

<sup>17</sup> “Atše sempre sëndétseprontana jóbanama, chora jtayenama. Chiyeca chë Taitá šondbobonshana.

<sup>18</sup> Ndocná atšbe vida quešochatsbojuána, pero chënga sëndababuanjšánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiama jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

<sup>19</sup> Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna.

<sup>20</sup> Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

<sup>21</sup> Pero ínÿengna imojtsanichamo: —Ndocna bacna bayëjbe juabna uambayá ntobenanana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

*Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnana*

<sup>22</sup> Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama.

<sup>23</sup> Jesús Bëngbe Bëtsabe bëts yebnocca yojétsana, canÿe amashjuana otsbojebniñe, Salomonbe Amashjuana ca uabáinentše.

<sup>24</sup> Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiama ndegombre soye ntsetatsëmbcá? Aca chë Cristo cojtsemnëse, chama lempe tšabá šmanÿanjé ca.

<sup>25</sup> As Jesús tojanëjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanjá nda atše bëtsemnana.

<sup>26</sup> Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abujénya mond-betsëstoncá.

<sup>27</sup> Chë atše šmondústonënga, atše šmondbóyeunaye y šmondbëuasto. Atše chënga sëndëubuatma.

<sup>28</sup> Atše chanjama, quem entšanga chë nyetsca tescama yomna tšabe vida chamotsebomnana; chënga ndocna te pochocánënga quemochátsmëna, y ndocná quenátobena átšbentšana chënga jefcana.

<sup>29</sup> Atšbe Taitá Bëngbe Bëtsá, chë entšanga atše chašmuastama tojamá, nyetscangbiama más bëtsá endmëna, chiyeca ndocná quenátobena chábentšana chënga jefcana.

<sup>30</sup> Chë Taitá y atše canÿa fsëndmëna ca —Jesús tojánayana.

<sup>31</sup> Chora, chë judiënga cachiñe ndëtšbenga tmojanájaca Jesús jtsatëchënganjama.

<sup>32</sup> Pero Jesús tojanëyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

<sup>33</sup> Chora chë judiënga tmojanjúá: —Ni canÿe quem bëts soyëngama bënga queftsátsboše aca jtsatëchënganjama. Aca Bëngbe Bëtsabiama ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca;



chíyeca bēnga fsēntseboše ndētsbēngaca aca jtsatēchēnganjama ca —chēnga tmojaníyana.

<sup>34</sup> Chora Jesús tojanéyana: —Bēngbe Bētsabe uabemana palabrēnguiñe mēntśá endayana: “Atše sēnjayana tšēngaftanga diosēnga šmomna ca.”

<sup>35</sup> Bēngbe Bētsá chca tojánayana chē chabe palábraca y cha chamot-seservénama tojánamandangiama; ndocná quenátobena jinýanýiyana ni mo canýe soye Bēngbe Bētsabe uabemana palabrēnguiñe, ndoñe ndegombre soye yomnama.

<sup>36</sup> Y atšbiamá, Bēngbe Bētsabiacá uabuayaná y quem luare ichmoná, ¿ntśamo tšēngaftanga šmojtšobena jayanama, “aca Bēngbe Bētsabiamá ndoñe tšabá quecátichamo ca”, chē Bēngbe Bētsabe Uaquiñá sēndmēna ca atše tijayanama?

<sup>37</sup> Ntśamo atšbe Taitá endamcá atše ndoñe sēntśamēse, tšēngaftanga átšbeñe ndoñe šmattsošbuáchiye.

<sup>38</sup> Pero, ntśamo atšbe Taitá endamcá atše aíñe stśamēse, masque ndoñe átšbeñe šmontsošbuaché, nýe chē Taitabe obenánaca soyēnga tijamama šmochtsošbuáchiye. As, canýe ora chašmotsetátšēmo y chacmēsertá, chē Taitá átšbeñe yomnama y atše chábeñe tsmēnama ca —Jesús tojanéyana.

<sup>39</sup> Chora chēnga cachiñe tmojánbošena Jesús jishachama, pero cha chēngbentśana tojanotsbocá.

<sup>40</sup> Chentśana, Jesús Jordán bėjaye chenguana tojesaná y choca tojtśanoquedañe. Chentše Juan tempo entśanga yojanēbáyana.

<sup>41</sup> Ba entśanga tmojána Jesús jinýama, y mēntśá imojtsichamo: “Ndegombre, masque Juan ni mo canýe bēts soye Bēngbe Bētsabe obenánaca tonjéftsema, lempe ntśamo quem boyabásabiamá tonjanoyebuambacá, ndegombre yojamna ca.”

<sup>42</sup> Y chentše, ba entśanga Jesúsbeñe imojtsanošbuaché.

## 11

### *Lázaro tojanóbana*

<sup>1</sup> Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Maríaftaca, chabe uabénata.

<sup>2</sup> Quem María inamna nda Bēngbe Utabná Jesusbe shecuatšiñe botamana uanguētsiye tbojanáshecbuešcja, y chabe stjēnashaca tbojtanshecbójó cha.

<sup>3</sup> Chē uta uabénatna ínýenga tmojanichamó Jesús jauenayama: —Bēngbe Utabná, chē aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmēna Lázaro chaóbanama. Pero aíñe entsemna Bēngbe Bētsabe obenana entśanga jinýanýiyama, y Bēngbe Bētsabe Uaquiñá chamuatschuama ca.

<sup>5</sup> Jesús corente yojánababuanýeshana Marta, María y chatbe uaftše Lázaro.

<sup>6</sup> Masque chcasna, Lázaro šocá yojtsemna ca Jesús tmojaníyana ora, cabá uta te más cha yojtsemna luarentše tojtśanoquedañe.

<sup>7</sup> Chentśana, chabe uatsjéndayēnga tojanéyana: —Judeoye cachiñe cuajna ca.

<sup>8</sup> As chē uatsjéndayēnga tmojaníyana: —Buatēmbayá, baseftayté entsemna chē luaroca judiēnga cmonjanbuachetá ndētsbēngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanéyana: —Bnētsana uta hora bnēté endmēna. Nda bnēté tojtśana, ndoñe ntjojéstjiana, binýniñe bētsemnayeca. Cachcá átšeftaca endmēna, tondaye quenátopodena átšeftaca jopásana, atše jóbana cabá ndoñe tonjobuache ora. Pero ibeta tojtśanēse, cha jtsojéstjiana, ndoñe



binÿniñe causa. Cachcá, bēnga šontsamna yojsēsšáchenēntscuana jatrabájana. Atšbe jóbanama tempo chaojóshjango ora, ya ndoñe queochátēshachena jatrabájama ca —tojánayana.

<sup>11</sup> Chentsana tojanéyana: —Bēngbe amigo Lázaro tojtsomaná, pero atše choye chanjá jetsefšenama ca.

<sup>12</sup> Chora chē uatsjēndayēnga tmojanjuá: —Bēngbe Utabná, tojtsomanase yojsayana chana tšabá yochtsatsmēna ca.

<sup>13</sup> Pero Jesús yojsanētsētná ndayá Lázaro tojtsanóbana ca, y chabe uatsjēndayēngna imojtsejuabnaye Lázaro ndegombre yojsomáñama.

<sup>14</sup> As Jesús tšabá tojanéyana: —Lázaro tontsóbana.

<sup>15</sup> Atše sēntsoyejuá choca atše ndoñe tsmēnama, tšēngaftangbe tšabiamna chaotsemnama; chca, tšēngaftanga más átšbeñe chašmotsošbuáchema. Pero cuajna cha jinÿama ca.

<sup>16</sup> Chora Tomás, chē Gemelo ca uabobainá, chē inÿe uatsjēndayēnga tojanéyana: “Bēngnaca cuajna, cháftaca mochjóbana ca.”

*Jesús iuama entšanga chámuatayenama y chē nÿetsca tescama yomna tšabe vida chamotsebomnama*

<sup>17</sup> Jesús chē béconana tojánashjango ora, tojántatšēmbona Lázaro ya canta te uatbontsána yojtsemnama.

<sup>18</sup> Betania pueblo yojamna Jerusalén béconana, mo unga kilómetroca.

<sup>19</sup> Ba judiēnga tmojána Marta y María jautsētsayama y jatjēmbambayama ndoñe tša ngmēnaca chabondētsemnama, chatbe uaftše tojanóbana causa.

<sup>20</sup> Jesús yojsashjajuanama Marta tojántatšēmbona ora, tojánbocna cha jajébenguama, pero María cach yebnentše tojanoquedá.

<sup>21</sup> Chora Marta Jesúsbioye tbojanियana: —Bēngbe Utabná, aca muentše macmēnese, atšbe uaftše ndoñe matēnjóbana.

<sup>22</sup> Pero atše sēntsetatšēmbo, masque ndayánaca mora Bēngbe Bētsá chacojotjañe, y cha lempe chca cmochjátšetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojanियana: —Aíñe, atše sēndētatšēmbo cha yochtayenama, pero quem luare jopochócama te, nÿetsca obanēnga mochtayena ora ca.

<sup>25</sup> As Jesús tbojanियana: —Atše sēndmēna chē entšanga chámuatayenama y chē nÿetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena.

<sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chē cbontsatsá soyiñe quecojtsošbuaché ca? —Jesús tbojantjá.

<sup>27</sup> Chora Marta tbojanियana: —Aíñe, Bēngbe Utabná, atše áceñe sēntsošbuaché, aca chē Cristo, chē Bēngbe Bētsabe Uaquiñá y chē quem luaroye jabamá comnama ca.

*Jesús, Lázaro yojsátbontsana cuevēshentše yojenóbošachna*

<sup>28</sup> Chca tojánayanentšana, Marta tojtaná chabe quenata María jachembuama, y iytēcana tbojanियana: “Buatēmbayá tonjášhango y entseboše aca jinÿama ca.”

<sup>29</sup> María chca tojanuena y cachora tojēftsanbocna y tojána Jesús jinÿama.

<sup>30</sup> Jesús cabá ndoñe chē puebløye tonjánamashēngo; yojētsemna Marta tbojanjébengo luarentše.

<sup>31</sup> Chē yebnentše imojtsemna judiēnga, María tša ngmēnaca ndoñe chaondētsemnama tjēmbambayēnga, tmojánbocana María juastama; er chē

tojéftsantsbaná y tojéftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chábentše tojanoshamentše y tbojaniana: –Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nyetscanga imojetsenóbošachiye; y Jesús chca tojáninýe ora, corente tbojancochtsetšena y puerte ngménaca yojtsemna.

<sup>34</sup> Chora Jesús tojanatjá: –¿Ndayentše cha šmojuatbontsá ca?

Y chënga tmojanjuá: –Bëngbe Utabná, mabo y cochjinýe ca.

<sup>35</sup> Chora Jesús tojánenobošachna.

<sup>36</sup> As chë judiënga tmojánayana: –¡Minýënga, tša ibnabobonshana ca!

<sup>37</sup> Pero inýe judiënga imojtsichamo: –Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

### *Lázaro tojtanyena*

<sup>38</sup> Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentše canýe bëts ndëtsbeca yojtsatámena.

<sup>39</sup> Chora Jesús tojanéyana: –Chë ndëtsbé mojuánanga ca.

Chora Marta, chë obanabe uabena tbojaniana: –Bëngbe Utabná, mora ya bacá yojtsonguëtsé, er ya canta te entsemna cha tontsóbana ca.

<sup>40</sup> Y Jesús tbojanjuá: –Ndegombre, ya tcbonjauyana, aíñe átšbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtsbé tmojanjuaná; Jesús celoye yojontješiye y Bëngbe Bëtsábioye tbojaniana: “Taita, cbatschuá atšbe opresido tcojouenama.

<sup>42</sup> Atše sëndëtatšëmbo aca sempre šcondbëtseyeunanama; atše chca tcbonjauyana, muentše montsemna entšangbe tšabiama, chca, aca atše šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

### *Chë judiëngbe amëndayënga tmojanenoyeuná Jesúsbioye jóbama (Mt 26.1-5; Mc 14.1-2; Lc 22.1-2)*

<sup>45</sup> Chë soyëngama, banga chë judiënguentsana, María jatjëmbabayama tmojánanga, y ntšamo Jesús tojanmcá tmojáninýënga, Jesúsbeñe imojtsošbuaché.

<sup>46</sup> Pero inýe judiënga fariseúngbioye tmojána, ntšamo Jesús tojanmama chënga jacúntama.

<sup>47</sup> As, chë fariseunga y chë bachnangbe amëndayënga tmojánenefjna inýe judiëngbe amëndayëngaftaca, y tmojánayana: –¿Ndayá mochjobenaye cháftaca jamama? Quem boyabása bëts soyënga entsama.

<sup>48</sup> Nýe cachcá chamojonýase, nyetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca – chënga imojtsichamo.

<sup>49</sup> Pero canýa chënguentsá, Caifás ca uabainá, chë uata chë bachnangbe más uámana amëndayá inamná, tojanéyana: –Tšëngaftanga tondaye quešmátstatšëmbo.

<sup>50</sup> Y ndoñe quešmatsjuabná, tšëngaftangbiamá más tšabá yojtsemna nÿe canÿe boyabása Israeloca entšangbiamá chaóbana, y ndoñe nÿets bëngbe luare chamotseepochocá ca —cha tojanéyana.

<sup>51</sup> Pero Caifás chë soye nÿe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojamna Israeloca entšangbiamá jóbana ca.

<sup>52</sup> Y ndoñe nÿe Israeloca entšangbiamá, sinó chë inÿe luarënguiñe Bëngbe Bëtsabe básenga tmojanáshanënga chamuatábama, as chca, nÿetscanga nÿe canÿe luarentša entšanga chamotsemnama.

<sup>53</sup> Chcasna, cach tescana judiëngbe amëndayënga tmojanenoyeuná Jesús jóbama.

<sup>54</sup> Chíyeca Jesús entšángbeñe, Judea luariñe ya ndoñe yontsana. Chë luarentšana tojëftsanbocna y canÿe luaroye tojtsanoñe, entšanga ndoyeniñe béconana, canÿe pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

<sup>55</sup> Judiëngbe Bashco fiestama batšá yojtsájamna, y ba entšanga pueblënguentsána Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyáma tšábenga jtsemnama, chë Bashco fiesta cabá ndobuache ora.

<sup>56</sup> Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

## 12

*María, botamana uanguëtsiye Jesúsbeñe tbojanáshecbuešcja*  
(Mt 26.6-13; Mc 14.3-9)

<sup>1</sup> Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena.

<sup>2</sup> Chentšna bëts saná Jesusbiamá tmojanábua. Marta tojanëjuatšé, y Lázaro yojtsemna chë Jesúsëftaca juasama meséshañe imojtsetbiámanënguëntše.

<sup>3</sup> As María canÿe jarrëtema tojanaca; chiñe yojanaftsuamna canÿe botamana uanguëtsiye, bëts cá uámaniye, ena nárdoca pormániye. Chë uanguëtsiye, María, Jesusbe shecuatšënguiñe tbojanáshecbuešcja, y cachabe stjënashaca tbojtanshechojó. Chora, chë yebnentše ena nardiyana yojtsonguëtsiye.

<sup>4</sup> Chora, canÿa Jesusbe uatsjëndayënguentsá, Judas Iscariote, chë Jesús uayayëngbe cucuatšinë yochjanayentšbashejuaná, tojánayana:

<sup>5</sup> —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuiye y ndbomnjëmënga chë crocénana mašmëntsatsatá ca?

<sup>6</sup> Pero Judas chca tojánayana, chë ndbomnjëmëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocénanentšana cha yojánatbëbana.

<sup>7</sup> As Jesús tbojanjuá: —Cachcá monÿá. María mëntscoñe chë botamana uanguëtsiye iuabofjájona, cha jobenayama átšbeñe jabuëšcjama, er ndoñe bën y atše šmochanjaitëme.

<sup>8</sup> Chë ndbomnjëmëngna tšëngaftangbeñe sempre mochanjesomñe, pero atše ndoñe ca —tojánayana.

*Judiënga tmojanenoyeuná Lázaro jóbama*

<sup>9</sup> Ba judiënga tmojántatsëmbona Jesús Betanioca yojtsemnama, y choye tmojána, ndoñe nÿe Jesús jinÿama, sinó Lázarnaca, chë Jesús tbojtanayená cha.

<sup>10</sup> As chë bachnangbe amëndayënga tmojanenoyeuná Lázarnaca jóbama.

<sup>11</sup> Chabe causa, ba judiënga chëngbioye cachcá tmojesanëñÿa y Jesúsbeñe imojtsošbuaché.

*Jesús Jerusalenoye tojánashjango*

*(Mt 21.1-11; Mc 11.1-11; Lc 19.28-40)*

<sup>12</sup> Chë yëfsana, mallajta entsanga, Jerusalenoca fiestama tmojánashjainënga, tmojántatsëmbona Jesús choye yochjánashjanguama.

<sup>13</sup> As chëngna palma betiye buacuafjënga tmojanatëtsetse, y Jesús jajébenguama tmojánbocana, y mëntsá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

<sup>14</sup> Jesús canÿe burrotema tbojáninÿena y chábeñe tojanenoye. Ntšamo Bëngbe Bëtsabe uabemana palabrënguiñe iuayancá, cachcá tojanopasá. Chiñe mëntsá endayana Jerusalenoca entsangbiama:

<sup>15</sup> Sión bëts puebloca oyenënga, ndoñe matauatjëngana.

Minÿënga, tšëngaftangbe Rey burrotëmiñe enjaquená entsabó ca.

<sup>16</sup> Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninÿanÿé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrënguiñe iuayancá y cachcá Jesúseftaca tojanopasama.

<sup>17</sup> Chë Jesúseftaca imojtsemna entsanga, Lázarbïoye uatbontsánoye tbojanchembo ora y chentšana tbojtanayená ora, ntšamo tmojáninÿama chora imojtsecuëntaye.

<sup>18</sup> Chíyeca, ba entsanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca.

<sup>19</sup> Pero chë fariseunga imojtsenatsëtsnaye: “Tšëngaftanga šmontsonÿá bënga tondaye jamama quemuátobenama y más, inÿetscanga cha montsëstona ca!”

*Básefta Grecia luaroca entsanga Jesús tmojánguango*

<sup>20</sup> Bashco fiestama, chë Bëngbe Bëtsá jadórama Jerusalenoye tmojánangbeñe, básefta griego entsángnaca imojtsemna.

<sup>21</sup> Chëngna, Felipe chë Galilea luarocá, chë Betsaida pueblócábïoye, tmojanobeconá y tmojanimpadá: “Señor, bënga fsëntseboše Jesús jinÿama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguëngbiama jauenayama.

<sup>23</sup> Jesús chata tojanëyana: “Chë Bëngbe Bëtsá Entsá tbojanbemá corente bëtsá yomnama jinÿanÿiyama te ya tojobuache.

<sup>24</sup> Ndegombre šcuayana: Canÿe trigo jénaye ndoñe fshantsiñe tmonjuatbontsá y ndoñe tonjóbanëse, nÿe cach canÿe trigo jénaye jesomñana. Pero tmojuatbontsá y tojóbanase, bëtscá jashájonana.

<sup>25</sup> Cachcá, nda nÿe cachá tojtsenóbobonshana, cha chabe vida echanjëftsobuetše. Pero nda nÿe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nÿetsca tescama yomna tšabe vida echántsebomna.

<sup>26</sup> Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bëtsá echanjínÿanÿiye bëtsá yomnama ca” —Jesús tojánayana.



*Jesús tojánayana cha yochjanóbanama*

<sup>27</sup> Y más Jesús tojánayana: “¡Mora tša cochtsetšenaná sěntsemna! ¿Atše chjayana: “Taita, chě átseftaca echanjopása soyēnga šmotsebojuaná ca?” Ndoñe; er más chama atše quem luaroye tijabo.

<sup>28</sup> Taita, šminyanjé aca puerte bětsá y obená comnama ca.”

Y cachora, celocana canye oyebuambnayana tojanóbocna mēntšá: “Ya tcbonjinyanjé atše puerte bětsá y obená tsmēnama, y mora cachiñe cachcá chanjama ca.”

<sup>29</sup> Entšanga chca tmojanuena ora, ínŷenga imojtsichamo nŷe tojanjuésase ca; pero ínŷengna imojtsichamo: —Canye ángel chábioye tbonjuatsětsá ca.

<sup>30</sup> Chora Jesús tojanéyana: —Ntšamo šmonjouencá, atšbiana ndoñe quenátsmēna, sinó tšēngaftangbiama.

<sup>31</sup> Mora chě tempo entsemna, chě quem luare entšanga tmojěftsema bacna soyēnga jinyanjeyama y chēngbe castiguama jayanama. Y mora, chě nŷetsca bacna soyēnga mandayá, quem luarentšana mochantábocna.

<sup>32</sup> Pero atše fshant socana atsbananá chaitsemna ora, nŷetsca entšanga átšbioye chanjúbuaja ca —Jesús tojánayana.

<sup>33</sup> Chca cha yojtsichamo, ana jinyanjeyama ntšamo jóbanama ibojamnama.

<sup>34</sup> Chora chě entšanga tmojanjuá: —Bēngbe Bětsabe uabemana pal-abrēnguiñe endayana, y chíyeca bēnga fsēndětatsēmbo chě Cristo nŷetsca tescama vida yochtse bomna ca. As, ¿ndáyeca cojtsichamo, Bēngbe Bětsá Entšá tbojanbemá chamuatsbanama yojtsemna ca? ¿Nda yojtsemna Bēngbe Bětsá Entšá tbojanbemá ca? —chēnga imojtsichamo.

<sup>35</sup> Y Jesús tojanéyana: —Nŷe baseftatescama chě entšangbe juabnēnga binŷnayá tšēngaftangbeñe entsemna. Chě binŷnayá cabá tšēngaftangbeñe yojtsemnēntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binŷniñe tojtsana, cha ndoñe ntsetatsēmbuana ndēmuajana yojtsana.

<sup>36</sup> Chě binŷnayá cabá tšēngaftangftaca endětsemnēntscuana, chábeñe šmochtsošbuáchiye; as, tšēngaftangbe juabnēnga binŷniñe echántsemna ca —Jesús tojánayana.

Chě soyēnga tojánayanentšana, Jesús tojtsanoñe y entšangbiama yojtsóitana.

*Ndáyeca chě judiēnga Jesúsbeñe ndoñe montsanošbuaché*

<sup>37</sup> Masque Jesús, judiēngbe delante ba běts soyēnga Bēngbe Bětsabe obenánaca tojěftsema, chēnga ndoñe chábeñe ntsošbuáchiyana,

<sup>38</sup> ntšamo Bēngbe Bětsabe juabna oyebuambnayá Isaías tojanabemcá, cachcá chaotsemnama. Isaías mēntšá tojánayana:

Bēngbe Utabná, ¿nda bēngbe buayenana soyiñe yojtsošbuaché?

Y ¿nda tbojosertá, acbe obenana tcojinjinyé ora ca?

<sup>39</sup> Chíyeca chēnga ndoñe montsobena Jesúsbeñe jtsošbuáchiyama, er Isaías mēntšánaca tojěftsanabema:

<sup>40</sup> Bēngbe Bětsá tojama chēnga chabe soyēngama ndoñe botamana chamondětsejuabnama

y chabe soyēnga ainaniñe ndoñe chamondóyēngacñama,

as ndoñe chaondětsēsertánama ca.

Y Bēngbe Bětsá entsichamo: “Chca entsemna, chēnga atšbe benache ndoñe chamondishachama,

y atše ndoñe ntjátsebacama;

y chca, chēnga mochántsemna mo nděshnana entšangcá ca.”



<sup>41</sup> Isaías chca tojánayana, er tojáninÿe Jesús puerte bêtsá y obená yojamnana, y chca chë uabemaniñe Jesusbiana yojanoyebuambná.

<sup>42</sup> Pero masque chca iuábemanése, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entšángbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe chamondëtëbuacnama.

<sup>43</sup> Chëngbiana más yojánamana, entšanga chëngbiana chamotsichamo tša uámanënga imojamna ca, y ndoñe, Bëngbe Bêtsá chca chaotsamama.

### *Jesusbe palabrëngaca yochtsótatsëmbo entšanga tšabá o ndoñe tšabá tmonjamama*

<sup>44</sup> Chora Jesús mëntsá jabuache tojánayana: “Nda átšbeñe tojtsošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana.

<sup>45</sup> Cachca, nda atše šojtsonÿá, chë šojichmó chábioynaca cha jtsonÿayana.

<sup>46</sup> Atše quem luaroye tijabo entšangbe juabnënga jabobínÿyana, chca, nda átšbeñe tojtsošbuaché, mo ibetiñcá ndoñe chaondëtsemnama.

<sup>47</sup> Pero nda atšbe soyëngama tojouena, pero ntšamo sëntsichamcá ndoñe tontsama, atše chabiana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entšanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama.

<sup>48</sup> Nda atše šojtsaboté y atšbe palabrëngama ndoñe šonjoyeuná, ya entse-bomna nda chabiana yochjayana bëts castigo jtsebomnama ibojtsemna ca. Atše tijanoyebuambá palabrëngaca, quem luare jopochócama te chabiana chca echántsayana.

<sup>49</sup> Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana.

<sup>50</sup> Atše sëndétatsëmbo, atšbe Taitá tojamandá orna, cha jamándana entšanga chë nÿetsca tescama yomna tšabe vida chamotsebomnama. Chíyeca, ndayá sëntsichamcá, endmëna ntšamo atšbe Taitá Bëngbe Bêtsá šojamandacá ca” — Jesús tojánayana.

## 13

### *Jesús chabe uatsjëndayënga tojanashecjabebé*

<sup>1</sup> Bashco fiesta cabá ndobuache ora, Jesús yojtsetátatsëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanÿeshancá, chë quem luare imojamnënga, chórna yojtseboše chë bëts bonshánana puerte más jinÿanÿiyana.

<sup>2</sup> Pero Satanás, Júdasbe ainaniñe bacna juabnënga tojanajajó, uayayëngbe cucuatšifne Jesús jayentšbáshejuanama. Judas Iscariote, Simonbe uaqiñá.

<sup>3</sup> Jesús yojtsetátatsëmbo chabe Taitá Bëngbe Bêtsá nÿets obenana tbojánatsetama. Cachcá, Jesús yojtsetátatsëmbo, Bëngbe Bêtsábioyana cha tojánabama y cachábioyana jtama ibojtsemnama.

<sup>4</sup> Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canÿe tuallëjua tojanenasná.

<sup>5</sup> Chentšana, canÿe bachešifne búyeshe tojanbuešcya y tojanontsé chabe uatsjëndayënga jushecjabebiyana y jtëshecbojuana cha yojtsasnana tuallëjuaca.

<sup>6</sup> Pero, Simón Pedro tbojanobuache ora, Jesúsbioye tbojanianyana: —Atšbe Utabná, ¿aca šcochjuashecjabiá ca?

<sup>7</sup> Chora Jesús tbojanjuá: —Atše sěntsama soye mora ndoñe quecmátěsertana; pero más chcoye aíñe cmochanjosérta ca.

<sup>8</sup> As Pedro tbojanianyana: —¡Ndocna te šcatjuashecjabiá ca!

Pero Jesús tbojanianyana: —Ndoñe chacbonjuáshecjabese, atšbia ndoñe que-cochátsměna ca.

<sup>9</sup> Y Simón Pedro tbojanianyana: —¡Atšbe Utabná, as nýe atšbe shecuatšěnga ndoñe, ndayá atšbe cucuatšěnga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, nýe shecuatše jtsashecjabiama jtsajabótana, ndoñe nýetšá cachiñe. Nda tojtsobebé, ndoñe tsengá ntsemnana. Cachcá, mo beběná cuenta tšěngaftanga šmontsemna; pero canýa muentše entsemna, y cha mo bebenacá ndoñe quenátsměna.

<sup>11</sup> Jesús yojtsetátšěmbo nda chě uayayěngbe cucuatšěne boshjuaná yochtsanměnama, chíyeca tojánayana: “Tšěngaftanguentšá canýa entsemna, cha mo bebenacá ndoñe quenátsměna ca”.

<sup>12</sup> Jushecjabebiyama tojanpochocá ora, chabe juatsboye uichětjoníya tojtaníhětjo, y mesěhentše tojtánótbema. Chora tojanéyana: —¿Chě tcbonjábiamasoyama quecmojtsěsertana ca?

<sup>13</sup> Tšěngaftanga atše šmondbauyana Buatěmbayá y Běngbe Utabná ca; tšabá chca šmontsichamo, er atše ndegombre chca sěndměna.

<sup>14</sup> Atše, tšěngaftangbe Buatěmbayá y Utabná, tcbonjushecjabebé; chcasna, tšěngaftángnaca cmontsamna jenáshecjabebiyana.

<sup>15</sup> Ntšamo quem sóyeca tcbonjanýanýecá, tšěngaftanga cachcá šmochtsama.

<sup>16</sup> Ndegombre šcuayana, chě oservená chabe nduiñbiama ndoñe más uamaná ntsemnana. Cachcá, chě ichmoná chě tbojichmobiyama ndoñe más uamaná quenátsměna.

<sup>17</sup> Quem soyěnga chašmojuatsjinýe y chca chašmojaměse, tšěngaftanga puerte oyejuayěnga vida šmochanjěftsebmna.

<sup>18</sup> “Atše sěndětátšěmbo chě tijábacangbiama, chíyeca atše nýetscangbiama ndoñe chca quetsatoyebuambná. Y ntšamo Běngbe Bětsabe uabemana palabrěnguiñe endayancá cachcá chaotsemnama, chě ‘canýa átšeftaca tanděse tonjasá, atšbe contra echántsemna ca’, cachcá echanjopása.

<sup>19</sup> Mora, cabá ndoñe chca tonjopasá ora, lempe chě soyěnga sěntsichamo. As, chca chaojopasá ora, átšbeñe šmochantsošbuáchiye, y as šmochántsetátšěmbo atše tsměna chě nda sěndměná.

<sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chě nda šojichmóbioye bochanjofja ca” —Jesús tojánayana.

*Jesús tojánayana uayayěngbe cucuatšěne Judas bochjánboshjonama  
(Mt 26.20-25; Mc 14.17-21; Lc 22.21-23)*

<sup>21</sup> Chě soyěnga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canýa tšěngaftanguentšá uayayěngbe cucuatšěne šochanjáboshjona ca.

<sup>22</sup> Chora, chabe uatsjěndayěnga tmojanontšě enonýinýayana, y ndoñe montsetátšěmbo ndabiama Jesús chca tojánayanama.

<sup>23</sup> Canýe uatsjěndayá, chě Jesús puerte ibnabobonshaná, Jesusbe juachaca inatbemana.

<sup>24</sup> As, Simón Pedro chábioye tbojánefjatšěmbo, ndabiama Jesús chca tojánayanama Jesúsbioye chabotjama.

<sup>25</sup> Chë puerte bonshana uatsjendayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše canye base tandëtema chanjafchécuacuaye y ndábioye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaquiñábioye, tbojanoyé.

<sup>27</sup> Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniyana: “Chë cochanjama soye, cam ora moma ca.”

<sup>28</sup> Pero ni canya chë jasama imojtsetbiamanënguentšá tbojanësertá, ndayama Júdasbioye chca tbojaniyanama.

<sup>29</sup> Judas inamna chëngbe crocénana shecnësiñe uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjémënga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

### *Chë tsëm mando*

<sup>31</sup> Judas tojéftsanbocnentšana, Jesús tojánayana: —Ora tocjebuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama.

<sup>32</sup> Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiama yochjínÿanÿiye.

<sup>33</sup> Atšbe básenga, baseftatescama tšëngaftangaftaca sëntsemna. Chora šmochántsenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca.

<sup>34</sup> Canye tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga cbondábabuanÿeshana, cachcá tšëngaftanga šmochtsenbobonshana.

<sup>35</sup> Tšëngaftanga šmojtsenbobonshánëse, nÿetsca entšanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanëyana.

### *Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Lc 22.31-34)*

<sup>36</sup> Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjuá: —Atše sëntšá luaroye, mora aca ndoñe quecátobena atše juastana, pero más chcoye aíñe šcochanjuasto ca.

<sup>37</sup> As Pedro tbojaniyana: —Atšbe Utabná, ¿ndáyeca ndoñe sëntsobena mora aca juastama? ¡Atše sëntseprontana acbiama jóbanama ca!

<sup>38</sup> Chora Jesús tbojaniyana: —¿Ndegombre cojtseprontana atšbiama jóbanama? Ndegombre cbëyana, cabá ngallo ndëcánta ora, aca unga soye atšbiama cochanjyana: “Cha ndoñe quetsatabuatma ca”.

## 14

### *Jesús beyeca entšanga jobenayana Bëngbe Bëtsá bioye jama*

<sup>1</sup> Mëntsánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsá beñe šmondošbuaché; átšbeñnaca šmochtsošbuáchiye.

<sup>2</sup> Atšbe Taitá Bëngbe Bëtsá endmënoca, ba luarënga joyéanama endmëna. Ndoñe chca tontsemnëse, atše chca matchbënjáuyana. Morna, cha endmënoye atše chanjá tšëngaftangbiama canýe luare joyéanama jabuáprontama.

<sup>3</sup> Atše chajjá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atše chaitsemnoye, tšëngaftángnaca chašmotsá joyéanama.

<sup>4</sup> Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbioye tbojaniyana: —Bëngbe Utabná, ndëmoye coch-jama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojaniyana ora, Jesús tbojanjuá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnayá, y entšanga chë nyetsca tescama yomna tšabe vida chamotsebomnama endamá. Nýe átšbeyeca endopodena ndayëjana jama, y atšbe Taitá Bëngbe Bëtsábioca jashjanguama.

<sup>7</sup> Tšëngaftanga atše šmojtsábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonýá ca —tbojaniyana.

<sup>8</sup> Pero Felipe tbojaniyana: —Atšbe Utabná, nýe chë Taitá šmanýanyé, ndayama más ca.

<sup>9</sup> Chora Jesús tbojaniyana: —Chëfta te tšëngaftangaftaca séntsemna, y ¿cabá ndoñe atše šcontsábuatma, Felipe? Nda atše šojinýe, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanýanyé ca?

<sup>10</sup> ¿Ndoñe condošbuaché, atšbe Taitá átšbeñe y átšnaca chábeñe nýe canýacá ftsmënama? Chë cbontsëtsëtná soyënga, ndoñe nýe atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá.

<sup>11</sup> Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nýe canýacá sëndmëna. Chama ndoñe šmontsošbuachese, as nýe chë tijama soyëngámncá átšbeñe šmochtsošbuáchiye.

<sup>12</sup> Ndegombre šcuayana, nda átšbeñe tojtssošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama.

<sup>13</sup> Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínýanyíye chë Taitá corente bëtsá y obená yomnama.

<sup>14</sup> Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca —Jesús tojánayana.

### *Jesús tojanašebuachená chë Uámana Espíritu jíchmuama*

<sup>15</sup> Mëntsánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama.

<sup>16</sup> Chca chašmojamëse, atšbe Taitá Bëngbe Bëtsá tšëngaftangbiama chan-jaimpáda, tšëngaftanga jabújabuachama y jabáñemuayama inýa cha chabuich-moma, chë Uajabuachaná nýetsca tescama tšëngaftangaftaca chauétsemnama.

<sup>17</sup> Cha, chë Uámana Espíritu endmëna chë nýetsca soyënguiñe ntšamo ndegombre yomncá oyebuambnayá. Chë nýe quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quemátábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.



18 “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo.

19 Muentšana baseftaytese, chë nÿe quem luarama enójuabnaye entšanga ndoñe más quešmochátonÿaye; pero tšëngaftangna aiñe, atše cachiñe šmochántinÿe. Atše ainá chántsemna, chíyeca tšëngaftanga átšeftaca tšabe vida šmochántsebmna.

20 Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nÿe canÿacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nÿe canÿacá šmomnama y átšnaca tšëngaftangaftaca.

21 Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinÿinÿiye ca” —Jesús tojánayana.

22 Chora, inÿe Judas, ndoñe Judas chë Iscariote, Jesúsbioye tbojaniana: — Bëngbe Utabná, ¿ntšamo chca yojtsemna, nÿe bënga šcochjínÿanÿiye ntšamo cach aca comnama, y nÿetsca quem luarentšëngbioye ndoñe ca?

23 Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebmna.

24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nÿe atšbe juábnaca quenátsmëna, sinó chë Taitá, chë šonjichmó chabe juábnaca.

25 “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná.

26 Chë Uajabuachaná, chë Uámana Espíritu, atšbe impadanánaca atšbe Taitá bochanjíchmu. Cha lempe cmochántsabuatambaye, y echanjama nÿetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tšabe ebionana tšëngaftangbiana šcuétseboshjona, cbetsatšatá. Chë nÿe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana.

28 Ya šmonjouena ntšamo tcbonjauyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnama, er chë Taitá atšbiana más bëtsá endmëna.

29 Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

30 “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana.

31 Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

## 15

### *Jesús yomna mo chë tšabe uvas betiyá*

<sup>1</sup> Mëntšánaca Jesús tojánayana: “Atše sëndmëna mo chë tšabe uvas betiyá, y atšbe Taitá Bëngbe Bëtsá chë tšabe uvas betiye inÿenacá.



<sup>2</sup> Chë inyená, chë uvas betiyentša buacuafjënga ndëshajuanëfjënga jtsebuacuetëtsetšana; pero chë uvas betiyentša buacuafjënga shajuanëfjënga jt-sobolímpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga.

<sup>3</sup> Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá.

<sup>4</sup> Atšeftaca cányiñe mo canyácá šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoyobanana nýe cachabe ponto jashájonana. Cachcá, tšëngaftanga átšeftaca ndoñe cányiñe mo canyácá šmontsemnëse, ndoñe šmattsobena Bëngbe Bëtsabiana bëtscá soyënga jamama.

<sup>5</sup> “Atše chë tšabe uvas betiyácá sëndmëna y tšëngaftanga chë buacuafjëngcá. Nda átšeftaca cányiñe mo canyácá tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canye buacuafja becá tojtseshajuancá. Er, tšëngaftanga atšbe ujabuáchenana ndoñe šmontsebošnëse, átšeftaca cányiñe mo canyácá ndoñe šmontsemna causa, tondaye šmattsobena jamama.

<sup>6</sup> Canya átšeftaca cányiñe mo canyácá ndoñe tontsemnëse, cha jtsemnana mo canye buacuetëtšena buacuafja, utšenëfja y buashánëfjá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canyácá tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cányiñe mo canyácá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe.

<sup>8</sup> Chë shajuana buacuafjëngcá tšëngaftanga chašmojtsemna ora, šmochanjínyanýiye atšbe Taitá corente bëtscá y obená yomnama. Y chca, tšëngaftanga atšbe ndegombre uatsjëndayënga šmochántsemna.

<sup>9</sup> Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnayëse.

<sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsësná, chë atše sëntsebojna oyejuayana tšëngaftángnaca chašmotsebojnana, y tšëngaftanga puerte chašmotsóyejuama.

<sup>12</sup> Mëntšá cbetsamëndá: Ntšamo atše cbondababuanýeshancá, cachcá šmochtsenbobonshana.

<sup>13</sup> Chë chabe amiguëngbiana tojóbanabiama, ndocna quenátobena chabiama más bonshánana jtsebojnana.

<sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna.

<sup>15</sup> Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservënënga ca ndoñe quecbatëtsësná. Morscana mëntšá cbontsëtsësná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinyanýé.

<sup>16</sup> Tšëngaftanga ndoñe atše chešmatábuayana, pero atše aíñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y

chca, mo canÿe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnama. Chca, lempe ntšamo atšbe Taitá šmojtjañcá, y chca šmojama atše jótsëmbonëse, átšbeñe šmošbuachéyeca, cha lempe cmochanjátšataye.

<sup>17</sup> Mëntsá atše cbetsamëndá: Smochtsenbobonshana ca” —Jesús tojanëyana.

*Jesús y chabe entsanga, chë nÿe quem luarama enójuabnayëngbiana uaboyëñjana*

<sup>18</sup> Mëntsánaca Jesús tojánayana: “Pero chë nÿe quem luarama enójuabnaye entsanga tcmojtsëbuayënjëse, šmochjenójuaboye, natsana chënga atše šmonjanáboyëñjama.

<sup>19</sup> Tšëngaftanga, chë nÿe quem luarama enójuabnaye entsanguentsana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsana quešmátsmëna, y atšna, chë quem luare oyenënguentsana tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsëbuayëñja.

<sup>20</sup> Smochjenójuaboye ntšamo tcbonjáuyanama: ‘Chë oservená chabe nduiñbiana ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsana ntsachetsá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsana.

<sup>21</sup> Chë chacmojtsëbuayëñjenga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

<sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebomna. Pero mora, chëngbe bacna soyëngama chënga ndoñe quemátobena jayanana, ‘¡Chca fsëñjama ntsetatšëmbcá ca!’

<sup>23</sup> Nda atše šojtsáboyëñja, atšbe Taitábioynaca jtsáboyëñjana.

<sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebomna. Pero mora, masque ntšamo sënjamcá tmonjinÿëse, chënga atše šmontsáboyëñja y atšbe Taitábioynaca.

<sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nÿe tondayama chënga šmonjanáboyëñja ca.’

<sup>26</sup> “Atše, atšbe Taitábentsana chë Uajabuachaná y añemuayá tšëngaftangbioye chanjíchmua. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tsabe soyënga cmochantsëtsëtsnaye.

<sup>27</sup> Chorscana, tšëngaftángnaca atšbiana entsanga šmochantsëtsëtsnaye, er tšëngaftanga átšeftaca šmondëtsemna, entsanga jábuayenama atše sënjanbojatšë orscana ca” —Jesús tojánayana.

## 16

<sup>1</sup> Mëntsánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora.

<sup>2</sup> Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntsá

mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’

<sup>3</sup> Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chiyeca, chca cmochanjáborlaye.

<sup>4</sup> Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

### *Ndayá chë Uámana Espíritu inétsama*

Mëntšánaca tojánayana: “Entšanga jábuayenama sënjanbojatšé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna.

<sup>5</sup> Pero morna, chë šojichmó cha yomnoye chantá; y tšëngaftanguentsá ndocná šochanjatjaye, ‘¿ndëmoye cojtsá ca?’

<sup>6</sup> Mora, tšëngaftangbe ainana ngménaca entsemna, atše chca tcbonjáuyana causa.

<sup>7</sup> Pero ndegombre šcuayana: Atše chanjá y chca tšëngaftangbe tšabiamá echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aiñe chanjá, y chora cha tšëngaftangbioye chanjíchmua.

<sup>8</sup> Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tšabia jtsemnana, y ndayá yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

<sup>9</sup> Entšanga átšbeñe ndoñe quematošbuaché. Chiyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana.

<sup>10</sup> Chë Taitábioye chanjá y atše ndoñe más quešmochátinje. Chiyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana.

<sup>11</sup> Quem luarentša bacna soyënga mándayabiamá Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chiyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

<sup>12</sup> “Atše cabá ba soyënga sëntsebomna tšëngaftanga jáuyanama. Masque chcasna, mora tšëngaftanga ndoñe quešmatobena chë soyëngama josértana.

<sup>13</sup> Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nje cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama.

<sup>14</sup> Atšbe soyënguentsána cha echanjójyëngacñe, y cach soyëngama cmochanjabuatambá. Chcase cha cmochanjínñanñiye atše bëtsá y obená bëtsemnana.

<sup>15</sup> Lempe ntšamo chë Taitá endbomncá, atšbe soyëngnaca endmëna. Chiyeca atše tcbonjáuyana, chë Uámana Espíritu atšbe soyënguentsána yochjójyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinje. Inje baseftayté y cachiñe smochantëtínje ca” —Jesús tojanëyana.

*“Tšëngaftangbe ngménana, oyejuayana echanjóbema”*

17 Chora Jesusbe básefta uatsjédayënga imojtsentjanaye: —¿Ntšamo yojt-sentšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantétinÿe, er atše chë Taitábioye chanjá ca”?

18 ¿Ntšamo yojt-sentšáyana, chë “baseftayté ca”? Ndoñe quemuátstatšëmbo ntšamo yojt-sentšáyanama ca —chënga imojtsichamo.

19 Jesús yojtsetátšëmbo chënga chca jatjayama imojtsebošama, y tojanéyana: —Atše tčbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantétinÿe ca.” ¿Chë soyëngama šmojt-sentjaná ntšamo stsentšáyanama?

20 Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nÿe quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentsana tšëngaftangbe ngménana, oyejuayana echanjóbema.

21 Canÿe shembása tbojontšabuache šešona jónÿnama ora, tša ngménaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana.

22 Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbioye chajésabo ora, atše šmochantétinÿe y corente oyejuayënga šmochántsatšmëna. Y ndocná queochatobenaye chë oyejuayana jabuajuánana.

23 “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye.

24 Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanéyana.

### *Jesucristo, quem luarentše mandayábioye yëñjanayá*

25 Mëntsánaca Jesús tojánayana: “Chë soyëngama lempe cuentëngaca tšëngaftanga tčbonjáuyana; pero tempo echanjobuache, chora atše ya ndoñe más cuentëngaca quechochátëtsësnaye; chë cuentna, puerte botamana lempe atšbe Taitabiama cchochanjáuyana.

26 Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiana atšbe Taitá jatsimpadánana.

27 Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábicana atše tijabama šmojtsošbuáchema, chë Taitá cmondábabuanÿeshana.

28 Atše chë Taitábicana sënjabocna y quem luaroye sënjabo. Pero mora quem luare chanjëftsebošjona atšbe Taitábioye jtama ca” —Jesús tojánayana.

29 Chora chabe uatsjédayënga tmojanianayana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna.

30 Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuamana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábicana tcojabama ca —chënga tmojanianayana.

31 As Jesús tojanéyana: —¿Mora chiñe šmojtsošbuaché ca?



<sup>32</sup> Ya tempo tocjobuache y cam ora entsemna, tšëngaftanga nyetsquénache šmochanjuáshana y atše nýe canýa šmochanjéseboshjona. Pero atše ndoñe nýe canýa quichátsmëna, chë Taitá átšeftaca entsémnayeca.

<sup>33</sup> Atše lempe quem soyënga cbontsëtsëtsná, tšëngaftangbe ainaniñe tšabe ebionana chašmotsebonnama, átšeftaca cánýiñe mo canýacá jtsemnëse. Quem luarentše šmochanjasufrina; pero añemo šmochtsebonna, atše ya chë quem luarentša mandayá sënjayëñaná ca —Jesús tojánayana.

## 17

### *Jesús chabe uatsjédayëngbiama Bëngbe Bëtsábioye tbojanimpadá*

<sup>1</sup> Jesús chë soyënga tojánayanentšana, celoye tojanontješé y Bëngbe Bëtsábioye tbojaniana: “Taita, atšbe te ya tocjobuache. Minýanýé, atše acbe Uaquiñá, corente bëtsá y obená bëtsemnama. As, atše acbe Uaquiñá, aca corente bëtsá y obená comnama chainýanýema.

<sup>2</sup> Mora aca nyets obenana šconjatšeta nyetsca entsángbeñe, nyetscanga chë atšbiana tcojábacacanga chë nyetsca tescama yomna tšabe vida chamotsebonnama atše chaimama.

<sup>3</sup> Chë nyetsca tescama yomna tšabe vida jtsebonnana endmëna aca, chë nýe canýe y ndegombre Bëngbe Bëtsá jtsabuatamana, y atše Jesucristo, acbe ichmoná.

<sup>4</sup> “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinýanýiyama.

<sup>5</sup> Taita, quem luare cabá ndoñe quenjatsmëna ora, aca tconjaninýanýé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup> “Aca quem luarentša entsanguentsana quem boyabásenga tconjabacacá y atšbiana šconjinýinýé. Atše chënga sënjanýanýé ntšamo ndegombre aca comnama. Chënga acbe entsanga mondmëna; y acna, chë atšbiana chënga šconjinýinýiyá. Chënga acbe palabra tmonjouena y tšabá tcomjoyeuná.

<sup>7</sup> Chýyeca chënga mondëtatšëmbo, lempe ntšamo atše tsbomncá ácbentšana tijóyëngacñama.

<sup>8</sup> Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chýyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup> “Atše chëngbiama cbontseimpadana. Chë nýe quem luarama enójuabnaye entsangbiama ndoñe quecbátsimpadana, pero aíñe chë atšbiana šcojinýinýiyëngbiama, er chënga acbe entsanga mondmëna.

<sup>10</sup> Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinýanýé atše corente bëtsá y obená bëtsemnama.

<sup>11</sup> “Atše ndoñe quem luarentše quešocháisetotona, pero chënga aíñe cabá camuentše mochanjéftsemna. Atše chantá ácaftaca jtsatsmënama. Uámana Taitá, chë atšbiana šconjinýinýiyënga acbe obenánaca cochtsanýena. Chca ntšamo bëndata mo canýacá bondmëna, chëngnaca cachcá chamotsebonnama.

<sup>12</sup> Atše chëngaftaca sëntsemnëntscuana, chënga sëntsanýena, aca šconjatšeta obenánaca. Atše chënga sëndánýena, y ni canýa queochátsmëna infiernoca pochocaná, nýe chë infiernoca pochocaná jtsemnama ibomná chana aíñe, ntšamo acbe uabemana palabrënguiñe endayancá, cachcá chaotsebonnama.

<sup>13</sup> “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebonna puerte bëtsá oyejuayana chëngnaca chamotsebonnama.



<sup>14</sup> Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja.

<sup>15</sup> Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentsana chacuatsebacama.

<sup>16</sup> Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna.

<sup>17</sup> Cochjama chënga acbe entšanga chamuétsemnama, y chca, nÿe acbiama vida chamotsebomna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna.

<sup>18</sup> Ntšamo aca quem luaroye šconjanichmocá, cachcá átšnaca chënga sëntsachamná, quem luare entšanga jábuayenama.

<sup>19</sup> Chëngbiama atše cachiñe mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnaye acbe entšanga chamotsemna, y chca, nÿe acbiama vida chamuétsebomna, ntšamo ndegombre yomncá chënga imoyenama.

<sup>20</sup> “Pero nÿe chëngbiama ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiama šconjínÿinÿiyënga, chëngbioye atšbiama ínÿenga chamojtsabuayiyná ora;

<sup>21</sup> as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entšanga, atše šcojichmoma chamotsošbuáchema.

<sup>22</sup> Ntšamo chë obenana y uámanana šconjatšetacá, cachcá átšnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama.

<sup>23</sup> Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup> “Taita, atšbiama chënga šconjínÿinÿiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninÿanÿé atše corente bëtšá y obená bëtsemnama.

<sup>25</sup> Taita, nÿetsca soyënguiñe tšabá amá, masque chë nÿe quem luarama enójuabnaye entšanga ndoñe quematábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha.

<sup>26</sup> Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

## 18

*Uayayënga Jesús tmojánishache*

*(Mt 26.47-56; Mc 14.43-50; Lc 22.47-53)*

<sup>1</sup> Chë soyënga Jesús tojëftsanayanentšana, chabe uatsjëndayëngaftaca tojëftsanbocna, chë binche bëjaye Cedrón ca uabáiniye chenguana jama.

Chentše inamna canye tjashetema; y Jesús chabe uatsjédayëngaftaca choye tojánamengo.

<sup>2</sup> Y Judas, chë Jesús uayayëngbe cucuatšiñe boshjuaná, tšabá chë luare yojanábuaatma, er Jesús y chabe uatsjédayënga ba soye chentše imojánenefjuana.

<sup>3</sup> Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nyetscanga uajuinýanëshangaca, lamparëshangaca y espadëjangaca uajátënga.

<sup>4</sup> Jesusna yojtsetátšëmbo lempe ntšamo cha yochjanpásama; chíyeca, natanoye tojánbocna y chë entsanga tojanéyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna.

<sup>6</sup> Jesús tojanéyana: “Atše cha sëndmëna ca”, y cachora chë entsanga tmojtanoštëšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanéyana: —Ya tcbonjúayana: “Atše cha sëndmëna ca.” Atše šmojtsenguasna, mënga cachcá šmochjónýaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínýinýiye entsanguentsana ni canya pochocaná queochátsmëna ca”.

<sup>10</sup> Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uámana amëndayabe canye oservenábioye catšbioica matscuaše tbojtsanéstjango. Chë oservená Malco ca inauabaina.

<sup>11</sup> As Jesús, Pédrëbioye tbojaniyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngménana jtsebomnama, ¿ndoñe chca chaondëtsemna ca?”

*Jesús, Anasbe yebnoca*

*(Mt 26.57-58; Mc 14.53-54; Lc 22.54)*

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca.

<sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá.

<sup>14</sup> Caifás yojamna nda judiënga tojanéyana: “Tšëngaftangbiana más tšabá entsemna canye boyabása Israeloca entsangbiana chaóbana ca.”

*Pedro tojánayana Jesúsbiye ndoñe bonjanabuátma ca*

*(Mt 26.69-70; Mc 14.66-68; Lc 22.55-57)*

<sup>15</sup> Simón Pedro y inye uatsjendayá Anasbe yebnoye Jesús imojtsëstona. Chë inye uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana.

<sup>16</sup> Pero Pédrëna nýe shjoca, amashjuanentše tojanoquedá. Chcasna, chë inye uatsjendayá tojánbocna y chë bëšáša ebtafjuana shembásaftaca tojanoyebuambá. Chora Pedro tbojanëmashëngo.

<sup>17</sup> As chë shembása Pédrëbioye tbojaniyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

<sup>18</sup> Tša yojtsesësna causna, chë oservënga y chë josticiënga shjoca tmojaninñe y chentše imojtósboniye. Y Pédrëna chëngaftaca yojtsešbonena.

*Ntšamo chë bachnangbe más uámana pasado amëndayá, Jesúsbioye tbojantjá (Mt 26.59-66; Mc 14.55-64; Lc 22.66-71)*

<sup>19</sup> Chora, chë bachnangbe más uámana pasado amëndayá tojanontsé Jesús jatjayama chabe uatsjéndayëngbiana y ndayá cha entsanga yojánabuatambamnaca.

<sup>20</sup> Y Jesús tbojanjuá: —Atse nyetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nyetsca judiënga mondbëtsenefjuanentse; y chca, iytëmencá tondaye chiyatoyebuambá.

<sup>21</sup> ¿Ndáyeca chca šcojtsetjaná? Atsbe palabra tmojouenënga májtjaye, as chënga chacmëyana ntšamo atse tijáuyanama. Chënga mondëtatšëmbo ntšamo atse tijayancá ca —Jesús tbojanjuá.

<sup>22</sup> Jesús chë soyënga tojánayana ora, canye josticio chentse yojtsemná, Jesúsbioye tbojanjuebiantsetá y tbojaniana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentse chë podesca palabra yojtsemna; y tšabá tijóyebuambasna, ¿ndáyeca šcojajuebiantsetá ca?

<sup>24</sup> Chentsana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

*Pedro cachiñe tojánayana Jesúsbioye ndoñe bonjanabuátma ca (Mt 26.71-75; Mc 14.69-72; Lc 22.58-62)*

<sup>25</sup> Chëntscuana, Pedro yojtsešbonena, tsanana chë iñe juachaca. Chora chë entsanga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atse ndoñe quetsátsmëna ca —cha tojánayana.

<sup>26</sup> Chora, chë bachnangbe más uámana amëndayabe canye oservená Pédrëbiyoe tbojaniana: —¿Atse ndoñe cháftaca chë tjashetémoca tbonjinýe ca?

Chë oservená inamna chë Pedro tbojtsanmatstëtsabe pamillo.

<sup>27</sup> Y Pédrëna cachiñe ndoñe ca tojánayana, y cachora canye ngallo yojacánta.

*Jesús Pilatbe delante*

*(Mt 27.1-2, 11-14; Mc 15.1-5; Lc 23.1-5)*

<sup>28</sup> Chentsana, Caifasbe yebnentsana Jesús tmojanánatse chë romano mandadbe yebnoye. Ya yojtsebínýana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse.

<sup>29</sup> Chíyeca Pilato tojánbocna y chënga tojanéyana: —¿Ndayá quem boyabásabe contra šmochjayana ca?

<sup>30</sup> Chora chë entsanga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup> As Pilato tojanéyana: —Tšëngaftanga matánatse, y ntšamo cach tšëngaftangbe leyíñe iuayancá muabiana šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbanama tojanayancá cachá chaotsemnama.

<sup>33</sup> As Pilato cach yebnoye tojtanamáshëngo, Jesús tbojanchembo y tbojan-tjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnýyeca chca yojtsemna o ínŷenga atšbiamá tcmojacuentáyeca ca?

<sup>35</sup> Chora Pilato tbojaniana: —¿Mo atše judío quetsmēna? Cach ácbioca entšanga y chē bachnangbe amēndayēnga muentše tcmojúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmēna. Aíñe tojtsemnēsna, atšbe ústonēnga muantsatsejaye atše chē judiēngbe cucuatšine ndoñe chašmondoboshjonama. Pero atšbe jamándama luare ndoñe quem luarentše quenátsmēna ca —Jesús tbojanjuá.

<sup>37</sup> As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sēndmēna. Chama atše tijonŷná y quem luaroye tijabo; y atše sēnjabo ndegombre soyēngama jabóyebuambayama. Y chca soyēnga jtsamēse tmoyenēnga, atše jtseyeunanana ca.

<sup>38</sup> Chora Pilato tbojaniana: —¿Y ndayase chē ndegombre soye yomna ca?

*Jesusbiamá tmojánayana chaóbana ca*

*(Mt 27.15-31; Mc 15.6-20; Lc 23.13-25)*

Chca tbojantjá chentsana, Pilato cachiñe tojánbocna judiēngaftaca jóyebuambayama, y tojanēyana: —Atše ni mo canŷe soye chiyátinŷena, quem boyabása castiganá chaotsemna ca jayanama.

<sup>39</sup> Pero tšēngaftanga šmondētatsēmbo, Bashco fiestama atše canŷe utamená cachcá jētsboshjonama. ¿Šmojtseboše chē judiēngbe Rey chjētsboshjona ca?

<sup>40</sup> Chorna nŷetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabásna canŷe bacá uamana entšá inamna.

## 19

<sup>1</sup> Chora Pilato, Jesús tbojanánatse y tojanmandá chamotsetjanjama.

<sup>2</sup> Y canŷe coronēsha uchmašēfjangaca chē soldadēnga tmojanapormá y Jesús tmojanabestšajó; y canŷe shbuenda uafjatsenga entšayá mo reycá tmojanichētjo.

<sup>3</sup> Chorna chēnga imojtsóbobecocnaye y jtsafchayama imojtsatsētsnaye: “¡Bayté judiēngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entšanga tojanēyana: —Smochjouena; cha chanjuábocna, chē boyabása castiganá chaotsemna ca jayanama atše ni mo canŷe soye ndoñe sēnjínŷenama chašmotsetatsēmbuama ca.

<sup>5</sup> As Jesús tojánbocna chē uchmašēfjangaca coronēsha uabestšajoná y chē shbuenda uafjatsenga entšayá mo reycá uichētjoná. Y Pilato tojanēyana: — ¡Muentše chē boyabása entsemna ca!

<sup>6</sup> Chē bachnangbe amēndayēnga y chēngbe josticiēnga cha tmojáninŷe ora, tmojanontsé uayebuáchana: —¡Motsecrucificá! ¡Motsecrucificá ca!

Chora Pilato tojanēyana: —Cach tšēngaftanga mánatse y smochjacrucificá; atše ni mo canŷe soye chiyátinŷena quem boyabása castiganá chaotsemna ca jayanama ca.

<sup>7</sup> Chora chē judiēnga tmojanjuá: —Bēngna canŷe ley fsēndbomna, ntšamo chiñe endayancana, quem boyabása jóbanama bontsemna, Bēngbe Bētsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja.

<sup>9</sup> Cachiñe chabe yebnoye tojtanamáshēngo y Jesús tbojantjá: —¿Ndēmocá aca cmēna ca?

Pero Jesús ndocá tbonjanjuá.

10 Chora Pilato tbojanियana: —¿Ndoñe šcochanjojuá ca? ¿Ndoñe condětatsēmbo, aca jacrucificama o jětsboshjonama atše tsobenama ca?

11 As Jesús tbojanjuá: —Acbe obenana Běngbe Bětsá ndoñe macmėnjánatšetase, tondaye cattsobena átšeftaca jamama; chíyeca, acbe cucuatšiñe šonjaboshjoná, acbiama más bėts bacna soye tonjama ca.

12 Cach orscana Pilato yojsenguaye ntšamo jamana, jobenayama Jesús jětsboshjonama; pero chě judiėnga imotsáyebuache: —¡Chacojětsboshjonėsna, Césarbe amigo ndoñe condmėna! ¡Nda rey tojtsenobiamná chana, Césarbe uayayá jtsemnana ca!

13 Pilato chě soyėnga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chě tribunaloca chashjañna hebreo biyañe Gabata ca inauabaina, y endayana “ndětšbėngaca pormániñe ca”.

14 Bashco fiestama canye te yojsájamna, y mo njetsto ora yojtsemna. Chora Pilato chě judiėnga tojanėyana: —¡Muentše tšėngaftangbe rey entsemna ca!

15 Pero chėnga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšėngaftangbe rey atše chjacrucificá ca?

Y chě bachnangbe amėndayėnga tmojanjuá: —Bėngbe rey nye César endmėna, ndocná más ca.

16 Chentšana Pilato, chėngbe cucuatšiñe Jesús tbojánboshjona chamocrucificama y chě judiėnga cha tmojanánatse.

### *Jesús tmojanrucificá*

*(Mt 27.32-44; Mc 15.21-32; Lc 23.26-43)*

17 Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina).

18 Chentše cha tmojanrucificá y inye útatnaca cátoica tmojanrucificá; Jesusna tsėntsaca.

19 Pilato tojanmandá canye uabemana soye chě cruciñe chamuanjuama. Chiñe yojetsábemana: JESÚS NAZARETOCÁ, JUDIĚNGBE REY ca.

20 Y ba judiėnga chě uabemana soye tmojanalía, er chě Jesús tmojanrucificá luare Jerusalenó béconana inamna, hebreo, latín y griego biyañe yojetsábemana.

21 Chca juabemama tojanmandáyeca, chě bachnangbe amėndayėnga Pilato tmojanियana: —Ndoñe matabiamnana “Judiėngbe Rey” sinó ntšamo cachá tojayancá, “Judiėngbe Rey atše sėndmėna ca”.

22 Pero Pilato tojanėjua: —Ntšamo tijuábema cachcá chaotsábemana ca.

23 Chě soldadėnga Jesús tmojanrucificá chentšana, chabe entšayangá tmojanájaca y cántañe tmojanajatá, njetasca canta soldadėngbiama. Chabe cmešėjua tmojanaca; chėjua yojanamna nduajonanėjua, njetsejua uabianánėjua.

24 As chě soldadėnga tmojáneniyana: “Ndoñe matjuátanėca; más tšabana tsbanánoye mochjútšena, ndabiama yochjuáquedama chaotsotatsėmbuama ca.”

Chca tojanopasá ana ntšamo Bėngbe Bětsabe uabemana palabrenguiñe endayancá cachcá chaotsemnana, chě “Atšbe entšayangá tmojatenájataye; atšbe cmešėjua tšbanánoye tmonjanėtšena, ndabiama jauquédama jtso-tatsėmbuama ca.” Y lempe chca chě soldadėnga tmojanma.

25 Jesusbe cruz juachaca imojtsemna chabe mamá; chě mamabe quenata María, Cleofasbe shema; y María Magdalena.



<sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianana: “Mama, chentše acbe uaquiñá entsemna ca.”

<sup>27</sup> Y chë bonshana uatsjendayá tbojanianana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

### *Jesús tojanóbana*

*(Mt 27.45-56; Mc 15.33-41; Lc 23.44-49)*

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguiñe endayancá cachcá chaotsemnama, tojánayana: “Sontsajuendá ca.”

<sup>29</sup> Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchecuacuá, canÿe hisopo niñëfjiñe tmojananguësëtjo y játsbanase, Jesusbe uayásoye tmojanbeconá.

<sup>30</sup> Chë untja vínoye Jesús tojanofšé ora, tojánayana: “Ya lempe tojochnëngo ca.”

Tojanotsejbé y tojanóbana.

### *Canÿe soldado chabe lanzësaca costillaca Jesúsbioye tbojanashacuá*

<sup>31</sup> Bashco fiestama canÿe te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte uámana te bëtsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama.

<sup>32</sup> As chë soldadënga tmojána y shecuatšënga imojtsatcacaye, natsana canÿa y chentšana chë inÿa, Jesúsëftaca yojtsecrucificaná.

<sup>33</sup> Pero Jesúsbioye tmojanobeconá ora, ya obaná tmojáninÿe; chíyeca chabe shecuatšënga ndoñe tmonjanatcacá.

<sup>34</sup> Masque chca, canÿe soldado Jesúsbioye costillaca canÿe lanzësaca tbojanashacuá. Y cachora buiñe y búyeshe chentšana tonjanóbocna.

<sup>35</sup> Chë mëntšá cuentayá chentše enjamna y tonjáninÿe, y ndegombre entsichamo; cha endëtátšëmbo ndegombre yojtsichámuama, chca, tšëngafángnaca chiñe chašmotsošbuáchema.

<sup>36</sup> Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachcá chaotsemnama. Chiñe endayana: “Ni mo canÿe betaše cha quemochatsëntšátca ca.”

<sup>37</sup> Y ínÿoca, Bëngbe Bëtsabe uabemana palabrenguiñe endayana: “Chë tmojenachentšá bominÿe mochanjabuájua ca.”

### *Jesús tmojanatbontsá*

*(Mt 27.57-61; Mc 15.42-47; Lc 23.50-56)*

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canÿe ustoná, masque nÿe iytëcana, chë judiëngbiamana auatja causa. Pilato aíñe tbojanlesenciá; as José tojána y Jesusbe cuerpo yojtsámbañe.

<sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana.

<sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unëtjona entšëjuangaca. Judiënga chca imnauamana, obaná juatbontsama ora.

<sup>41</sup> Jesús tmojanrucificá luarentse canye base jajañe inamna, y chiñe canye tsëm cuevëshe, entsangbe pormánëshe, obanëngbiana; chëshiñe cabá ndocna obaná mondëjajo.

<sup>42</sup> Asna, nye chentse Jesusbe cuerpo tmojansegorá, chë Bashco fiestama canye te yojtsájamna causa, y chë cuevëshe chë béconana inámnayeca.

## 20

### *Jesús tojtanyena*

*(Mt 28.1-10; Mc 16.1-8; Lc 24.1-12)*

<sup>1</sup> Chë inye semana bojatsenté, cabá cachëse, cabá ndëbinyna ora, María Magdalena chë cuevëshoye tojana y tojáninye inyoca yojtsemna chë cuevëshoye amashjuanentsha ndëtsbé.

<sup>2</sup> Asna, tojëftsánótjajo y tojana chë Simón Pedro y chë inye uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtsámbañe y ndayentse tmojtsejájoma ndoñe queftsátstatsëmbo ca.”

<sup>3</sup> Chora Pedro y chë inye uatsjendayá chentšana tbojëftsanbocna y chë cuevëshoye tbojánata.

<sup>4</sup> Njëts útata ibojtsëchamana, pero chë inye uatsjendayá Pédrëbiana más betscó tojanótjajo y natsana chë cuevëshoye tojánashjango.

<sup>5</sup> Tojanotsejbé y chë chentse tmojanacjá entsëjuangá tojáninye, pero choye ndoñe tonjánamashëngo.

<sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninye chë chentse tmojanacjá entsëjuangá.

<sup>7</sup> Y chë Jesús juabestsëntsacjuama tojanaservé entsëjuana ndoñe chë inyájuangaca yontsamna, sinó inyoca botamana uandmanánëjua.

<sup>8</sup> Chora chë inye uatsjendayá, chë cuevëshoye natsana tojanashjanguá, choye tojánamashëngo. Tojáninye y Jesús tojtanyenama yojtsanošbuaché.

<sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguiñe endayancá, chë Jesús obanënguentsana jtayenama ibojamnama.

<sup>10</sup> Chentšana chë uatsjéndayata chatbe oyenoye tbojtaná.

### *Jesús, María Magdalënbioye tbojánëbëbocna*

*(Mc 16.9-11)*

<sup>11</sup> Pero María chentse tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama.

<sup>12</sup> Y tojáninye uta angelotémata uafjantsëjua uichëtjonata, Jesusbe cuerpo yojtsejájóntse ibojtsetbemana. Canya tsëntsënëshoica y chë inyana matsëskoica.

<sup>13</sup> Chora chata tmojaniana: —Shembása, ¿ndayama cošaché ca?

As cha tojanjuá: —Atšbe Utabná tmojtsámbañe, y ndayentse tmojtsejájoma ndoñe quetsátstatsëmbo ca.

<sup>14</sup> Chca tojánayana ora, tojanostëtsantjesé y tojáninye chentse Jesús yojtsemna, pero María ndoñe yontsetáttsëmbo cha Jesús bëtsemnama.

<sup>15</sup> Chora Jesús tbojaniana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanýa ca; chiyecca tbojantjá: —Bacó, aca tcojuambësna, šmëyana ndayentse cojtsejájó, as atše cha jesocñama ca.

<sup>16</sup> As Jesús tbojaniana: —¡María ca!

Chora María chábioye tojanontjesé y tbojaniana: —¡Rabuni ca! (hebreo biyañe chca endayana “Buatëmbayá ca”).

17 Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstétstsja. Pero motsa atšbe catšátangbioye y cochjáuyana, atšbe tssetsjuá atše y tšëngaftangbe Bëtsábioye, atše y tšëngaftangbe Taitábioye ca.

18 As María Magdalena tojána y Jesusbe uatsjédayënga tojanéyana cha chë Utabnábioye tbojáninye ca y cha chë palabrenga tojánayana ca.

*Jesús chabe uatsjédayënga tojánebëbuacna  
(Mt 28.16-20; Mc 16.14-18; Lc 24.36-49)*

19 Tojanibétata ora, cach semana bojatsenté, chë uatsjédayënga tmojánenefjna canye luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntsá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

20 Y chca tojanéyana ora, chabe cucuatšënga y costillaca tojaninýanyé. Chora chë uatsjédayënga oyejuayënga imojtsemna, chëngbe Utabná tmojáninýama.

21 As Jesús cachiñe tojanéyana: “Chë atšbe ainaniñe tšabe ebionana tšëngaftangaftaca chaotsemna. Ntsamo atšbe Taitá Bëngbe Bëtsá šojichmocá, átšnaca cachcá tšëngaftanga cbontšachamná ca.”

22 Chca tojánayana ora, chëngbioye tojangouo y tojanéyana: “Chë Uámana Espiritu šmochjójyëngacñe.

23 Ndëmuanýënga chëngbe bacna soyëngama chašmojáperdonanga, perdonánënga mochántatsmëna; y ndoñe chašmonjáperdonasna, ndëperdonánënga mochántsemna ca.”

*Tomás, Bëngbe Utabnábioye ainá tbojáninye*

24 Pero Tomás, chë Gemelo ca uabobainá, canya chë bnëtsana uta uatsjédayënguentsá, chë uatsjédayëngaftaca ndoñe yontsemna, Jesús tojánashjango ora.

25 Chíyeca, “bënga chë Utabná fsënjinye ca”, chë inye uatsjédayënga tmojaniyana ora, Tomás tojanéjua: “Atšbe chabe cucuatšinye chë uajabonjana uinýniñe ndoñe sënjinýe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

26 Canye semana tojanochnëngo ora, chë uatsjédayënga cachiñe canye luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

27 Chora Tomásbioye tbojaniyana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atšbe tijtayenama cochtsošbuáchiye ca.

28 As Tomás tbojaniyana: —¡Atšbe Utabná y atšbe Bëtsá ca!

29 Chora Jesús tbojaniyana: —Tomás, nýe šconjínýeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýca tmojšbuachenga ca!

*Ndayama quem librëša tmojanábema*

30 Jesús, chabe uatsjédayëngbe delante inye bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana.

31 Y quem librëšañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnana; y chcase, chábeñe chašmojtsošbuachese, chábeyeca chë nýetsca tescama yomna tšabe vida chašmotsebomnana.

## 21

### *Jesús, canyësfta chabe uatsjéndayënga tojánëbëbuacna*

<sup>1</sup> Chca tojanopasá chentsana, Jesús inye soye chabe uatsjéndayënga tojánëbëbuacna, Tiberias mar béjaye tsachañe. Chora mëntsá tojanopasá:

<sup>2</sup> Cányëntse imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblocá; Zebedeobe uaquiñata y Jesusbe inye uta uatsjéndayata.

<sup>3</sup> Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Bëgnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmojáninýena.

<sup>4</sup> Ya yojtsebínýana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama.

<sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanéyana: —Barquëshu catšbioica chë atarraiešha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyetšá beonga tmojánishëche causa.

<sup>7</sup> As chë Jesusbe bonshana uatsjendayá, Pédrëbioye tbojanianyana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtaniçhëtjo, er nduichëtjoná yojtsemna, y chë béjayoye tojanoshbuetše.

<sup>8</sup> Chë inye uatsjéndayëngna chë barquëshañe tmojána, y chë atarraiešha jútjena beóngaca imojtsásjaye, er chë tsachocama bécoñe imojtsemna, nye canye patse metroca.

<sup>9</sup> Fshantsoye tmojánastjajna ora, chënga tmojáninýena canye chebániñe pormániñe, y chentsna canye beona y tandëšnaca yojtsesegorana.

<sup>10</sup> Chora Jesús tojanéyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraiešha jútjena bëts beóngaca, uasjojónana tsachóntsoñe tojanéyamba. Mo canye patse y shachna bnëtsana y unga beóngaca; pero masque nyetšá beonga, chë atarraiešha ndoñe ntjuatanëcanana.

<sup>12</sup> Chora Jesús tojanéyana: “Mabënga, šmochjase ca.”

Chë uatsjéndayënguentšana ni canya yontsenñémua cha jatjayama nda cha yojamnama, er nyetscanga imojtsetátšëmbo cha chë Utabná bëtsemnama.

<sup>13</sup> Chora Jesús tojanobeconá, chë tandëše tojanca y chënga tojanatšatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanayentšana.

### *Jesús, Simón Pédroftaca tojanoyebuambá*

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aíñe. Aca condëtatšëmbo atše aíñe cbondbobonshánama ca.

As Jesús tbojanianyana: —Atšbe entsanga, mo oveshatemëngcá imomnënga, cochtsanýena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cocht-sanÿena ca.

<sup>17</sup>Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cocht-sanÿena.

<sup>18</sup>Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniana.

<sup>19</sup>Chca tojánayana, ana jtsotatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentsana, Pédrëbioye tbojaniana: —Smasto ca.

#### *Jesusbe bonshana uatsjendayá*

<sup>20</sup>Pedro tojesanenostëtšantješé y tojáninÿe, Jesusbe bonshana uatsjendayá ústonoye yojtseye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?”

<sup>21</sup>Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup>Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nÿe šmasto ca.

<sup>23</sup>Chíyeca, chentšana, Jesucristbeñe ošbuáchiyëngbenache nÿetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

<sup>24</sup>Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

<sup>25</sup>Jesús inÿe ba soyënga tonjëftsema; tša bëtscá soyënga endmëna, nderado lempe cada canÿe soye tcojuábema y librëšangá tcojuapormá, atše sëntsejuabná, nÿetsca chëšangá quem luarentše ndoñe nanjuába.



## Hechos

### *Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatsé orscana,

<sup>2</sup> y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama.

<sup>3</sup> Jesús cruciňe tojanóbana y tojtanayenentsana, ba soye chë ichmóněnga yojáneběbuacana, chca, chěnga jinňanňiyama cha ndegombre tojtanayenama. Canta bnětsana tentscuana cha yojáneběbuacana y Běngbe Bětsabe aměndayama chěnga yojanabuatambá.

<sup>4</sup> Canýe, Jesús chabe ichmóněngaftaca yojětsemna ora, měntšá tojanaměndá: –Jerusalenentsana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tcbonjúuyana.

<sup>5</sup> Ndegombre, Juan entsanga bėjayeca tonjaněbaye; pero ndoňe baytesna, Běngbe Bětsá chë Uámana Espíritu bochanjíchmuama, tšěngaftangbe ainaniňe jtsemándayama cháuamashěnguama ca.

### *Jesús celoye tojtantsjuá*

<sup>6</sup> Canýe, chë ichmóněnga Jesúseftaca cánýiňe imojtsemna ora, chěnga tmojantjá: –¿César y chë Romoquěngbe aměndayentsana tašcochjatsebacá, y mora běnga, Israeloca entsanga, canýe Rey quemochtsatsbomna ca?

<sup>7</sup> As Jesús tojaněyana: –Tšěngaftanga ndoňe quemátamna chë soyěngama jtsetatsěmbuana. Nýe atšbe Taitá aiňe; y cha, chabe obenánaca echanjamánda mocna ora y ndayté chca chaopasama.

<sup>8</sup> Chë Uámana Espíritu tšěngaftangbe ainaniňe jtsemándayama chaojabo ora, tšěngaftanga obenana šmochanjóyěngacňe. Chentšana, ntšamo atšbiana šmotatsěmbcá, chë tcbonjabuatambá soyěnga, entsanga šmochjúuyana Jerusalenentse, nýets Judea luariňe, Samarioca y quem luarentša nýets luarěnguenáchnaca ca.

<sup>9</sup> Chë soyěnga tojánayanentsana y chabe uatsjěndayěnga imojtsonýaye ora, Běngbe Bětsá, Jesúsbioye tbojtanatsbaná y canýe jantšetěshe chábioye ibojútsbotse y ndoňe más tmonjanobená cha jinýama.

<sup>10</sup> Jesús celoye yojtsetsjuama chěnga bën imojtserreparáněntscuana, nýe ndeolpe, uta boyabásata uafjantse entsayaca bopormánata chěngbe juachaca tbojabántsaye,

<sup>11</sup> y chěngbioye tmojaněyana: “Galileoca entsanga, ¿ndáyeca celoye šmojtsantješana? Jesús, chë tšěngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjésabo ca.”

### *Júdasbe cuenta Matías tmojanábuayana*

<sup>12</sup> Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscoňna bécoňe inamna, ndayěntscoca canýe ochnayté jama yojanlesenciana nýetšá.

<sup>13</sup> Jerusalenoye tmojtanashjajna orna, chë yebnentša tsbanánoca tsoye tmojtanášěngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá.

<sup>14</sup> Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

<sup>15</sup> Chë tempo tmojánenefjna canye patse y uta bnëtsana Jesucristbeñe ošbuáchiyënga, y canye, Pedro tojantsá y tojanëyana:

<sup>16</sup> “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrënguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama.

<sup>17</sup> Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiñe jtsoservénama.

<sup>18</sup> Tšëngaftanga šmondëtatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nyetsca chabe chunchullëjuangá tojtsanáshana.

<sup>19</sup> Jerusalemntše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’.

<sup>20</sup> Salmos librëšañe, Jesucristo uayayëngbe cucuatšinë boshjuanabiama mëntšá enduábemana:

Chabe yebna éñañe chaotsemna  
y ndocná chentše chaondëtsiyena ca.

Y mëntšánaca endayana:

Chabe cuenta inya chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca monde-nutënga, Bëngbe Utabná Jesús bëngaftaca enjamnëntscuana,

<sup>22</sup> Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbontanatsbanantscuana. Y mora šontsamna canya mënguentšá juabuayanama, Jesús tojtanayenama entšángbioye bëngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y inyëngna Justo ca; y chentšana Matías.

<sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuautma; chcasna, šminyanýe nda quem útatentšana cochjuábuayanana,

<sup>25</sup> canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

<sup>26</sup> Y nda chë ichmoná yochtsemnama jtsotatšëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiama imojanjuabná mo canye Jesusbe ustonacá, cachcá ntšamo chë bnëtsana canye uatsjëndayëngbiama chënga imojanjuabnacá.

## 2

### *Chë Uámana Espíritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cányiñe canye luarentše imojtsemna.

<sup>2</sup> Ndeolpe, celocana mo canye jabuache binyiëcá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše.

<sup>3</sup> Y chora bichtajënga mo iñeshcá yojónyna y canyanýabeñe yojojátaye.

4 Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontsé inyetsá biyangana, chënga tempo ndmabiyañe, ntšamo chë Uámana Espíritu yojtsamcá chënga inyetsá chamotsebiyama.

5 Chë tempo Jerusalenentše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

6 Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inye luarocana áshjajnënga imojtsuenana chë Jesucristbeñe ošbuáchiyënga inyetsá biyangana jtsóyebuambnayana, ntšamo cada ona chënga imojanbiyacá.

7 Chë soyëngama entšanga puerte imojenjnaná y mëntšá imojtsenatsësnaye: “Chë chca montsóyebuambnanga Galileoquënga mondmëna.

8 Chcase, ¿ntšámoyeca bënga imojtsobena chënga joyaunayana cach bënga mondëbiyacá ca?

9 Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca,

10 Frigioquënga, Panflia, Egiptó y Libia, chë Cirene béconana luaroquënga. Báseftangna Romoquënga montsemna;

11 chëngbeñe nderado judiënga camuentše onýnánënga, pero ínýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inýengna Cretocana y Arabiocánëngnaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

12 Chë causa nyetscanga imojtsenjnanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

13 Pero ínýengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

#### *Ntšamo Pedro chora tojanoyebuambá*

14 Chentsana, Pedro tojantsá chë inye bnëtsana canye ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyetscanga Jerusalenentše oyenënga, tšabá šmochjouena. Ntšamo tojopasama cbochanjábuaenaye, as chacmësertama.

15 Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe.

16 Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

17 Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nyetscangbe ainaniñe cháumashënguama.

Chentsana, tšëngaftangbe uaquiñënga y bemianga atšbe soyëngama entšanga mochantsëtsësnaye;

tšëngaftangbe bobontsëngna, atše chanjama soyënga mochantsonýyaye mo otjenayoquëcá;

y tšëngaftangbe bëtsëjëmëngna atšbe soyënga mochantsotjénaye.

18 Chca ora, atše chanjama nyetsca atšbe oservëngbiama, boyabásenga y shembásenga,

chëngbe ainaniñe atšbe Espíritu cháumashënguama,

as chënga atšbe soyëngama entšanga mochantsëtsësnaye.

19 Atše chanjama bëts soyënga celoca;

y quem luariñe echántsemna buiñe, íñeshe y ngona mo jantsetëshcá, atšbe obenana jinŷanŷiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora,

shinŷe ndoñe queochátsbuashinŷinŷana

y juashcona buárganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotsëmbuaná, cha bochanjatsbocá’

Chca Joel tempo tojanábema ca” –Pedro tojánayana.

<sup>22</sup> Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmónjaninŷanŷé, Jesúsbiocyte chabe trabajo biamnayá cha tbojánbemama. Chë soye Bëngbe Bëtsá tcmónjaninŷanŷé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinŷanŷiyama. Cach tšëngaftanga chë soyëngama šmondëtatsëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca.

<sup>23</sup> Ndegombre tšëngaftangbe cucuatšišne Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámnaca cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entsangbe cucuatšišne.

<sup>24</sup> Pero Bëngbe Bëtsá tojama cha cháuatayenama; y chë obanëngbe luar-entšana tbojatsbocá, er ndoñe yonjopodena cha obaná chaoquedama ca” – cha tojánayana.

<sup>25</sup> Chora Pedro tojatanëyana: “Rey David tempo Jesusbiamma mëntšá tojéftsanabema, ntšamo cha Bëngbe Bëtsábiocyte tbojaniyanama:

Atšbe Utabná, aca sempre átšeftaca condbétsemna,

y sempre átšeftaca condboquedá atše juajabuáchama,

chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá sëntsemna,

y atšbe uayásaca cbontsatschuaná.

Atše masque chanjóbana, tšabá sëndëtatsëmbo aca atšbe Bëtsá, atše chaitayenama cochjamama.

<sup>27</sup> Aca, Bëngbe Bëtsá, obanëngbe luarentše ndoñe quešcochátsboshjona,

y ndoñe queochatsleséncia acbe uámana oservenabe cuerpo chaot-sopochocama.

<sup>28</sup> Aca chë tšabe benache šconjaninŷinŷé, ntšamo tšabe vida jtsebonnama.

Aca átšeftaca condbétsemnama, atše puerte oyejuayá sëntsemna ca –David tojéftsanabema ca.”

<sup>29</sup> Chentšana Pedro tojatanëyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

<sup>30</sup> Cach David canŷe Bëngbe Bëtsabe juabna oyebuambnayá inamna. Cha tšabá inatátšëmbo Bëngbe Bëtsá bëtská tbojanšbuáchenama, Davidbe entsanguentšana canŷa, Cristo, cach Davidcá rey jabemama.

<sup>31</sup> David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca.

<sup>32</sup> Bëngbe Bëtsá tojama Jesús cháuatayenama y bënga cha fsënjinŷe. Chíyeca bënga fsëntsetatsëmbo chca ndegombre bétsemnama.



<sup>33</sup> Bëngbe Bëtsá, Jesús celoye tbontanatsbaná chabe catsbioica jtsatsmënayama jtsemándayama, y Bëngbe Bëtsá chë Uámana Espíritu Jesúsbiocyte tbojanëntsabuaché ntšamo chë Taitá tbojansbuachenacá. Ntšamo tšëngaftanga šmontsonyá y šmontsuenancá entsemna, Jesucrísoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca.

<sup>34</sup> David ndoñe Jesuscá celoye tonjána, pero mëntsá tojëftsaná bema: Bëngbe Bëtsá atšbe Utabná Crístbiocyte tbonjaniyana:

‘Atšbe catsbioica cochtsetbemana,

<sup>35</sup> acbe uayayënga acbe cucuatšniñe chamoquedama atšbe obenánaca chamëntscuana ca.’ ”

<sup>36</sup> Chora Pedro tojatanéyana: “Tšëngaftanga nyëts Israeloquënga šmochtsetátšëmbo, atše ndegombre cach Jesusbiamana sëntsoyebuambnama. Cha tšëngaftanga šmonjancrucificá, pero Bëngbe Bëtsá chábiocyte tbonjábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšenánënga imojtsemna, y Pedro y chë inye ichmónëngbiocyte tmojanéyana: —Baconga, ¿ndayá mora jamama šojtsamna ca?

<sup>38</sup> As Pedro tojanéjua: —Ngménaca šmochtenójuaboce bacna soyënga šmojtšamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháumashënguama.

<sup>39</sup> Bëngbe Bëtsá chë soyënga tcmonjanašebuachená tšëngaftangbiamana, tšëngaftangbe básëngbiamana y nyëts chë bën luarënguenache imomna entšangbiamana, nyëtsçanga chë Bëngbe Utabná Bëngbe Bëtsá chábiocyte jabama chaojubuáyanënga ca.

<sup>40</sup> Inye palabréngnaca Pedro tojatanéyana y bëtscá tojanabuayená mëntsá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentsana šmochtsojuánañe ca!”

<sup>41</sup> Ba entšanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entšanga nyëtsá tmojanoboté, Jesucrístbeñe ošbuáchiyënga jtsemnama.

<sup>42</sup> Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtšacohebiona nyëtsçanga cányiñe jtsemnama y imojanamana mo chë Jesucrístbeñe ošbuachiyëngcá cányiñe jtšesayana y cányiñe Bëngbe Bëtsáftaca jtsencuéntayana.

### *Ntšamo chë natsana Crístbeñe ošbuáchiyënga vida innabomna*

<sup>43</sup> Nyëtsçanga imojtsenjanayace, chë ichmónënga bëts soyënga y inye soyënga chabe obenana jinyaníyama chamomama Bëngbe Bëtsá tojámayeca.

<sup>44</sup> Nyëtsca chë Jesucrístbeñe ošbuáchiyënga sempre cányiñe mo canyáca imojtsemna y nyëtsca chëngbe bomna soyënga nyëtsçangbiamana yojtsemna.

<sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë inyënga tojtšëjabortcá.

<sup>46</sup> Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cányiñe imojtsesaye oyejuayënga y ndoñe ojëndayënga.

<sup>47</sup> Chënga imojanamana Bëngbe Bëtsá jtsatschuanayana, y nyëtsca entšanga imojtsejuabnaye chë Jesucrístbeñe ošbuáchiyëngbiamana tšabe entšanga imojamna ca. Y cada te Bëngbe Bëtsá yojtšama más ošbuáchiyënga chamóbotema, chë ndëmuanyënga cha yojtšatsebacayënga.



### 3

#### *Pedro canye coshétbioye tbojanshná*

<sup>1</sup> Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuéntayana.

<sup>2</sup> Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entšanga imojanamana cada te cha juanat-sana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnějuanënga lemošna chaótejañama.

<sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanye ora, canye lemošna chátbioye yojótejañe.

<sup>4</sup> Chatna chë šocá imojtsonýaye, y Pedro tbojaniyana: “Scochtsënyaye ca.”

<sup>5</sup> As cha yojtsënyaye y yojtsejuabnaye ndayá chjójyëngacñe ca.

<sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšíñe y shëmiabeñe añemo yojtsatsbomna.

<sup>8</sup> As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama.

<sup>9</sup> Chë Bëngbe Bëtsabe bëts yebnentše imojétsemnënga nýetscanga cha tmojáninye tšabá jtsanana y Bëngbe Bëtsá jtsatschuanayana.

<sup>10</sup> Chënga imnatátšëmbo cha chë cosheto yojamnana, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entsanga lemošna jotejañama. Cha tšabá yojtsatsmënamna entsanga ojanánënga imojtsemna.

#### *Ntšamo Pedro tojanoyebuambá Salomonbe Amashjuana ca uabáinentše*

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluárana. As, nýetsca entsanga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye.

<sup>12</sup> Pedro chë entsanga tojánanye ora, tojanéyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nýe šcojtsëbuáutja? ¿Šmojtsejuabná nýe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca?”

<sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjáboshjona chamóbama. Pilato enjëtseboše Jesús jëtsboshjonama, pero tšëngaftanga Pilatbe delante šmonjányana chca ndoñe šmontsanboše ca, y chíyeca Pilato ndoñe tbontanboshjona.

<sup>14</sup> Jesús uamaná y nýetsca soyënguiñe tšabá amá enjamna, pero tšëngaftangna cha šmontsanoboté y Pilato šmonjanimpadá chabe cuenta canye boyabása, entsá obanayá, chabuatsboshjonama.

15 Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninÿe y chama fsëndétatsëmbo.

16 Jesús puerte obená endmënayeca, quem cosheto añémoca entsatsmëna. Ntšamo šmonjinÿe y šmonjatatsëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atše sëndétatsëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá.

18 Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngmënana yochtsanbomnama. Morna, ntšamo Bëngbe Bëtsá tojanayancá ya tonjochnëngo.

19 Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama,

20 y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá.

21 Canÿe te echanjóshjango, Bëngbe Bëtsá lempe tsmëmácá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entsanga tojanabuayenacá.

22 Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana.

23 Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentsana luaroca jtsemnama y chamotsepochochocama ca’ —cha tojánayana.

24 “Y nÿetsca chë Bëngbe Bëtsabe juabna oyebuambnayëngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonÿacá.

25 Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canÿe trato tojánbema; chë soyënga cabá tšëngaftangbiama entsemna. Bëngbe Bëtsá Abrahámbioye mëntsá tbojaniyana: ‘Chë ácbentsana entsángbeyeca tšabe bendicionënga chanjama nÿetsca quem luarentša entsangbiama ca.’

26 Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” —Pedro tojánayana.

## 4

### *Pedro y Juan Jerusalenentša mandadëngbe delante*

1 Pedro y Juan cabá entsanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga.

<sup>2</sup> Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna.

<sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.

<sup>4</sup> Masque chca, banga entsanguentšana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalemëntse tmojánenefjna.

<sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca.

<sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espiritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjémënga,

<sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

<sup>10</sup> Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiama Bëngbe Bëtsá tojanma cháuatayenama.

<sup>11</sup> Jesusbiamá Bëngbe Bëtsabe uabemana palabrënguiñe mëntšá endayana: “Chë yebna jebuanënga tmontsanaboté ndëtsbé, mora chë más bëts uashacuanëšentse entsejájona ca”. Tšëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna.

<sup>12</sup> Nÿe cha yobena tšëngaftanga játsebacama. Bëngbe Bëtsá ndocna inÿe entsábioye tbonjatšetá chabe obenana chca jamama; chíyeca quem luarentse ndocná más quenátobena bënga játsebacama. Nÿe Jesucristbe obenánaca aíñe ca —Pedro tojánayana.

<sup>13</sup> Chënga imojenjnaná Pedro y Juan tša añémoca ibojtsóyebuambnama tmojáninÿe ora, y chata tempo nduatsjínÿenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúsëftaca bayté ibojamnama.

<sup>14</sup> Y entsanga imojtsonÿaye chë tmojanshná cha chentse chátaftaca yojtsemnama; chë causa, chënga ndocá más tmonjanobená chatbe contra jatichámuana.

<sup>15</sup> As chora tmojanamëndá chentšana chábuaisebocnama y chentse tmojanoque dangna chë soyama imojtsenatsëtsnaye.

<sup>16</sup> Chënga imojtsentjanaye: “¿Ndayá chátaftaca mochjama ca? Jerusalemëntse oyenënga montsetatšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

<sup>17</sup> Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebáyana; y ndoñe chašmonjouenëse, jabuache castigo šochántse bomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamá entšángbeñe jtsabuátambayana.

<sup>19</sup> Pero Pedro y Juan tbojánayana: “¿Ntšamo tšëngaftanga šmatjyana ntšamo fchanjayanama ca? Ndegombre, Bëngbe Bëtsabe bominyiñe ndoñe tšabá quenátsmëna tšëngaftangbioye aíñe joyaunayana y chábioye ndoñe.

<sup>20</sup> Er bënga queftsátobena jtsajbanana oyebuambnayana chë tifjinje y tifjouena soyëngama ca.”

<sup>21</sup> Chë mandayëngna chátbioye tojtsanautatjá, pero chentšana tmojtanabáshejuana. Nyetsca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinjenana ntšamo chata jácastigama.

<sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

### *Jesucristbeñe ošbuáchiyënga Bëngbe Bëtsá tmojanimpadá más añemo chau-atšatama*

<sup>23</sup> Pedro y Juan ya tmojtanabáshejuana ora, tbojánata chë inje ošbuáchiyëngaftaca jateninjenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá.

<sup>24</sup> Chënga chca tmojanuentsana, nyetscanga cányiñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nyetsca béjayënga y lempe ntšamo chenache yomncá,

<sup>25</sup> chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná nye bonamentiamá soyënga jamana?

<sup>26</sup> Quem luarentša reyënga y amëndayënga imoprontánënga, nyetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

<sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama.

<sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entšángbeñe jtsóyebuambnayama,

<sup>30</sup> y cochjama acbe obenánaca šoquënga tšabá chamotsatsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bëngbe Bëtsáftaca jencuëntama tmojanpochocá orna, chë tmojánenefjnentše tojanangmëmana; y nyetscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

### *Nyetsca bomna soyënga nyetscangbiama yojtsemna*

<sup>32</sup> Jesucristbeñe ošbuáchiyënga, nyetscanga canje juabna imojtsebomna y ainaniñe cach canje ebionana. Ndocná ntjatichamuana chabe soyënga nye chabiamá yojtsemna ca, pero aíñe imojtsichamo, “atše sëndbomna soyënga nyetscangbiama entsemna ca”.



<sup>33</sup> Chë Jesusbe ichmónëngna puerte obenánaca mëntšá imojtsichamo: “Fsënjinye y fsëntsetatšëmbo Bëngbe Utabná Jesús obanënguentšana tojtayenama ca.” Y Bëngbe Bëtsá yojtšama chë ichmónënga bëtscá tšabe bendicionënga chamotsebonnama.

<sup>34</sup> Jesucristbeñe ošbuachiyëngbeñe ndocná yonjamna ndayánaca uajabotá, er nyetscanga fshantse o yebna bomnënga imojanamana jtsatobuíyana, y chë crocénana

<sup>35</sup> chë ichmónëngbiöye jayentšbuáchiyana, ntšamo tojtsëjabotcá nyetscanga jujátayama.

<sup>36</sup> Chca tojanma canya Bëngbe Bëtsabe bëtš yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá.

<sup>37</sup> Chana, fshantse yojtsatobuiye, y chë crocénana Jesusbe ichmónëngbiöye yojáyentšbuachiye, chë uajabótëngbiama chaoservema.

## 5

### *Ntšamo Ananías y Safirafaca tojanopasá*

<sup>1</sup> Inamna canye bacó, Ananías ca uabainá, y chabe shemna, Safira ca. Chatna canye fshantse tbojániye.

<sup>2</sup> Ananías y Safirna tbojanenóyeunata; chcasna, batšá crocénana cachatbiamama tbojanobuajó y chë tojanójama crocénana ichmónëngbiöye Ananías tojanamba, pero tojanëyana chana canjamna nyets crocénana ntsachetšá chë fshantsama tbojanosháchiñe ca.

<sup>3</sup> As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocénánama jabuambayama ca? Acna chë fshantsama tcmójtabená crocénánentšana cach acbiamama batšá tcontábojama.

<sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénánama chca jobostérama? Chca jamëse, ndoñe nye entšángbiöye quecatabuambná, sinó Bëngbe Bëtsánaca ca” —Pedro tbojaniyana.

<sup>5</sup> Ananías chë palabrenga tojanuena ora, obaná tojánshajaye. Y nyetscanga chama tmojántatšëmbonënga corente imojtsauatja.

<sup>6</sup> Chentšana, básefta bobontsënga tmojánashjajna y Ananíasbe cuerpo entšëjuaca tmojanandmaná y jauátbontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetatšëmbo ntšamo chabe boyáftaca tojanopasama.

<sup>8</sup> Chora Pedro tbojantjá: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aíñe, nyetšnama fsënjiye ca.

<sup>9</sup> Pedro tbojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebonnama ndoñe šontsobatmana ca? Acbe boyá jauátbontsama tmonjuambënga muentše bëšoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá.

<sup>11</sup> Y nyetsca Jesucristbeñe ošbuáchiyënga chentše imojtsemnënga y nyetscanga chë soye tmojántatšëmbonënga, corente imojtsauatja.



*Ba bēts soyēnga chē ichmónēnga tmojanma, Bēngbe Bētsabe obenana jinŷanŷiyama*

<sup>12</sup> Chē Jesucristbe ichmónēngaftaca ba bēts soyēnga entsāngbeñe yojtsebinŷna Bēngbe Bētsabe obenana jinŷanŷiyama; y nŷetsca Jesucristbeñe ošbuáchiyēnga imojanamana Bēngbe Bētsabe bēts yebnoca jénefnana, Salomonbe Amashjuana otsbojebnentše.

<sup>13</sup> Chē ínŷenga, chē Jesucristbeñe ndošbuáchiyēngna, imojtsauatja Jesucristbeñe ošbuáchiyēngaftaca jtsenutana; pero entsāngna chē ošbuáchiyēngbiamá tšabá imojtsencuéntaye.

<sup>14</sup> Bēngbe Utabnábeñe ošbuáchiyēnga más imojtsóbotena, bētscá boyabásenga y shembásengnaca.

<sup>15</sup> Tša bēts soyēnga chē ichmónēngaftaca yojtsebinŷna; chíyeca entsānga imojanamana jutsnēshangañe y tjuashēnguiñe tsáshenoye šoquēnga jubuacnana, chca, Pedro chējana tojtsachnējuana ora, nŷe mo chabe sómbrēnaca chēngbe cuerpejana chaochnēnguama, shnánēnga jtsatsmēnama.

<sup>16</sup> Jerusalén chábuañe pueblēnguentsāna ba entsānga imojanamana jabana, y šoquēnga y bacna bayējbe juabna uambayēnga imojtsēyabó; y nŷetscanga shnánēnga imojtsatsmēna.

*Bēngbe Bētsá tojanma Pedro y chē inŷe ichmónēnga cárcelocana natjēmbana chámuaisebocnama*

<sup>17</sup> Chē ichmónēnga tša tšabá imojtsamama, chē judío bachnangbe más uámana amēndayá y chabe ústonēnga, chē saduceunga, puerte envidia imojtsebmoma.

<sup>18</sup> As chē ichmónēngbioye tmojánishēche y chē bēts pueblentša cárceloye tojtsanētame.

<sup>19</sup> Pero ibetna, Bēngbe Utabná canŷe ángel tbojanichmó y chē utámenentša bēšašangá cha tojánatēfjo, chēnga tojtanēbuacna y mēntšá tojanēyana:

<sup>20</sup> “Motsajna, Bēngbe Bētsabe bēts yebnentše šmochjámashjna, y entsānga šmochjabuayená ntšamo cuanjama chē nŷetsca tescama yomna tšabe vida jtsebmomna, Jesucristoftaca cánŷiñe mo canŷacá jtsemnēse ca.”

<sup>21</sup> Ntšamo tmojanuencá, yēfsana cabá cachēse Bēngbe Bētsabe bēts yebnoye tmojána y tmojanontšé entsānga jabuátambana.

Chēntscuana, chē bachnangbe más uámana amēndayá y chabe ústonēnga, chē Israeloca bētsējemēngcá mándayēnga y inŷe chentša amēndayēnga tmojánachembo jénefnama y jenóyeunayama; as chora chēnga tmojanmandá chē utámenocana chē ichmónēnga jobiatšama.

<sup>22</sup> Pero chē soldadēnga chē utámenoye tmojánashjajna ora, chēnga chentše ndoñe tmonjánanŷena. Chcasna, chēnga tmojtaná chē mándayēnga chca jaúnayama.

<sup>23</sup> Y tmojánayana: “Chē utámenoca fsēnjínŷena lempe tšabá endētsētámeñe y soldadēngna nŷetsca bēšašangá monduabojanŷanga; pero fsēnjatēfjo y tsoye fsēnjámashjna orna ndocná chibiátinŷena ca.”

<sup>24</sup> Chē bachnangbe amēndayēnga y chē Bēngbe Bētsabe bēts yebnentša soldadēngbe amēndayá chca tmojanuena ora, yojtsētēmnana y imojtsentjanaye ndayá chentšana yochjanopásama.

<sup>25</sup> Chorna, chēnga imojtsemnentše canŷe boyabása tojánashjango y mēntšá tojanēyana: “Chē šmojutámiēnga mora Bēngbe Bētsabe bēts yebnoca montsemna, entsānga montsabuatambá ca.”

<sup>26</sup> Chē soldadēngbe amēndayá tojána soldadēngaca, chē Jesusbe ichmónēnga junatsama; pero nŷe tšabá tmojanēnatse, er chēnga entsāngbiamá imojtsauatja, nderado cachēngbioye ndētšbēngaca muantsēbaye.

27 Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana:

28 –Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nyetsca chë Jerusalenentša oyenënga chabe soyëngama šmojtsabatambá y šmojtseboše, cha tojanóbanama castigo bëngbeñe chaotsemnama ca.

29 Chorna, Pedro y chë inye ichmónënga tmojánayana: –Bënga šontsamna natsana Bëngbe Bëtsá joyeunayana y chentšana entšangbioye.

30 Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canye cruciñe juajabonjëse.

31 Bëngbe Bëtsá tbontatsbaná y chabe catsbioica tbojëtstbema, jtsamëndayama, y tbojábema entšangbe Unachayá y Atsebacyá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama.

32 Bënga fséntsichamo ndayá bënga ndegombre tifjinye Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espiritu cháuamashëngo chë tmojtseyeunanëngbe ainaniñe jtsemándayama ca –chënga tmojánayana.

33 Chë mándayënga chca tmojanuena ora, puerta tmojanotjayaná y tmojánbošena chë ichmónënga jtsëbáyama.

34 Pero chë mándayënguentše yojtsemna canye fariseo, Gamaliel ca uabainá. Chana canye ley abuatambayá inamna y entšanga puerta innarrespetana. As cha tojantsá y tojanmandá chë ichmónënga ratotema chentšana jubuacnama.

35 Chentšana chë inye mándayënga tojanéyana: “Israeloca taitanga, puerta cuedado šmochtsebmna ntšamo quem boyabásengaftaca šmochjamama.

36 Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canye uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá.

37 Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nyetsca chabe ústonënga tmontsanáshana.

38 Chíyeca atše cbéyana, quem boyabásënga matabáshejuana y ndocá mataborlánana. Ntšamo chënga montsamancá, nye entšangbe juabna y nye chëngbe trabajo tojtsemnëse, betscó echanjopochóca.

39 Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebmna, nderado mo Bëngbe Bëtsabe uayayënga šmuatjanenobiama ca” –cha tojanéyana.

Y as chënga Gamaliel tmojanoyeuná.

40 Chcasna, chë ichmónëngbioye tmojánachembo, tmojtsanachebuáanganja y tmojanéyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtanabáshejuana.

41 Chora chë ichmónënga chë amëndayëngbentsana puerta oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservëngbe bëtsemnayeca.

42 Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšangbioye imojanabuayiyná, Bëngbe Bëtsabe bëts yebnentše y yebnënguenáchnaca.

## 6

*Chë ichmónëngbiamá ujabuáchanënga tmojanëbuáyana*

<sup>1</sup> Chë tempo, Jesucristbeñe ošbuáchiyënga betesco imojtsóbotena. Chora chë Jesucristbeñe ošbuachiyëngbentse, chë judiënga griego biyanga batsá imojtsetsátjaye y chë judiënga hebreo biyangbiamá mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nÿetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjamoto soyënguiñe.

<sup>3</sup> Chcasna, baconga y batanga, tšëngaftanguentsana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye.

<sup>4</sup> Y bëngna šontsamna nÿets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayinayana ca” —chënga tmojánayana.

<sup>5</sup> Nÿetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espíritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá).

<sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentse jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentse más ošbuáchiyënga betesco imojtsóbotena. Y ba judiëngbe bachnángnaca tmojanontšë Jesucristbeñe jtsošbuáchiyana, ntšamo chë ínÿënga imojtsanošbuachecá.

*Esteban tmojánishache*

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entsángbeñe bëts soyënga yojtsama.

<sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontšë Estebanoftaca enatsëtsnayana. Chënga imojamna judiënga Cirenoquënga, Alejandrioquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”.

<sup>10</sup> Pero chë Uámana Espíritu tojanma Esteban chaóyebuambama bëts cá osertanacá, y chíyeca chënga ndoñe imontsobena ntšamo cha jojuana.

<sup>11</sup> As chënga báseftanga tmojanëbuénaye Estebanbe contra podesca soye chamuayanama, mëntšá: “Cha fsënjoyeuná Moisesbiamá y Bëngbe Bëtsabiamá ndoñe tšabá jtsóyebuambnayana, mo cuafjoyanguangcá ca.”

<sup>12</sup> Chcase chënga tmojanma entsanga, bëtsëjemëngcá mándayënga y ley abuátambayënga Estebanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo.

<sup>13</sup> Y tmojanënatse básefta entsanga, uayátšenaye soyënga y podesca soyënga Estebanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama.

14 Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtseepochóca y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabatambacá ca.”

15 Chë mándayënga y nÿetscanga chentše imojétsetbiamanënga Esteban tmojanonÿinÿé ora, tmojáninÿe chabe jubiá yojtsebuashinÿinÿana mo canÿe ángelbe jubiacá.

## 7

### *Ntšamo Esteban tojanenëuyaná*

1 Chora chë bachnangbe más uámana amëndayá, Estébanbioye tbojantjá: — ¿Ntšamo acbiamá montsichamcá ndegombre yojtsemna ca?

2 As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts puebloca joyénanama cabá nda ora,

3 y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.”

4 As Abraham chabe luare Caldea tojëftsanboshjona y tojána Haránoca joyénanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše.

5 Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatšëtayama, chabiamá y chabe básengbiamá, Abraham tojóbanentšana. Chca tbojanšbuachená ora, Abraham ni canÿe šešona bonjánbomna.

6 Y Bëngbe Bëtsá mëntšá tbojaniyana: “Chë ácbentšana entšanga, ínÿengbe luaroca áshjajnënga mochántsemna, y choca oyenënga chëngbe oservénënga chëngbioye mochanjábiamá y canta patse uatëntscuana jabuache mochanja-sufrina ca.”

7 Y mëntšánaca tbojaniyana: “Pero atše chanjácastigaye chca oservénënga chacmojábiamá luarentša entšanga; y as, chentšana chë ácbentšana entšanga mochanjésebocana y mora bontsemna luaroye mochanjésabo y muentše atše šmochántadorana ca.”

8 Bëngbe Bëtsá Abrahámbioye tbojanšbuachená nÿe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinÿnamna tbojanmandá chabe šešona, boy-abásetema tojonÿná ora, base bobachtema chë más delicadentše jatëtšana. Chíyeca, chabe uaquiñá Isaac tojanonÿná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

9 “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia innabomna y tmojtsatanobuiye, Egiptoeye canÿe oservenacá chamotsánatseñama. Pero Bëngbe Bëtsá Josébioye nÿets tempo ibnauájabuachana,

10 chíyeca nÿetsca chabe ngmenënguentsana tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyejúa



ntšamo José yojamna; chíyeca Faraón Josébioye tbojánbema Egiptoca mandado y chabe yebnënguëntše oyenëngbiámnaca.

11 “Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónyënama.

12 Pero Jacob tojántatšëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama.

13 Uta soyama chënga tmojtesaná ora, José chabe catšátanga tojanëyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatšëmbona.

14 Chentšana, José tojanmandá chabe taitá Jacob y nyetsca pamíllanga Egiptoye chamotsama. Canyësëfta bnëtsana shachnënga imojamna chë Egiptoye tmojánanga.

15 Chcasna, Jacob Egiptoye tojána choca joyënanama. Choca cha tojanóbana y chë inye bëngbe bëts taitángnaca.

16 Jacob y chabe básënga, ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá. Abraham tojëftsanbuamé cuevëshënguiñe. Abraham canye crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

17 “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna.

18 Cabana, Egiptoca inye rey tojanojayé y cha Josébioye ndoñe tbonjanabuátmana.

19 Chë reyna, bëngbe entšanga, chë bëngbe bëts taitángbioye tojanaingñe y tojanma chënga puerte chamosufrima; tojanamëndá, chë tmojtsónyina šešonatëmënga cachcá jtsënyayana chamotsóbanama.

20 Chë tempo canye básëtema tojanonyná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinjëntscuana.

21 Cachcá jonÿayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché.

22 Chca, chë Egiptoquënga imnatátšëmbo soyënga Moisés tmojanbuatëmbá y canye uámana entšá tojánbocna jóyebuambayama y ndayánaca jamama.

23 “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnama.

24 Canye, Moisés tojáninye canye Egiptocá canye Israelocábioye ibojtsetantšetaye ora; as Moisés tbojanoboguiyaná y chë Egiptocábioye tbojtsanóba.

25 Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentšana chëngbioye játsebacama ca. Pero chë Israeloquënga ndoñe yontsësertana.

26 Yëfsana, Moisés tojánanÿena útata, cach Israelocata, ibojtsentsjanaye; chora cha betesco tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’

27 As, chë inÿabioye ibojtsentsjanayá Moisésbioye tbojtsanajuatsëntše y tbojanianya: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’

28 ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’



<sup>29</sup> Moisés chca tojanuena ora, Madián luaroye tojtsanachá y choca joyena inye luarocana ashjangonacá. Chentše uta uaquiñata yojéftsabamna.

<sup>30</sup> “Chentšana canta bnétsana uatése, entšanga ndoyena luariñe, Sinaí tjañe béconana, canye ángel tbojánebëbocna zarzêsha yojtsángbototjuanentše.

<sup>31</sup> Moisés yojenjnaná ndayá yojtsonyama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye:

<sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama.

<sup>33</sup> As Bëngbe Utabná tbojaniyana: ‘Motsenóshecbotsca, er aca contsemnentše nye atšbiamá luare endmëna, er átšnaca chentše séntsemna.

<sup>34</sup> Ndegombre sënjinýe ntšamo atšbe entšanga Egiptoca montsesufrina y sënjouena chëngbe oyabojuayana, y atše sënjabo chënga jabátsebacama. Chcasna, mabouena, Egiptoýe cbochanjíchmuca ca’ –Bëngbe Bëtsá tbojaniyana.”

<sup>35</sup> Chentšana Esteban tojanëyana: “Quem Moisés entšanga tmojtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinýná ángeloftaca.

<sup>36</sup> As Moisés, bëngbe bëts taitanga Egiptocana tojésanëbuacna y bëts soyënga tojanma, y inye soyënga Bëngbe Bëtsabe obenana jinýanýiyama Egiptentše, chë Buángana ca uabaina mar béjayentše y entšanga ndoyena luarentše, canta bnétsana uatëntscuana.

<sup>37</sup> Cach Moisés Israeloca entšanga mëntšá tojanëyana: ‘Bëngbe Bëtsá tšëngaftanguentsana canya bochanjábema atšcá Bëngbe Bëtsabe juabna oye-buambnayá ca.’

<sup>38</sup> Moisés Israeloca entšángaftaca yojéftsemna chë entšanga ndoyena luaroca. Choca chë entšanga tmojánenefjna Sinaí tjañe béconana. Chentšana canye ángel Moisésoftaca tojanoyebuambá, bëngbe bëts taitángbioye chë buayenana soye Moisés chaóyebuambama, chë entšanga tšabe vida jónýenama palabrenga; y Moisés chca tojanma, bëngnaca chë palabrenga jouenama jobenayama.

<sup>39</sup> “Pero bëngbe bëts taitanga ndoñe tmonjánbošena joyeunayama, masna nye tmojtsanaboté y Egiptoýe jesshëconama imojtsaiseboše.

<sup>40</sup> Moisés cabá chë tja tsjuanoca chë ángeloftaca yojtsemna ora, chëngbe bachnangbe más uámana amëndayá Aarónbioye mëntšá tmojaniyana: ‘Bëngbe Bëtsabe cuenta šmayentšpormá canye buashinýinýana soye jadórama, bënga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjëftsëbuacnáftaca ca.’

<sup>41</sup> As tmojanma canye buashinýinýana soye mo canye uacnabecá y cha jadórama ba bayënga tmojanëbaye, y tmojanóboyejuanga cachënga chë soye tmojanpormáyeca.

<sup>42</sup> Chë causa, Bëngbe Bëtsá chëngbentsana tojtsanojuánañe y cachcá tojesanënyaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe librëšañe mëntšá endayana, ntšamo Bëngbe Bëtsá tojanayancá:

Israeloca entšanga,

¿Atše jëtschuayama bayënga chešmënjanebaye y chë soyënga chešmënjánatšëmbona,

chë canta bnétsana uata entsanga ndoyena luarentše tšëngaftanga šmonjëftsemna ora?

<sup>43</sup> Atše jadóra cuentna, chë Molocbiana jebna soye šmonjanacutsá y cha šmonjánadorana,

y chë Refánbe estréllacnaca cachcá šmonjánama.

Chë soyënga mo Bëngbe Bëtsá cuenta šmonjánbomna y cach tšëngaftanga šmonjanobopormá jadórama.

Mora chë causa atše chanjama, Babilonientšana más chcoye tšëngaftanga chacmotsénatsama ca” —chiñe endayana.

<sup>44</sup> “Bëngbe tempsca bëts taitanga entsanga ndoyena luaroca, chë jatsjacama opodena yebna innabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninÿinÿecá.

<sup>45</sup> Bëngbe bëts taitangna chëngbe taitángbentsana chë jatsjacama opodena yebna chëngbiana tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsjava tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentsana tmojtanébuacna; y chë jebna soyna chë tmojanayënjána luarentše tojanoquedá, rey David yojëftsiyenëntscuana.

<sup>46</sup> David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama.

<sup>47</sup> Pero Salomón inamna nda chë Bëngbe Bëtsabe bëts yebna tojanjebuá.

<sup>48</sup> Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> ‘Celoca endmëna chë luare ndayentšana atše tsmánda,

y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntšamo atšbiana jebna yebna šmochjajebo ca?’ —chë Utabná jayanana—

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nÿetsca chë soyënga tijamëse ca?’ ”

<sup>51</sup> Esteban mëntsánaca tojanéyana: “Tšëngaftanga nÿets tempo josértama ndëbošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjaniiyencá, tšëngaftángnaca cachcá.

<sup>52</sup> ¿Bëngbe Bëtsabe juabna oyebuambnayënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtšanëbaye, y mëngna entsángbioye imojanabuayiyná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšiče cha šmojábošjona y šmojóba.

<sup>53</sup> Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

#### *Esteban ndëtsbéngaca tmojanóba*

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnana.

<sup>55</sup> Pero chë Uámana Espíritu Estébanbe ainaniñe corente yojtsemándaye. Celoye yojntješiyey y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana.

<sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

<sup>58</sup> Chentšana, chënga chë pueblentšana tmojtsanábozna y ndëtsbéngaca tmojtsanatëchënganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojesanábonÿiñe chaotsinÿenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

### *Saulo yojánama chë Crístbeñe ošbuáchiyënga chamotsesufrínama*

Cach te, inÿenga tmojanontšé Jesucrístbeñe ošbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmonjánacheta.

<sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamana puerte tmojánenobošachna.

<sup>3</sup> Chëntscuana, Saulo yojtsentšena Jesucrístbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamana.

### *Felipe Samaria luaroca tšabe noticiëngama yojanabuayiyiná*

<sup>4</sup> Y Jesucrístbeñe ošbuáchiyënga tmojanáshanëngna nÿetsquénache imojánabuayiyenaye Jesusbe tšabe noticiënga.

<sup>5</sup> Chca, Felipe Samarioye tojána y tojanontšé chë Bëngbe Bëtsabe Uámana Uabuayaná, Cristbiamana, chentša entsanga jábuayenama.

<sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana.

<sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna.

<sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canÿe pueblentše Samarioica inamna canÿe boyabása, Simón ca uabainá; cha tempo inamna canÿe bocjuaná y chë Samarioica entsanga chabe soyëngama imojánenjnanaye. Cha yojánichamo cha canÿe uámana entšá canjamna ca.

<sup>10</sup> Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿinayá ca.”

11 Y ndegombre chënga corente inmayerunana, er cha chë bocjuanana soyëngaca bayté chë entsànga ingñénënga y ojnánénënga yojtsabamna.

12 Pero chë luarentsa entsànga, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye.

13 Y cach Simónëncaca Jesucristbeñe yojtsošbuáchiye y tojanenábaye, y chentsana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnánaná yojtsemna.

14 Chë Jerusalenoca imojtsemna ichmónënga tmojántatšëmbona Samarioca entsànga Bëngbe Bëtsabe palabra tmojanóyeunama; as, chora Pedro y Juan choye tmojanichamó.

15 Pedro y Juan Samarioye tbojánashjango ora, chentse Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháuamashënguama jtsemándayama.

16 Er cabá ni mo cánÿabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca.

17 As Pedro y Juan chëngbe bestšašinë cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

18 Simón tojáninÿe, chë ichmónënga entsángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe,

19 y átšnacaca chë obenana šmatšetá, y ndábeñnacaca cucuatšënga chajajajó ora, chábeñnacaca chë Uámana Espíritu cháuamashëngo ca.

20 As Pedro tbojanianyana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa!

21 Ndegombre, aca bëngaftaca ndoñe quecátsmëna, ni bëngbe trabajo achiana quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa.

22 Ngmëncaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna.

23 Atše sëntsetatšëmbo, acbe ainaniñe tša bacna juabnënga ínÿëngbiana yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojanianyana.

24 As chora Simón tojanéyana: —Bëngbe Utabná atšbiana šochjaimpáda, ntšamo šmonjauyancá ndoñe chandëpasama ca.

25 Pedro y Juan, ntšamo Bëngbe Utabná Jesucristbiana tbojaninÿcá y ibnatatšëmbcá entsànga imojtsëtsësnaye. Chentsana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entsànga abuayinayene.

### *Felipe y chë Etiopía luaroca reinabe uajabuachaná*

26 Chentsana, Bëngbe Utabnabe canÿe ángel Felípbioye tbojanianyana: “Moprontá y tsmána luarëngoye motsa, Jerusalenentsana Gaza ca uabaina bëts pueblöyë benachëjana ca.” Chë benachna entsànga ndoyena luarëjana yojanachnëngona.

27 As Felipe yojëtsëtsbaná y tojána. Benachiñe tbojáneninÿëna canÿa Etiopía luarocáftaca. Etiopía luaroca canÿe reiná inamna y chë boyabásana chabe

uajabuachaná y chabe crocénana bojanýá inamna. Chana Jerusalenoye tojánabo Bëngbe Bëtsá jadórama.

<sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librësha yojtsaiualíaye.

<sup>29</sup> Chora chë Uámana Espíritu Felípbioye tbojanianyana: “Mobeconá y chë cochësha juachaca cochtsaye ca.”

<sup>30</sup> As Felipe betsko yojobeconá. Chora yojouena chë Etiopía luarocá, Isaíasbe uabemana librësha yojtsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjuá: —¿Ntšamo šochjosérta, ndocná šonjabuayenase ca?

Y Felípbioye tbojanianyana: —Diosmanda, atšbe cochëshoye másëngo y atšbe juachaca mabótbema ca.

<sup>32</sup> Isaíasbe uabemana librëshañe mëntšá yojtsalíaye: Cha tmojanánatse mo canýe oveshá jóbama cuafjuanatscá; y chë mo canýe oveshá tmojtsëtsbotjné ora, cha iytëca jtsemnana, chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canýe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana, quem luarentša chabe vida tmonsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojanianyana: — Diosmanda, šmobuayená, ¿ndabiama Bëngbe Bëtsabe juabna oyebuambnayá chca yojtsichamo, cachabiana o ínýabiana ca?

<sup>35</sup> As Felipe tojanontsé, chë Isaíasbe librëshañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canýe béjaye obëjniñe juachañe ibojtsachnëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabayé ca.

<sup>37</sup> As Felipe tbojanianyana: —Jesucristbeñe nyets acbe ainánaca tcojtsošbuáchese, aíñe echanjopódia juabáyama ca.

Y chë boyabása tbojanjuá: —Aíñe, sëntsošbuaché Jesucristo Bëngbe Bëtsabe Uaquiñá yomnama ca.

<sup>38</sup> As chë Etiopiocá tojanmandá chë cochësha chauátotonama. Chentšana, nyets útata chë béjayoye tbojanashëbëbuástjango y Felipe, chë Etiopioca uajabuachanábioye tbojanabaye.

<sup>39</sup> Chë béjayentšana tbojtanbocna ora, chë Uámana Espíritu Felipe ibojtsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojtsatoñe.

<sup>40</sup> Felipe tojántatšëmbona Azoto bëts puebloca yojtsemnama, y chentšana tojána nyetsca pueblënguenache chë tšabe noticiënga abuyayynaye, Cesarea puebloye jashjanguëntscuana.

## 9

*Ntšamo Saulo Crístbeñe ošbuachiyá tojanóbema  
(Hch 22.6-16; 26.12-18)*

<sup>1</sup> Saulo chëntscuana cabá Bëngbe Utabnábeñe ošbuáchiyënga yojanautatjné jtsëbáyama. Chama cha tojána chë bachnangbe más uámana amëndayábioye,



<sup>2</sup> uabemana tsbuanachangá jauátjañama, as chěchangaca jobenayama chě Damascoca judiēngbe enefjuana yebnēngoye jama, y chocna, chě Jesucristo tojaninñanyé Benache ustoniñe, boyabásenga o shembásenga tojánñenese, jótabayama y Jerusalenoye junatsama. Y chca jamama tojánbocna.

<sup>3</sup> Pero ya Damasco béconana yojsaye orna, nñe ndeolpe chabe juachañe celocana canñe bēts tcuinñe tojanbuashinñinñena.

<sup>4</sup> Chora Saulo fshantsoye tojánshajaye y canñe oyebuambnayana tojanuena, mēntśá: —Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bēngbe Utabná ca?

Y chě oyebuambnayana tbojanjuá: —Atše sēndmēna Jesús y aca condama atśbe entśanga chamotsesufrínama.

<sup>6</sup> Pero matētsbaná y Damascoye mamáshēngo; chentše canña cmochanjabuayená ndayá jamama cmojtsemnana ca.

<sup>7</sup> Chě Sáuloftaca imojánajna boyabásenga tša auatjanánēnga imojtsemna y chíyeca ndoñe imontsobena jóyebuambayana; er nñe chě oyebuambnayana tmojanuena, pero ndocná tmonjáninñe.

<sup>8</sup> As Saulo fshantsentśana tojtantsbaná y tojtanobuchatēfjona ora, tondaye yontsobena jinñana. Chcasna, chě ínñenga tmojëftsanobuacuetēntśé y chca, Damascoye tmojanánatse.

<sup>9</sup> Chentše yojëftsemna unga te, jinñama ntsobencá, ni ntjascá y tondaye ntjofšiyca.

<sup>10</sup> Damascoca Jesucristbeñe canñe ošbuachiyá inoyena, Ananías ca uabainá. Cha Bēngbe Utabnábioye mo otjenayoquēcá tbojáninñe y Bēngbe Bētsá tbojanianana: —Ananías ca.

As cha tbojanjuá: —Bēngbe Utabná, ¿ndayá chjama ca?

<sup>11</sup> Y Bēngbe Utabná tbojanianana: —Moprontá y motsa chě “Ndericho tsáshenañe ca” uabainoye, y Júdasbe yebnentše cochjanotícia canñe boyabásabiama, Saulo ca uabainábiami, Tarso pueblócá; cha mora Bēngbe Bētsáftaca bentsencuénta.

<sup>12</sup> Saulo ya tonjinñe mo otjenayoquēcá, canñe entśá Ananías ca uabainá entsamashjuana y chabe cucuatśēnga chabe bestśašinñe entsejájua, chca, cha chabuatabinñana ca.

<sup>13</sup> Ananías chca tojanuena ora, tojánayana: —Bēngbe Utabná, banga ba soyēnga chabiama šmonjacuentá; Jerusalenoca tša bacá acbe entśanga imomnēnga tojaborlaye.

<sup>14</sup> Y mora entsebmna mando chě bachnangbe amēndayēngbentśana, muentše aca otšēmbuanēnga jótabayama ca.

<sup>15</sup> As Bēngbe Utabná tbojanianana: —Motsa, er atše cha sēnjuábuayana atśbiama chaotrabajama; chaóyebuambama ndoñe judiēngbeñe, reyēngbeñe y Israeloca entśangbeñnaca, y chca, chēnga atśbiama chamotatsēmbonama.

<sup>16</sup> Atše cha chanjinñinñiye ntsachetśá ibojtsemna átsbeyeca jasúfriama ca.

<sup>17</sup> As Ananías tojána Saulo yojsanmēna yebnoye. Tojánamashēngo ora, Saulēbe bestśašinñe chabe cucuatśēnga tojanjajó y tbojanianana: “Jesucristbeyeca atśbe catśata, Saulo, Bēngbe Utabná Jesús, chě benachējana conjanabó ora cmonjanebēbocná, šonjichmó aca chacmatabinñana y chě Uámana Espiritu acbe ainaniñe jtsemándayama cháuamashēnguama ca.”

<sup>18</sup> Cachora, Sáulēbe bominñentśana mo beonbe bobachēshēngcá tojan-tquécjana, y chca, ibojtsatabinñana; chora tojantsbaná y tojanenábaye.

<sup>19</sup> Chentśana, Saulo tojanse y añemo yojsatsbomna y baseftayté chě Jesucristbeñe ošbuáchiyēngaftaca tbojántotona, Damascoca.

*Damasco puebloca Saulo entśanga yojanabuayiná*

20 Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

21 Chë imojtsuenanënga nyetscanga imojtsenjanaye y mëntśá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšiñe jabáshejuanama.”

22 Pero Saulo cada ora más añémoca yojtsóyebuambnaye y puerte tšabá yojaninyäná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

### *Ntšamo Saulo judiëngbentsana tojtsanachá*

23 Bayté tojanochnëngo ora, judiënga tmojanenoyeuná ntšamo jamëse Saulo jóbama,

24 pero Saulo chë soye tojántatšëmbona. Bnëtë y ibeta, chë bëts pueblentša bëšašanguenache chënga chabiamá imojananyá, jtsóbama;

25 pero chë Jesucristbeñe ošbuáchiyënga, ibeta, cha canye bëts sbarëcuiñe tmojtsanatsuamá, y chë pueblentša shëconana tapiëšëjana tmojtsanëštjango. Chca cha tojanotsbocá.

### *Saulo Jerusalenoca*

26 Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama.

27 Chcasna, Bernabé Sálëbiyoye tbojëftsanbetše y chë Jesucristbe ichmónëngbiyoye tbojanánatse, y tojanacuntá Saulo benachiñe Bëngbe Utabnábiyoye tbojáninyama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiamá entsanga tojánabuayenama.

28 As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiamá bëts añémoca entsanga yojanabuayinyá y

29 yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama.

30 Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

31 Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### *Pedro Enéasbiyoye tbojanshná*

32 Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entsanga jabuachámnaca tojána.

33 Lida pueblentše canya tbojáninyena, Eneas ca uabainá. Cha jama ndobená inamna y posufta uata jutsnëshañe chca inajájona.

34 Pedro tbojaniyana: “Eneas, Jesucristo tcomonjashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

35 Nyetscanga chë Lida pueblentše y Saronoca oyenënga chë entsá shnaná tmojáninye. Y as, chënga bacna soyënga amana tmojtsanajbaná y cachorscana tmojanontsé Bëngbe Utabnábeñe ošbuáchiyana.

### *Pedro tojanma Dorcas cháuatayenama*

<sup>36</sup> Chë tempo, Jope pueblota yojanienya canye shembása Jesucristbeñe ošbuachiyá, Tabita ca uabainá, o griego biyaña Dorcas ca. Cha nyets tempo tsabe soyenga yojánama y yojanamana chë tojtsëjabetenga jujabuáchana.

<sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanaajó.

<sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuachiyenga tmojántatsëmbona Pedro choca yojtsemnama. Asna, uta boyabásata tmojanichamó Pedro jauyanama: “Dios-manda, betSCO Jope pueblote mabo ca.”

<sup>39</sup> As Pedro tojéftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinýinýnaye chë Dorcas yojaujonaná entšayangá y cmešëjuangá, cabá chëngaftaca yojéftsemna ora.

<sup>40</sup> Pedro tojanmandá nyetscanga chentšana chamotsebocanama; chora Pedro yojoshëntsamentšiyey Bëngbe Bëtsáftaca ibojencuentá. Chentšana, Pedro chë obanábioye tbojanonýinýyey y tbojanienya: “Tabita, matëtsbaná ca.”

As Dorcas tojtanoBuchatefjona y Pédrëbioye tbojáninýey ora, tojanótbema.

<sup>41</sup> Chora Pedro tbojanábuacueshache y tbojtansbaná. As Pedro tojánachembo nyetsca chë Jesucristbeñe ošbuachiyenga, chë viudanga y chë inýenga, y Dorcas ainá tojtandinýané.

<sup>42</sup> Chë soye nyets Jope pueblentše tojanótatsëmbona y banga Bëngbe Utanábëñe imojtsošbuachiye.

<sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

### *Pedro y Cornelio*

<sup>1</sup> Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá.

<sup>2</sup> Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbomnjëmënga jujabuáchama y sempre Bëngbe Bëtsáftaca ibnéncuentaye.

<sup>3</sup> Canye te, mo bëts mošenana ora, cha botamana tojáninýey mo otjenayoquécá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojanienya: —¡Cornelio ca!

<sup>4</sup> Cornelio chë ángelbioye ibojtsonýaye y auatjananá tbojanienya: —Taita, ¿ndayá yojtsemna ca?

Y chë ángel tbojanienya: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

<sup>5</sup> Chcasna, mora básefta boyabásenga Jope bëts pueblote michamó y Simón, chë Pedro ca monduabobuatmá, moye chamuánatse.

<sup>6</sup> Cha posada entsebmna inýey Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentšana útata tojánachembo y canye soldádnaca, chabe uajabuachaná, Bëngbe Bëtsá adorayá;

<sup>8</sup> Lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nÿetsto ora, chënga benachiñe Jope béconana imojt-sajnëntscuana, Pedro yebnentša tsbanánoye tojánášëngo, Bëngbe Bëtsáftaca jencuéntama.

<sup>10</sup> Becá tbojánishëntsena y jasama yojtseboše; pero imojtsebo-próntantscuana, Pedro mo otjenayoquécá mëntšá tojáninÿe:

<sup>11</sup> Celoca yojtsatëfjna y mo canÿe bëts entšayëjuacá yojtsabá y nÿets canta sibientšana yojtsëjonÿana.

<sup>12</sup> Chë entšayëjuañe imojtsemna nÿetscna bayënga, ósjojnaye bayënga y nÿetscna shloftšëngnaca.

<sup>13</sup> Y tojanuena canÿe oyebuambnayana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyíñe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayana mëntšá: —Bëngbe Bëtsá tojalesenciá y canÿe bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua.

<sup>17</sup> Pero Pedro ndoñe yontsetátšëmbo ntšamo tojaninÿcá ndayá chabiamama yojtsayanama. Chëntsçuana, chë Cornéliëbe ichmónënga noticiánana Simónbe yebnoca tmojánashjajna y shjoca bëšoca imojtsobátmana.

<sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninÿama chabosertama yojtsenójuabnantscuana, chë Uámana Espiritu tbojanianama: “Mouena, muentše mora unga boyabásenga cmontsenguá.

<sup>20</sup> Motsbaná, mocana matastjango y yapa ntjatenójuabnaycá chëngaftaca cochjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canÿe tšabá mándbomna entšá y Bëngbe Bëtsábioye adorayá, y nÿetsca judiënga chabiamama tšabá mondbëtsoyebuambnaye. Bëngbe Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanëmashengo y posada tojanëyentšame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentšënga Pedro tmojantjëmbambá.

<sup>24</sup> Chë inÿe yëfsana Cesarea puebloye tmojánashjajna. Chentše Cornelio Pédrëbiamama yojtsobátmana, y Cornelio tojanëbuaja pamíllanga y tšabe amiguëngnaca chentše imojtsemna.

<sup>25</sup> Pedro tojánashjango ora, Cornelio tojánbocna jajëbenguama y chabe shecu-atšentše yojshëntsamentšiye cha jadórama.

<sup>26</sup> Pero Pédrëna tbojtanatsbaná y mëntšá tbojanianama: —Matëtsbaná, atše cach aquécá nÿe canÿe entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánanÿena, chentše tmojanótotënga.



28 Chora Pedro tojanéyana: —Cach tsëngaftanga šmondétatsëmbo chë judiëngbe leyënguifne endayana ndoñe yondopodena canye judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna ínÿabiama jatsjuabnayana cháftaca jenútanama ndoñe tšabá yondmëna ca.

29 Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

30 As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuéntaye y ndeolpe sënjinÿe atšbe delante canye boyabása uabuashinÿinÿana entšayaca bopormaná.

31 Cha šonjauyana: “Cornelio, Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca.

32 Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.”

33 Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

### *Ntšamo Pedro tojanoyebuambá Cornéliëbe yebnentše*

34 Pedro chora tojanontsé mëntšá jóyebuambayama: —Mora atše šontsosertana, ndegombre Bëngbe Bëtsabiama nÿetscanga cachcá uámanënga imomnama.

35 Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga.

36 Tsëngaftanga šmondétatsëmbo, Bëngbe Bëtsá Israeloca entšanga tojánabuayanama, tšabe noticiënga jtsóyebuambnayëse, chënga nÿetscanga ainaniñe tšabe ebionana chamotsebomnama, Jesucrístbeyeca; y cha endmëna nÿetsca entšangbe Utabná.

37 Tsëngaftanga šmondétatsëmbo ntšamo nÿets Judeoca tonjanopasama. Chë soye Galilea luaroca tojanoboatšé, Juan entšanga yojanabuayiyná orscana, chënga bacna soyënga amana chamotsajbanama y chamuenábayama.

38 Smondétatsëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháumashënguama, y tojanma Jesús corente obená chaotsemnama; y šmondétatsëmbo ntšamo Jesús enjánana entšangbiamama tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

39 “Bënga fsënjáninÿe y fsëndétatsëmbo lempe ntšamo Jesús tojanmá Jerusalenoca y nÿets Judea luariñe; y cha tmonjanóba, canye cruciñe jacrucíficase.

40 Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama.

41 Cha nÿetsca entšangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentsana bënga cháftaca fsënjanse y fsënjanošé.



<sup>42</sup> Cha šonjichamó entsanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiamama y ainëngbiamama yochjayana tšabá o ndoñe tšabá tmonjamama.

<sup>43</sup> Bëngbe Bëtsabe juabna oyebuambnayënga nyetscanga cach Jesusbiamama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espíritu tmojánóyëngacñe*

<sup>44</sup> Pedro chë palabrenga cabá yojtsoyebuambnantscuana, chë Uámana Espíritu tojánamashëngo nyetsca chë imojtsuenanëngbe ainaniñe jtsemándayama.

<sup>45</sup> Chë judiënga Jesucristbeñe ošbuáchiyënga Pédroftaca tmojánabënga imojenjananá, chë Uámana Espíritu ndoñe judiëngbeñnaca cháumashënguama Bëngbe Bëtsá tojanmama.

<sup>46</sup> Chënga imojtsuenana chënga inyetsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espíritu tmonjóyëngacñe ntšamo bënga tmonjoyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnana ca.”

<sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

## 11

*Ntšamo Pedro chë Jerusalemoca imojánenefjuana ošbuachiyëngbioye tojanéyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojánatšëmbona, chë ndoñe judiëngnaca Bëngbe Bëtsabe palabreñe imojtsošbuáchemama.

<sup>2</sup> Pero Pedro Jerusalemoye tojesaná ora, báseftanga chabiamama ndoñe tšabá tmojánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtama tëtšenënga jtsemnana ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca.

<sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanéyana:

<sup>5</sup> —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninye celocana mo canye bëts entsëjuacá átšbioye enjétsabeconaye y nyets canta sibiocana enjétsëjonýana.

<sup>6</sup> Y botamana sënjanrrepará ndayá chë tsoye bëtsemnana y sënjáninye choye monjëtsemna uamna y tjoca bayënga, ósjojnaye bayënga y nyetscna shloftšëngnaca.

<sup>7</sup> Y sënjanuena canye oyebuambnayana mëntšá: “Motsbaná, Pedro; mobaye y quem bayënga mose ca.”

<sup>8</sup> Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyíñe ndoñe yondëlesenciana jasama bayënga y jasama ndoñe tšabá imomnënga ca.”

<sup>9</sup> Chentšana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canye bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.”

<sup>10</sup> Chë soye unga soyama chca tonjanopasá y chentsana chë entsëjua celoye tontanátsjua.

<sup>11</sup> Y cachora unga boyabásenga Cesarea pueblocana ichmónënga, chë posada sëndbomnentse tmonjánashjajna, atse janguanguama.

<sup>12</sup> Y chë Uámana Espíritu šonjanmandá atse yapa ntjatenujuabnaycá chëngaftaca jama; y quem chnënguana Jesucristbeñe ošbuachiyëgnaca átseftaca tmonjána. Njetscanga canye entsá Cornelio ca uabainabe yebnoye fsënjánamashjna;

<sup>13</sup> y chana bënga šonjanacuntá ntšamo tojáninye, cachabe yebnentse canye ángel ibojtsebiatsana y mëntšá tbojaniyana: “Básefta boyabásenga Jope bëts puebloye michamó y moye chamuánatse Simón, chë Pedro ca monduabobu-atmá,

<sup>14</sup> y cha cmochanjabuayená ntšamo aca y acbe yebnentša oyenënga šmochjotsbocá ca.”

<sup>15</sup> As, atse jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

<sup>16</sup> “Chora sënjanenujubó ntšamo Bëngbe Utabná tonjánayanama: ‘Ndegombre, Juan entsanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’

<sup>17</sup> Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatsatacá. Y chca, atse ndoñe quetsásmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë njetsca tescama yomna tšabe vida chamotsebomnama ca!

*Ntšamo Antioquía puebloca tojanobojatsé, entsanga Jesucristbeñe ošbuáchiyana*

<sup>19</sup> Esteban tmojanóba chentsana, tmojanontsé chë Jesucristbeñe inye ošbuachiyëgnaca jatëcamiyama. As chentsana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama.

<sup>20</sup> Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.

<sup>21</sup> Bëngbe Utabnabe obenana chëngaftaca yojtsemna, y chca, ba entsanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojántatsëmbona ora, Antioquía luaroye Bernabé tmojanichmó.

<sup>23</sup> Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Njetscanga tojanabuayená chamotsiyena njets ainánaca Bëngbe Utabnábeñe jtsošbuáchiyëse.

<sup>24</sup> Bernabé inamna canye entsá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentsana, Bernabé Tarso puebloye tojána Saulo janguanguama,  
<sup>26</sup> y tbojáninyena ora, Antioquía luaroye tbojëftsanbetše. Antioquía luarentsna canye uata nyetsá Jesucristbeñe ošbuáchiyëngaftaca cányiñe ibojëftsemna y ba entsanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána.

<sup>28</sup> Chënguentšana canya Agabo ca uabainá tojantsá y chë Uámana Espíritbeyeca tojánayana, mëntsá: “Nyets luariñe entsanga oyeñiñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.

<sup>29</sup> Chcasna, chë Antioquía bëts pueblentsa Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama.

<sup>30</sup> Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

## 12

### *Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamia y jätsetšenama.

<sup>2</sup> Tojanmandá espadëjaca chamóbama Santiago, Juanbe catšata;

<sup>3</sup> y Herodes tojántatsëmbona judiënga chë soye tojanogúsetama; as, cha tojanmandá Pédrënaca chamutámiamia. Chca tojanopasá chë levadúraca ndëpormana tandëse sayté, Bashco fiesta ora.

<sup>4</sup> Pedro tmojánishache orna, Herodes tojanmandá chamutámiamia, y chë cárceloca soldadënga cantátanga tmojanenajatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama.

<sup>5</sup> Chcasna, Pedro yojtsëtámena y chë soldadëngna corente imojtsebojanýá. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiamia.

### *Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canye te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canye soldado yojtsemna; uta cadenëjuaca yojtsabatsëcna y inye soldadëngna bëšócana chë utámeniñe imojtsebojanýá.

<sup>7</sup> Ndeolpe, Bëngbe Utabnabe canye ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacuatšënguentšana tojanatquécjana,

<sup>8</sup> y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojanianyancá, y chora chë ángel tbojätaniyana: “Mataquëfsayé y šmasto ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canye otjénayoca cuaftsemncá ca.

<sup>10</sup> Y útentše chë soldadënga imojtsebojanýajana chata tbojánachnëngo y yerëša bëšásoye tbojánashjango, chë ndayéša yojanamna tsáshenoye jabocnama; y chë bëšášana nye cachabe ponto yojotëfjo. Chentsana

tbojěftsanbocna ora, canýe tsáshenějana ibojtsaye, y nýe ndeolpe chë ángel Pédrëbentšana yojtsojuánañe.

<sup>11</sup> Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámna ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuéntaye.

<sup>13</sup> Pedro chë tsashenoica bësásoca tojanchembo ora, canýe oservená, Rode ca uabainá, tojánbocna jarrepárama.

<sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bësoca yojtsemna ca.

<sup>15</sup> Chë tsoca imojtsemnëngna chora tmojanियana: “¿Opá chectsebocna ca?” Pero chë oservená yojtsichamo ndegombre ca. Y chënga tmojanियana: “¡Chabe ángel ctsemna ca!”

<sup>16</sup> Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerte imojenjaná.

<sup>17</sup> Pero Pedro tojánëfjatsëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínýoye yojáta.

<sup>18</sup> Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

<sup>19</sup> As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýa soldadënga jtsëbáyama. Chë soyënga tojanochnëngo chentšana, Herodes Judea luarentšana tojěftsanbocna y Cesarea luaroye tojtsanoñe, y choca tojtsanoquedañe.

### *Herodes tojanóbana*

<sup>20</sup> Herodes corente yojtsetsátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida innabomna Heródesbe luaroca sanángaca.

<sup>21</sup> Chcasna, rey Herodes inýe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé.

<sup>22</sup> Chora entšanga tmojanontšë mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canýe dios entsemna ca!”

<sup>23</sup> Cachora, Bëngbe Bëtsabe canýe ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojěftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tojěftsanbetše.



## 13

### *Bernabé y Saulo tbojanbojatsé Bëngbe Bëtsabe trabajo jamama*

<sup>1</sup> Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyefata) y Saulo.

<sup>2</sup> Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentshana chabuétseboचना; chatna canye trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye.

<sup>5</sup> Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Nyets chë luarëjana tmojánachnëngo orna, Pafos puebloye tmojánashjajna; y chentše tmojáninýena canye judío tatsëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyebuambnayá ca, pero ndoñe chca yonjamna.

<sup>7</sup> Chë tatsëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana.

<sup>8</sup> Pero chë tatsëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá.

<sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye,

<sup>10</sup> y tbojanianyana: “¡Abuambnayá, puerte bacna entšá, Satanasbe uaquiñá y tsabe soyënga ndoñe chaondëtsebínýnama trabajayá! Bëngbe Utabnabe nyetsca ndegombre soyëngama aca contsichamo uayátsenaye soyënga yojtsemna ca.

<sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canya buacuetëntšnana chabuánatsama, jtaná yojtsemna causa.

<sup>12</sup> Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

### *Pablo y Bernabé Antioquía pueblentše, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona.

<sup>14</sup> Pergentšana Antioquía puebloye tbojátanata; chë pueblo inamna Pisidia luare béconana. Chentšana, ochnayté, chë judiëngbe enefjuana yebnoye tbojánamashëngo y tbojanótbema.



<sup>15</sup> Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canya tmojanichmó chënga jáuyanama: —Israeloquënga, bënga fsëntseboše entsanga chašmabuayená, nderado ndayá jayanama šmojtsebomnëse, muentša entsanga añemo chamotsebomnana ca.

<sup>16</sup> As Pablo tojantsá y entsángbioye cucuátseca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga.

<sup>17</sup> Israeloca entsanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnana, chënga Egiptoca inye luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana.

<sup>18</sup> Canta bnëtsana uata nyëtsá, Bëngbe Bëtsá entsanga ndoyena luaroca chënga yojanëuantana,

<sup>19</sup> y cha tojanma chë Canaán luaroca canysëftentša entsanga chamopochocama y bëngbe bëts taitanga chëngbe fshantsënga nduiñënga tojánabiama.

<sup>20</sup> Chë tempo, chë Bëngbe Bëtsá Abrahámbioye quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana.

<sup>21</sup> Chentšana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamilanguentšá.

<sup>22</sup> Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davídbioye mo chëngbe reycá tbojánbema. Chabiama Bëngbe Bëtsá tojánayana: ‘Atše sëndëtatšëmbo, David, Isaibe uaquiñá, canye tšabe entsá yomnana y chama atše sëndoyejúa, y cha sempre endëprontana ntšamo atše stsebošcá jtsamama ca.’

<sup>23</sup> Davídbentsana canye entsá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

<sup>24</sup> Cabá Jesús ndëbocna ora, Juan nyëtsca Israeloquënga tojanabuayená bacna soyënga amana chamotsajbanama y chamuenábayama.

<sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënana tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átsbentsana echanjabo canya, y atše merecido taitatobuajoñe ni mo jotsejbiyama chabe she-cohëtjonëshentša corriëja jajafjonama ca.’

<sup>26</sup> “Chcase morna, Abrahámbentsana entsanga y ndoñe judiënga Bëngbe Bëtsá adórayënga; bëngbiama entsemna quem buayenana soye, chë Bëngbe Bëtsá entsanga jätsebacana.

<sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusale-nentša oyenënga y chentša mándayënga ndoñe quenjátanësertana nda Jesús bëtsemnana, y chë tmojtsalía soyëngama cach ndoñe. Y chca, chënga Jesús

chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.

<sup>28</sup> Y masque ndocna bacna soye tmonjáninÿena Jesús jóbanama chabotsemnama, Pilato tmojanimpadá chaomandá chábioye jóbama.

<sup>29</sup> Chentšana, lempe ntšamo Bëngbe Bëtsabe uabemana palabrenguiñe iuayancá Jesúseftaca tojanochnëngo ora, chabe ústonënga chë cruzocana tmojtanéštjango y tmojanatbontsá.

<sup>30</sup> Pero Bëngbe Bëtsá tojanma Jesús cháuatayenama.

<sup>31</sup> Chë Galileocana Jerusalenoye cháftaca tmojánanga, baytentscuana Jesús yojánebuacana; y morna, lempe ntšamo Jesusbiana tmojaninÿcá, chënga entšángbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá,

<sup>33</sup> cha tonjama, bënga chë chëngbe entšanguentšëngbiama, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrenguiñe, segundo salmentše mëntšá tojanábema, ntšamo Bëngbe Bëtsá Jesúsbioye tbojaniyanama:

Aca atšbe uaquiñá condmëna.

Mënté entšanga sënjinÿanyé aca atšbe Uaquiñá comnama ca.

<sup>34</sup> Y tempo Bëngbe Bëtsá chabe uabemana palabrenguiñe tojaninÿanyé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá,

tšëngaftanga cbochanjátšataye ca.

<sup>35</sup> Inÿoca Bëngbe Bëtsabe uabemana palabrenguiñe, Salmos librëša uabi-amnayá, mëntšá tojanábema ntšamo Jesús Bëngbe Bëtsábioye tbojaniyanama:

Aca ndoñe quecochatsleséncia atšbe cuerpo,

chë acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenëngbiama tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentše, y chabe cuerpo tojanopochocá.

<sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entšanga chëngbe bacna soyëngama perdonánënga montsemna. Jesúsbeyeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyiñe iuayancá tmojanmama, chënga ndoñe tmonjanobená chca perdonánënga jtsemnama; nÿe Jesúsbeñe jtsošbuáchiyëse chënga perdonánënga jtsemnana.

<sup>40</sup> Cuedado šmochtsebomna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama.

<sup>41</sup> Bëngbe Bëtsá mëntšá tojánayana:

Smochjouena. Tšëngaftanga chë ntšamo atše tijayancá šmojtsábotenga, ojnánënga šmochántsemna y smochanjóbana.

Tšëngaftanga cabá vida šmobomnëntscuana, atše bëts soyënga chanjëftsema, y masque ndánaca chë soyëngama chacmojtsacúnta,

tšëngaftanga chiñe ndoñe quešmochatošbuáchiye ca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbioye tmojanaimpadá, chë inye ochnaytescama chë soyëngama más jábuayenama.

<sup>43</sup> Chentse chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanëseto. Y chatna chënga tmojanabuayená nyets tempo chamotsejuabnama, Bëngbe Bëtsá chëngbiana tšabe soyënga yojsamama.

<sup>44</sup> Chë inye semana, chë ochnaytena, nya mo nyetsca chë pueblentse oyenënga tmojanobeconá Bëngbe Bëtsabe palabra jouenama.

<sup>45</sup> Pero ba entšanga choye jouenama tmojánama chë judiënga tmojáninye ora, tmojanotjayaná, ba entšanga Pablo imojtseyeunanama; as chënga tmojanontsé mocá ichámuana ndayá cha yojsóyeuambnama, y chábioye oyenguayana.

<sup>46</sup> As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmommënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nyetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyeuambayama.

<sup>47</sup> Er Bëngbe Bëtsá chama šjanichamó, mëntšá jauyanëse: Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiana cochántsemna mo canye binynayacá.

Chca, ácbeyeca nyets luarënguenache entšanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyejuaye y tmojanontsé mëntšá ichámuana: “Bëngbe Utabnabe palabra tšabá bëngbiana entsemna ca.” Y chora, chë nyetsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontsé Jesúsbeñe jtsošbuáchiyana.

<sup>49</sup> Y chca, nyets chë luariñe más entšanga Bëngbe Bëtsabe palabra imojtsuenana.

<sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama.

<sup>51</sup> As, Pablo y Bernabé tbojésanshecstëtonata, judiënga jinyanÿiyama chënga ndoñe tšabá tmojanmama; y chentšana, Iconio puebloye tbojtsanoñe.

<sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uamana Espiritu chëngbe ainaniñe corente yojsamádaye.

## 14

### *Pablo y Bernabé Iconio puebloca*

<sup>1</sup> Iconioca, Pablo y Bernabé cánÿiñe tbojánamashëngo chë judiëngbe enefjuana yebnentse y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché.

<sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñjaná, Pablo y Bernabebiana podesca chamotsejuabnama.

<sup>3</sup> Chíyeca, Pablo y Bernabé bayté chentse tbojanototoná y ndauatjca Bëngbe Utabná Jesucristbiana tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bétsemnama, chë Bëngbe Bëtsá nyetscanga iuababuánÿeshanana.

<sup>4</sup> Pero nyetsca chë pueblentsa entsanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca.

<sup>5</sup> As, chë judiënga y ndoñe judiënga chentsa mandayëngaftaca tmojanenoyeuná chata jtsatsetšenama y ndëtsbéngaca jtsëbáyama.

<sup>6</sup> Pero Pablo y Bernabé chama tbojántatsëmbona orna, tbojtsanëchañe Listra y Derbe puebløye, Licaonia luaroca, y choca chábuañe luarëngoye;

<sup>7</sup> y chë luarënguenáchnaca, chata Jesucristbe tsabe noticiënga entsanga tmojanabuayená.

*Listra puebloca, ndëtsbéngaca Pablo tmojtsanatëchënganja jtsóbama*

<sup>8</sup> Listra puebloca inamna canÿe boyabása jama ndobená. Ndocna te yondobena jana, chca cosheto inónÿna causa. Chë boyabásana yojtsetbemana

<sup>9</sup> ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatsëmbona chë šocá tša yojtsošbuáchema, shnaná jtsatsmënama;

<sup>10</sup> as Pablo, juayebuáchenëse tbojanianyana: “¡Motsbaná y acbe shecuatsëngaca tsabá motsa ca!”

Chora chë boyabása, canÿe jontsënjëse tojantsá y yojóntša anana.

<sup>11</sup> As chë entsanga, ndayá Pablo tojanmccá tmojáninÿe ora, tmojanontšë uayebuáchana chë Licaonia luarentša biyañe, mëntsá: “¡Bëngbe diosënga bëngbioye tbojátma mo entsatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inÿe diosëngbiana oyebuambnayacá. Páblëbioye chca imojtsábobuatma, er cha más yotsoyeuambná.

<sup>13</sup> Zeusbiana chentsa bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entsanga imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

<sup>14</sup> Bernabé y Pablo chama tbojántatsëmbona ora, entsayá tbojtsanenántšajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsannotjajo entsangbe tsëntsajana y mëntsá ibojtsaychembumbuana:

<sup>15</sup> “Baconga y batanga, ¿ndáyeca chca šmojtsama ca? Bëndata cach tsëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tsabe noticiënga, tsëngaftanga chë quem ndoserverna soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinÿncá.

<sup>16</sup> Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tsabá cachëngbiana yojtsémnayeca,

<sup>17</sup> Bëngbe Bëtsá ndocna te ntjájbanana tsëngaftanga jtsinÿanÿayana, cachá tojama tsabe soyëngaca, mocna Bëtsá cha yomnana. Cha endama tsëngaftangbiana chauaftema y chë matënga botamana chaoshájonama, y becá saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

<sup>18</sup> Masque chë soyënga tbojánayana, nÿe batšatema más bën y ya ndoñe matbënjnobenata chë entsanga jtsëuyanana uacnënga jashebuáyama, chca, chátbioye jadórama.

<sup>19</sup> Chca ora, básefta judiënga tmojánashjajna Pisidioca, Antioquócana y Iconiocana, y chentsa entsángbioye tmojanayëñjaná, Jesucristbe ichmonatbe



contra chamotsemnama. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca.

<sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

<sup>21</sup> Derbe puebloca Jesucristbe tšabe noticiënga entšanga tmojanabuayená, y chca, entšanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiye.

<sup>22</sup> Chë luarënguenache chata ibojánana chë Jesucristbe ustonëngbioye atañémuaye, cada te chábeñe más chamotsošbuáchema. Y entšángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtská jëftsepacécánana ca.”

<sup>23</sup> Nyetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentsana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšinë chamotsemnama, ndábeñe chënga imojtsošbuaché.

### *Pablo y Bernabé, Siroca Antioquía puebloye tbojtánata*

<sup>24</sup> Pisidia luarëjana tbojánachnëngo ora, Panfilia luaroye tbojánashjango.

<sup>25</sup> Perge pueblentše Jesucristbe tšabe noticiënga entšángbioye tmojanabuayená, y chentšana Atalia puebloye tbojánata.

<sup>26</sup> Chentšana, Bernabé y Pablo, bejaycá tbojtánata Siroca Antioquía puebloye. Chentša entšanga Bëngbe Bëtsá tmojanimpadá chata chabe cucuatšinë chabotsemnama, chë trabajuiñe chaotsanyënama; y chorna, chë trabajo ya tbojanpochocá.

<sup>27</sup> Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanyé, chë ndoñe judiëngnaca chamotsobenama Jesucristbeñe jtsošbuáchiyama.

<sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

## 15

### *Ichmónënga y bëtsëjemëngcá mándayënga Jerusalenoca tmojánenefjna jencuéntama*

<sup>1</sup> Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntsá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátopodena tšëngaftanga atsebácanënga jtsemnama ca.”

<sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y inyënga Jerusalenoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtsanajbanama y chora Bëngbe



Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínÿënga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá.

<sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntsá tmojánayana: “Chë ndoñe judiënga entsamna chë más delicadentse base bobachtema tëtšenënga jtsemnana, bënga judiëngcá; y tsëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbe ichmónënga y bëtsëjemëngcá mándayënga tmojánenefjna jencuëntama, chë ndoñe judiënga aíñe o ndoñe yonjánamnama chë más delicadentse base bobachtema tëtšenënga jtsemnana, ntšamo chë judiënga imojanamancá.

<sup>7</sup> Bën y bëtscá chënga tmojanencuentá chentšana, Pedro tojantsbaná y mëntsá tojanëyana: “Jesucristbeyeca catsátanga, tsëngaftanga šmondëtatšëmbo, ya bayté entsemna Bëngbe Bëtsá tsëngaftangbentšana atše šonjanábuayana, Jesucristbe tsabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema.

<sup>8</sup> Bëngbe Bëtsá jtsetatsëmbuana lempe ntšamo entsanga tmojtsejuabnacá. Y cha šonjaninÿanyé, chë ndoñe judiëngnaca inmobena chabe entsanga jtsemnana, chábeñe tmojtsošbuáchese, chë Uámana Espiritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá.

<sup>9</sup> Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tsabe juabna chamotsebonnama, Bëngbe Bëtsabe palabriñe jtsošbuáchiyëse.

<sup>10</sup> Y mora, ¿ndáyeca tsëngaftanga ndoñe šmontseboše ntšamo Bëngbe Bëtsá tojamcá? Pero tsëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsoobenana jocúmpliana.

<sup>11</sup> Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tsabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

<sup>12</sup> Chorna, chentse imojtsemna entsanga nÿetscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entsanga jinÿanÿiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

<sup>13</sup> Chë útata jóyebuambayama tbojanpochocá ora, Santiago mëntsá tojánayana: “Jesucristbeyeca catsátanga, šmochjouena:

<sup>14</sup> Simón šonjabuayená ntšamo Bëngbe Bëtsá natsana tojaninÿanyé, chë ndoñe judiëngnaca cha iuanÿenama, y chíyeca cha chënguentsana banga tojubuáyana chabe entsanga chamotsemnana.

<sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyeambuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntsá:

<sup>16</sup> Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canye uáshajayena yebna tojětsjebcá, atše, Davidbe pamíllanga cachiñe uámaněnga chantabiamana;

<sup>17</sup> chca, chě inye entsanga chamonguango ndayá jamana atše, tsěngaftangbe Utabná, más chašmotsábuatmama, njętsca ndoñe judiěnga, chě atšbe entsanga chamotsemnana atše tijábacacanga.

<sup>18</sup> Chca atše, tsěngaftangbe Utabná sěntsichamo, nda ya bayté entsemna tonjanma entsanga chě soyěnga chamotsetatšěmbuama ca –chiñe endayana.”

<sup>19</sup> Chentsana Santiago měntsá tojaněyana: “Chíyeca atše sěntsejuabná, běnga ndoñe šontsamna chě ndoñe judiěngbiana jamana más totcá chaotsemnana Jesucristo jtsěstonama.

<sup>20</sup> Chamna, šontsamna chěnga juabuábiamana y jáuyanana ndoñe chamondětsesá, sananga chě ndaye soyěnga entsanga tmojuabná diosěnga yomna ca jadórama tmojuiyěbana; bacna soyěnga shembásenga o boyabásengaftaca ndoñe chamondětsama y ndoñe chamondětsesá tšesana bayěngbe měntsena, y buiñe cach ndoñe ca.

<sup>21</sup> Er chě natsana tempěnga orscana, njętsca pueblěnguenache mondměna chě Moisés tojěftsanayana soyěnga entsángbioye abuyayınayěnga; y chabe leyěnga, njętsca ochnayté mondbetsalıaye chě běnga judiěngbe enefjuana yebněnguenache ca” –cha tojaněyana

*Chě Jerusalenoca ichmóněnga y bětsějeměngcá mándayěnga canye tsbuanácha tmojanichmó chě ndoñe judiěngbiana*

<sup>22</sup> Chentsana, chě Jesucristbe ichmóněnga y bětsějeměngcá mándayěnga, njętsca chě Jesucristbeñe ošbuáchiyěngaftaca tmojanenoyeuná chěnguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojaněbuáyana Judas, chě Barsabás ca uabobuatmá, y Silas; chata ibnamna uámanata chě Jesucristbeñe ošbuáchiyěnguentše.

<sup>23</sup> Y chěngaftaca canye tsbuanácha tmojanichmó, y chiñe měntsá yojětsayana:

Běnga chě Jesucristbe ichmóněnga y chě bětsějeměngcá mándayěnga, cach tsěngaftangcá Jesucristbeñe ošbuáchiyěnga, fsěntseboše Běngbe Bětsá salúdoca chacmotsábouamna, tsěngaftanga chě ndoñe judiěnga, Jesucristbeñe ošbuáchiyěnga, Antioquía puebloca y Siria y Cilicia luarěngoca oyeněnga.

<sup>24</sup> Běnga fsěntsetatšěmbo běngbentsana báseftanga choye tmojángama, běnga ntjaměndacá, y fsěntsetatšěmbo mocna soyěnga cmojtsabuátambama y chě causa, tsěngaftanga ndoñe šmontsetatšěmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnana.

<sup>25</sup> Chcasna, běnga fsěnjenoeyuná y šonjúnynana tšabá yojtsemna báseftanga běnguentšana jabacacayana tsěngaftangbioye jontješiyama chamotsama, y Pablo y Bernabé, chě Jesucristbeyeca běngbe bonshana catsátataftaca, choye chamotsama.

<sup>26</sup> Chě útatna ba soye tbojotsbocá vida jáshbiana, Běngbe Utabná Jesucristbiana oservěniñe.

<sup>27</sup> Chátaftaca Judas y Silas fsěnjichamó; y chatna cach tsěngaftangaftaca bochanjójeyebuambaye ntšamo quem tsbuanáchañe yojtsábemanama.

<sup>28</sup> Chě Uámana Espíritu y běnga cachcá fsěntsejuabná, běnga ndoñe šontsamna tsěngaftanga jaměndana bětscá jabuache manděnga Moisesbe leyěnguiñe chašmotsocumplínama. Nye quem uámana soyěnga chiñe aíñe cmontsamna jtsobedecánana:

<sup>29</sup> Ndoñe šmattsesaye mēntšena, chē ndaye soyēnga entšanga tmojuabná diosēnga yomna ca jadórana tmojóba bayēngbiana; ndoñe šmatjofsiye buiñe, ni šmatjase tsešana bayēngbe mēntšena; y shembásenga y boyabásengaftaca bacna soyēnga ndoñe šmattsama. Chē soyēnga ntšamcá, tšabá šmochanjama.

Bēngbe Bētsá salúdoca chacmotsábouamna ca –chiñe yojétsayana.

<sup>30</sup> Chcasna, chē quem Jerusalenocana ichmónēnga tmojésanodiošoftanentšana, Antioquía pueblöye tmojána; y chocna, nyetsca chē Jesucristbeñe ošbuachiyēngbioye tmojanébuaja y chē tsbuanácha tmojanayentšbuaché

<sup>31</sup> Chē Antioquía pueblentša Jesucristbeñe ošbuáchiyēnga ntšamo chē tsbuanáchañe yojtsabemancá tmojanalía ora, bēts añemo tmojtanca y corente imojtsóyejuaye.

<sup>32</sup> Judas y Silas Bēngbe Bētsabe juabna oyebuambnayata ibnamna; as, chátñaca chē chentša Jesucristbeñe ošbuachiyēngbioye ba soyēnga tmojanéyana, chēnga añemo chamotsatsbomnama y Jesucristbeñe corente chamotsošbuáchema.

<sup>33</sup> Chentšana baseftaytese, chentša Jesucristbeñe ošbuáchiyēnga chēngbioye tmojtanadiošoftá, chē ndēmuanýenga tmojanichamóngbioye jtama.

<sup>34</sup> Pero Sílasna tšabá ibojtsinýana cachentše más jéftsajétanama.

<sup>35</sup> Pablo y Bernabé baseftayshinýe Antioquía pueblentše tbojanototoná y ba ínýengaftaca Bēngbe Utabná Jesucristbe tšabe noticiēnga entšanga tmojanabuatambá y tmojanabuayená.

*Pablo cachiñe inýe luarēngoye tojána, Bēngbe Bētsabe trabajo jamama*

<sup>36</sup> Chentšana baseftaytese, Pablo Bernabébioye tbojanianana: “Bēngbe Utabnabe palabra tbojanabuayená luarēngoye bochjésa, choca Jesucristbeñe ošbuáchiyēnga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chē Marcos ca uabobuatmábioye chátaftaca jéftsbetšama.

<sup>38</sup> Pero Páblēna ndoñe tšabá ibontsinýana cha jéftsbetšana, er Juan chátbentšana tojtsanojuánañe Panfilia luarocana, y ndoñe tonjanatjēmbambá, Bēngbe Bētsabe trabajo japochócantscuana.

<sup>39</sup> Y chē palabrama tondaye tbojanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata;

<sup>40</sup> y Páblēna, Silas tbojanábuayana jéftsbetšama. Chē Antioquía pueblentša Jesucristbeñe ošbuáchiyēnga Bēngbe Bētsá tmojanimpadá Pablo y Silas Bēngbe Utabnabe cucuatšñe chabotsemnama, chatbe trabajuiñe chaotsanýenama. Chentšana, Pablo Sílasftaca tbojánbocna y

<sup>41</sup> Siria, Cilicia luarēnguējana tojánachnēngo entšanga añemo atšatnaye, chē luarenache enefjuana ošbuáchiyēnga Jesucristbeñe más chamotsošbuáchema.

## 16

*Pablo Timotéobioye tbojáninýena*

<sup>1</sup> Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entšá inamna.

<sup>2</sup> Chē Listra y Iconioca Jesucristbeñe ošbuáchiyēnga Timoteobiana tšabá imojanoyebuambná.

<sup>3</sup> Pablo tojánbošena Timoteo jéftsbetšama; pero cabá ndetsbetše orna, Pablo base bobachtema chē más delicadentše tbojantētše, ntšamo judiēnga

imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnana.

<sup>4</sup> Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye abuyaynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá.

<sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

#### *Pablo mo otjenayoquëcá canyë Macedonioca entšábioye tbojáninjë*

<sup>6</sup> Chë Uámana Espíritu, Pablo y Sílasbioye tojaninýanýé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana.

<sup>7</sup> Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama.

<sup>8</sup> Misia luarëjana tmojánachnëngo ora, Troas luaroye chënga tmojána.

<sup>9</sup> Chë te ibeta, Pablo mo otjenayoquëcá tojáninjë canyë Macedonioca boyabása ibojtsebiatsana y mëntšá ibojtseimpadana: “Diosmanda Macedonioye mabo y šmabëjabuache ca.”

<sup>10</sup> Pablo chca tojáninjë y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjétsatjëmbamnaye. Bënga fsënjétsajuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

#### *Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye,

<sup>12</sup> y chentšana Filíposoye. Filipos enjamna canyë uámana bëts pueblo Macedonioca y bëtscá romanënga oyeniñe. Chë luarentše baseftayté fsënjanuquedanga.

<sup>13</sup> Canyë ochnaytena, chë pueblentšana fsënjéftsanbocna y chë fshájaye tsa-choye fsënjána. Fsënjanuena chentše canjamna canyë luare Bëngbe Bëtsáftaca jencuéntama ca, y fsënjána janguanguama. Fsënjáninýena ora, chentše fsënjanotbiana y Bëngbe Bëtsabe palabra fsënjanoyebuambá chentše tmojanójoto shembásengbiana.

<sup>14</sup> Enjamna canyë shembása, Lidia ca uabainá, Tiatira pueblócá, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema.

<sup>15</sup> Cha y chabe yebnentše oyenënga tmonjánenabayé ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtarié bënga chentše joquédama.

<sup>16</sup> Canyë te, chë Bëngbe Bëtsáftaca encuéntaye luaroye fsënjétsajna orna, šonjanébiatše canyë tobiaše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiaše yojanmalísiaye soyëngama.

<sup>17</sup> Chë tobiaše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe



Bëtsabe oservénënga y tšëngaftanga cmontsabuaiyná ntšamo Bëngbe Bëtsá yobena tšëngaftanga játsebacama ca!”

18 Y baytë chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjanijana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

19 Pero, chë bayëjbe juabna chábentšana tojésanbocnama y chëngbiana más crocénana jabemama chora chë tobiaše ndoñe yontsobenama, chë tobiaše nduiñënga tmojáninÿe ora, Pablo y Sílasbioye tmojánishëche y tmojtsanasjojye plazoye, mandayëngbioye.

20 Chë mandayëngbioye tmojanënatse ora, chënga mëntšá imojtsichamo: “Quem boyabásata judío entšata bondmëna, y muatbe causa bëngbe pueblentša entšanga montsenbouenana,

21 y bontsabuatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” –chënga imojtsichamo.

22 Chora chë entšanga tmojanontšë uayebuáchana; as, chë mándayënga tmojanamëndá chata entšayá jtsëtsejquëcana y niñëfjëngaca jtsachebuánganjana.

23 Jabuache tmojanachebuánganjentšana, cárceloye tmojanautame y chë utámenënga shanÿá tmojanmandá yejuana chaotsabuajënyama.

24 Chca tmojanmandá ora, chë utamianá chata tojanënatse chë más tsoye utámenoye y shecuatšentšana tsbuanëšiñe tojanatsebuá.

25 Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inÿe utámenëngna chca imojtsuenana.

26 Ndeolpe, corente jabuache yojtsëbánjua y chë utámena yebna fshantso-cana yojtsábonjnaye. Cachora, nÿetsca chë utámenentša bëšašangá tojantëfjo y nÿetsca utámenënga chë cadenëjuangá yojtsayentšjafjona.

27 Pero chë utámenënga shanÿá tojanofšená y chë utámenentša bëšašangá yojtsatëfjnama tojáninÿe ora, cha tojanjuabó nÿetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

28 Pero Pablo tbojánbochembo: —¡Acbe cuerpo ndocá matenábomana; nÿetscanga camuentšë fsëndëtsomñe ca!

29 Asna, chë utámenentša shanÿá canÿe uajuinÿanësha tojanëyá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatšentšë yojoshëntsamentšiyë.

30 Chentšana tojtänëbuacna y tojanëyana: —Señórata, ¿ndayá šojtsemna jamama atšë atsbocaná jtsemnama ca?

31 Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentšë oyenëngnaca ca.

32 Y cha y nÿetscanga chë yebnentšë imojtsemnënga, Bëngbe Utabnabe palabra tmojanabuayená.

33 Cach ora chë ibeta, chë utamianá chata tojanënatse chë lisianënguiñe jetsajabiana. Chentšana, cha y chabe pamíllanga tmojánenabayë.

34 Chentšana, chë utamianá chata tojanënatse chabe yebnoye y saná tojanacaredadó. Cha y nÿetscanga chë yebnentšë oyenënga oyejuayënga imojtsemna, Bëngbe Bëtsábeñe imojtsošbuáchema.

35 Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama.



<sup>36</sup> Chë utamianá Páblëbioye tbojanianya: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

<sup>37</sup> Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

<sup>38</sup> Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja.

<sup>39</sup> Chcasna, cach mándayënga tmojána chata perdón jatëtejañama; chentšana tmojtanëbuacna y tmojanëyana: “Diosmanda, muentšana inýe luaroye motsoñata ca.”

<sup>40</sup> As chata chë utámenentsana tbojëftsanbocna y Lídiëbe yebnoye tbojëftsanata. Chentšna, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

## 17

### *Tesalónica puebloca, Pablo y Silasbioye ndoñe tšabá tmonjanëbuaja*

<sup>1</sup> Pablo y Silas inýe luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna innabomna chënga jénefnama.

<sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguñe iuayana soyëngaca,

<sup>3</sup> chënga yojanabuayiyá y ndegombre yojaninýanýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntsá yojanëtsëtsná: “Chë Cristo, Jesús endmëna, ndabiamana atše cbontsabuyayiná ca.”

<sup>4</sup> Judiënguentsana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca.

<sup>5</sup> Pero chë judiënga ndošbuáchiyënga chca tmojáninýe ora, puerte envidia imojtsebomna. Asna, chënga tmojánachembo banga, tondaye amënga y bacna entsanga, y chënga tmojanenutaná jamama nýetsca chë pueblentsa entsanga chamotsenbouénanama; y canýe entsá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entsangbe cucuatšifne jabáshejuanama.

<sup>6</sup> Pero chentše ndocná tmonjáninýena; as chë entsanga Jasón imojtsesjoye y chentša mándayënga imojëtsemnoye tmojanánatse y Jesucristbeñe inýe ošbuachiyëngnaca choye tmojanënatse, y mëntsá imojtsáyebuache: “¡Chë boyabásata, chë ndëmuanýata ibojtsama nýetsca luarentša entsanga chamuenbouénanama, quem luaróynaca tbojabo,

<sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguñe ndoñe quenatslesenciancá, er

chënga montsichamo inÿe rey canmëna, Jesús ca, y cha, César chë Romoca mandadbe cuenta nyetscángbeñe yojtsemánda ca!” —chënga imojtsáyebuache.

<sup>8</sup> Chë entsanga y chë pueblentsa mándayënga chca tmojanuena ora, corente imojenbouénana.

<sup>9</sup> Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtanabáshejuana.

### *Pablo y Silas Berea Puebloa*

<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata.

<sup>11</sup> Chentsa judiënga imojamna más tsabe ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aíñe o ndoñe ndegombre yojtsemnana.

<sup>12</sup> Y chca, ba chentsa judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

<sup>13</sup> Pero, Pablo Bereoca chë Bëngbe Bëtsabe buayenana soyama entsanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentsa entsanga chamuenbouénanama.

<sup>14</sup> Chcasna, banga Jesucristbeñe ošbuáchiyënga tmojanma cachora Pablo chentsana chauétsebocnama y bėjaye tsachoye chaotsoñama; chëntscuana, Silas y Timoteo Bereoca tbojanoquedá.

<sup>15</sup> Pablo tmojantjëmbambá entsangna, Atenas ca uabaina bëts pueblóntsoñe cháftaca tmojána. Chentsana, Pablo chënga tojanabuayená chamuauisshëconama Silas y Timoteo jaúnayama betscó jtsayana, Pábloftaca jateninÿenama.

### *Pablo Atenas puebloa*

<sup>16</sup> Pablo Atenas bëts puebloa Silas y Timoteo yojtsëbatmanëntscuana, puerte tbojanongmé, er cha tojáninÿe chentsa entsanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca.

<sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsësnaye, y cada te chentsa plazoca chë ndëmuanÿënga chentše imojanashjajuanëngaftácnaca.

<sup>18</sup> Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsësnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiama muentše entsabóyebuambnaye ca.”

Chënga chca imojtsichamo, er Páblëna Jesusbiama y chë obanënga jtayenama yojanoyebuambná.

<sup>19</sup> Asna, chentsa entsanga cha tmojanánatse canÿe luaroye, entsanga jénefnama y oyeambuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiama jayanama tsabá o ndoñe tsabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatšëmbuama ca?

<sup>20</sup> Aca tsëm soyënga šcontsëtsësná y bënga fsëntseboše jtsetatšëmbuana ndayá chë soyënga bétsayanana.

21 Er n̄yetscanga Atenasentša oyenēnga y in̄ye luarēngocana áshjajnēngna, corente yojanogúsetana chē tojtsopasana tsēm soyēngama jtsuenanana y jtsencuéntayana.

22 As Pablo tojantsá chēngbe tsēntsaca chē Areópago ca uabáinentše y tojánayana: —Atenasentša entsānga: ntšamo bominyē sēnjajajcá, atše sēntsetatšēmbo tšēngaftanga ba diosēnga puerte šmayaunana y šmadoránama.

23 Atše sēndánrreparana tšēngaftangbe diosēnga šmétsadorana luarēnguenache y sēnjín̄yena can̄ye altar y chentše mēntšá iuábemana: “Chē Bētsá nduabu-atmabiama ca”. Y morna, chē Bētsá chē nda ntsabuatmcá šmadoránabiama, atše cbontsabuayin̄á.

24 “Chē Bētsá quem luare y lempe ntšamo chentše yomncá tojanma; cha endmēna quem luarentše y celoca Utabná, y cha ndoñe quenatiyena cha jadórama entsāngbe jebna yebnēnguiñe,

25 ni quebnatájaboto ndocná chabiama tondaye chaondētsama, er cha endmēna nda inētsama bēnga vida chamotsebomnama y jtseshachnayama chamotsobenama, y cha n̄yetsca soyēnga šnetsatšatnaye.

26 “Cha n̄ye can̄ye boyabásabentšana n̄yets luarēnguentša entsānga tojánabiama, n̄yets quem luarentše chamotsiyenama; y cha quem soyēnga cabá ndēma ora, tojanjuabó mocna ora y ndayentše entsānga chamuetsiyenama;

27 chca, Bēngbe Bētsá chamonguanguama, masque chabiama ndoñe corente tmontsetátšēmbo, y chamuin̄yena y chábeñe chamotsošbuáchema; pero ndegombre, Bēngbe Bētsá bēngbentše cada cán̄yabentšana ndoñe bēnoqa quenátsmēna.

28 Ntšamo can̄ya tojanayancá: ‘Bēnga Bēngbe Bētsáftaca cán̄yiñe mo can̄yacá mondmēna; chábeyeca bēnga vida mondbomna, jobónjuama mondbena y ainēnga mondmēna ca’. Ntšamo tšēngaftanguentša báseftanga bēts soyēngama uabiamnayēngnaca tmojanayancá: ‘Bēnga n̄yetscanga Bēngbe Bētsabe básenga mondmēna ca’.

29 Y chcasna, Bēngbe Bētsabe pamíllanga bēnga tmomnēse, ndoñe quešnátamna jtsejuabnayana Bēngbe Bētsá yomna mo cach entsāngbe castellano, midio o chē ndētsbeca pormana soyēngcá ca, er chē soyēngna n̄ye ntšamo entsānga tmojajuabocá y tmojtsobencá japórmana.

30 Pero Bēngbe Bētsá tojanjuabó ndoñe ntjaton̄yayana chē entsāngbe temp-sca ndosertánana, y morna, n̄yetsca luarēnguentša entsānga entsamēnda, ndaye bacna soyēnga tmojtsamama ngmēnaca chamuenojuabó, chca amama chamotsajbaná y Bēngbe Bētsabe benache chamuatishache ca.

31 Bēngbe Bētsá can̄ye te tojuin̄yaná, y chē tena, ndocnábioye ín̄yabiama más tšabá ntjaton̄yaycá, cha echanjayana entsānga tšabá o ndoñe tšabá tmonjamama; lempe chca cha echanjama can̄ya cachá tbojabocacá entsáftaca, Jesús; y chca yochtsemnamna, Bēngbe Bētsá entsānga tojin̄yan̄yé, chē bocacaná Jesús cháuatayenama cachá tojánmayeca ca” —Pablo tojánayana.

32 Chē obanēnga mochtayenama ichámuana chē entsānga tmojanuena ora, báseftanga Pablo imojtsáboyejuana, y ín̄yengna mēntšá imojtsichamo: —Bēnga fsēntseboše chē contsichamo soyēnga más chcoye cachiñe jatuenama ca.

33 As Pablo chēngbentšana tojésanbocna.

34 Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chēnguentše imojamna Dionisio, can̄ya chē Areopagoca tbiamanēnguentšá; can̄ye shembásanaca, Dámaris ca uabaina, y ín̄yenga.

## 18

### *Pablo Corinto puebloca*

<sup>1</sup> Chë soyënga tojanochnëngüentsana, Pablo Aténasentsana Corinto bëts puebloye tojána.

<sup>2</sup> Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama,

<sup>3</sup> y ntšamo chata jamama Páblënaca jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entsšëjuaca japórmana.

<sup>4</sup> Y nÿetsca ochnayté, Pablo yojanamana chentša judío entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentsena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnana.

<sup>5</sup> Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtsabuayiynaye y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnana.

<sup>6</sup> Pero chë judiënga Páblëbe contra imojtsemna y tmojanontšé podesca chabiamá ichámuana. Asna, Pablo chabe uichëtjoniyangá yojtsenántšasajaye, chënga jinÿanÿiyama chënga ndoñe tšabá tmonjánchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentšana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena.

<sup>8</sup> Y Crispo, canÿe chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye.

<sup>9</sup> Canÿe ibeta, Bëngbe Bëtsá Páblëbioye mo canÿe otjenayoquëcá tbojaniyana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana.

<sup>10</sup> Er atšë ácaftaca sëntsemna y ndocná quecmochátsbojajo ntšámnaca jáborlama; atšë bëtscá entsanga quem pueblentšë sëndábamna ca.”

<sup>11</sup> Chcasna, Pablo Corintentsë canÿe uata y chnënguana shinÿe tojanotoná, Bëngbe Bëtsabe palabra entsanga abuátambaye.

<sup>12</sup> Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse.

<sup>13</sup> Chocna, chë mandado tmojaniyana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

<sup>14</sup> Pablo jóyebuambayama uatajanóntša orna, Galión chë judiënga tojanéyana: —Quem entsá nderado inÿabioye matbënjóba o ndayánaca chca matënjobuachjanguá, as cocayé atšë matijótbema tšëngaftanga judiënga yejuana joyaunayama;

<sup>15</sup> pero ntšamo šmontsichamcá entsemna nÿe buatëmbana soyëngama, nÿe tšëngaftanga šmëbuatma entsangbiamá y cach tšëngaftangbe leyëngama;



chcasna, cach tsëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

<sup>16</sup> As Galión tojanamëndá chë tribunal luarentšana chë judiënga jtëbuacnama.

<sup>17</sup> Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquiye tojtaná y chentsana cachiñe inye luarëngoye tojána, Bëngbe Bëtsabe trabajo jamama*

<sup>18</sup> Pablo cabá bayté Corintentše tbojántotona. Chentsana, Jesucristbeñe ošbuachiyëngbentsana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nyets stjénashe yojtsenátstbotje, Bëngbe Bëtsábioye jinjinyiyama canye soye tbojanšbuáchenama.

<sup>19</sup> Efeso puebloye tmojánashjajna ora, Páblëna Priscila y Aquila tojesanabashejuana. Chentsana, cha tojána chë chentsa judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye.

<sup>20</sup> Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauná;

<sup>21</sup> chentsana, chëngbentsana tojesanodiošoftá, mëntsá jëftsëyanëse: “Nderádose cachiñe chantésabo tsëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna.

<sup>22</sup> Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentsana Antioquiye tojána.

<sup>23</sup> Chentše baseftayté yojëftsemna; y chentsana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiyiná*

<sup>24</sup> Cach tempo, Efesoye tojánashjango canye judío, Apolos ca uabainá, Alejandría bëts puebloca; cha puerta obená inamna jonguamiyama y corente inatátšëmbo Bëngbe Bëtsabe uabemana palabrëngama.

<sup>25</sup> Bëtscá tojánatsjinye chë Bëngbe Utabná tojaninjänýé benachama; añémoca yojanoyebuambná y Jesusbe soyëngama botamana yojanabu-atambá, masque cha nye ntšamo Juan entsanga tojánabuatambama y tojanëbáyama inatátšëmbo.

<sup>26</sup> Ndauatjca Apolos tojanontsé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe injinýena benache bëtsemnana.

<sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiama canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye.

<sup>28</sup> Entšangbe delante chë judiëngaftaca jabuachana imojánenatsëtsnaye y nyetscanga tojaninjänýé, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrëngaca chënga tojaninjänýé, Jesús Bëngbe Bëtsabe Uámana Uabuayaná bëtsemnana.



## 19

### *Pablo Efeso puebloca*

<sup>1</sup> Apolos Corintoca yojtsemnëntscuana, Páblena chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanÿena, pero chëngna nÿe ntšamo Juan chë Ubayaná tojanabuatambacá imnatátšëmbo.

<sup>2</sup> Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiana ora ca?

Chora chënga tmojanjuá: —Ni mo queftsátstatšëmbo chë Uámana Espíritu yomnama ca.

<sup>3</sup> Y Pablo tojanëyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

<sup>4</sup> As Pablo tojanëyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábentšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema.

<sup>6</sup> Pablo chëngbe bestšašañe chabe cucuatšënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontsé inÿetsá biyanganá, chënga tempo ndmabiyañe, y Bëngbe Bëtsabe juabna imojtsoyebuambná.

<sup>7</sup> Chentše imojtsemna bnëtsana uta entšanga.

<sup>8</sup> Unga shinÿëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entšángaftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema.

<sup>9</sup> Pero ba nduauenanënga ndoñe imontsošbuaché y Bëngbe Utabná tojaninÿanÿé Benachama entšángbeñe bacna soyënga imojtsichamo. Chcasna, Pablo chëngbentšana tojtsanojuánañe y nÿe chë Jesucristbeñe ošbuáchiyënga tojanëbuaja canÿe scueloye, canÿe entšá Tirano ca uabainabe yebnoye. Chentše cada te chë ouenanëngaftaca yojanoyebuambná,

<sup>10</sup> y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca.

<sup>11</sup> Y Bëngbe Bëtsá puerte bëts soyënga Pábloftaca yojtsama.

<sup>12</sup> Tša bëts soyënga tojanma; chíyeca, nÿetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšángbentšana jésebocanana.

<sup>13</sup> Pero básefta judiënga tsáshenañe bacna bayëjënga entšángbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntsá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

<sup>14</sup> Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá.

<sup>15</sup> Pero canÿe, Escévëbe uaquiñënga chca tmojánayana orna, chë bacna bayëja mëntsá tojanëjua: “Atše Jesús sënduábuatma y sëndëtatšëmbo nda Pablo yomnana; pero tšëngaftanga, ¿ndëmuanÿënga šmomna ca?”

16 As, cachora chë bacna bayëjbe juabna uambayá chëngbioye tojanontsënja y tša añemo bomná bétsemnayeca chënga tojtsanayëñjaná, jabuache jtsajantsetayëse; chë causa, chënga chë yebnentsana tmojtsanacheta enasënga y lisiánënga.

17 Nyetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entsänga más imojtsatschuanaye.

18 Jesucristbeñe imojtsošbuachiyënguentsana, banga imojánashjajuana y entsängbe delante imojtsecompšaye, tempo bacna soyënga tmojanmama;

19 banga, chë bocjuanana soyënga jamama imojanëntsënënga, chëngbe bocjuanana librësangá tmojaniyëbo y entsänga imojtsantješna ora, chësangá imojtsajuinÿiye. Tmojanjuabó ntsachetsá chë librësangá betsámanama y tojanóbocna shachna bnëtsana uaranga crocénana nÿetšá.

20 Y chca, Bëngbe Utabnabe palabra más ba entsänga imojtsuenana y chiñe imojtsošbuáchiye y Bëngbe Bëtsá chabe obenana entsängbeñe yojsinÿinÿnaye.

21 Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsana Romoye jama ca.

22 Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

### *Efesoca entsänga tmojänenbouenana*

23 Chë tempo, Efesoca entsänga corente tmojänenbouenana, chë Bëngbe Utabná yojsinÿanÿná Benache imojtsisháchichanëngbe causa.

24 Chë entsänga chca tmojanma, er canÿe entsá mídioca soyënga pormayá, Demetrio ca uabainá, chënga tojanayëñjaná chca jamama. Cha yojanamana binche soyetëmënga japórmana y chëtëmënga yojáninÿna mo chë Efeso puebloquëngbe diosá Artemisa jadórmana bëts yebncá. Demétrioftaca imojantrabájangna bëtscá crocénana imojanójacañe chë soyetëmënga eniñe.

25 Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntsá tojanëyana: “Baconga, tsëngaftanga šmondëtatšëmbo, bënga bëtscá crocénana jtsebonnamna quem trabajuentsana chca jopódiana.

26 Pero tsëngaftanga šmontsonÿá y šmontsuenana ntšamo chë Pablo ca uabainá yojsichamcá. Cha entsichamo, chë entsängbe pormana soyënga ndoñe yontsemna jtsadoránana ca; y chca ba entsänga tojabuayená y chënga aíñe montseyeunana. Chë soyna ndoñe nÿe muentše Efesentše chca quenátopasana; nÿets Asia luaríñnaca chca entsopasana.

27 Resjo entsemna; chca causa, entsänga bëngbe trabajuama ndoñe tšabá quemochátichamo y chë uámana Artemisa jadórmana bëts yebnama mochántichamo uámana yebna ndoñe yondmëna ca. Y chca, Artemisbe obenana entsänga mochantsábotena y Artemisa ndoñe bañe quemochátabatma, nda Asientše y nÿets luaríñnaca mondadorana ca.”

28 Chca tmojanuena ora, chca pórmayënga puerta tojánëtëna y tmojanáyebuachena: “¡Efesoquëngbe Artemisa corente bëtscá endmëna ca!”

29 Y chca, nÿetsca chë pueblentsa entsänga tmojänenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscoñe.

30 Pablo tojánbošena choye jamashënguama chë entsängaftaca jóyebuambayama, pero Jesucristbeñe ošbuáchiyënga ndoñe tmonjanlesenciá.

<sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entšanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsehbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama.

<sup>33</sup> Pero básefta judiënga, canÿe entšá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánefjatšëmbo cucuátšeca iytëca chamobiamama, er cha yojtseboše entsangbe delante chë judiënga jobuauyanama.

<sup>34</sup> Pero, Alejandro judío bemnama chë entsanga tmojántatšëmbona ora, nyetscanga tmojanáyebuachena uta horëntscuana, mëntšá: “¡Efesoquëngbe Artemisa corente bëtsá endmëna ca!”

<sup>35</sup> Chë pueblentša mándayëngbe uajabuachaná, entsanga iytëca jábiamama tojanobená ora, tojanëyana: “Efesoquënga, nyets luariñe endótatšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatšena ndëtšbé.

<sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá.

<sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiamama ndoñe podesca tmonjoyebuambá.

<sup>38</sup> Demetrio y cháftaca šmotrabájanga, nderado ndabiamama ndaye demanda šmojtsebomnësna, cabildoca endatëfná y chentše mándayënga montsemna chë demandënga jouenama, y chëngbentše cada ona šmochjëftsendemánda.

<sup>39</sup> Y tšëngaftanga inÿe soye šmojtseguasna, cmontsamna ntšamo bëngbe leyënguñe yomandancá, nyetsca quem pueblentše oyenëngaftaca jenóyeunayana.

<sup>40</sup> Ndayá mënté tojopasá causa, resjo entsemna bëngbiamama chamuayana, ntšamo leyënguñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanëyana.

<sup>41</sup> Y chca jayanëse, chë entsanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedonioye tojëftsanbocna.

<sup>2</sup> Chë luarënguëjana cha tojánachnëngo Jesucristbeñe ošbuáchiyënga becá añemo atatšatnaye, ba chabe palabrëngaca; chentšana, Grecia luaroye tojánashjango,

<sup>3</sup> y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatšëmbona chë judiënga cha jtsóbama tmojanenóyeunama. Asna, tojanenojuabó jesshëconama, cach Macedonia luarëjana jésachnënguse.

<sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata.

<sup>5</sup> Chënga tmonjanonatsé y šonjanëbatma Troasoca.

<sup>6</sup> Chë levadúracá ndëpormana tandëse saye fiestentsana, Filíposentsana barquëshañe fsënjëftsanbocna y shachna tianoye, Troasoca chë tmonjanonat-senga fsëntanishëche, y chentše canye semana fsënjanouedanga.

### *Ntšamo tojanopasá Troas puebloca*

<sup>7</sup> Chë inye semana jobojátsama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama; y Pablo entsanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana.

<sup>8</sup> Fsënjamna canye tsoye tsbanana tsañoca y chentše ba uajuinñanëshangá enjanamna;

<sup>9</sup> y canye bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná.

<sup>10</sup> As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entsanga tonjanéyana: “Ndoñe nyetšá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entsángaftaca tonjanse y tontëtanontsé oyeuambnayana, jabinñëntscuana. Chora Pablo chentšana tontsanofne.

<sup>12</sup> Y chë otsatsëna bobontsna ainá imojtsatánatseñe, y chama chë entsanga corente oyejuayënga imojtsemna.

### *Pablo Troasentsana Mileto puebløye tojána*

<sup>13</sup> Bëngna fsënjanonatsé y barquëshañe fsënjána Aso pueblóntscoñe, chentšana Pablo jtesbetsama, ntšamo fsënjanenoyeunacá, er Pablo tonjánbošena fshantscá choye jana.

<sup>14</sup> Asoca Pábloftaca fsëntaneninñena ora, bëngaftaca barquëshañe cha tonjána Mitilene puebløye.

<sup>15</sup> Chentšana fsënjëftsanbocna y yëfsana Quío luarëjana fsënjánachnëngo, y chë inye yëfsana Samos luaroye fsënjánashjajna. Chentšana fsënjána y yëfsana Mileto puebløye fsënjánashjajna.

<sup>16</sup> Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndëtsemnana. Chca tojánbošena er cha enjëtseboše betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

### *Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana*

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana.

<sup>18</sup> Chënga tmonjánashjajna ora, Pablo tonjanéyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana.

<sup>19</sup> Nyets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguiñe tijasufri, chë judiënga atše jóbama mondboše causa.

<sup>20</sup> Y lempe ntšamo tšëngaftangbe tšabiama yomncá tcbonjabuayená; ton-daye ntjatsbuetamencá. Nyetscangbe delante sënjabuatambá y tšëngaftangbe yebnënguenáchnaca.



21 Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamot-sajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema.

22 Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo.

23 Nýe mëntšá aíñe sëndétatšëmbo: Nýetsca bëts pueblënguenache ndayëjana atše chandbëtsana, Uámana Espíritu šondbétsebuayiynaye entšanga cašmochjutame y puerte chaisufrima camochjama ca.

24 Atšbe vida cach atšbiana ndoñe yapa quenatámana, chaitsaina o chayóbana. Pero atšbiana iuámanana endmëna ndayá atše jobenayana atšbe trabajo jëftsepochoçana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnama jábuayenama.

25 “Y mora atše ndegombre sëntsetatšëmbo, tšëngaftangbentsana, chë ndëmuanýengbentše Bëngbe Bëtsabe amëndayama sënjabuayená, ndocná atše más quešmochátinýe.

26 Chýeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiana,

27 er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebueta mencá.

28 Chcasna, cach tšëngaftangbiana šmochtsantješna y nýetscanga muentše Jesucristbeñe ošbuachiyëngbiámnaca. Chëngbeñe mo chëngbe abujënyangcá Uámana Espíritu tcmonjajayé, Bëngbe Bëtsabe entšanga chašmotsanýenama, chënga Bëngbe Bëtsá chábinga tojábiana, chabe Uaquiñabe buiñe juabuáshanëse y jóbanëse, mo bëtscá cuafjopagacá.

29 Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama.

30 Y tšëngaftangbentsánëna báseftanga mochanjábocana y entšángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínýengbentsana chamotsoluarema y nýe chë abuátambayëngbioye chamotsésetonama.

31 Chcasna, sempre šmochtsantješna; ndoñe chacmondébnëtjomba, atše unga uatëntscuana, bnëtë y ibeta, tšëngaftanga cada ona cbondétsabuayiynama y chama atše puerte tijasufrí.

32 “Y morna, Jesucristbeyeca catšátanga, Bëngbe Bëtsabe cucuatšinë cbétsabashejuana y ntšamo tšëngaftangbiana chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndëmuanýënga cha tojáchembo chabe entšanga chamotsemnana.

33 Atše ndocnabe crocénana, o castellano o entšayá atšbiana quetsátantšaboše;

34 más inýetšá, y tšëngaftanga lempe šmondétatšëmbo, atše cach atšbe cucuátseca tijëftsetrabajama, atšbiana y átšeftaca imojamnëngbiana opresido enjamna soyënga janguanguama.

35 Atše nýets tempo sëndinýanýná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesúsbe palabréngama sempre jtsejuabnayëse: ‘Canýe entšá más oyejuayá jtsemnana



ndayánaca ínÿabioye tbojtsatsetná ora, y ínÿabioye tbojtseyëngacá ora ndoñe nÿa nÿetsá ca' ” –Pablo tonjanoyebuambá.

<sup>36</sup> Pablo chë soyënga tonjánayanentsana, tonjanoshamentsé y nÿetscanga chentse monjëtsemnëngaftaca Bëngbe Bëtsá tmonjanótsëmbona.

<sup>37</sup> Nÿetscanga tmonjánenobošachna y Pablo tmontanotsejcuá y tmontanámocho.

<sup>38</sup> Y entšanga corente ngménaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquëshha enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

<sup>1</sup> Chë Jesucristbeñe ošbuáchiyënga fsënjëftsanabashejuana ora, barquëshhañe fsënjanenoyayé y ndericho Cos luaroye fsënjána; chë yëfsana Rodasoye y chentšana Pátara puebloye.

<sup>2</sup> Pátara pueblentse canÿe barquëshha fsënjáninÿena, Fenicioye enjétsaye; asna, chëshhañe fsënjanenoyayé y chentšana fsënjëftsanbocna.

<sup>3</sup> Fsëntsanachnëjuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentse chë barquëshentša uasmanëshangá jëftsáboshjonama yojámnayeca, chë puebloye bënga fsënjëftsanamashjna.

<sup>4</sup> Chentšana, Jesucristbeñe ošbuáchiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianyana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama.

<sup>5</sup> Chë canÿsëfta te tonjanochnëngo ora, chentšana fsënjëftsanbocna y nÿetscanga parejo chëngbe shémangaftaca y básangaftaca šonjanatjëmbambá chë pueblo chabóntscoñe; y chentse, chë chënÿañe fsënjanoshamentsé y Bëngbe Bëtsá fsënjanimpadá.

<sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

<sup>7</sup> Tirentšana fsënjëftsanbocna y Tolemaida puebloye fsënjánashjajna; y chentse tonjanopochocá bëngbiama bejaycá chë te ayana. Tolemaidentse Jesucristbeñe ošbuáchiyënga fsënjanacheuá y chëngaftaca canÿe te fsënjanoquedanga.

<sup>8</sup> Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiama tšabe noticiënga abuayinayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachanënguentšá, Jerusalenoca ubuáyanënga.

<sup>9</sup> Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga.

<sup>10</sup> Ya bayté chentse fsënjëtsemna orna, Judeocana tonjánashjango canÿa Bëngbe Bëtsabe juabna oyebuambnayá, Agabo ca uabainá.

<sup>11</sup> Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduíñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

<sup>12</sup> Chca fsënjanuena ora, bënga y chentša entšanga Pablo fsënjanimpadá Jerusalenoye ndoñe chaondëtsama.

<sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše sěntseprontana y ndoñe nýe chašmobatsęcama; Jerusalenoca jobanámnaca sěntseprontana, Běngbe Utabná Jesusbiamca ca —cha tonjánayana.

<sup>14</sup> Jáyěňjanama ndoñe chibiatanobená ora, ndoñe más chibiatanimpadá; nýe měntšá fsěňjanianyana: —Ntšamo Běngbe Utabná yojtsebošcá chaotsemna ca.

<sup>15</sup> Chě soyěnga tonjanochngěntšana, fsěňjanoprontá y Jerusalenoye fsěňjana.

<sup>16</sup> Cesareoca, básefta Jesucristbeñe ošbuáchiyěnga choye šonjanatjěmbambá y chocna, chěnga šonjaněnatse canýe Chipre luaroca entsabe yebnoye, Mnasón ca uabainá, ndábentše běnga joquédama. Mnasón tempscana inamna Jesucristbeñe ošbuachiyá.

### *Pablo tojána Santiago jauatsětsayama*

<sup>17</sup> Jerusalenoye fsěňjánashjajna orna, chentša Jesucristbeñe ošbuáchiyěnga oyejuayěnga šonjaněbuaja.

<sup>18</sup> Yěfsana, Pablo běngaftaca tonjána Santiago jábuachama, y chentše, nýetsca chě ošbuachiyěngbeñe bětsějeměngcá mandayěngnaca monjětsemna.

<sup>19</sup> Pablo tonjanacheuá y chentšana tonjanacuntá lempe ntšamo Běngbe Bětsá Páblěbe trabájoca chě ndoñe judiěngbeñe tojanmama.

<sup>20</sup> Chca tmonjanuena ora, Běngbe Bětsá tmontanchuá y Pablo měntšá tmonjanianyana: “Morna, Jesucristbeyeca běngbe catšata, contsonýa ntšamo ba uaranga judiěnga Jesucristbeñe imojtsošbuáchema, y chěnga nýetscanga montsantješna nýetsca Jesucristbeñe ošbuáchiyěnga chě Moisesbe leyentša nýetsca manděnga chamotsocumplínama.

<sup>21</sup> Y entsānga chěngbioye noticia tmojatšatá, aca chě inýe luarěnguenache imoyena judiěnga cojtsabuatambá, Moisés tojanmandá soyěnga ndoñe ntseyeunanama y basetéměnga base bobachtema chě más delicadentše ndoñe ntjatětsama, ntšamo běnga judiěnga fsěnduamancá, y ntšamo běnga fsěndětatsěmbcá ndoñe chamondětsamana ca.

<sup>22</sup> Y morna, ¿ntšamo chě soyěngama cochtsemana? Ndegombre, chěnga mochanjátatsěmbona aca moye tcojabama.

<sup>23</sup> Chcasna, ntšamo cbochanjabuayenacá cochjama: Běngbentše canta boyabásenga montsemna y chěnga entsamna Běngbe Bětsabiamca canýe šbuachenana soye jamama.

<sup>24</sup> Acaftaca cochjunatse, chěngaftaca cochtsemna y chěngcá cochtsama Běngbe Bětsabe delante tšábenga jtsatsměnama ntšamo chamojtsama ora, y ntsachetšá jětsájua chaojtsamncá, aca cochjětsájua, as chěnga chamobená nýets stjěnashe jtsenátšbotjiamca, jinýanýiyama, ntšamo Běngbe Bětsábioye tmojašbuachenacá ya tmojamama. Y chca, nýetsca judiěnga mochanjinýe ndoñe ndegombre yontsemna chě ntšamo chěngbioye acbiamca tmojacuntacá; masna, chěnga mochanjátatsěmbona aca ndegombre ntšamo Moisesbe leyiñe yomandancá icuamama.

<sup>25</sup> Y chě ndoñe judiěnga Jesucristbeñe imojtsošbuachengbiamna, běnga ya fsěňjubuábiamca y fsěňjáuyana ndayá jtsocumplínama chěnga yojtsamnama, měntšá: ‘Ndoñe chamondětsesá měntšena, chě entsānga tmojtsejuabná diosěnga imomna soyěnga jadórama tmojiyěbana; ni buiñe, ni tsešana bayěngbe měntšena; y ndoñe chamondětsama bacna soyěnga shembásenga y boyabásengaftaca ca’ ” —chěnga tmojánayana.

*Běngbe Bětsabe běts yebnentše judiěnga Pablo tmojánishache*

<sup>26</sup> As Pablo, yěfsana chë cántanga tonjanénatse y chëngaftaca tonjanma soyënga Bëngbe Bëtsabe delante tsábenga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnyama, ndayténtscoñe yojamna chë cantangbiana soyënga jtsamama, Bëngbe Bëtsabe delante tsábenga jtsatsmënama, y jayanama ndayté chëngbiana yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiana juatšëmbonama.

<sup>27</sup> Chënga tmojanenoyeuná y tmojánayana canýsëfta tentscuana chca jama ca. Chë canýsëfta te ya jochnënguama yojtsemna orna, básefta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entsänga chamuenbouënanama. Y cha tmojánishache,

<sup>28</sup> mëntšá jtsayebuáchëse: “¡Israeloca entsänga, šmabétsëjabuache ca! Quem boyabása entsemna chë nyets luarënguenache iuana abuátambaye soyënga bëngbe entsängbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tsábá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominyiñe ndoñe tsábá chaondëtsemnama ca” –chënga imojtsichamo.

<sup>29</sup> Chca imojtsichamo, er entsänga Pablo tmojáninýe chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

<sup>30</sup> Nyetsca chë pueblentša entsänga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame.

<sup>31</sup> Jtsóbama ya imojtsebuachéta ora, chë Romoca soldadëngbe mandayá tojántatšëmbona nyetsca chë bëts pueblentša entsänga imojtsenbouenana.

<sup>32</sup> Asna, chë mandayá chabe soldadënga y inýe chentša amëndayënga tojánachembo y cánýiñe chë entsänga imojtsemnoye tmojëftsanótjajo. Entsänga, chë mandayá y chë soldadëngbioye tmojánanýe ora, tmojtsanajbaná Pablo jantšëtayana.

<sup>33</sup> Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsëcama y tojanatjá: “¿Nda mua yomna y ndayá tojama ca?”

<sup>34</sup> Pero chë entsängbeñe, ínýenga canýe soye imojtsáyebuache y ínýengna inýe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama.

<sup>35</sup> Chë soldadëngbe oyenoca grádasbengoye tmojánashajna ora, chë soldadënga tojanotocá Pablo cutsnana juambama, chë entsänga tša rábiaca imojtsemna causa,

<sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

### *Ntšamo Pablo entsängbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

<sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsänga yojanëtsëtsná chë mándayëngbe contra chamotsemnama y chë canta uaranga podesca uamana entsänga puñálaca uajatëngaftaca, entsänga ndoyena luaroye tojanboconá ca?

<sup>39</sup> Chora Pablo tbojanjuá: —Atše judío sēndmēna, Tarso puebloca onŷnaná, canŷe uámana pueblentše Cilicia luaroca; Diosmanda šmolesenciá entšanga jáuyanama ca.

<sup>40</sup> As, chē soldadēngbe amēndayá chca tbojanlesenciá. Páblēna chē gradas-benguiñe tojantsá y cucuatše tojanatsbaná entšanga iytēca chamobiamama. Nŷetscanga iytēca imojtsemna orna, Pablo hebreo biyañe mēntšá entšanga tojanēyana:

## 22

<sup>1</sup> “Baconga y taitanga, mora šmochjouena atše jenēuyanama ntšamo ch-jayancá ca.”

<sup>2</sup> Pablo cachēngbe biyañe, hebreo biyañe yojtsóyebuambnama entšanga tmojanuena ora, más iytēca tmojanobiamama. As Pablo tojanēyana:

<sup>3</sup> “Atše judío sēndmēna. Tarso pueblentše, Cilicia luaroca sēnjanonŷná, pero muentše Jerusalenentše sēnjanoboché y sēndétatšēmo soyēngna Gamaliélbeyeca chca botamana sēnjanatsjinŷe. Cha corente tšabá šonjanbuatēmbá bēngbe bēts taitangbe leyēnga; nŷets atšbe ainánaca Bēngbe Bētsá sēndēservena, ntšamo nŷetsca tšēngaftanga mora šmontsamancá.

<sup>4</sup> Atše sēnjánama chē Jesucristo tojaninŷanŷé Benache ústonēnga chamosufrima y chamóbanama; boyabásenga y shembásenga sēnjanētabaye y cárceloŷe sēnjanautame.

<sup>5</sup> Chē judío bachnangbe más uámana amēndayá, nŷetsca chē judiēngbeñe bētsējemēngcá mándayēnga y inŷe muentša mándayēnga mondobena jayanana ntšamo sēntsichamcá ndegombre yomnama. Chēnga uabemana tsbuanachangá šmonjaninŷé, bēngbe catšátanga judiēnga chamotsetatšēmbuama atše mando stsanbomnama, Jesucristbeñe ošbuáchiŷēnga jótabayama; y Damascoye sēnjána chocha Jesucristbeñe ošbuáchiŷēnga jótabayama, moye Jerusalenoye junatsama jacastígayama.”

### *Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)*

<sup>6</sup> “Pero canŷe te benachiñe Damasco béconana sēnjétsaye orna, mo nŷetsto ora, nŷe ndeolpe atšbe juachañe canŷe bēts tcuinŷe celocana tonjanbuashinŷinŷena.

<sup>7</sup> Y fshantsoŷe sēnjétseshajaye y canŷe oyebuambnayana sēnjanuena mēntšá: ‘Saulo, Saulo, ¿ndáyeca šcojtsacmena ca?’

<sup>8</sup> Atše sēnjantjá: ‘¿Nda comna, Bēngbe Utabná ca?’ Y chē oyebuambnayana šonjanjuá: ‘Atše sēndmēna Jesús Nazaretocá, y aca condama atšbe entšanga chamotsesufrínama ca.’

<sup>9</sup> Chē átšeftaca monjánajnēnga chē bēts tcuinŷe tmojáninŷe y tmojanouatjananga, pero chē oyebuambnayana ndoñe tmonjanuena.

<sup>10</sup> Chora atše sēnjantjá: ‘¿Bēngbe Utabná, ndayá jamama šojtsemna ca?’ Y cha šonjaninŷana: ‘Matētsbaná y mētētontsé Damascoye jama. Chentše canŷa cmochanjabuayená ndayá jamama cmojtsemnama ca.’

<sup>11</sup> Chē tcuinŷe yapa tonjanbuashinŷinŷena causa, atše jtaná sēnjanoquedá. Chcasna, chē ínŷēnga šmontanobuacuetēntsé y chca, Damascoye sēnjánashjango.

<sup>12</sup> “Chentše enjamna canŷe bacó Ananías ca uabainá; cha inoyena ntšamo Bēngbe Bētsá yobošcá y yojánama ntšamo bēngbe leyēnguiñe iuayancá, y nŷetsca chentša judiēnga monjanamana chabiamama tšabá jtsóyebuambnayana.



13 Cha tonjánabo atše jinÿama y tonjánashjango ora, šonjaniyana: ‘Jesu-crístbeyeca atšbe catsata, Saulo, chacmotsatabinÿna ca.’ Cachora y cha sënjaninÿe.

14 “Chentsana cha tonjánayana: ‘Bëngbe bëts taitangbe Bëtsá aca tcmo-juábuayana, ntšamo cha acbiama yobošcá chacotsetatsëmbuama, chë nÿetsca soyënguifne Tšabá Amá chacuinÿama y cachabe uayásentšana chacóyeunama.

15 Bëngbe Bëtsá chca tojama, aca chë chabe buayenana soyëngama entšángbeñe chacóyeuambama, y chamna nÿets luarentša entšángbeñe coch-jacuénta, ntšamo tcojinÿe y tcojouencá.

16 Y mora, jndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjaniyana.

*Pablo tojanacuntá ntšamo chë ndoñe judiëngbioye tmojánichmoma*

17 “Jerusalenoje sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquécá sënjanoquedá.

18 Chca orna, Bëngbe Utabná sënjaninÿe y cha mëntšá šonjaniyana: ‘Betsco motsa y cam ora Jerusalenentsana métsebozna; quemuentša entšanga ndoñe quecmochatóyeunaye ntšamo atšbiama condétatsëmbo y contsëtsësnacá ca.’

19 Atše sënjanjuá: ‘Bëngbe Utabná, chënga mondétatsëmbo atše sënjánana nÿetsca chëngbe enefjuana yebnënguenache y chë ácebeñe ošbuáchiyënga sënjanëtámiana y sënjánatsetšenaye;

20 y acbiama ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá.

21 Pero chca sënjanayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbioye cbochanjíchmuca ca.’ ”

*Pablo y chë soldadëngbe amëndayá*

22 Chë entšanga chëntscoñe tmojanuena; pero chë ndoñe judiëngbiama tojanoyebuambá orna, chënga tmojanontsé uayebuáchana: “¡Ndoñe tšabá quenátsmëna cha vídaca chaotsemnama! ¡Motsóba ca!”

23 Y chënga más imojtsáyebuache; puerta rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtšana;

24 chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache.

25 Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canÿe entšá derecho bomná mo canÿa Romoca onÿnanacá jatjanjana, ndegombre tšabá o ndoñe tšabá tonjamama cabá ndayana ora ca?

26 Chë básefta soldadëngbe mandayá chë soye tojanuena ora, tojána y nÿetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entšá derecho bomna mo canÿa Romoca onÿnanacá canmëna ca.

27 As chë amëndayá tojána Pablo yojtsemnoye y tbojaniyana: —Smëyana, ¿aca derecho bomná mo canÿa Romoca onÿnanacá comna ca?

Y cha tbojanjuá: —Arseñor ca.

28 Chora chë amëndayá tojánayana: —Atše beca crocénana sënjëtšajó mo canÿa Romoca onÿnanacá derecho jtsebomnama ca.

As Pablo tbojanjuá: —Y atšna derecho bomná mo canÿa Romoca onÿnanacá sëndmëna atše tijanonÿná orscana, er atšbe taitá chca derecho bomná in-amna ca.



29 Chcasna, chë jatjanjama imojtseprontanënga, Páblëbentsana tmojanjuaná; y chë mandayánaca tojanjuaná y yojtsauatja, Pablo derecho bomná mo canya Romoca onýnanacá yojamnana tojántatsëmbona ora, er cha tojanmandá Pablo chamotsebátsëcama.

*Pablo, Jerusalemëntša uámana mándayëngbe delante*

30 Chë soldadëngbe amëndayá yojtseboşe ndegombre jtsetatsëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyjetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

1 Chora Pablo, nyjetsca chë mandayëngbioye tojanënyanyé y tojanéyana: —Taitanga, atşe mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

2 As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama.

3 Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entsá, ntšamo ndegombre tcojuabnacá ndinýinýayá! Aca chentşe contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

4 As, chabe béconana imojtsemna entsanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

5 Chora Pablo tojánayana: —Taitanga, atşe ndoñe quetsátstatsëmbo cha chë bachnangbe más uámana amëndayá yomnana. Er Bëngbe Bëtsabe uabemana palabrenguiñe mëntsá endayana: “Entsangbe mandayabe contra ndoñe catjayana ca.”

6 Pablo tojáninýe chë mándayënguëntşe báseftanga saduceunga y ínýengna fariseunga imojtsemnana; as, mëntsá tojanáyebuachena: —Taitanga, atşe fariseo sëndmëna; atšbe bëtsëtsanga fariseunga mondmëna. Atşe, jtsošbuáchiyëse chë obanënga mochtayenama tsobátmana causa, atşe ndoñe tšabá sëntsama ca tšëngaftanga šmochjayana ca.

7 Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nyjetsca entsanga ndoñe cachcá imontsejuabnaye.

8 Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíñe chë soyënguiñe jtsošbuáchiyana.

9 Y nyjetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioye ndegombre tbojauyana ca.”

10 Entsanga más imojtsáyebuache y chë soldadëngbe amëndayá yojtsauatja nderado entsanga Pablo muantsatcacaye; as, cha tojanmandá soldadënga chamua Pablo chë entsángbentsana jaisábocnama y chë soldadëngbe oyenoye cachiñe jesánatsama.

11 Yëfsana ibeta, Bëngbe Utabná Páblëbioye tbojánëbëbocna y tbojanियana: “Pablo, ainaniñe añemo cochtsebomna. Ntšamo aca atšbiama condétatsëmbo y muentşe Jerusalemëntşe condoyebuambnacá, cachcá cmontsemna Romoca jamama ca.”

*Judiënga tmojanenoyeuná Pablo jtsóbama*

<sup>12</sup> Chë inÿe yëfsana, judiënguentsana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

<sup>13</sup> Chca jamama tmojanjuabó entsanga imojamna canta bnëtsanëngama más.

<sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana.

<sup>15</sup> Morna, tsëngaftanga y chë inÿe muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Pablëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama.

<sup>17</sup> Chorna, Pablo canÿe básefta soldadëngbe mandayábioye tbojanchembo y tbojanianana: “Diosmanda quem basa mánatse chë nÿetsca soldadëngbe amëndayábioye; canÿe soye entsebomna chábioye jauenayama ca.”

<sup>18</sup> As, cha chë bobontse tbojëftsanbetše, chë nÿetsca soldadëngbe amëndayábioye tbojanánatse y tbojanianana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebomna canÿe soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

<sup>20</sup> As chë bobontse tbojanianana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.

<sup>21</sup> Pero ndoñe catjóyaunaye; chënguentsana canta bnëtsanëngama más entsanga iytëmenënga Pablëbiana montsanÿá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojanianana.

<sup>22</sup> Chentsana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentsana tbojtanichmó.

*Pablo tmojanánatse Félix, chë Cesareoca mandádbioye*

<sup>23</sup> Chentsana, chë soldadëngbe amëndayá tojánachembo útata chë inÿe soldadëngbioye mándayënguentsana, y tojanamëndá chamoprontama uta patse soldadënga, inÿe canÿsëfta bnëtsanënga couayënguiñe y inÿe uta patse lanzëšangaca, Cesarea puebloye ibeta, las nueve ora jabocanama;

<sup>24</sup> y tojanamëndá couayënga chamoprontá Pablo chauenójayema. Y tojanmandá tsábá y ndocá ntjapasacá Pablo chamuánatsama, Félix chë Cesareoca mandádbioye.

<sup>25</sup> Y canÿe tsbuanácha chëngaftaca tojanichmó y chëchañe mëntsá yojtsábemana:

<sup>26</sup> Claudio Lisias, chë bëts uámana mandado Felixbiana: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjátatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá.

<sup>28</sup> Atše sěntseboše jtsetatšěmbuana ndaye soyama chěnga chabe contra imojtsichámuama; as, cha sěnjuánatse nŷetsca chě judiěngbe aměndayěnga montsemnoye;

<sup>29</sup> y chentšana, atše sěnjátatšěmbona chěnga chabe contra imojtsichamo ana cachěngbe leyentša soyěngama, pero cha tondaye tonjobuachjanguá, cha jóbama běnga chašotsamna, ni mo cárceloye jutámíama.

<sup>30</sup> Pero atše sěnjátatšěmbona chě judiěnga tmojenoyeuná cha jtsóbama; chíyeca, cam ora cha ácbioye sěntsichamná, y chabe contra icháměngna sěnjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chě soldaděnga tmojanma ntšamo tmojanaměndacá, íbeta Pablo tmojëftsanbetše y Antípatris puebloye tmojanánatse.

<sup>32</sup> Yěfsana, chě shecuátšeca tmojána soldaděngna cach soldaděngbe oyenoye tmojésanshěcuana, y chě couayiñe enjaqueněnga Pábloftaca tmojána.

<sup>33</sup> Cesareoye chěnga tmojánashjajna ora, chě tsbuanácha chě mandádbioye tmojanantsabuaché, y Páblēnaca chabe cucuatšíñe tmojánboshjona.

<sup>34</sup> As chě mandado chě tsbuanácha tojanalía; chentšana, cha tojanēnoticiá ndaye luarocá Pablo inamnana, y Cilicia luarocá cha inamnana cha tojántatšěmbona ora,

<sup>35</sup> tbojaníyana: “Acbe contra icháměnga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe běts yebnoca Pablo chamotsebojanŷama.

## 24

### *Ntšamo Pablo chě mandado Félixbe delante tojaneněuyana*

<sup>1</sup> Shachna tianoje, Ananías, chě bachnangbe más uámana aměndayá, Cesareoye tojána báseftangaftaca chě judiěngbeñe bětsějēměngcá mándayěnguentšana y canŷa entšanga obuauyayáftaca, Tértulo ca uabainá; y chě mandádbioye chěnga tmojána Páblēbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaníyana: “Aslěpaye, taita mandado, ácbeyeca běnga natjěmbana fsěndoyena y aca puerte obiashjachá cómnayeca ba tšabe soyěnga quem luar-entša entšangbiama yojtsebinŷa.

<sup>3</sup> Nŷets tempo y nŷetsquénache chě soyěnga fsěndóyěngacañe, běts uámana mandado, y běnga chama corente cbondetsechuaná.

<sup>4</sup> Pero ndoñe yapa bēn jatenbiamnayamna, Diosmanda ratotema šmotsoyauná.

<sup>5</sup> Běnga fsěntsetatšěmbo quem boyabása entšanguentše entsemna mo bacna shacuncá, nŷets luarěnguenache yojtsana y yojtsama chě judiěnga nŷetscanga cachca soye ndoñe chamondětsejuabnama, y cha yojtsemna chě Nazaretocabe ustoněngbe uanatsaná.

<sup>6</sup> Y tonjábosena jamama Běngbe Bětsabe běts yebna, Běngbe Bětsabe bom- inŷiñe ndoñe tšabá chaondětsemnama; chíyeca běnga cha fsěnjotbá. Běnga fsěnjábosena chabíama jayanana tšabá o ndoñe tšabá tonjamama, ntšamo běngbe leyěnguiñe endayancá;

<sup>7</sup> pero chě soldaděngbe aměndayá Lisias tonjontremeté y jabuachana běngbe cucuatšentšana tbojtsánatseñe,

<sup>8</sup> y tonjayana chě chabe contra icháměngna caojtsamna ácbioye chama jabana ca. Cach taitá chacojatjá ora, ndegombre soyěnga cochántsetatšěmbo ndáyeca běnga muabe contra fstsichámuama ca” —cha tojánayana.

<sup>9</sup> Y chë judiënga chentše imojétsemnëngna imojtsanichamo aïñe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánefjatsëmbo chaóyebuambama; as Pablo tojánayana: “Atše sëndétatsëmbo aca ba uatama comna muentša entsangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná.

<sup>11</sup> Ntšamo cach aca jtsetatsëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama.

<sup>12</sup> Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuenbouénanama amiñe, Bëngbe Bëtsabe bëts yebnoca, ni chëngbe enefjuana yebnënguenache, ni inýe luarënguenache chë bëts pueblentše.

<sup>13</sup> Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca.

<sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanýe benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nýetsca chë Moisesbe leyiñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché;

<sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nýetsca entsanga, lempe tšabá amënga y chë ndoñe tšabá amëngnaca.

<sup>16</sup> Chíyeca, atše nýets tempo puerte tšabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

<sup>17</sup> “Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnëjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama.

<sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entsángaftaca, ni enbouenaniñe.

<sup>19</sup> Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse.

<sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tjobuáchjanguama chešmënjínýena, atše castiganá jtsemnama šojtsemna ca chënga chamuayanama;

<sup>21</sup> o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

<sup>22</sup> Félix bëtská inatátsëmbo Bëngbe Utabná tojaninýinýe Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanëyana: “Chë soldadëngbe amëndayá Lisias chaojášhango ora, chanjayana ntšamo quem tšëngaftangbe sóyeca jamama ca.”

<sup>23</sup> Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.



<sup>24</sup> Chentshana baseftaytese, chë mandado Félix Cesareoye tojtashjango, chabe shema Drusíaftaca, canye judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canya nanjobenaye Jesucristbeñe ošbuachiyá jtsemnama.

<sup>25</sup> Pero, nyetsca soyënguiñe tšabá jtsamama, cachá jenomándama jtsobernama y ntšamo tmojamama nyetsca entsangbiamama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojaniyana: “Mora, mata; luare quëtstsebmoma ora, cbochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuéntama.

<sup>27</sup> Y chca uta uata tojanochnëngo; chentshana, Félix ya ndoñe más chë mandado yontsemna y chabe cuentna Porcio Festo mandadca tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanhoshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentshana Jerusalenoye cha tojána.

<sup>2</sup> Chocna, chë bachnangbe amëndayënga y chë más uámana judiënga Fëstbioye tmojána Páblëbe contra jayanama.

<sup>3</sup> Y tmojanimpadá, mo chëngbiamama canye bëts pavor cuenta, cha chao-mandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama.

<sup>4</sup> Pero Festo tojanëyana, Páblëna Cesareoca utamená yojtsemna y baseftaytese cha choye jtama ca.

<sup>5</sup> Y tojanëyana: “Chamna, tšëngaftangbe amëndayënga átseftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnëtsana te más chëngaftaca tbojëftsanhëtana y chentshana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama.

<sup>7</sup> Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canye chë soyëngama tmonjanobená jinyanjyana chca ndegombre bëtsemnama.

<sup>8</sup> Y Pablo, cachá jenëuyanama mëntsá yojtsichamo: —Atše tondaye chiya-tobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjabošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma.

<sup>11</sup> Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Dios-manda chë Romoca bëts mandado cháuyana tšabá o ndoñe tšabá sënjama ca —Pablo tojánayana.



12 As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

*Festo, Rey Agrípaftaca tbojanencuentá ntšamo Pábloftaca jamama*

13 Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama.

14 Bayté chata chentše tojanajëtana; y chca, Festo chë réybioye tbojan-cuentá Páblëbe soyama. Cha mëntsá tbojanianya: —Muentše endmëna canÿe entsá, Pablo ca uabainá; Félix utamená tbonjëftseboshjona, atše mandadca sënjontsé ora.

15 Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama.

16 Y atše sënjáuyana: “Chë romanënga ndoñe quematamana ndocnabiana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

17 Chýyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetšana.

18 Pero chabe contra ichámënga, ntšamo atše sëndanjuabnacá chënga moch-jayanamna ni mo canÿe bëts soye chabe contra chemátayana, chënga jóyebuambayama tonjóyentsbuache ora.

19 Chënga chabe contra montsichamo, nÿe cachëngbe Dios ntšamo jadórama yomnana y canÿa Jesús ca uabainábiana; cha tojanóbana, pero Pablo entsichamo cha ainá yotsomñe ca.

20 “Chora atše ndoñe quetstëtsetatsëmbo ntšamo chë soyiñe jamana; asna, Pablo sënjantjá Jerusalenoye jama tayojëtseboše ca, choca atše jayanama tšabá o ndoñe tšabá cha tonjanmama.

21 Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanÿama, chë mandádbioye jíchmuama atše jobenayëntscuana ca” —Festo tbojancuentá.

22 Chca tbojanencuentá ora, Agripa Féstbioye tbojanianya: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

23 Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentšana Festo tojanmandá Pablo jobetšana;

24 y chora cha tojánayana: “Rey Agripa y nÿetsca taitanga bëngaftaca šmojtsemnënga: Chentše entsemna chë boyabása. Nÿetsca judiënga chabe contra átšbentše montsabíchamo, Jerusalenoca y quem Cesarea pueblëntšnaca, y nÿa jtsayebuáchëse tša šmontseimpadana cha chaóbanama;

25 pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu.

26 Pero atše, atšbe bëts uámana mandádbioye quem boyabásabiana juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebonnama.

<sup>27</sup> Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” –cha tojánayana.

## 26

### *Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblëbioye tbojanianana: –Jóyebuambayama contselesenciana, cach aca chacuenéuyanama ca.

As Pablo, chë réybioye jachuayama cucuatše tojanatsbaná y jenéuyanama tojanontsé mëntšá jayanama:

<sup>2</sup> –Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenéuyanama nyetsca soyëngama ntšamo judiënga atšbe contra montsichámuama;

<sup>3</sup> y más sëntsoyejuá, taitá conduábuatmama lempe ntšamo judiënga mond-uamancá y condétatšëmbo chë judiënga ndayama imuenoboyebuambnana. Chcasna, Diosmanda uantádoca šmotsoyeuná.

### *Pablo tojanacuntá ntšamo cha tempo inamnana*

<sup>4</sup> “Nyetsca judiënga mondétatšëmbo ntšamo atše tempšana chëngbeñe tsiyenama, bobontse sënjamna orscana, atše sënjanonýná luarentše y Jerusalem-entše.

<sup>5</sup> Chëngnaca mondétatšëmbo y montsobena jayanana, chënga tmojtsebošëse, chca ndegombre yomnana; atše nyets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inye judiëngbiana.

<sup>6</sup> Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama.

<sup>7</sup> Bëngbe bnëtsana uta Israeloca bëts pamíllanga mondobátmana chë šbuachenana soye chëngbiana chaóshjanguama y chíyeca, cada te bnëté y ibeta chënga Bëngbe Bëtsá mondadorana y mondëserveda. Y atše cach soyama obatmana causa, bëts rey Agripa, judiënga mora atšbe contra montsabíchamo.

<sup>8</sup> ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

### *Pablo tojanacuntá, ntšamo tempo cha Jesucristbeñe ošbuáchiyënga yojan-aborlánama*

<sup>9</sup> “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,

<sup>10</sup> y chca Jerusalem-entše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átšnaca aíñe chca chamoma ca sënjánichamo.

<sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjetsemna causa, chë inye luarëngoca bëts pueblënguenáchnaca chënga sënjanëcamena.”

### *Pablo tojanacuntá ntšamo cha Jesucristbeñe ošbuachiyá tojanóbema (Hch 9.1-19; 22.6-16)*

<sup>12</sup> “Y cachcá jamama canye te Damascoye sënjetseye; chë bachnangbe amëndayënga uabemanëchangá šmonjanëntsabuaché chca jamama y, cachënga choye šmonjanichmó.

<sup>13</sup> Pero, uámana rey, chë benachëjana mo nÿetsto ora, sënjaninÿe canÿe bëts tuinÿe celocana, shinÿama corente más enjëtsebinÿnaye, y atše y chë átšeftaca ajnëngbe shëconana corente enjëtsebuashinÿinÿana.

<sup>14</sup> Nÿetscanga fsënjánshajaye y atše sënjanuena canÿe oyebuambnayana, hebreo biyañe, mëntśá šonjëtšatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfiñe cha tojtsoscunjá orcá, cachá jenótsetšenana ca.’

<sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.’

<sup>16</sup> Pero matëtšbaná y matëtśá. Atše cbonjébëbocna jinÿinÿiyama aca tchojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinÿe soyama y más chcoye atšbiamá cbochanjinÿinÿiye soyëngámna.

<sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná,

<sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebonna, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entšangbe juabnënga binÿnayá. Satanasbe cucuatsiñe ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebonnama canÿe luare entšángaftaca, chë ndëmuanÿengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca’ ” —cha šonjanianá.

### *Pablo tojanma ntšamo chë mo otjenayoquëcá tojaninÿcá*

<sup>19</sup> “Chcasna, bëts rey Agripa, atše sënjanma chë mo otjenayoquëcá sënjaninÿe ora ntšamo Cristo šonjaniancá;

<sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusalemnoquënga y nÿetsca chë Judea luaroquënga y ndoñe judiëngnaca; chënga sënjanaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama.

<sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana.

<sup>22</sup> Pero Bëngbe Bëtsá sempre šonduájabuachana, y chca, cada te mëntscoñama, nÿetscanga Bëngbe Bëtsabiamá sëndabuayiná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetśá ndoñe.

<sup>23</sup> Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojsošbuáchenga atsebácanënga mochtsemnama ca.’ ”

*Pablo tojanma rey Agrípbioye jáyëñanama, Jesucristbeñe ošbuachiyá chaóbemama*

<sup>24</sup> Pablo, cachá jeněuyanama chë soyënga tojánayana ora, Festo mëntśá tojanáye buachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsátsmëna, bëts uámana Festo; inyetsá entsemna; atše sëntsoyebuambná nÿets juábnaca, y ndegombre soyënga.

<sup>26</sup> Chentse rey Agripa entsuenana, y cha puerte tśabá chë soyëngama endétatsëmbo, chíyeca, tondayama ntjatauatjá, atše chabe delante sëntsoyebuambná; atše corente sëndétatsëmbo chánaca chë soyëngama yotatsëmbuama, er ndayá Jesús tojanmca, ndoñe tonjopasá ndaye iytëmena chaboye.

<sup>27</sup> Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecoşbuaché? Atše sëntsetatsëmbo aiñe chiñe coşbuáchema ca —Pablo tbojaniana.

<sup>28</sup> Chora Agripa tbojanjuá: —Batśatema más y maşcjayëñaná Jesucristbe ustoná atše jóbemama ca.

<sup>29</sup> As Pablo tojánayana: —Nÿe batśatema más o bëts cama más, atše Bëngbe Bëtsá sëntseimpadana, ndoñe nÿe bëndatbe barie, sinó nÿetscanga chë mora şmojtsuenanënga, atścá Cristbe ústonënga chaşmobiamama, pero utámenënga ndoñe chamondétsemna, ntşamo mora atše sëntsemncá ca.

<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná,

<sup>31</sup> y luaroye tmojána chë soyama jencuëntama. Mëntśá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjáboşenëse, bënga matmënjobená quem boyabása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëşa uabiamnayá, cháftaca sënjána. Chora Pablo y chë inÿe utámenënga Julio ca uabainabe cucuatşinë tmonjánabashejuana. Julio enjamna canya chë Romoca bëts mandadbe soldadënguentśa mandayá.

<sup>2</sup> Asna, fsënjánaşëngo canye Adramitio puebloca barcuinë; ya chë Asioca bëts pueblëngoye juama enjétsamna. Cesarea pueblentsana fsënjánbocna y Aristárcnaca bëngaftaca enjétsamna; cha enjamna Tesalónica bëts pueblócá, Macedonia luaroca.

<sup>3</sup> Chë inÿe yëfsana, Sidón puebloye fsënjánashjajna. Chentse Julio, tśabá mandbomná Pábloftaca enjétsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama.

<sup>4</sup> Sidonocana fsënjéftsanbocnentsana, bëngbe contra corente enjétsëbinÿiaye. Chíyeca, Chipre fshantsënga catşbioicajana, ndoñe yapa quentétsëbinÿiayëjana bënga fsënjána.

<sup>5</sup> Cilicia y Panfilia luarënga bëconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canye Alejandría puebloca barco chentse tonjáninÿena, Italia luaroye yojétsaye; asna, şonjanamëndá chë barcuinë jenójjayiyana.

<sup>7</sup> Baseftaytentscuana uenana fsënjánana y pordonto fsëñjanobená Gnido pueblentsa ndirichiñe jashjanguana. Cabá bëngbe contra enjétsëbinÿiaye



causa, Salmón luarējana fsenjánachnějna, Creta fshantsēnga béconana, ndoñe yapa quentétebinjīayējana.

<sup>8</sup> Y chca, pordonto bejaycá fsenjánana, fshantsēnga béconana; chentšana, canye pueblo, Tsabe Puertēnga ca uabáinentše fsenjánashjajna, Lasea ca uabaina pueblo béconana.

<sup>9</sup> Chca, bayté tonjanochněngo y chora chē bejaycá jama puerte resjo enjésemna, er ya chē judiēnga bayēnga jobáyama te tonjanochněngo, Bēngbe Bētsá chēngbe bacna soyēngama cháuperdonama, y chora chē uaftena tempo joshjanguama ya enjétsobeco.

<sup>10</sup> Chíyeca Pablo chē entsānga mēntšá tonjanabuayená: “Baconga, atše šontsinjāna mora puerte resjo entsemna bejaycá jātama, y ndoñe tsabá queochátsmēna, ni chē uasmanēshangama, ni chē barcuama y bēngbiana cach ndoñe, mo nderado muanjanóbana ca.”

<sup>11</sup> Pero chē soldadēngbe amēndayá Páblēbioye ndoñe ntjoyeunayana; más, chē barcuentsā mandayá y chē barco nduifbioye aīñe.

<sup>12</sup> Ndoñe tsabá yonjamna, chē barco chora enjésemnentše chē uaftena tempēntscuana jēftsemnana; chē causa, nya mo nyetscanga tmonjanenoyeuná cachiñe bejaycá chentšana jātama, nderado cuanjobenaye Fenice puebloye jashjanguama y chentše jēftsemnama chē uaftena tempo tojopochocantscuana. Chē pueblo Creta luaroca enjamna; y choye jamashēnguanma enjamna shinje endbetsenatjēmbambana juachoica tsjuanoicajana y tsmanoicajana.

### *Mar béjayiñe puerte uaftena y binjia tojanóshjango*

<sup>13</sup> Chentšana tonjanontsé tsmanoicana batšá binjīayana, chíyeca chē entsānga tmonjanjuabó ya yojsanopodena jtétóntšana jama ca. As, chentšana fsenjétsanbocna y bejaycá fsenjána, Creta fshantsēnga beconanējana.

<sup>14</sup> Pero baseftayté chentšana, chē fshantsēngocana tonjanontsé corente jabuache binjīayana y chē barquēshoye enjétsoshjajuana. Chē binjia yojanabaina Nordeste binjia ca.

<sup>15</sup> Chē barcna nye chē bínjīēbe ponto tonjanontsé uayana; chē binjia enjétsobayējana jama ndoñe quentétsopodena causa, šonjanotocá nye ntšamo tojtsebinjīacá chašúyambama.

<sup>16</sup> Chentšana fsenjánachnějna Cauda ca uabaina stētsoicajana, base fshantsēnga mar béjayoca; chiñe ya ndoñe tša jabuache quentétebinjīaye y pordonto fsenjanobená buyeshoicana jtabocnana chē barco enjanasjá canouše, ndoñe chaondētsóndbemama.

<sup>17</sup> Ya chē barquēshoye fsēntanēsēngo orna, chē entsānga lazējangaca chē barquēsha tmontsanabatsēcaca, más uamorochēsha chaotsamnama. Pero chēnga monjétsauatja nderado chē barco chē Sirte ca uabaina cascajuentše nanjetsánjua; asna, chē barcuentsā ancla tmonjanashēbēútsēna, chē barco ndoñe betesco chaondētsábonjnama, y ntšamo enjetsanbinjīaycá fsenjána.

<sup>18</sup> Chē inye yēfsana y chē binjīayana cabá jabuache enjésemna causa, chēnga tmonjanontsé chē barcuentsā uasmanēshangá jtsēshbuétsetšana;

<sup>19</sup> y unga tianoye bēngnaca šonjanotocá, cach bēngbe cucuátseca, chē barcuentsā soyēnga buyeshoye jtsētšanana.

<sup>20</sup> Baytentscuana bēnga ndoñe chibiatanobená jinjāna ni shinje, ni estrellatémēnga, tša tonjéteibetata causa; y tša jabuache enjétebinjīaye causa, bēnga ya ndoñe quefstétsanobatmana chentšana jótsbocana.

<sup>21</sup> Ya bayté enjésemna y chēntscuana tondaye saná ntjascá fsenjésemna. Chentšana, Pablo bēngbe tsēntsaca tonjantsá y tonjánayana: “Baconga,



tšabá manjamna atše mašmēnjanoyeuná y Creta luarocana ndoñe matmēnjēftsanbocna; chca mora ndoñe mal mamojtsepasá y ndoñe n̄ya n̄yetsá matmēnjobuetše.

<sup>22</sup> Pero mora ngménaca ndoñe matsmēnēngana; masque chē barco echantsenatjēmba, tšēngaftanguentsá ndocná queochatóbana.

<sup>23</sup> Ibeta can̄ye ángel šonjébēbocna; Bēngbe Bētsá, ndabia atše sēndmēna y nda sēndēservena, cha tbojichmó;

<sup>24</sup> y chē ángel mēntsá šonjauyana: ‘Pablo, ndoñe matauatjana; entseyta aca chē Romoca bēts mandádbioye chacotsama, y aca Bēngbe Bētsábia cómnayeca, n̄yetsca quem barcuñe ajnēnga jobanámentšana cha echanjatsebacá ca.’

<sup>25</sup> Chcasna, baconga, ndoñe matauatjēngana, er atše Bēngbe Bētsábeñe corente sēntsošbuaché y lempe ntšamo chē ángel šonjauyancá echanjóbocna.

<sup>26</sup> Pero mora entseyta can̄ye fshantse mar bėjaiñe chašúshejanguama ca” — cha tonjanēyana.

<sup>27</sup> Can̄ye ibeta, uta semana fsēnjánana chentšana chē Adriático ca uabaina mar bėjaiñe fsēnjétsemna, y n̄ye ín̄yoye y ín̄yoye chē bin̄jia šonjétsēyambaye. Y mo tsēntseto yojétsemna orna, chē barcuentsa trabájayēnga tmojanjuabó ya fshantse béconana imojétsemna ca.

<sup>28</sup> As chēnga tmonjanmedidá ntsachetsá chē búyeshe buajoye inamnama y tonjanóbocna unga bnētsana y chnēnguana metro; más chcoye cachiñe tmonjanmedidá y uta bnētsana can̄ysēfta metro tonjanóbocna.

<sup>29</sup> Chēnga monjétsauatja nderado bēts ndētšbēngaca nanjetsántšētjiama; asna, chē barco stētsoicajana canta ancla buyeshoye tmonjanashēbēútsena, chē barco ndoñe más chaondētsábonjnama, y tša monjétsēboše betscó chaobín̄yama.

<sup>30</sup> Chēntscuana, chē barcuentsa trabájayēnga tmojánbošena chentšana jt-sachetana; chamna, chēnga tmojanontsé chē canouše buyeshoye just-janguana, pero chca imojétsama, mo chē anclēnga chē barco natsanoica cuaftsēstjajuancá.

<sup>31</sup> Pero Pablo chē soye tojánin̄ye, y chē soldadēngbe amēndayábioye y chē soldadēngbioye tonjanēná y mēntsá tonjanēyana: “Chē barcuentsa trabájayēnga cach quem barcuentsē ndoñe chamonjoquedase, tšēngaftanga ndoñe quešmochatobenaye muentšana jótsbocama ca.”

<sup>32</sup> As, chē soldadēnga tmonjána y chē canoušentša lazējēnga tmontsantētsetše y buyeshoye chēse tmontsantsatše.

<sup>33</sup> Enjétsēbin̄yana ora, Pablo n̄yetscanga tonjanaimpadá ndayánaca chamosēngama, mēntsá jáuyanēse: “Ya uta semana entsemna y tšēngaftanga ni mo batsatema chešmatamaná, y tondaye chešmatsbmuananga.

<sup>34</sup> Diosmanda, masque n̄ye mo batsatémnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

<sup>35</sup> Pablo, chca tonjánayanentšana, can̄ye tandēse tonjanca y n̄yetscangbe delante Bēngbe Bētsábioye tbontanchuá. Chorna, tonjanjatá y tonjanontsé jasama.

<sup>36</sup> Chentšana n̄yetscanga tmonjanenñemó y chēngnaca tmonjanse.

<sup>37</sup> (Chē barcuentsē n̄yetscanga fsēnjamna uta patse y can̄ysēfta bnētsana y chnēnguanēnga.)

<sup>38</sup> Ntšamo imnabošcá tmonjansentšana, buyeshoye trigo tmontsanashaná, chca, chē barco ndoñe yapa chaondētsautama.

### *Chē barco tojtsanematjēmba*

<sup>39</sup> Ya tonjanbin̄yana ora, chē barcuentsa trabájayēnga ndoñe quemēntétsetatšēmbo ndaye fshantse chentše bétsemnama, pero

tmonjáninÿe chë fshantsentse canÿe luare jachañe, chë béjaye chë luaroye omashjuanentse, y chiñe canÿe chëñyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana.

<sup>40</sup> Asna, chë anclentša lazëjënga tmontsantëtsetse y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñësiñe entsëjua tsbanánoye tmontanëšëngo, y chë binÿia tonjanma chë barco chaontsé chë chëñyoye juabëconama.

<sup>41</sup> Pero chë barco canÿe luaroye tonjánashjango, y chentse chë béjaye catatoicajana enjetsobuá y chë barco cánÿentse, bëts cá cascajo buyeshiñe binÿnentse tontsanajo. Chë barcuentša natsanoica lado chë cascajuñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyiná y lempe entsanandbiamná, yapa binÿia causa y búyeshe chentse enjëtojsantsetaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama.

<sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nÿetscanga chë jachbabama obenëngna natsana chë buyeshoye joshbuetšana tsachoye chamuashjanguama,

<sup>44</sup> y chë ínÿengna tablëshënguiñe o chë barcuentša pedazënguiñe chamoshbuetšana. Y chca, nÿetscanga fsënjanobená tsabá y ndocá ntjapasacá fshantsoye jashjanguama.

## 28

### *Pablo Malta luaroca*

<sup>1</sup> Ya nÿetscanga fshantsoca tsabá fsënjëtsemna ora; fsënjäntatsëmbona chë luare Malta ca yojanabaina.

<sup>2</sup> Chë luarentša entsanga bëngaftaca corente tsabá mándbomnënga monjëtsemna; canÿe iñeshe tmonjanangbotjó y šonjanëbuaja choca bënga jatóšboniyama, er tša enjëtsaftena y yapa enjëtsesëсна.

<sup>3</sup> Pablo tojanatbaná básefta buashana chamesëfjënga y chë iñeshoye enjëtseshacjnaye ora, canÿe mëtšcuaye tojánbocna y enjetsachaye, chentse yapa obonÿaye causa, y Páblëbe cucuatšiñe tontsanojonjá.

<sup>4</sup> Chë luarentša entsanga, chë mëtšcuaye Páblëbe cucuatšiñe yojtsajonÿanama tmonjáninÿe ora, monjëtsenatsësnaye: “Quem boyabása ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatslesencia cha vida chaotsebomnana ca.”

<sup>5</sup> Pero Pablo tontsanenacuestëtoná y iñeshoye chë mëtšcuaye tbontsantsatse y Pablo ndocá chenatanpasá.

<sup>6</sup> Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtsanjuabnaye y tmonjanontsé ichámuana Pablo canÿe dios inamna ca.

<sup>7</sup> Chentša bëconana inamna chë luarentša mandayabe fshantsënga. Cha šonjanëbuaja y corente tsabá šonjanacuedá, unga tentscuana. Chë taitana Publio ca inauabaina.

<sup>8</sup> Chë tempo, Públëbe taitá šocá jutsnëshañe inajájona, calentóraca y buíñeca buamachnëjuanánaca. Pablo tonjána cha jinÿama y tonjánamashëngo; Bëngbe

Bëtsábioye tbonjanimpadá y chë šocábeñe chabe cucuatšënga tonjanjajó, y chca, cha shnaná enjëtsatsmëna.

<sup>9</sup> Chca tonjanopasá chentšana, chë luarentša inye šoquënga Páblëbioye monjánajna y cha enjánashnaye.

<sup>10</sup> Bëtsá tšabe soyënga chentše bëngbiamá tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

### *Pablo Romoye tojánashjango*

<sup>11</sup> Chë fshantsentše mar béjayoca unga ishinye fsënjëftsemna, y chentšana canye Alejandriocana yojanabá barcuñe fsënjanenojayé; chë barco nyets uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catšatcá.

<sup>12</sup> Chentšana, Siracusa bëts puebloye fsënjánashjajna y chentše unga te fsënjëftsemna;

<sup>13</sup> y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjëtsebinýiaye, y chca, chë inye yëfsana Puteoli puebloye fsënjánashjajna.

<sup>14</sup> Chentše básefta Jesucristbeñe ošbuáchiyënga fsënjánanýena, y šonjanëbuaja chëngaftaca canye semana chentše jëftsajëtanama; y chentšana Romoye fsënjëftsambocna.

<sup>15</sup> Romoca Jesucristbeñe ošbuáchiyënga ya imojëtsetatšëmbo bënga choye fchjanashjajnama; chcasna, chënga tmonjانبocna bënga jajëbenguama canye luare Foro del Apio y Unga Tabernënga ca uabainóntscoñe. Pablo chënga tonjánanýe ora, Bëngbe Bëtsá tbontanchuá y puerte añémoca enjëtsemna.

<sup>16</sup> Romoye fsënjánashjajna ora, soldadëngbe amëndayá Páblëbioye tbonjalesenciá cánýabe yebnentše chaotsiyenama, y tonjanmandá canye soldado chabotsebojanýama.

### *Ndayá Pablo Romoca tojanma*

<sup>17</sup> Choye fsënjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nyetscanga ya tmojánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe bëts taitanga imojanamana soyëngama contra, judiënga Jerusalenoca šmonjanishache y romanëngbe cucuatšinë šmonjانبoshjona.

<sup>18</sup> Chë romanënga lempe šmonjantjá chentšana, monjëtseboše atše jëtsboshjonana, er ndocna bacna soye chemátaninýena atše jóbanama chašotsemnama.

<sup>19</sup> Pero chë judiënga ndoñe quemtëtseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama.

<sup>20</sup> Chíyeca, atše tčbonjúbuaja jányama y jáuyanama, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca —tojanéyana.

<sup>21</sup> Chora chënga tmojanianyana: —Bënga ni mo canye tsbuanácha Judeocana fchiyatáyëngaca acbiamá noticiëngaca, y ni canye catšata judío, chocana moye ashjajnënguentšá, ndocna bacna soye acbiamá chešnatacutá.

<sup>22</sup> Bënga fsëntseboše jouenana ntšamo aca cojuabnama, er ntšamo Jesucristbe ustonëngbiamá fstsëtatšëmbcá, entsemna ana nyets luarenache chëngbe contra entšanga imojtsichamo ca.

<sup>23</sup> Asna, canye tescama Pablo tmojaniyana chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininye y inatátšëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca.

<sup>24</sup> Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero ínÿengna ndoñe.

<sup>25</sup> Nÿetscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntsá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

<sup>27</sup> Muentša entšanga ainánaca josértama ndoñe quemátsboše causa, chënga nduauenanënga montsemna y nduabinÿnëngnaca; chënga bomínÿeca ndoñe chamondobená jinÿama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjátsebacama ca.’ ”

<sup>28</sup> Pablo chora mëntsá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entšanga bacna soyënguentšana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.”

<sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentše tonjanoquedá canye uántšamena yebnentše; y nÿetscanga cha jauatsëtsayama monjánajnënga cha enjanëbuájajana.

<sup>31</sup> Nÿetscangbe delante puerte añémoca entšanga enjanabuayiyiná Bëngbe Bëtsabe amëndayama, y enjanabuatambá soyënga Bëngbe Utabná Jesucrist-biama, y ndocna Romoca mandayá quebënjatanauyá chca jtsamama.

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëftsanábema Bëngbe Bëtsabe uabemana palabrënguiñe.

<sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiana jtsóyebuambnayana. Entšá quetsomñecana, tojanonýná canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanýé Jesucristo chabe Uaquiñá bëtsemnama. Cha chca tojaninýanýé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëtš soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyëts luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

<sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiana sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

### *Pablo tša inaboše Roma bëtš puebløye jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiana, er nyëts quem luariñe entšanga tša monjesoyebuambná tšëngaftanga Jesucristbeñe bëtscá šmojtšošbuáchema.

<sup>9</sup> Bëngbe Bëtsá, nda nyëts ainánaca sëndëserveda, tšabe noticiënga chabe Uaquiñabiana abuayinayañe, endëtatšëmbo atše nyëts tempo Bëngbe Bëtsáftaca stsencuénta ora, tšëngaftangbiana sëndëtseimpadanama;

<sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama.

<sup>11</sup> Er atše tša sënjëseboše tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëtš añemo chašmotsebomnama, y Jesucristbeñe corente chašmotšošbuáchema;

<sup>12</sup> o más tšabá jayanamna, tšëngaftanga y átšeftaca mochjenájabuache ainaniñe bëtš añemo jtsebomnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero mëntscoñama ndoñe tsjobenaye. Atše sëntseboše ndayá chayobená jamana inýënga tšëngaftangbioca Jesucristbeñe chamotšošbuáchema, ntšamo inýëngbeñe ndoñe judiëngbeñe tonjopasacá.

<sup>14</sup> Atše Jesucristbiana canýe oservená sëndmëna, y chíyeca nyëtscángaftaca obligaciönaca sëntsemna, chë pueblënguiñe oyenëngaftaca y bën tjøye oyenëngaftaca, chë uatsjinýenëngaftaca y ndoñe chcangaftácnaca.



<sup>15</sup> Chíyeca atše tša sěntseboše tsěngaftanga chě Romoca šmoyeněgnaca chě tsabe noticiěnga jábuayenama.

*Chě tsabe noticiěnga Běngbe Bětsabe obenana jtsinjanynayana*

<sup>16</sup> Atše ndoñe quetsátēuatja chě tsabe noticiěnga jtsabuayiyayama, er chě noticiěnga jtsinjanynayana Běngbe Bětsabe obenana; y chě obenánaca, nyetscanga Jesucristbeñe ošbuáchiyěnga jtsobenana atsebácaněnga jtsemnana, natsana chě judiěnga chca ošbuáchiyěnga, pero chě ndoñe judiěgnaca.

<sup>17</sup> Er chě tsabe noticiěnga jtsinjanynayana ntšamo Běngbe Bětsá inétsama entšanga chabe bominyiñe tsábenga chamotsemnana. Y entšanga chabe bominyiñe tsábenga jábiamana, chěnga Jesucristbeñe tmojtsošbuáchema. Ntšamo Běngbe Bětsabe uabemana palabrenguiñe endayancá: “Nye ndabiama Běngbe Bětsá tojama chabe bominyiñe tsabia chaotsemnana, cha Běngbe Bětsabeñe betsošbuáchema, cha ndegombre chě nyetsca tescama yomna tsabe vida echántsebomna ca.”

*Běngbe Bětsabe delante nyetscanga culpa bomněnga mondměna*

<sup>18</sup> Běngbe Bětsá celocana tojinjanýé, chě uabouana castigo, tša tbojetnama entšangbiamana chaotsemnana, ainaniñe bacna juabněnga bomněngbiamana y chě bacna soyěnga aměngbiamana y nděmuanýengbiamana, masque Běngbe Bětsabe ndegombre soyěnga jtsotatsěmbñana, tša bacna soyěnga tmojtsama causa, ndoñe ntjaleséciana cachěnga jtsiyenama ntšamo ndegombre yomncá.

<sup>19</sup> Běngbe Bětsá echanjácastigaye, er ntšamo entšanga imobencá Běngbe Bětsabiamana jtsetatsěmbuama soye, chěngaftaca sempre endětsemna. Y chca endměna, Běngbe Bětsá chě soye tojinjanýeyeca.

<sup>20</sup> Běngbe Bětsá quem luare tojanma orscana, entšanga mondetsoyena botamana josértana, Běngbe Bětsabe obenana ndocna te yochjěftsopochócama y cha ndegombre Běngbe Bětsá yomnana. Chě soyěnga Běngbe Bětsabiamana entšanga quemátobena jinýana; nye jtsetatsěmbuamna aiñe. Entšanga mondobena chě soyěnga Běngbe Bětsabiamana jtsetatsěmbuana, cachá tojanma soyěngaca. Chcasna, chěnga ndoñe quemátobena jayanana bacna soye tmojama, cha nduabuatma causa ca.

<sup>21</sup> Chěnga Běngbe Bětsabiamana mondětatsěmbo, pero ndoñe ntsebošana chábioye jadórana, “aca ndegombre Běngbe Bětsá condměna ca” jtsicháměse, ni cha ntsatschuanayana. Pero, ntšamo chěnga tmojtsejuabnacá tondaye ntsámanana; ndoservena juabněngaca y bacna juabněngaca montsiyena, y chca, chěnga montsiyena, jtsaměse ntšamo cachěngbe juabněnga yomncá, mo ibetiñe cuaftsajncá.

<sup>22</sup> Chěnga jtsichámuana corente osertáněnga imomna ca, pero ndegombrna juabna ndbomněnga mondměna.

<sup>23</sup> Chěnga ndoñe ntsadoránana Běngbe Bětsá, chě ndocna te yochjěftsobaná; chě cuenta, soyěnga tmojobopormá mo entšangcá, y chěngna aiñe jóbanana; o soyěnga shloftšěngcá o bayěngcá, o osjojnayěngcá, y chěnga diosěnga imomna ca jtsejuabnayěse jtsadoránana.

<sup>24</sup> Chíyeca, Běngbe Bětsá cachcá tojónya, cachěngbe ainaniñe puerte bacna juabněngaca mandáněnga chamotsiyenama, y chca, bacna soyěngnaca inýengaftaca imojtsama; chě soyěngamna jtsēuatjana chěnga entsamna.

<sup>25</sup> Chěnga chca jtsemnana, er ndoñe tmonjábosena Běngbe Bětsabe ndegombre soyěnguiñe jtsošbuáchiyana, pero chě ndoñe ndegombre soyěnguiñe cocayé jtsošbuáchiyana; chěnga jtsadoránana y jtseservénana, Běngbe Bětsá quem luarentse tojama soyěnga; pero ndoñe ntsadoránana, ni ntseservénana

cach Bëngbe Bëtsá, chë nyetsca chë soyënga tojanmá. Entšanga nyets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachcá tojónya, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama.

<sup>27</sup> Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

<sup>28</sup> Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsšëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá.

<sup>29</sup> Chënga nyetscna bacna soye jtsamana: ainaniñe nyetscna bacna juabna jtsebomnana, nÿe cachëngbiana bëtscá soyënga jtsebomnama tša jésebošana, y ínÿengbioye ntšámncá jáborlama jtsebošana; chënga nÿe játsbošana inÿa tojtsebomna soyënga jtsebomnama, ínÿenga jtsébánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga.

<sup>30</sup> Chënga ínÿengbiana podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámncá ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtšétsangbioye ndoñe ntsayaunanana.

<sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana.

<sup>32</sup> Y chënga corente mondëtatšëmbo chca soyënga amëngbiana, Bëngbe Bëtsá chabe leyinÿe tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana ínÿenga cachcá tmojtsama ora.

## 2

*Bëngbe Bëtsá echanjama chë ndoñe tšabe soye amënga bët castigo chamotsebomnama*

<sup>1</sup> Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmatobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinÿanÿnayana cach tšëngaftágnaca ndoñe tšabá šmonjamama, y castigánënga jtsemnama cmontsamna, er tšëngaftanga cachëngcá šmojtsiyena.

<sup>2</sup> Bënga mondëtatšëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnama yojtsamna ca cha tojayana ora.

<sup>3</sup> Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentšana šmochjotsbocá ca?

<sup>4</sup> Bëngbe Bëtsá tšëngaftangbiana corente tšabe juabna endbomna; mora ndoñe quecmátacastigaye, y tšëngaftangftacna puerte uantado nÿe chca endëtsemna. ¿Chama tšëngaftanga cha šmojtsábotena? ¿Ndoñe

šmondétatšëmbo Bëngbe Bëtsá chca corente jtsababuánÿeshanëse cmojtsénÿa, tšëngaftanga juabna chašmotrocama y chabe benache chašmuishachama cha yobóseyeca?

<sup>5</sup> Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmotsama más bëts castigo chašmotsebomnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bëtsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama.

<sup>6</sup> Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe.

<sup>7</sup> Ndëmuanyënga nÿets tempo tšabá jtsamëse imoyena, y chca imonguá Bëngbe Bëtsá más uámanënga chauabiamama, cha chëngbiamama tšabá chaotsoyebuambná y tšabe vida jtsebomnama chaoma; chë te chëngbiamama Bëngbe Bëtsá echanjama, chë nÿetsca tescama yomna tšabe vida chamotsebomnama.

<sup>8</sup> Inÿenga imoyena, nÿe cachëngbe juabnëngaca cachënga tšabá jtsomñamama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nÿetsca tescama castigánënga jtsemnana chënga yojtsamna ca.

<sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiamama chaotsemnana, er yapa tsetšénana chëngbiamama echanjëftsemna; chca echántsemna chë chcángbeñe judiënga imomnëngbiamama natsana, y ndoñe judiëngbiámna.

<sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiamama corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiamama natsana, pero ndoñe judiëngbiámna.

<sup>11</sup> Er Bëngbe Bëtsabiamama nÿetscanga cachcá monduámana.

<sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjamama ca y castigo chamotsebomna ca, chë leyënguiñe iuayana soyëngaca.

<sup>13</sup> Chca endmëna, er Bëngbe Bëtsá ndoñe queonÿbatsma entšanga chabe bominiñe tšábënga chamotsemnana, nÿe ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse.

<sup>14</sup> Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsëtsná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinÿanÿayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama.

<sup>15</sup> Ntšamo tmojtsiyencá chënga jtsinÿanÿayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinÿanÿayana chënga ntšamo chë leyiñe yomandánama cachcá

imojuabnama. Inye ora, chengbe juabnenga echantsétsétsnaye aïne o ndoñe tšabá tmonjama ca; y ndayté, Bëngbe Bëtsá nyetscangbiamama ntšamo tmojamama yochjayana ora, cachengbe ainaniñe tmojajuabó soyëngaca, cha echanjínñanyíye ndayá tšabá o ndoñe tšabá tmonjamama.

<sup>16</sup> Chë te, Bëngbe Bëtsá nyetscangbiamama echanjayana chengbe juabnëngama y ntšamo tmojamama, ndayá entsanga tempo ndoñe tmonjáninñama; cha chca echanjama Jesucrístoftaca; y chë atše sëndabuayiná tšabe noticiënga entsichamo ndegombre chca yochtsemnama.

### *Judiënga y Moisesbe ley*

<sup>17</sup> Y mora tšëngaftangbiamama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtšenábotamnayana Bëngbe Bëtsabe ubuáyana entsanga šmomna ca;

<sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentsana šmojuatsjinñe jobocacayana ndayá más tšabá jamama tojtsemncá.

<sup>19</sup> Tšëngaftanga tša jësejuabnayana, šmobena ínñënga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binñiñcá oyenëngbe juabnënga binñayëngcá;

<sup>20</sup> tšëngaftanga jtsejuabnayana chë ntšamo tšabá yomncá ndosertánëngbiamama abuayinayënga šmomna ca, y mo chë basëngcá tondaye nduatsjínñenëngbiamama abuátambayënga ca. Tšëngaftanga tša jësejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca.

<sup>21</sup> Y chcasna, tšëngaftanga chë ínñënga abuátambayënga, ¿ndáyeca ndoñe cach tšëngaftanga šmondétsánatsana? Tšëngaftanga ínñëngbioye jtsabuayinayana ndoñe chamondétsatbëbanama; as, ¿ndáyeca cach tšëngaftanga šmnétsatbëbana?

<sup>22</sup> Tšëngaftanga jtsichámuana, acbe shema o boyábioye ndoñe ínñaftaca cattseíngñaye ca; as, ¿ndáyeca tšëngaftanga cachcá šmnétsama? Tšëngaftanga jtsáboyënjana soyënga chë ndayama ínñënga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentšana uámana soyënga šmnétsatbëbana?

<sup>23</sup> Tšëngaftanga tša jtšenábotamnayana chë ley šmobomnama; as, ¿ndáyeca šmonýbëtsama ínñënga Bëngbe Bëtsabiamama podësca chamotsóyebuambnama, tšëngaftanga chë leyentsana mandënga jobedésama ndocna te ntsebošana causa?

<sup>24</sup> Chama, Bëngbe Bëtsabe uabemana palabrenguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiamama ndoñe tšabá quematoyebuambná ca.”

<sup>25</sup> Tšëngaftanga ntšamo leyíñe yomandancá šmojtsamëse, Bëngbe Bëtsábënga šmomnama jinñanyiyama, chë más delicadentše base bobachtema tëtšëñënga jtsemnana tšabá nántsemna; pero ntšamo chiñe tomandancá ndoñe šmotsamëse, chca tëtšëñënga jtsemnana, tondayama ntoservénana, y chca, tšëngaftanga jtsemnana mo chë más delicadentše base bobachtema ndëtëtšëñëngcá.

<sup>26</sup> Y chë ndoñe judiënga chë más delicadentše base bobachtema tëtšëñënga, judiëngcá ndoñe quemátsmëna; pero chënga ntšamo leyíñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entsangcá.

<sup>27</sup> Y chca, tšëngaftanga judiëngbiamama Bëngbe Bëtsá echanjayana ndoñe tšabá šmonjama ca, ntšamo leyíñe yomandancá ndoñe šmotsama causa. Cha chca echanjama, er bëtscá ndoñe judiënga mondmëna y chënga ntšamo leyíñe yomandancá mondocumplina, pero chënga ndoñe quemátsmëna



tšëngaftangcá tétšenënga, jtsinýnama Bëngbe Bëtsábenga šmomnana. Tšëngaftanga, masque Bëngbe Bëtsabe uabemana ley šmondúabomna y chë más delicadentše base bobachtema tétšenënga šmondmëna, cabá ndoñe šmotsama ntšamo leyiñe iuayancá, ndayá jamama cmojtsamnama.

<sup>28</sup> Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canýe ndegombre judío. Y canýe entšá ndoñe Bëngbe Bëtsábia ntsemnana nýe ínýenga chë más delicadentše base bobachtema tmojatëtšama.

<sup>29</sup> Y canýe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnama tojtsinýanýnase. Y chca, canýe ndegombre judío, Bëngbe Bëtsabe entšá yomnama chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espíritu jamana entšá chca ainana chaotsebomnana, ndayá inétsinýanýnaye cha canýe ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entšá jtsemnana jëftsashjáchama, más tšabá yojtsemna canýe judío jtsemnana ca? ¿Base bobachtema chë más delicadentše tétšená jtsemnana becá yojtsámama ca?

<sup>2</sup> Aíñe, chca jtsemnana corente enduámama y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýé, nýetscangbiama chamotsinýenama.

<sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšënëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

<sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbétsama ndayá jamama tojašebuachenacá, masque nýetsca entšanga bosterënga chamotsomñe. Er Bëngbe Bëtsabe uabemana palabrenguiñe Bëngbe Bëtsabiama mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama mond-uamancá.)

<sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nýets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nýetsca quem luarentša entšangbiama, ntšamo tmojamcá tšabá o ndoñe tšabá bétsemnana.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinýanýiyama, y Bëngbe Bëtsá sempre ntšamo ndegombre yomncá tojtsamama jinýama entšanga tmojtsobenëse, ¿ndáyeca



Bèngbe Bètsá cabá iuichamo ntšamo atše tijamcá ndoñe tšabá yontsemna ca y atše canye bacna soye amá stsemna ca?”

<sup>8</sup> Y chcase, ndánaca mèntsá nanjáyana: “Ntšamo ndoñe tšabá yondmèncá mochjama, chca, entsanga chámuinye Bèngbe Bètsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabu-atambá ca; Bèngbe Bètsá chca abuatambayènga echanjácastigaye, ntšamo castigánènga jtsemnama imomerecencá.

*Ntšamo entsá tojtsamama, Bèngbe Bètsabe bominyiñe ndocná tšabia ntsemnana*

<sup>9</sup> Y asna, ¿Bèngbe Bètsá bènga judiènga ínÿengbiamá más tšabá šonya? ¡Ndoñe, ndegombre ndoñe! Atše ya sènjinyinýe judiènga y ndoñe judièngnaca, chë bacna soyènga jamama juabnèngaca mandánènga imomnama.

<sup>10</sup> Er Bèngbe Bètsabe uabemana palabrenguiñe mèntsá endayana: Ntšamo entsá tojtsamama, ndocná Bèngbe Bètsabe bominyiñe tšabia quenátsmèna.

¡Ndoñe, ndegombre ndoñe, ni mo canya chca quenátsmèna!

<sup>11</sup> Ndocná quenátsmèna ntšamo ndegombre yomncá chabotsosertánama; ¡Ndocná quenátsmèna nda chaotseboše Bèngbe Bètsáftaca jtsemnama!

<sup>12</sup> Nÿetscanga ndoñe tšabe benache tmojishache y chiñe montsajna. Chènga nÿetscanga Bèngbe Bètsabe bominyiñe tondayama quemátoservena.

Ndocná quenátsmèna ntšamo tšabá yomncá chaotsamama, ¡ni canya ndoñe!

<sup>13</sup> Ntšamo tmojtsichamcá puerte bèts bacna soye jtsemnana, mo canye obanabe cuevèshe atèfjnèshe puerte bacá tojtsonguètsecá.

Chènga tmojtsoyebuambná soyèngaca ínÿengbioye jtsaíngñayana.

Chë tmojtsichamo soyèngaca puerte bacna soye ínÿengbiamá jtsamana, mo canye mètscuaye tbojtseftètse orcá, chë veneno canye entsábioye jóbana.

<sup>14</sup> Chènga, nÿets tempo ínÿengbiamá podesca jtsichámuana, y sempre jtsóyebuambnayana chë ínÿenga ntšámnaca jáborlama.

<sup>15</sup> Sempre jtseprontánana ínÿengbioye ntšámnaca jáborlama y jobáyama.

<sup>16</sup> Chènga sempre jtsiyenana ínÿenga chamotsesufrínama jtsamèse, y nÿe ntšámnaca jtsaborlánana.

<sup>17</sup> Chènga ndocna te tondaye ntjamana nÿetscanga natjèmbana chamotsiyenama;

<sup>18</sup> Chènga ndoñe ntsiyenana Bèngbe Bètsabiamá jtsejuabnayèse, cha chë más bètsá nÿetscangbiamá yomnama ca –chiñe endayana.

<sup>19</sup> Er bènga mondétatsèmba, lempe ntšamo leyiñe iuabemancá, chë leyèngaca mandánènga imoyenèngbiamá yomnama. Chcasna, chë ley endmèna, Bèngbe Bètsabe delante ndocná chaondobená jayanama, cha ndoñe tšabá tonjama, chama ndoñe yonjátatsèmba causa ca; y endmèna jinyanÿiyama, ntšamo tmojamcá tšabá o ndoñe tšabá bétsemnama Bèngbe Bètsá nÿetscangbiamá yochjayana ora, nÿetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca.

<sup>20</sup> Er, Bèngbe Bètsá ndoñe queochatsma ndocná chabe bominyiñe tšabia chaotsemna, ntšamo leyiñe yomandancá cha tojamama; chë ley bèngbiamá jamana, nÿe bènga bacna soye tmojamama chamotsetatšèmbuama.

*Ntšamo Bèngbe Bètsá inama entsanga chabe bominyiñe tsábenga chamotsemnana*

<sup>21</sup> Pero mora, Bèngbe Bètsá tonjinyanýe ntšamo cha inama entsanga tsábenga chabe bominyiñe chamotsemnana; y Bèngbe Bètsá ndoñe ntjamana

canÿa chabe bominiÿiÿe tÿabia chaotsemnama, ntÿamo ibomncá cha tojtsamama, ntÿamo chë leyënguiÿe y mandënguiÿe yomncá. Pero masque mora chca, Bëngbe Bëtsá tonjinÿanyé, Moisesbe leyiÿe y Bëngbe Bëtsabe juabna oyebuambnayëngbe librëšangaÿe yopodena jinÿenana chca yochtsemnama.

<sup>22</sup> Bëngbe Bëtsá jamana entšanga chabe bominiÿiÿe tšábenga chamotsemnama, chënga Jesucristbeÿe tmojtsošbuáchema. Bëngbe Bëtsá nÿetscanga Cristbeÿe ošbuáchiyëngbiana chca jamana, y chabiana nÿetscanga cachcá monduámama;

<sup>23</sup> er nÿetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerte bëtsá jtsemnama, ntÿamo Bëngbe Bëtsá tojanjuabocá entšanga chamotsemnama.

<sup>24</sup> Pero Bëngbe Bëtsá chëngbiana corente tšabe juabna bómnayeca, mo ndayá cuafjatšatacá, cha jamana chënga chabe bominiÿiÿe tšábenga chamotsemnama. Bëngbe Bëtsá chca tojanma, Cristo Jesúsbeyeca, entšanga atsebácanënga chamotsemnama y ya ndoÿe más bacna soyënga jamama juabnëngaca mandánënga chamondëtsemnama cha tojanma ora.

<sup>25</sup> Bëngbe Bëtsá cha tbojanábuayana, chabe buiÿe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeÿe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominiÿiÿe chamotsemnama, chë entšanga bacna soyënga tmojanmama chë tempo ntjatonyáycá, er cha chë tempo corente uantado chëngaftaca yojtsemna y chëngbe bacna soyëngama ndoÿe yonjánacastigaye.

<sup>26</sup> Cha lempe chca tojanma, jinÿanÿiyama cha sempre ntÿamo ndegombre yomncá inétsamama, y nÿetscanga Jesucristbeÿe ošbuáchiyënga chabe bominiÿiÿe tšábenga chamotsemnama inétsamama.

<sup>27</sup> Chcáyeca, entšá ndoÿe ntsoberenana tondayama ntsenábotamnayana. Chca endmëna, er Bëngbe Bëtsá tšabia chabe bominiÿiÿe jabemana, ndoÿe ntÿamo leyiÿe tomandancá cha tojtsamama, sinó nÿe Jesucristbeÿe tojtsošbuáchema.

<sup>28</sup> Y chca jayanëse, mora bënga tšabá montsetátšëmbo, Bëngbe Bëtsá inétsama canÿe entšá tšabia chabe bominiÿiÿe chaotsemnama, nÿe Jesucristbeÿe tojtsošbuáchema, y ndoÿe ntÿamo leyiÿe yomandancá cha tojtsamama.

<sup>29</sup> ¿O Bëngbe Bëtsá nÿe judiëngbe Bëtsá yomna? ¿Ndoÿe judiëngbe Bëtsánaca cha ndoÿe yondmëna? Aíÿe, chëngbe Bëtsánaca cha endmëna;

<sup>30</sup> er nÿe canÿe Bëtsá nÿetscangbiana endmëna, y cha echanjama chë más delicadentse base bobachtema tëtšenënga imomnëngbiana y ndoÿe chcangbiámna, chabe bominiÿiÿe tšábenga chamotsemnama, Jesucristbeÿe tmojtsošbuáchema.

<sup>31</sup> Chcasna, Bëngbe Bëtsá jamana entšanga chabe bominiÿiÿe tšábenga chamotsemnama, Jesucristbeÿe tmojtsošbuáchema; ¿chca yojtsayana chë ley nÿe tondayama yondoservenaca? ¡Ndoÿe, ndegombre ndoÿe! Inÿetšá, chca jamana chë ley más chaotsámanama.

## 4

### *Ntÿamo Abrahánofata tojanopasá*

<sup>1</sup> Morna Abrahamiana mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeÿe ošbuáchiyana bomnentšana.

<sup>2</sup> Abraham chabe bominiÿiÿe tšabia chaotsemnama, ndayá cha tojanmama Bëngbe Bëtsá matënjanmëse, cha matënjanobená entšangbeÿe ndayama jtsenábotamnayana, pero Bëngbe Bëtsabe delante ndoÿe;

<sup>3</sup> Er Bëngbe Bëtsabe uabemana palabrenguine mëntšá endayana: “Abraham, Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominyiñe tšabia yojamna ca.”

<sup>4</sup> Canye entsá trabajayá, crocénana josháchiñana ndayá tojamama, pero chë crocénana ndoñe nye tšetánana ntsemnana, sinó chana jtsemnana ntšamo cha tojtsomerecencá.

<sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominyiñe tšabia yomna ca, pero aïne tojtsosbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiamá Bëngbe Bëtsá echanjama chabe bominyiñe tšabia chaotsemnana, chabe ošbuáchiyama.

<sup>6</sup> Rey David cachcá chabe librëšañe tojánayana, chë ndabiamá Bëngbe Bëtsá jayanana chabe bominyiñe tšabia chaotsemna ca, masque chabiamá chca cháuyanama tondaye tonjamëse. David chca entsabiamá tojánayana, cha puerte echantsoyejuaye ca.

<sup>7</sup> Chabe librëšañe mëntšá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga,

chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nye chë más delicadentse base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmënëngbiámna. Y muentse tmonjayana, Abraham Bëngbe Bëtsábeñe yojtsošbuachéyeca, Bëngbe Bëtsá tojánayana cha chabe bominyiñe tšabia yojamna ca.

<sup>10</sup> Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora.

<sup>11</sup> Y cabá chentšana, Abraham base bobachtema chë más delicadentse tëtšená yojtsemna; y chca yojamna jinyanüyama, Bëngbe Bëtsá tempo ya chabiamá tojánayana cha chabe bominyiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinyanüyama Abraham mo taitacá yomnama Bëngbe Bëtsábeñe imošbuachëngbiama, masque ndoñe base bobachtema chë más delicadentse tëtšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominyiñe tšábenga imomna ca.

<sup>12</sup> Y Abrahámna endmëna mo chë taitacá, chë más delicadentse base bobachtema tëtšenënga imomnëngbiama, pero aïne Bëngbe Bëtsábeñe corente jtsošbuáchiyëse imoyenëngbiama, cachcá ntšamo bëngbe bëtš taitá Abraham Bëngbe Bëtsábeñe yojtsošbuachecá. Y cha cabá chë más delicadentse base bobachtema ntsetëtšena ora, ya chca yojtsošbuáchiye.

*Jtsošbuáchiyëse, ntšamo Bëngbe Bëtsá tojašebuachenacá jóshjanguana*

<sup>13</sup> Bëngbe Bëtsá tojanašebuachená Abrahambiamá y chábentšana entsangbiama, quem luare chëngbiama yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca.

<sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiama yojtsemna ca tmojayanëse, Bëngbe

Bëtsábeñe jtsošbuáchiyana tondayama nantsoservena, y ntšamo Bëngbe Bëtsá tojanašebuachenacá tondaye ntsámanana.

15 Chë ley juabocnana, Bëngbe Bëtsá puerte etonaná entšanga cháuacastigama, chënga ntšamo chiñe iuayancá ndoñe tmontsamama; pero ndocna mandënga tontsemñese, ndocná ntsobenana chë ndoñe tontsayancá ndoñe ntjamana.

16 Y chca, Bëngbe Bëtsá Abrahámbioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahámbentšana entšangcá imomñëngbiama; y Bëngbe Bëtsá chca tojanašebuachená, cha chëngbe tšabiama iuantjéšnayeca. Chë mo Abrahámbentšana entšangcá imomñëngbeñe, ndoñe quemnatsmëna nÿe chë ntšamo ley yomandacá imnétsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachéngnaca. Y Abraham nÿetscanga bëngbiama, Bëngbe Bëtsábeñe ošbuáchiyënga, mo taitacá endmëna.

17 Ntšamo Bëngbe Bëtsábe uabemana palabrënguiñe endayancá, Bëngbe Bëtsá Abrahámbioye ibojtsatsësnaye ora: “Atše sënjama aca ba luariñe entšangbiama atšbe bominiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiamama yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

18 Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Acbentšana entšanga tša mallajta mochántsemna, ndocná queochatobenaye jacúntana ca”.

19 Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jýëngacñama, masque Abraham yojtsonÿaye ya bëtsanánëjema yojtsemnama, er ya mo patse uata yojtsebomna, y chabe shema, Sara, ndoñe yonjobena šešonga jtsabamnama.

20 Abraham ndocna te tonjanajbaná Bëngbe Bëtsábeñe ošbuáchiyana, y ni mo canÿe ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparëjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye,

21 er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnama.

22 Chíyeca, Bëngbe Bëtsá tojánayana cha chabe bominiñe tšabia yojamna ca.

23 Pero, chabe bominiñe tšabia yojamna ca Bëngbe Bëtsá tojánayana ora, ndoñe nÿe Abrahambiamama chca ntsóyebuambnayana;

24 ndayá bëngbiámnaca, ndëmuanÿëngbiama Bëngbe Bëtsá yochjayana chabe bominiñe tšábënga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama.

25 Bëngbe Bëtsá tojanalesenciá entšanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominiñe tšábënga jábiamama.

## 5

*Mora bënga Bëngbe Bëtsábe bominiñe tšábënga montsemna*



<sup>1</sup> Er Bëngbe Bëtsá tojama bënga chabe bominyiñe tšábenga chamotsemnama, bënga chábeñe imošbuachéyeca; mora tempcá tšabá Bëngbe Bëtsáftaca bënga montsatsmëna, Bëngbe Utabná Jesucristbeyeca.

<sup>2</sup> Bënga Crístbeñe mondošbuáchema, cha tojama bënga chamotsetatšëmbuama Bëngbe Bëtsá tša tšabia yomnama, y Bëngbe Bëtsábiocana tšabe soyënga jtsebomñese mora chamotsiyenama. Bënga tša oyejuayënga jésemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsëtsanga šochjábiamama, batšá ntšamo cachá yomncá.

<sup>3</sup> Y ndoñe nÿe chama bënga oyejuayënga jésemnana, ndayá bënga tmojtseufrina y padecena soyënguiñe tmojtsajna órnaca. Chca mondbama, er bënga mondetatšëmba bënga tmojtseufrina orna, bënga juatsjínÿana ntšamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse.

<sup>4</sup> Bënga padecena soyënguiñe tmojtsemna ora, más tšabá uantadënga jtsemnana mondobénayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tšabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojama ora, bënga jtsoobenana más jtsobatmanana, ntšamo šojašebuachenacá cha yochjamama.

<sup>5</sup> Bënga chca tmojtsobátmanëse, ndocna te nÿe bonamente quemochatobátmana, er Bëngbe Bëtsá šojinÿanyé tša bëtscá cha šuababuánÿeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

<sup>6</sup> Tempo bënga tondaye chemuatanobená jamana Bëngbe Bëtsabe bominyiñe tšábenga jtsemnana, y chora Cristo tojanóbana bënga chë bacna soyënga tmojamëngbe tšabiamama, nÿa chama tempo yojamna ora.

<sup>7</sup> Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntšamo chë leyiñe yomandancá jamama tojtsamanabiamama; pero, canÿa bëtscá jtšababuánÿeshanëse tšabe soyënga ínÿengbiamama tojtsamabiamama, nderádose chabiamama jóbanama cuantseprontana.

<sup>8</sup> Pero Bëngbe Bëtsá bënga šojanÿanyé tša šuababuánÿeshanama, er bënga cabá bacna soyënga ntsamcá imojoyena ora, Cristo bëngbiamama tojanóbana.

<sup>9</sup> Cristo, chabe buiñe juabuáshanëse bëngbiamama tojanóbanayeca, Bëngbe Bëtsá tojanma bënga chabe bominyiñe tšábenga jtsemnana. Y chca endmënayeca, ndegombre Cristo šochanjátsebacaye, entšanga ndoñe tšabá tmonjama ca y castigo chëngbiamama chaotsemna ca Bëngbe Bëtsá chaojayana ora.

<sup>10</sup> Bënga tempo Bëngbe Bëtsá imojanáya; pero cha tojanma bënga cháftaca tempcá tšabá chamotsatsmënama, chabe Uaquiñá tojanóbanayeca. Y mora, bënga natjëmbana cháftaca chamotsemnana ya tojama ora, ndegombre atsebácanënga mochántsemna, chabe Uaquiñá ainá yómnyayeca.

<sup>11</sup> Y ndoñe nÿe chca, ndayá bënga cháftaca puerte oyejuayënga chamotsemnámñaca Bëngbe Bëtsá jamana, ndayá Bëngbe Utabná Jesucristo bëngbiamama tojánmayeca. Y mora, chábeyeca Bëngbe Bëtsá tojama bënga cháftaca tempcá tšabá chamotsatsmënama.

### *Adán y Cristo*

<sup>12</sup> Canÿe entšá bacna soye tojanma causa, nÿetsca entšanga bacna soyënga amënga tmojábocana; y cha tojanóbana, bacna soyënga tojanma causa. Y chca, nÿetsca entšanga entsamna jóbanama, er nÿetscanga bacna soyënga tmojama.

<sup>13</sup> Bëngbe Bëtsá Moisésbioye chë leyënga cabá nduántšaboshjona ora, entšanga quem luarentše bacna soyënga tmojanma. Pero ndocna ley tontsemna ora, Bëngbe Bëtsá ndoñe ntjatonÿayana entšanga bacna soyënga tmojamama.



<sup>14</sup> Njetsca entsanga, Adánbentsana Moisésbentscoñe, njetscanga yojánamna jóbanama, ntšamo cach Adán tojanmcá ndoñe tmonjanmëngnaca, ntšamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entsanga mondobena jinýama, ntšamo chë jabama ibojamná canýe soyënguiñe yochtsanmëna.

<sup>15</sup> Pero ntšamo chë útata tbojanmcá ndoñe cachca soye quenátsmëna; er Bëngbe Bëtsá entsangbe tšabiama jtsejuabnayëse tšabe soyënga chëngbiana tojanma ora, ndoñe yonjamna mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tšëngaftanga šmondétatsëmbo, nýe canýe entsá canýe bacna soye tojanma causa, cha tojanma njetsca entsanga jóbanama chaotsamnana, pero Bëngbe Bëtsá entsangbe tšabiama yojuabnýe, más bëts soyënga jamana, chë Adanbe bacna soye entsangbiana bacna soyënga tojanmama. Chca, Bëngbe Bëtsá tojanma ba entsanga bëtsá tšabe soyënga chamotsebonnana; y chca tojama, nýe canýe entsá, Jesucristo, tšabe soyënga tojánmayeca.

<sup>16</sup> Chë ba entsanga bëtsá tšabe soyënga chamotsebonnana Bëngbe Bëtsá tojamentšana endóbocana soye, puerte inýetsá comna, chë entsá Adán, canýe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebonnana ibojtsemna ca, y njetsca entsángnaca chë causa; pero masque njetscanga bacna soyënga tmojama, Bëngbe Bëtsá entsangbe tšabiama ndoñe bëndëtsebnatjëmbayeyeca, tojanma entsanga chabe bominiñe tšábenga chamotsemnana y chë bacna soyëngama castigánënga ndoñe chamondëtsemnana.

<sup>17</sup> Ndegombre endmëna, canýe entsá bacna soye tojanma causa, njetsca entsanga jóbanama yojtsamna. Pero puerte más, canýe entsá Jesucristo tojanma. Ndëmuanýengbiana Bëngbe Bëtsá tojama bëtsá tšabe soyënga chamotsebonnana, ndëmuanýengbiana Bëngbe Bëtsá tojama chabe bominiñe tšábenga chamotsemnana, y Bëngbe Bëtsábiocana chca tmojóyëngacñënga, chënga njetscanga mochantsiyena bacna soyënga jtseyëñjanayëse y njetsca tescama mo bëtsëtsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canýe entsá, Adán, canýe bacna soye tojanmama, Bëngbe Bëtsá tojánayana njetscanga bacna soye tmojanma y castigánënga chamotsemna ca; cachcá ntšamo canýe entsá, Cristo, puerte tšabe soye tojánmayeca, Bëngbe Bëtsá jayanana njetscanga imojtsobena chabe bominiñe tšábenga jtsemnana y chë njetsca tescama yomna tšabe vida jtsebonnana ca.

<sup>19</sup> Y ntšamo Bëngbe Bëtsá tbojanmandacá ndoñe chaondëmama canýe entsá tojanma causa, njetsca entsanga bacna soye amënga tmojanobiama; cachcá, ntšamo Bëngbe Bëtsá tbojanmandacá canýe entsá, Jesucristo, tojánmayeca, Bëngbe Bëtsá tojanma bëtsá entsanga chabe bominiñe tšábenga chamotsemnana.

<sup>20</sup> Chë ley entsangbe cucuatšine tmojanáboshjona, jinýanýiyama ntšamo ndegombre yomna bacna soyënga jtsamana; pero entsanga más bacna soyënga imojtsama ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiana yojtsama.

<sup>21</sup> Chcasna, mora mochjayana, entsanga bacna soyëngaca puerte mandánënga imojamna, y chca, njetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entsanga chabe bominiñe tšábenga chamotsemnana, Bëngbe Utabná Jesucristbeyeca chë njetsca tescama yomna tšabe vida chamotsebonnana; chíyeca mora bënga montsobena jtsiyenama, Bëngbe Bëtsá šojatšatá tšabe soyënga lempe bëngaftaca jtsemnëse.

## 6

*Cristbeyeca bēnga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánjēshanama más chašotsinŷanŷnama, cha más bacna soyēnga bēnga jtsaperdónayēse?

<sup>2</sup> ¡Ndoñe, ndegombre ndoñe! Tempo bēnga monjanियena bacna soyēnga jamama juabnēngaca mandánēnga, pero mora bēnga montsobena jtsiyenana chē juabnēnga tondaye bēngbioye ntsamcá, y chca, bēnga montsobena mo obanēngcá chē soyēngama jtsemnana; y as, ¿ndáyeca bēnga muatjátsjuabnaye ntšamo ndoñe tšabá tontsemncá jatiyenana?

<sup>3</sup> Er ndegombre tšēngaftanga šmondētatsēmbo, bēnga uabáinēnga tmojanoquedá ora, tmonjaninŷanŷé bēnga Cristo Jesúseftaca cánŷiñe mo canŷacá bētsemnana; y bēnga uabáinēnga tmonjanoquedá ora, enjamna mo bēnga cuafjobancá, ntšamo Cristo tojanobancá.

<sup>4</sup> Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamot-sobenama mo tsēm entsangcá jtsiyenama, ntšamo Crísoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

<sup>5</sup> Bēnga Crísoftaca cánŷiñe mo canŷacá jtsemnēse, cha tojanóbana ora mo bēngnaca cháftaca cuafjobancá enjámnayeca, ndegombre bēnga cánŷiñe mo canŷacá cháftaca mochántsemna, bēnga cachiñe vida nŷetsca tescama chamot-satsbomnana Bēngbe Bētsá jtsamēse, ntšamo Cristo cháuatayenama cha tojanmcá.

<sup>6</sup> Y bēnga mondētatsēmbo, chē ntšamo bēngbe vida enjamncá, bacna juabnēngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chē tempsca vida chaóbanama cuafjamcá, Cristo tmojancrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnēnga jtse-pochócama; y chca, ya ndoñe más chē bacna soyēngaca mandánēnga chamondētsemnana, mo nŷets tempo nŷe ínŷabiama oservenēngcá.

<sup>7</sup> Er canŷe entsá tojóbana ora, chē bacna soyēnga chábioye ya ndoñe más ntsemándayana.

<sup>8</sup> Er Cristo tojanóbana ora, mo bēngnaca cháftaca cuafjobancá endménayeca, cháftaca jtsiyenámna bēnga montsošbuaché.

<sup>9</sup> Bēnga mondētatsēmbo Cristo cháuatayenama y ndocna te cha cachiñe jatóbanama Bēngbe Bētsá tojanmama; y ndocna obenana queochatsma cha cachiñe chauatóbanama.

<sup>10</sup> Cha tojanóbana, y chē bacna soye jamama juabnēnga ndocna te ntjobenayana chábioye jamándana, y ínŷenga ndoñe imontsobena ntšamo cha jabórlana; y ntšamo mora cha yoyencá, Bēngbe Bētsá jtse-servénama yomna.

<sup>11</sup> Cachcá, tšēngaftanga cmontsamna jtsejuabnayana, chē ya ndoñe más bacna soyēngaca mandánēnga šmojtsemnana, pero vida šmobomna lempe jtsamēse Bēngbe Bētsá tšēngaftangftaca oyejuayá chaotsemnana, Cristo Jesúseftaca cánŷiñe mo canŷacá jtsemnēse.

<sup>12</sup> Tšēngaftanga cmontsamna, chē bacna soyēnga jamama ainanentše šmobomna juabnēngaca ndoñe más mandánēnga ntsemnana, chca, tšēngaftanga ndoñe chašmondēt-samama juabnēngaca nŷe cach tšēngaftanga, tšēngaftangbe cuerpiñe tšabá jtsomñama.

<sup>13</sup> Tšēngaftanga ndoñe quecmátamna jalesénciana ndaye tšēngaftangbe cuer-pentša soye, bacna soyēnga jamama chaoservema. Chamna, tšēngaftanga cmontsamna Bēngbe Bētsá jauyanana, lempe ntšamo tšēngaftanga šmomncá,

cha jasérviamu chaotsemna ca, tsëngaftanga chë smomna mo ya ndoñe más obanëngcá Bëngbe Bëtsabiamu, y tojanma tsabe vida chašmotsebmomna; y jauyanana nyetsca tsëngaftangbe cuerpentša soyëngna Bëngbe Bëtsá jasérviamu yojtsemna ca.

<sup>14</sup> Ndoñe quecmátamna bacna soyëngaca mandánënga jtsemnana, er tsëngaftanga ndoñe quešmátiyena leyinë iuayana soyëngaca mandánënga, y smondoyena Bëngbe Bëtsá tsëngaftangbiamu tsabá jtsejuabnayëse.

*Ošbuachiyá obligaciónaca jtsemnana ntšamo tsabá yomncá jamama*

<sup>15</sup> Y asna, ¿bënga imojtsobena bacna soyënga jamana, chë leyinë iuayana soyëngaca ndëmandánënga imomnana, y Bëngbe Bëtsá bëngbiamu tsabá jtsejuabnayëse bënga imoyenama? ¡Ndoñe, ndegombre ndoñe!

<sup>16</sup> Tsëngaftanga tsabá smondëtatšëmbo, ínÿabe cucuatšinë mo nyets tempo nÿe ínÿabiamu oservenëngcá šmojoquedá ora, cha jtsobedecënana, ndegombre tsëngaftanga chë nduiñbiamu nyets tempo oservënënga jtsemnana. Chcasna, cachcá jtsemnana, chë tsëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñinë tsëngaftanga nyetsca tescamu obanënga cuaftsemncá, o Bëngbe Bëtsá jtsobedecënana, y chca, chabe bominiñinë tsábënga jabocanana.

<sup>17</sup> Pero šontsamna Bëngbe Bëtsá jtsatschuanayana, er tempo tsëngaftanga mo nÿe ínÿabiamu oservenëngcá šmojamna, bacna soyënga jamama juabnëngaca mandánënga; pero mora nyets ainánaca šmojoyeuná, ntšamo chë tcmojuanabatambá soyënguiñe šmojoyëngacñëcá.

<sup>18</sup> Bëngbe Bëtsá tsëngaftanga cmojatsebacá, bacna soyëngaca ndëmandánënga chašmotsebmomna, y morna mo Bëngbe Bëtsabiamu oservenëngcá šmojabocna, ntšamo tsabá yomncá jtsamama.

<sup>19</sup> Muentše sënjoyebuambá ntšamo entšanga mondbetsichamcá, er tsëngaftanga ndoñe corente juabna quešmátsbmomna toto palabrënga chacmósertama. Tempo, tsëngaftanga šmonjanamana jaleséciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tsëngaftanga cmontsamna jaleséciana tsëngaftanga chašmotsebmomna juabnëngaca mandánënga tsabe soyënga jtsamama, chca, ndegombre Bëngbe Bëtsabe entšanga chašmotsebmomna.

<sup>20</sup> Tsëngaftanga, cabá bacna soyënga jamama juabnëngaca mandánënga šmonjamna ora, tsëngaftanga ndoñe obligaciónaca quešmënjatsmëna ntšamo Bëngbe Bëtsabiamu tsabá yomncá játamama.

<sup>21</sup> ¿Ndaye tsabe soye tsëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtšëuatja. Chca soyënga tcojamentšana jóbcnana, entšá nyetsca tescamu castiganá chaotsebmomna, mo Bëngbe Bëtsabe bominiñinë nyetsca tescamu obaná cuaftsemncá.

<sup>22</sup> Pero mora, ndoñe quešmátsmëna bacna soyënga jamama juabnëngaca mandánënga, y mora bëtscá šmojtšentšëna Bëngbe Bëtsá jtseyeunanana y jtseservënana. Chca jtsamana, tsëngaftangbiamu puerte tsabá entsemna, er chca, Bëngbe Bëtsabe entšanga šmochántsemna, y cabana, chë nyetsca tescamu yomna tsabe vida šmochántsebmomna.

<sup>23</sup> Bacna soyënga tcojtsamentšana jóbcnana entšá nyetsca tescamu castiganá chaotsebmomna, mo Bëngbe Bëtsabe bominiñinë nyetsca tescamu obanënga cuaftsemncá; pero, Bëngbe Bëtsá šojtsatšatná soyënguentšana, jóbcnana chë nyetsca tescamu yomna tsabe vida jtsebmomna, Cristo Jesús Bëngbe Utabnáftaca cánÿiñe mo canÿacá jtsemnëse.

## 7

*Chë bouamnátbentsana ndayá bēngbiama mochjuatsjinjē*

<sup>1</sup> Jesucristbeyeca catsátanga, tsēngaftanga šmotátšēmbo ntšamo chë leyēnga entsangbiama inétsemnama; tsēngaftanga šmotátšēmbo, ntšamo chë leyiñe tojtsayancá canjē entsá chaotsamamna, nje chë entsá tojtsainēntscuana chábioye jtsemándayana.

<sup>2</sup> Chcasna, canjē bouamna shembása, ntšamo chë leyiñe endayancá bontsemna chabe boyáftaca jēftsemnana, chë boyá tuainēntscuana; pero chë boyá tojtsóbanēsna, chë leyiñe endayana, chë shemna canjā jtoquédana, chë boyabiama ndēmmandaná ca.

<sup>3</sup> Y chca, chë shema injē boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínñaftaca ingñayá ca. Pero chabe boyá tojtsóbanēse, chë leyiñe endayana chë shemna canjā jtoquédana, chë boyabiama ndēmmandaná ca, y cha jtsobenana ínñaftaca jtobouamayana; y chca tojama ora, boyábioye ínñaftaca ingñayana ndoñe ntsemnana.

<sup>4</sup> Tsēngaftanga chë ošbuachiyēngaftácnaca cachcá endmēna; ya ndoñe más chë léyeca mandánēnga quešmátmēna, er Cristo tojanóbana ora šmojánbocna, mo chë soyēngama obanēnga cuafjoquedangcá, ínñabe entsanga jtsemnama, Cristbēnga, ndabiama Bēngbe Bētsá tojanma cháuatayenama; y chca jtsemnēse, bēnga bētscá soyēnga ntšamo tsábá yomncá chamotsamama, Bēngbe Bētsá jaserviama.

<sup>5</sup> Bēnga chë nje ntšamo cabēnga innabošcá monjaniyena ora, chë ley enjanoservena bēngbe ainaniñe chamotsebomnama bacna soyēnga jamama puerte bēts juabnēnga, nje bēnga tsábá jtsomñama. Ba bacna soyēnga tmonjanma, y chë causa bēnga šonjánamna njetsca tescama castigánēnga jtsemnama, mo Bēngbe Bētsabe bominjñiñe njetsca tescama obanēnga cuaftsemncá.

<sup>6</sup> Pero mora Bēngbe Bētsá šojatsebacá chë léyeca ndēmmandánēnga chamotsemnama; chë ley tempo enjamna bēngbiama mo canjē amēndayacá. Pero mora bēnga chë leyama mo obanēngcá montsemna; chca, bēnga ndoñe chamondētsiyenama ntšamo tempo enjamncá, chë uabemana leyēngaca mandánēnga, y aíñe tsmēcá chamotsiyenama, ntšamo chë Uámana Espíritu iuamcá bēnga vida chamotsebomnama.

*Bacna soye jamama juabna tcojtsebomñese, chë ley jamana entsá bacna soye chaomama*

<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátmēna. Chë léyeca atše tsábá sēndētatsēmbo ndayá yomna bacna soye jamana. Atše ndocna te matijántatsēmbona ndayá yomna chë “ínñabioye jtsántšabošana”, “ínñabioye ndoñe cattsantšaboše ca” chë leyiñe ndoñe matmēnjanábemēse.

<sup>8</sup> Pero bacna soyēnga jamama juabnēnga atše bomna causa tonjanma, atše puerte chaitsebošama chë ndoñe šonjamna jtsebošana soyēnga; y chca chë juabnēngaca tonjanopasá, atše chë leyēnguiñe ndayá iuayanama jtsejuabnayēse. Er ndocna ley tondmēna ora, entsá ndoñe ntsetatsēmhuana ndayá yomna bacna soye jtsamana.

<sup>9</sup> Canjē tempo enjamna, chora atše sēnjaniyena leyēngama ntsetatsēmbcá, pero ntšamo leyiñe iuayancá sēnjanabuátmana ora, ndayá jamama ndoñe yonjamnama, atše sēnjanontsé chë bacna soyēnga jamama juabnēngaca mandaná jtsemnama;

<sup>10</sup> y chora atše sēnjántatsēmbona, chë causa šojtsanmēna njetsca tescama castiganá jtsemnama, mo Bēngbe Bētsabe bominjñiñe njetsca tescama obaná



cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nyetsca tescama castiganá jtsemnama.

<sup>11</sup> Chë leyentša mandinë inye soyënga ndoñe šonjëtsemna jamama ca yojtsayánayeca, chë bacna soyënga jamama juabnënga átšbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá.

<sup>12</sup> Pero bënga mëntšá mochjayana: chë ley na tšabe soye endmëna, er Bëngbe Bëtsábiocana tojanóbocna, y chë mandëgnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana.

<sup>13</sup> Y asna, ¿quem tšabe soye tojanma atše chašotsemna nyetsca tescama castiganá jtsemnama, mo Bëngbe Bëtsabe bominyiñe nyetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nyetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyetsca entšanga mondobena jinñana canye bacna soye, mo canye puerte bëtš bacna soyca.

<sup>14</sup> Bënga mondëtatšëmbo chë ley Bëngbe Bëtsabe ley yomnama, pero atšna nye canye entšá sëndmëna, canya nyets tempo nye bacna soyënga jamama juabnëngaca mandaná.

<sup>15</sup> Ndegombre ndoñe quešnátësertana ntšamo sëntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsogustancá.

<sup>16</sup> Pero chë atšbe ainaniñe stsejuabná ndoñe tšabá tontsemna soye stsamëse, ndayama leyinë iuayana ndoñe candmëna ntsamana ca, chca atše jtsinñanñayana chë ley ndegombre tšabe soye yomnama.

<sup>17</sup> Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama.

<sup>18</sup> Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama.

<sup>19</sup> Atše ndoñe quetsátama chë tšabe soye ndayá jamama sëndbošcá, pero aiñe sëntsama chë bacna soye ndayá jamama ndoñe sëndbošcá.

<sup>20</sup> Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

<sup>21</sup> Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama.

<sup>22</sup> Atšbe ainanoca puerte sëntsoyejuá, Bëngbe Bëtsábiocana yóbocana mandëngama.

<sup>23</sup> Pero atše sënjinñena inye soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soyca, mo chë bacna soyëngaca mandaná cuaftsemncá.



24 ¡Tša lastema atšbiamá! Chë bacna soye jamama juabnënga átšbeñe entsemánda, y entsama atše chašotsemna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá. ¿Nda nanjobenaye chentsana atše jatsbocama?

25 Nÿe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aiñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga sëntsama, ntšamo chë juabnënga šontsemadacá.

## 8

### *Ntšamo Bëngbe Bëtsabe Espiritu yomandacá jtsiyenana*

1 Y chca, Bëngbe Bëtsá ndoñe ntjayanana, Cristo Jesúseftaca cánÿiñe mo canÿacá imomnënga, chëngbe bacna soyëngama nÿetsca tescama castigánënga jtsemnama vojtsamna ca.

2 Er, chë Uámana Espiritoftaca mandánënga mondménayeca, Bëngbe Bëtsá šojatsebacá, bënga chë bacna soye jamama juabnëngaca mandánënga ndëtsemnama, y nÿetsca tescama castigánënga ndëtsemnama, mo Bëngbe Bëtsabe bominyiñe nÿetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebomnama, cánÿiñe mo canÿacá Cristo Jesúseftaca jtsemnëse.

3 Bëngbe Bëtsá tojanma ndayá Moisesbe ley ndoñe tonjanobenacá, er entsanga mondoyena nÿe ntšamo cachënga imobošcá, y nÿe cánÿenga ndoñe ntsobenana jamana ntšamo tojtsamncá. Bëngbe Bëtsá tojánayana entšángbeñe bacna juabnëngbe mando jtsepochoćama ca, y chama chabe Uaquiñá tbojanichmó. Cha quem luaroye mo canÿe entšacá tojánabo, canÿe ainánaca, mo chë entsanga bacna soye amëngbe ainancá, pero ndocna te ni mo canÿe bacna soye ndoñe tonjëftsema; y tojánabo, chábeyeca entsanga bacna soyëngama perdonánënga chamotsemnama.

4 Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espiritu ainaniñe yomandacá y ndoñe nÿe ntšamo bënga entsanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

5 Chë nÿe cachënga tšabá jtsomñama cachëngbe juabnëngaca imoyenënga, nÿe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espiritu ainaniñe iuamëndacá oyenëngna, siempre jésejuabnayana tšabe soyënga jamama, ntšamo chë Uámana Espiritu yobošcá.

6 Ntšamo chë nÿe cachá tšabá jtsomñama juabnëngaca mandaná oyenentsana jóbocnana entšá nÿetsca tescama castiganá chaotsemnama, mo Bëngbe Bëtsabe bominyiñe nÿetsca tescama obaná cuaftsemncá; y ntšamo chë Uámana Espiritu tojtsemandacá oyenentsana jóbocnana chë nÿetsca tescama yomna tšabe vida jtsebomnama y ainaniñe tšabe ebionana.

7 Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntsobenana;

8 y chca, chë nÿe chca bacna juabnëngaca oyenënga, ndoñe ntsobenana jamana ntšamo Bëngbe Bëtsá tšabá tbojtsinÿancá.

9 Pero tsëngaftanga ndoñe quešmátiyena nÿe cach tsëngaftanga tšabá jtsomñama cach tsëngaftangbe juabnëngaca, sinó šmojtsiyena ntšamo chë

Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana.

<sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entsanga bacna soyënga jtsamana causa, tšëngaftangbe espíritu nÿets tempo vida echanjesóbomñe, er Bëngbe Bëtsá tojama tšëngaftanga chabe bominiñe tšábenga chašmotsemnana.

<sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nÿe bënga tšabá jtsomñama cabëngbe bacna juabnëngaca;

<sup>13</sup> er nÿe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñe obanënga cuaftsemncá; pero Uámana Espíritbeyeca, chca juabnëngaca nÿetsca bacna soyënga jtsamana jtsajbanama šmojobenase, chë nÿetsca tescama yomna tšabe vida šmochántsebomna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básenga jtsemnana.

<sup>15</sup> Er Bëngbe Bëtsá ndoñe tonjama bënga ainaniñe canÿe espíritu chamotsebomnana, mo nÿe inÿabiana nÿets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básenga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama.

<sup>16</sup> Y chë Uámana Espíritu y bëngbe espíritu canÿe ora jayanana bënga Bëngbe Bëtsabe básenga imomna ca.

<sup>17</sup> Y Bëngbe Bëtsabe básenga mondmënayeca, bëngnaca mochanjójyëngacñe ndayá cha chabe básenga jatšatayama tojašebuachenacá; bënga y Cristo cánÿiñe chë soyënga mochanjójyëngacñe, er bënga inÿe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chášubiamama, ntšamo cach Cristo yomncá.

### *Bëngbe Bëtsá bëtsëtsanga y uámanënga šochjábiana*

<sup>18</sup> Atše ndegombre sëndëtatšëmbo, ntšamo quem tempo bënga imosufrincá, puerte batšatema yomna chë bëngbe tšabiama uámanana y buashinÿinÿanana Bëngbe Bëtsá šochjínÿanÿiyama.

<sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnana jinÿanÿiyama ora.

<sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canÿe te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha yojanjuabnacá;

21 Bëngbe Bëtsá canye te yochjama lempe ya ndoñe más chaondet-sopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinÿinÿanana jtsebomnana, cachcá yochjama lempe chë cha tojanma soyëngaca.

22 Er bënga mondëtatšëmbo lempe ntšamo Bëngbe Bëtsá tojanmcá mëntscoñama yomna mo canye shembása šešona jtsebomnana ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá.

23 Pero ndoñe nÿe chë lempe ntšamo Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtscá soyënga šochjátšatayentsana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebomnana.

24 Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonÿase, chora chama ya ndoñe ntjátobatmanëngana. Er ndocná jatobatmanana chë ndayá jinÿama ya tojobenacá.

25 Pero ndayama bënga tmobatmancá, cabá ndoñe jinÿama tmontsobena soye tojtsemnëse, bënga jtsamnana Bëngbe Bëtsábeñe jtsobatmanana, uantadënga jtsemnëse, ntšamo tojayancá Bëngbe Bëtsá chaomëntscuana.

26 Uámana Espíritnaca bënga šochandbétsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábioye bëngbiamna jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama.

27 Y Bëngbe Bëtsana, ntšamo entšanga ainanoca tmojtsebošcá yonÿá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiamna ibotjanañe, ntšamo Bëngbe Bëtsá yobošcá.

### *Bënga ayëñjanayëngama más tmojábocana*

28 Y bënga mondëtatšëmbo, Bëngbe Bëtsá nÿetsca soyënguiñe inétsama cha imobobonshánëngbe tšabiamna, ndëmuanÿenga cha tojáchembo chabe entšanga chamotsemnana, ntšamo cha jamama yojanjuabnacá.

29 Jesucrístbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninÿaná chënga chabe Uaquiñacá chamotsemnana; chca, chabe Uaquiñá chë bëtscá catsátangbeñe chë natsaná chaotsemnana.

30 Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiamna tojanma chabe bominÿiñe tšábënga chamotsemnana, y chëngbiámnaca yochjama chabe uámanana y obenanentsana chamotsebomnana.

31 Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca.

32 Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nÿetsca bëngbe

tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe sochanjátšataye.

<sup>33</sup> ¿Nda nanjobenaye jayanama chë Bëngbe Bëtsá tojabacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominyiñe tšábenga imomna ca.

<sup>34</sup> Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerta bëtsá chentše jtsemnana; y choca, chánaca bëngbiana Bëngbe Bëtsábioye ibotjanañe.

<sup>35</sup> ¿Ndayá nanjobenaye Crístbentšana, chë tša šondababuanýeshanábentšana bënga jtsajuánayana? ¿Padecena soyënguñe jtsemnana, tša jtsetsetšana, bënga chamosufrima ínýenga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiana tojtsemna ora, o bënga jtsëbáyama ínýenga tmojtseboše ora?

<sup>36</sup> Ntšamo Bëngbe Bëtsabe uabemana palabrenguñe endayancá, canýe entšá Bëngbe Bëtsábioye ibojauyana ora:

Acbe causa entšanga cada te šontsëtsëtsná bënga jtsëbáyama ca;

entšanga bëngbioye nýe ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nýetsca chë soyënguentsana bëngna ayëñjanayëngama más tmonejábocana, cha bënga šuababuányeshanayeca.

<sup>38</sup> Er atše tšabá sëndëtatšëmbo tondaye yondobena, bënga Bëngbe Bëtsábentšana, chë tša šondababuanýeshanábentšana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe;

<sup>39</sup> ndocna quem luarentša tsbanánoca soye, ni quem luarentša tajsoica soye; ni ndocna inýe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanýeshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanyé bonshánentšana!

## 9

### *Bëngbe Bëtsá Israeloca entšanga tojabacacá, uámanënga chamotsemnana*

<sup>1</sup> Atše, Crísoftaca cánýiñe mo canýacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama.

<sup>2</sup> Ndegombre, atše puerta ngménaca atšbe entšangbiana, chë Israeloquëngbiana séntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa.

<sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nýetsca tescama castiganá y Crístbentšana luaroca jtsemnana, atšbe entšanga, chë cach atšcá buiñe bomna entšanga jujabuáchama.

<sup>4</sup> Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiama y chë tša bëtsá y uamaná cha yomnana chënga tojaninýanyé. Bëngbe Bëtsá ba soye chënga tojanabuayená ndayá cha chëngbiana yojánboše y ndayá chëngbiana jamama, y chë ley chëngbe cucuatšíñe tojanáboshjona. Chënga monjántatšëmbo ntšamo



Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana.

<sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canýe entsacá, mo canýe Israeloca entsangbentsacá tojánabo; y cha endmëna Bëngbe Bëtsá, nýetsca soyënguiñe mandayá. Nýetsca entsanga nýets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nýetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna.

<sup>7</sup> Ni nýetsca Abrahámbentsana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniyana: “Chë ácbentsana entsanga nýe Isaácbensana mochanjabo ca.”

<sup>8</sup> Chca entsayana, bëngna ndoñe šontsamna jtsejuabnayana Abrahámbentsana nýetsca entsangbiamama mo Bëngbe Bëtsabe basengcá; inýetsá, nýe chë Bëngbe Bëtsá tbojanšbuachenáyeca Abraham yojánabamna básengbiamama cocayé entsemna jtsejuabnayana, Abrahámbentsana ndegombre entsanga bëtsemnama.

<sup>9</sup> Er mëntsá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntsá tempo entsba uata chanjésabo, y Sara canýe šësona bochántseboamna ca.”

<sup>10</sup> Pero nýe nýetsá ndoñe quenátsmëna. Chë Rebecbe uta básatna canýe taitá ibnabomna, bëngbe tempsca bëts taitá Isaac.

<sup>11-12</sup> Bëngbe Bëtsá, Rebécbioye tbojaniyana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinýinýiyama chë básatbensana canýa cha tbojánbocacama, Jacob, y ndoñe chë inýe basa, Esaú, chca jamama tempo cha tojanjuabóyeca. Rebécbioye chca tbojaniyana chë básata cabá ndonýna ora, y ni canýe basa cabá ndocna soye ndama ora. Y chca, ntšamo tojanopasacana, tojanopasá chë básatbensana canýa y ndoñe chë inýa chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama.

<sup>13</sup> Ntšamo Bëngbe Bëtsá chabe uabemana palabrenguiñe tojanayancá: “Jacob sënjanbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nýetscángaftaca endëtsemna ca? ¿Ndoñe, ndegombre ndoñe!

<sup>15</sup> Er Bëngbe Bëtsá Moisésbioye tbojaniyana:

Atše šochanjóngmia nda chaitsebošabiamama,

y nda chaitsebošá chanjalastéma ca.

<sup>16</sup> Y chca, Bëngbe Bëtsá canýe entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama.

<sup>17</sup> Er Bëngbe Bëtsabe uabemana palabrenguiñe, Faraón chë Egiptoca réybioye cha tbojaniyana: “Atše rey tcbonjábema, tša bëtscá atšbe obenana yomnama nýetscanga ácebeñe chayinýanýema, y nýets luarentša entsanga atšbiamama chamotatsšëmbonama ca.”

<sup>18</sup> Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiamama nduauenaná chaotsomñama.

<sup>19</sup> Pero ndánaca tsëngaftanguentšá šuatjatjaye: “Bëngbe Bëtsá chca tojtsemëse, ¿ntšamo cha nantsobena jayanana canýe entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?”



<sup>20</sup> Pero, nÿe entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canÿe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”?

<sup>21</sup> Chë fshantse soyënga pormayá jtsobenana canÿe fshantsentsana jamana, canÿe matbaja uámana tescama, y inÿajna cada te chaotsoservénama. Cachcá, Bëngbe Bëtsá jtsobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinÿanÿiyama entsángaftaca tbojánetnama, chëngbe bacna soyëngama; y yojáboše cha puerte obená yomnama jinÿanÿiyama. Chíyeca, chënga tša yojanëuantana, chënga chë ndëmuanÿengbiama Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanÿënga jtsapochócama Bëngbe Bëtsá yojtsanprontana.

<sup>23</sup> Y chánaca yojáboše jinÿanÿiyama cha puerte uamaná y bëtsá yomnama. Cha tojama, bënga chë ndëmuanÿënga cha šojanalastemá, chabe obenantšana y uámanantšana chamotsebomnama; y cha tempo chca tojanjuabó bënga uámanënga y bëtsétsanga jábiamama.

<sup>24</sup> Bënga mondmëna chë ndëmuanÿënga Bëngbe Bëtsá chama šojánachembo, inÿengna judío entsanguentšana, y inÿengna ndoñe judiëngbentsana.

<sup>25</sup> Ntšamo chabe uabemana palabrënguiñe, Oséasbe librëšañe Bëngbe Bëtsá tojanayancá:

Entšanga ndoñe átšbënga mondmënënga, chënga “atšbe entsanga ca” chantsëbobuatma;

y canÿe luarentša entsanga ndoñe sënjánababuanÿeshanënga, chëngna “atšbe bonshánënga ca” chantsëbobuatma.

<sup>26</sup> Y cach luare ndayentše Bëngbe Bëtsá tojánayana: “Tšëngaftanga atšbe entsanga ndoñe quešmátsmëna ca”,

cachentše Bëngbe Bëtsá ainá chënga echanjáuyana “atšbe básënga ca”.

<sup>27</sup> Israeloca entsangbiama, Isaías jabuachana tojánayana:

Masque Israeloca entsanga puerte banga chamotsemna, nÿa mo chë mar béjayoca chënÿañe cascajca,

Bëngbe Bëtsá nÿe báseftanga chentšana echanjátsebacaye;

<sup>28</sup> er, ndoñe bën y Bëngbe Utabná canÿe y nÿetsca tescama echanjayana,

nÿets quem luarentša entsangbiama ndayá chënga tmojamama tšabá o ndoñe tšabá bëtsemnama,

y chëngaftaca echanjama ntšamo chaojayancá ca –cha tojánayana.

<sup>29</sup> Ntšamo Isaías tojanayancá, Bëngbe Bëtsá Israeloca entsángaftaca ntšamo jamama tojanoyebuambá ora:

Bëngbe Utabná, nÿets obenana bomná,

inÿënga bënga jtsapochócama cha tojanalesenciá ora,

báseftanga bëngbe entsanguentšënga ainënga chamotsomñama ndoñe matënjanmëse,

bënga mora pochocánënga mamojtsemna, mo chë Sodoma y Gomorra pueblëngoca entsangcá ca,

cha nÿetscanga y nÿetsca tescama tojtsanapochócaye ca.

### *Israeloca entsanga y chë tsabe noticiënga*

<sup>30</sup> Chcasna, mora mëntšá mochjayana: ndoñe judiënga tondaye monjánama Bëngbe Bëtsabe bominiñe tšábënga jtsemnama, pero cha tojanma chënga chabe bominiñe tšábënga chamotsemnama, chënga chábeñe imojtsošbuáchiyama.

<sup>31</sup> Pero, Israeloca entsanga imojánboše Bëngbe Bëtsabe bominyiñe tsábenga jtsemnama, ntšamo chë leyiñe iuayancá jtsamëse; pero ndoñe chca tmonjanobená.

<sup>32</sup> ¿Y ndáyeca chca? Co chë Bëngbe Bëtsabe bominyiñe tsábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nye ntšamo leyiñe iuayancá jtsamëse. Y chca, chëngna Jesús tmojtsanaboté, ntšamo chë Bëngbe Bëtsabe uabemana palabrënguiñe chë tmojtsanábotengbiana endayancá, chëngbiana cha yomna mo chë ndëtsbé ndayiñe chënga jtsojestjiamcá ca.

<sup>33</sup> Bëngbe Bëtsabe uabemana palabrënguiñe cha chca tojánayana: Smochjinýe, atše sënjama Jerusalenentše canýa chaotsemna, y cha endmëna mo ndëtsbecá ndayentše chënga mochjojestje, y canýe peñëscá ndayëse yochjama chënga chamotsótsatsama; pero nda chábeñe tojtsošbuaché, ndocna te nye bonamente queochátobatmana ca.

## 10

<sup>1</sup> Jesucristbeyeca catsátanga, atše nyets ainánaca sëntseboše y Bëngbe Bëtsá sëntseimpadana, cha Israeloca entsanga cháuatsebacama.

<sup>2</sup> Atše sëndëtatšëmbo y sëntsobena chëngbiana jayanama, chënga puerte mondboše Bëngbe Bëtsá jaserviama, pero ntšamo chënga yojtsësertancá, ntšamo Bëngbe Bëtsá jaserviama yojtsamnamna, ndoñe quenátsmëna ntšamo ndegombre yomncá.

<sup>3</sup> Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tsábenga chamotsemnama, y cachënga tmojánguango ntšamo jamëse jobenayama Bëngbe Bëtsabe bominyiñe tsábenga jtsemnama; pero ndoñe chca tmonjanobená, chë entsanga chabe bominyiñe tsábenga chamotsemnama ntšamo Bëngbe Bëtsá inetsamcá ainánaca ntjoyëngacñëcá.

<sup>4</sup> Er Cristo tojama entsanga ndoñe chamondëtsama ntšamo leyiñe iuayancá, Bëngbe Bëtsabe bominyiñe tsábenga jtsemnama, chca, chënga chamobenama chabe bominyiñe tsábenga jtsemnama, Crístbeñe jtsošbuáchiyëse.

<sup>5</sup> Chë Bëngbe Bëtsabe bominyiñe tsábenga jtsemnama bošëngbiana, ntšamo leyiñe iuayancá jtsamëse, Moisés mëntsá tojánayana, chëngbiana tojanábema ora: “Nda tojtsama nyetsca mandënga ntšamo leyënguiñe endayancá, tsabe vida echántsebomna, nyets tempo chë leyëngaca mandaná ca.”

<sup>6</sup> Mëntsá endmëna ntšamo Bëngbe Bëtsabe uabemana palabrënguiñe iuayana, entsanga chabe bominyiñe tsábenga chamotsemnama ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama);

<sup>7</sup> o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).”

<sup>8</sup> Ntšamo Bëngbe Bëtsabe uabemana palabrënguiñe iuayancá mëntsá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca.

<sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyets ainánaca tcojtsošbuáchese, Bëngbe Bëtsá cmochjatsbocá ca.

10 Er ainanoca bënga Jesucristbeñe jtsošbuáchiyana y Bëngbe Bëtsá ja-  
mana cachabe bominyiñe tšábenga chamotsemnama; palabrëngaca bënga  
jinÿanyiyana ndegombre Jesucristbeñe imojtsošbuáchema, y Bëngbe Bëtsá  
bënga jätsebacana.

11 Er Bëngbe Bëtsabe uabemana palabrënguiñe mëntšá endayana: “Nda  
Bëngbe Bëtsábeñe tojtsošbuaché, ndocna te nÿe bonamente queochátobatmana  
ca.”

12 Judiënga y ndoñe judiënga atsebácanënga mondmëna cach sóyeca, er canÿe  
Utabná nÿetscangbe Utabná endmëna, y cha tmojtsošbuanëngbiama, cha  
bëtsá jtsamana.

13 Er Bëngbe Bëtsabe uabemana palabrënguiñe mëntšá endayana: “Ndánaca  
Bëngbe Utabná tbojtsošbuanábioye, cha bochanjatsbocá ca.”

14 Pero, ¿ntšamo cha mochjótšëmbona, chábeñe ndoñe tmontsošbuáchese?  
¿Y ntšamo chábeñe mochtsošbuáchiye, chabiama jóyebuambayama ndoñe  
tmonjouenëse? ¿Y ntšamo chabiama mochjouena, chabe buayenana soyënga  
chënga jáuyanama ndocná tontsemnëse?

15 ¿Y ntšamo chabe buayenánana mochtsabuátambaye, chëngbioye  
jíchamuama ndocná tontsemnëse? Ntšamo Bëngbe Bëtsabe uabemana  
palabrënguiñe endayancá: “¡Tša tšabá chë buayenánana abuátambayënga  
tmojáshjajna ora ca!”

16 Pero nÿetscanga chë tšabe noticiënga ndoñe ntjoyeunayana. Cach Isaías  
mëntšá tojánayana: “Utabná, ¿nda chë mondabuayiyná soyënguiñe yojt-  
sošbuaché ca?”

17 Chcasna, chë tšabe noticiënga jouenëse, entsanga jobenayana Jesu-  
cristbeñe jtsošbuáchiyana; y nda Cristbíama tojtsabuayiynase, entsanga chabe  
buayenánana jouenana.

18 Pero atše šcotjá: ¿ndegombre nandmëna judiënga chë buayenánana  
ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe  
Bëtsabe uabemana palabrënguiñe endayancá, chë Bëngbe Bëtsabe buayenana  
soyëngama oyebuambnayëngbiama:

Chëngbe oyebuambnayana nÿets quem luariñe tojóshjango,

y chëngbe palabrënga nÿets luarënguentša entsangbenache tojuáshana ca.

19 Pero cachiñe šcotjá: ¿Israeloca entsanga chë buayenánana ndoñe ton-  
janësertá ca? Natsana, Moisés mëntšá tojánayana, chë ndoñe judiënga Jesu-  
cristbeñe tmojtsošbuaché ora, ntšamo chë judiënga mochtsanjuabnayama  
tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache  
soyëngama tšëngaftanga chašmotsíyentšbuašama, chënga chë ndoñe  
monjamna mo tšëngaftangcá atšbe entsanga.

Atše chca chanjama chëngaftaca, chënga chë tempo Bëngbe Bëtsabe soyëngama  
ndoñe tonjanësertá ca.

20 Isaíasnaca, Bëngbe Bëtsabíama tojanoyebuambá ora, puerte añémoca  
tojánayana:

Chë atše ndoñe šmondënguanga, šmonjínÿena;

y chë atšbíama ndoñe mondënotíciangbioye sënjenonÿinÿé ca.

21 Pero Israeloca entsangbiama mëntšá tojánayana:

Nÿets tempo atše tša sënjánama, chënga átšeftaca tšabá tempcá chamot-  
satsmënama,

pero chënga ndoñe chemátanbošena jouenama, y atšbe contra monjëtsemna  
ca.

# 11

## *Bëngbe Bëtsá, Israeloca entsangbiana tsabe juabna yobomnama tojinjanyé*

<sup>1</sup> Y as mora şcotjá: ¿Bëngbe Bëtsá chabe entsanga tojtsanëbaté? ¡Ndoñe, ndegombre ndoñe! Cach atşe canye Israelocá sëndmëna, Abrahábentšana entsá y Benjaminbe bëts pamillentšana entsá.

<sup>2</sup> Bëngbe Bëtsá chabe entsanga ndoñe tonjubaté, chë tempšana tojánabacacanga. Tşengaftanga şmondëtatşëmbo ntşamo Bëngbe Bëtsabe uabemana palabrënguiñe endayancá, Bëngbe Bëtsabe juabna oyebuambnayá Elías, Israeloca entsangbe contra Bëngbe Bëtsábioye cha ibojanatsëtná ora:

<sup>3</sup> “Bëngbe Utabná, acbe juabna oyebuambnayënga tmojtsëbaye y acbiana pormana altarënga tmojtsepochohá; nye atşe vídaca tijoquedá, y chënga montseboşe átşnaca jóbama ca.”

<sup>4</sup> Y mëntşá Bëngbe Bëtsá tbojanjúá: “Atşe canyşefta uaranga boyabásenga atşbiana sënjacuedá, Baal ndoñe tmonjadoranga, ndayá entsanga tmojobopormá y imojtsejuabná canye dios yomna ca.”

<sup>5</sup> Mórncaca cachcá entsemna, judiënguentşe báseftanga monduájamna Jesucristbeñe oşbuáchiyënga, ndëmuanyënga Bëngbe Bëtsá tojabacacá, cha chëngbiana tsabe juabna bómnyeyeca.

<sup>6</sup> Bëngbe Bëtsá entsanga jabacacayana chëngbiana tsabe juabna bómnyeyeca; y ndoñe chca ntjamana ndayá entsanga tmojamama. Er ndayá tmojamama Bëngbe Bëtsá entsanga tojábacacase, cha nanjínyanyiye cha chca inétsama, ndoñe nye chëngbiana tsabe juabna bómnyeyeca.

<sup>7</sup> ¿Y asna? Israeloca entsanga ndoñe chemátaninyëna ntşamo Bëngbe Bëtsabe bominyiñe tsábenga jtsemnana, pero chënguentşënga básefta bocacánëngna aíñe tmojanobená. Bëngbe Bëtsá tojanalesenciá chë ín्यënga Israeloquënguentšana chabe buayenana soyënga ainaniñe ndoñe chamondóyëngacñama;

<sup>8</sup> ntşamo Bëngbe Bëtsabe uabemana palabrënguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinýana ni josértana, mo nduabínynënga o nduauenanënga cuaftsemnëngcá ca.”

<sup>9</sup> Davídnaca chëngbiana mëntşá tojánayana: Mo chë entsanga canye fiestentşe oboyejuayënga, chëngbe uayayëngbeyeca nye ndeolpe ishëchenëngcá, y mo chë bayëngbiana uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtşbeñe cuaftsojestjá.

Chca Bëngbe Bëtsá chaoma, chëngbe bacna soyëngama; y cha cháuyana chënga puerte castigánënga jtsemnana yojtsamna ca, bacna soyënga tmojama causa;

<sup>10</sup> Bëngbe Bëtsá chaoma ntşamo mochjapásama chënga ndoñe chamondobená jtsetatşëmbuana, y chaoma puerte chamosufrima, nyets tempo padecena soyënguiñe jtsiyenëse ca —cha tojánayana.

## *Bëngbe Bëtsá ndoñe judiënga tojatsebacá*

<sup>11</sup> As mora şcotjá: ¿Israeloca entsanga Bëngbe Bëtsá ndoñe tmonjanoye-uná ora, cha tojánayana chënga nyetsca tescama castigánënga jtsemnana yojtsamna ca, ndocna inye soye chëngbiana ntsemncá? ¿Chëngbiana yojamna mo chë ndëtşbeñe jójëstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátşmëna. Chënga Bëngbe Bëtsá



ndoñe chematanoyeuná causa, ndoñe judiënga tmonjántatšëmbona ndayá bétsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše.

<sup>12</sup> Judiënga bacna soyënga tmojanma causa, inÿe entsanga quem luarentše tmojobená ba tšabe soyënga jtsebomnama. Chë judiënga tmonjanorreba já causa, chë ndoñe judiënga ba tšabe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nÿetsca entsangbiana echántsemna.

<sup>13</sup> Ntšamo mora chanjayancá, tšëngaftanga ndoñe judiëngbiana entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerta uámana trabajo stsebomna ca.

<sup>14</sup> Atše sëntsobátmana, quem trabájoca atše jobenayana jamama chë cach atscá buiñe bomna entsanguentsënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuaše, y chca, ndayá tijamama, Bëngbe Bëtsá chënguentšana báseftanga cháuatsebacama.

<sup>15</sup> Er chë judiënga Bëngbe Bëtsá tojtsanëbaté ora, cha tojanma inÿe entsanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nÿa chënga mo obanënga cuabmëncá y cuaftsatayanëngcá.

<sup>16</sup> Nda canÿe arninÿentšana chë natsana tandëse Bëngbe Bëtsabiana josérviana yojtsemna ca tojayanëse, jtsemnana mo nÿetsana chabiana cuaftsemncá. Canÿe betiyentša tbëtëjënga Bëngbe Bëtsabiana yojtsemna ca canÿa tojayanëse, nÿetsca chë betiyentša buacuafjëngnaca Bëngbe Bëtsabiana jtsemnana.

<sup>17</sup> Chë judiënguentše báseftanga Jesucristbeñe ndoñe montsanošbuaché ora, tšëngaftanga chë ndoñe judiënga šmonjanobená chábeñe jtsošbuachiyana. Y chca, judiënga monjamna mo canÿe jena olivo betiyentšana entsanga tmojatëtše buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebomna, mo chë jena buacuafjënga y cachentša buacuafjënga cach tbëtëjentsana lempe cuaftsoyëngacañcá.

<sup>18</sup> Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebomnama, chë Jesucristbeñe ndoñe montsanošbuaché judiëngbiana yojamna soyënga. Smochtsejuabnaye, buacuafjëngna chë tbëtëjëngayeca vida jtsebomnana, y ndoñe tbëtëjënga chë buacuafjëngayeca; cachcá, tšëngaftanga nÿe Bëngbe Bëtsábeyeca chë tšabe soyënga šmojtsebomna.

<sup>19</sup> Pero tšëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsëjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jóyëngacñana ca.”

<sup>20</sup> Ndegombre, chënga Jesucristbeñe ndoñe montsanošbuaché causa, mo buacuetëtšënfjëngcá tmonjanoquedá, pero Jesucristbeñe šmojtsošbuachema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebomnana.

<sup>21</sup> Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entsanga bétsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena



buacuafjēngcá šmognēnga, cha cach ndoñe quecmochátaperdonaye, chábeñe ošbuáchiyana šmojtsajbanase.

<sup>22</sup> Bětscá šmochtsejuabnaye Běngbe Bětsá puerte tšabia yomnama, pero cha tšatjayá yomnámna šmochtsejuabnaye; tšatjayá endmēna chē bacna soyēnga tmojtsamēngaftaca, pero tšēngaftangaftacna puerte tšabia. Cha tšēngaftangaftaca chca echántsemna, tšēngaftanga chca chašmojtsomerecēnēntscuana; pero ndoñesna, Běngbe Bětsá echanjama tšēngaftāngnaca mo buacuetētšēnēfjēngcá chašmoquedama, chē tšabe bendicionēnga Běngbe Bětsábentšana ntsoyēngacañcá.

<sup>23</sup> Y ntšamo mora imojtsejuabnacá chē judiēnga tmojatrocá y tmojontšé Jesucristbeñe jtsošbuáchiyana, chēngnaca cachiñe chē tšabe bendicionēnga Běngbe Bětsábentšana mochanjójyēngacñe, y mochántsemna mo betiyiñe jena buacuafjēngcá, er Běngbe Bětsá becá obenana endbomna jamama ntšamo chē judiēnga tempo imojobomncá cachiñe chamotsatsbomnama.

<sup>24</sup> Chcasna, más paselo jtsemnana canye jena olivo betiyentša buacuatētšēnēfja cach betiyiñe jétsjena, y ndoñe, chē tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chē Jesucristbeñe ndoñe montsošbuaché judiēngbiama, jóntšana jtošbuáchiyana y tšabe bendicionēnga Běngbe Bětsábentšana jójyēngacñana, tšēngaftanga ndoñe judiēnga chē tempo Běngbe Bětsá ndoñe šmonjanábuatmēngbiama.

#### *Běngbe Bětsá njetścāngaftaca puerte tšabia endmēna*

<sup>25</sup> Jesucristbeyeca catšátanga, atše sēntseboše tšēngaftanga chašmotsetátšēmbó chē tempo Běngbe Bětsá entšanga ndoñe tonjaninyanýe soyēngama. Atše sēntseboše tšēngaftanga quem soyēngama chašmotsetátšēmbó, chca, tšēngaftanga ndoñe judiēnga chē judiēngbiama más uámanēnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninyanýecá, quem soye endmēna: Běngbe Bětsá tojalesenciá, nye baseftatescama banga Israeloquēnga Běngbe Bětsabe soyēnga ainaniñe ndoñe chamondóyēngacñama; pero chca echántsemna, chē ndoñe judiēnguēntše atsebácanēnga jtsamnama imognēnga, atsebácanēnga chamojtsemnēntscuana.

<sup>26</sup> Chca chaojopasá ora, njetšca Israelentša entšanga atsebácanēnga mochántsemna; ntšamo Běngbe Bětsabe uabemana palabrenguiñe endayancá: Entšangbe atsebacayá Israelocana echanjabo, y echanjama njetšca Jacóbēbentšana entšanga ndoñe más vida chamondětsebomna, bacna soyēnga jtsamēse ca.

<sup>27</sup> Y mēntšá endmēna ntšamo chēngbiama chjašebuachená:

chēnga játsebacana, chēngbe bacna soyēngama chaijaperdónaye ora ca —chiñe endayana.

<sup>28</sup> Chē tšabe noticiēnga tmojtsanaboté causa, judiēnga Běngbe Bětsabe uayayēnga mondmēna, chca, tšēngaftangbe tšabiama chaotsemnama. Pero Běngbe Bětsá tojánabacacayeca, chēngnaca Běngbe Bětsabe bonshánēnga mondmēna, er Běngbe Bětsá chēngbe tempsca uamana bēts taitanga chca tojanašebuachená.

<sup>29</sup> Chca endmēna, er Běngbe Bětsá ndocna te juabna ntjatrócana; njetścanga chabe entšanga chamotsemnama tojáchembēnga, njetš tempo cha echántsabuanýeshana, y echanjama chēngbeñe tšabe bendicionēnga chaotsemnama.

<sup>30</sup> Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa.

<sup>31</sup> Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecénënga, chca, Bëngbe Bëtsá chéngnaca cháualastemama.

<sup>32</sup> Er Bëngbe Bëtsá tojinýanýé, cha ndoñe ntjoyeunayama juabnéngaca nyetscanga mandánënga imomnama, chca, nyetscanga jálastemama cha jobenayama.

<sup>33</sup> ¡Ndegombre, Bëngbe Bëtsá nyetscangbiana puerte tšabia endmëna, puerte osertaná y puerte obiashjá! Ndocná quenátobena ínýenga jábuayenama ndayá Bëngbe Bëtsá jamama inetsejuabnáyca, y ndocná quenátobena corente josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana palabrënguiñe endayancá: Ndocná quenátstatsëmbo ntšamo Bëngbe Bëtsá inetsejuabnáyca; ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiana ndebená cha jatsmënama, y chë ndebënana ndayánaca jtoyiyama chabotsemnana ca.

<sup>36</sup> Er lempe cha tojama, lempe cha iútabna, y lempe chabiana yomna. ¡Nyetscanga nyetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénama*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórana ca, Bëngbe Bëtsá jadórana mo ndayá cuafjobacá y cuafjuatšëmboncá, mo cabá ainá cuafstomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnana. As, chca chašmojtsama ora, ndegombre oyejuayá Bëngbe Bëtsá šmochántsebiamnaye.

<sup>2</sup> Ndoñe šmattsiyena jtsamëse ntšamo chë nye quem luarama enójuabnaye entšanga monduamancá, y smochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga smochanjobenaye jtsejuabnayana y smochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnana.

<sup>3</sup> Ndayá Bëngbe Bëtsá atšbiana tšabá jtsejuabnayëse šojatšetama, nyetsca tšëngaftanga chochjáuyana, ndocná cachabiana chaondëtsejuabná más uamaná yomna ca, nye ntsachetšá jtsenójuabnayana ibomna nyetšá. Más tšabá, cada ona cachabiana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiana chaotsetrabájama.

<sup>4</sup> Er, ntšamo bënga cada ona mondbomna canye cuerpo y chë cuerpiñe ba soyënga jtsebomnana, y nyetsca soyënga ndoñe cach soyama cuerpiñe ntsooservénana,

<sup>5</sup> cachcá bënga ošbuáchiyënga, masque bëtscanga imomna, Crístoftaca cánýiñe mo canýacá mondmënayeca, bënga mondmëna mo chabe cuerpo cuafstsemncá, y cada ona cánýiñe mo canýacá nyetscángaftaca.

<sup>6</sup> Bëngbe Bëtsá tojama bënga cada ona chamotsebomnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiana

inajuabnaycá. Y chabe juábnaca bēnga jtsóyebuambnayama jtsobenama Bēngbe Bētsá tojamēse, chca mochtsama ntsachetšá chábeñe bēngbe ošbuáchiyana yomncá.

<sup>7</sup> Ošbuáchiyēnga bētsá jaserviama bēnga chamotsobenama Bēngbe Bētsá tojamēse, chca mochtsama. Tšabá jtsabuátambayama bēnga chamotsobenama Bēngbe Bētsá tojamēse, chca mochtsama.

<sup>8</sup> Inyēnga jañémuama bēnga chamotsobenama Bēngbe Bētsá tojamēse, chca šontsamna. Lempe ntšamo bēnga tmobomncá inyēngbiámnaca chaotsemnama bēnga jamama chamotsobenama Bēngbe Bētsá tojamēse, nyets ainánaca chca šontsamna. Amēndayēnga jtsemnama bēnga chamotsobenama Bēngbe Bētsá tojamēse, šontsamna bētsá jamana tšabá jtsamēndayama. Inyēnga jálastemama bēnga chamotsobenama Bēngbe Bētsá tojamēse, šontsamna oyejuayēnga chca jamana.

*Ntšamo bēnga Jesucristbeñe ošbuáchiyēnga jtsamana šojtsamna*

<sup>9</sup> Inya chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama.

<sup>10</sup> Cmontsamna nyetscanga puerte jtsenbobonshánana, Jesucristbeyeca catšátanga quetsomñecá, chē inyēnga bēngbiama más uámanēnga imomna ca jtsejuabnayēse.

<sup>11</sup> Ndoñe oyēnjayēnga šmattsemna, ndayá bētsá Bēngbe Utabnabiama šmochtsetrabájaye; ainaniñe corente añemo jtsebomnēse, Bēngbe Utabná sempre šmochtseserverna.

<sup>12</sup> Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtsachñējuana ora, puerte uantadēnga šmochtsemna, y siempre Bēngbe Bētsáftaca šmochtsencuéntaye.

<sup>13</sup> Bēngbe Bētsabe entšanga opresido bomnēnga šmochjújabuache, y šmochtseprontana tšēngaftangbe yebnentše posada inyēnga júyentšamiama.

<sup>14</sup> Bēngbe Bētsá šmochtseimpadana, chē tšēngaftanga chašmosufrima amēngbiama tšabe bendicionēnga cha chaotsamama; aíñe, cha šmochjaimpáda tšabe bendicionēnga chēngbiama chaotsamama, bacna soyēnga ndoñe.

<sup>15</sup> Oyejuayēnga inyēngaftaca šmochtsemna, chēnga oyejuayēnga chamojtsemna ora; ngménaca šmochtsemna, inyēnga ngmēniñe chamojtsemna ora.

<sup>16</sup> Smochtsiyena nyetscanga jtsenēyeunanēse. Nye cach tšēngaftanga uámanēnga ndoñe šmattsenobiamnaye, sinó chē nduámanēnga imomnéngaftaca tšabá mándbomnēnga šmochtsemna. Ndoñe šmattsejuabnaye yapa osertánēnga šmomna ca.

<sup>17</sup> Inyēnga bacá chacmojtsaborlana ora, ndoñe šmattsatēchénanguaye; corente šmochtsentšena ntšamo nyetsca entšangbiama tšabá yomncá jtsamama.

<sup>18</sup> Ntsachetšá šmojobenacá, lempe šmochtsama natjēmbana nyetsca entšángaftaca jtsiyenama.

<sup>19</sup> Atšbe bonshánēnga, inyēnga bacá chacmojtsaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguiñe cha tojánayana: “Atše chanjama chēnga chamosufrima, inyēnga chamosufrima tmojama causa; y chēnga chanjácastigaye, inyēngbioye bacá tmojaborlá causa ca.”

<sup>20</sup> Chca játamamna, mēntšá šmochjama, ntšamo cachánaca tojanayancá:

Acbe uayayá tbojtseshēntsānēse, saná cochjacaredáda,  
y tbojtsajuendase, cochjuáfsiye.

Chca chacojamēse, cochanjama cha puerte chaotsēuatja ntšamo tcmojabor-  
lama,

y ainana corente chabotsetšena, mo chebana iñbenga chabe bestšašiñe cuaf-  
jacjacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšēngaftanga chac-  
mayénjanama. Chamna, ntšamo tšabá yomncá jtsamēse, chē ndoñe tšabe  
soye šmochjayénjaná.

## 13

<sup>1</sup> Njētsca entsānga entsamna jtsamana ntšamo chē amēndayēnga tmo-  
jtsamēndacá, er ndocná obenana ntsebomnana, Bēngbe Bētsá ndoñe chca  
tbonjalesenciase, y nje Bēngbe Bētsá tojama amēndayēnga obenana chamot-  
sebomnama.

<sup>2</sup> Chca, chē amēndayēngbe contra tmojtsemnēngna, ntšamo chaotsemnana  
Bēngbe Bētsá tojayancá contra chēnga jtsemnana; y chca contra tmojt-  
semnēngna, castigānēnga mochántsemna;

<sup>3</sup> er ntšamo tšabá yomncá amēnga, ndoñe quenátamna ndayama chē  
amēndayēnga jatebēuatjana, nje chē bacna soye amēngna aíñe. Tšēngaftanga  
šmojtseboše jtsiyenama chē amēndayēngbioye ntjatebēuatjca; chcasna,  
ntšamo tšabá yomncá šmochtsama, y chē amēndayēngna tšabe bomínjēca  
mochantsonyaye ntšamo chašmojtsamcá;

<sup>4</sup> er chē amēndayēngna Bēngbe Bētsabe trabajo amēnga mondmēna,  
tšēngaftangbe tšabiama. Pero bacna soyēnga šmojtsamēsna, cmontsamna  
jtsiyenana chē amēndayēnga jtsebēuatjēse, er chēnga jacastígama obenana  
mondbomna, y chca mondbétsama. Chēnga, Bēngbe Bētsabe mándoca jayanana  
chē bacna soye amēnga ndoñe tšabá tmonjama ca, y jamana chēnga  
chamosufrima.

<sup>5</sup> Chíyeca, jtseytana ntšamo chē amēndayēnga tmojtsichamcá jtsamana,  
pero ndoñe nje chē castigo ndoñe chašmondētsebomnana, ndoñe chca  
šmontsama causa, sinó chē ainanentša tšabe juabnēnga ntšamo tbo-  
jtsētsētsnacá joyeunayama yómnyayeca.

<sup>6</sup> Cachca soyēngama, amēndayēngbiama impuesto tšēngaftanga  
jtsatsquécjnayana; er chē amēndayēnga Bēngbe Bētsabe oservénēnga  
mondmēna, ntšamo chiñe jtsamama tojtsamncá corente tmojtsentšena  
ora.

<sup>7</sup> Chcasna, tšēngaftanga šmochjáyentšbuachiye ntšamo chēnga jtsebom-  
nama tojtsamncá. Chē crocénana entsānga ayēngacayēngbioye, ndaye im-  
puétnaca šmochtēbuénaye; chēngna šmochtsarrespetana ntšamo yomncá, y  
chēnga uámanēnga chamotsemnana šmochtsejuabnaye.

<sup>8</sup> Crocénana inya jētsēntšabuáchiyama chacmojtsamnēse, nje ntoyiyca ndoñe  
šmatjoquéda, njēts tempo ndebénēnga; nje quem soye sempre šmochtsama:  
njētscanga šmochtsenbobonshana; er nda ndēmua entšábioye tbojtsebobon-  
shana, ya tojama ntšamo leyiñe yomandancá.

<sup>9</sup> Quem mandēnga, “acbe shema inyaftaca ndoñe cattseíngñaye, inya ndoñe  
catjóba, ndoñe catjatbēba, inya tojtsebomna soye ndoñe nje acbiama cattse-  
boše”, y chē inye mandēnga leyiñe lempe quem mandiñe entsemna: “Ndēmua  
entšánaca cochtsebobonshana ntšamo cach aca cuenobobonshancá”.

<sup>10</sup> Nda ndēmua entšábioye tbojtsebobonshana, chábioye ndoñe bacá nt-  
jabórlana; chca, ndánaca jtsebobonshánēse, entšá jamana lempe ntšamo  
leyiñe yomandancá.



<sup>11</sup> Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentsana cuafjofšenangcá, Jesucristo jasérviana jt-sentsénëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnama.

<sup>12</sup> Mora bënga mondoyena canye luarentše bëtscá bacna soyëngaca y ngmenánaca, y chca jtsemnana mo bënga nyets tempo ibetiñe cuafjsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binýniñe ya jontšamcá. Chiyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyënjanama bënga jtseprontánëse, mo canye soldado jenëuyanama y inýa jayënjanama ba soyënga tojenocjacá.

<sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínýengbiana lempe chaotsinýnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsoencá chca soyënga ndoñe ntsamana, nyetscanga ndoñe cachcá ntsejuabnayama ndoñe ntsamana y ndoñe ínýenga yapa ntsíyentsbuášana.

<sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšëngaftanga tšabá jtsomñama juabnëngaca, ndayá tšëngaftanga chašmotsamama chë juabnënguiñe tojtsemncá.

## 14

### *Ndoñe šmattsóyebuambnaye inýe ošbuáchiyëngbe contra*

<sup>1</sup> Chë Jesucristbeñe nye batsatema ošbuáchiyënga tšabá šmochjúbuaja, y chëngaftaca ndoñe šmattsenatsëtsnaye ndayá aíñe o ndoñe jamana yontsamnama.

<sup>2</sup> Er básefta ošbuáchiyënga corente imotátšëmbo chënga nye ndayánaca jasama imobenama, pero chë Jesucristbeñe nye batsatema ošbuáchiyëngna, ndocna mëntšena ntseyayana, er chënga jtsejuabnayana aíñe jasana canye bacna soye nántsemna ca.

<sup>3</sup> Chë nyetsca saná sayënga ndoñe chamondëtsejuabná chë inýe soyënga ndoñe mondëtsesayëngbiana, chë causa chënga más batšá uámanënga imomna ca; y chë ndaye soyënga ndoñe mondëtsesayëngna, chë nyetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá.

<sup>4</sup> Tšëngaftanga ndoñe quecmátamna chë ínýabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canye te inýe tescama más uámana te yomna ca; pero ínýengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yajuabnacá ndáyeca chca ca.

<sup>6</sup> Nda tojtsejuabná canye te inýe tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojttesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga



chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiamama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentsana ndocná ainá ntsemnana nÿe cachabiamama, ni jóbanana nÿe cachabiamama.

<sup>8</sup> Bënga tmojtsiyenëse, Bëngbe Utabnabiamama jtsiyenana; y tmojóbanëсна, Bëngbe Utabnabiamama jóbanana. Chca, masque ainënga o obanënga, bënga Bëngbe Utabnábengama jtsemnana.

<sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tsëngaftanguentse báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tsëngaftanguentse jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama.

<sup>11</sup> Er Bëngbe Bëtsabe uabemana palabrenguiñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá, nÿetscanga atšbe delante mochanjoshëntsaméntša atše jadórama, y nÿetscanga šmochanjauyana, “ndegombre aca Bëngbe Bëtsá condmëna ca”.

<sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

### *Ndoñe šmatjama inÿe ošbuáchiyënga bacna benachiñe chamótsatsama*

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma.

<sup>14</sup> Atše sëndëtatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiamama cocayé chë soye nÿets tempo jëftsemnana ndoñe tšabe soye.

<sup>15</sup> Tsëngaftanga inÿa becá šmojtsatsëtná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tsëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tsëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tsëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiamama Cristo tojanóbana, chë ndoñe ndegombre benachiñe chaoquedama.

<sup>16</sup> Ndoñe šmatjaleséncia ndayá tsëngaftanga tšabá šmétsamama, ínÿenga ndoñe tšabá tsëngaftangbiamama chamotsóyebuambnamama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora.

<sup>17</sup> Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca

tempcá tšabá jtsatsmënana y ainaniñe oyejuayana jtsebmomnana; y Uámana Espíritbeyeca bēnga jobenayana chca jamana.

<sup>18</sup> Y nda Crístbioye chca tbojtseservena, jamana Bēngbe Bētsá cháftaca oyejuayá chaotsemnana, y entšangbe bominiñe tšabia jtsemnana.

<sup>19</sup> Sempre šontsamna tšabe soyēnga jtsamana y chē soyēngaca chaopodé jamana nyetscanga natjēmbana chamotsiyenama, y ndaye sóynaca šmochtsama, ndayá ínŷenga chaújabuache Jesucrístbeñe corente jtsošbuáchiyama y ainaniñe bētscá añemo jtsebmomnana.

<sup>20</sup> Tšēngaftanga ndaye sanánaca jasama šmobénayeca, ndoñe šmatjama chaotsopochocama ndayá Bēngbe Bētsá ainaniñe tojamcá. Ndegombre, nyetsca sananga tšabá jasama endmēna; pero ndayá tšēngaftanga šmojasama, inŷa bacna benachiñe chaótsatšama šmojamēse, chē soye cocayé ndoñe tšabá ntsemnana.

<sup>21</sup> Tšabá endmēna mēntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chē soye aíñe tcojama ora, Jesucrístbeyeca canŷe catšata chaojuaboma y bacna soye chaomama tojoserese.

<sup>22</sup> Asna, ntšamo tšēngaftanga chē soyēngama ndegombre šmošbuachecá, nŷe Bēngbe Bētsá y tšēngaftangaftaca chaotsemna. Canŷe entšá ndegombre oyejuayá jtsemnana, canŷe soye jamama tšabá yomna ca tojtsejuabnase, y chē soye tojamentšana, ndoñe tšabá chca yonjamna ca juabnēnga ainaniñe ndoñe tontsebmomnēse.

<sup>23</sup> Pero canŷe entšá ndayá tojamentšana tojayana, bacna soye tojama ca chē ndayá tojasama o tojamama, as Bēngbe Bētsánaca echanjayana cha ndoñe tšabá tonjama ca, er ntšamo tojamcá ndoñe tonjama chē soye aíñe tšabá yomnana jtsošbuáchiyēse; y ndayánaca chca ora tojtsamēse, chca jamana bacna soye jtsemnana.

## 15

### *Ntšamo ínŷengbiama tšabá tojtsemncá mochtsama, ndoñe nŷe bēngbiama*

<sup>1</sup> Bēnga, chē Jesucrístbeñe corente ošbuáchiyēnga, šontsamna chē nŷe batšatema ošbuáchiyēnga jujabuáchana, chēnga bacna soyēnga tmojtsama ora, nŷe batšá ošbuáchiyana bomna causa; y ndoñe nŷe jatsēnguayana nŷe ndaye soyēngaca yopodena bēnga tšabá jtsemnana.

<sup>2</sup> Cada ona bēnga šontsamna jamana ntšamo cach bēngcá Jesucrístbeñe ošbuachiyabiama tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bētscá Jesucrístbeñe chaotsošbuáchema, y ainaniñe más añemo chaotsebmomnana.

<sup>3</sup> Er Cristo, ntšamo tojanmcá cach ndoñe tonjanma nŷe cha oyejuayá jtsemnana. Inŷetšá, cháftaca tojanopasá ntšamo Bēngbe Bētsabe uabemana palabreñguiñe endayancá, mo Cristo Bēngbe Bētsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsētsná ca.”

<sup>4</sup> Er lempe ntšamo tempo Bēngbe Bētsabe uabemana palabreñguiñe tmojanabemcá, bēnga jabaátambama endmēna. Ndayá bēnga chiñe tmojuatsjínŷama, bēnga jtsobenana padecena soyēnguiñe tmojtsachnējuana ora uantadēnga jtsemnana, y ainaniñe más añemo jtsebmomnana; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama.

<sup>5</sup> Atše, Bēngbe Bētsá sēntseimpadana, nda inétsama bēnga padecena soyēnguiñe uantadēnga chamotsemnana, y nda inétsama bēnga ainaniñe más añemo chamotsebmomnana, cha chaoma nyetscanga canŷe juabna chašmotsebmomnana, ntšamo Cristo Jesús yojanjuabnacá tšēngaftanga jtsejuabnayēse;

<sup>6</sup> cha chca chaoma, nyetsca tsëngaftanga mo cányiñe cuaftsemncá, y mo nyetscanga canye ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanÿema.

*Chë ndoñe judiëngbiámnaca chë tsabe noticiënga jtsemnana*

<sup>7</sup> Nyetscanga oyejuayënga šmochjenofja, ntšamo Crístnaca tsëngaftanga tcmo-janëbuajcá, chca, entsanga chamuinÿanÿé Bëngbe Bëtsá puerte bëtsá y obená yomnama.

<sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima;

<sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca chochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

<sup>10</sup> Inÿoca mëntšá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entsángaftaca cányiñe ca.

<sup>11</sup> Y ínÿoca mëntšá endayana:

Bëngbe Utabná šmochtsatschuanaye tsëngaftanga ndoñe judiënga, y cha šmochtsatschuanaye nyetsca tsëngaftanga nyets luarënguenache entsanga ca.

<sup>12</sup> Y Isaíasnaca Bëngbe Bëtsabe uabemana palabrenguiñe mëntšá tojanábema:

Canÿa Isaíbe entsanguentsana echanjabo,

y Bëngbe Bëtsá chábioye uamaná bochanjábema, nyets luarënguenache entsanga chaotsamëndama,

y chënga chábeñe jtsošbuáchiyëse, chábeñe mochantsobátmana tsabe soyënga chëngbiamama chaotsamama ca.

<sup>13</sup> Atše, Bëngbe Bëtsá sëntseimpadana, nda inétsama bënga chábeñe chamotsobátmanama tsabe soyënga bëngbiamama chaomama, cha chaoma tsëngaftanga ainaniñe puerte oyejuayënga chašmotsemnana y ainaniñe tsabe ebionana chašmotsebomnana, chábeñe jtsošbuáchiyëse; y Bëngbe Bëtsá chca tsëngaftangbiamama chaoma, tsëngaftanga cada te más chábeñe chašmotsobátmanama, chë Uámana Espíritbe obenánaca.

<sup>14</sup> Jesucristbeyeca atšbe catšátanga, atše corente sëndëtatšëmbo tsëngaftanga puerte tsábenga šmomnana, ndayá cmamnana corente šmotatšëmbuama, y jtsebuayiynayama šmobenámnaca.

<sup>15-16</sup> Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjácá; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebomna chë uámana trabajo, Cristo jtse servénana, chë ndoñe judiënga jtsejabuáchanëse. Atše bachnëcá sëntsoservena, Cristo stseservena ora, entsanga tsabe noticiëngama jtsebuayiynayëse; atše chca sëndama chë ndoñe judiënga Jesucristbeñe chamotsošbuáchemama, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiamama canye uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

<sup>17</sup> Chca, atše Cristo Jesúseftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnama.

<sup>18</sup> Atše añemo séntsebmoma nye chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama,

<sup>19</sup> chë Bëngbe Bëtsabe obenana jinyanüyama bëts soyëngama, chë chabe obenánaca tojopasá tšabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entšanga tijabuayená.

<sup>20</sup> Atše sempre canye soye inye soyëngama más sënjanboše, y enjamna chë tšabe noticiëngama jábuayenana, entšanga ndocna te Cristbiamama oyebuambayana tmonjanuena luarënguenache; y chca sënjanma, atše ndoñe játamama inya tojanbojátšé trabajo, mo ínñabe bojátšena yebnentše jajebuama cuafjantontšecá.

<sup>21</sup> Ntšamo Bëngbe Bëtsabe uabemana palabrënguiñe endayancá, chë tempo Cristbiamama ndoñe tmonjanuenëngbiamama:

Chë ndëmuanyënga tempo ndocná chabiamama tonjanabuayená, chënga tšabá mochanjinñe ntšamo cha yomnana;  
y chë ndocna te chabiamama tmonjouenënga, chabe soyëngama echanjósertayeca.

### *Pablo yojanjuabná Roma bëts puebloye jama*

<sup>22</sup> Y nya chë causa, atše ndoñe chiyjobená tšëngaftangbioye jama tšëngaftanga jányama, masque ba soye tsjenojuabná choye jama.

<sup>23</sup> Pero mora atšbe trabajo quem luarënguiñe sënjapochocá y tempscana tšëngaftanga jányama tša sëndánbošeyeca,

<sup>24</sup> sëntsejuabná mora aíñe chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama Españoloye ayana jtëtóntšama.

<sup>25</sup> Morna Jerusalenoye chanjá, choca entšanga Bëngbe Bëtsábenga imomnënga jaujabuáchama;

<sup>26</sup> er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnjémënga imomnënga jujabuáchama; y oyejuayënga chca tmonjama.

<sup>27</sup> Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebmoma; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebmoma chamotsobenama.

<sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajáftsayentšbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga jáftsanýama, tšëngaftangaftaca baseftayté jëftsemnama.

<sup>29</sup> Atše corente sëntsetatšëmbo tšëngaftangbioye chajá ora, chjášhango y chjama tšëngaftanga bëtscá tšabe bendicionënga Crístbentšana chašmotsebmoma, tondaye chacmondëtsabuáshebenëntscuana.



<sup>30</sup> Jesucristbeyeca catsátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tšëngaftanga cbontsaimpadana, bëtsá chašmotsentšena Bëngbe Bëtsá nyets ainánaca jtseimpadánama, ntšamo atše sëndbetseimpadancá, cha atše chašotsinýenama.

<sup>31</sup> Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusaleñoquënga Bëngbe Bëtsábenga, tšabá chamóyëngacñama ndayá chënga jujabuáchama chajáftsayentšbuachiye ora.

<sup>32</sup> Y chentšana, y Bëngbe Bëtsá chca chaojábošenëse, atše chayobená bëtsá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená.

<sup>33</sup> Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamotsebomnama, nyetsca tšëngaftangaftaca chaotsemnama. Chca chaotsemna.

## 16

### *Ubuátmënga jacheuayama*

<sup>1</sup> Atše sëntseboše tšëngaftanga jáuyanana Febe, Jesucristbeyeca bëngbe uabena, canýe tšabe entšá endmënama; cha chë Cencrea puebloca enefjuana ošbuáchiyënga endújabuachana.

<sup>2</sup> Tšabá cha šmochjofja, mo canýa Bëngbe Utabnábia quetsomñecá, ntšamo Bëngbe Bëtsabe entšanga entsamncá ínýëngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiamá oservéniñe.

<sup>4</sup> Jobanámnaca bonjanprontana, atše jatsbocama, ndoñe chašmondóbama. Atše chama chata sentsatacheuaná; y ndoñe nýe atše, sinó nyets luarenache enefjuana ndoñe judiënga ošbuachiyëngnaca chca.

<sup>5</sup> Chë ošbuáchiyënga, chë Bëngbe Bëtsá jëtschuayama chatbe yebnentše jënefnama imuamanëngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama.

<sup>6</sup> María šmochjachuaye; cha tšëngaftangbeñe bëtsá tojatrabajá.

<sup>7</sup> Chë cach atšcá judeocata Andrónico y Junias šmochjácheuaye. Chata canýe ora átšeftaca cárceloye bonjanëtámëna, y Jesucristbe ichmónëngbiamá chata puerte uámanata bonjamna, y atšbiamá más natsana tbojanontšë Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna.

<sup>9</sup> Urbano šmochjachuaye, chë bëngaftaca Cristbiamá oservéniñe trabajayá; y atšbe bonshana Estáquisnaca šmochjachuaye.

<sup>10</sup> Apeles šmochjachuaye; cha ba soye tonjinýanyé Jesucristbeñe puerte yošbuáchemá; y Aristóbulbe yebnentšëngnaca šmochjácheuaye.

<sup>11</sup> Chë cach atšcá judeocá Herodión šmochjachuaye, y chë Narcisbe pamilentšana Bëngbe Utabnábeñe ošbuachiyëngnaca.

<sup>12</sup> Trifena y Trifosa šmochjácheuaye; chata Bëngbe Utabnabiamá puerte bondëtrabajá; y bëngbe bonshaná Pérsidnaca šmochjachuaye; cha bëtsá endëtrabajá, Bëngbe Utabnabiamá oservéniñe.

<sup>13</sup> Rufo, chë Bëngbe Utabnabiamá uámana trabajayá, šmochjachuaye, y chabe mamánaca; cha mo atšbe mamacá endmëna.



<sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca inménutanangnaca.

<sup>15</sup> Filólogo y Julia, Nereo y chabe uabena, Olimpás y nÿetsca Bëngbe Bëtsabe entšanga chëngaftaca inménutanangnaca šmochjácheuaye.

<sup>16</sup> Nÿetscanga mo Jesucristbeyeca catšatangcá šmochjenuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. Nÿets luarenache enefjuana Cristbeñe ošbuáchiyënga cmontsacheuaná.

<sup>17</sup> Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebmna chë cánÿenga ínÿengaftaca contra chamotsemnama y ínÿenga Jesucristbeñe ošbuáchiyana chamotsajbanama inmétsamëngbiama; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana.

<sup>18</sup> Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabrëngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama.

<sup>19</sup> Nÿetsca entšanga tmojouena, chë Bëngbe Bëtsabe soyëngama ntšamo ínÿenga tmojabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá.

<sup>20</sup> Y Bëngbe Bëtsá, nda inétsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyënjana, mo cha tšëngaftangbe cucuatšinë cuafjaboshjoncá. Atše sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

<sup>21</sup> Timoteo, chë átseftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

<sup>22</sup> Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

<sup>23</sup> Gayo cmontsacheuaná; atše Pablo chabe yebnentse posada sëntsebmna, y cha enduamana nÿetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

<sup>24</sup> Atše, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

<sup>25</sup> Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchemá; y chca, cha echanjama ntšamo chë bënga fsëndabuayiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe tonjinÿanÿé, y chë causa chënga chë soye ndoñe ntsetatšëmbuana.

<sup>26</sup> Pero morna, ntšamo Bëngbe Bëtsabe juabna oyeuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegombre soyëngama

chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

<sup>27</sup> Nye canye Bëngbe Bëtsá endmëna, y cha nyets osertánana endbomna. ¡Nyetscanga chamotsinÿanÿná cha puerte bëtsá y uamaná yomnama, ndayá Jesucristo tojanmama! Chca chaotsemna.

# 1 Corintios

## *Pablo chënga jacheuayama*

<sup>1</sup> Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cányiñe chë Jesucristbeyeca catšata Sósteneseftaca,

<sup>2</sup> quem tsbuanácha sèntsabiamná tšëngaftanga chë Corinto bëts pueblaca Jesucristbeñe ošbuáchiyëngbiamá; ndëmuanyënga Cristo Jesúseftaca Bëngbe Bëtsá tojábiama chabe entšanga nye chábioye oservénënga, ndëmuanyënga Bëngbe Bëtsá tojáchembo chabe entšanga chašmotsemnama, chë nye quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná.

<sup>3</sup> Atše sèntsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

## *Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama*

<sup>4</sup> Bëngbe Bëtsá tšëngaftangbiamá sempre sëndbëtsatschuanaye, er tšëngaftanga cányiñe mo canyáca Cristo Jesúseftaca šmómnyayeca, Bëngbe Bëtsá tšëngaftangbeñe tojajuabó, tšëngaftangbe tšabiamá.

<sup>5</sup> Chca Crísoftaca šmómnyayeca, Bëngbe Bëtsá tojama tšëngaftanga chašmotsebonnama chábentšana nyetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmësertama.

<sup>6</sup> Chca, ntšamo cbonjanabuayiynacá mo Jesucristbe ndegombre soyëngcá, tšëngaftangnaca ín'yëngbioye tšabá šmojinyanýe ndegombre soyënga bëtsemnama, chë ntšamo jtšiyenama.

<sup>7</sup> Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtónýna tescama Bëngbe Bëtsábeñe jtsošbuáchiyëse chašmojtšobátmanëntscuana.

<sup>8</sup> Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nyetsca entšangbiamá tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca.

<sup>9</sup> Bëngbe Bëtsá nyets tempo jtšamana ntšamo tojašebuachenacá, y cha endmëna nda tcmojánachembo cányiñe mo canyáca chašmotsemnama chabe Uaquiñá Jesucristoftaca, Bëngbe Utabná.

## *Choca ošbuachiyëngbeñe nyetscanga ndoñe cachcá montsanjuabná*

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nyetsca bëngbiamá yomnama, tšëngaftanga nyetscanga cachcá chašmotsejuabnama, y tšëngaftangbeñe ndoñe más báseftanga canýe soye y ín'yënga inýe soye chamuatsjuabná. Y aíñe šmochtsiyena mo canyáca, nyetscanga cachcá jtsejuabnayëse y cachcá jamama jtsebošëse.

<sup>11</sup> Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtšenpenzentserama.

<sup>12</sup> Ntšamo sèntsichamcá entsemna ndayá tšëngaftangbentše báseftanga šmojtšichamo: “Atše Páblëbe ustoná sëndmëna ca”; ín'yëngna imojtšichamo:

“Atšna Apólosbe ustoná sēndmēna ca”; ínŷenga: “Atšna Pédrēbe ustoná sēndmēna ca”, y ínŷengna: “Atšna Cristbe ustoná sēndmēna ca” imojtsichamo.

<sup>13</sup> Chca šmojtsamama, jtsóbocanana mo cada básefta ošbuáchiyēnga canŷe Cristo tmojtsebomncá. ¿Pablo yojamna nda tmojancrucificá tšēngaftangbe tšabiama? ¿O tšēngaftanga uabáinēnga šmomna, atše jótšēmbonēse, tšēngaftanga atšbe ústonēnga bétsemnana?

<sup>14</sup> ¡Bēngbe Bētsá sēndbētsatschuanaye atše ndocná tšēngaftanguentšá tījanábayama; nŷe Crispo y Gáybioye aīñe!

<sup>15</sup> Chca, ndocná quenátobena jayanana, atše jótšēmbonēse uabainá cha tojanoquedá ca, mo átšbeñe ošbuáchiyēnga cuaftsemncá.

<sup>16</sup> Estéfanabe pamillentšēgnaca sēnjanēbaye, pero ndoñe quetsatabouínŷna inŷa tījanábayama.

<sup>17</sup> Er Cristo ndoñe chešnatanichmó ínŷenga jubáyama, ndayá chē chabe tšabe noticiēngama entšanga jábuayenama. Ndoñe chešnatanichmó chē soyēnga jayanama, corente osertana entšangbe soyēnga jtsichámēse; chca, entšanga Crístbeñe chamotsošbuáchema, ndoñe chē atšbe osertánanentšana palabrengama, sinó nŷe chē buayenánama, Cristo cruzoca bēngbiana tojanóbanama.

#### *Crístbeñe yomna Bēngbe Bētsabe obenana y osertánana*

<sup>18</sup> Quem buayenánana, Cristo entšangbiana cruzoca tojanóbanama, chē pochocánēnga jtsemnana tmojtsajnēngbioye jtsinŷanana mo ndoñe corente juabna bomnēngbe soycá; pero bēngbiana, chē Bēngbe Bētsá nŷetsca tescama šochjátsebacangbiamna, quem buayenánana jtsinŷanŷnayana Bēngbe Bētsabe obenana.

<sup>19</sup> Ntšamo Bēngbe Bētsá chabe uabemana palabrenguiñe tojanayancá: Atše chanjama chē tša osertánēngbe osertánana tondayama chaondētsoservénama; y chanjama chē ba soyēngama osertánēngbe osertánana tondayama chaondētsámanama.

<sup>20</sup> ¿Ntsachetšá yojtsámama chē tša osertaná y chē puerte uatsjinŷená tbojayana soyēnga? ¿Ntsachetšá yojtsámama chē tša tšabá chē soyēngama juabnayá, morscá, y ínŷengaftaca enatsētsnaye ora chēngbe ayēnjanayá tojayana soyēnga? Ndegombre Bēngbe Bētsá tojinŷanŷé, chē quem luarentša bēts osertánánaca tmojayana soyēnga tondaye yonduámanama.

<sup>21</sup> Bēngbe Bētsá, nŷets osertánana bomná quetsomñecá y puerte tšabá jtsejuabnayēse, ndoñe tonjanalesenciá quem luarentša entšanga cha chamotsábuatmama, chē quem luarentšēnga tša osertánēnga tmojánayana soyēngama. Chamna, cha tšabá tbojanínŷnana chábeñe ošbuáchiyēnga játsebacana chē bēnga fsēndabuayiyná soyēngama, masque ínŷengbioyna mo ndoñe corente juabna bomnabe soycá jtsinŷanana.

<sup>22</sup> Judiēnga tša jtsebošana y Bēngbe Bētsábioye jtsotjanañana bēts soyēnga chaomama, chabe obenana jinŷanŷiyama; y ndoñe judiēngna tša jtsenguayana chē puerte osertánēngbe soyēnga jtsetatšēmbuama.

<sup>23</sup> Pero bēngna Crístbiana entšanga fsēndabuayiyná, chē ínŷenga tmojancrucificabiana. Quem buayenánana chē judiēnga ndoñe tšabá ntjéuanana. Y ndoñe judiēnga mondbétsejuabnaye chca yomna mo canŷe ndoñe corente juabna bomnabe soycá ca;

<sup>24</sup> pero bēngbiana, nŷetscanga Bēngbe Bētsá chabe entšanga chamotsemnana šojáchembēngbiamna, masque judiēnga o ndoñe judiēnga, Crístbeñe endmēna nŷets Bēngbe Bētsabe obenana y osertánana;

<sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinýanana mo canýe ndoñe corente juabna bomnabe soyca, pero ndegombre endmëna canýe puerte más osertaná tojama soye, lempe ntšamo entšanga imotatsëmbuama. Y ndayá cha tojamcá masque bángbioye jtsinýanana mo canýe tondaye obenabe soyca, ndegombre chë soye jtsinýanýanana Bëngbe Bëtsá puerte más obenana yobomnana, nýets obenana ntšamo entšanga imobomnana.

<sup>26</sup> Jesucristbeyeca atšbe catšátanga, šmochtsejuabnaye ntšamo yojamnama, Bëngbe Bëtsá chabe entšanga chašmotsemnana tcmojánachembo ora. Tšëngaftangbentše nýe báseftanga tša osertánënga šmojamna, ntšamo chë osertánana bomnënga imomnana entšanga mondbetsejuabnacyá; y báseftanga šmojamna becá mando atšetanënga o uámana pamillentšënga.

<sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jamama chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamotsëuatjama.

<sup>28</sup> Bëngbe Bëtsá quem luarentšana tojanbocacá ndayá tondaye yonduamancá y ndayá ínýënga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondëtsámanama.

<sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca.

<sup>30</sup> Bëngbe Bëtsá tojama bënga Crísoftaca cánýiñe mo canýacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bomínýiñe chamotsemnana, chabe entšanga jtsemnana chamobenama, puerte tšábënga cach Bëngbe Bëtsacá, y atsebácanënga chamotsemnana.

<sup>31</sup> Y chca, ntšamo Bëngbe Bëtsabe uabemana palabrénguiñe endayancá: “Nda tojtseboše jayanama cha canýe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

## 2

### *Ntšamo Pablo Cristo crucificanábiamá chënga tojanabuayená*

<sup>1</sup> Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabréngaca, ní chë tša osertánëngbe palabréngaca.

<sup>2</sup> Y tšëngaftangaftaca sënjamna ora, ndoñe quetstétseboše nýe ndayíñnaca jatjuabnayanana, ndayá nýe Jesucristbeñe, nda bëngbe tšabiamá tmojanrucificá.

<sup>3</sup> Atše tšëngaftangbeñe sënjamna, mo canýa ba soyënga jamama ndobenacá, y mo canýa puerte auatjacá y tbojtsengmëmncá, chabe trabajo jamama ndoñe jobenayama juabnaye causa.

<sup>4</sup> Ntšamo cbonjanëtsësná y cbonjanabuayiynacá atše sënjanoyebuambá ndoñe chë tša osertánëngbe palabréngaca, tšëngaftanga jáyëñjanama chiñe chašmotsošbuáchema; pero aiñe tcbonjanayëñjaná, Bëngbe Bëtsabe Espíritu y chabe obenana tšëngaftanga jinýanýiyëse,

<sup>5</sup> chca, tšëngaftanga Bëngbe Bëtsabeñe chašmotsošbuáchema, ndoñe nýe entšangbe osertánanaca, sinó Bëngbe Bëtsabe obenanama.

### *Uámana Espíritbeyeca, Bëngbe Bëtsá jamana entšanga cha chamotsábuatmama*

<sup>6</sup> Pero, chë ya tmojashjáchënga Bëngbe Bëtsabeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyebuambaye



becá osertánana bomna soyënga. Pero ndoñe quenátsmëna quem luarentša entsãnga quem tempo mondbétsichamo soyënga, ni mora quem luarentše amëndayëngbe soyënga, ndëmuanÿenga ndoñe bën y ndocna obenana bomnënga mochanjëftsoquéda.

<sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsãngbioye baytentscuana ndoñe tonjaninÿanÿé soyënga, y chca, entsãnga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mocht-sanobena puerte bëtsétsanga y uámanënga jtsemnana, cháftaca chë nÿetsca tescama yomna tsabe vida jtsebomnama.

<sup>8</sup> Quem Bëngbe Bëtsabe puerte osertánana bomna soyënga endmëna canÿe soye ndayá quem luarentša amëndayënga ndoñe ntsësertánana, er chënga aíñe matënjanesértase, Bëngbe Utabnábioye chënga ndoñe matmënjancrucificá, Bëngbe Utabná nda puerte bëtsá y uamaná yomna.

<sup>9</sup> Bëngbe Bëtsabe uabemana palabrénguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinÿe, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanÿanÿé, er chë Espiritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entšángbeñe ndocná quenátobena jtsetatšëmbuana ndayá entsabe ainaniñe tomnama, sinó nÿe chë entsabe espíritu, chë chábeñe yomná. Cachcá, nÿe Bëngbe Bëtsabe Espiritu jtsetatšëmbuana ndayá Bëngbe Bëtsá tojuabnacá.

<sup>12</sup> Y bëngna, Bëngbe Bëtsábiocana Espiritu tmojóyëngacñe, ndoñe canÿe quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tsabiama cha jtsejuabnayëse.

<sup>13</sup> Bënga chë soyëngama fsëndoyebuambná, ndoñe chë quem luarentša entsãngbentsana tifjuatsjinÿe osertánana bomna palabréngaca, sinó chë Bëngbe Bëtsabe Espiritu šojabuatambá palabréngaca. Chca, Bëngbe Bëtsábiocana soyëngama bënga fsëndabuayiná, Bëngbe Bëtsabe Espiritbentsana yóbocana palabréngaca, chë Uámana Espiritu ainaniñe imobomnëngbioye.

<sup>14</sup> Bëngbe Bëtsabe Espiritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espiritbiocana yóbocana soyënga, er chë entsabiama chë soyënga jtsemnana mo canÿe ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuama y josértama, nÿe chabe ainaniñe chë Uámana Espiritu tbojtsájabuachanëse.

<sup>15</sup> Pero nda aíñe chë Espiritu tbojtsebomna jtsobenana nÿetsca soyënga tsabá jinÿama chabosertama, y ndocná chë Espiritu ndoñe tbondbomná ntsobenana josértana ntšamo chë Espiritu bomná yomnama.

<sup>16</sup> Er Bëngbe Bëtsabe uabemana palabrénguiñe mëntsá endayana: “Ndocná quenátabuata Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

### 3

*Jatrabájama enutanánënga Bëngbe Bëtsá jasérviamá*

1 Pero, Jesucristbeyeca atšbe catsátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nÿe cachënga tšabá jtsomñama juabnënga bomna entsangbioycá, mo basetemëngbioycá, Cristbe soyëngama josértama ndobenënga.

2 Mo canÿe bebmacá, chabe basetémbioye nÿe létšiyë jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše chonjanabuatambá Bëngbe Bëtsabiana nÿe chë más paselo josértama soyëngama, y ndoñe inÿe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama;

3 er tšëngaftanga cabá šmojtsama, nÿe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínÿengaftaca cabá yapa šmojtsenántšaboše y nÿe ínÿengbioye jayénjanama soyënga šmojtsamëntscuana, tšëngaftanga šmojtsama nÿe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nÿe quem luarama enójuabnaye entsangcá.

4 Er canÿa: “Atše Páblëbe ustoná sëndmëna ca”, y ínÿana: “Atše Apólosbe ustoná sëndmëna ca” tojayana ora, chca jtsamana mo chë nÿe quem luarama enójuabnaye entsangcá.

5 Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo.

6 Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcijnacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuama endbetsamcá, tojama banga tšëngaftanguentše Jesucristbeñe chamotsošbuáchema.

7 Ntšamo, chë jená y chë matënguiñe béjaye buešcijnayá ndoñe yapa ntsámanana chiñe shajuanënga chaóboconama, nÿe Bëngbe Bëtsá aíñe, cachcá, nda Bëngbe Bëtsabiana entsanga jábuayenama trabajo tojabojatsé y nda chentsana tojášhango cach trabajuiñe jontšama, ndoñe ntjamana entsanga Jesucristbeñe chamotsošbuáchema; nÿe Bëngbe Bëtsá chca jamana.

8 Chë jená y chë matiñe béjaye buešcijnayá cach trabajuiñe jtsentšénana, y chatna mo trabajayatcá jtsámanana; y cada ona juacánana ntšamo chabe trabajo tomncá.

9 Bëndata fsëndmëna trabájayata Bëngbe Bëtsabiana oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboconama, y šmondmëna mo chë cha yojtsejebuana bëts yebncá.

10 Er Bëngbe Bëtsá atšbe tšabiana jtsejuabnayëse, chë trabajo šojabonÿé, y atše mo canÿe puerte tšabe jebuanacá, canÿe yebna ndayiñe chaotsëcuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentsana inÿa, mo chë inÿe yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama.

11 Mo chë cánÿabentsana inÿe trabajayacá, ndoñe ntsobenana chë yebna jajebuama tojanbojatsé cha chë yebna chaotsëcuatjonama tojanpormañe inÿe

soye cachcá chaoservema jatspórmana, cachcá, ndocná chaondétsabuatambá inye soyenga, nye ntšamo Jesucristbe soyenga yomncá aíñe, chë ntšamo atše natsana sënjanabuatambacá.

<sup>12</sup> Chë Jesucristbiana más uámana soyenga buatëmbayá jtsemnana mo chë castellano, midio y inye uámana soyengaca yebna jebuanacá; y chë Jesucristbiana nye nduámana soyenga buatëmbayana mo chë niñebenga, butsjëshsa y tëshenjnësheca yebna jebuanacá.

<sup>13</sup> Y Cristo chaojésabo te, Bëngbe Bëtsá echanjínyanýiye ntšamo cada cánýabe trabajo yomnama. Cha chë te íñesheca chca echanjínyanýiye, y chë íñesheca, Bëngbe Bëtsá echanjinýe y echanjínyanýiye ndaye trabajo cada ona tojamama.

<sup>14</sup> Ntšamo cada cánýabe trabajo yojsámanama jtsetatšëmbuama Bëngbe Bëtsá chaojinýe ora, cha chabe trabajo aíñe yojsámana ca queojayanése, chë tšabe trabajayá Bëngbe Bëtsábiocana canýe uacanana soye echanjóyëngacñe, er cha jtsemnana mo canýe entšacá, nda canýe yebna tojtsejebuana jtsejuinýama ndoñe paselo tondmëna soyëngaca.

<sup>15</sup> Pero chë te cánýabe trabajo nye batšá yojsámanama Bëngbe Bëtsá íñesheca chaojinýanýese, chora chabe trabajo echántsemna mo chë jtsejuinýama paselo tomna soyëngaca jebuanabe soyëngcá, chentšana nyets yebna jtsejuinýana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsabiama trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquéda.

<sup>16</sup> ¿O tšëngaftanga ndoñe šmondétatšëmbo nyetscanga cánýiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnama, y tšëngaftanguentše Bëngbe Bëtsabe Espiritu yomnama?

<sup>17</sup> Nderado nda tojama, tšëngaftanga nyetscanga cánýiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánýiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jaserviama; y tšëngaftanga chca šmondmëna.

<sup>18</sup> Ndocná cachá chaondétsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mondbétsejuabnaye ntšamo canýe puerte osertaná inétsemnana, cha bontsemna jóbemama mo canýa ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama.

<sup>19</sup> Er chë quem luarentša entšanga tša osertánënga imotátšëmbo soyenga, Bëngbe Bëtsabe bominyiñe yomna mo chë corente juabna ndbomnabe soycá. Bëngbe Bëtsabe uabemana palabrënguiñe mëntšá endayana: “Bëngbe Bëtsá chë tša osertánënga jáyënjanana, ndayá cachënga ínýenga jáingñama tša osertánánaca tmojtsama soyëngaca ca.”

<sup>20</sup> Y mëntšánaca endayana: “Bëngbe Utabná endétatšëmbo chë tša osertánëngbe juabnënga tondayama yondoservénama ca.”

<sup>21</sup> Chíyeca, ndocná chaondétsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Crístbeñe ošbuachiyënga bétsemnana, tšëngaftangbe tšabiama endmëna, y nyetscanga chë tcmojujabuachëgnaca cachcá.

<sup>22</sup> Lempe tšëngaftangbe soye endëtsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca.

<sup>23</sup> Y tšëngaftanga Crístbenga šmondmëna, y Cristna Bëngbe Bëtsábia.

## 4

### *Jesucristbe ichmónëngbe trabajo*

<sup>1</sup> Entšanga entsamna bëngbiama jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanyé, pero mora aíñe tojinÿanyé soyënga jtsabuátambayama trabajo bomnënga.

<sup>2</sup> Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tšabe palabra bomná chaotsemnama.

<sup>3</sup> Atšbe bariëna, tondaye quenatámana, ntšamo tijamcá šmojinÿe y ndoñe tšabá tijama ca šmojayanëse, o inÿe entšanga cachcá tmojayanëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tajojtsemnama.

<sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tšabá o ndoñe tšabá tijamama.

<sup>5</sup> Chíyeca, tšëngaftanga ndoñe quecmátamna jinÿana y jayanana ínÿenga ndoñe tšabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tšabá echanjínÿanÿiye chë iytëmcá yomna soyëngama, mo ibetiñe cuaftsemncá, y botamana echanjínÿanÿiye, mo binÿniñcá, ndayá jamama nÿe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

<sup>6</sup> Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminÿama, y chca sënjama tšëngaftangbe tšabiama, ntšamo bëndata tifjamentsana chašmuatsjínÿama jtsiyenana nÿe ntšamo Bëngbe Bëtsabe uabemana palabrenguiñe iuayancá, y ndocná tšëngaftanguentšá canÿe entšabiama chaotsenábotamnaye, y ínÿabiamna ndoñe tšabá chauátoyebuambnama.

<sup>7</sup> Er, ¿nda chë ínÿengbiama más uámanënga tšëngaftanga cmojtsabiamná? ¿Y ndayá šmobomna, Bëngbe Bëtsá ndoñe tcmojtšatá soye? Y tšëngaftanga chca chašmotsebomnama cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nÿe cach tšëngaftangbeyeca šmojonÿencá?

<sup>8</sup> Tšëngaftanga šmojtsejuabná ya lempe ntšamo cmëjabotcá Bëngbe Bëtsábicana šmojtsebomna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentsana tondaye ntsëjabotcá. Malaye tšëngaftanga mo reyëngcá šmojtsemna, Crísoftaca cánÿiñe jtsemándayëse; chca, bëngnaca tšëngaftangftaca jtsemnama, cánÿiñe jtsemándayëse.

<sup>9</sup> Atše šontsinÿana, bënga chë Cristbe ichmónënga Bëngbe Bëtsá šojábiamna mo chë nÿetscangbiama más nduamanëngcá, mo chë jóbanama yojtsemna entšangcá. Nÿetscanga chë Bëngbe Bëtsá tojábiamënga bëngbioye jtsénÿayana mo ndoñe cachca entšanga fstsemncá; angelënga y entšángnaca cachcá bëngaftaca montsama.

<sup>10</sup> Bënga, Cristbiamna oservena causa, quem luarentša entšangbiama fsëntsinÿna mo corente juabna ndbomnëngcá; chë cuenta, tšëngaftanga



šmojtsejuabná Cristbe soyëngama corente osertánënga šmomna ca. Bënga fsëndmëna chë entsangbe bominyiñe ndocna obenana ndbomnënga; y tšëngaftangna šmojtsejuabná puerte obenana bomnënga šmomna ca. Tšëngaftangbioye ínÿenga puerte uámanënga y bëtsëtsanga jtsabiamnayana, pero chënga bëngbioye jtsëbuayënjana.

<sup>11</sup> Y mëntscoñama, bënga šontsabuashebebianana saná, ndayá jofšiyama y entšayá. Entšanga bëngbioye bacá jtsaborlánana, y tondaye yebna queftsátsbomna.

<sup>12</sup> Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tšabe bendicionënga chamotsebomnama. Bënga chamosufrima ínÿenga tmojtsama ora, bënga chë soye fchandbëtsoboyaye.

<sup>13</sup> Inÿenga bëngbiana bacá tmojtsoyebuambná ora, jtsababuányëshanëse fsënduamana jtëjuana. Quem luarentša entsangbe bominyiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservénënga, mo chë quem luarentša tsengacá; y chca endmëna mëntscoñama.

<sup>14</sup> Quem soyënga ndoñe quechatëbuabianná tšëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga.

<sup>15</sup> Er masque tšëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tšëngaftangbiana mo taitangcá, Cristo Jesúsbeñe jtsošbuáchiyama tmojanëjabuachama. Nÿe atše sëndmëna mo taitacá tšëngaftangbiana, mo ošbuachiyëngcá, er atše natsana tcbonjanabuayená chë tšabe noticiënga Jesucristbiana, y tšëngaftanga chiñe šmotsanošbuaché.

<sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšëngaftangbioye sëntsichamná, atšbe bonshaná, canÿe aíñe tšabe palabra bomná; Bëngbe Utabnábeñe tojanošbuachéyeca, atše Cristbiana sënjanbuayiyná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tšëngaftanga chašmuatenójuaboma ntšamo atše tšëngaftangbeñe tsjoyenama, Cristbeñe ošbuachiyacá, ndayama atše nÿets tempo ošbuáchiyënga sëndbetsabatambaycá nÿets luare ošbuáchiyënga enefjuanenache.

<sup>18</sup> Tšëngaftanguentšë báseftanga ya šmojtsejuabná puerte uámanënga šmojtsemna ca, er šmojtsejuabná atše stsauatja tšëngaftangbioye jama jáñÿama ca.

<sup>19</sup> Pero Bëngbe Bëtsá chašojalesenciase, sëntsobátmana betscó tšëngaftangbioye jama jáñÿama. As chjinÿe ntsache obenana imobomna chë Bëngbe Bëtsabe entsangcá jtsiyenama tša uámanënga imomna ca juabnayënga, y ndoñe nÿe ntšamo jayanama imobencá.

<sup>20</sup> Er Bëngbe Bëtsá canÿe ošbuachiyabe ainaniñe tojtsemánda ora, chca jtsinÿnana ndoñe nÿe ntšamo tojtsichámuama, ndayá Bëngbe Bëtsabe obenana chábeñe tojtsemnama.

<sup>21</sup> ¿Tšëngaftanga ndayá más šmattseboše: atše chayá tšëngaftangbioye jaucácanama, o chayá tšëngaftangbioye jáñÿama puerte bonshanánaca y ntsetšatjaycá tšëngaftanga jauyanama?

## 5

*Ndayá cuanjama canÿe boyabása shembásaftaca bacna soye amáftaca*

<sup>1</sup> Ndegombre nÿets luariñe entsótatsëmbo tšëngaftanguentšë yojtsemna canÿa, shembásaftaca bacna soye amá, y ntšamo cha yojtsamcá puerte bacna



soye yojtsemna; ni chë Bëngbe Bëtsábioye nduabuátmënga chca ntsamana: canye entśá cachabe mamamnáftaca bacna soye yojtsama.

<sup>2</sup> Y tšëngaftanga cabá šmojatsjuabná corente tšábenga šmomna ca, masque chca tšëngaftangbeñe yojtsopasánëse. Tšëngaftanga cmontsamna puerte ngménaca jtsemnana, tša uabouana soye cha yojtsama causa. Canye entśá chca tojamáftacna, tšëngaftanga cmontsamna jamana cha ndoñe más tšëngaftangaftaca chaondenútanama mo ošbuachiyacá.

<sup>3</sup> Y atśna, masque tšëngaftangaftaca choca ndoñe quetsátsmëna, atśbe juabna choca tšëngaftangaftaca entsemna; y chca atśbe espíritoca séntsemnayeca, Bëngbe Utabná šojéftsanatšetá mándoca, sënjajuabó y séntsetatsšëmbo ntšamo tšëngaftanga cmojtsamnana, chë entśá chca tojamáftaca.

<sup>4</sup> Tšëngaftanga chašmojénefjna ora, chentše atśbe espíritoca tšëngaftangaftaca atše chántsemna, y atśbe espíritu chentše echántsemna Bëngbe Utabná Jesusbe obenánaca.

<sup>5</sup> Y chora tšëngaftanga cmontsamna jamándana chë entśá ya ndoñe más tšëngaftangaftaca mo ošbuachiyacá chaondenútanama, mo Satanasbe cucu-atšiñe cha cuafjaboshjoncá, chca, chë quem entśá nye cachá tšabá jtsomñama juabnënga chaotsopochocama, y chca, Bëngbe Utabná cachiñe chaojésabo ora, chabe espíritu atsbocaná chaotsemnana.

<sup>6</sup> Tšëngaftanga šmojtsejuabná puerte tšábenga y uámanënga šmomna ca, pero šmojtseleséncia canya tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatsšëmbo, ntšamo chë nye batśá levadura endbama, nyets arninýá chauábochemá; cachcá, tšëngaftanguentše canya tša bacna soye chca tojama ora, nyetscangbiana ndoñe tšabe soyënga jóbocnana.

<sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninýacá, ndocna levadúraca, chë bacna juabnéngaca ya ndëmandánënga šmojtsémnayeca. Ndegombre tšëngaftanga chca šmondmëna, er Bëngbe Bëtsá tojama tšëngaftanga tsëm vida chašmotsebomnana. Bashco fiesta ora, oveshá tmojanóba, Israeloca entśanga perdonánënga chamotsemnana. Cachcá Cristo, mo chë oveshacá, tojanóbana bacna soyënguentsana bënga játsebacama.

<sup>8</sup> Ntšamo chë judiënga chë fiesta ora mondbamcá, nyets levadura ojanana cachcá jonýayana, cachcá, bënga šontsamna jtsajbanana oyenana bacna soyënga ínÿengbiana jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë festiñe nye levadúraca ndëpormana tandëse mondbetsesaycá, cachcá, bënga šontsamna jtsiyenana nyetsca soyënga ainaniñe ndocna bacna juábnaca jtsamëse, y ndegombre yomncá jtsóyebuambnayëse y jtsamëse.

<sup>9</sup> Chë inye atśbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca.

<sup>10</sup> Y chca ndoñe quetstétseboše jáuyanana nya tondayama chašmondëtsoyebuambná nyetsca chë quem luarentšënga boyabása o shembásaftaca bacna soye amëngaftaca, chë nye cachëngbiana bëtscá soyënga jtsebomnana tša bošëngaftaca y atbëbanëngaftaca, y chë cachëngbe pormana soyënga diosënga yomnana jtsejuabnayëse adorayëngaftaca ca; er nya chca jamamna, tšëngaftanga cmattsamna quem luarentšana jëftsebocanana.

<sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca

bacna soye tojtsama, o nda nÿe cachabiana bÿetscá soyÿenga jtsebomnama tÿsa tojtseboÿe, o chÿe cachabe pormana soyÿenga diosÿenga yomnama jtsejuabnayÿese tojtsadorana, o yapa tojtsayatsená, o yapa tojtsetmó, o tojtsatbÿebana. Chca entsángaftacna, ni mo ſmuatjót'bema chÿengaftaca cánÿiñe jasama.

12-13 Atſe ndoñe queſnát'smëna jayanana chÿe ndoſbuáchiyÿenga, chÿe bÿengaftaca ndoñe mondbénutananga, aíñe o ndoñe tſabá tmonjamama. Bÿengbe Bÿetsá echántsemna nda chÿengbiana yochjayana ntſamo tmojamcá tſabá o ndoñe tſabá bÿetsemnama, tſÿengaftanga ndoñe. Ndegombre nÿe chÿe oſbuáchiyÿenga tſÿengaftangaftaca imnénutanangbiana cmontsamna chca jayanana. Chcasna, ſmochjama ntſamo Bÿengbe Bÿetsabe uabemana palabreñguíñe endayancá: "Tſÿengaftanga cmontsamna, chca bacna soye amá tſÿengaftangbentsana jtabocnana ca."

## 6

### *Oſbuáchiyÿenga jendemándama tojtsemna ora*

1 Canÿe tſÿengaftanguentſa oſbuachiyá inÿe oſbuachiyabiana canÿe demanda tojtsebomna ora, ¿cha nanjá chÿe ndoſbuáchiyÿenga mandadÿengbioye chÿe soye chamojandmanama? ¿Ndáyeca chca nanjama, y ndoñe chÿe Bÿengbe Bÿetsabe entsángbioye nanjá chabe demanda chamouenama?

2 Tſÿengaftanga ndegombre ſmondétatſÿembo, Bÿengbe Bÿetsabe entsanga mochjayanama quem luarentſa entsangbiana tſabá o ndoñe tſabá tmonjamama. Y chÿenga quem luarentſa entsangbiana chca jayanama tmojtsobenÿe, ¿ndoñe montsobena más base soyÿengama chca jayanama?

3 Tſÿengaftanga ndegombre ſmondétatſÿembo chÿe angelÿengbiámnaca tſabá o ndoñe tſabá tmonjamama bÿenga mochjayanama. Chcasna, bÿenga más jtsobenana chÿe quem luarentſe jÿÿtsiyenama soyÿengama chca játayanana.

4 Y chcase, tſÿengaftangbeñe chca demandÿenga chÿe quem luarentſe jÿÿtsiyenama soyÿengama tojtsemna ora, ¿ndáyeca ſmatjátÿebuayana chÿe oſbuáchiyÿengbiana tondaye tmontsámama entsanga, chÿe soyÿenga chamojandmanama?

5 Chca ſÿenjayana tſÿengaftanga chaſmotsÿuatjama: ¿O tſÿengaftanguentſe ni mo canÿa yondmëna corente osertaná, oſbuachiyÿengbeñe demandÿenga chamojandmanama?

6 Pero ndoñe chca: oſbuachiyÿengbeñe demandÿenga tojtsemna ora, mandadÿengbioye jana chÿe soyÿenga chamojandmanama. Y chca jamana ndoſbuáchiyÿenga mandadÿengaftaca.

7 Y tſÿengaftangbeñe nÿe demandÿenga jájandmanama tojtsemna ora, tſÿengaftangbiana ya canÿe puerte bacna soye jtsemnana. ¿Ndáyeca ndoñe ſmattsóboyaye ínÿenga bacá cmojtsaborlana ora? ¿Ndáyeca ndoñe cachcá ſmatjonÿaye ínÿenga cmojtsabiatbÿebana ora?

8 Pero cach tſÿengaftangaftacna inÿetſá copasana, ínÿengbioye bacá jtsaborlánana y jtsabiatbÿebanana, y tſÿengaftangcá Crístbeñe oſbuachiyÿengbioynaca.

9 ¿Tſÿengaftanga ndoñe ſmondétatſÿembo, chÿe bacna soye amÿenga Bÿengbe Bÿetsabe améndayoye ndoñe mochanjámashÿenguama? Ndoñe matenoíngñana. Ni chÿe boyabása o shembásaftaca bacna soye amÿenga, ni chÿe cachÿengbe pormana soyÿenga diosÿenga yomna ca jtsejuabnayÿese adórayÿenga, ni cachÿengbe boyá o shema ínÿaftaca íngñayÿenga, ni chÿe boyabásenga mo shembasengcá jtsinÿnama boſÿenga, ni chÿe boyabásenga inÿe boyabásengaftaca bacna soye amÿenga,

<sup>10</sup> ni chë atbëbanënga, ni chë nÿe cachëngbiama bëtscá soyënga jtsebomnama tša bošënga, ni chë tša tmoyënga, ni chë uayátsenayënga, ni chë ínÿengbiama bacna soye jtsemëse imnëtsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama.

<sup>11</sup> Y tempo báseftanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmojaperdoná, y chca entsemna mo bebënénga cuaftsemncá; cha tojama tšëngaftanga chabe entšanga chašmotsemnama, nÿe cha chašmotseservénama, y tojama tšëngaftanga mo tšabengcá chabe bominiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espiritu tojamama.

*Bëngbe cuerpo chaotsemna Bëngbe Utabná jtseeservénama*

<sup>12</sup> Mondbëtsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyënga jtsemama ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatsleséncia ndaye sóyecnaca nÿets tempo mandaná jatsmënana.

<sup>13</sup> Mëntsánaca mondbëtsichamo: “Saná uafsbiana y uafsbíá saná chaóyëngacñama ca.” Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama.

<sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondëtatšëmbo, Crísoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtsemnana mo Crístbe cuerpentša soycá. ¿Ntšamo atšbe chjátobena atšbe cuérpoca, chë ndayá yomna mo Crístbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe!

<sup>16</sup> ¿O tšëngaftanga ndoñe šmondëtatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrenguiñe boyabása y shembása tbojéninÿenama mëntsá endayana: “Chë útata mo canÿacá bochántsema ca.”

<sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebomncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamama, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsemama.

<sup>19</sup> ¿Tšëngaftanga ndoñe šmondëtatšëmbo tšëngaftangbe cuerpo yomna mo canÿe yebncá Uámana Espíritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.

<sup>20</sup> Chca endmëna, er Cristo bënga jätsebacama tojanóbana ora, yojamna mo cha bëtscá cuafjopagacá tšëngaftanga Bëngbe Bëtsábenga chašmotsemnama.

Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtsá bëtsemnama.

## 7

### *Jobouamayama jábuayenama*

<sup>1</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá.

<sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá.

<sup>3</sup> Boyábioye bontsemna jamana chabe shembiamma lempe ntšamo jamama ibomncá, boyá bëtsemnama; y chabe shémnaca cachcá chabe boyabiamma chaoma.

<sup>4</sup> Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá, chë boyabe cuerpo ndoñe nÿe cha cánÿabiama ntsemnana, sinó chabe shemiámnaca.

<sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuéntama jtsentšénama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca sëntsicchamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama.

<sup>7</sup> Y atšbe bariëna, atšbe juabna entsemna malaye nÿetscanga chë soyënguiñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna inÿe soyama.

<sup>8</sup> Chë cabá ndbouamnënga y viudanga sëntsëtsëtsná, chëngbiamma tšabá yojtsemna ntjobouamaycá joquédana, atšcá.

<sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jësejuabnayana.

<sup>10</sup> Pero chë bouamnënga sëntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná.

<sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonÿá.

<sup>13</sup> Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana.

<sup>14</sup> Er Bëngbe Bëtsá tojama, canÿe shembása ošbuachiyá chabe entšá chaotsemnama, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiamma oservena entšacá, cha chëngbeñe mo canÿe pamillëcá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe



shema Crístbeñe ndošbuáchiyabiamá mo chabiamá oservená entsacá, chá chéngbeñe mo canye pamillécá jatrabájama tojtseboše ora. Er chca ndoñe tontsemnëse, chë básenga muántsemná ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondménayeca, canya o nyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiamá mo chabe entsangcá.

<sup>15</sup> Pero chë boyá o shema Crístbeñe ndošbuachiyá cachcá jtsenónyayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama.

<sup>16</sup> Chca šmochjama, er aca shema ħntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchemá, y chca, atsbocaná chaotsemnana? o aca boyá ħntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchemá, y chca, atsbocaná chaotsemnana?

<sup>17</sup> Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbétsamëndaye.

<sup>18</sup> Nderado Bëngbe Bëtsá cánÿabioye tbojachembo, y chá ínÿengbeyeca chë más delicadentše base bobachtéma tëtšená tojtsemná, ntšamo chë judiënga monduamancá, chá ndoñe chaondëtsenobiámná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y chá ndoñe chca tëtšená tontsemnëse, chá ndoñe chaondëtsejuabná tëtšená jatsmënnana, ntšamo chë judiënga monduamancá.

<sup>19</sup> Er ndayá iuámana, ndoñe quenátšmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana.

<sup>20</sup> Cada ona bontsemná jtsiyëñana, ntšamo yojoyencá, chabe entsá chaotsemnana Bëngbe Bëtsá tbojanchembo ora.

<sup>21</sup> Bëngbe Bëtsá tcmojanchembo ora, nyets tempo ínÿabiamá oservená cojamnëse, chama ndoñe cattsenócochinÿena. Pero nderado tojtsemná ntšámose jashjáchama ndoñe más chca ntsemnana, cach acbiamá jatrabájama, as chca cochjama.

<sup>22</sup> Er chë nye ínÿabiamá nyets tempo oservená yojamná, Bëngbe Bëtsá chabe entsá chaotsemnana tbojanchembo ora, chá mora ošbuachiyacá, jtsemnana canya ya ndoñe más bacna soyënga jamama juabnëngaca mandaná, sinó Bëngbe Utabnabiamá oservená. Cachcá, chë nye cachabiamá trabajayá yojamná, Bëngbe Bëtsá tbojanchembo ora, mora chá nyets tempo Crístbe oservená jtsemnana.

<sup>23</sup> Cristo bëngbiamá tojanóbana ora, yojamna mo chá bëtscá cuafjopagacá, bënga Bëngbe Bëtsabe entsanga chamotsemnana. Ndoñe šmatjaleséncia nye entsangbe juabnëngaca nyets tempo mandánënga chašmotsemnana, y Bëngbe Bëtsabiamá chacmotsebnëtjomba.

<sup>24</sup> Chcasna, Jesucrístbeyeca atšbe catšátanga, cada ona bontsemná Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

<sup>25</sup> Y chë ndëbouamna shembásengbiamá, chënga aíñe o ndoñe yontsamná jobouamayamna, atše chama ndoñe Bëngbe Utabnabe canye mando quetsátsbomná, pero chanjayana ntšamo atše tsjuabnacá. Bëngbe Bëtsá atšbe tsabiamá tojanjuabóyeca, entsanga montsobena jtsejuabnayana aíñe tsabe palabra bomná chiñe atše tsmënnama.

<sup>26</sup> Atše šontsinÿana, entsá ibojtsemná jtsomñana nye ntšamo mora yot-somñcá, er bënga mora montsiyena puerte padecena soyënguiñe.



27 Shema tcobomnëse, ndoñe cachcá catjëftsonyaye; y ndoñe tcond-bomnësna, ndoñe catjásënguaye.

28 Tcojobouamase, bacna soye ndoñe quecátama; y nderado canye tobiáse tojobouamase, cach bacna soye ndoñe quenátama. Pero chë tmojtsobouamangna padecena soyënguiñe mochanjoyena quem luarentse chamojëftsemnëntscuana, y atse sëntseboşe chënga jujabuáchama chca jatiyena ndoñe chaondëtsamnama.

29 Jesucrístbeyeca atšbe catsátanga, ntšamo sëntseboşe jayanamna mëntšá entsemna: Cristo quem luaroye yochjésabo orscama ya nye batšá entsájamna. Chýeca, morscana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentšénana Bëngbe Bëtsabe soyënguiñe, y ndoñe nye chë bouamná bëtsemnama tbojtsemna soyënguiñe.

30 Cachcá, chë puerte ngménaca tša ošachiyiñe imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamot-siyena mo ndoñe chca tmontsemncá; chë soyënga buamnayënga chamot-siyena mo tondaye chëngbe soye tontsemncá.

31 Chë quem luarentša soyëngaca jtsiyenama imojtsentšénënga entsamna jtsiyenana mo ndoñe chca tmontsamncá, er quem luare ntšamo bënga mora monduabuatmcá, pronto echanjochnëngo.

32 Atse sëntseboşe tšëngaftanga ndoñe chašmondëtsenocochinýenama. Canye entšá ndoñe bouamná tontsemna ora, jtsobenana jtsentšénana Bëngbe Utabnabe soyëngama jtsejuabnayama, y ntšamo oyejuayá cha jabemama;

33 pero chë bouamná nyets tempo jtsenócochinýenana quem luarentša soyëngama, jtsiyenama, y ntšamo chabe shema oyejuayá jtsebomnama;

34 y chca, cha uta soyiñe canye ora jtsentšénana. Chë ndëbouamna shembása y chë tobiáse bontsobena jtsentšénana Bëngbe Utabnabe soyënguiñe sempre jtsejuabnayama. Chënga mondobena jtsentšénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inyetsá, chë bouamna shembásana, nyets tempo jesenócochinýenana quem luarentse vida jtsebomnama soyëngama, y ntšamo chabe boyá oyejuayá jtsebomnama.

35 Atse chca cbontsëtsësná tšëngaftangbe tšabiama, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentšénama.

36 Nderado nda tojtsejuabná chabe uatsësnaye tobiáseftaca jtsobouamayama ibojtsemna ca, chca jamama chë tobiáse ya bëtšá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtseboščá. Chaotsobouamá. Chca tojama ora bacna soye ndoñe ntsamana.

37 Pero nderado inya, tondaye obligaciónaca tontsemna y lempe ntšamo tojtseboščá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntšobouamayana tšabá yomna ca, cha tšabá chca jtsamana.

38 Chcasna, chë tobiáseftaca tojtsobouamá chana, canye tšabe soye jamana; pero chë ndoñe cháftaca tonjobouamá chana, canye más tšabe soye jamana.

39 Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomnëntscuana; pero chë boyá tojóbanëse, cha jtsobenana cachiñe jtobouamayana, nda cha tojtsebošáftaca, pero chca chaoma mo canya Bëngbe Utabnáftaca cányiñe mo canyáca quetsomñecá.

40 Pero atše jayanamna, cha más oyejuayá nántsemna ndoñe tontóbouamase; y sèntsejuabná, átsnaca tsbomna chë Bëngbe Bëtsabe Espiritu chašotsebuayiynama.

## 8

### *Uátšëmbona saná entsangbe pormana soyëngama*

1 Mora chanjóyebuambaye ndayá tšëngaftanga atše šmojatjama, ndayá jtseyayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nÿetscanga osertánënga imomnama. Canÿa tbojtsosertana ora, cha nderado nanjájuaboye, chca bétsemnama puerte uamaná cha yojtsemna ca, pero canÿa, ínÿenga tojtsababuánÿeshana ora, cha jtsobenana chënga becá jujabuáchana.

2 Nderado nda tojtsejuabná ndegombre canÿe soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá.

3 Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entsacá.

4 Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngama, atše šcuayana: bënga corente mondëtatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna.

5 Pero masque celoca y quem luarentše chamomna entsangbiana “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiana diosënga ca ubuátmënga, y banga bëts mándoca entsangbiana “utabnënga ca” uabáinënga),

6 bënga chë ošbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtsejservénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

7 Pero nÿetsca ošbuáchiyënga ndoñe chca quemátstatšëmbo. Básefta entsanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtsesá ora, jtsejuabnayana chca uatšëmbonana bétsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca.

8 Ndegombre, ndayá bënga tmojtsesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominÿiñe ndoñe quemochátsmëna más tšábënga aíñe tmojtsesama; ni ndoñe chcanga, ndoñe tmontsesá causa.

9 Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batšá ošbuáchiyënga y osertánënga, ntšamo tšëngaftanga šmojtsamcá chamuatsmama, y chentšana, chëngbe ainaniñe juabnënga chamotsebomna y chëngbioye chaotsëtsësná ndoñe tšabá tmonjama ca.

10 Er, aca chë soyëngama tatšëmbuá, nderado tcojótbema jasama canÿe luarentše, canÿe soye ndayama entsanga dios yomna ca jtsejuabnayëse

adórayentše, y canye Crístbeñe ošbuachiyá tojtsebmoma ainaniñe juabnënga ndoñe tšabá tonjamama, chca tojáyeyeca, aquécá chë soyëngama ndoñe yondétatšëmbo causa, y cha nderado chentše cojtsesama tcmojinyëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná.

<sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatšëmbuá, cha pochocaná chaotsemnana, er chabe ainanentše echántsemna juabnënga canye bacna soye tojamama, chë saná tojasama. Chca nderado cányabioye catjama, ndabiama Cristo tojanóbana, cha jatsbocama.

<sup>12</sup> Jesucristbeyeca acbe catšatbiama chca bacna soye tcojama ora, chca causa cha canye soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe nye chë catšatbiama, ndayá cach Cristbiámna.

<sup>13</sup> Chíyeca, nderado ndayá atše stsesama, atše tsjama Jesucristbeyeca atšbe catšata chaoma canye soye y chca jamama chabiama canye bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canye bacna soyiñe chaótsatšama.

## 9

### *Jesucristbe ichmónëngbe derecho*

<sup>1</sup> Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná sëntsemnana. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiama atšbe trabajuentšana.

<sup>2</sup> Masque ínÿenga atšbiama ndoñe quematsjuabná atše canye Jesucristbe ichmoná tsmëna ca, tšëngaftangbiamna aiñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cányiñe mo canyáca šmondmënama, puerte tšabá šmontsinÿanÿná atše Jesucristbe canye ichmoná tsmënama.

<sup>3</sup> Mëntsá chanjayana chë atše ndoñe tšabá tijama ca imojtsichámëngbiama:

<sup>4</sup> Ndegombre bënga nÿets derecho fsëndëtsóbomñe jtsobátmanama tšëngaftangbentšana, chë tcojojabuáchëngbentšana, bëngbe trabajuama saná o ndayá jofšiyama chašcuacaredadama.

<sup>5</sup> Y bëngnaca derecho fsëndëtsóbomñe canye shema ošbuachiyá jtsebmoma y bëngaftaca cha jëftsbetšama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mond-betsamcá.

<sup>6</sup> ¿O nÿe Bernabé y atše šojtsëtocana cabëndatbe cucuátšeca jatrabájana vida jtsebmoma, y ndoñe derecho fsëntsebmoma ošbuáchiyënga chašotsacuédanama, Bëngbe Bëtsabiama trabájayama?

<sup>7</sup> ¿Ndëmua mo canye soldadcá tojtsoservená, ndayá tbojtsájabotama cachá nantsatopagana, vida jtsebmoma? Ndocná canye jajañe uvas betiyënga ntjájena, chentša uvasësangá ndoñe ntjuasama. Ndocná oveshënga ntsanÿenana, chë tojabuatëba létšiyentšana ndoñe ntjofšiyama.

<sup>8</sup> Ntšamo atše muentše sëntsichamcá ndoñe nÿe entsangbe juabna quenátsmëna; y Moisesbe leyíñnaca cachcá endayana,

<sup>9</sup> er chabe leyiñe mēntśá endayana: “Aca canye toróftaca shajuana tmojt-satbaná luariñe chacojtsetrabája ora, ndoñe catjuanguētsenaye ca.” Y chca ndoñe quenátayana Bēngbe Bētsá nye toronga inétsanýena ca,

<sup>10</sup> sinó inye más bēts soye; chca endayana ndayá ndegombre bēnga, chē Bēngbe Bētsabiama soyēngama abuayiynayiñe trabájayēnga cha šnetsanýena ca. Chca tmojanábema bēngbiama, er chē fshantse arayá y chē meshēnga atbanayá, entsamna chca jamana jtsojátmanēse, chē tmojátabe shajuarentśana batśá jójyēngacñama.

<sup>11</sup> Y chca, bēnga chē tśabe noticiēngama tchojábuaenase, y chca, Bēngbe Bētsábiocana tśabe bendicionēnga chašmotsebomnama bēnga tifjama, ndoñe yapa tanandátsmēna tšēngaftanga jótjañana, chē šmobomna soyēnguentśana bēnga jēftsiyenama chašcuatśatama.

<sup>12</sup> Inyēnga derecho tmojtsebomna tšēngaftanga jótjañana chē šmobomnentśana chašmuacaredadama, tšēngaftangbeñe chēngbe trabajuama, as bēnga más derecho fstsebomna chca jamama.

Pero bēnga tondaye checbatamēndá, bēnga chē derecho bétsebomnayeca. Chca játamamna, bēnga lempe fsēntsoboyá, chca, bēnga tondaye ntjátamama, y chē causa entśanga ndoñe chašondétsayaunana, bēnga chē tśabe noticiēnga fstsabuayiyná ora.

<sup>13</sup> Tšēngaftanga šmondétatśēmo, Bēngbe Bētsabe bēts yebnoca trabájayēnga Bēngbe Bētsabiama oservēniñe, mondbóyēngacñe chēnga jasama, ndayá entśanga Bēngbe Bētsá jadórama chabe bēts yebnoye tmojiyēbo sananguentśana. Y chē Bēngbe Bētsá jadórama soyēnga amēnga, altaroca, chē juatśēmonama luarentse, chēnga jasana ndayá chentse tmojuatśēmona soyēnguentśana.

<sup>14</sup> Cachcá, Bēngbe Bētsá tojamandá, chē tśabe noticiēnga abuayiynayēngna, vida jtsebomnamna lempe ntśamo tojtsējabotcá chamóyēngacñe ca, chē tśabe noticiēnga abuayiynayama.

<sup>15</sup> Pero atse ndocna te chiyaisemandá ínýēnga chca chašmotsecuedánama, atse chē tśabe noticiēnga abuayiynayá bétsemnama chca derecho tsbómnyayeca, y cach ndoñe mora quem soye quecbatēbuabiamná, tšēngaftanga ndayánaca atse chašmuatsetama. Atśbiama más tśabá nántsemna jóbanana, y ndoñe ntjalesénciana inýa chaoma atse cach atśbiama oyejuayá ndoñe ntjátsmēnama, ínýēngbentśana soyēnga stjójyēngacñe causa.

<sup>16</sup> Atse ndoñe quetsatsjuabná atse canye bēts soye stsama ca, chē tśabe noticiēnga stsabuayiynama, er atse obligaciónaca sēntsemna chca jtsamama, Bēngbe Bētsá chama šojanchémboyeca. ¡Tśa lastemcá atśbiama nántsemna, chē tśabe noticiēnga ndoñe sēntsabuayiynase!

<sup>17</sup> Chíyeca, atse chē tśabe noticiēnga stsabuayiyná nye atse chca jamama stsebóseyeca, atśbe uacanana soye ya stsebomna; pero atse chca stjama, y ndoñe tontsemna nye atse chca jamama stsebóseyeca, masque chca, atse stsama, ndayá jtsamama Bēngbe Bētsá šojanbonýecá.

<sup>18</sup> Y chca, atśbe uacanana soye endmēna atse oyejuayá jtsemnana chē tśabe noticiēnga abuayiynayama, ošbuachiyēngbentśana atse vida jtsebomnama tondaye ntjatoyēngacñecá; chca, atse tondaye quetsátama chē tśabe noticiēnga abuayiynayama tsbomna deréchoca, chē atśbe trabajuentśana vida jtsebomnama.

<sup>19</sup> Atse, masque ndocna entśábeyeca nýets tempo mandaná quetsátsmēna, puerte nduamaná sēnjóbema, mo canya nýets tempo ínýabeyeca mandanacá, nýetscanga jaserviama, chca, atse chca jtsamēse, jobenayama becá entśanga, ntśamo tojopodecá, jayénjanama Crístbeñe chamotsošbuáchema.



<sup>20</sup> Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema.

<sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá.

<sup>22</sup> Chë nÿe batšatema ošbuáchiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondétatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama.

<sup>25</sup> Nÿetscanga chë tmojótjajënga ínÿenga jáyënjanama, chënga jopróntana nÿetsca soyënguiñe jtse nomándayëse, chca, canÿe uacanana soye, tsbuanachëngaca uapormana coronésha juayëngacñama; y chësha betscó jtsancatana. Pero bënga ndoñe; bënga mondoyena Crístbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nÿetsca tescama bënga mochanjëftsebmna.

<sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canÿa ínÿëngbioye jáyënjanama tojotjajuacá, chë ndëmoye jashjanguama yomnana ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatšënga tojtsëtšana y chë ínÿabe cuerpoye ndoñe.

<sup>27</sup> Mo canÿe tšabe peliayacá, chabe cuerpo játsëtšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbioye jtseservénëse chamotsiyenama ínÿëngbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

## 10

### *Cach entsangbe pormana soyënga ndoñe chamondëtsadoránama jábuayenama*

<sup>1</sup> Jesucrístbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nÿetscanga Bëngbe Bëtsá canÿe jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuaftsomñcá.

<sup>2</sup> Chë jantšetësheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga.



<sup>3</sup> Chënga nyetscanga tmojanse cachca saná, chë Bëngbe Bëtsá celocana tojanichmó saná;

<sup>4</sup> y nyetscanga tmojanofsé chë Bëngbe Bëtsá tojanma chë peñësentsana chaóbcna bėjaye. Cristo chëngaftaca yojtsemna jtsanýenama chënga imojt-sajnëntscuana, y ntšamo chë peñësentse chëngaftaca tojanopasacá, yojan-inýanýná Cristo chënga yojtsanýenama.

<sup>5</sup> Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentse.

<sup>6</sup> Lempe chca tojanopasá bënga jinýanýiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama.

<sup>7</sup> Chíyeca, tšëngaftanga ndoñe šmattsadorana entsangbe pormana soyënga, ndayama ínýenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrënguiñe chëngbiana endayancá, chënga canýe ternerá castellánoca tmojanpormá ora, mo dios cuaftsemncá jadórama: “Entsanga tmojanotbiana jasama y jatmuama, y chentšana tmojantsbaná joboyeuama ca”.

<sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nýe canýe te, uta bnëtsana y unga uaranga entsanga tmojanóbana

<sup>9</sup> Bacna soyënga ndoñe šmattsama, jinýama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtscuayëngaca ftëtšenënga.

<sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëts taitángaftaca tojanopasá, bënga jinýanýiyama ntšamo jtsiyenana šojtsamnana, y Moisés, Bëngbe Bëtsabe uabemana palabrënguiñe chca tojëftsanboshjona bënga jábuátambama, bënga, chë Jesucristo yochjésabo orscama ya batšatema yojtsájamna ora oyenëngbiana.

<sup>12</sup> Chcasna, nda tojtsejuabná Bëngbe Utabnabiana tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama.

<sup>13</sup> Ndocna entsá jatócochënguana bacna soyënga jamama, ntšamo tempo ínýenga ndoñe tonjanocochëngcá cachca bacna soyëngama, pero tšëngaftanga corente šmondëtatsëmbo Bëngbe Bëtsá sempre cmochtséjabuachanama chë padecena soyënguiñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínýanýiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánënga, ndocna te šmattsadorana cach entsangbe pormana soyënga, ndayama ínýenga jtsejuabnayana diosënga yomna ca.

<sup>15</sup> Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboje y šmochjayana, ntšamo cbojtsëtsësnacá aíñe o ndoñe tšabá bëtsemnana.

<sup>16</sup> Ntšamo Jesús chë coptema vinoyama Bëngbe Bëtsábioje tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýanýayana bënga Crísoftaca cánýiñe mo canýacá

imomnama, chabe buiñe juabuáshanëse bēngbiama tojanóbanayeca. Y chē mondbajataye tandēse tmojase ora, jtsinñanñayana bēnga Crístoftaca cánñiñe mo canñacá imomnama, cha bēngbiama tojanóbanayeca.

<sup>17</sup> Bēnga ošbuáchiyēnga masque banga mondmēna, chca orna nñetscanga cach tandēsentsana bēnga jasana, y chíyeca bēnga jtsemnana mo canñacá, mo Cristbe cuerpcá.

<sup>18</sup> Tšēngaftanga šmochtsejuabnaye ndayá chē Israeloca bachnanga mond-uamanama: chēnga chē altaroca tmojóba y tmojuátšēmbona bayēnguentšana jasana, y chca chēnga chora jtsinñanñayana chēnga cánñiñe mo canñacá imojtsemnana Bēngbe Bētsáftaca, chē chca tmojtsadoranáftaca.

<sup>19</sup> Y chca, atše ndoñe quetsátsboše jayanama chē entsangbe pormana soyēnga mo diosēnga cuaftsemncá, uámana soyēnga yomna ca. Ni chē cach entsangbe pormana soyēnga diosēnga yomna ca jtsejuabnayēse jadórama uátšēmbona saná inñe sanama más iuámana ca.

<sup>20</sup> Pero aíñe, entsanga cach entsangbe pormana soyēngama mo diosēnga cuaftsemncá, chca tmojuátšēmbona ora, ndegombre chēnga Satanás y chabe uajabuachanēngbioye jtsadoránana, y ndoñe Bēngbe Bētsábioye. Y atše ndoñe quetsátsboše, tšēngaftanga chca uatšēmbonana šmojasama, cánñiñe mo canñacá chē bayējēngaftaca chašmotsemnana.

<sup>21</sup> Tšēngaftanga ndoñe quešmátobena chē vínoye coptémentšana jofšiyana, ntšamo chē ošbuáchiyēnga bētsemnana mondbetsamcá, y chentšana chē cach entsangbe pormana soyēnga, mo diosēnga cuaftsemncá jadórama vínoye coptémentšánēnaca. Chca šmojama ora jtsemnana mo chē diablēngaftaca cuaftsesangcá. Y cach ndoñe quešmátobena vínoye jofšiyana y tandēse jasana, ntšamo ošbuáchiyēnga bētsemnana mondbetsamcá, y chentšana cach entsangbe pormana soyēnga mo diosēnga cuaftsemncá jadórama fiestentša sanánaca jasana, y chca chē bayējēngbioye jtsadoránana.

<sup>22</sup> Bēnga chca tmojtsamama, bēnga mochanjama Bēngbe Utabná puerte etonaná bēngaftaca chaotsemnana, er chē bayējēngaftaca bēnga chca jt-samana. ¿O imojtsejuabná bēnga chabiamana más obenana bomnēnga imomna ca?

*Lempe šmochjama Bēngbe Bētsá puerte bētsá y uamaná yomnama jinñanñiyama*

<sup>23</sup> Mondbétsichamo: “Entselesenciana ndayánaca jamana, ndayama Bēngbe Bētsá ndocá tonjayana ca”, pero básefta soyēnga atše stjama ora ndoñe nñetscangbe tšabiamana ntsemnana. “Entselesenciana ndayánaca jamama ca”, pero nñetsca soyēnga ntšamo bēnga tmojamcá, ošbuachiyēngbioye ndoñe ntjuabuáchana Jesucrístbeñe más chamotsošbuáchema, y ainaniñe más añemo chamotsebomnana.

<sup>24</sup> Ndocná chaondētsama lempe ntšamo tojobenacá nñe cachabe tšabiamana, ndayá más chaotsama chē ínñengbe tšabiamana.

<sup>25</sup> Lempe mercadoca tmojtsena soyēnguentšana šmochjase, ntjatstjanaycá chē mēntšena aíñe o ndoñe tmonjuátšēmbona chē cach entsangbe pormana soyēnga, mo diosēnga cuaftsemncá jadórama ca. Ndoñe chca šmattsetjanaye, ntšamo tšēngaftangbe ainaniñe juabnēnga šmojtsebomnana;

<sup>26</sup> er ntšamo Bēngbe Bētsabe uabemana palabrenguiñe endayancá: “Quem luare Bēngbe Utabnabe soye endmēna, y lempe ntšamo chiñe yomncánaca ca.”

<sup>27</sup> Nderado canñe ndošbuachiyá tcmojúbuaja chábioca jasama, y tšēngaftanga choye jama tša šmojtsebošēse, lempe ntšamo cha chacmojonanjacá šmochjase, ndayentšana chē saná tojóboconama ndocá ntjatstjanaycá, ntšamo tšēngaftangbe ainaniñe juabnēnga šmojtsebomnana.

28 Pero nderado nda tcmojáuyana: “Quem mēntšena cach entšangbe pormana soyēnga mo diosēngcá jadórana tmonjanátšēmbona ca”, as ndoñe chana šmatjase, er canya chca tcmojáuyana, y ainanentše šmojtsebmna juabnēnga, chē chca jamama ndoñe tšabá bétsemnama.

29 Atše sēntsoyebuambná ndayá chē chca tcmojauyanabe ainaniñe juabnēngama, chē soye jasana ndoñe tšabá yondmēnama, ndoñe chē tšēngaftangbe ainanentša juabnēngama.

Pero tšēngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bétsemnama, ntšamo chē ínñabe ainaniñe juabna yobomnama ca?”

30 Y atše chē ndayá stsesama Bēngbe Bētsá tijētschuase, ¿ndáyeca inña šochjauyana atše ndoñe tšabá tijama ca, chē soye tijasama, chē ndayama Bēngbe Bētsá tijētschuá ca?”

31 Masque ntšámnaca, cachcá, chašmojtšesá, o chašmojtsofšššná, o ndaye inñe soye chašmojtšama, ndayama Bēngbe Bētsá ndocá tonjayana, lempe šmochtsama Bēngbe Bētsá puerte bētsá y uamaná yomnama jtsinñanñayama.

32 Tondaye šmatjama ndayá chaobená jamana, ínñenga Cristo chamotsábotema. Ndoñe chca šmatjama, ni judiēngbiama, ni ndoñe judiēngbiama, ni chē Bēngbe Bētsábeñe ošbuachiyēngcá enefjuanēngbiama.

33 Smochtsama ntšamo atše sēndēntšencá, nñetscanga nñetsca soyēnguiñe oyejuayēnga jtsabamnama, lempe ntšamo stjobenacá jtsamēse, ndoñe nñe atšbe tšabiama, ndayá masna chē ínñengbe tšabiama, chēnga chamotsobemama chēngbe bacna soyēnguentšana atsebácanēnga jtsemnama.

## 11

1 Tšēngaftanga šmochtsiyena ntšamo atše sēndamcá jtsamēse, cach ntšamo atše sēndoyencá, ntšamo Cristo inetsamcá jtsamēse.

*Ntšamo yomna shembásenga tšabá jtsemnama, ošbuachiyēngcá tmojénefjna ora*

2 Atše sēntseboše tšēngaftanga jáuyanana tšabá šmojama ca, tšēngaftanga nñetsca soyēnguiñe atšbiama šmnétsenojuabnama, y tšēngaftanga šmojtšabuátambama y šmojtšamama ntšamo tchbonjanabuatambacá, cachcá ntšamo atše sēnjētsanboshjoncá.

3 Pero atše sēntseboše tšēngaftanga chacmēsertá: nda nñetsca entšanga iuamēnda cha, Cristo endmēna; y nda shémbioye ibománda cha, boyá endmēna; y nda Crístbioye ibománda chana, Bēngbe Bētsá endmēna.

4 Nderado canñe boyabása chabe bestšaše tojtšenátsbotse, inñe ošbuáchiyēngaftaca cánñiñe Bēngbe Bētsáftaca tbojtsencuénta ora o Bēngbe Bētsabe juabna tojtsoyebuambná ora, cha jamana cachá chaotsēuatjama, chabe bestšášeca chca tojama causa.

5 Pero nderado canñe shembása chabe bestšaše ndoñe tontsenátsbotse, inñe ošbuáchiyēngaftaca cánñiñe Bēngbe Bētsáftaca tbojtsencuénta ora o Bēngbe Bētsabe juabna tojtsoyebuambná ora, cha jamana chama cachá chaotsēuatjama; jtsēuatjana mo cha lempe jshetētšená cuaftsemncá.

6 Er, nderado canñe shembása ndocna te tontseboše chabe bestšaše jtšenátsbotsana, chabiama más tšabá nántsemna lempe chaotsenójshetētše. Pero tojtsejuabná utsbotjená o chca lempe jshetētšená jtsemnama cha yochtsēuatja ca, as chabe bestšaše chaotsenátsbotse.

7 Boyabása ndoñe quebnátsmēna chabe bestšaše jtšenátsbotsana, er Bēngbe Bētsá tojanma ntšamo cachá yomncá cha chaotsemnama, y chē boyabása chca jtsemnēse, jtsinñanñayana Bēngbe Bētsá chabe mandayá yomnama.

Pero ntšamo chë shembása yomncá, jtsinÿanÿnayana chë boyabása chabe mandayá yomnama;

<sup>8</sup> er Bëngbe Bëtsá, boyabása ndoñe tbonjanma shembásabentsana, ndayá shembása boyabásabentsana.

<sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca.

<sup>10</sup> Chíyeca, y chca jamama angelënga tšabá jtsinÿanánayeca, shembása jtsemnana chabe bestšaše chaotsenátbotsama, chca, chaotsinÿnama inÿa chábeñe yomándama.

<sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana.

<sup>12</sup> Er masque Bëngbe Bëtsá, shembása boyabásabentsana tbojanma, mora, shembásabentsana boyabása jóbocnana; y lempe Bëngbe Bëtsábiocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canÿe shembásabiamna Bëngbe Bëtsáftaca jencuëntana, bestšaše ntsenatsbotscá.

<sup>14</sup> Ntšamo entšanga sempre mondbetsejuabnaycá, ndayá tšabá bëtsemnana, bëngbioye jtsabuátambayana, boyabása bën stjënësha chabuájua tojalesenciase, cha jamana cachá chama chaotsëuatjama.

<sup>15</sup> Pero shembásabiamna, chë bën stjënësha jtsinÿanÿnayana chabe botamanana y uámanana, er Bëngbe Bëtsá tojanma shembása bën stjënësha chaotsábomnama, chca, cha chaotsebomna ndáyeca chabe bestšaše jtsenátbotsama.

<sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnana.

*Bëngbe Utabnabiamna jtenójuaboyama jasama ora, chënga ndoñe tšabá imonjánama*

<sup>17</sup> Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefnja ora, Bëngbe Bëtsá jadórama, atše šontsinÿana chë soye yojt-soservena tšëngaftanga más bacá chašmotsemnana, y ndoñe tšëngaftangbe tšabiamna.

<sup>18</sup> Natsana cbochjáuyana, atše sënjouena tšëngaftanga ošbuachiyëngcá šmojénefnja ora, báseftanga canÿe soye imnétsejuabnaye y ínÿengna inÿetšá ca, y atše sëntsejuabná batšana ndegombre chca yojtsemna ca.

<sup>19</sup> Ndegombre jtseytana tšëngaftangbeñe chamotsemna báseftanga canÿe soye juabnayënga y ínÿengna inÿetšá, chca, nÿetscanga chamotsetatšëmbuama ndëmuanÿenga imojtsemna chë Bëngbe Bëtsá tojayana chënga tšabá tmojama ca.

<sup>20</sup> Tšëngaftanga tandëse jasama y vínoye jofšiyama šmojénefnja ora, ntšamo bënga fsënduamancá, Bëngbe Utabná bëngbiamna tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamna jtenójuaboyama jasama ora;

<sup>21</sup> er chë jasama tojobuache ora, cada ona inóntša jasama ndayá tojijëbcá, y ndoñe ntjatobátmanana nÿetscanga ndayánaca jasama chamotsebomnëntscuana; báseftanga shëntseca joquédana, y ínÿengna tša jëftsesana y jofšiyana jëftsótmenantscuana.

<sup>22</sup> ¿Tšëngaftanga ndoñe yebna šmondobomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefnja ošbuáchiyënga



nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše chochjáuyana tšabá šmojama ca, chë Bëngbe Utabnabiamama jasama ora chca šmojamama? ¡Ndegombre ndoñe!

*Bëngbe Utabnabiamama jtenójuaboyama saná  
(Mt 26.26-29; Mc 14.22-25; Lc 22.14-20)*

<sup>23</sup> Er atše cach Bëngbe Utabnábentsana ntšamo chontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona íbeta, tandëse tojanca,

<sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamama chanjóbana. Ntšamo mora montsamcá šmochtsama, atšbiamama jtenójuaboyama ca.”

<sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiamama jtenójuaboyama ca.”

<sup>26</sup> Er tšëngaftanga cada quemëntša tandëse chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántsinñanñaye cha entšangbiamama tojanóbanama.

*Ntšamo yomna jamana, Bëngbe Utabnabiamama jtenójuaboyama jasama ora*

<sup>27</sup> Chcasna, Bëngbe Utabnabiamama jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiamama Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinñanñayana, Bëngbe Utabnabe cuerpo y buiñe chabiamama tondaye yonduámanama.

<sup>28</sup> Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora.

<sup>29</sup> Er nderado nda tojase y tojofšé, chë Bëngbe Utabnabiamama jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama.

<sup>30</sup> Chíyeca, banga tšëngaftanguentšënga šoquënga šmojtsemna, ínñënga añemo ndbomnënga, y ínñëngna ndoñe nñe báseftanga tmojóbana.

<sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játaçastigana, ntšamo tšabá yomncá ndoñe tmonjase causa.

<sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínñyama, y chca, bayté chentšana, Bëngbe Bëtsá ndoñe chabondëtsemna játanayana bënga šojtsamna nñetsca tescama castigánënga jtsemnana ca, cánñiñe chë nñe quem luarama enójuabnaye entšángaftaca.

<sup>33</sup> Chca, Jesucristbeyeca atšbe catšátanga, tšëngaftanga chë Bëngbe Utabnabiamama saná jasama chašmojénefná ora, cánñiñe nñetscanga šmochjabojátša.

<sup>34</sup> Y nderado nda tbojtseshëntšana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga játaçastigana chora ndoñe tšabá šmonjama causa. Chë inñe soyëngama ndayama tšëngaftanga šmonjatjá, chamna chanjamánda tšëngaftanga jányama chaijá ora.



## 12

### *Bëngbe Bëtsabe tsetana obenana, tšabe soyënga jamama*

<sup>1</sup> Jesucristbeyeca atšbe catšátanga, atše sëntseboše tšëngaftanga chašmotsetátšëmbo Bëngbe Bëtsabe tsetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondëtatšëmbo, tšëngaftanga Crístbeñe ndošbuáchiyënga šmonjamna ora, ínÿenga cmonjanabuatambá soyënga, y chora tšëngaftanga šmonjamna ínÿabeyeca uasjanëngcá, cach entsangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsobenana.

<sup>3</sup> Chíyeca, atše mora sëntseboše tšëngaftanga chašmotsetátšëmbo, ndocná ntsobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espiritu jamana bënga ndoñe chamondëtsebomnana cachca tsetana obenana tšabe soyënga jamama, pero lempe jobayana cach canÿe Espiritbeyeca.

<sup>5</sup> Bënga, Bëngbe Bëtsá mondëservena, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé.

<sup>6</sup> Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana.

<sup>7</sup> Bëngbe Bëtsá inétsama cada ošbuachiyá chaotsebomnana canÿe tsetana obenana tšabe soyënga jamama, y chë soye jtsinÿanÿnayana Bëngbe Bëtsabe Espiritu chabe ainaniñe yomnana; y chë tsetana obenana jtsemnana nÿetscangbe tšabiama.

<sup>8</sup> Bëngbe Bëtsá, Espiritbeyeca, canÿa obenana jatstayana puerte osertanánaca chaóyebuambama, y ínÿana obenana cach Espiritbeyeca ndayámnaca corente jtsetatšëmbëse chaóyebuambama;

<sup>9</sup> ínÿana cach Espiritbeyeca, obenana Crístbeñe puerte chaotsošbuáchema, y ínÿabiamna, cach nÿe canÿe Espiritbeyeca, obenana jatstayana šoquënga jáshnama;

<sup>10</sup> ínÿana, obenana tšabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama.

<sup>11</sup> Pero cach Espiritu, chë nÿe canÿe Espiritu lempe chca jamana, ntšamo tšabá bëtsemnana cha tojtsejuabnacá cada entsábioye jatstayëse.

### *Nÿetsca ošbuáchiyënga cánÿiñe, mo Cristbe cuerpcá jtsemnana*

<sup>12</sup> Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Crístbeñe ošbuáchiyënga, pero Crístbeyeca, bënga cánÿiñe mo canÿacá jtsemnana.

<sup>13</sup> Er bënga nÿetscanga, judiënga o ndoñe judiënga, nÿe ínÿabiamna nÿets tempo oservëngna o cachëngbiama trabájayënga šojanëbaye, Crísoftaca cánÿiñe mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

14 Cachcá, canye cuerpo ndoñe nye canye soye ntsebomnana, ndayá ba soyënga.

15 Nderado shecuatše tojayana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana.

16 Nderado matscuaše tojayana: “Bominye ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana.

17 Nyets cuerpo bominye tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jonguétsetšiyana.

18 Pero ndegombre endmëna, Bëngbe Bëtsá nyetsca soye cuerpentše tojancjá ndayentše cha tojánbošenentše.

19 Nyetsca cuerpentša soyënga nye canye soye tojtsemnëse, ndoñe canye cuerpo nántsemna.

20 Pero ndegombre endmëna, masque ba soyënga cuerpentše yomna, nye canye cuerpo jtsemnana.

21 Bominye quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

22 Inyetsá, chë cuerpentša soyënga, chë tojtsinýana mo obenana ndbomna y nduámana soyëngcá, jtsemnana chë cuerpama más iyta soyënga.

23 Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjëse. Y chë cuerpentša soyënga, ndayama bënga jtsëuatjana ínýenga chamotsonýama, bënga jamana ínýenga ndoñe chamondëtsonýama, chiñe entšayaca jtichëtjëse.

24 Pero chë cuerpentša soyëngaca, chë nyetscanga jtsonýayana y botamana jinýama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinýenama.

25 Cha chca tojanma, cuerpentša nyetsca soyënga chë cuerpama trabajo cánýiñe chamotsamama, y chca, cada soye chaotsama trabajo chë cuerpentša nyetsca soyëngbe tšabiama.

26 Nderado canye cuerpentša soyama bacna soye tojopasá, chora nyetsca chë cuerpentša soyëngámnaca chca ndoñe tšabe soye jtsebínýnana; pero canye cuerpentša soyama tcojama más uámana soye chaotsemnana o ndaye tšabe soye tojopasase, chora nyetsca chë cuerpentša soyëngámnaca chca tšabe soye jtsebínýnana.

27 Cachcá, tšëngaftanga Crístbeñe ošbuáchiyënga, cháftaca cánýiñe mo canýacá jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá.

28 Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiama abuatambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínýengbioye puerte ujabuáchanënga, chë inye ošbuachiyëngbioye amëndayënga, y chë nyetsca biyañe jtsóyebuambnayama obenana bomnënga, tempo ndmabiyañe.

<sup>29</sup> Ndegombre, ošbuachiyëngcá enefjuanëngbeñe nÿetscanga ndoñe Jesucristbe ichmónënga ntsemnana, nÿetscanga ndoñe Bëngbe Bëtsabe juabna oye-buambnayënga, nÿetscanga ndoñe abuatambayënga, nÿetscanga ndoñe Bëngbe Bëtsabe obenana bomnënga, bëts soyënga jamama.

<sup>30</sup> Nÿetscanga ndoñe šoquënga jáshnama obenana bomnënga; nÿetscanga ndoñe nÿetsca biyañe jtsóyebuambnayama obenana bomnënga, tempo ndmabiyañe; ni nÿetscanga ndoñe obenana bomnënga quemátsmëna, chë tempo ndmabiyañe nÿetsca biyañe jtsóyebuambnayama obenana bomnënga ntšamo tmojtsichamcá josértama y ínÿengbiöye chama jtsabuayiyayama.

<sup>31</sup> Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

### *Bonshánana jtsebmomnana*

Y inÿe soye más, atše cbochanjínÿanÿiye ntšamo šmojtsobena cabá más tšabá jtsiyenana, Bëngbe Bëtsá jtseservëñe.

## 13

<sup>1</sup> Nderado atše stjóyebuambaye entšangbe biyañe y angelëngbe biyañe, pero ínÿengbiöye ndoñe sentsababuánÿeshanëse, atše stsemna canÿa tondayama uamaná, mo nÿe canÿe metalëshe tojtsenancá, o mo nÿe canÿe platillëshcá ndoñe tšabá tontsenanëshe.

<sup>2</sup> Y atše obenana stsebmomna Bëngbe Bëtsabe juabna jóyebuambayama y nÿetsca soyëngama, y chë Bëngbe Bëtsá tempo entšanga ndoñe tonjaninÿanÿë soyënga šojtsësertana, y Bëngbe Bëtsabe nÿetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše tondaye sëntsemna.

<sup>3</sup> Y atše lempe ntšamo stsebmomncá ndbomnëjëmënga stsëjátaye, y ínÿengbiöye stjenontréga atšbe cuerpo chamojuinÿema, pero ínÿengbiöye ndoñe sentsababuánÿeshanëse, atše ndocna uámana soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebmomnana. Inÿenga ababuanÿeshaná ndoñe ntsántšabošana ntšamo inÿa tojatsbmomncá, ni ntsenábotamnayana, ni cachá chë ínÿengbiama más uamaná ntjätenobiamnayana;

<sup>5</sup> ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana.

<sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe.

<sup>7</sup> Inÿenga ababuanÿeshaná, ainaniñe añemo jtsebmomnana nÿetsca padecena soyënguiñe, lempe ntšamo más tšabá yomna soyënguiñe jtsošbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

<sup>8</sup> Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebmomnana;

<sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nÿe batšatema bëngbiöye jtsinÿanÿayana Bëngbe Bëtsabe soyëngama, ndoñe lempe;

<sup>10</sup> pero Jesucristo chaojésabo ora, y chaojama bēnga chamotsemna lempe ntšamo Bēngbe Bētsá bēngbiana yojanjuabnacá, quem soyēnga, chē n̄ye batsatema bēngbioye jtsin̄yan̄nayana Bēngbe Bētsabe soyēngama, ya ndoñe más queochátsbin̄ya.

<sup>11</sup> Atše básatema ora, sēnjanoyebuambná, sēnjanjuabná, y soyēngama tšabá jtsetatšēmbuamna sēnjanjuabná mo can̄ye basetemcá; pero bētsá sēnjanóbema orna, sēntsanajbaná lempe amana mo can̄ye basetemcá.

<sup>12</sup> Cachcá, mora bēnga quem luarentse n̄ye batsatema Bēngbe Bētsabe soyēngama jtsetatšēmbuana, mo can̄ye espejuin̄e tmojtson̄yácá, pero ndoñe n̄ya corente tšabá. Pero can̄ye te bēnga mochántsetatšēmbo lempe n̄yetsca soyēngama, bēnga Bēngbe Bētsabe delante chamojtsemna ora. Mora atše sēntsetatšēmbo n̄ye batsatema Bēngbe Bētsabe soyēngama, pero chora lempe chanjuábuatmana, ntšamo Bēngbe Bētsá corente šuabuatmcá.

<sup>13</sup> Pero morna, Bēngbe Bētsábeñe jtsošbuáchiyana, chábeñe jtsobátmanana, y chábioye y ín̄yengbioye jtsababuán̄yeshanana, chē soyēngna n̄yetsca tescama jēftsemnana; pero chentšana chē más uámana soye endmēna ín̄yenga jtsababuán̄yeshanana.

## 14

### *Ndmabiyañe obenana Bēngbe Bētsabe tšetánana*

<sup>1</sup> Bētscá šmochtsama n̄yetscanga jtsababuán̄yeshanēse chašmotsiyenama, y puerte šmochtseboše jtsebomnama chē Bēngbe Bētsabe tšetana obenana tšabe soyēnga jamama; pero chentšana masna, chē Bēngbe Bētsabe juabna jóyebuambayama obenana.

<sup>2</sup> Er chē tempo ndmabiyañe mora jóyebuambayama obenana bomná, Bēngbe Bētsábioye jtsatsētsnayana y ndoñe entšángbioye, er ndegombre entšanguentse ntšamo cha tojtsoyebuambnacá ndocná ntjosértana; chana chabe espíroftaca jtsóyebuambnayana y ndoñe n̄ye chabe juábnaca, chē tempo Bēngbe Bētsá ndocna entšábioye tbonjanin̄yinyé soyēngama.

<sup>3</sup> Pero chē Bēngbe Bētsabe juabna oyebuambnayana entšanga jtsētsētsnayana, chēnga más chamotsošbuáchema y ainaniñe añemo chamotsebomnama, Bēngbe Bētsabe soyēngama jábuayenama, y jamama padecena soyēnguiñe tmojtsemna órncá añemo chamotsebomnama.

<sup>4</sup> Chē tempo ndmabiyañe mora jóyebuambayama obenana bomná, jtsamana n̄ye cha más jtsošbuáchiyama y ainaniñe añemo jtsebomnama; pero chē Bēngbe Bētsabe juabna oyebuambnayana jtsamana chē ošbuachiyēngcá enefjuanēnga chca soyēnga chamotsebomnama.

<sup>5</sup> Atše sēntseboše n̄yetsca tšēngaftanga chē tempo ndoñe šmonjanbiyañe mora jóyebuambayama obenana chašmotsebomnama, pero chama atše más sēntseboše tšēngaftanga chē Bēngbe Bētsabe juábnaca soyēnga chašmotsóyebuambnama. Chē Bēngbe Bētsabe juábnaca soyēnga oyebuambnayá más uamaná jtsemnana chē in̄ye biyañe oyebuambnayabiama; chca ndoñe nántsemna, ntšamo can̄ye biyañe tojayancá chē biyañe oyebuambnayá tbojtsēsertánese y chē ošbuachiyēngcá enefjuanēnga tojábuyanase, y chca, chē soyēnga tmojouenama, chēnga chamotsobena más jtsošbuáchiyama y añemo jtsebomnama.

<sup>6</sup> Y mora, Jesucristbeyeca atšbe catsátanga, atše nderado tchojábuache y n̄ye in̄ye biyañe tchojáuyanese, ¿chca ntšamo cbatjújabuache? Atše jtsobenana jujabuáchana, n̄ye ntšamo chē biyañe tijayancá átsnaca šojtsēsertánese, y ndayá Bēngbe Bētsá šojin̄yinyecá entšanga jábuayenama stjobenase, chē Bēngbe



Bëtsá tojama atše jtsetatšëmbuama soye, chë Bëngbe Bëtsabe juábnaca stsoye-buambná soye o chë tšëngaftanga jabuátambama cha yoboše soye.

<sup>7</sup>Entsanga monduamana ndayánaca juéanana, mo flautëfja o arpa, vida nd-bomna soyënga; cada sóyeca inyetsá juéanama ndoñe tontsopodénëse, ndocná nantsobena jtsetatšëmbuama ndayá canya chë soyëngaca yojtseánama.

<sup>8</sup>Y nderado nda trompetëfjua tojuájetëta ora, soldadënga japéliama chamoprontama, chë uajatëtaná inyetsá, nya chama ndoñe tonjuájetëtëse, ndocná buanjoserá y jempéliama ndoñe nanjoprónta.

<sup>9</sup>Tšëngaftangaftácnaca cachcá jtsopasánana. Inyënga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbonštšamo šmojtšichamcá. Nántsemna mo nye cányënga cuaftsoyebuambnacá.

<sup>10</sup>Atše sëntsejuabná, ndegombre quem luarentše ba inye biyañe entsanga imnëtsoyebuambnayana, y ndaye biyáñnaca tmojoyebuambá ora, sempre jtsemnana inyënga ntšamo chënga tmojtšichamcá osertánënga.

<sup>11</sup>Pero ntšamo inya chabe biyañe šojauyancá atše ndoñe šontsësertánëse, atše stsemna canye chabiamana ndosertana biyañe oyeambuambayá, y chánaca cachcá atšbiama.

<sup>12</sup>Chcasna, chë Uámana Espíritu šondinyanýná obenana jtsebobnana tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebobnana inétsama obenana.

<sup>13</sup>Chíyeca, chë tempo ndmabiyañe mora jóyebuambayama obenana tojtsebobmná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuayenama obenana chaotsebobnana.

<sup>14</sup>Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá.

<sup>15</sup>Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stšichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse.

<sup>16</sup>Nderado aca Bëngbe Bëtsá cojtsatschuaná nye espíritoca, y canya quem Bëngbe Bëtsabe tšetana obenanama ndosertaná tmojóyeunase, cha ndoñe ntsobenana jayanana “chca chaotsemna ca”, cach aquëcá cha yojtsejuabnana jinýinýiyama, er ntšamo cojtsichamcá cha ndoñe ntsësertánana.

<sup>17</sup>Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebobnana.

<sup>18</sup>Atše, Bëngbe Bëtsá sëntsatschuaná inye biyañe jóyebuambayama tšëngaftangbiama más tsobenama;

<sup>19</sup>pero Crístbeñe ošbuachiyëngcá tmojénefná ora, atše más sëndbëtseboše nye mo shachna palabratémnaca jóyebuambayana, chënga aíñe catafjoser-tacá, chca, inyënga jabuátambama, y ndoñe bnëtsana uaranga palabrenga jatóyebuambnayana inye biyañe, chënga chaósertama ndoñe tontsopodénëse.

<sup>20</sup>Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatëmëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye.

<sup>21</sup>Bëngbe Bëtsabe uabemana palabrenguiñe, Bëngbe Utabná mëntsá tojánayana:

Atše quem entšángbioye chanjáuyana,



ínÿenga inÿe luarëngocana ashjajnëngaftaca, chëngbiana canÿe ndosertana biyañe oyebuambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inÿe biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe.

<sup>23</sup> Er tšëngaftanga nÿetscanga ošbuachiyëngcá šmojënefjna ora, nÿetscanga ba biyañe šmojtsoyebuambná, y choye tojámashëngo canÿa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca.

<sup>24</sup> Pero nÿetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canÿa Bëngbe Bëtsabeñe ndošbuachiyá o canÿa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nÿetscanga tmojtsichámuama.

<sup>25</sup> Y Bëngbe Bëtsá chábioye bochanjinÿinÿiye ntšamo cha ainaniñe toja juabó y tojabošencá, ndayá ndocnábioye tbonjinÿinÿecá, y cha echanjoshëntsamentsiye Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

### *Ošbuachiyëngcá šmojënefjna ora, ntšamo tšabá yomncá lempe šmochtsama*

<sup>26</sup> Chcasna, Jesucristbeyeca atšbe catsátanga, šmojënefjna ora, cada ona ndayánaca jtsebomnana nÿetscangbiana: ínÿengna jtsobenana javérsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entsanga jábuayenana ntšamo inÿa inÿe biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnana Cristo jasérvia.

<sup>27</sup> Nderado inÿe biyañe jóyebuambayama tojtsemnëse, útata o nÿa másese únganga chca chamoyebuambá, y canÿánÿa; y jtseytana ndánaca ntšamo tmojtsichamcá chabosertá y nÿetscanga chama chauabuayená.

<sup>28</sup> Y chca chabosertama y nÿetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefjna ora chë chca oyebuambnayá bontsemna ndoñe chca biyañe ntsóyebuambnayana, sinó nÿe canÿa tojtsemna ora cha jtsobenana chca Bëngbe Bëtsáftaca jencuéntana.

<sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábicana tayojtsóbocanama.

<sup>30</sup> Pero canÿa Bëngbe Bëtsabe juabna tojtsóyebuambnantscuana, inÿa chentše ouenana tbemanábioye Bëngbe Bëtsá tbojinÿinÿé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inÿa chaóyebuambama.

<sup>31</sup> Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjínÿama y nÿetscanga añemo jatšatayama.

<sup>32</sup> Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora;

<sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnama, y nye ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entsanga mondbénefjna luarënguenache endbetsemncá,

<sup>34</sup> tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënefjna ora, er ndoñe quenátslesenciana chënga chora chamuátoyebuambnama, y aïne chënga entsamna chëngbe boyanga jtsayaunanana, ntšamo Moisesbe leyiñe endayancá.

<sup>35</sup> Chënga ndayánaca jtsetatšëmbuana tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jtsoyebuambnayana tšëngaftanga ošbuachiyëngcá šmojënefjna ora.

<sup>36</sup> ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cányënga ndoñe ntsobenana jayanama ndayá jamama cmojtsamnama.

<sup>37</sup> Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnama.

<sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

<sup>39</sup> Chcasna, Jesucrístbeyeca atšbe catsátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínýënga ndoñe chamondëtsóyebuambnama;

<sup>40</sup> pero lempe šmochjama ntšamo jamama yomncá, y ndoñe nye ntšamo cada ona tojatsjuabnacá.

## 15

### *Cristo tojtanayenama*

<sup>1</sup> Morna, Jesucrístbeyeca atšbe catsátanga, atše sëntseboše tšëngaftanga chašmuatenójuaboma atše tcbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucrístbeñe šmojtsošbuaché y cha jtseservénëse šmojtsiyena.

<sup>2</sup> Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nye ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëftsanboshjona, Bëngbe Bëtsábiocana atše tjanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá;

<sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrënguiñe chabe juabna oyebuambnayënga chama tmojanayancá;

<sup>5</sup> chë Pédrëbioye tbojánëbëbocnama, y chentšana chë bnëtsana útata ca uabobáinëngbioynaca.

6 Chentsana mo shachna patsama más chábeñe ošbuáchiyënga tojánëbëbuacna, chënga cánÿentse imojtsemna ora; chënguentsãnga banga cabá vida imotsóboñe, masque báseftanga ya tmojóbana.

7 Chentsana Santiágbioye tbojánëbëbocna, y chentsana nÿetsca chabe ichmónëngbioye.

8 Y chentsana átšnaca šonjánëbëbocna. Mo canÿe šešona cabá shbená tojonÿnacá, Cristo chabe ichmoná šonjánbema, chë tempo chama jopróntama ntseboñcá, ndayëntscuana ínÿenga cha tojanabuatambá.

9 Er atše sëndmëna chë más batšá uamaná Jesucristbe ichmónëngbeñe; y ni merecido taitatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrinama.

10 Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiama jtsamana, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiama; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiama jtseboñëse.

11 Ndayá más yojtsámana ndoñe quenátsmëna, atše o chënga, Jesucristbe soyëngama abuayinyaiñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

### *Chë obanënga cachiñe vida mochatsatbomnama*

12 Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnétsichamo Bëngbe Bëtsá ndoñe yochanjama chë mora obanënga chámuatayenama ca?

13 Pero chca tojtsemna, chë obanënga ndoñe mochántayenasna, Cristo cach ndoñe tontanayena;

14 y Cristo ndoñe matenjésayenëse, bënga nÿe bonamente chabiama fstsabuayiyiná, y tšëngaftanga nÿe bonamente chábeñe šmojtsošbuaché.

15 Y canÿe más bëts soye: chca tojtsemnësna, bënga muanjábocna mo chë Bëngbe Bëtsabiama soyënga tmojinÿe ca ichamëngcá, pero ndoñe ndegombre chca tontsemna; er bënga fsëndbétsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama.

16 Pero chë obanënga ndoñe mochántayenasna, Cristo cach ndoñe tontanayena.

17 Y Cristo cháuatayenama Bëngbe Bëtsá ndoñe matënjanmëse, tšëngaftanga nÿe tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna.

18 Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentsana atsebácanënga quemochátsmëna, sinó nÿetsca tescama castigánënga.

19 Bënga tmojtsobatmana Cristo bëngbiama tšabe soyënga chaotsamama, pero chca nÿe quem luarentse bënga vida tmojtseboñnëntscuana, as bënga nÿetscangiama más muantsomerecena, nÿetscanga bëngbiama chaotsangménama.

20 Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinÿanÿayana más shajuanënga chentsana yochjóboçnama, cachcá, Cristo tojtanayena ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsbomnama.

21 Chca, ndayá canýe entsá, Adán, tojanmama, nyetscanga jóbanama yojt-samna, cachcá, ntšamo inýe entsá, Cristo, tojanmama, Bëngbe Bëtsá yoch-jama entsanga chámuatayenama.

22 Er ntšamo, Adánbentsana entsanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nyetsca tescama yomna tšabe vida chënga chamotsebomnama.

23 Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentsana, Cristo cachiñe quem luaroye chaojésabo ora, nyetscanga chë Crístbe entsanga imomnënga.

24 Y chentsana, Bëngbe Bëtsá chë Taitábioye, Cristo chabe amëndayana chabojantsabuaché ora, nyetsca mandadënga, mando y obenana bomnënga corente jtsayënjanyëse.

25 Er Cristo bontsemna ínýenga mo reycá jtsamëndayana, chabe uayayënga chabe cucuatšifne chamoquedama Bëngbe Bëtsá tojamëntscuana.

26 Canýe uayayá inétsama entsanga jóbanama; pero Cristo último echanjama chabe obenana pronto chaotsochocama.

27 Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinýama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama.

28 Y Cristo nyetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentse yobinýniñe.

29 Inýetšánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entsanga chëngbe cuenta muantenábaye?

30 Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiamu oservenena causa?

31 Atšbiamu cada te resjo endmëna jóbanama. Jesucristbeyeca atšbe catšátanga, atše séntsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canýe oservenacá, tšëngaftanga chábeñe šmojtsošbuáchema.

32 Mo canýa tšátjaye bayëngaca tojtsentsjaná orcá, atšbiamu puerte resjo enjamna jóbanama, Efeso puebloca; pero nýe chë entsanga mondbétsejuabnaye jëftsashjáchama soyënga jtsebošëse chca matsjamnëse, ¿ndaye tšabe soye matënjanoócna, chca atšbiamu resjo jóbanama enjamna ora? Obanënga ndoñe mochántayenësna, mochtsama ntšamo entsanga jayanana mondua-mancá: “¡Mochjase y mochjofsiye, nderado yëfse muatjóbanu ca!”

33 Ndoñe matenoíngñana. Ntšamo canýa tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.”

34 Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentse Bëngbe Bëtsabe soyënga ndoñe quešmatábuatma. Atše chca séntsichamo tšëngaftanga chašmotsëuatjama.



*Ntšamo chë obanënga mochtayena*

<sup>35</sup> Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?”

<sup>36</sup> ¡Juabna ndbomna entsá! Ndayá tcojajé orna, jtseytana chë jénaye chaóbanama, chë matatema vida chaotsebomnama.

<sup>37</sup> Ndayá tcojajecá ndoñe ntsemnana chë juábocnama matatema, ndayá nñe chë meshe, trigo meshe o ndaye mata méshnaca jtsemnana.

<sup>38</sup> Pero Bëngbe Bëtsá jamana chë jénayentsána mata chauábocnama, ntšamo jamama cha tojajuabocá; y cha jamana cada jénayentsána canñe mata chauábocnama, ntšamo chë jénayentsána chauábocnama tojtsemncá.

<sup>39</sup> Nñetsca cuerpënga ndoñe cachcá ntsemnana. Entšanga canñe cuerpo mondbomna, bayënga inñe cuerpo, shloftšënga inñe cuerpo, y beongna inñe cuerpo.

<sup>40</sup> Chë celoca vida bomnënga inñetsá jtsinñnana, y chë quem luarentse vida bomnëngna inñetsá. Pero chë buashinñinñanana y botamanana ntšamo celoca vida bomnënga jtsinñnancá, ndoñe cachcá ntsemnana chë quem luarentse vida bomnëngbe botamanancá.

<sup>41</sup> Cachcá, shinñe ndoñe quenátsbomna cachca buashinñinñana juashconcá, ni estrellëngcá; y estrellënguentse cach ndoñe cachcá ntsebuashinñinñanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentse imojaniyena ora imojéftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentse bënga mondbomna cuerpo jóbanana, inñënga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca.

<sup>43</sup> Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinñinñana y echantsámána. Bënga quem luarentse imoyenëntscuana imobomna cuerpo, nñe batsá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna.

<sup>44</sup> Quem luarentse imobomna cuerpo endmëna cam luarentse vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemmandana. Canñe cuerpo quem luarentse vida chaotsebomnama yómnyeyeca, canñe cuerpëncá, jtsemnana celoca vida chaotsebomnama.

<sup>45</sup> Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentsána nñetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Crístna canñe espíritu endmëna, y chë espíritu jamana entsanga chë nñetsca tescama yomna tšabe vida chamotsebomnama.

<sup>46</sup> Pero chë celoca nñetsca tescama vida jtsebomnama cuerpna ndoñe natsana ntjóbcnana, ndayá chë quem luarentse vida jtsebomnama cuerpo; chentsána chë celoca vida jtsebomnama cuerpo.

<sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentsána tojánbcna; Crístna, mo entsángbentsána chë natsaná tsmacá bemanacá, celocana tojánbcna.

<sup>48</sup> Adánbentsána, chë natsana entsá, chë fshántseca tmojanmábentsána tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Crístcá jtsemnana; Cristo nda celocana tojánabo.



<sup>49</sup> Ntšamo bēnga jtsinŷnana chē Bēngbe Bētsá fshántseca tbojánbema entšacá, cachcá bēngnaca mochtsinŷna ntšamo chē celocá yomnacá.

<sup>50</sup> Jesucrístbeyeca atšbe catšátanga, atšbe cbochjáuyana, nŷe quem luarentše vida jtsebomnama cuerpēngaca, bēnga ndoñe ntsoberenana Bēngbe Bētsabe amēndayoye jamashēnguana; ni ndayá yochjopochóca soye, ntsoberenana ndayá ndoñe yochanjopochóca soye jtsebomnana.

<sup>51</sup> Smochjouena, atšbe canŷe soye cbochanjáuyana, y chē soye Bēngbe Bētsá entšanga tempo ndoñe tonjaninŷanŷé: Bēnga ošbuáchiyēnga nŷetscanga ndoñe quemochatóbana, pero Bēngbe Bētsá šochanjátrocaye mo tsmēmangcá.

<sup>52</sup> Nŷe betesco, mo tcojofshetá y cachora tcojtafšnacá, quem luare ya jopochócama ora, canŷe ángel trompetéŷjua chaojuátēta ora, er chora trompetéŷjua echanjuénana, Bēngbe Bētsá echanjama obanēnga chámuatayenama, nŷetsca tescama vida jtsebomnama; y bēnga, chē ainēnga mochtsemnēngna, cha šochanjátrocaye mo tsmēmangcá jtsemnana;

<sup>53</sup> er jtseytana Bēngbe Bētsá chaotrocá chē bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna te yochanjóbana soyiñe.

<sup>54</sup> Bēngbe Bētsá chca bēngaftaca chaojama ora, chē cha jatrócana ndayá bēngbeñe yochjopochocacá, ndocna te yochanjopochóca soyiñe, y ndayá bēngbeñe yochjobancá, ndocna te yochanjóbana soyiñe, chora echanjochnēngo ntšamo Bēngbe Bētsabe uabemana palabrenguiñe chama endayancá:

Bēngbe Bētsá tojayēnjaná chē entšanga chamóbanama endbētsama obenana; entšanga ndoñe más quemochatóbana ca.

<sup>55</sup> ¡Mora entšanga chamuatóbanama chaotsama obenana ya ndoñe quenátsmēna;

Bēngbe Bētsá chē obenana nŷetsca tescama tojayēnjaná ca!

<sup>56</sup> Entšanga bacna soyēnga tmojama causa, obenana endmēna entšanga jóbana causa chaotsamnama. Ndayá leyiñe iuayanama, entšá jtsetatšēmbuana ndayá yomna bacna soyēnga jamana, y chca tátšēmba causa, chca bacna soyēnga jamama juabnēngaca mandaná jtsemnana, y cabana, jóbana jtsemnana.

<sup>57</sup> ¡Pero Bēngbe Bētsá mochtsatschuanaye, bēnga mo ayēnjanayēngcá cha šojábiamama, er ya ndoñe šontsamna chca jtsemnana, chē Bēngbe Utabná Jesucristo bēngbiamama tojanma sóyeca!

<sup>58</sup> Chíyeca, Jesucrístbeyeca atšbe catšátanga, atšbe bonshánēnga, Jesucrístbeñe sempre puerte šmochtsosbuáchiye y ndocna te šmatjalesēncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bētscá jtsamana Bēngbe Utabnabiamama trabájayiñe, er tšēngaftanga šmondētātšēmba, Bēngbe Utabnabiamama trabájayiñe ndayá šmojamcá, ndocna te nŷe bonamente ntsemnana.

## 16

### *Jerusalenoca ošbuáchiyēngbiamama crocenánama*

<sup>1</sup> Mora chanjóyebuambaye chē Jerusalenoca Bēngbe Bētsabe entšanga ndbomnjémēngbiamama tšēngaftanga šmochjuíchmua crocenánama. Atšbe sēntseboše tšēngaftanga chca chašmoma ntšamo chē Galacia luaroca ošbuachiyēngcá enefjuanenache chama atšbe sēnjanabuayenacá.

<sup>2</sup> Cada tmengo, cmontsamna batšá crocénana jaluárana ntšamo chē semaniñe šmojonŷencá, y šmochtsejuabaye; chca atšbe choye chajá ora, ndoñe chacmondētsamna quem uajabótama chora crocénana játatbanayana.

<sup>3</sup> Y atše choye chajíshjango ora, Jerusalenoye chjichamuá chë tšëngaftanga mo tšabengcá šmojubuáyana entšanga, chë Jerusalenoca ošbuachiyëngbioye tšëngaftangbe crocénana chámuayentsbuachema, y tsbuanachangá chanjúyentsbuachiye ndayá imojtsamama chënga jábuayenama.

<sup>4</sup> Y nderado, átšnaca chëngaftaca jama tšabá tojtsemnëse, chënga átšeftaca chamua.

### *Ntšamo Pablo yojanjuabná chë luarëngoye jama*

<sup>5</sup> Atše sëntsejuabná tšëngaftangbioye jama jautsëtsayama, Macedonia luarëjana chajjachnëngüentsana, chentša ošbuáchiyënga jaftsanýëse, er atše sëntsejuabná natsana Macedonia luaroye jëftšana.

<sup>6</sup> Nderado baseftayté tšëngaftangbeñe chašuétsjetana, o nderádose nýets uaftena tempo; as tšëngaftanga inýe luaroye játama chašmuájabuachama, ndëmoye jama chašojtsemnoye.

<sup>7</sup> Atše ndoñe quetsátsboše nýe betesco tšëngaftanga jáftsanýana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase.

<sup>8</sup> Pero Efesoca šochanjajétana Pentecostés fiesta chaojobuáchëntscuana.

<sup>9</sup> Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana šmochtsantješna cha ton-dayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiamama endëtrabája, ntšamo atše sëndamcá.

<sup>11</sup> Chcasna, ndocná chábiyoye chabondëtsáboyënja. Bëtscá šmochjama cha natjëmbana átšbiyoye chauatábama, er atše cha sëntsobátmana, chë ínýenga muentše Crístbeñe ošbuáchiyëngaftaca.

<sup>12</sup> Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### *Pablo chënga jtadiósoftanama*

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nýets tempo, Crístbeñe y chabe soyënguñnaca šmochtsosbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca.

<sup>14</sup> Y nýetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucrístbeyeca atšbe catšátanga, tšëngaftanga šmondëtatšëmbo, Estéfanas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabiamama jtsetrabájayana, chabe entšanga jtsëjabuáchanëse.

<sup>16</sup> Atše cbaimpadá, tšëngaftanga lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nýetsca chë ínýenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentsana Estéfanas, Fortunato y Acaico moye tmojášhjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana.

<sup>18</sup> Er chënga átšbiyoye tmonjabo y tšëngaftangbiamama šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca.

<sup>20</sup> Muentša ošbuáchiyënga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nyetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama.

<sup>24</sup> Atše, nyetsca tšëngaftanga cbondábabuanjeshana, canya mo tšëngaftangcá, Cristo Jesúseftaca cányiñe mo canyácá jtsemnëse.

## 2 Corintios

### *Jacheuayama*

<sup>1</sup> Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catšata Timotéoftaca quem tsbuanácha sentsabiamná, Corinto puebloca Bëngbe Bëtsábeñe ošbuachiyëncá enefjuanëngbiamá, y nyets Acaya luarentše Bëngbe Bëtsabe nyetsca entšangbiámnaca.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebomnama.

### *Ntšamo Pablo tojansufrí*

<sup>3</sup> Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiamá lastemado yomná, y ndaye padecena soyënguiñe tmojtsemna ora, bënga šondbetsañemuayá.

<sup>4</sup> Cha bënga jtsañémuayana padecena soyënguiñe tmojtsemna ora, chca, bënga chamotsobenama chë tmojtšesufrinënga jañémuayama, ntšamo Bëngbe Bëtsá šojjabuachcá chënga jujabuáchëse.

<sup>5</sup> Er ntšamo Cristo tojansufricá, bënga tša fsëndësufrina chabiamá oservëniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebomnama.

<sup>6</sup> Er bënga tmojtšesufrinëse, jtsemnana bënga jobenayama tsëngaftanga jañémuayama chë šmojtšesufrina ora, y atsebácanënga chašmotsemnama, Bëngbe Bëtsabe soyëngama jouenëse. Chë padecena soyënguiñe tmojtsemna ora Bëngbe Bëtsá šojañëmose, jtsemnana bënga fchayobenama tsëngaftanga jañémuayama, padecena soyënguiñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtšesufrina ora.

<sup>7</sup> Bënga sempre fsëndobátmana y tsabá fsëndëtatšëmbo chë padecena soyënguentsana tsabá šmochjábocanama, er bënga fsëndëtatšëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebomnama, ntšamo bënga fchaitsebomnama cha tojamcá.

<sup>8</sup> Jesucristbeyeca atšbe catšátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguiñe fsënjaninyena, nya ndoñe más jauantacá, chentšana vídaca jabocanama ntjatobatmancá.

<sup>9</sup> Bënga šontsanënana mo jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana.

<sup>10</sup> Cha šojatsebacá bënga jóbanama puerte resjo enjamntšana, y cachcá šochjátsebacaye bëngbiamá cachiñe cachcá tša resjuiñe chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe šochjátsebacama.

<sup>11</sup> Tsëngaftangnaca cmontsamna bënga jujabuáchana, bëngbiamá Bëngbe Bëtsá jaimpádase; chca, ba entšanga Bëngbe Bëtsá mochanjëtšchuaye, er cha tojama bënga chábensana tsabe bendicionënga fchayóyëngacñama, cha jamëse ntšamo chënga bëngbiamá tmojanimpadacá.

*Ndáyeca Pablo Corinto puebloye ndoñe tonjána*

<sup>12</sup> Canÿe soye endmëna ndayá oyejuayënga šojtsabiamná: bënga bëngbe ainanentša juabnëngaca jtsetatšëmbuana puerte tšabá jtsamëse fstsiyena ca, ntšamo chë Bëngbe Bëtsabe entšanga endbetsamncá, nyetsca quem luarentša entšángbeñe, y más tšëngaftangbeñe, y bënga jtsetatšëmbuana ntšamo tšabá tifjamcá nyets ainánaca tifjamama. Bënga tondaye chibiatsma quem luar-entša entšangbe osertanánaca, ndayá Bëngbe Bëtsá tša tšabia bëngaftaca bëtsemnayeca, šojújabuache chca chamotsiyenama.

<sup>13</sup> Er ntšamo fsëntsabiamnamna ndoñe queftsátsboše, ntšamo tšëngaftanga šmojtsalía y cmojtsësertánentšana inÿetšá játayanana, y sentsobátmana puerte tšabá lempe chacmósertama.

<sup>14</sup> Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiana oyejuayënga chašmotsemnama, ntšamo bëngnaca tšëngaftangbiana oyejuayënga fchantsemncá.

<sup>15</sup> Chca ndegombre yomnama atše sëndëtatšëmboyeca, atše sënjanjuabná tšëngaftangbioye jshétsana jányama, y chca, chë tšabe soye tšëngaftangbiana uta soye jamana, tšëngaftangbioye uta soye jányëse.

<sup>16</sup> Atše sënjanjuabná tšëngaftanga jshaftsanyana, Macedonioye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca, tšëngaftanga mašmëñjanobená atše juajabuáchana Judea luaroye játama.

<sup>17</sup> Atše chca jamama tsjanjuabná ora, ¿chca tijanma ndoñe corente tšabá ntjenojuaboycá? ¿Tšëngaftanga šmatjájuboye, ntšamo nÿe quem luarama enójuabnaye entšanga monduamancá, cachora canÿe soyama “áiñe” y “ndoñe ca” jayanëse, atše ndayánaca jamama snëtsejuabnaye ca?

<sup>18</sup> Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canÿa cachora canÿe soyama “áiñe” y “ndoñe ca” cuafjatichamcá.

<sup>19</sup> Er Cristo Jesús, Bëngbe Bëtsabe Uaquiñá, ndabiana Silvano, Timoteo y atše tšëngaftangbeñe fsënjanabuayiyiná, ndoñe ntsejuabnayana canÿe soye jamama y chentšana jatsjuabnayana inÿetšá jatsmama, mo canÿe entšá cachora canÿe soyama “áiñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá.

<sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “áiñe ca” cuafstichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”.

<sup>21</sup> Pero Bëngbe Bëtsá endmëna nda inétsama bënga y tšëngaftanga puerte Cristbeñe chamotsošbuáchema, cháftaca cánÿiñe mo canÿacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama.

<sup>22</sup> Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinÿanyayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnyayeca, bënga corente jtsetatšëmbuana bënga mochjóyëngacñama lempe ntšamo Bëngbe Bëtsá bënga jatšatayama šojašebuachenacá.



<sup>23</sup> Bëngbe Bëtsá entsonjã atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucácanëse.

<sup>24</sup> Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnana.

## 2

<sup>1</sup> Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá.

<sup>2</sup> Tšëngaftanga ngménaca chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga?

<sup>3</sup> Chíyeca tcbonjanëbuábiamana chë ntšamo šmojualiaca, chca, atše choye stjášjango ora, tšëngaftanga átšbioye ndoñe ngmená chašmondëbemama. Chca játamamna, tšëngaftangbiamana más tšabá endmëna oyejuayá atše chašmobema. Atše tšabá sënjántatšëmbo ndayá átšbioye oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiamana. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora.

<sup>4</sup> Pero chë tsbuanácha tcbonjanëbuábiamana ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiamana atše jatsmama tšëngaftanga puerte ngménaca chašmotsemnana, ndayá chašmotsetatšëmbuama atše tša cbababuánýeshanama.

### *Perdón chë bacna soye amabiamana*

<sup>5</sup> Y mora, chë tšëngaftangbeñe puerte ngménana chaotsemnana tojama boyabásabiamana, cha átšbioye ndoñe ngmená chešnátšbema, ntsachetšá tšëngaftanga tcmojabiamcá, ínýengbioye ínýengbiamana más. Chca sëntsichamo, er atše ndoñe quetsátsboše jayanama ntsachetšá tojamama cha más bacna soye tojama ca.

<sup>6</sup> Banga tšëngaftanguentsënga ntšamo šmojamcá, chë entsábiamana ya bëts castigo entsemna. Nýe nýetsá ponto.

<sup>7</sup> Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménaca bëtsemna causa.

<sup>8</sup> Chíyeca, tšëngaftanga cbaimpadá cachiñe tšabá chašminýinýé chábioye corente šmobobonshánama.

<sup>9</sup> Tempo ya chama tcbonjanëbuábiamana, atše jinýama tšëngaftanga aíñe o ndoñe šmotsanprontánama, lempe ntšamo tcbonjanamëndacá jamama.

<sup>10</sup> Chcasna, ndánaca ndayánaca tšëngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiamana y Crístbe delante.

<sup>11</sup> Atše tšëngaftangcá, quem entsábioye šcoperdoná chë bëngbiamana tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inëtseboše ndaye bacna soye entsá chaotsamama.

*Ndáyeca Pablo ndoñe natjëmbana Troas puebloca tontsanoquedañe*

12 Atše Troas puebloca sënjánashjango ora, Cristbe tšabe noticiënga jábuayenama, atše sënjaninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama.

13 Masque chca enjamna, atše ndoñe quetstétsobena natjëmbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinÿenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

*Cristoftaca cánÿiñe mo canÿacá jtsemnëse, bënga mo ayëñjanayëngcá jtsemnana*

14 Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëyëñjanama, tempo šojanamënda juabnënga; y chë mora bënga Crísoftaca cánÿiñe mo canÿacá jtsemnëse, nÿets tempo cha šnetsënachayama, mo canÿe ayëñjanayacá, y chë nÿets luarenache entsanga Cristbiamama soyënga chamotsábuatmama bëngaftaca cha yojtsamama, mo nda canÿe botamana uanguëtše soye nÿets luarënguenache chauáshanama cuaftsamcá.

15 Er chë incienso tojtsejuínÿinÿana ora, entsábioye tšabá juanguëtšenana; cachcá Cristbe tšabe noticiënga fstsabuayiná ora, Bëngbe Bëtsabiamama bënga jtsemnana chë ndëmuanyënga tmojtsama cha oyejuayá chaotsemnana. Incienso tcojtsejuinÿná ora, nÿetscángbioye juanguëtšenana. Cachcá, Bëngbe Bëtsabe palabra fstsoyebuambná ora nÿetscanga jouenana, Cristo yojtsatsebacanga y chë pochocánënga jtsemnana imojtsajnëngnaca.

16 Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiama chë tšabe noticiënga jtsemnana mo canÿe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nÿets tempo jtsebomnana; y chca, chëngbiama chë tšabe noticiënga jtsemnana mo canÿe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama?

17 Bënga chë tšabe noticiënga ndoñe queftsatabuayiná, ntšamo ba entsanga imojtsamcá, mo nÿe batsá uámana soyënga cuaftsemncá, y ndayánaca juácánama, mo nda ndaye nduámana soyënga cuaftsemncá. Banga chca mondama; bënga ndoñe. Bënga, Crísoftaca cánÿiñe mo canÿacá jtsemnëse, fsëndabuayiná mo Bëngbe Bëtsabe delante cuaftsemnëngcá, ndegombre nÿe ntšamo tšabá yomncá nÿets ainánaca jtsebošëse, y mo Bëngbe Bëtsabe ichmonëngcá.

### 3

*Chë Bëngbe Bëtsabe tsëm tratama buayenana soye*

1 Chca bëngbiama fstsjayana ora, tsëngaftanga cmojtsinÿana ¿bënga cachiñe tiftëtontsé cabënga bëtsétsanga enobiamnayana? ¿O bënga šojtsamna, mo inÿengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chëchangaca jinÿanÿiyama?

2 Bënga bëngbe ainaniñe puerte tšabá fsëndëtatšëmbo, nÿetsca entsanga, ntšamo tsëngaftanga jtsamëse smoyencá tmojinÿe ora, tsëngaftanga jtsinÿanÿayana bënga ndegombre ntšamo tšabá yomncá fstsamama. Chca, tsëngaftanga jtsemnana mo canÿe tsbuanachacá, nÿetscanga jtsabuatmana y jtsobenana jualíana, bënga tšabá fstsamama.

3 Nÿetscanga tšabá mondëtatšëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámna. Chca,

tšëngaftanga šmondmëna mo Cristbe canÿe tsbuanachacá, ndayëcha quem luarentša entsángbioye tojuyentsbuaché bëngaftaca. Tšëngaftanga ndoñe chešmatanobená Crístbeñe ošbuáchiyënga jtsemnama entsangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canÿe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entsanga chamotsobedecénama, pero tšëngaftangna Cristbe buayenana soye tšëngaftangbe ainaniñe šmojóyëngacñe.

<sup>4</sup> Crístbeyeca Bëngbe Bëtsábeñe jtsošbuáchiyëse, bënga corente fsëndëtatšëmbo chca ndegombre bëtsemnama.

<sup>5</sup> Ndoñe quenátsmëna, nÿe bënga cánÿenga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nÿe Bëngbe Bëtsabe ujabuáchenanaca;

<sup>6</sup> er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canÿe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inÿetsá; entsanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tsabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nÿetsca tescama yomna tsabe vida chënga chamotsebomnama.

<sup>7</sup> Quem Moisesbe ley, chë ndoñe tmonjobedecema entsanga jóbanama jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinÿinÿaniñe tojánabo. Chë causa entsanga ndoñe imontsobena ni mo jinÿana Moisesbe jubiá, er tša ibo-jtsanjuebëbuashinÿinÿana, Bëngbe Bëtsáftaca tbojánencuententšana tojtanabo ora. Pero betesco tojanëjbana chë jubiá chca buashinÿinÿanana. Chë ley, chë natsana trato, Bëngbe Bëtsá tojanayentsbuaché ora, tša buashinÿinÿanánaca cha tojanmëse;

<sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháuamashënguama Bëngbe Bëtsá tojama ora.

<sup>9</sup> Bëngbe Bëtsá chë ley tojanayentsbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinÿinÿanana jinÿanÿiyëse; ndegombre más bën y uámana tempo entsemna chë mocna ora Bëngbe Bëtsá yojtsama entsanga chabe bominÿiñe tsábenga chamotsemnama.

<sup>10</sup> Er chë Bëngbe Bëtsá ley tojanayentsbuaché ora tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entsangbiama tsëm soyënga tojtsamama tcojtsonÿá ora, chë tša buashinÿinÿanana yojtsemna ora.

<sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsangbiama jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echántsinÿanÿnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nÿetsca soyëngama jayanëse, tondayama

ntjatauatjá.

<sup>13</sup> Y chca, bēnga ndoñe Moisescá queftsátama, chē chabe jubiá chaobuash-inyinyenama Bēngbe Bētsá tojanma ora, canye entsējuaca yojsenamochécjua; cha chca tojanma, chē Israeloca entsānga ndoñe chamondobená jinýama chē jubiá buashinyinyanana ya yojsēchnējuana ora.

<sup>14</sup> Pero Bēngbe Bētsá tojanma chēnga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bēngbe Bētsá Moisésbioye tbojanšbuachenacá chēngbiamama jamama, Israeloca entsānga tmojtsalía ora, ndoñe ntsēsertánana Bēngbe Bētsabe ndegombre soyēnga, mo chēngbiamama iytēmena soyēnga cuaftsemncá, mo chē Moisés yojsenamochécjua entsējuacá. Y chca endmēna, er nýe Crísoftaca cányiñe mo canýacá jtsemnēse, chēnga jtsobenana chē soyēngama jósertana, y iytēmencá ya ndoñe ntsemnana.

<sup>15</sup> Y mēntscoñama, Moisesbe librēsangá chēnga tmojtsalía ora, ndoñe ntsēsertánana Bēngbe Bētsabe ndegombre soyēngama, ntšamo chiñe tojtsayancá jamama ndoñe montseboše causa.

<sup>16</sup> Pero canye entsá chē Bēngbe Utabnabe benache tojishache ora, cha jtsobenana chē soyēngama josértana.

<sup>17</sup> Y Bēngbe Utabná y Espíritu canya bondmēna, y Bēngbe Bētsabe Espíritu tojtsemnentše, chē bacna soyēnga jamama juabnēnga, ni chē ley ndoñe ntsemándayana.

<sup>18</sup> Moisés chabe jubiañe Bēngbe Bētsabe buashinyinyanana y uámanana tojaninyanjé, y chíyeca, canye entsējuaca yojsenamochécjua, chca, chēnga ndoñe chamondinyama. Pero bēnga ošbuáchiyēnga nyetscanga jtsinyānyayana Bēngbe Utabnabe buashinyinyanana y uámanana, mo canye espejo canye soye tojtsinyānyacá, y ndoñe queftsátsboše ntšámnaca jamēse chē soye jatsēytamianana. Cha bēngaftaca yojsama cada te más chē ntšamo cha yomncá bēnga chamotsemnana, cada te más bētsétsanga chē ntšamo cha yomncá jtsemnēse. Chca endmēna ntšamo Bēngbe Utabná yojsama; y Bēngbe Utabná y Espíritu canya bondmēna.

## 4

<sup>1</sup> Y chca, Bēngbe Bētsá bēngbiamama lastemado yómnayeca, quem trabajo šojabanyé, jtsabuayiyayama chē Crísoftaca tojašebuachená soyēnga; y chíyeca bēnga ndocna te ntjájbanana ainaniñe añemo bomnana.

<sup>2</sup> Bēnga fsēntsaboté chē ínýenga iytēmencá immétsama soyēnga, chē ínýenga tmojinýe ora chama jtsēuatjana, y chē ínýenga entsānga jáingñama immétsama soyēngnaca, y Bēngbe Bētsabe buayenana soye ndoñe queftsatstróca ndoñe ndegombre soyēngaca. Chamna, bēnga sempre nýe chē ntšamo ndegombre yomncá fsēndbétsoyebuambnaye, mo Bēngbe Bētsabe delante cuaftsemnēngcá jtsamēse; y chca, bēnga fsēndbétsama cada entsabe ainanentša juabnēnga chamuayanama, bēnga ndegombre soyēnga fstsoyebuambná ca.

<sup>3</sup> Y nderado bēnga chē tsabe noticiēnga ftsabuayiyá ora, báseftanga chē soyēnga chaósertama ndoñe tontsopodénēse, nýe chē pochocánēnga jtsemnana tmojtsajnēngbiamama chca jtsemnana.

<sup>4</sup> Chēngbiamama, chē Crístbeñe ndošbuáchiyēngbiamna, chē quem luarentše mora mandayá, Satanás, tojama chē buayenana soye ndoñe chaondétsēsertánama; chca, chēnga ndoñe chamondinyama chē tsabe noticiēnguentsana puerte bēts y tsabe soyēnga, chē Cristo puerte bētsá y obená yomnana ínyanynaye soyēnga, nda nyetsca soyēnguiñe Bēngbe Bētsacá yomna.



<sup>5</sup> Bënga ndoñe nÿe cabëngbe soyama queftsatabuayiyná, ndayá Jesucristbiamama mo Bëngbe Utabnacá. Bënga bëngbiamama fsëndbáyana mo oservenëngcá fstsmeña ca, tsëngaftanga jujabuáchama; y chca fsëndbétsama Jesús jasérviamama.

<sup>6</sup> Er Bëngbe Bëtsá, nda quem luare jobojátsama ora tojanmandá binÿiniñe ibetentsana chaóboconama, chánaca tojama bënga ainaniñe tsabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentsana inétsobocana osertánana, ndayá Crístbeñe bënga mondonÿá.

*Bënga fsëndoyena Crístbeñe jtsošbuáchiyëse*

<sup>7</sup> Pero chë puerte tsabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebomnana, chca, jinÿanÿiyama tša bëts obenana Bëngbe Bëtsábocana yóbocanama, y ndoñe bëngbentsana.

<sup>8</sup> Y chca, bënga nÿetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tsabá jaboconama; ndoñe queftsátstatsëmbo ndayá jamama šojtsamna, pero ndoñe queftsátsmëna ntobencá jtsobátmanama quem padecena soyënguentšana tsabá jabocnana.

<sup>9</sup> Inÿenga montsama bënga puerte fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabioye cuafjutsencá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšine fsëntsemna, pero cabá ndoñe ntjobáyana.

<sup>10</sup> Inÿenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chausufrima y chaóbanama. Chca bëngaftaca endopasana, chca, ínÿenga chamobená jinÿama Jesús bëngbeñe vida yobomnana.

<sup>11</sup> Er bënga vida fchabomnëntscuana, sempre puerte resjo bëngbiamama jëftsemnana jóbana, Jesúsbioye servena causa; y chca endmëna, ínÿenga chamobená jinÿama Jesús vida yobomnana bëngbe cuerpiñe, chë canÿe te yochjopochóca cuerpo.

<sup>12</sup> Y chca, bënga tša fsëndësufrina y jobanámnaca resjo endmëna; y tsëngaftanga tsabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tsabe vida chašmotsebomnana.

<sup>13</sup> Bëngbe Bëtsabe uabemana palabrënguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiamama fsëntsoyebuambná.

<sup>14</sup> Er bënga fsëndëtatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crísoftaca cánÿiñe mo canÿacá jtsemnëse, bënga chámuatayenama, y tsëngaftangaftaca cánÿiñe cha yochtsemnoye šochjúshejango.

<sup>15</sup> Lempe ntšamo bënga fstsama y fstsésufrincá tsëngaftangbe tsabiamama endmëna; chca, más becá entšanga chábeñe chamojtsošbuaché ora, ba tsabe bendicionënga Bëngbe Bëtsá entšangbiamama jtsamëse, más becá entšángnaca chábioye chamotsatschuaná, ndayá chëngbiamama cha yochjamama; y lempe chca, Bëngbe Bëtsá puerte uamaná y obená yomnana nÿetsca entšanga chamotsichámuama.

<sup>16</sup> Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsopochócyana, Bëngbe Bëtsá jamana chë bëngbentsana nÿets tempo vida yochtsebomna soye, cada te más obenana chaotsebomnana; y chca, bënga jtsemnana mo tsmëma entšangcá.



17 Ntšamo bēnga mora fsēndēsufriñcá endmēna n̄ye quem luarentše vida tmojtsebomnēntscuana, y chca, chē soye jtsemnana mo can̄ye nduámana soycá; pero ntšamo bēnga fsēndēsufriñcá josérviana bēnga jtsebomnama chē Bēngbe Bētsá šochjatsataye puerte bēts uámanana y obenana, cháftaca n̄yets tempo vida jtsebomnama, chē ndayá yomna n̄yetsca soyēngama más bēts y uámana soye.

18 Er bēnga n̄ye chē tojtsopodena jin̄yama soyēnguiñe ndoñe n̄yets tempo queftsatsjuabná, ndayá chē ndoñe yondopodena jin̄yama soyēnguiñe; er chē bēnga imobena jin̄yama soyēnga ndoñe n̄yetsca tescama ntsemnana; pero chē bēnga ndoñe mondobena jin̄yama soyēnga cocayé n̄yetsca tescama jtsemnana.

## 5

1 Bēnga mora mondbomna can̄ye cuerpo quem luarentše vida jtsebomnama. Quem cuerpo yomna mo chē jtsatsjacama yopodena yebncá, cán̄yentše ndoñe n̄yets tempo ntjēftsemnana. Bēnga mondtatšēmo, quem cuerpo can̄ye te tojtsopochocase, Bēngbe Bētsá yochjama bēnga tsmēma cuerpēnga chamotsatsbomnama, celoca n̄yetsca tescama vida jtsebomnama, Bēngbe Bētsabe pormana cuerpēnga y ndoñe entsangbe pormana cuerpēnga.

2 Chíyeca, bēnga quem luarentše chca vida tmojtsebomnēntscuana, yapa tmojtsesufrina causa, bēnga tša jtsebošana betscó Bēngbe Bētsá celoye chašúyambama, y bēnga n̄yets tempo celoca jtsiyenama tsēm cuerpo jtsebomnama cha chaomama;

3 chca, Cristo yochjésabo ora, bēnga chē tsēm cuérpoca chamotsemnana, y ndoñe n̄ye espíritu ndocna cuérpoca.

4 Bēnga quem cuerpiñe, chē quem luarentše vida jtsebomnama cuerpiñe chamojtsiyenēntscuana, yapa padecena soyēnguiñe sufrina causa, bēnga jabuache mochanjášachna; chca echántsemna ndoñe n̄ye chē espíritu ndocna cuérpoca jtsemnana bēnga imojtsebóseyeca, ndayá masna, bēnga chē tsēm cuerpo chamotsebomnama Bēngbe Bētsá chaomama imojtsebóseyeca. Bēnga fsēntseboše chē bēngbeñe jopochócama yomna soye Bēngbe Bētsá lempe chaotrocama, chca, bēnga chamotsobenama celoca n̄yetsca tescama vida jtsebomnama.

5 Y Bēngbe Bētsá endmēna nda tojama bēnga chamotseprontánama chē tsēm cuerpo jtsebomnama, y nda tojama Espiritu bēngbe ainaniñe cháumashēnguama, chca bēngbioye jin̄yan̄iyama, bēnga ndegombre mochjójyēngacñe ndayá Bēngbe Bētsá tojašebuachenacá.

6 Y chca, bēnga sempre ainaniñe bēts añemo fchandbétsebomna. Bēnga fsēndētatsēmo, quem cuerpiñe cabá vida bēnga mochjēftsebomnēntscuana, bēnga ndoñe mochántsemna Bēngbe Utabná yojtsemnentše.

7 Er mora bēnga fsēndoyena jtsamēse, ntšamo Crístbeñe bēnga imošbuachecá, y ndoñe n̄ye ndayá jin̄yama tmojtsobenama.

8 Bēngbe fsēntsemna ainaniñe bēts añémoca, y más fsēntseboše jájbanana quem cuerpiñe vida jtsebomnana, jama Bēngbe Utabnáftaca n̄yetsca tescama vida jtsebomnama.

9 Chíyeca bēnga bētscá fsēndēntšena Bēngbe Utabná siempre oyejuayá jabemama, masque bēnga quem luarentše quem cuérpoca tmojtsiyena, o ya ndoñe.

10 Er n̄yetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyēngacñama, ntšamo tšabá o ndoñe tšabá quem luarentše chabe cuerpiñe vida yojēftsebomnēntscuana tojēftsemcá.

*Jábuayenama ntšamo Bëngbe Bëtsá inama entsanga tempcá tšabá cháftaca chamotsatsmënana*

11 Chcasna, Bëngbe Utabná nyetscangbiana chë más bëtsá yomnama jtsejuabnayëse, bënga bëtscá fsëndama entsanga jáyënjana, bënga tšabá fstsamama chamotsejuabnama. Pero Bëngbe Bëtsá ya endétatsëmbo ntšamo bënga fstmënana, y atše sentsobátmana tšëngaftángnaca chca tšabá chašmotsetátšëmbo, tšëngaftangbe ainanentša juabnéngaca, chë bëngbiana aíñe ca cmojtsëtsësná juabnénga.

12 Bënga ndoñe cachiñe cabëngbiana queftsatoyebuambná; chca fsentsichamo ndayá tšëngaftanga oyejuayënga bëngbiana chašmotsemnama, chca, tšëngaftanga jojuama chašmobenama, chë uámana soyënga tmojtsebiamnángbioye ndayá entsanga canye entsábeñe tmojtsonyáca y ndoñe chca chë entsabe ainaniñe tomna soyëngaca.

13 Er bënga mo chë ndoñe corente juabna ndbomnéngcá fstsamëse, ntšamo báseftanga mondbetsichamcá, jtsemnana Bëngbe Bëtsá jaserviama; y bënga corente juabna bomnéngcá fstsamëse, jtsemnana tšëngaftangbe tšabiama.

14 Bënga chca fsëndmëna, Cristo šondábabuanyëshanayeca, y chë soye endama bënga nye cha fchaiteservénama, er bënga fsëndenajuabná y puerte tšabá fsëndétatsëmbo, canya, Cristo, nyetscangbiana tojanóbanama; y cha nyetscangbiana tojanóbanayeca, endmëna mo cha tojanóbana ora, nyetscanga cháftaca cuafjobancá.

15 Y Cristo nyetscangbiana tojanóbana, chë quem luarentse vida bomnénga ndoñe más nye cachëngbiana chamondëtsiyenama, sinó chabiama, nda chëngbiana tojanóbana y tojtanayena.

16 Chíyeca, bënga ya ndoñe ndocnabiama queftsatsjuabná ntšamo entsanga quem luarentse jtsejuabnayama monduamancá; masque ndegombre bënga chca Cristbiana fsënjanjuabná, mora ya ndoñe chca chabiama queftsatsjuabná.

17 Chcasna, nderado nda Crísoftaca cányiñe mo canyáca tojtsemna, Bëngbe Bëtsá tojama cha mo canye tsëm entsacá chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inye soyënga y tsëm soyënga.

18 Bëngbe Bëtsá endmëna nda chca inétsama, entsanga mo tsëm entsangcá jábiamama; y cha Crísoftaca tojama bënga tempcá tšabá cháftaca chamotsatsmënana. Y cha bënga canye trabajo šonjanabanýé, bënga entsanga jábuayenama, Bëngbe Bëtsá inétsama entsanga tempcá tšabá cháftaca chamotsatsmënana, y entsanga jujabuáchama chca chamotsemnama.

19 O mëntsá, Cristo tojanma sóyeca Bëngbe Bëtsá yojtsama entsanga chamotsobenama tempcá tšabá cháftaca jtsatsmënana, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyetsca tescama castigánënga jtsemnana ndoñe chaondëtsamnama. Y bënga šonjanabanýé chë trabajo, entsanga jtsabuayiynayama ntšamo Bëngbe Bëtsá inama entsanga tempcá tšabá cháftaca chamotsatsmënana.

20 Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšena Bëngbe Bëtsáftaca tempcá tšabá jtsatsmënana.

21 Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canye bacna soyënga amá cuaftsemncá, chca, bënga Crísoftaca cányiñe mo canyáca jtsemnëse, Bëngbe Bëtsabe bominyiñe tšábënga jtsemnana chamotsobenama.

## 6

<sup>1</sup> Chcáyeca, bēnga Bēngbe Bētsáftaca cányiñe trabájayēnga quetsomñecana, cbontsaimpadana ndoñe nye bonamente chašmondóyēngacñe chē Bēngbe Bētsá yojsama soyēnga, tšēngaftangbiana tšabe juabna jtsebmñese.

<sup>2</sup> Er Bēngbe Bētsá chabe uabemana palabrēnguiñe mēntšá tojánayana:

Chē tšabe soye jamama tšabá šonjaninyana ora, atše tcbonjanoyeuná;

chē ácbioye jatsbocama te, tcbonjanájabuache ca.

Smochjinye. Mora entsemna chē mocna ora Bēngbe Bētsá tšabá ibojtsinyana tšabe soye jamama; mora entsemna chē mocna ora Bēngbe Bētsá yojtseboše aca jatsbocama.

<sup>3</sup> Bēnga ndocna bacna soye queftsátama, ndayá chaoma entšanga chē tšabe noticiēnga chamotsábotema, chca, ndocná podesca chaondētsóyebuambnama bēngbe trabajuama, Cristbiana.

<sup>4</sup> Inyetsá, bēngna nyetsca soyēnguiñe fsēnjaniyena mo Bēngbe Bētsabe oservenēngcá; Bēngbe Bētsábeñe obatomancá puerte uantadēnga jtsemñese, fstsesufrina ora; puerte padecena soyēnguiñe bētsemna causa, ndayá jamama ndoñe fsēntsetatsēmbó ora; y ainaniñe puerte ngmēnaca fstsemna ora;

<sup>5</sup> Inyēnga šojtsatsetšená ora; cárceloye šojautame ora; entšanga bēngbe contra tmojtsebouénana ora; jabuache trabájayēñe puerte uamēntšayēnga fstsemna ora; bayté ntsamanacá fstsemna ora; y jasama tondaye fsēntsebomna ora.

<sup>6</sup> Bēngnaca fsēntsinyanyná Bēngbe Bētsabe oservénēnga fstsmēnama, puerte tšabe vídaca, ndocna bacna soye ntjamcá jtsiyenēse; Bēngbe Bētsabe soyēngama corente jtsetatsēmbēse; inyēnga ntšamo šojáborlaye ora puerte uantadēnga jtsemñese; inyēngbioye puerte bonshanánaca jtsēnyayēse; Uámana Espiritu bēngbe ainaniñe jtsebomñese; y ndegombre nyets ainánaca nyetscanga jtsababuányeshanēse;

<sup>7</sup> ntšamo Bēngbe Bētsabiana ndegombre yomncá jtsabuayiynayēse; Bēngbe Bētsabe obenánaca ba soyēnga jtsamēse; y mo chē soldadēngcá, uayayēnga jáyēnjanama y chēngbiana jenēuyanama soyēnga jtsebomnana, chē Satanásbioye jayēnjanama y chabiana jenēuyanama ndayá Bēngbe Bētsá šojatšatacá jtsebomñese; y Bēngbe Bētsá chca tojama, er cha tojama bēnga chabe bominyiñe tšábēnga chamotsemnama.

<sup>8</sup> Bēnga fsēntsinyanyná Bēngbe Bētsabe oservénēnga fstsmēnama, inyēnga bēngbiana tšabe soyēnga tmojtsejuabná ora y bēnga nduámanēnga jtsemnama chēnga tmojtsama ora; inyēnga tšabe soyēnga bēngbiana tmojtsoyebuambná ora y chēnga bēngbiana podesca tmojtsichamo ora; bēnga áingñayēnga fstsmēna ca báseftanga tmojtsejuabná ora, pero bēnga ntšamo ndegombre yomncá jtsóyebuambnayēse.

<sup>9</sup> Mo nduamanēngcá bēnga entšángbeñe jtsēnyayana, pero banga corente tšabá bēnga šondéubuatma; bēngbiana sempre resjo endmēna jóbanama, pero smochjinye, bēnga sempre vídaca chentšana jatóbocañana; bēnga juat-sjinyama jobenayama, Bēngbe Bētsábeyeca castigánēnga fchandbētsemna, pero nya jóbanana ndoñe.

<sup>10</sup> Masque ngmēnēnga fstsemna, ainaniñe sempre oyejuayēnga fchandbētsomñe; masque ndbomñejemēngcá, pero fchandbētsama banga Bēngbe Bētsábicana bētscá chamotsebomnama; quem luarentša soyēnga tondaye queftsátbomna, pero Bēngbe Bētsabe entšanga quetsomñecana, ndegombre lempe fsēndētsóbomñe.

<sup>11</sup> Tšēngaftangbiana, Corintoca entšanga, lempe fsēnjayana, tondaye nt-jaitēmcá; nyets ainánaca, corente cbondábabuanyeshana.

<sup>12</sup> Bënga puerte cbondábabuanÿeshana, pero tšëngaftangna ndoñe yapa quešcátababuanÿeshana.

<sup>13</sup> Atše cbontsaimpadana, mo canÿe taitá chabe básenga cuaftsaimpadancá, atše puerte chašmotsebobonshánama, er atše corente cbondábabuanÿeshana.

*Bënga mondmëna mo Bëngbe Bëtsabe bëts yebncá*

<sup>14</sup> Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca.

<sup>15</sup> Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.

<sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórana yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrenguiñe chabe entšangbiana tojanayancá:

Chëngbeñe vida chántsebomna y chëngbenache chántšana;

atše chëngbe Bëtsá chántsemna

y chëngna atšbe entšanga ca.

<sup>17</sup> Chíyeca mëntšánaca Bëngbe Utabná chabe entšanga tojanéyana:

“Chë bacna soye amëngbentšana šmochjésebocana, y chëngbentšana šmochtsojuánañe;

tondaye šmattsebana, ni šmattsama ndayá Bëngbe Bëtsabe entšangbiana ndoñe tšabá tontsemncá.

As cbochanjúbuaja,

<sup>18</sup> y chántsemna mo canÿe taitacá tšëngaftangbiana,

y tšëngaftangna mo atšbe uaquiñënga y bembangcá.

Chca séntsichamo atše, tšëngaftangbe Utabná, nÿets obenana bomná ca” —  
chiñe enduábemana.

## 7

<sup>1</sup> Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nÿetsca soyënguiñe tšábënga jtsemnana, bëngbe cuerpama o espíritbiana bacna soye ndoñe más ntsamcá; y Bëngbe Bëtsá nÿetscangbiana más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entšangcá, nÿetsca soyënguiñe puerte tšábënga jtsemnëse.

*Ntšamo chë Corintoca entšanga juabna tmojantrocá*

<sup>2</sup> Bëngbiana šmochtsenójuabnaye tšëngaftangbe ainaniñe puerte bonshanánaca. Bënga ndocnabiana bacna soye chibiatsma, ndocnabiana chibiatsma más bacna entšá chaotsemnama, y ndocnábioye chibiatsingñé.

<sup>3</sup> Atše chca ndoñe quetsátichamo, ndoñe tšabá šmonjama ca tšëngaftangbiana jayanama, er ntšamo ya tcbonjauyancá, atše tšëngaftangbiana sempre ainaniñe puerte bonshanánaca sëndbétsenojuabnaye; y chca, mo átšeftaca canÿiñcá šmochántsemna, masque chayóbana o cabá vida chaitsóbomñëse.



<sup>4</sup> Atše puerte tšabá sëndétatsëmbo, ntšamo tšabá yomncá šmochtsamama; y tšëngaftangbiana puerte oyejuayá sëntsemna. Lempe ntšamo tsësufincá tsiyenama, atšbe ainaniñe bëts añemo sëndëtsóbomñe y corente sëntsoyejuá.

<sup>5</sup> Macedonia luaroye fsënjánashjajna orscana, ndoñe luare queftsátsbomna jóchnama, sinó nyetsca soyënguiñe fsëndëpadecena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse.

<sup>6</sup> Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnama, Tito moye tonjánashjango ora.

<sup>7</sup> Y cha tojánabó ora, bënga ndoñe más añemo quefstétsebomna nyë cha tojánashjanguama, sinó tšëngaftanga šmojanájabuachama y ainaniñe añemo chaotsebomnama šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iuámanana; y quem chabe noticiëngaca, cabá más sëntsoyejuá.

<sup>8</sup> Er masque tšëngaftanga tša ngménaca šmojamna chë tcbonjanëbuábiana tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatsëmbo chë tsbuanácha básefta tescama ngménënga tcmojánabiana,

<sup>9</sup> mora atše puerte oyejuayá sëntsemna, ndoñe tšëngaftanga ngménënga šmojamnama, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmotsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiana chibiatsma.

<sup>10</sup> Ntšamo Bëngbe Bëtsá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbocaná chaotsemnana, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nyë quem luarama enójuabnaye entšanga mondbetsebomncá ngménana bomnentsana, ndoñe ntjóbcnana juabna jatrócana; chentsana jóbocnana nyë nyetsca tescama castiganá jtsemnana, mo nyetsca tescama cuafjobancá.

<sup>11</sup> Smochjinýe ndayá tojóbcna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nyetsca chë soyënguiñe tšëngaftanga šmonjinýanýé chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnama chacmotsamnama.

<sup>12</sup> Y chca, atše chë tsbuanácha tcbonjanëbuábiana ora, ndoñe checbátanëbuabiana chë puerte bacna soye tojanmábeyeca, ni chë bacna soye tojanoyëngačñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminýanýé tšëngaftanga bëngbe tšabiana puerte šmenójuabnama.

<sup>13</sup> Chíyeca bënga más añemo ainaniñe fsëntsebomna.

Pero ntsachetšá añemo fstsomnama, masna puerte oyejuayënga



fséntsemna, er bënga fsënjinÿe Tito tša oyejuayá, er chabe ainaniñe lempe natjẽmbana yojtsemna nyetsca tsẽngaftangbiama.

<sup>14</sup> Tito tsẽngaftanga jánÿama cabá nda ora, atse cha sënjaniana tsẽngaftanga smochjanóyeunaye chẽ atse tcbonjanẽbuaja palabra ca; y tsẽngaftanga ndoñe chešmatsma atse chaitsẽuatjama chca tijánayanama. Inÿetšá, lempe ntšamo tchojauyancá ndegombre endmẽna; cachcá, ntšamo bënga Títbioye fsënjaniancá ndegombre entsemna, chẽ tsẽngaftangbiama fstsóyejuama.

<sup>15</sup> Y mora Tito más cmontsababuánÿeshana, ntšamo cha tcmojanamẽndacá ndayá tsẽngaftanga smojanmama, y ntšamo puerte respétoca y mo uamaná cuaftsemncá chabiama jtsejuabnayẽse smojanofjama tojtenojuabó ora.

<sup>16</sup> Atse puerte oyejuayá séntsemna, er atse sëndétatšẽmbo tsẽngaftanga ntšamo tšabá yomncá nyetsca soyẽnguiñe smochtsamama.

## 8

### *Chẽnga jañẽmuayama, inÿe ošbuachiyẽngbioye nyets ainánaca jujabuáchama*

<sup>1</sup> Y mora, Jesucristbeyeca catšátanga, bënga fséntseboše tsẽngaftanga chašmotsetátšẽmbo ntšamo Bẽngbe Bẽtsá bẽtscá tšabe bendicionẽnga tojama Macedonia luarentse ošbuachiyẽngcá enefjuanẽngbiama.

<sup>2</sup> Chẽnga puerte tmojasufri, y chora chca, chẽnga tmojinÿanyé becá imošbuáchema y tša imoyejuama; y masque puerte ndbomnjẽmẽnga, chẽnga nyets ainánaca bẽtscá tmojanacaredadó Jerusalenentša ošbuáchiyẽnga ndbomnjẽmẽngbiama.

<sup>3</sup> Atse sëndétatšẽmbo y sentsobena jayanama chẽnga ndegombre tmojatšatá ntšamo tmojobenacá, y ntsachetšá imobenentšana cabá más, chẽnga chca imobóseyeca.

<sup>4</sup> Tša šonjánaimpadana chẽngbioye jálesenciama ndayánaca jamama, Jerusalenoca ošbuachiyẽngbioye jujabuáchama.

<sup>5</sup> Bẽnga ftsjanobatmanama cabá más chẽnga tmonjanma; natsana, chẽnga Bẽngbe Utabná tmojaniana lempe ntšamo cha tojtsebošcá chẽnga jamama imojtseboše ca, y chentšana bẽngaftácnaca cachcá tmonjanma; y lempe enjamna ntšamo Bẽngbe Bẽtsá inabošcá.

<sup>6</sup> Ndayá Macedonioca ošbuáchiyẽnga tmojanmama bënga añemo fsënjanoyẽngacñeyeca, bënga Tito fsënjaimpadá chẽ tšabe trabajo chaopochocama, chẽ tsẽngaftangbeñe crocánana játbana, Jerusalenoca ošbuáchiyẽnga jujabuáchama, ndayá cha jamama tojanbojatsecá.

<sup>7</sup> Y morna, ntšamo tsẽngaftanga nyetsca soyẽnguiñe tša smomncá —puerte ošbuáchiyẽnga, becá obenẽnga Bẽngbe Bẽtsabe soyẽngama jóyebuambayama, puerte osertánẽnga Bẽngbe Bẽtsabe soyẽngama, corente juabnayẽnga bẽtscá jamama Cristo jaserviama y bẽngbioye corente ababuánÿeshanẽnga —cachcá, mórncá bẽtscá smochjama quem trabajuiñe chẽ ošbuáchiyẽnga ndbomnjẽmẽngbiama, tsẽngaftangbe bonshánana jtsinÿanÿnayẽse.

<sup>8</sup> Chca ndoñe quechatẽtsẽsná mo canÿe mandcá; atse séntseboše ndayá nÿe tsẽngaftanga jáuyanana ntšamo ínÿenga bẽtscá tmojatrabajá chẽ ndbomnjẽmẽngbiama, tsẽngaftángnaca cachcá chašmotsamama; y chca, chašminÿanÿema chẽ tsẽngaftanga smobomna bonshánana ndegombre bẽtsemnama.

<sup>9</sup> Er tsẽngaftanga smondétatšẽmbo ntšamo Bẽngbe Utabná Jesucristo puerte tšabe soyẽnga bẽngbiama tojamama, bẽngbioye puerte jtsababuánÿeshanẽse. Celoca, cha cabá quem luaroye ndabo ora, cha bẽtscá inabomna; pero tsẽngaftanga ababuánÿeshanayeca, mo canÿe puerte nduamanacá tojanóbema.

Y mora, Cristo mo canye nduamanacá tojóbmeyeca, Bëngbe Bëtsá puerte tšabe soyënga šojatšatá.

<sup>10</sup> Tšëngaftangbe tšabiana mëntšá cbabuayená, ntšamo quem soyiñe šmochjamama. Chë inye uata tšëngaftanga šmonjanbojatsé, ndoñe nye chë ndbomñejémëngbiama jacjayama, ndayá chca jamama jtsebošámnaca.

<sup>11</sup> Morna, chë ndbomñejémëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse.

<sup>12</sup> Er canye entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tšëngaftanga puerte ujabótënga chašmoquedá, inyëngbioye atšatnaye causa, chënga ndoñe yapa ujabótënga cha-mondëtsemnana.

<sup>14</sup> Atše sentsichamo ndayá nyetscanga chamotsenajabuachana, chca tojtséjaboto ora ca. Mora, chë bëtscá šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtséjaboto ora.

<sup>15</sup> Ntšamo Bëngbe Bëtsabe uabemana palabrënguiñe endayancá: Chë tša bomnábioye ndoñe chebatanójama; y chë nye batšá bomnábioye, ndoñe quebënjatanbuáshbena ca.

### *Tito y chabe enutënga*

<sup>16</sup> Bëngbe Bëtsá šcuatschuá, tšëngaftanga jtsanýenama Tito ainaniñe juabnënga chaotsebomnana cha tojanmama, cachcá ntšamo bënga fsëndbomncá.

<sup>17</sup> Er tšëngaftangbioye chaotsama bënga fsënjanimpadá ora, cha oyejuayá aíñe ca tonjánayana choye jama; y chabiana puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

<sup>18</sup> Títoftaca, canya Jesucristbeyeca bëngbe catšata fsëntsichamná; chabiana puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayiyayama.

<sup>19</sup> Y ndoñe nye chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomñejémëngbiama trabajuiñe; chë trabajo endmëna bonshánana jinýanýiyama; chca fsëntsama, Bëngbe Utabná jtsatschuanayama y jinýanýiyama bënga chca jujabuáchama tša fstsbošama.

<sup>20</sup> Títoftaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomñejémënga jujabuáchama;

<sup>21</sup> Er bënga fsëndama lempe ntšamo fstsobencá, ndoñe nye ntšamo Bëngbe Bëtsabe bominyiñe tšabá yomncá jamama, ndayá ntšamo entšangbe bominyiñe tšabá yomncánaca.

<sup>22</sup> Chátaftaca inya Jesucristbeyeca bëngbe catšátnaca fsëntsichamná; cha bënga ba soyiñe šonjinýanyé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama.

<sup>23</sup> Y Titbiamna, cha quem trabajuiñe atšbe enutá endmëna, y atšcá tšëngaftangbiama endëtrabája; y chë inyáta Jesucristbeyeca bëngbe

catšatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiamna chabóyebuambama; y chë bontsama sóyecna, chata Crístbioye corente jtsatschuanayana.

<sup>24</sup> Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjínÿanÿiye tšëngaftanga ndegombre chënga šmojtsababuánÿeshanama, y bënga razón fstsebmnama tšëngaftangbiamna oyejuayënga jtsemnama.

## 9

### *Chë inÿe ošbuáchiyëngbiamna crocénana játbanama*

<sup>1</sup> Chë Jerusalemoca Bëngbe Bëtsabe entšangbiamna crocénana játbanamna ndoñe quenátsiyta tšëngaftangbioye jatëbuabiamnayama,

<sup>2</sup> er atše ndegombre sëntsetatšëmbo tšëngaftanga tša šmojtseboše chca jujabuáchama. Macedonioca entšanga puerte oyejuayá sempre sëndbëtsëtsësnaye, Acaya luaroquënga chë inÿe uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebmnama, chëngnaca chë trabajo jamama.

<sup>3</sup> Pero Jesucrístbeyeca quem catšátanga sentsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nÿe bonamente chaondëtsemnama, y ntšamo sënjanayancá tšëngaftanga chašmotseprontánama;

<sup>4</sup> er nderado báseftanga Macedonioquënga átseftaca tmojá y choca ndëprontánënga tcmojánÿena chë ndbomnjëmëngbiamna ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsetatšëmbo tšëngaftanga prontánënga šmochtsemna ca; y ndegombre, tšëngaftangbiamna cabá más ouatjcá nántsemna.

<sup>5</sup> Chíyeca, tšabá šonjuínÿnana Jesucrístbeyeca quem catšátanga jáimpadana chënga atšbe natsana chamotsama tšëngaftanga jánÿama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínÿanÿiye ndbomnjëmëngbiamna šmojacjá, chca jamama tša šmobóšeyeca, y ndoñe nÿe batšatema jatšatayama y tšëngaftangbiamna bëtscá jobuájuama šmojtseboše.

<sup>6</sup> Quemuiñe šmochtsenójuabnaye: Nda nÿe batšá tojajé, cach batšá chentšana josháchiñana; y nda bëtscá tojajé, cach bëtscá chentšana josháchiñana.

<sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngménaca o nÿe ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana.

<sup>8</sup> Bëngbe Bëtsá endobena jamana chábensana nÿetsca tšabe bendicionënga y bëtscá soyënga tšëngaftanga chašmotsebmnama; chca, ntšamo nÿetsca soyënguiñe cmojtsëjabotcá sempre chašmotsóbomñama, y cabá más bëtscá chašmotsebmnama, nÿetsca tšabe obrënguiñe ínÿenga chašmëjabuachama.

<sup>9</sup> Bëngbe Bëtsabe uabemana palabrenguiñe, mëntšá endayana chë bëtscá tojacbiamna:

Cha nÿets ainánaca ndbomnjëmënga bëtscá jatšatayana;

y chë tšabe soyënga ntšamo cha tojtsamcá nÿets tempo jëftsemnana.

<sup>10</sup> Bëngbe Bëtsá, nda endbama chaotsemna jénaye jájema y sananga jasama, cmochanjátataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama.

<sup>11</sup> Bëngbe Bëtsá echanjama tšëngaftanga nyetsca tšabe soyënga chašmotsebonnama, chca, tšëngaftanga nyets ainánaca puerte ínÿengbioye chašmatsatama, y bëngbeyeca, chë mochjóyëngacñënga Bëngbe Bëtsá chamotsatschuanama;

<sup>12</sup> er chë ujabuáchenana Bëngbe Bëtsabe entsanga tcojatsatá ora, ndoñe nye ndayá tojtsëjabotcá jatsatayana, ndayá chënga Bëngbe Bëtsá chamotsatschuanámna jamana.

<sup>13</sup> Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguiñe iuayancá tšëngaftanga šmoberdecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga šmojátatama.

<sup>14</sup> Y chënga tša mochántseboše tšëngaftanga jányama y tšëngaftangbiana Bëngbe Bëtsá mochántseimpadana, er cha bëtscá tšabe soyënga tšëngaftangbiana tojama.

<sup>15</sup> ¡Bëngbe Bëtsá šcuatschuá ndayá cha šojátatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

## 10

### *Ntšamo Pablo tojánayana ínÿenga chabe contra imojtsichamo ora*

<sup>1</sup> Y mora, atše Pablo, cbochanjáimpada, tšëngaftangbioye puerte bonshanánaca jtsënyayëse, y tšëngaftangbiana tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentsana bënoca stsemna ora ca.

<sup>2</sup> Tšëngaftanga cbontsaimpadana, tšëngaftanga jányama chajá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nye bënga tšabá jtsomñama juabnëngaca bënga fstsiyena ca.

<sup>3</sup> Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entsanga monduamancá;

<sup>4</sup> er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nye quem luarama enójuabnaye entsanga japéliama monduamancá, ntšamo nye chënga tšabá jtsomñama juabnënga yomncá. Inÿetsá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayënjanama, puerte jabuache soyënga jayënjanama. Mo nda canÿe uayayábioye jtsepochoancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiana,

<sup>5</sup> y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbétsama chca juabnayana chamotsajbanama, y chamotsobena ntšamo Cristo yomandacá jtsamana.

<sup>6</sup> Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.



<sup>7</sup> Tšëngaftanga ndayánaca jtsonyayana nýe ntšamo tbojtsabinýnecá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Crístbenga fstsmënama, ntšamo cha yomncá.

<sup>8</sup> Er atše masque tša sëndbétsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja.

<sup>9</sup> Atše ndoñe quetsátsoše tšëngaftanga chacmotsinýana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama.

<sup>10</sup> Er báseftanga mëntšá atšbiama imojtsichamo: “Chabe tsbuanáchangañe cha šontsaménda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana ndbomnacá, y ntšamo tojtsichamcá tondaye ntsámanana ca.”

<sup>11</sup> Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

<sup>12</sup> Ndegombre bënga ndoñe tša añemo queftsátbomna jayanama nýetsá uámanënga fstsmëna ca, mo chë cachënga jtšenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýenga imomnama jtsonyayëse; y chca tmojtsama ora, chënga juabna ndbomnënga jtsemnana.

<sup>13</sup> Bënga ndoñe yapa quifchatóyebuambaye cabëngbiana, chca, tša tšábenga bënga imomna ca jtšenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá.

<sup>14</sup> Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsënjamna tšëngaftangbioye jama, Cristbiana tšabe noticiënga jábuayenama.

<sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínýengbe soye yómnayeca. Chamna, bënga fsëntsobátmana tšëngaftanga Crístbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tšëngaftangbeñe fsëntsamcá.

<sup>16</sup> Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entsángbioye; chca, bënga ndoñe yapa quifchatóyebuambaye ínýengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canýe uámana entsá yomna ca, más tšabá cha cháuyana Bëngbe Utabná puerte uamaná endmëna ca.”

<sup>18</sup> Er Bëngbe Bëtsá jayanana canýe entsá ndegombre tšabá tojama ca, ndoñe nýe cachá tojtsenábotamnabiana, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiana.

## 11

*Pablo y chë ndoñe ndegombre ichmónënga*



<sup>1</sup> Malaye atše šmëntjējuáanta, atše básefta soyënga mo canýe opá tojtsoyebuambnacá stsihámëntscuana, cach atše stsenabotamná ora. Masque ntšámnaca šmochtsëuánta.

<sup>2</sup> Bëngbe Bëtsábeyeca atše tša cbondábabuanýeshana y cbondánýena, tšëngaftanga nýe cha chašmotsëstonama y ndoñe ínýengbioye. Er atše Cristo sënjašbuachená tšëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nýe chábioye sempre ustonëngcá, ntšamo canýe taitá chabe bembe ndocna boyabása nduabuatomá nýe canýe boyabásaftaca chaóbuamama jushjanguancá.

<sup>3</sup> Mëtšcuaye Evábioye tbojaningñé, y cha tbojanínýnana puerte osertanabe soyënga cuaftsatsëtsnacá, pero ndegombre ndoñe chca yonjamna. Atše sëntsauatja nderado cachcá ínýenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nýe Cristo nýetsca soyënguiñe jtseeservénama.

<sup>4</sup> Atše chama sëntsauatja, er ndánaca jashjanguana y Jesusbiamama tojtabuayiyiná, mo cha inýe entšá cuaftsemncá, ndoñe ntšamo bënga Jesusbiamama fsëndabuayiyinacá, y tojtsama tšëngaftanga chašmobená canýe espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháuamashënguama espiritcá, chë Uámana Espiritu, tšëngaftanga tšabá cha jtseuántana. Y atše sëntsauatja, tšëngaftangbe ainaniñe inýe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentsana šmonjouencá, y chora tšëngaftanga chábioye becá tšabá jtseuántana.

<sup>5</sup> Pero atše sëntsejuabná tondayiñe más batsá uamaná tsmëna ca, chë Jesucristbe puerte uámana ichmónënga imomna ca juabnayëngbiamama.

<sup>6</sup> Atše ndoñe sënjuatsjinýe ntšamo corente tšabá entšángaftaca jóyebuambayama; pero atše puerte tšabá sëndëtatšëmbo ntšamo stsihámuuama. Bënga puerte tšabá nýetsca soyënguiñe tšëngaftanga tcbonjanýanyé, ndegombre chca osertánana ftsbomnana.

<sup>7</sup> ¿O atše ndoñe tšabá sënjama, tšabe noticiënga cbonjanabuayiyiná ora, tšëngaftangbentsana atšbiamama tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chao-mama?

<sup>8</sup> Mo ínýenache ošbuachiyëngcá enefjuanënga crocénana cuafjabaquëcá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama.

<sup>9</sup> Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiamama totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjajnënga, šmonjanatšetá ntšamo šojanbuashbencá. Chca, atše sënjanama, atšbe causa tšëngaftangbiamama totcá ndoñe chaondëtsemnana; y sempre chca chántsama.

<sup>10</sup> Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatšëmbo ndocná Acaya luarentše yochjama atše chaya-jbaná puerte oyejuayá jtsóyebuambnayama, chë tšabe noticiënga stsabuyiyiná ora; y chca chanjama atšbe opresidama chašmoyema ínýenga ntsamncá.

<sup>11</sup> ¿Y ndáyeca chca stsama? ¿Yojtsemna ndoñe cbondábabuanýeshana causa? Ndoñe. Bëngbe Bëtsá endëtatatšëmbo tša cbondábabuanýeshanama.

<sup>12</sup> Pero atše sempre chántsama ntšamo sëndamcá, chca, chë ínýenga, chë Jesucristbe puerte uámana ichmónënga imomna ca juabnayënga ndoñe chamondëtsebomna ndáyeca jatenábotamnayama, ntšamo bënga ftsamcá chënga imojtsetrabája ca.

<sup>13</sup> Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá.

<sup>14</sup> Y chama ndoñe šmatjenjnaná, er cach Satanásnaca endbëtsama mo canÿe buashinÿinÿana angelcá jtsinÿnama;

<sup>15</sup> chíyeca, ndoñe muatjenjnaná, chabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

*Ntšamo Pablo tojansufrí, Cristbe ichmoná bëtsemna causa*

<sup>16</sup> Cachiñe cbochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átšnaca jtsenábotamnayama jobenayama.

<sup>17</sup> Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebomna ndáyeca jobenayama jtsenábotamnayana.

<sup>18</sup> Banga mondmëna, cachënga jtsenábotamnayana ndayá quem luarentše chënga tmojamama, as átšnaca chantsenábotamnaye.

<sup>19</sup> Tšëngaftanga chë tša osertánënga, oyejuayënga opëngbioye jtsëuantánana.

<sup>20</sup> Atše sëndétatšëmbo tšëngaftanga chë opëngbioye šmnetsëuantánama, er tšëngaftanga šmondbëtsëuantana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tcmojtsajuebjantšetayënga.

<sup>21</sup> Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiama šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnayama tmojtsebomnëse, puerte uámana ichmónënga imomna ca jtsichámëse, átšnaca añemo sëntsebomna chama jtsenábotamnayama; chca stjayana ora, mo canÿe opá tojtsoyebuambnacá sëntsoyebuambná.

<sup>22</sup> Chënga jtsenábotamnayana hebreunga imomnama. Atšnaca hebreo sëndmëna. Chënga jtsenábotamnayana Israeloquënga imomnama. Atšnaca Israelocá sëndmëna. Chënga jtsenábotamnayana Abrahámbentsana entšanga imomnama. Atšnaca Abrahámbentsana entšá sëndmëna.

<sup>23</sup> Chënga jtsichámuana Cristo imoservenca. Atše chëngbiama cabá más tšabe oservená sëndmëna. Chca stjayana ora, mo canÿe opá tojtsoyebuambnacá sëntsoyebuambná. Atše chëngbiama más tijatrabajá, más šmojutame, más šmojatsetšená y ba soye atšbiama resjo endmëna jóbanama.

<sup>24</sup> Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá.

<sup>25</sup> Unga soye niñëbéngaca šmonjanëtsjanganja, y ndëtšbéngaca canÿe šmonjanatëchënganja. Unga soye chë atše sënjánenjaquena barco tontsanenatjëmbe, y chca ora, canÿe šonjanotocá, chë mar béjayoca tsachocana bënoca canÿe ibeta jëftsebobínÿnana y canÿe te jëftsejétnana.

<sup>26</sup> Atše becá sënjánana, y chca atšbiama resjo enjamna bëtš fshajayënguiñe y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëtš pueblënguentše, entšanga ndoyenentše y mar béjayoca. Atšbiámna resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmënëngbeñe.

<sup>27</sup> Atše bētsćá tijatrabajá empás uamēntšnayá joquédantscuana; ba soye tijachnēngo ibeta ntsamanacá y ba soye tijachnēngo shēntseca y uajuendayá; ba soye ndayá jasama ntsebomncá; tijasufrí sēsnama y tondaye entšayama.

<sup>28</sup> Quem soyēngama y inye ndoñe chiyátayana soyēngama más, atše cada te natjēmbana ainánaca ndoñe queschtatsmēna, er ndoñe quetsátstatsēmbo ntšamo nyetsca ošbuachiyēngcá enefjuanēnga imojtsiyenana.

<sup>29</sup> Ndánaca tšabe soye jamama tondaye añemo tontsebotmna ora, atše chabiama šochandbóngmia, mo átšnaca cach tondaye añémoca cuabndētsemncá. Nderado ínýenga tmojama ndánaca bacna soyiñe chaótsatsama, atše ndegombre puerte ngménaca chandbētsesufrina.

<sup>30</sup> Nderado nya tojátsiyta atše ndayama jatenábotamnayama, as chē atše tondaye obenana ndbomná tsmēnama ínyanynaye soyēngama chtsenábotamnaye.

<sup>31</sup> Bēngbe Bētsá y Bēngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endētatsēmbo atše ndegombre stsichámuama chē sēntsoyebuambná soyēnguiñe.

<sup>32</sup> Atše Damasco bēts puebloca sēnjamna ora, chē rey Aretasbe uabuáyana mandado tojanmandá chē puebloye amashjuaniñe soldadēnga chamotsebojanýama, atše chašmishachama chējana stsebocana ora;

<sup>33</sup> pero básefta enutēnga, canye sbarēcuiñe šmontsanēstjango chē pueblentša shēconana tapiēsiñe canye atēfjnējana, y chca atše sēnjanobená chēngbe cucuatšentšana jótsbocana.

## 12

*Ndayá Pablo mo otjenayoquēcá tojáninye y ndayá Satanás tojanma, Pablo chaosufrima*

<sup>1</sup> Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chē mo otjenayoquēcá sēnjinye Bēngbe Bētsabe soyēngama y Bēngbe Utabná šojinýinye soyēngama.

<sup>2</sup> Atše canye entšá sēnduábuatma, cha Crísoftaca cányiñe mo canyacá endmēna y nda bnētsana canta uata entsemna, Bēngbe Bētsá tbojanánatse, chē celoca más tsbanánoye, Bēngbe Bētsá yomnoye. Atše ndoñe quetsátstatsēmbo Bēngbe Bētsá cha tbojanánatse chabe cuérpoca o nye chabe espirititiñe. ¡Nye Bēngbe Bētsá chama yotátšēmbo!

<sup>3-4</sup> Atše sēndētatsēmbo Bēngbe Bētsá chē entšábioye celoye tbojanánatsama, nyetscanga oyejuayēnga imomnoye (atše ndoñe quetsátstatsēmbo Bēngbe Bētsá tbojanánatse chabe cuérpoca o nye chabe espirititiñe; nye Bēngbe Bētsá chama yotátšēmbo), y chentše cha tojanuena palabrenga, ndocná bontsemna jayanama palabrenga, chē ndayama entšangbiana ndoñe yontselesenciana jatichámuana.

<sup>5</sup> Atše chē entšá sēndmēna. Canye entšá ndáftaca chca tojopasabiama, tšabá nántsemna chama jtsenábotamnayana; pero cach atšbiama jtsenábotamnayana ndoñe tšabá ntsemnana, ndayá nye chē atše mo obenana ndbomnacá tsmēnama inýinynaye soyēngama chantsenábotamnaye.

<sup>6</sup> Y nderado jtsenábotamnayama atše stseboše, chca ora atše ndoñe stsama mo canye opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondētsejuabná ntšamo atšbiama tbojtsinýanama o ntšamo atšbiama cha tojouenama atše más tsmēna ca.

<sup>7</sup> Chiyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninÿinÿé entšá bétsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canÿe bëts uchmašëfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama.

<sup>8</sup> Unga soye Bëngbe Utabná sënjaimpadá chca sufrínana chašotsebojuánama;

<sup>9</sup> pero Bëngbe Utabná šonjauyana: “Nÿe atšbe bonshánana endmëna lempe ntšamo cmojtsajabotcá; nÿetscanga atšbe obenana más tšabá jinÿana, chë obenana ndbomna entšángbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inÿinÿnaye soyëngama, Cristbe obenana átšbeñe sempre chaot-somñama.

<sup>10</sup> Chiyeca, Cristo jaserviama, oyejuayá chandbétsemna atše mo obenana ndbomnacá stsemna ora, ínÿenga šmojtsoyenguá ora, puerte padecena soyënga causa ndayá jamama ndoñe séntsetatšëmbo ora, atše puerte chaisufrima ínÿenga tmojtsama ora y puerte tšetšena ainánaca stsemna ora; er chca soyënguiñe stsemna ora, mo canÿa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

### *Nderado ndayá Corintoca ošbuáchiyënga muanjamama Pablo yojánauatja*

<sup>11</sup> Atše chca chë soyëngama séntsenabotamná ora sënjoyebuambá mo canÿe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanÿenga yojtsamna atšbiamna puerte tšabá jtsichámuana, atše chca jtsenábotamnayama ndoñe chašondétsemnama. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juabnayëngbiama, masque atše šontsebiona mo atše tondaye cuaftsamancá.

<sup>12</sup> Canÿa Jesucristbe ndegombre ichmoná bétsemnama inÿinÿnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inÿinÿnaye soyënga y chë tšabe soyënga ntšamo chora tonjanopasacá, puerte tšabá jtsinÿanÿnayana atše canÿe ndegombre ichmoná tsmënama; y atše chca sënjanma, padecena soyënguiñe puerte uantado jtsemnëse.

<sup>13</sup> ¿Ndayá tšëngaftanga ndoñe cachcá šmonjanóyëngacñe chë inÿe luarenache ošbuachiyëngcá enefjuanëngbiama? Canÿe soye aíñe, er tšëngaftangbiowe tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aíñe sënjalesenciácá. Smochtseperdóna chca bacna soye tšëngaftangbiama tijamama.

<sup>14</sup> Atše ya séntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte séntseboše tšëngaftanga Cristo sempre chašmotseservénama. Atše chca jamama séntseboše, er atše tšëngaftangbiama mo canÿe taitacá, Cristbeñe šmontsanošbuachéyeca, atše chabiamna tcbonjanabuayená ora; séntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiama.

<sup>15</sup> Y atše corente oyejuayá lempe ntšamo tsbomncá chanjátsataye, y atše jopochócantscuanënaca, tšëngaftangbe tšabiamna. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

<sup>16</sup> Ndoñe; tšëngaftanga tšabá šmondétatšëmbo, atše uajabotá sënjamna ora, atše tondaye tcbonjanótjañama. Masque chca, básëftanga imojtsichamo ntšamo ínÿenga ndayíñnaca jáingñama atše tstátšëmbo ca, chëngbentšana



crocénana josháchiñama; y atše catijama, ínÿenga jáingñase, nÿe ntšamo atše tsbošcá chamotsamama ca.

<sup>17</sup> ¿O nderado atše tchojaingñé, canÿa chë tšëngaftangbioye sënjichamó chentšáftaca?

<sup>18</sup> Tito sënjanimpadá tšëngaftanga jányama chaotsama, y cháftaca sënjanichmó chë inÿa bëngcá Crístbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse fstsiyena? Ndegombre chca endmëna.

<sup>19</sup> Nderado tšëngaftanga šmojatsjuabná bënga jenëuyanama chca cbojtsëtsëtná ca; pero ndoñe chca quenátsmëna. Inÿetšá, bënga Crístoftaca cánÿiñe mo canÿacá entsangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucrístbeyeca atšbe bonshana catšátanga, tšëngaftangbe tšabiama tijayana, Crístbeñe corente chašmotsošbuáchema y ainaniñe bëts añemo chašmotsebmnama.

<sup>20</sup> Er atše sëntsauatja, atše jányama chaijá ora, ndoñe chacbondányena ntšamo tsbošcá, y tšëngaftanga atše ndoñe chašmondínÿena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, ínÿengaftaca yapa jtsenántšabošana, ndayánaca rábiaca jtsamana, nÿe tšëngaftangbiamá tšabe soyënga jtsebmnama jtsebošana, ínÿengbiamá podesca ichámuana, uayátsenayënga jtsemnana, ínÿengbiamá cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chachojánÿenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá.

<sup>21</sup> Atše sëntsauatja, cachiñe jányama chaijá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngménaca jošachnama ba tšëngaftangbiamá, ndëmuanÿenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntšobencá.

## 13

### *Inÿe soyëngama jábuayenama y jádiošoftama*

<sup>1</sup> Móraca ya unga soyama tšëngaftanga jányama chanjá. Atše chaijáshjango ora, tojtseiytëse chanjayana ntšamo báseftanga tmojamcá tšabá o ndoñe tšabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama.

<sup>2</sup> Atše tempo sënjanabuayená, chë tšëngaftanguentšënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjájbananga. Mora, tšëngaftangbentšana bënoca sëntsemna ora, cachiñe cachcá cbëtëtabuayená, ntšamo sënjanamcá chë tšëngaftangaftaca uta soyama sënjamna ora: atše cachiñe jányama chaijase, ndoñe quichatsleséncia bacna soyënga chašmotsamama y chama ntjacastigacá jatabáshejuanana.

<sup>3</sup> Atše chca chanjama, er tšëngaftanga šmontsenguá ndayánaca tšabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tšëngaftangaftaca cha tojamama; ndayá chabe bëts obenana tšëngaftangbeñe bëtscá jtsinÿanÿnayana.

<sup>4</sup> Er cha tmojancrucificá mo canÿa obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá



jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšëngaftanga jtsaservénama.

<sup>5</sup> Tšëngaftanga cada ona šmochjshénojuaboye, tšabá jtsetatšëmbuama mocna entsanga bétsemnana, jtsetatšëmbuama aíñe o ndoñe sempre Crístbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnana y tšabá ínÿenga šmochjínÿanÿiye. ¿Ndoñe šmondétatšëmbo Jesucristo tšëngaftangbe ainaniñe yoyenama? Ndóñesna, tšëngaftanga ndegombre ndoñe Crístbeñe ošbuáchiyënga šmontsemna.

<sup>6</sup> Pero atše sëntsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënana.

<sup>7</sup> Y Bëngbe Bëtsá fsëntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënana tšëngaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátéjaboto jinÿanÿiyana ntšamo bënga bëngbe mándoca ftsmënana mo ichmonëngcá, tšëngaftanga jábuayenama. Pero chë soye tondayana šattsentšamna,

<sup>8</sup> er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aíñe.

<sup>9</sup> Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá fstsemna ora, bëngbe mando jácastigama ntjatinÿanÿnaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnománda ora. Bënga Bëngbe Bëtsá fchandbétseimpadana, chca bacna soyënga amana jtsajbanase, chašmobená jtsemnana nÿetsca soyënguiñe tšábënga, y lempe ntšamo tšëngaftanga chašmotsemnana Bëngbe Bëtsá yobošcá.

<sup>10</sup> Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chajá ora ndoñe chašondétsemna jabuache jucácanana, mo canÿa puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnana, y ndoñe tšëngaftanga jatapochócama.

<sup>11</sup> Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebomnana endamá, tšëngaftangaftaca echántsemna.

<sup>12</sup> Nÿetscanga smochjenchuaye mo Jesucristbeyeca catšatángcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>13</sup> Nÿetsca quem luaroca ošbuáchiyënga cmontsacheuaná.

<sup>14</sup> Atše, Bëngbe Bëtsá sëntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cánÿiñe mo canÿacá chašmotsomñe.

## Gálatas

### *Pablo Galacia luaroca ošbuáchiyënga jacheuayama*

<sup>1-2</sup> Atše Pablo, quem tsbuanácha sentsabiamná Jesucristbeñe ošbuáchiyëngbiana, chë Galacia luaroca ošbuachiyëngcá enefjuanëngbiana. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná.

<sup>3</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebmnama.

<sup>4</sup> Cristo chabe derecho vida jtšobomñama cachcá tojanonÿá y tojanóbana, bëngbe bacna soyënguentsana játsebacama, y bënga chamotsobena jtšiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá.

<sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

### *Nÿe canÿe ndegombre buayenana soyënga Cristbiana endmëna*

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crísbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtsoye šmojtsequedá, ínÿengbe buayenana soye jouenama, y chë ínÿenga jtšichámuana chë buayenana soyënga chë tšabe noticiënga canmëna ca.

<sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiana tšabe noticiënguentsë, ba ndegombre soyënga jtsejuánama, inÿe soyënga jacjayama.

<sup>8</sup> Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiama ¡Bëngbe Bëtsá chaoma infernoca becá chaosufrima!

<sup>9</sup> Tempo ya chca sënjánayana; mora cachiñe šcutétayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiama chaoma infernoca puerte chaosufrima!

<sup>10</sup> Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše séndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

*Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama*

<sup>11</sup> Atše sěntseboše tšěngaftanga, Jesucristbeyeca atšbe catšátanga, chašmotsetátšēmbo chě tšabe noticiēnga ntšamo sěndabuayiynacá quem luarentša entsangbe juabnentsana ndoñe yondóbocanama.

<sup>12</sup> Ndocna entsá chě tšabe noticiēnga chešnatanbuayená, ni chešnatanbuatěmbá, ndayá cach Jesucristo šonjaninýinýé.

<sup>13</sup> Tšěngaftanga šmojátatsěmbona ntšamo atše tempo tsjanamana jtsiyenana, ntšamo judiēnga Běngbe Bětsá mondadorancá atše cha sěnjanadorana ora, ntšamo atše becá tsjánamama chě ošbuachiyěngcá enefjuanēnga puerte chamosufrima, y ntšamo atše becá tsjánamama ndocná Jesucristbeñe chaondětsošbuáchema.

<sup>14</sup> Atše inýe judiēnga cach atšcá uata bomněngbiama más sěnjánama Běngbe Bětsá adórayiñe, ntšamo judiēnga cha jadórana monduamancá, y atše nýets añémoca tša sěnjantšena jtsamama ntšamo běngbe běts taitanga básenga jabuátambama monjanamancá.

<sup>15</sup> Pero Běngbe Bětsá atšbe tšabiama yojanjuabná, y chíyeca, atše cabá ndonýna ora, canýe běts soyama cha šojanbocacá.

<sup>16</sup> Y cha tojánbošena ora, šonjaninýinýé ntšamo ndegombre chabe Uaquiñá yomnana, y šonjanchembo. Cha chca tojanma, atše chě tšabe noticiēnga ndoñe judiēngbeñe chayábuayenama. Y atše ndocnábioye chiyataná ndayá jamama šojtsanmēnama chašobuayenama;

<sup>17</sup> y Jerusalenoye cach ndoñe chiyataná chě atšbiama más natsana Jesucristbe ichmónēnga imojamněngaftaca jencuéntama. Chamna, cachora Arabia uabaina luaroye sěntsanoñe, y chentšana Damasco běts puebloye sěntaná.

<sup>18</sup> Jesucristbeñe jtsošbuáchiyama sěnjanóntša orscana, unga uatěse Jerusalenoye sěnjána Pédroftaca jencuéntama, y cháftaca nýe uta semana sěnjěftsemna.

<sup>19</sup> Y ndocna chě Jesucristbe inýe ichmónēnga chiyáisananye; nýe Santiago aíñe, Běngbe Utabnabe catšata.

<sup>20</sup> Běngbe Bětsá šontsonýá, ntšamo tšěngaftanga cbontsětsětnacá ndegombre bětsemnama.

<sup>21</sup> Jerusalenocana sěnjěftsanbocnentsana, Siria y Cilicia luarēngoye sěnjána.

<sup>22</sup> Pero chě tempo, chě Jesucristbeñe ošbuáchiyēnga Judea luariñe bomínýeca ndoñe quešmējatanábuatma.

<sup>23</sup> Nýe ínýengbiyoye imojtsayaunana: “Nda tempo bēnga puerte chamot-sesufrínama enjanamá, mora entsanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entsanga Jesucristbeñe ndoñe chamondětsošbuáchema ca” —chēnga imojtsichamo.

<sup>24</sup> Y entsanga Běngbe Bětsá imojtsatschuanaye, ndayá cha atšbiajana tojanmama.

## 2

### *Chě inýe ichmónēnga tmojánayana Pablo aíñe tšabá yojtsama ca*

<sup>1</sup> Jerusalenoye sěnjána orscana bnětsana canta uatěse, cachiñe choye sěnjesaná. Bernabé šonjantjěmbambá, y Tito běndátaftaca fsěnjěftsanbetše.

<sup>2</sup> Choye sěnjána, choye jama šojamnama Běngbe Bětsá šonjaninýanýéyeca. Atše nýe chě Jesucristbeñe ošbuáchiyěngbiama uámanēnga imojamněngaftaca sěnjanencuentá, ínýengaftaca ndoñe; y chě tšabe noticiēngama chě ndoñe judiēngbeñe sěndabuayiynama chēnga sěnjanacuntá. Chca sěnjanma atše jtsetatšěmbuama, ntšamo tijanma y sěnjěftsamcá ndoñe nýe bonamente yonjamnama.

<sup>3</sup> Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tětšená chaotsemnama, ntšamo judiënga monduamancá, Bëngbe Bëtsábenga imomnama chaotsinýnama.

<sup>4</sup> Chca tonjanopasá, masque ínýenga monjánboše Tito base bobachtema chë más delicadentše tětšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nyëts tempo mandánënga chamotsiyenama.

<sup>5</sup> Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nyëts tempo Jesucristbe ndegombre tšabe noticiënga chašmotsóbomñama.

<sup>6</sup> Pero chë ndëmuanýëngbiama entšanga monjánichamo chë uánatsanënga imojamna ca (ndayá chënga tempo imojamna atšbiama ndoñe quenatámana; Bëngbe Bëtsabiama nyëtscanga cachcá monduámana), chëngna tondaye chešmatanbuayená, ntšamo tempo tijanmama inýetšá chaimama.

<sup>7</sup> Maska, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntsabuáchema, ntšamo judiënga jábuayenama cachcá Pédrëbioye tbojanëntsabuachecá.

<sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiama jábuayenama, ntšamo cachá Pédrëbioye chabe ichmoná tbojanbemcá, judiënga chabiama jábuayenama.

<sup>9</sup> Santiago, Pedro y Juan, chë ošbuachiyënguentša uánatsanënga, atše canýe bëts trabajo chaitsebomnama Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabëbioye, jinýinýiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayinyayama trabajo jamama, y chëngna judiëngbeñe.

<sup>10</sup> Chënga nyë šonjanaimpádaye chë ošbuáchiyënga ndbomnëjëmënga Jerusaleñoquëngbiama jtsenójuabnayama; y atše bëtscá sëntsama chënga jujabuáchama.

*Pablo Antioquioca Pédrëbiama tojánayana cha ndoñe tšabá tojanma ca*

<sup>11</sup> Pero Pedro Antioquía bëts puebløye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna.

<sup>12</sup> Mëntšá tonjanopasá: Santiago básefta entšanga Antioquiøye tojanichmó, pero chënga cabá choca ndáshajna ora, Pedro yojanamana chë ndoñe judiënga ošbuáchiyëngaftaca jtseyayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tětšenënga jtsemnama yojánamna ca tmojánayanënga, chabiama muanjájuaoboyama yojtsauatja causa.

<sup>13</sup> Chë inýe judiënga ošbuachiyëngnaca tmojanontšé amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsonýayëse,



chëngcá yojtsama, jtsamëse ntšamo cha yojántatsëmbo chca jamama ndoñe ibonjamncá.

<sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentsá ndegombre soyënga endmëncá. Chca sënjaninÿe ora, Pédrëbioye nÿetsca ošbuáchiyëngbe delante sënjanianya: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

*Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema*

<sup>15</sup> Bënga judiënga fsëndmëna, bëngbe bëtsëtsanga judiënga monjámnyeyeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna.

<sup>16</sup> Y bënga mondëtatšëmbo, canÿe entšá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tšábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entšá chabe bominiÿiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtscá mondënguá, Bëngbe Bëtsá chaomama bënga chabe bominiÿiñe tšábenga chamotsemnana, bënga Crísoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnana. Pero inÿe entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsaryana? ¡Ndoñe, ndegombre ndoñe!

<sup>18</sup> Atše, ntšamo Bëngbe Bëtsá šojaninÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplínana perdonánënga jtsemnana, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canÿa ntšamo ndoñe tšabá yondmëncá amá.

<sup>19</sup> Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiÿiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonÿá, Jesucristbeñe jtsošbuáchiyama; y chca, atše chaitsobena jtsiyenana Bëngbe Bëtsá jtseservënëse. Atše Crísoftaca cánÿiñe mo canÿacá sëndmënyeyeca, Cristo cruciñe tojanóbana ora enjamna mo átšnaca cuafjobancá;

<sup>20</sup> y mora entsemna mo nÿe atše ya ndoñe cuaftsiyencá, Cristo becá vida atšbe ainaniñe entsebómnyeyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonÿá y atšbe tšabiamna tojanóbana.

<sup>21</sup> Atše ndoñe quetsatábotena ntšamo Bëngbe Bëtsá entšangbe tšabiamna juabna yobomncá. Nderado Bëngbe Bëtsá tojama canÿe entšá chabe bom-



inýiñe tšabia chaotsemnama, ntšamo chë leyiñe jamama yomna ca iuayancá cha tojtsamama, as Cristo nýe tondayama matënjanóbana.

### 3

#### *Leyjtsobedecénese o Jesucristbeñe jtsošbuáchiyëse*

<sup>1</sup> ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana.

<sup>2</sup> Atše sëntseboše nýe canýe soye atše chašmëyana: ¿Uámana Espiritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchemá?

<sup>3</sup> ¿Ndáyeca tša ndenójuabnayënga šmomna? Bëngbe Bëtsabe Espiritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtšiyenëse?

<sup>4</sup> ¿Nýetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna.

<sup>5</sup> Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchemá?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrénguiñe mëntsá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominyiñe tšabia yojamna ca.”

<sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entsangcá, cachcá ošbuáchiyana bëtsebomnama, chë chábéntšana ndegombre entsangbiamá.

<sup>8</sup> Bëngbe Bëtsabe uabemana palabrénguiñe endopodena jualíama, Bëngbe Bëtsá yochjanma chë ndoñe júdiënga chabe bominyiñe tšábenga chamotsemnama, chábeñe tmojtsošbuáchemá ca. Y Bëngbe Bëtsabe uabemana palabrénguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acheyeca, atše chanjama nýetsca quem luarëntša entsanga tšabe bendicionënga chamotsebomnama ca.”

<sup>9</sup> Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchemá. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamá tšabe soyënga tojanmcá.

<sup>10</sup> Chë Bëngbe Bëtsá chabe bominyiñe tšábenga yochjábiamá ca juabnayënga, ntšamo leyiñe jamama yomna ca iuayancá lempe tmojtsobedecënema, chënga nýets tempo jtšiyenana jtsetatšëmbëse Bëngbe Bëtsá nýetsca tescama chënga yochjácastigayama. Er Bëngbe Bëtsabe uabemana palabrénguiñe mëntsá endayana: “Bëngbe Bëtsá jayanana nýetsca tescama castigo chaotsebomna ca, nda nýets tempo ndoñe tontsama nýetsca mandënga ntšamo chë leyënguiñe iuabemancá ca.”

<sup>11</sup> Ndegombre, puerte tšabá entsinýinýena, Bëngbe Bëtsá ndoñe yochanjama ndocná chabe bominyiñe tšabia chaotsemnama, ntšamo chë leyiñe jamama ibomna ca iuayancá tojtsobedecënese. Chca ndegombre endmëna,

er Bëngbe Bëtsabe uabemana palabrënguiñe mëntśá endayana: “Nýe ndabiama Bëngbe Bëtsá tojama chabe bominyiñe tśabia chaotsemnama, cha Bëngbe Bëtsábeñe betsoşbuáchema, cha ndegombre chë nyetsca tescama yomna tśabe vida echántsebomna ca.”

<sup>12</sup> Jtsamana ntśamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsoşbuachecá. Ntśamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntśamo chë leyënguiñe endayancá, tśabe vida echántsebomna, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntśamo chë leyiñe iuayancá ndoñe tmontsama causa. Ntśamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebomna, nda canýe niñëşiñe tmojajonyá chaóbanama cha ca.”

<sup>14</sup> Chca tojopasá, Bëngbe Bëtsá chaomama, chë tśabe bendicionënga ntśamo cha Abrahámbioye tbojanşbuachenacá, ndoñe judiëngnaca chamotsebomnama, Cristo Jesúsbeyeca; y Jesucristbeñe oşbuachiyánaca, Bëngbe Bëtsá chao mama chë Uámana Espíritu bëngbe ainaniñe cháumashëngo jtsemándayama, ntśamo Bëngbe Bëtsá tojanaşebuachenacá.

#### *Ndocna ley quenátobena Bëngbe Bëtsabe şbuachenana soye jatrócama*

<sup>15</sup> Jesucristbeyeca catsátanga, chë ndayá sëntsichamcá endmëna ntśamo nyets tempo entśangbeñe endbetsopasancá. Uta entśata tbojenoyeuná canýe trato jënbemama, y ntśamo tbojenşbuachenacá chaotsinýnama chatbe uabaina tsbuanáchañe tbojuábemëse, ndocná inýa más ntsoobenana jayanana ntśamo tbojentratacá ndoñe yontsoservena ca; y inýe soyënga chiñe jacjayama cach ndoñe.

<sup>16</sup> Chcasna, Bëngbe Bëtsá ba soye Abrahámbioye tbojanşbuachená puerte tśabe bendicionënga chabiama jamama, y chabe entśanguentşana canýabiámnaca. Y Bëngbe Bëtsabe uabemana palabrënguiñe ndoñe quenátayana: “chabe entśanguentşëngbiámnaca ca”, mo Bëngbe Bëtsá ba entśangbiama cuaftsichamcá; sinó mëntśá endayana: “ache entśanguentşana cánýabiama ca”. Y chca entsayana, nýe canýe entśá ca; y cha endmëna Cristo.

<sup>17</sup> Atşe ndayá mëntśá cbontsëtsëtná: Natsana, Bëngbe Bëtsá Abrahánoftaca canýe trato tojánbema, y tbojaniyana “áiñe ca”, ntśamo tbojanşbuachenacá jamama. Chentşana canta patse y unga bnétsana uatëse, Bëngbe Bëtsá Moisesbe cucuatşiñe chë leyënga tbojanántşaboshjona; chíyeca, chë leyënga ndoñe ntsoobenana jamana chë Bëngbe Bëtsá Abrahánoftaca tojánbema trato ndoñe chaondëtsoservënama, ni jamana ndayá Bëngbe Bëtsá tojanşbuachenacá ndoñe chaondëtsoservënama.

<sup>18</sup> Er ndayá Bëngbe Bëtsá chabe entśanga tojatsatacá, tojtsemna chënga ntśamo chë leyiñe jamama yomna ca iuayancá tmojtsamama, chca, chë tşetana soyënga ya ndoñe nantsóbocana ndayá Bëngbe Bëtsá jamama tojanaşebuáchenantşana. Pero ba tśabe bendicionënga Abrahambiana jamama, Bëngbe Bëtsá tbojanşbuachenáyeca, Bëngbe Bëtsá chë soyënga Abrahambiana tojanma.

<sup>19</sup> Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tśabe soyënga jamama Abrahámbioye tbojanşbuáchenantşana baytese. Bëngbe Bëtsá yojanjuabná chë ley chaoservé entśanga jinýanýiyama ndayá tśabá o ndoñe tśabá jamama bëtsemnama, chë

Abrahámbentšana Uámana Entsá jashjanguentscuana, ndabiama Bèngbe Bètsá Abrahámbyoye tbojanšbuachená ba tšabe bendicionènga jamama. Bèngbe Bètsá angelèngaftaca chë ley Moisesbe cucuatsiñe tbojanántšaboshjona, y chë entsá Moisés enjamna chë oyebuambnayá Bèngbe Bètsáftaca y entsángaftaca.

<sup>20</sup> Uta entsáta canye trato jénbemamna, jtseytana inye entsá chë uta entsátaftaca chaóyebuambama; pero Bèngbe Bètsá Abrahámbyoye ba tšabe soyènga jamama tbojanšbuachená ora, nye canya chca tojanma, y ndoñe bonjanájaboto inya chabiama Abrahánoftaca chaóyebuambama.

### *Ndayama chë ley yomna*

<sup>21</sup> ¿Chca nántsayana, ntšamo Moisesbe leyíñe iuayancá, chë Bèngbe Bètsá tojanšbuachená soyèngama contra yomna ca? ¡Ndoñe, ndegombre ndoñe! Bèngbe Bètsá entsángbe cucuatsiñe canye ley tojanáboshjona, y chë ley tojtobena jamana entsanga ndegombre tšabe vida chamotsebomnama, as Bèngbe Bètsá nanjama entsanga chabe bominjiñe tšábenga chamotsemnama, ntšamo chë leyíñe jamama yomna ca iuayancá tmojtsamama.

<sup>22</sup> Pero Bèngbe Bètsabe uabemana palabrenguiñe endayana, nyetsca quem luarentša entsanga cachèngbe bacna soyènga jamama juabnèngaca mandánènga imomna ca, chca, Jesucristbeñe ošbuáchiyènga chamobenama ndayá Bèngbe Bètsá tojašbuachenacá jójyèngacñama. Y chènga, Jesucristbeñe imojtsošbuáchema imojtsebomna ndayá Bèngbe Bètsá tojanašebuachenacá.

<sup>23</sup> Jesucristbeñe jtsošbuáchiyama entsanga chamobenama tempo joshjanguentscuana, bènga monjamna corente mandánènga chë léyeca, y chca enjamna mo presènga cuaftsemncá, cárceloca utámenènga. Chë ley chca enjamna, ntšamo entsanga Jesucristbeñe muanjobenaye jtsošbuáchiyama Bèngbe Bètsá jinyanjiyama tempo joshjanguentscuana.

<sup>24</sup> Cristo jabama tempo tonjanoshjanguentscuana, chë ley bèngbiama enjamna mo canye pamillentša oservenacá, cha jtsamana chentsá básenga chamotsamama ntšamo tšabá tojtsemncá. Chë ley chca yojamna, bènga Cristbeñe jtsošbuáchiyama chamobenama, y chca, Bèngbe Bètsá chaoma bènga chabe bominjiñe tšábenga chamotsemnama.

<sup>25</sup> Pero Jesucristbeñe jtsošbuáchiyama bènga chamotsobenama mora ya tonjóshjangoyeca, chë ley ya ndoñe más quenátsmèna mo canye entsacá, ndayá tšabá yomncá bènga chamotsamama cuafsamcá.

<sup>26</sup> Cristo Jesúsbeñe šmojtsošbuáchema, nyetsca tšèngaftanga šmojobená Bèngbe Bètsabe básenga jtsemnama, Cristo Jesúseftaca cánjiñe mo canyáca jtsemnèse.

<sup>27</sup> Tšèngaftanga tcmontanèbaye, y chca, Crístoftaca cánjiñe mo canyáca šmontsemna. Y mora šmojobená mo cach Cristcá jtsemnama.

<sup>28</sup> Chiyeca, ndayá Bèngbe Bètsá tojamama, judiènga y ndoñe judiènga cachcanga mondmèna; nyets tempo nye ínjabiamana oservénènga y chë nye cachèngbiama trabájayènga cachcanga, y boyabásenga y shembásengnaca. Nyetsca tšèngaftanga mo canyáca šmondmèna, Cristo Jesúseftaca cánjiñe mo canyáca jtsemnèse.

<sup>29</sup> Tšèngaftanga Cristbe entsanga šmondménayeca, šmontsemna mo Abrahámbentšana entsanga cuaftsemncá; y chca, ntšamo Bèngbe Bètsá Abrahámbyoye tbojašbuachenacá, tšèngaftanga šmochanjójyèngacñe.

## 4

<sup>1</sup> Atšnaca sèntseboše jayanama, chë uaquiñá nda yochjójyèngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá

mo canye basacá tojtseemnentscuana, ndocna derecho chë soyënguiñe ntsebomnana; y chca, cha jtseemnana mo canya nyets tempo nye ínÿabiamana oserve-nacá, masque lempe ntšamo chabe taitá tbojašbuachenacá chë uaquiñabiamana tojtsemna.

<sup>2</sup> Chë uaquiñá tojtsobóchantscuana, entšanga jtseemnana ndëmuanyënga ntšamo cha tbojtsajabotcá jtsoinayana, y ínÿënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtseemnana, chë taitá tojayana tempëntscuana.

<sup>3</sup> Mo cachcá cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nyets tempo nye ínÿabiamana oserveñëngcá, quem luarentše imománda espiritëngaca.

<sup>4</sup> Pero Bëngbe Bëtsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entšangcá, canye shembásabentšana tojanonÿná, y yojoyena jtsamëse ntšamo judiëngbe leyiñe jamama ibojamna ca yojanayancá jtsamëse.

<sup>5</sup> Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtseemnana, bënga chë tempo šonjánamna chë ley jtsobedecénana.

<sup>6</sup> Y chca, tšëngaftanga ya chabe básënga šmojtseemnana jinÿanÿiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”.

<sup>7</sup> Mëntšá, cada ona tšëngaftanguentšá ya ndoñe quenátsmëna mo chë nyets tempo nye ínÿabiamana oserveñëngcá, quem luarentše imománda espiritëngaca mandánënga, y aiñe Bëngbe Bëtsabe basa tojoquedá. Y chabe basa tojoquedáyeca, lempe ntšamo Bëngbe Bëtsá chabe básënga jatšatayama tojašebuachenacá cha echanjóyëngacñe.

*Pablo, Galacia luaroquëngbiamana ngménaca yojtsanjuabnaye*

<sup>8</sup> Tempo, Bëngbe Bëtsá ndoñe šmonjanábuatma ora, tšëngaftanga šmojamna mo nyets tempo nye ínÿabiamana oserveñëngcá, ndoñe ndegombre diosënga mondmëna espiritëngaca mandánënga.

<sup>9</sup> Pero mora, Bëngbe Bëtsábioye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyeca tšëngaftanga cachiñe chë quem luarentše imománda espiritënga šmojtsayaunana? Chënga ndocna obenana quemátšbomna, y nduámanënga mondmëna. ¿Ndáyeca tšëngaftanga šmojtseboše cachiñe jtseemnana mo chë nyets tempo nye ínÿabiamana oserveñëngcá, chë espiritëngaca mandánënga?

<sup>10</sup> Tšëngaftanga tša jtsejuabnayana diënguiñe, shinÿënguiñe, canye uatëntša tempënguiñe y uatënguiñe, mo uámana tempëngcá Bëngbe Bëtsá tšabá jadórana, y chama bëts fiestënga jtsebomnana.

<sup>11</sup> Atše corente šontsengmena, nderado atšbe trabajo tšëngaftangbeñe tondayama tonjoservé.

<sup>12</sup> Jesucristbeyeca atšbe catšátanga, bëtscá cbontsaimpadana, šmochtsiyena jtsamëse ntšamo atše sëndamcá, er átšnaca sënjobema ntšamo tšëngaftanga ndoñe judiënga šmondmëncá. Tšëngaftanga ndocna bacna soye atše chešatsborlá.

<sup>13</sup> Tšëngaftanga šmondëtatšëmbo, atše sënjanobená chë natsana soyama tšëngaftanga chë tšabe noticiënga jábuayenama, canye šocana šonjanontšáshjango causa.

<sup>14</sup> Atše canye šocana sënjánbomna causa, tšëngaftangbiamana ndoñe paselo quenjatsmëna tšëngaftangbeñe atše jofjana; pero masque chca, tšëngaftanga



ndoñe chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canye ángel Bëngbe Bëtsabe ichmoná šmojofjá, o cach Jesucristbioycá.

<sup>15</sup> Ndayá chora tšëngaftangaftaca enjanopasancá, puerte oyejuayënga tcomjánabiama. ¿Y mora ndayá tojopasá? Ndegombre, atše sëndétatšëmbo y sentsobena jayanama, tšëngaftanga ndaye sóynaca atšbiama mašmënjánmama. Chë más uámana šmojánbomna soyënga atšbe cucuatšinë mašmënjánboshjona, y nya mo chë bominyëngnaca masmënjánenobuchjatsëca atše jatšetayama.

<sup>16</sup> Y morna, ¿ntšamo ndegombre yomncá cbojtsëtsësnama, atšbiama šmojtsejuabná mo tšëngaftangbe uayayá cuaftsemncá ca?

<sup>17</sup> Chë ndoñe ndegombre soyënga buátëmbayënga montsinÿinÿná mo tšëngaftangbiama ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiama ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánÿeshanama.

<sup>18</sup> Puerte tšabá endmëna atše y ínÿenga chafstseboše tšëngaftangaftaca amiguënga jtsemnana, canye tšabe soye jamama tojtsemnëse; y sempre chca chauétsemna, tšabiama tojtsemnëse, y ndoñe nÿe atše chentše tšëngaftangaftaca stsemna ora.

<sup>19</sup> Tšëngaftanga, chë atšbiama mo atšbe basengcá šmondmënënga, Jesucristbeñe chašmošbuáchema tcbonjanëjabuácheyeca; atše cachiñe sentsesufrina tšëngaftangbe causa, ntšamo canye šešona jtsebonnana ora canye shembása jtseufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínÿnëntscuana.

<sup>20</sup> Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiama tsësentínana. Atše tša šontsecochëngmena tšëngaftangbiama.

### *Ntšamo Agar y Sáraftaca tojanopasá*

<sup>21</sup> Canye soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyinë endayancá tacmojtsësertana?

<sup>22</sup> Chiñe endayana, Abraham uta uaquiñata yojánabamna ca; cánÿana Agárbeñe, canya chabe shembiana nÿets tempo oservená; y chë ínÿana, cachabe shëmbëñe, Sara, y mua ndocnabiama nÿets tempo oservená yonjamna.

<sup>23</sup> Chë chabe shembiana nÿets tempo oservenabe šešona, tojanonÿná nÿe Abraham y Agar chca chaotsemnana tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámbioye tbojanšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canye uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembása Agar, chë nÿets tempo nÿe ínÿabiama oservená yojamná, entsinÿinÿná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyënga entsangbe cucuatšinë tojanáboshjona ora. Agar básenga yojtsabamna ora, chëngnaca tmojanonÿná nÿe ínÿabiama nÿets tempo oservëngnaca jtsemnana, y chë tratentša leyinë soyëngaca mandánënga jtsemnana tmojtsebošëngnaca jtsemnana mo nÿe ínÿabiama nÿets tempo oservenëngcá.



<sup>25</sup> Ndayá Agáraftaca tojanopasacá entsinÿinÿná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénëna entsinÿinÿná, er chentša entsanga montsemna chë leyëngaca mandánënga. Ntšamo Agar y chabe básenga nÿe ínÿabiama nÿets tempo oservénënga monjamncá, Jerusalenentša entsángnaca cachcá chëngcá mondmëna, chë leyëngaca nÿets tempo mandánënga bëtsemnayeca.

<sup>26</sup> Ndayá Sáraftaca tojanopasacá, chë nÿe cachabiama trabájaye shembása, entsinÿinÿná chë trato, chë tsabe bendicionënga Abrahambiana jamama chábioye tbojanšbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entsanga.

<sup>27</sup> Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiama, y chca endmëna mo canÿe shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiama, y chca endmëna mo canÿe shembása aíñe boyaftaquëcá, er Bëngbe Bëtsabe uabemana palabrënguiñe chë shembásatbiama mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama,  
moyejuá y moyó oyejuayá cojtsemnama.

Chca moma, er aca, chë shembása chabe boyabiama utšená, chë shembása boyá bomnabiama más básenga cochántsabamna ca.

<sup>28</sup> Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca.

<sup>29</sup> Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nÿe chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá.

<sup>30</sup> Pero, ¿ndayá Bëngbe Bëtsabe uabemana palabrënguiñe Abrahambe básatbiama iuayana? Mëntšá endayana: “Moma, chë nÿets tempo nÿe ínÿabiama oservená y chabe basa acbe yebnentšana chábuaisebocnama, er chë nÿets tempo nÿe ínÿabiama oservenabe šešona ndoñe quenátobena chabe taitabe soyënga jtsebomnama. Nÿe chë propio shembe šešona aíñe, er chë shemna ndoñe nÿe ínÿabiama nÿets tempo oservená quenátsmëna.”

<sup>31</sup> Chcasna, Jesucrístbeyeca atšbe catšátanga, bënga ndoñe quemuátsmëna mo canÿa nÿe ínÿabiama nÿets tempo oservenabe básenga cuaftsemncá, er mora ya ndoñe más quemuátsmëna chë léyeca nÿets tempo mandánënga. Y aíñe montsemna mo canÿe shema ndoñe nÿe ínÿabiama nÿets tempo oservenabe básenga cuaftsemncá, er Bëngbe Bëtsabe básenga bënga mondmëna.

## 5

### *Cristo bënga šojatsebacá*

<sup>1</sup> Cristo bënga šojatsebacá, ndoñe más mo chë nÿets tempo nÿe ínÿabiama oservenëngcá chamondëtsiyenama, chë léyeca mandánënga. Nÿa šmochtsentšena nÿets tempo chca atsebácanënga chašmoquedama, y

ndoñe šmatjaleséncia tšëngaftanga cachiñe chë léyeca mandánënga ínÿenga chácmabiamama.

<sup>2</sup> Tšabá šmochjouena. Atše Pablo cbéyana: Nderado tšëngaftanga ndoñe judiënga, šmojalesenciá ínÿenga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiama tojanmcá tondayama nantsoserverna.

<sup>3</sup> Ndëmuanÿe entšánaca, nda tojalesenciá ínÿenga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana.

<sup>4</sup> Ndëmuanÿenga tšëngaftangbentšana šmojtsenguá, Bëngbe Bëtsabe bominiñe tšábenga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crístoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiama jtsejuabnayëse, chácmatsebacana.

<sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominiñe tšábenga nÿets tempo chamotsemnama. Y bënga chca mondobátmana, Jesucristbeñe ošbuáchiyana bómnayeca, y chë ošbuáchiyana chë Uámana Espíritbiajana bëngbioye endobá.

<sup>6</sup> Er Crístoftaca cánÿiñe mo canÿacá tmojtsemna ora, aíñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endména chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿenga jtsababuánÿeshanëse.

<sup>7</sup> Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama?

<sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama.

<sup>9</sup> Ntšamo entšanga mondëntšayancá: “Nÿe base levadura jamana nÿetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nÿetsca leyëngaca mandánënga.

<sup>10</sup> Bënga Bëngbe Utabnáftaca cánÿiñe mo canÿacá bëtsemnayeca, atše corente sëntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacistíga, nda tšëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiama chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsabuayiyná ora, chënga ya ndoñe átšeftaca nanjósentiaye.

<sup>12</sup> Pero chë natjëmbana ainánaca ndoñe chašmondëtsiyenama imojtsamëngna, ¡malaye cachënga muanjenocbóna!

<sup>13</sup> Pero tšëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnama. Pero chca bëtsemnama, mora ndoñe šmatjátsjuabnaye šmojtsobena jalesénciana, nÿe tšëngaftangbe cuerpënga tšabá chamotsemnama juabnéngaca mandánënga jatiyenama. Chamna, tšëngaftanga šmuenbobonshánayeca, nÿetscanga šmochtsenájabuachana.

<sup>14</sup> Er ntšamo Moisesbe leyentša nyetsca mandënguiñe endayancá, nye canye mandiñe lempe chca entsayana. Y chë mando endmëna: “Ndëmua entsánaca cochtsebobonshana ntšamo cach aca cuenobobonshancá.”

<sup>15</sup> Pero ínÿenga chamotsesufrínama jtsamëse tšëngaftanga šmojtšiyenëse, mo tšátjaye bayënga tmojtšenashantsná y tmojtšenobanacá, cuedado šmochtsebomna. Ndoñese, nyetscanga šmatjãnenpochocaye.

*Ntšamo chë Bëngbe Bëtsabe Espíritbeyeca vida jtsebomnama*

<sup>16</sup> Chíyeca cbochjáuyana: Nyets tempo šmochtšiyena ntšamo chë Uámana Espíritu cmojtšamëndacá, y chca, tšëngaftanga ndoñe quešmochátama soyënga, nye cach tšëngaftanga tšabá jtsomñama juabnëngaca.

<sup>17</sup> Er ndayá bënga, nye entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entsangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtšamëse, ndoñe quešmátobena jamana, ndayá cach tšëngaftanga, nye entsangbe juábnaca jamama šmojatsbošcá.

<sup>18</sup> Tšëngaftanga, ntšamo chë Uámana Espíritu cmojtšamëndacá šmojtšamëse, ndoñe quecmátamna ntšamo chë leyiñe iuayancá játamama.

<sup>19</sup> Ntšamo entsanga, nye entsangbe juábnaca tmojtšamcá, nyetscanga paselo jtsonÿayana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntšobenana cachënga jenomándama, chca soyënga jtsamëse.

<sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnama jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana.

<sup>21</sup> Nye jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espíritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjëmbana ínÿengaftaca jtšiyenana, puerte uantado nyetsca padecéniñe jtsemnana, nyetscanga corente bonshanánaca jtsénÿayana, tšabe ainana jtsebomnana, y nyétscañe tšabe palabra bomnënga jtsemnana,

<sup>23</sup> jtsejuabnayana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtšobenana. Y ndocna ley quenátsmëna, chca soyënga tmojtšama entsangbiamá contra cháuyanama.

<sup>24</sup> Jesucrístbënga imomnënga tmojama, chënga chë nye entsangbe juabnëngaca mandánënga ndoñe ntsemnana; ya ndoñe más, chë nye cachënga tšabá jtsomñama bacna juabnëngaca mandánënga quemátsmëna, y chë nye cachëngbiamá soyënga jamama bëtscá juabnëngaca cach ndoñe.

<sup>25</sup> Bënga ndegombre tšabe vida chamotsebomnama Uámana Espíritu yo-jtsámayeca, bënga mochtšiyena jtsamëse lempe ntšamo Uámana Espíritu šojtsamëndacá.

<sup>26</sup> Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiayama, y ndoñe nye mochjatsboše ntšamo inÿa tojatashjachcá jatsbomnama.

## 6

*Nyetscanga šmochtsenájabuachana*

<sup>1</sup> Jesucristbeyeca atšbe catšátanga, nderado ndánaca bacna soye toja-mama šmojinýe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonýayëse. Cuedado šmochtsebomna, er ndóñese, tšëngaftángnaca cmatjócochëngo cachcá soye jamama.

<sup>2</sup> Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canýe uámana entšá yomna ca, pero ndoñe chca cha tondmënëse, cachá jtseñoíngñayana.

<sup>4</sup> Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínýenga tmojamama más tšabá yojtsemna ca jatichámëse.

<sup>5</sup> Er cada ona bontsemna jtseñojuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe bu-atëmbayáftaca nyetsca tšabe soyënga jenájatayana.

<sup>7</sup> Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.”

<sup>8</sup> Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nýe cachá tšabá jtseñoñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna.

<sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canýe bëts te echanjóshjango, bënga bëtscá tšabe soyënga josháchiñana, mo tša tšabe shajuanënga tmojashaquëcá.

<sup>10</sup> Chíyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyayeca, bëngcá Bëngbe Bëtsabe básenga imomnëngbiana.

*Quem tsbuanácha juapochócama cach Pablo tojanábema*

<sup>11</sup> ¡šmochjinýe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmanýyënga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšenënga chašmotsemnama, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase.



<sup>13</sup> Pero ni mo chë más delicadentše base bobachtema tětšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tětšenënga chašmotsemna, chënga jtšenábotamnayama jobenayama, ínÿenga base bobachtema chacmatëtšama tšëngaftanga šmojalesenciama.

<sup>14</sup> Atšeftacna ndocna te chca chaondopasá. Atše nÿets tempo y becá chanjëftsóyebuambnaye ndayá atšbiamá Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiamá tondaye quenatámana ntšamo entšanga quem luarentše imojuabnacá y chëngbiama puerte iuámana; y ndayá atšbiamá puerte iuámana, entšangbiama tondaye quenatámana; y chë causa, atše chëngbiama mo obanacá sëndmëna.

<sup>15</sup> Chë más delicadentše base bobachtema aíñe tětšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiamá, Uámana Espíritu bëngbe ainaniñe jtsemándayëse.

<sup>16</sup> Chë quem buatëmbana sóyeca jtsamëse šmoyenëngbiama, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiama chca quetsatsimpadana, ndayá nÿetscanga Bëngbe Bëtsabe entšanga imomnëngbiámnaca.

<sup>17</sup> Y mora, nÿe canÿe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinÿna ntšamo atše tijasufrí, Jesusbe oservená bëtsemnama.

<sup>18</sup> Jesucristbeyeca atšbe catsátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

## Efesios

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóšeyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiana.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y chata chaboma tsëngaftangbe ainaniñe tsabe ebionana chašmotsebmoma.

*Crísoftaca cányiñe mo canyáca jtsemnëse, bënga mochántsebmoma nyetsca tsabe soyënga, ntšamo celoca yobinýncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cányiñe mo canyáca mondmënayeca, Bëngbe Bëtsá tojama bënga nyetsca tsabe soyënga chamotsebmoma, ntšamo celoca yobinýncá.

<sup>4</sup> Bëngbe Bëtsá bënga šojanabacacá Crísoftaca cányiñe mo canyáca chamotsemnana, cabá quem luare cha ndama orscana, bënga chabe delante chamotsemnana chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama.

<sup>5</sup> Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca.

<sup>6</sup> Chíyeca bënga Bëngbe Bëtsábioye sempre jtsatschuanayana, cha bëngbe tsabiana juabna yobómnayeca, ndayá chabe Bonshana Uaquiñáftaca bëngbe tsabiana cha tojamama.

<sup>7</sup> Bëngbe Bëtsá puerte bonshanánaca bëngbe tsabiana bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiana tojanóbana, chabe buiñe juabuáshanëse.

<sup>8</sup> Bëngbe Bëtsá tojama bënga nyets osertánana y becá juabna chamotsebmoma, cha becá bonshanánaca bëngbe tsabiana juabna yobómnayeca,

<sup>9</sup> y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama.

<sup>10</sup> Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentse, Cristo chamotsebmoma nyetsca chë soyënguiñe mo chë mandayacá.

<sup>11</sup> Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cányiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatsatayama tojašebuachená, mo chëngbe otocana soyacá.

<sup>12</sup> Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tsabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama.

<sup>13</sup> Y tsëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tsëngaftanga Crísoftaca

cányiñe mo canýacá chašmotsemnama y tcmojanainýnaná tšëngaftanga chabe entšanga bétsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo cha tojanašebuachenacá.

<sup>14</sup> Bënga chë Uámana Espíritu bëngbe ainaniñe mondbómnyeyca, corente mondëtatšëmbo ndayá Bëngbe Bëtsá chabe entšanga tojašebuachenacá bënga mochjójyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiama inétsamama, nyetscanga cha mochántatschuanaye, cha bëtsá y obená bétsemnama.

*Pablo Bëngbe Bëtsábioye tbojanimpadá, ošbuáchiyënga osertánana chamotse-bomnama.*

<sup>15-16</sup> Chcáyeca, atšna, Bëngbe Bëtsá tšëngaftangbiamama stseimpadana ora, sempre cha sëndbétsatschuanaye, er atše sënjátatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuánýeshanama.

<sup>17</sup> Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnama, y chacminýanyé nda Bëngbe Bëtsá yomnana, chca, más tšabá cha chašmotsábuatmama.

<sup>18</sup> Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebonnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsošbatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetatšëmbo tša bëtsá y bëts soyënga yomna ndayá chabe entšanga cha tojašebuachenacá;

<sup>19</sup> y chašmotsetatšëmbo tša bëts soye y ndocna te ntjëftopochócama chabe obenana yomnana, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëts obenana endmëna,

<sup>20</sup> ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama.

<sup>21</sup> Choca Cristo nyetsca soyënguiñe yojtsemánda, y más bëtsá obenana y mando yojtsebonna nyetsca mándayëngbiamama, chë mando y obenana bomnëngbiamama, y cha yomna más uamaná y bëtsá nyetsca chë entšangbiamama mo bëtsëtsangcá utabnëngbiamama, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentše yobínýnama y Cristo yochjésabentšana yochtsebinýnamnaca.

<sup>22</sup> Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiamama.

<sup>23</sup> Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguínaca, y lempe cha endëmánda.

## 2

*Atsebácanënga mondmëna, Bëngbe Bëtsá šuababuánýeshanayeca*

<sup>1</sup> Tempo tsëngaftanga Bëngbe Bëtsabiama mo obanëngcá šmonjamna, er tsëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama.

<sup>2</sup> Chca, tsëngaftanga šmonjánama mo chë nÿe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu.

<sup>3</sup> Tempo bënga nÿetscanga fsënjaniiyena ntšamo tsëngaftanga šmonjaniyencá. Bënga soyënga fsënjánama, nÿe ntšamo ftsjanbošcá nÿe bëngbe cuerpëngbe tsabiama, y nÿe ntšamo bëngbe juabna enjamncá bacna soyënga jamama. Bënga fsënjaniiyena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabu-atmëngcá.

<sup>4</sup> Pero Bëngbe Bëtsá sempre tša lastemado entšangbiama endmëna y sempre corente bënga šondábabuanÿeshana;

<sup>5</sup> y chíyeca, bënga cabá mo obanëngcá chabiama fsënjamna ora, bacna soyënga fsënjánama causa, chora cha tojanma bënga tsabe vida chamotsebomnana y Crístoftaca cánÿiñe mo canÿacá chamotsemnana. Bëngbe Bëtsá tsëngaftangbe tsabiama juabna bómnyeca, bacna soyënguentšana tcmojatsebacá.

<sup>6</sup> Bënga Jesucrístoftaca cánÿiñe mo canÿacá bëtsemnayeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá.

<sup>7</sup> Chca enjamna, Bëngbe Bëtsá entšanga cháuinÿanÿema nÿetsca joshjanguama tempënguiñe, ntšamo cha bëngbe tsabiama bëtscá juabna bëtsebomnana, cha Cristo Jesúseftaca bëngbioye tsabe juábnaca šojánanÿe ora.

<sup>8</sup> Er Bëngbe Bëtsá tsëngaftangbiama tsabe juabna yojánbomnayeca, tcmojatsebácá, Jesucrístbeñe šmojtsanošbuáchema; pero atsebácanënga šmondmëna, ndoñe cach tsëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canÿe tšetana soye.

<sup>9</sup> Atsebácanënga šmondmëna, ndoñe cach tsëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana.

<sup>10</sup> Bëngbe Bëtsá šojtabiama ntšamo bënga mondmëncá, y Cristo Jesúseftaca cánÿiñe mo canÿacá bëtsemnayeca, Bëngbe Bëtsá mo tsmëma entšangcá cuaftsatsmëncá šojtabiama, tsabe soyënga jtsamëse jtsiyenama. Y ndayá bënga tsabá mondamcá, Bëngbe Bëtsá tempo tojanprontá bënga chamotsamama.

### *Crístbeyeca tempcá tsabá Bëngbe Bëtsáftaca jtsatsmënana*

<sup>11</sup> Tsëngaftanga ndoñe judiënga, ndëmuanÿenga judiënga cmondubuatma “chë más delicadentše base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tsëngaftanga chë ndoñe judiënga,

<sup>12</sup> šmochjenójuaboje ntšamo tempo šmojamnama, Crístbeñe cabá ndošbuáchiye ora. Chora, tsëngaftanga Cristo ndoñe šmonjánbomna, Israeloca entšangbiama stëtsoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tsëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmcá.



13 Pero mora tsëngaftanga Cristo Jesúseftaca cánýiñe mo canýacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tsëngaftangbiamama tojanóbana.

14 Cach Cristo yojsama bënga tempcá tsabá Bëngbe Bëtsáftaca chamotsemnama. Cha tojama judiënga y ndoñe judiënga nyetscanga mo cachca entsangcá chamotsemnama, mo nda canýe tapiëse tojtsendbemcá, chë ndayëseca canýe luarentša entsanga tmojtsenjáta, chënga enáyaye causa.

15 Cristo chënga mo cachca entsangcá tojábiamama, judiëngbe leyënga y mandënga ndocna obenana chamondëtsebomnama jamëse. Chca tojama, cha jóbanëse, chë útoica entsanga mo nýe canýe tsmëma entsangcá jábiamama, cháftaca cánýiñe mo canýacá jtsemnëse. Cha chca tojanma chënga nyetscanga tsabá chamotsiyenama;

16 y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canýe entsangcá chamotsemnama, chënga tempcá tsabá Bëngbe Bëtsáftaca chamotsatsmënama.

17 Cristo quem luaroye tojánabo tsabe noticiënga jabábuayenama, tempcá tsabá Bëngbe Bëtsáftaca jtsatsmënama. Cha quem tsabe noticiënga tojanabuayená tsëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuaatmënga.

18 Er chábeyeca, canýánýenga y ínýenga montsobena chë Taitábioye jobéconana, er bënga nyetscanga cachca espíritu bëngbe ainaniñe mondbomna, chë Uámana Espíritu.

19 Chýeca tsëngaftanga, Bëngbe Bëtsabe entsanguentse ndoñe quešmátsmëna mo inýe luarocana ashjajnëngcá, y ni mo cachëngbe yebnentse ndoyenëngcá, tondayama derecho ndbomnënga. Inýetšá endmëna; tsëngaftanga derecho šmondbomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básenga šmondmëna.

20 Jesucristo y chabe entsanga mondmëna mo canýe jebna yebncá. Jesucristbe ichmónënga y chë Bëngbe Bëtsabe juabna oyebuambnáyënga mondmëna mo chë ndëtšbënga ndayíñe chë yebna tojtsëcuatjoncá; tsëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentse uashacuana ndëtšbecá.

21 Quem más uámana luarentse uashacuana ndëtšbeñe, nyetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentse tsëm jebna sóynaca chiñe jtsëcuatjonana. Cachcá Cristo, mo chë más uámana luarentse uashacuana ndëtšbecá, jtsamana nyetsca chábeñe ošbuáchiyënga cháftaca cánýiñe mo canýacá chamotsemnama, y ínýengnaca cachcá chamotsemnama. Y nyetsca ošbuáchiyënga Crístoftaca cánýiñe mo canýacá tmojtsemna ora, chënga jtsemnana mo Bëngbe Utabnabiamama canýe bëts yebna jebncá, chábioye jtsatschuanayama.

22 Y tsëngaftanga Efesoca ošbuachiyëngbiámñaca Cristo entsama, chë inýe chábeñe ošbuáchiyëngaftaca mo canýe entsangcá chašmotsemnama. Y chë Uámana Espíritu bëngbe ainaniñe yojsiyénayeca, bënga nyetscanga cánýiñe mondmëna, mo canýe bëts yebncá ndayentse Bëngbe Bëtsá yoyena.

### 3

*Pablo Jesucristbe trabajo yojanbonýena, chë ndoñe judiëngbeñe jamama*

1 Chca, atše Pablo utamená sěntsemna, Cristo Jesusbiamá soyēnga entšanga abuayiynaye causa, tšēngaftanga chē ndoñe judiēngbe tšabiama.

2 Er tšēngaftanga ya cmontsamna jtsetatšēmbuama, Bēngbe Bětsá tšēngaftangbe tšabiama juabna yobomnana; y chca, chē trabajo atše šojabonyé, tšēngaftangbe tšabiama jamama.

3 Tšēngaftángnaca cmontsamna jtsetatšēmbuama ndayá Bēngbe Bětsá šojinýinýé, ntšamo cha jamama tempo tojanjuabocá, pero entšanga chca ndoñe tonjaninýanýé, y chē soyama ya batšatema tcbonjubuábiamá.

4 Chašmojualiá ora, šmochanjátatšēmbona Cristbe soyēnga šosertánama, chē tempo ndocná yonjanábuatma soyēnga,

5 chē tempo Bēngbe Bětsá ndocnábioye tbonjaninýinýé soyēnga; pero mora cha tojinýanýé, Jesucristbe ichmónēnga nýe Bēngbe Bětsabiamá oservénēngbioye y Bēngbe Bětsabe juabna oyebuambnayēngbioye; y cha chca tojama chabe Uámana Espíritoftaca.

6 Ndayá tempo Bēngbe Bětsá ndoñe tonjaninýanýecá mēntšá endmēna: chē ndoñe judiēnga Jesucristbe tšabe noticiēnguiñe chamojtsošbuaché ora, cachcá ntšamo chē judiēnga ošbuáchiyēnga Bēngbe Bětsábiocana mochjoshachiñcá, chēngnaca chábiocana mo otocancá chē soye mochanjójyēngacñe. Chēnga mo cach judiēnga ošbuachiyēngcá, Cristo mondbomna mo chēngbe mandayacá. Y chca Cristo endmēna mo bestšašcá y chēnga nýetscanga mondmēna mo cachabe cuerpentša soyēngcá. Chē ndoñe judiēnga ošbuáchiyēnga mochanjójyēngacñe lempe ntšamo Bēngbe Bětsá chē judiēnga ošbuáchiyēnga tojašebuachenacá. Chca echántsemna chē ndoñe judiēngaftaca, chēnga Cristo Jesúsēftaca cánýiñe mo canýacá bétsemnayeca.

7 Masque ndoñe šonjanomerecena, mo ndayá cuafjatšetacá, Bēngbe Bětsá šonjanábuayana cha jtseservénama, tšabe noticiēnga entšanga jtsabuayiynayēse; y cha átšēftaca chca tojanma chabe obenánaca.

8 Atše nýetsca chē Bēngbe Bětsabe entšanguentše sēndmēna chē más nduamaná; pero Bēngbe Bětsá bēts pavor šontsebema, šonjalesenciá chē Cristbe bētscá tšabe soyēnga chē ndoñe judiēnga jábuayenama. Chē Cristbe soyēnga tša bētscá endmēna, y chca, quenátopodena chē soyēnguentsana lempe jtsabuatmana.

9 Y chē trabajo šonjabonyé jamama, nýetscanga botamana jinýama chamotsobenama ndayá Bēngbe Bětsá yochjama, ndayá cachá, chē nýetsca soyēnga tojamá, tempscana yojanjuabnacá. Mēntscóñama Bēngbe Bětsá chē soye ndocnábioye tbonjinýinýé, pero mora aiñe.

10 Chca, Crístbeñe ošbuachiyēngbeyeca, mora chē celoca mándayēnga y obenana bomnēnga, chamobená juabuátmanana nýets osertánana ntšamo Bēngbe Bětsá yobomncá.

11 Bēngbe Bětsá chca tojama, ntšamo cachá yojanjuabnacá nýetsca tescama jamama, y chca cha tojama Jesucrístoftaca, Bēngbe Utabná.

12 Bēnga Crístoftaca cánýiñe mo canýacá mondmēna, y chábeñe mondošbuachéyeca, bēnga montsobena Bēngbe Bětsábioye jobéconama tondayama ntjatauatjca, y corente jtsetatšēmbēse cha ndoñe chašondubatema.

13 Chíyeca atše cbontsaimpadana ndoñe chašmondětsajbaná ainaniñe añemo bomnana, atše sěntsesufrina causa, er chē tšēngaftangbe tšabiama tsēsufrentšana, tšēngaftangbiamá tšabe soyēnga endóbocana.

### *Cristbe bonshánana*

14-15 Y chca, Bēngbe Bětsá, chē Taitá, ndábentšana nýetsca pamíllanga celoca y quem luarentše uabaina imóyēngacañe, chabe delante joshaméntšase,

<sup>16</sup> sěntseimpadana, chabe bėtsćá uámana bomnánaca chaoma, tsěngaftanga ainaniñe obenana y bėts añemo chašmotsebomnama, chabe Espíritbeyeca,

<sup>17</sup> y tsěngaftanga Crístbeñe jtsošbuáchiyěse, mua tsěngaftangbe ainaniñe chaotsiyenama. Běngbe Bėtsánaca sěntseimpadana, cha y ínŷenga nŷets ainánaca jtsababuánŷeshaněse,

<sup>18</sup> tsěngaftanga y nŷetsca Běngbe Bėtsabe entśángnaca tsěngaftangaftaca, chašmotsobena josértama Crístbe bonshánana bėngbiana tśa bėtsćá yomnama. Nderado nda tojontśé chabe bonshánana jatśěmbonana mo canŷe soye cuaftsemncá, cha ndocna te nanjobenaye jtsetatśěmbuana těntsoye ndayěntscoca yomna y nŷanějoye ndayěntscoca, jashenoye ndayěntscóñe y tsbanánoye ndayěntscóñe yomna.

<sup>19</sup> Atśe sěntseimpadana tsěngaftanga chašmobená chě bonshánana juabuátmanana (chě bonshánana puerte bėtsćá endmėna causa, bėnga ndocna te quemochatobenaye josértama ntśamo chě soye lempe yomnana). Pero sěntsebośe, tsěngaftangbe ainaniñe nŷe Běngbe Bėtsabe soyėnga chaotsemna y tsěngaftanga chašmotsiyena jtsaměse, ntśamo tsěngaftanga chašmotsamama Běngbe Bėtsá yujuabnacá.

<sup>20</sup> Y mora, nŷetscanga Běngbe Bėtsá chamotsatschuaná. Cha obenana yobomna ntśamo bėnga tmojtsojtjanañe o tmojtsejuabnama más soyėnga jamama, chabe puerte bėts obenánaca; y chě obenana bėngbe ainaniñe yojtsemánda y yojtsama bėnga ainaniñe sempre ośbuáchiyana chamotsebomnama.

<sup>21</sup> ¡Entśanga Běngbe Bėtsá chamotsatschuaná nŷets tempo y nŷetsca tescama, ndayá Crístbeñe ośbuáchiyėnga tmojtsamama y cach Cristo tojamámnacal! Chca chaotsemna.

## 4

### *Uámana Espíritbeyeca bėnga cánŷiñe mo canŷacá jtsemnana*

<sup>1</sup> As, atśe chě cárceloye utamená, Běngbe Utabnabiana trabájaye causa, tsěngaftanga cbontsaimpadana, ndėmuanŷenga Běngbe Bėtsá tcmojáchembo chabe entśanga chašmotsemnana, sempre chašmotsiyena mo chě entśangcá ndėmuanŷenga Běngbe Bėtsá cach soyama tojánachembo y chca imomerecena.

<sup>2</sup> Cada ona chamotsenojuabná mo chě ínŷenga chabiana más uámanėnga tmojtsemncá, y nŷetscángbioye puerte bonshanánaca śmochtsobátmana, y bėtsćá bonshánana jtsebomněse śmochtsenėuantana;

<sup>3</sup> sempre śmochtsejuabnaye y śmochtsentśena tsěngaftanga nŷets tempo cánŷiñe mo canŷacá chašmotsemnana, nŷetsca tsěngaftanga natjėmbana jtsemněse. Y tsěngaftanga śmontsobena cánŷiñe mo canŷacá jtsemnana chě Uámana Espíritbeyeca.

<sup>4</sup> Bėnga Jesucrístbeñe ośbuáchiyėnga bėtsemnayeca mondmėna mo cach cuerpentśėngcá, chě Crístbe cuerpo, y cachca Espíritu bėnga nŷetscanga ainaniñe mondbomna. Běngbe Bėtsá śojáchembo, bėnga chábeñe jtsošbuáchiyěse, nŷetscanga cachcá śochjátśatayama chamotsobátmanama.

<sup>5</sup> Bėnga nŷetscanga cach Utabná mondbomna, cachca ośbuáchiyana Jesucrístbeñe mondbomna, y bėnga nŷetscanga uabáinėnga mondmėna chca betsośbuáchiyama.

<sup>6</sup> Bėnga ośbuáchiyėnga nŷetscangbiana cach Běngbe Bėtsá y Taitá endmėna. Cha bėngbe amėndayá endmėna, chabe obenana nŷetscángbeñe jtsinŷnana, y nŷetsca bėngbe ainaniñe chabe Espíritu endmėna.

<sup>7</sup> Pero bēnga, cada ona tšetana obenana tojóyēngacñe, tšabe soyēnga jamama, ntšamo Cristo jatsatayama tojanbošencá, chábeñe ošbuáchiyēnga jujabuáchama.

<sup>8</sup> Chíyeca, Bēngbe Bētsabe uabemana palabrenguiñe Jesucristbiana mēntšá endayana:

Cha celoye tontantsjuá, y cháftaca tonjanéyamba nyetsca chabe uayayēnga, chē tojánayēnjananga,

y chabe entšángbioye obenana tonjanatšatá, tšabe soyēnga jamama ca.

<sup>9</sup> ¿Y ndayá yojsayana chē “cha tontantsjuá ca”? Chca entsayana co Cristo natsana, quem luaroye tojánastjango ca.

<sup>10</sup> Y Cristo, chē tojanastjanguá, cachá endmēna nda celoca chē más tsbanánoye tojtantsjuá; chca, canye ora nyétscañe cha chaotsemnama.

<sup>11</sup> Y cachá, chē tšabe soyēnga jamama obenana tojanatšatá ora, tojanma chábeñe ošbuáchiyēnguentše chamotsemna ínŷengna chabe ichmónēnga, ínŷengna Bēngbe Bētsabe juabna oyebuambnayēnga, ínŷengna tšabe noticiēnga Cristbiana abuayiynayēnga, y ínŷengna ošbuáchiyēnga anŷenēnga y Bēngbe Bētsabe soyēngama abuátambayēnga.

<sup>12</sup> Cristo tojanabacacangna chabe entšángbioye mochjanējabuache, cha tojanabanýe trabajo chēnga chamotsamama, y nyetsca ošbuáchiyēnga, chē nyetscanga cánŷiñe mondmēna mo Cristbe cuerpcá, cada te más ošbuáchiyana y bonshánana chamotsebomnama,

<sup>13</sup> bēnga nyetscanga chamobenantscuana cachca ošbuáchiyana Jesucristbeñe jtsebomnama, y Bēngbe Bētsabe Uaquiñabiana nyetscanga lempe cachcá jtsetatšēmbuama. Chca, bēnga mochanjashjache jtsemnama lempe ntšamo Cristo yomncá, mo bētsétsanga bētsca juabna bomnēngcá,

<sup>14</sup> y ndoñe nye mo basengcá, Bēngbe Bētsabe soyēngama jtsetatšēmbuama. Chē soyēnguiñe ya ndoñe más nye mo basengcá quemochátsmēna, ndēmuanŷengna paselo jáingñama yomna. Mo canye barquēsha nye ndaye bínŷiacnaca tojtsēyambancá, básefta entšanga nye ndaye buatēmbana soye tmojatucá jatsyeunanana; bēnga ndoñe chca quemochátsmēna, ya ndoñe más bēngbe juabna quemochatstróca, nye ndaye tmojatucá tsēm sóyeca, ínŷengbioye áingñayēnga. Chēnga becá montsetatšēmbo ntšamo entšanga jáingñana, y montseboše chē montsabatambá bostero soyēnga bēnga jtseyeunanama.

<sup>15</sup> Chamna, chē Bēngbe Bētsabe ndegombre soyēngama bonshanánaca jtsóyebuambnayēse, šontsamna jashjáchana jtsemnama lempe ntšamo Cristo yomncá. Cha bēngbe amēndayá endmēna, cachcá ntšamo bestšaše chē cuerpentša soyēnga jtsemandayancá.

<sup>16</sup> Mo canye bestšašcá, chēse jamana nyetsca chē cuerpentša soyēnga ndayentše chamuenefjnama y chiñe jobónjuama chamotsobenama, chē cuerpo saná chaotsebomnama jtsamēse, chca, nyets cuerpo tšabá chaóbochema, cachcá Cristo, chē nyetsca ošbuáchiyēngbe amēndayá, chabe obenánaca jamana chēnga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chē soye chaotsamama tomncá, as nyets cuerpo tšabá jobóchana; cachcá, ošbuáchiyēnguentše cada ona tojtsama ntšamo jamama tbojtsemncá, as nyetsca ošbuáchiyēnga cada te más ošbuáchiyana mochántsebomna, puerte jtsenbobonshánēse.

*Crísoftaca cánŷiñe mo canŷacá jtsemnēse tsēm vida šmochtsebomna*

<sup>17</sup> Mēntšá entsemna ntšamo cbontsētsētnacá, y Bēngbe Utabná endmēna nda tojama atše mando chaitsebomnama tšēngaftanga chca jáuyanama: Ndoñe



más šmattsiyena bacna soyënga jtsamëse, mo chë Bëngbe Bëtsábioye ndu-abuátmënga mondbetsamcá; chënga jtsiyenana jtsamëse ntšamo cachëngbe ndoserverna juabnënga tojtsamëndacá.

<sup>18</sup> Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábiocana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

<sup>19</sup> Chënga bacna soyënga tmojtsama ora, tondayama ntsenócochinÿenana; chënga nÿets tempo jesentsénana nÿetsca bacna soyënga amana, y chca jtsamana tondayama ntjatenujuabnaycá.

<sup>20</sup> Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá.

<sup>21</sup> Ndegombre tšëngaftanga chabiamana šmojanuena y ínÿenga tcmoianabu-atambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá.

<sup>22</sup> Chcasna, ntšamo tšëngaftanga šmojanjuabná, šmoiansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmoiansentina y šmojanamcá, canÿe ondbiamnaye juabnentsana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye.

<sup>23</sup> Tšëngaftanga cmontsamna tšëngaftangbe juabniñe tsëm y tšabe juabnënga jtsebomnana.

<sup>24</sup> Tšëngaftanga cmontsamna jashjáchana mo tsmëma entsangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entsangcá tcmojábiamana, tšëngaftanga chašmotsiyenama jtsamëse Bëngbe Bëtsabe bominÿiñe tšabá yomna soyënga y chábioye jadórana soyënga, chë ndegombre soyënguentsana óbocana soyënga.

<sup>25</sup> Chcasna, ya ndoñe más šmattsebohero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nÿetscanga cánÿiñe mondmëna mo nÿe canÿe entsangcá.

<sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënana chacmetëna y ndoñe nÿets te chacmondetëna.

<sup>27</sup> Ndoñe šmatjaleséncia Satanás ndayánaca tšëngaftangftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontsé; cachabe cucuátšeca tšabe trabajo chaotsóboma, chca, ndayánaca cha chaotsebomnana chë ujabótënga jatšatayama.

<sup>29</sup> Bacna palabrënga ndoñe šmattsichamo, pero aíñe tšabe palabrënga y nÿa chorsca ujabótama palabrënga, chë inÿe entsángbioye jujabuáchama más Cristcá chamotsemnama, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsëtsësná sóyeca.

<sup>30</sup> Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmoianainÿnaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nÿetsca tescama yochjatsebacaye orscama.

<sup>31</sup> Inyengbiamana bacna juabnënga ainaniñe ndoñe chašmondëtsebmna, etonánënga ndoñe chašmondëtsemna, ni ínÿengaftaca ndoñe chacmon-detëna. Inyengbioye ndoñe chašmondëtsabuachembuana, ínÿengbioye ndoñe šmatjoyánguango y ndaye bacna sóynaca ndoñe šmattsama.

<sup>32</sup> Nÿetscángaftaca tšábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

## 5

### *Ntšamo yomna Bëngbe Bëtsabe básënga chamotsiyenama*

<sup>1</sup> Tšëngaftanga, Bëngbe Bëtsabe bonshana básënga quetsomñecá, nÿa šmochtsentšëna cachacá jtsemnana.

<sup>2</sup> Smochtsiyena nÿetsca soyënga bonshanánaca jtsamëse, ntšamo Cristo šojanababuanÿeshancá; chca, cha chabe derecho vida jtsobomñama cachcá tojanonÿá y bëngbiamana tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe bominiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóba y altaroca tcojajuinÿese, y chë soye botamana jtsonguëtsiyana.

<sup>3</sup> Tšëngaftanga, Bëngbe Bëtsábënga šmomnënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejuabnayanana y jtsebošana, y chë nÿe yapa jésebošana más soyënga ínÿengbiamana jtsebmnama cach ndoñe. Ni chë soyëngama ndoñe šmattsóyebuambnaye.

<sup>4</sup> Bacna soye ndoñe šmattsóyebuambnaye, ni corente ntjenajuaboycá, ni nÿe ntšámnaca bacna soye jenbotatšëmbonana cach ndoñe, er chë soyënga tšëngaftangbiamana ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye.

<sup>5</sup> Er tšëngaftanga ya šmondëtatšëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga ínÿengbiamana jtsebmnama bošá y amá (chca jtsayanana chabiamana más iuámana soyënga jtsebmnama, Bëngbe Bëtsábioye jatsbobonshánama), chca amënguentshana ndocná tondaye queochatóyëngacñe ndayá Bëngbe Bëtsá chabe entšangbioye jatšatayama tojašebuachenantsana, Cristo y Bëngbe Bëtsabe amëndayoca.

<sup>6</sup> Ndocná chacmondaingñe ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye.

<sup>7</sup> Chíyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojanियena bacna juabnënga jtsebmne y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánÿiñe mo canÿacá bëtsemnayeca, chabe soyënga šmontsetátšëmbo y sempre šmondëtsemna cháftaca, chë entšangbe juabnënga binÿnayáftaca. Smochtsiyena jtsamëse mo chë binÿnayabe entšangcá.

<sup>9</sup> Chë binÿnayábeyeca entsanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca.

<sup>10</sup> Nÿa šmochtsentšëna soyënga jamama, Bëngbe Bëtsá oyejuayá chaotsemnana.

<sup>11</sup> Chë mo ibetiñe cuaftsiyencá oyenëngbe bacna soyënga tondayama ntsošervënanana, y tšëngaftanga chca ndoñe šmattsama. Chamna, chëngbioye šmochjínÿanÿiye chënga ndoñe tšabá tmonjamama.

<sup>12</sup> Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja;

<sup>13</sup> pero nyetsca soyënga binÿniñe tmojacjá ora jtsopodénana tšabá jinÿama ntšamo ndegombre tomncá. Cachcá, ntšamo entsanga tmojamcá chë binÿnayá chaojinÿanyé ora, echantsopodena jtsotatsëmbuama ntšamo chë soyënga yomnana;

<sup>14</sup> er ndayánaca binÿniñe tojtsinÿinÿena, jtsopodénana jinÿama ntšamo ndegombre chë soye tomncá. Cachcá, ntšamo entsanga iytëmencá tmojtsamcá chë binÿnayá chaojinÿanyé ora, chënga mochántsetatsëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá;

chë bacna soyënga ama causa, Bëngbe Bëtsabe bominiñe mo obanëngcá imomnënguentsana šmochtsojuánañe,

y Cristo acbe juabnënga echantsebínÿnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá.

<sup>16</sup> Lempe ntšamo chašmojobenacá nyets tempo tšabe soyënga šmochtsama, er quem tempo entsanga yapa bacna soyënga montsama.

<sup>17</sup> Ntjenujuaboycá ndoñe šmattsama, mo chë ndosertanëngcá. Pero aíñe bëtscá šmochtsentsena ndayá Bëngbe Utabná jamama yobošcá chacmósertama.

<sup>18</sup> Ndoñe šmattsótmenaye, er chë soye entsábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama.

<sup>19</sup> Smochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye.

<sup>20</sup> Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

### *Ntšamo yomna canÿe yebnentsënga chamotsemnana*

<sup>21</sup> Nyetscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentsa mándayënga imomnana; y nyets tempo chca šmochtsama, Bëngbe Utabná chašmotsobedecénama.

<sup>23</sup> Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá;

<sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatsëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiama tojanóbana.

<sup>26</sup> Chca tojanma, chënga chabe entsanga y puerte tšábenga jábiamama; y chënga tmojánenabayé ora, tmojaninÿanyé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiama buayenana soyënga tmojanuena ora.

27 Cha chca lempe tojanma, chë ošbuáchiyënga japróntayama corente tšábenga y uámanënga cachabiamama chamotsemnana, ndocna bacna soye ndbomnënga, ni ndocna entsá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca.

28 Ntšamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtšenobobonshánana, er chata cányiñe jtsemnana mo nye canye entsá cuenta.

29 Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá;

30 er bënga nyetscanga cányiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá.

31 Ntšamo Bëngbe Bëtsabe uabemana palabrenguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canyacá bochántsemna ca.”

32 Chë soyënga josértama puerta totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnana.

33 Pero morna, tšëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

## 6

1 Básenga, Bëngbe Utabnáftaca cányiñe mo canyacá bëtsemnayeca, tšëngaftangbe bëtsetsangbioye šmochtsayaunana, er chca jamana tšabá endmëna.

2 Moisesbe leyiñe canye mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtsoye catjëttsaquédaye,

3 tšabe vida chacuetsobomñama y quem luarentše bayté chacuetsiyenama.”

4 Taitanga, ndoñe šmattsama tšëngaftangbe básenga chauetënana; más tšabana, chënga šmochtsabëchaye jtsabuátambayëse y jucácanëse, ntšamo Bëngbe Utabná endbetsabatambaycá.

5 Tšëngaftanga, chë nyets tempo nye ínñabiamama oservénënga, tšëngaftangbe nduiñënga šmochtsayaunana; chca šmochtsama puerta respétoca, bëtscá cuedádoca y nyets ainaniñe tšabe juabnéngaca, mo cach Crístbioye cuaftseser-vencá.

6 Y chca chë nduiñëngbioye šmochtsaservena, ndoñe nye chënga chacmojtsénña ora, mo nda nye entsangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá.

7 Nyetsca trabajotëmënga šmochtsama nyets tšëngaftangbe añémoca, mo Bëngbe Utabnabiamama cuaftsetrabajacá, y ndoñe nye entsangbiamama.

8 Er tšëngaftanga ya šmondëtatšëmbo, cada ona, nyets tempo nye ínñabiamama trabajayá o nye cachabiamama trabajayá tomna, ntšamo tšabe soyënga tojamcá Bëngbe Utabnábiocana yochjójyëngacñe.

9 Y tšëngaftanga, ndëmuanýëngbiamama ínñënga nyets tempo imoservena, cachcá tšabá chëngaftaca šmochjamna, tondayama ntsaútatjnyayëse. Smochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnana, y chabiamama nyetscanga cachcá monduámana.

*Ndayá Bëngbe Bëtsá entsanga tojatsatá Satanasbiamama jenëuyanama*



<sup>10</sup> Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo.

<sup>11</sup> Mo canÿe soldadcá, ba soyënga jtochëtjuana chë tmojtsentsjananga ora uayayëngbiana jenëuyanama, tšëngaftágnaca cachcá, nÿetsca chë Bëngbe Bëtsá cmojatšatá soyëngaca šmochtseprontana jenëuyanama, tšëngaftanga jáingñama Satanás ntšámnaca tojtsama ora, ndoñe chacmondáyënjanama.

<sup>12</sup> Er bënga ndoñe quemuatenojuerzana cach quem luarentša entsángaftaca jenëyënjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espíritëngaftaca; y chë tsbanánoca luarënguiñe imomna y bacna soyënga chaotsebínÿnama ama espíritëngaftácnaca.

<sup>13</sup> Chíyeca, lempe ntšamo Bëngbe Bëtsá cmojatšatacá šmochjóyëngacñe y chë soyënga jtsamëse šmochtsiyena jtseprontánama, mo canÿe soldado jenëuyanama y jáyënjanama bëtská soyënga tojtochëtjca. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënjanama, y jenëuyanama lempe jtsamëse, chašmobená cha jayënjanama.

<sup>14</sup> Mo canÿe soldadcá, jabuache jtasnayana y cochaca canÿe morocho soye jenácochjatsana jtsevalentiana y ndoñe chamondëyënjanama, tšëngaftágnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuaftjenacochjatscá, chca, Satanás tšëngaftangaftaca tondaye chaondobená jamama.

<sup>15</sup> Mo canÿe soldadcá jtoshecochëtjuana betesco jobónjuama jtseprontánama, tšëngaftágnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entsanga tempcá tšabá cháftaca chamotsatsmënama.

<sup>16</sup> Canÿe soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora.

<sup>17</sup> Mo chë soldadcá, canÿe morocho buchtsanëse tojtabuchëtsëse chabe bestšaše jenëuyanama, tšëngaftágnaca cachcá, sempre šmochjësejuabnaye Bëngbe Bëtsá cmojatšebacama, y chë juabna cmochanjújabuache, mo canÿe morocho buchtsanëse cuaftsabuchëtsancá. Mo canÿe soldadcá, chë uayayábioye jayënjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámana Espíritu jt-samana, tšëngaftanga Bëngbe Bëtsabe palabra chašmotsebomnama.

<sup>18</sup> Nÿets tempo chë Uámana Espíritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiana nÿetscangbiana cha šmochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chaijontsé ora, cha chë buayenana soye chašúyanama; y atše chayobená ton-

dayama ntjatauatjca jóyebuambayana, y chca, entsanga chayinñanyé Jesucrist-  
biana tšabe noticienga, ndayá chënga tempo ndoñe monjántatšëmbo.

<sup>20</sup> Bëngbe Bëtsá šojichmó mo canya chabe cuenta oyebuambnayacá, chë  
buayenánama entsángbeñe jóyebuambayama, y chca bétsamama, mora atše uta-  
mená sëntsemna. Atšbiana Bëngbe Bëtsá šmochtseimpadana, atše chayobe-  
nama Cristbe buayenánama tondayama ntjatauatjca jóyebuambayana, ntšamo  
atše jamama šojtsemncá.

*Pablo chënga jtadiósoftanama*

<sup>21</sup> Tíquico, Jesucristbeyeca bëngbe bonshana catšata y canye entsá tšabe  
palabra bomná, Bëngbe Utabnabe trabajo jamama oservéniñe, ntšamo atše  
stsemnama y ndayá stsamama tšëngaftanga chašmotsetatšëmbuama, lempe  
cmochanjácuntaye.

<sup>22</sup> Chama cha tšëngaftangbioye sënjichmó, ntšamo muentše fstsemnama  
chacméyanama, y tšëngaftanga ainaniñe añemo chašmotsebonnama chao-  
mama.

<sup>23</sup> Atše sëntseimpadana Bëngbe Bëtsá chë Taitá y Bëngbe Utabná  
Jesucristo, chaboma chë Jesucristbeyeca catšátangbe ainaniñe tšabe  
ebionana chašmotsebonnama, y Bëngbe Bëtsábioye y ínñengbioye puerte  
chašmotsababuánñeshanama, Jesucristbeñe tšëngaftangbe ošbuachiyánaca;

<sup>24</sup> y chaboma, chë Bëngbe Utabná Jesucristbioye bëts bonshanánaca  
imobobonshanëngbeñe tšabe bendicionënga chaotsemnama, canye ndocná  
yondobena jatrócama bonshanánaca.

## Filipenses

### *Jacheuayama*

<sup>1</sup> Pablo y Timoteo, Jesucristbiana oservénata, quem tsbuanácha fséntsabiamná Filipos bēts pueblocá Bēngbe Bētsabe entšanga imomnēnga, y Jesucristoftaca cán̄yīñe mo can̄yáca imomnēngbiana. Fséntsabiamná n̄yetsca chē Jesucristbeñe ošbuáchiyēngbiana, n̄yetsca chentša uanatsanēngaftaca y chē in̄ye ošbuáchiyēnga ujabuáchaniñe trabajayēngaftaca.

<sup>2</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tšēngaftangbeñe tšabe bendicionēnga chaotsemnama, y chaboma tšēngaftanga ainaniñe tšabe ebionana chašmotsebonnama.

### *Pablo Bēngbe Bētsábioye tbojtanchuá ošbuáchiyēngbiana*

<sup>3</sup> Cada tšēngaftangbiana stenojuabó ora, Bēngbe Bētsá tšēngaftangbiana sēndbētsatschuanaye;

<sup>4</sup> y Bēngbe Bētsá tšēngaftangbe tšabiana stseimpadana ora, atše corente oyejuayá chca sēndbētsama,

<sup>5</sup> ntšamo tšēngaftanga atše šmojuájabuachama, tšabe noticiēnga Jesucristbiana entšanga abuyiynayiñe, tšēngaftanga Jesucristbeñe jtsošbuáchiyama šmonjanbojatšé orscana y mēntscoñama.

<sup>6</sup> Atše corente sēntsetatšēmo, Bēngbe Bētsá tojanbojatšé tšēngaftangbe ainaniñe tšabe soyēnga jtsamama, y más tšabe soyēnga yochtsamama. Y chca yochtsama, lempe ntšamo tšēngaftangbiana cha yojtsejuabnacá chaochnēnguēntscuana, y chca, Cristo Jesús yochjésabēntscuana.

<sup>7</sup> Atše tšēngaftangbiana sempre ainaniñe sēndbētsenojuabnaye, chíyeca atšbiana puerte tšabá entsemna chca tšēngaftangbiana jtsejuabnayana. Tšēngaftanga n̄yetscanga atše šmonjuájabuache jamama chē Bēngbe Bētsá tša tšabia bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntsētámena ora o natjēmbana shjoca stsana ora, n̄yetscángbioye tšabá in̄yin̄yayiñe chē tšabe noticiēnga ndegombre soyēnga bētsemnama, y bētsá amiñe entšanga chē soyēnguiñe corente chamotsošbuáchema.

<sup>8</sup> Bēngbe Bētsá yotátšēmo ntšamo sēntsichamcá ndegombre bētsemnama. Atše tša sēntseboše tšēngaftanga jányama y cbontsababuan̄yeshana cachcá ntšamo Cristo Jesús atše šondbobonshancá.

<sup>9</sup> Atše, Bēngbe Bētsá sēntseimpadana tšēngaftanga cada te más cha chašmotsebobonshánama y chē in̄yēngbioynaca, chca, osertánana chašmotsebonnama ndayá chē ndegombre soye bētsemnama jtsetatšēmbuama, y chašmotsetátšēmo ndayá tšabá o ndayá ndoñe tšabá tondmēnama;

<sup>10</sup> y chca, chašmotsobena sempre jabocacayama chē puerte tšabá yojtsemna jamama soye. Chca, Cristo yochjésabo ora, tšēngaftanga puerte tšabe vida šmochántsebonna, bacna soyēngaca ndēmandánēnga; y tondaye quešmochátama, chora chē entšanga chca ndoñe tšabá quenátsmēna ca chamuátichamuama.

<sup>11</sup> Y lempe ntšamo chašmojtsamcá ndegombre tšabá echántsemna, y n̄ye Jesucristo endobena jamama entšanga chca chamotsamama. N̄yetsca chē tšabe soyēnga echántsemna, Bēngbe Bētsá puerte bētsá y uamaná bētsemnama jin̄yan̄iyama.

*Atšbe vida endmēna Cristo jtse servénama*

12 Jesucristbeyeca atšbe catšátanga, atše sěntseboše tšěngaftanga chašmotsetátšěmbo, ntšamo atše tijapasama, más bětscá entšanga Jesucristbiamá tšabe noticiēnguiñe chamotsošbuáchema tojoservema.

13 Chca, nŷetsca chē romanēngbe mandadbe bētš yebna bojanŷá soldadēnga y chē inŷe entšanga quem luarentše montsetátšěmbo atše utamená stsemna, atše Cristbiamá tstrabája causa.

14 Atše utamená sěntsemnayeca, ošbuáchiyēnguentsana banga ainaniñe más añemo montsebmna, y chíyeca chēnga Bēngbe Bētšabe palabra más y más añémoca y tondayama ntjatauatjca entšāngbioye montsabuayiyná.

15 Ndegombre entsemna, báseftanga Cristbiamá entšāngbioye imojtsabuayiyná, pero chēngna nŷe ntšamo tijashjachcá šmojtsántšabošama chca, y chēnga imojtseboše, bětscá jtsamēse, atše chayotjáyanama; chíyeca chca imojtsama. Pero ínŷengna, entšāngbioye montsabuayiyná tšabe soyēnga ínŷengbiamá jamama ndegombre imojtsebóseyeca.

16 Mēnga chca montsama, atše šmondobonshánayeca y Bēngbe Bētšá chē trabajo šojaněntšabuáchema mondětatsšěmboye, Jesucristbiamá tšabe noti-ciēnga ndegombre bětsemnama entšanga jtsinŷanŷnayana;

17 pero chē ínŷengna chca imojtsama, ndoñe tšabe soyēnga ínŷengbiamá imojtsebóseyeca, ndoñe chēnga chē ínŷengbiamá tšabe soyēnga imojtsebóseyeca. Chēnga Jesucristbiamá imojtsoyebuambná nŷe entšanga chēnga chamotsarrespetánama, y nŷe cachēngbiamá tšabe soyēnga jtsebmnama imojtsebóseyeca. Chēnga jtsejuabnayana mochjobenaye jamama atše más chašotsengménama ca, muentše utamená chjěftsemnēntscuana, chēnga entšāngbioye chca tmojtsabuatambá ora.

18 Pero ¿ndayase chē soye atšbiamá? Masque ntšámnaca, tšabe soyēnga ínŷengbiamá tmojtseboše o ndoñe, Cristbiamá montsoyebuambná, y Cristbiamá chēnga montsoyebuambnama atše oyejuayá sěntsemna.

Y cabá más chanjóyejuaye,

19 er atše sěntsetatšěmbo quem utámenentsana atše chjésebcnama. Atše sěntsetatšěmbo muentšana chjésebcnama, tšěngaftanga Bēngbe Bētšá šmoimpadánayeca y Jesucristbe Uámana Espíritu šuajabuachánayeca.

20 Atše corente jtsošbuáchiyēse Bēngbe Bētšábeñe sěndobátmana, atše ndocna te tondaye chanjěftsema y chama chjaisēuatjama, pero aĩne nŷetscangbe delante becá añémoca chayoyebuambá, y nŷets tempo pero más mora, lempe ntšamo stsamama y stsihámuama, atše chaima entšanga chaminŷanŷema Cristo puerte bētšá y uamaná bětsemnama, y chca chántsama masque ainá o obaná chaitsemnēse.

21 Chca entsemna, er atšbe vida Cristo jtseservénama endmēna, y nderado atše chajjóbanēse, nŷetscanga puerte bētš soye mochanjěftsashjache.

22 Pero atše ainá stsemnēse, chanjobenaye más uámana trabajo Cristbiamá jěftsemama. Chíyeca, atše ndoñe corente quetsátstatsšěmbo ntšamo mora jobuáyanana, ainá jtsemnama o ndoñe.

23 Ndegombre mora puerte šontsētēmnana ntšamo jobuáyanana: atše tša sěndboše ndoñe más quem luarentše ntjěftsemnana, Crísoftaca jt-satsmēnama, y ndegombre chca atšbiamá puerte tšabá nántsemna;

24 pero, ínŷoicana tšěngaftangbiamá šontsemna ainá jěftsemnana.

25 Atše corente sěntsetatšěmbo chca ndegombre yochtsemnama, y chíyeca sěntsetatšěmbo atše cabá ainá chjěftsemnama, tšěngaftanga jujabuáchama más Jesucristbeñe chašmotsošbuáchema, y chiñe bětscá oyejuayana chašmotsebmnama.



<sup>26</sup> Chca, atše tšëngaftanga jutsëtsayama choye chajjá ora, chašmobená inye soyama más Cristo Jesús jëtschuayama.

<sup>27</sup> Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguifne endayancá. Y mëntšá, cachcá, jutsëtsayama chajjá o ndoñe, atše chántsetatsšëmbo tšëngaftanga Jesucristbeñe ošbuáchiyama ndoñe šmontsajbanama, y aiñe becá ošbuáchiyana chábeñe šmotsobomñama; nyetscanga cachcá šmojtsejuabnýeca y nyetscanga cach soye šmojtsebóseyeca, cányiñe nyetscanga enutanánënga jtsenojuerzánëse, ndocná chë tšabe noticiënguifne tšëngaftanga šmobomna ošbuáchiyana chacmondábuajuanama.

<sup>28</sup> Tšëngaftangbe uayayëngbiamá tondayama šmattsauatja, sempre bëtscá añemo šmochtsebomna. Chca tšëngaftanga šmochanjínyanýie chënga pochocánënga mochtsemnana, y tšëngaftangna atsebácanënga šmochtsemnana. Y chë soye Bëngbe Bëtsá tšëngaftangbiamá echántsama, Cristbeñe šmošbuachéyeca.

<sup>29</sup> Chca echanjopása, er Bëngbe Bëtsá tšëngaftangaftaca puerte tšabia endmëna, Cristbiamá oservénënga Bëngbe Bëtsá tcmojábiamá, pero ndoñe nýe chábeñe chašmotsošbuáchema, ndayá chabiamá chašmosufrímnaca.

<sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinýe ntšamo atše sënjánenojuerzana, entšanga jinýanýiyama chë tšabe noticiënga ndegombre soyënga bëtsemnana. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

## 2

### *Ndoñe uámanënga šmattsenobiamnaye, ntšamo Cristo ndoñe tonjanmcá*

<sup>1</sup> Tšëngaftanga, Crístoftaca cányiñe mo canýacá jtsemnëse, ainaniñe bëtscá añemo šmontsebomna. Cristo cmondábabuanýeshana, y chë soye tšëngaftanga cmontsëjabuachana nyetsca trabajënguentsana tšabá jabocanama. Y tšëngaftanga Cristbe Espíritoftaca cányiñe mo canýacá šmontsemna; tšëngaftanga nyetscanga šmondénbobonshana y nyetscangbiamá jóngmiamá šmonduamana.

<sup>2</sup> Tšëngaftanga lempe chca šmobómnyayeca, atše corente oyejuayá šmochjábema, er tšëngaftanga nyetscanga cachcá cányiñe šmondëjuabná, cachcá nyetscanga šmondénbobonshana, nyetscanga mo canýe ainancá šmondbomna, y nyetscanga cachca soye šmondboše.

<sup>3</sup> Tondaye šmattsama nýe ínýënga chë sóyeca chamotjáyanama, o nýe tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýënga bëngbiamá más uámanënga imomnana.

<sup>4</sup> Y ndocná tondaye chaondétsama, nýe chabiamá tšabe soyënga jónýenama, sinó ndayánaca chaotsama nyetscangbiámncá tšabe soyënga jónýenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nyets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná:

“Atše sëntseboše nyetsca entšanga nyets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, nyetsca chabe bomna soyënga jëftseboshjonëse,

y ndegombre, mo canýe oservenacá tojanóbema.

Cha canýe entšacá tojanonýná,

y entšanga canye ndegombre entšacá tmojáninye.

<sup>8</sup> Cachá tojanlesenciá nduamaná jtsemnana, y sempre Bëngbe Bëtsábioye ibnayeunana, y jobanámnaca, cruciñe jóbanëse.

<sup>9</sup> Ndayá cha tonjanmama, Bëngbe Bëtsá, chë celoca más uámana luare tbojaninÿinÿé

y chë más uámana uabaina, chë más bëtsétsangbe uabainënguentša uabaina tbojabuajo;

<sup>10</sup> y chca, celoca imomnënga, y quem luarentše y fshantse jashenoye imomnëngnaca nÿetscanga chamóshamentšema,

Jesúsbioye jëtschuayama, chabe uámana uabaina jayanëse;

<sup>11</sup> y chca, nÿetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nÿetscanga chamotsatschuanama.

*Cristbeñe ošbuáchiyënga entsamna mo buashinÿinÿana estrellëngcá jtsemnana*

<sup>12</sup> Chcasna, atšbe bonshana catšátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiamá bënoca stsemna ora. Bëtsétsanga ntjatenobiamnaycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama;

<sup>13</sup> er Bëngbe Bëtsá nÿets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

<sup>14</sup> Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjatichamcá y ínÿengaftaca jabuachana ntjate-natsëtsnycá.

<sup>15</sup> Chca cmontsamna, chca, tšëngaftanga šmojtšama soyënguiñe ndocná ndocna bacna soye chaondínÿenama, y puerte tšabe vida chašmotsebomnana. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canye luarentše puerte bacna entšángbeñe y siempre bëtscá bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canye ibetiñe luarentše buashinÿinÿana estrellëngcá.

<sup>16</sup> Chë tšabe soyëngaca entšángbioye chauinÿanÿé ntšamo muanjobenaye tšabe vida jtsebomnana. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjinÿanÿiye atše ndoñe nÿe bonamente jabuache tija-trabajá. Chca atše chántsemna mo nda bëtscá tojoprontá, y chentšana ínÿengaftaca tojótjajo ora, chëngbioye tojtsayënjanacá.

<sup>17</sup> Mo chë altaroca canye bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Cristbeñe tša šmošbuachéyeca, y tšëngaftangbe ošbuachiyánënaca endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjabanëse, puerte oyejuayá stsemna, y stjama tšëngaftángnaca cachcá chašmotsóyejuama.

<sup>18</sup> Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

*Timoteo y Epafrodito*

19 Atše beca ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiamá chašuabocuéntama, y chca, atše más añemo chaitsatsbomnama.

20 Er nÿe cha endmëna canÿa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama;

21 chë ínÿengna nÿetscanga nÿe cachëngbe tšabiamá ndayánaca jamama jtsejuabnayana, y tondaye ntsebošana Jesucristbiamá jamama.

22 Pero cach tšëngaftanga ya šmondétatšëmbo, ntšamo Timoteo chë pade-cena soyënguentšana tšabá tonjétsobocñama, y ntšamo Timoteo y atše, mo canÿe uaquiñá chabe taitábioye cuaftsajabuachancá, cánÿiñe fsënjantrabája, más bëtscá entsanga chë tšabe noticiënga chamóyëngacñama.

23 Chcasna, atše sëntsobátmana cha jíchmuana, ntšamo átšeftaca jopásama chaitsetatšëmbo y cachora;

24 pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

25 Atše sëntsejuabná yojtsemna, Jesucristbeyeca bëngbe catšata Epafrodítmá choye jíchmuana, nda átšeftaca cánÿiñe endëtrabája y chë tšabe noticiënga ndegombre soyënga bëtsemnama jinÿanÿiyama endenojuerzana, nda tšëngaftanga šmojanichmó atše chašuabëuájabuachama.

26 Cha chanjíchmuá; cha puerte entseboše tšëngaftanga jányama, y yapa ngmënacá entsemna, cha šocá enjamnama šmojátatšëmbonama.

27 Y ndegombre cha šocá enjamna, y enjétsinÿna mo jtsobanamcá; pero Bëngbe Bëtsá tbonjalastemá, y ndoñe nÿe chábioye sinó átšbioynaca, atše ndoñe más ngmenanënga chayátsbomnama, ntšamo mora sëntsebmomnama.

28 Chiyeca atše más sëntseboše cha pronto jíchmuana, as tšëngaftanga cha chašmojtinÿe ora, puerte oyejuayënga chašmotsemnama, y atše ndoñe yapa chašondëtsengmenama.

29 Smochjofja nÿets oyejuayánaca, Bëngbe Utabnábeyeca catšátanga quet-somñecá; y nÿets tempo chacá amëngbioye mo bëtsëtsangcá šmochtsëtabna,

30 er batšatema más y matënjétsobana, Cristbiamá trabajayiñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

### 3

#### *Ndayá Pablëbiamá ndegombre corente yojanámana*

1 Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inÿe tsbuanáchañe tcbonjanëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuiñe chašmondëtsemnama.

2 Cuedado šmochtsebmoma chë ndoñe tšabe entsangbiamá, mo quešëngcá imomnënga, chë puerte bacna soyënga mondbëtsamënga, y entsangbe más delicadentse base bobachtema jatëtšana uamanënga;

3 er bënga mondmëna y ndoñe ínÿenga, chë ndegombre uinÿnanánana bomnënga, bënga Bëngbe Bëtsabe entsanguentšënga bëtsemnama, bënga chë Uámana Espíritbe uajabuáchenanaca Bëngbe Bëtsá mondadóránama, bënga chë Cristo Jesúsëftaca cánÿiñe mo canÿacá bëtsemnama mondbëtsoyejuama, y bënga chë ntšamo ínÿenga monduamancá bëngbe cuerpiñe jamama tondayama yondoservénama mondbëtsejuabnayama.

4 Masque atše razón sëndëtsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón

yajtsebomna chë soyënga yoservena ca jtsejuabnayama, ndegombre atše chabiamá más razón chama stsóbomñe.

<sup>5</sup> Sënjanonýná y posufta tianoye base bobachtema chë más delicadentše šmojantëtše; atšbe nyëts uta bëtšétsata Israeloca entšanguentšata bonjamna, y atšna Benjaminbe bëtš pamillentšá sëndmëna; atšbe tempsca bëtš taitanga nyëtscanga hebreunga imnamna. Atšna fariseo sënjamna. Atše sënjánama, lempe ntšamo judiëngbe leyënguiñe endayancá, ndayá jamama šojanmëncá.

<sup>6</sup> Atše tša sënjánboše Bëngbe Bëtšá jtse servénama, chíyeca Jesúsbeñe ošbuáchiyënga bëtscá sënjanëcamena; y ndayá canye entšá ibnëtsemna jtsamama, Bëngbe Bëtšabe bominyiñe tšabia jtsemnana, judiëngbe ley jtsocumplínese, chama ndocná tondaye quenjátšbomna jayanama, atše ndoñe tšabá sëntsanama ca.

<sup>7</sup> Pero lempe chca ntšamo atše sënjamnama y ndayá sënjánamama, puerte sënjanjuabná atšbiamá puerte yojanámana ca; pero mora, Cristo atšbe ainaniñe tonjámarshëngoyeca, chë soyënga atšbiamá ya ndoñe quenatámana.

<sup>8</sup> Y cabá más, tondaye atšbiamá quenatámana, chë bëtš soye jtsonýayëse, Cristo Jesús, Bëngbe Utabná jtsabuatmana. Chábeyeca, lempe chë nye quem luarentša soyënga sënjëseboshjona, y lempe chë soyënga atšbiamá tondayama quenátoservena; y chca entsemna, chë bëtš soye jëftsashjáchama, Cristo jtsabuátmama,

<sup>9</sup> y cháftaca cánýiñe mo canýacá jtsemnana. Atše ya ndoñe quetsat-snguá Bëngbe Bëtšabe bominyiñe tšabia jtsemnana, nye ntšamo atše tijamama chë judiëngbe ley jtsocumplínese, pero Crístbeñe jtsošbuáchiyëse aíñe; Bëngbe Bëtšá entsama atše chabe bominyiñe tšabia chaitsemnana, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca.

<sup>10</sup> Atše sëntseboše ndayá cha jtsabuatmana, chë obanënguentsana tojtanayenama cha tojaninýanjé obenana atše chaitsebomnama, atše cháftaca cánýiñe mo canýacá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnana;

<sup>11</sup> y ntšámnaca, atše jëftsashjáchama Bëngbe Bëtšá chaoma atše chaitayenama.

*Yejuana jtsentšénese, Bëngbe Bëtšábiocana uacanámana josháchiñama*

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtšabe bominyiñe stsemna ca, pero sempre natsanoye sëntšá, mo nda canye luaroye jashjanguama cuaftsëchamancá; y puerte jtsošbuáchiyëse sëntsobátmana atše chjobenaye jtsemnana, chë ndayama Cristo šojanchembo, er Cristo Jesús ya tonjama atše chabiamá chaitsemnana.

<sup>13</sup> Atšbe catšátanga, atše ndoñe quetsátichamo chca ya tijashjache ca. Pero chama canye soye sëntsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá sëntsama jobenayama chë jashjanguama yojtsemnoye jashjanguama,

<sup>14</sup> chë ndëmoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juacánama bëtscá jenojuérsase cuaftsëchamancá. Cachcá, átšnaca sëntšá chë Bëngbe Bëtšá šojtsachembuana uacanámana josháchiñama, Cristo Jesúsbeyeca; y chë uacanámana entsemna chë nyëtsca tescama yomna tšabe vida jtsebomnana.

<sup>15</sup> Chca bënga šontsamna jtsejuabnayana, chë Jesucrístbeñe puerte ošbuáchiyana y nyëts tempo cha ústonënga; y nderado tšëngaftanga



ndayíñnaca inyetšá šmojatsjuabná ora, Bëngbe Bëtsá chë sóynaca tšabá cmochanjínñanñiye.

<sup>16</sup> Pero morna šontsamna jtsiyenana ntšamo méntscoñama Bëngbe Bëtsabe soyëngama šojosertacá.

<sup>17</sup> Jesucristbeyeca catšátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninñanñecá imojt-siyenëngbioye šmochtsëñyaye.

<sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbétsemna. Banga mondmëna, y chënga ntšamo vida imojtsebomnama montsinñinñná, lempe ntšamo Cristo chë cruciñe jóbanëse bëngbiana iuayancá contra chënga imojtsemnama,

<sup>19</sup> y chëngbioye nyetsca tescama infernoca mochántsapochocaye. Chëngbiana chë más uámana soye yojtsemna jtsamana ntšamo cachënga tmojtsebošcá, nye cachëngbe cuerpiñe tšabá jtsomñama. Chënga nya mo bëtš soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jësejuabnayana chë nye quem luarama enójuabnayëngbe soyëngama.

<sup>20</sup> Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo.

<sup>21</sup> Cha bëngbe cuerpënga, chë pronto jopochócama cuerpënga echanjátrocaye, jtsemnana mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeca.

## 4

### *Bëngbe Utabnáftaca cánñiñe mo canñacá jtsemnëse oyejuayana jtsebomnana*

<sup>1</sup> Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánñiñe mo canñacá šmochtsemna. Corente cbondábabuanñeshana y tša sëntseboše tšëngaftanga jáñyama. Tšëngaftangbeyeca atše puerte oyejuayá sëntsemna, y atše corente sëndbétsoyejuaye tšëngaftangbiana inñyëngbioye jáuyanama.

<sup>2</sup> Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá.

<sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chë shembásata chacújabuachama, er chata bëtšcá átšeftaca tbon-jatrabajá tšabe noticiënga entšanga abuayiynayiñe. Clemente y inñe entšanga átšeftaca tmonjatrabajá cach soye amiñe. Nyetsca chëngbe uabaina entsábemana chë librëšañe, ndayentše yojtsábemana chë tšabe vida mochjónñenëngbe entšangbe uabaina.

<sup>4</sup> Sempre oyejuayënga šmochtsemna, Bëngbe Utabnáftaca cánñiñe mo canñacá jtsemnëse, y cachiñe šcutëtayana: ¡Móyejuanga!

<sup>5</sup> Nyetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jësabama tempo ya entsobeco.

<sup>6</sup> Todayama šmattsenócochinñena, pero cada Bëngbe Bëtsáftaca chašmojtsencuënta ora, ndayá cmojtsëjabortama cha šmochjaimpáda. Y chca chašmojtsama ora, chánaca šochtsatschuanaye.

<sup>7</sup> Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotsebomnama; chë tšabe ebionana puerte bëtšcá endmëna, y bënga entšanga quetsomñecá ndoñe ntšobenana chama

jósertana; y chca tšabe ebionánaca, tšëngaftangbe juabnënguine y ainaniñe tondayama quešmochátenocochinýena, er tšëngaftanga cánýiñe mo canýacá Cristo Jesúseftaca šmondmëna.

*Lempe ntšamo tšabá yomncá soyëngama jtsejuabnayana*

<sup>8</sup> Cabana, atšbe catsátanga, lempe ntšamo ndegombre yomncá soyënguine šmochtsejuabnaye, lempe chë respeto yomerecëniñe, nýetsca soyënguine entšangbe bominiñe tšabá yomniñe, nýets tempo corente tšabá yomniñe, nýetsca soyënga entšanga yogusetániñe, y lempe chë ndayama entšanga tmojtsejuabná tša iuámana ca soyënguine. Lempe chë tšabá yomna soyënguine y jtsatschuanayama yomna soyënguine šmochtsejuabnaye.

<sup>9</sup> Sempre šmochtsama chë átšbentsana šmojuábouinýe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinýcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

*Pablo tojtanacheuá tmojanájabuachama*

<sup>10</sup> Atše corente sëndoyejuá Bëngbe Utabnáftaca cánýiñe mo canýacá tsmënama, er tšëngaftanga ba ishinýe chentšana, cachiñe šmojatobená atše jatinyñiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnëtjomba ca, ndayá ntšamo tšëngaftanga tšabá šmojuabnacá atše jinýinýiyama ndoñe yonjanopodena ca.

<sup>11</sup> Atše chca, ndoñe quetsátichamo uajabotá stsemna ca, er atše sënjuatsjinýe sempre oyejuayá jëftsemnana, nýe ndaye soyiñe masque batšatémnaca stsebomněse.

<sup>12</sup> Atše sëndëtatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomněse. Atše tijuatsjinýe oyejuayá jtsemnana masque nýe ndaye soyënguínacá stsemna ora, jasama bëtscá stsebomna ora o masque nýe shëntseca jtsemnama šojtsemna ora, atše jtsiyenama bëtscá soyënga stsebomněse o masque ndóñnaca.

<sup>13</sup> Atše lempe chca sëndobena, atše obenana jtsebomnama Cristo endbétsamayeca.

<sup>14</sup> Masque chcasna, tšëngaftanga tšabá šmonjama, atše padecena soyënguine sënjamna ora atše juajabuáchana.

<sup>15</sup> Tšëngaftanga, chë Filipos puebloca Jesucristbeñe ošbuáchiyënga, corente šmondëtatšëmbo, Macedonia luarentšana sënjëftsanbocna ora, nýe tšëngaftanga atše šmonjanájabuachama; inýe ošbuáchiyënga ndoñe. Chora enjamna atšbe bojatšena tempo tšëngaftangbe luarentše chë tšabe noticiënga entšanga abuayinayaiñe; y nýe tšëngaftanga atše šmonjanájabuache.

<sup>16</sup> Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja.

<sup>17</sup> Chca ndoñe quenátayana atše tsjuabná nýe tšëngaftangbentsana ndayánaca jóyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama.

<sup>18</sup> Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puerte tšabá entsemna, mo juatšëmbonama ndayá tcojóba y altaroca tcojajuinýe y botamana tojtsonguëtšecá, chora cha oyejuayá chca jóyëngacñana.

<sup>19</sup> Atšbe Bětsá, chabe bětscá uámana y běts bomnánaca, echanjama tšěngaftanga lempe ntšamo cmějabotcá Cristo Jesusbiajana chašmóyěngacñama.

<sup>20</sup> Entšanga nýets tempo chamotsinýanýná Běngbe Bětsá y Běngbe Taitá puerte uamaná bétsemnama. Chca chaotsemna.

*Chěnga jtadiósoftanama*

<sup>21</sup> Atšbe cuenta, nýetscanga chě Jesucristbeyeca Běngbe Bětsábenga imomněnga šmochjácheuaye. Atšeftaca montsemna Jesucristbeyeca catšátangnaca cmontsacheuaná.

<sup>22</sup> Nýetscanga chě muentse Běngbe Bětsábenga imomněnga, y más chě romaněngbe mandadbe běts yebnoca oyeněnga, cmontsacheuaná.

<sup>23</sup> Atše sěntseimpadana Běngbe Utabná Jesucristo, chaoma tšěngaftangbeñe tšabe bendicioněnga chaotsemnama.

## Colosenses

### *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, y Jesucristbeyeca bëngbe catšata Timotéoftaca,

<sup>2</sup> quem tsbuanácha sentsabiamná chë Colosas puebloca Bëngbe Bëtsábenga imomnëngbiama. Tšëngaftanga bëngcá Jesucristbeñe ošbuáchiyënga šmondmëna, y chca, Jesucristbeyeca bëngbe catšátanga. Atše sëntseimpadana Bëngbe Bëtsá Bëngbe Taitá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebomnama.

### *Pablo, Bëngbe Bëtsábioye tbojanimpadá Colosas puebloca ošbuáchiyëngbiama*

<sup>3</sup> Bëngbe Bëtsá, Bëngbe Utabná Jesucristbe Taitá tšëngaftangbiama fstseimpadana ora, cha sempre fchandbëtsatschuanaye,

<sup>4</sup> er bënga fsënjátatsëmbona ntšamo tšëngaftanga Cristo Jesúsbeñe tša šmojtsošbuáchema, y ntšamo tšëngaftanga nyetscanga chë Bëngbe Bëtsábenga imomnënga šmababuánjeshanama.

<sup>5</sup> Natsanama, chë ndegombre buayenánama, chë tšabe noticiënga, tšëngaftanga tcmojanabuatambá ora, tšëngaftanga botamana šmojanuena ntšamo chë buayenániñe bejtsayancá, chë tšëngaftanga šmojtsoyobena tšabe soyama jobátmana, Bëngbe Bëtsábeñe jtsošbuáchiyëse. Chë šmotsobatmana soye entsama tšëngaftanga Jesucristbeñe puerte chašmotsošbuáchema y nyetscanga chašmotsababuánjeshanama. Bëngbe Bëtsá celoca enduaquëcñá chë tšëngaftanga šmojtsoyobatmana tšabe soye.

<sup>6</sup> Chë tšëngaftanga tcmojanabuayená tšabe noticiënga más bëtscá entšanga montsuenana; y chca, nyets quem luarentše entšanga montsiyena más tšabe soyënga jtsamëse. Chca entsemna ntšamo tšëngaftangbentše tojopasacá, chë natsana te chë tšëngaftanga Bëngbe Bëtsabe tšabiánama šmojanuena orscana, y ntšamo Bëngbe Bëtsá puerte bonshanánaca y tšabiánaca bëngbioye šuanjënama ndegombre cmojanosérta orscana.

<sup>7</sup> Y chca Epafra tšëngaftanga tcmojanabuatambá, Bëngbe Bëtsabe bonshánama y tšabiánama. Epafra endmëna canya bëngaftaca Cristbiamana oservená, y cha bënga fsëndbobonshana; cha Cristbiamana endëtrabája bëngbe cuenta tšëngaftangbentše.

<sup>8</sup> Cha šonjáuyana ntšamo chë Uámana Espiritu yojtsama, nyetscanga Jesucristbeñe ošbuachiyëngbioye chašmotsababuánjeshanama.

<sup>9</sup> Lempe ntšamo tšëngaftangftaca tojopasama, chë natsana te tšëngaftangbiama fsënjauena orscana y mëntscoñama, Bëngbe Bëtsá sempre tšëngaftangbiama fchandbëtseimpadana, cháftaca fstsencuénta ora. Bëngbe Bëtsá fsëndëimpadana, chabe Espiritu chaoma tšëngaftanga chašmotsobena jtsetatsëmbuana y jtsosertánana, chca, ntšamo Bëngbe Bëtsá yobošca chašmotsamama, tšëngaftanga tšabá chašmotsetatsëmbuama.

<sup>10</sup> Y chca, tšëngaftanga šmochantsobena jtsiyenana jtsamëse ntšamo Bëngbe Utabná yobošcá, y sempre šmochantsama ntšamo chabiamana tšabá yomncá. Ntšamo tšëngaftanga chašmojtšiyencá tšabe soyënga jtsamëse, chentšana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma.

<sup>11</sup> Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëts añemo chašmotsebomnama; y



chca, tsëngaftanga chë padecena soyënguiñe chašmojtsemna ora, puerte uantadënga chašmotsemnana, y ainaniñe añémoca Bëngbe Bëtsábeñe beca chašmotsobátmanama.

<sup>12</sup> Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entšanga jatšatayama tojašebuachenacá jtsebomnana. Tsëngaftanga šmochanjóyëngacñe ntšamo cmojtsëtocancá celoca, chë corente buashinÿinÿana luarentše.

<sup>13</sup> Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšentsana, y tojama chë chabe bonshana Uaquiñabe amëndayana bëngbe ainaniñe chamotsebomnana;

<sup>14</sup> chábeyeca Bëngbe Bëtsá Satanásbe cucuatšentsana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

*Cristo tojanóbanayeca, entšanga Bëngbe Bëtsáftaca tšabá jtsatsmënana*

<sup>15</sup> Cristo tmonjáninÿe ora, bënga tmojántatsëmbona ntšamo Bëngbe Bëtsá yomnana; entšanga imojobena cha jinÿama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna.

<sup>16</sup> Chábeyeca Bëngbe Bëtsá tojama lempe ntšamo celoca y quem luarentše yobinÿncá, lempe ntšamo chë entšanga imobena o ndoñe mondobena jinÿama soyënga, y chë espíritëngnaca chë imobena ínÿengbioye jtsamëndayana y obenana imobomna. Bëngbe Bëtsá, chábeyeca y chabiamana tojama, lempe ntšamo quem luarentše yobinÿncá.

<sup>17</sup> Bëngbe Bëtsá cabá nÿetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnana yojamncá.

<sup>18</sup> Cha endmëna nda nÿetscanga Bëngbe Utabnábeñe ošbuáchiyënga iuamënda, ntšamo chë bestšaše nÿetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebomnana, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënënguentšana, cha chë natsaná chaotsemnana; nÿe cha canÿa chë más uámana luare chaotsebomnana, nÿetscañe chaotsemándayama.

<sup>19</sup> Er Bëngbe Bëtsá yojanjuabná cachabiamana tšabá yojamna, lempe ntšamo cha yomncá, chabe Uaquiñábeñnaca chaotsemnana,

<sup>20</sup> y Bëngbe Bëtsá tojánbošena, Crístbeyeca nÿetsca soyënga quem luarentše y celoca, cháftaca tempcá tšabá chaotsatsmënana. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nÿetsca soyënga quem luarentše y celoca, cháftaca tempcá tšabá chaotsatsmënana.

<sup>21</sup> Tempo, tsëngaftanga Bëngbe Bëtsá stëtsoye šmojanquedá y chábioye uayayënga šmojamna, bacna soyënga šmojanjuabná y šmojánama causa;

<sup>22</sup> pero mora chabe Uaquiñáftaca, cha mo canÿe entšacá jóbane, Bëngbe Bëtsá tojama tsëngaftanga tempcá tšabá cháftaca chašmotsatsmënana; y chca tojama, tsëngaftanga chabe delante nÿets tempo chašmotsemnana; chora tsëngaftanga, chabe entšanga, ainaniñe ndocna bacna soye ndbomnënga chašmotsemnana, y ndocná chaodayana ntšamo šmojamncá ndoñe tšabá yontsemna ca.

<sup>23</sup> Pero tsëngaftanga cmontsamna chë bëtsacá ošbuáchiyana šmondobomnana nÿets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nÿets tempo chë tšabe noticiënguiñe šmochtsošbuáchiye, y ndoñe šmatjaleséncia ndocná tsëngaftangbe ošbuáchiyana chaotrocama; y

nÿe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmca, Jesucristbiana buayenánama šmojanuena ora. Chë buayenánana endmëna ntšamo ba entšanga nÿetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entšanga jtsabuayiyayana.

*Pablo, ošbuáchiyënga jaséviama trabajo tmojanbonÿé*

<sup>24</sup> Atše corente sënjesoyejuá mora tšëngaftangbiana jasúfriama stsobenama. Ba entšanga entsamna jasúfriana Cristo jaséviama, y atše sëntsesufrina ntšamo Cristo tojansufricá, mora atše jtseufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiana, chë chabe cuerpcá imomnënga, chënga Crístbenga bëtsemnama.

<sup>25</sup> Bëngbe Bëtsá atše šojábema chë Jesucristbeñe ošbuáchiyëngbe canÿe ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnama. Chë trabajo endmëna, lempe ntšamo cha tojayancá entšanga jábuayenana.

<sup>26</sup> Bëngbe Bëtsá nÿetsca entšanga ndoñe tonjanalesenciá, quem luare jobojátsama orscana y nÿets tempo chë buayenánama chamotsetatšëmbuama; pero mora, chábenga imomnënga chë soye cha tojinÿanÿé.

<sup>27</sup> Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninÿanÿecá; y yoboše chë ndoñe judiënga jinÿanÿiyama tša bëtš y tšabe soye yomna chë ndegombre buayenánana, ndayá tempo ínÿenga ndoñe tonjaninÿanÿecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojtsobena jtsobátmanana, Bëngbe Bëtsá puerte bëtšëtsanga y uámanënga chácmabiamama, batšá ntšamo cachá yomncá.

<sup>28</sup> Bënga nÿetscángbioye Jesucristbiana fchandbëtsabuayiyayey; fchandbëtšëtsësnaye ndayá chënga ndoñe yontsamna jtsamana, y fsëndbëtsabuatambaye nÿets osertánanaca ndayá chënga aíñe yojtsamna jtsamana, y chca, nÿetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cánÿiñe mo canÿacá jtsemnëse.

<sup>29</sup> Chca chaotsemnama, atše bëtscá sëndëtrabája; y chca sëntsama, chë Cristo yojtsama atše chaitsebomnama bëtš obenánaca.

## 2

<sup>1</sup> Atše sëntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nÿetscanga chë ndocna te atše šmonjinÿe ošbuachiyëngnaca.

<sup>2</sup> Atše chca sëndama, tšëngaftanga y chënga ainaniñe bëtš añemo chašmotsebomnama, y cánÿiñe mo canÿacá chašmotsemanama, nÿetscanga jtsenbobonshánëse. Chca, nÿets osertánana tšëngaftanga chašmotsebomnama, y chë tempo Bëngbe Bëtsá entšanga ndoñe tonjaninÿanÿé buayenánama chašmotsetatšëmbuama, y chë buayenánana Crístbe soye entsemna.

<sup>3</sup> Mo canÿe bëtscá bomnana iytemena soycá pero mora ya uínÿenana, cachcá Crístbeñe entsemna nÿets osertánana y obenana Bëngbe Bëtsá jtsabu-atmama. Chë soye tempo Bëngbe Bëtsá entšanga ndoñe tonjaninÿanÿé, pero mora Cristo yojtsama bënga chë uámana soyënga chamotsebomnama.

<sup>4</sup> Atše chca sëntsichamo, botamana palabrëngaca ndocná chacmondáingñema.

<sup>5</sup> Er masque choca tšëngaftangaftaca atše ndoñe quetsátsmëna, atšbe ainana aíñe choca tšëngaftangaftaca entsemna; y atše puerte sëntsoyejuá tšëngaftanga šmatenëyeunanama y nyets tempo Bëngbe Bëtsábeñe šmojtsošbuáchema.

*Crísoftaca cánýiñe mo canýacá jtsemnëse, entšanga ndegombre tšabe vida jtsebomnana*

<sup>6</sup> Tšëngaftanga Jesucristbeñe ošbuáchiyënga šmojanóbiama ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá.

<sup>7</sup> Chca šmontsobena jamana, cháftaca cánýiñe mo canýacá nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiyë chë Cristbiama buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondëtsamama tšëngaftanga jtsajbanama Cristbeñe ošbuáchiyana jtsebomnana. Chca entšanga montseboše juabnëngaca tšëngaftanga jáingñama, nýe básefta entšangbe juabnënga y tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuátambayentsana y chë espíritëngbentsana, ndëmuanýengbiama entšanga jtsejuabnayana chënga nyetsca soyënguiñe imománda ca; pero Cristbentsana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canýe entšacá quem luarentše yojëtsiyena;

<sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Crísoftaca cánýiñe mo canýacá bëtsemnayeca; y Cristo, nyetsca chë mándayënga y obenana bomnëngbiama más uamaná endmëna.

<sup>11</sup> Tšëngaftanga Crísoftaca cánýiñe mo canýacá bëtsemnayeca, mo uinýnananëngcá šmontsemna, tšëngaftanga Bëngbe Bëtsabe entšanga šmomnana. Quem uinýnanánana ndoñe quenátsmëna mo chë más delicadentše base bobachtema tmojatëtscá, cach entšangbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tšëngaftangbe ainanentsana Cristo bacna juabnënga jabuajuánayana.

<sup>12</sup> Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuaftjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bëtsemnana tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inýe tempo tšëngaftanga Bëngbe Bëtsabiama mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnyayeca, pero aíñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnana, Crísoftaca cánýiñe mo canýacá jtsemnëse, y Bëngbe Bëtsá bëngbe nyetsca bacna soyënga šojtsaperdoná.

<sup>14</sup> Mo nda ba ndebënénga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebënanana pronto jtobocana ca, pero chë entšá chëchangá tojtsandbiama chë entšanga cha

ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta.

<sup>15</sup> Jesucristo cruciñe tojanóbanayeca, Bëngbe Bëtsá tojanayënjaná Satanás y chabe bacna espíritënga obenana bomnënga y ínÿengbioye amëndayënga; y nÿetsca entsangbe delante tojaninÿanyé cha chënga jtsamëndayama yobenama, mo canÿe reycá chë ínÿenga tojayënjaná ora, chabe entsángaftaca natsana jtsayana y chë ayënjanánëngna ústonoye.

*Ainaniñe becá jtsebošana chë ošbuáchiyëngbiama celoca yomna soyënga*

<sup>16</sup> Ndoñe caso šmattsabiamnaye, ndoñe tšabá šmontsama ca ínÿenga tšëngaftangbiama tmojtsichamo ora, ndayá tšëngaftanga šmétsesaye o šmétsosfšësnayama, o ndayá aíñe o ndoñe šmondbëtsamama Bëngbe Bëtsá jadórama fiestënga ora o shbojueta fiesta ora, o jóchnama tese.

<sup>17</sup> Bayté entsemna, Bëngbe Bëtsá entsangbe cucuatšiče chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿanyñaye ndayá más chcoye jopásama; entsángbioye yojaninÿanyñaye ndayá Cristo yochjanmama.

<sup>18</sup> Báseftanga mondmëna y chënga mo nduamanëngcá entsángbeñe jtsebínÿnana, pero tsoye cachënga corente uámanënga jtsenobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquëcá tmojinÿe ca, y nÿe cachënga puerte jtsenábotamnayana, pero chca chamotsamama razón ndoñe quemátsbomna, er nÿe ntšamo inÿe entsanga imnetsejuabnaycá chëngnaca cachcá jtsejuabnayana.

<sup>19</sup> Chënga Jesucristoftaca cánÿiñe ndoñe tmonjoquedanga, y Cristo endmëna chë nÿetsca ošbuáchiyëngbe amëndayá, mo chë bestšaše nÿets cuerpo jtsemandayancá. Canÿe cuerpiñe chë bestšaše jtsamana nÿets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nÿetsca chë cuerpentša soyënga chamenefjanama jtsamëse. Cachcá, Cristo jtsamana nÿetsca ošbuáchiyënga cánÿiñe mo canÿacá cháftaca chamotsemnana, y cada te más tšabá cha chašmotsábuatmama.

<sup>20</sup> Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentšana. As, ¿tšëngaftanga ndáyeca šmojtsiyena jtsamëse mo chë nÿe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo:

<sup>21</sup> “Chë soye ndoñe matsbanana, chca soye ndoñe catjase, o chë soye acbe cucuatšëca ndoñe catjaca ca”?

<sup>22</sup> Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nÿe ntšamo entsanga mondbetsamcá y ínÿengbioye mondbetsabuatambaycá.

<sup>23</sup> Ndegombre, ba entsanga jtsejuabnayana chë mandënga tmojamëngbiama, puerte osertanáncaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórama yomncá imojtsabuatambá ca, jtsabuátambayana entsá cabnmëna uamaná ndoñe ntsenobiamnayana ca, y jabuache cachabe cuérpoca jtsamana



ca. Pero chë mandënga tondaye ntsámanana, er chë mandënga entsangbe ainanentsana ndoñe ntjajuánana chë bacna soyënga jtsamama juabnënga.

### 3

<sup>1</sup> Cristo cháuatayenama Bëngbe Bëtsá tojanma ora, enjamna mo tsëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tsëngaftangbe ainaniñe puerte šmochtseboše ndayá Bëngbe Bëtsá celoca tsëngaftangbiamama yobomncá; y choca, Cristo uámana puestentše endëtbemana, Bëngbe Bëtsabe catsbioica. Y šmochtsinÿinÿnaye chca šmojtsebošama, ntšamo jtsamëse mora šmojtsiyenama.

<sup>2</sup> Tsëngaftanga nÿets tempo chë celoca soyëngama šmochtsejuabnaye, ndoñe chë nÿe quem luarentše yomna soyëngama.

<sup>3</sup> Tsëngaftanga Crístoftaca cánÿiñe mo canÿacá jtsemnëse, jtsemnana mo tsëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tsëngaftangbe vida yojtsinÿena.

<sup>4</sup> Ndegombre, Cristo endmëna nda endama tsëngaftanga tsabe vida chašmotsebošnama; y quem luarentše cha cachiñe chaojtonÿná ora, tsëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyecá, tsëngaftangbiámncaca echanjínÿanÿiye más bëtsëtsanga y uámanënga šmojtsemnana.

#### *Tempscá vida y morsca vida*

<sup>5</sup> Tsëngaftanga, ntšamo chë nÿe quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtseyena nÿe ínÿengbiamama bacna juabnënga jtsebošnama, y ndoñe chaondëtseboše nÿe bëtscá soyënga ínÿengbiamama más jtsebošnama, er chca jtsamana jtsayanana, chabiamama más yojtsámama soyënga jtsebošnama, Bëngbe Bëtsá jatsbobonshánama.

<sup>6</sup> Er entsanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entsángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana.

<sup>7</sup> Y tempo, tsëngaftanga šmojanियena jtsamëse, sempre nÿe chca bacna juabnëngaca,

<sup>8</sup> pero mora tsëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tsabe palabrënga jtsóyebuambnayana.

<sup>9</sup> Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá.

<sup>10</sup> Y mora tsëngaftanga šmojashjache jtsemnana mo tsmëma entsangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entsangcá tcmojábiamama; y cha nÿets tempo yojtsama, tsëngaftanga cada te más ntšamo cha yomncá chašmotsemnana, chca, corente tsabá cha chašmuábuatmanama.

<sup>11</sup> Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema tëtšenënga ndoñe más uámanënga quemátsmëna chë ndoñe chca mondmëñëngbiamama; chë inÿe luarëngocana áshjajnënga, bën tjoye oyenënga, chë nÿe ínÿabiamama nÿets



tempo oservénënga y chë cachëngbiamana trabájayënga, nyëtscanga cachcanga mondmëna. Chë nyë ndayá iuámana endmëna Crístbeñe jtsošbuáchiyana y nyëtsca ošbuáchiyëngbe ainaniñe cha yojtsemna jtsemándayama.

<sup>12</sup> Tšëngaftanga Bëngbe Bëtsábënga šmondmëna. Cha cmondábabuanyëshana y tcmojabacacá chabe entšanga chašmotsemnama; chíyeca, tšëngaftanga cmontsamna ínÿënga jtsinÿanÿnayana nyëtscangbiamana jóngmiamana šmuamanama, tšabe juabna ínÿëngbiamana sempre šmnëtsebonnama, cada ona chë ínÿënga chabiamana más uámanënga cuaftsemncá innëtsejuabnayama, nyëtscanga puerte bonshanánaca šmnëtsënÿayama, y nyëtsca padecena soyënguiñe corente uantadënga šmonnama.

<sup>13</sup> Nyëtscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿënga šmochjáperdonaye.

<sup>14</sup> Lempe chë soyëngama más enduámana nyëtscanga jtsenbobonshánana. Nyëtscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá.

<sup>15</sup> Cristo endama tšëngaftangbe ainaniñe tšabe ebionana chašmotsebonnama. Chë tšëngaftangbe ainaniñe tšabe ebionánaca šmochtsiyena nyëtscanga natjëmbana, Jesucrístbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nyëtscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

<sup>16</sup> Chë Crístbe puerte tšabe buayenana soyënga tšëngaftangbe ainaniñe nyëts tempo šmochtsambaye. Nyëts osertanánaca šmochtsenbuátëmbaye y šmochtsenbuayiynaye. Nyëts ainánaca šmochjacánta chë Salmos librëšañe uabemana cantënga, chë Jesucrístbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama.

<sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, siempre Bëngbe Bëtsá Bëngbe Taitábioye, chábeyeca jtsatschuanayëse.

### *Ntšamo ínÿëngaftaca jtsiyenama*

<sup>18</sup> Shémanga, šmochtsatšëmbo tšëngaftangbe boyanga chë yebnentša mándayënga imonnama, y nyëts tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna.

<sup>19</sup> Boyanga, tšëngaftangbe shémanga siempre šmochtsababuánÿëshana, y podësca palabrëngaca ndoñe šmattsëtsëtsnaye.

<sup>20</sup> Básënga, tšëngaftangbe bëtsëtsanga nyëtscañe šmochtsayaunana; chca šmojtsamëse, Bëngbe Bëtsá oyejuayá echántsemna.

<sup>21</sup> Taitanga, ndoñe šmattsama tšëngaftangbe básënga chauetënama, ainaniñe tondaye añémoca chënga ndoñe chamondëtsatsmënana.

<sup>22</sup> Tšëngaftanga chë nyëts tempo nyë ínÿabiamana oservénënga, tšëngaftangbe nduiñënga nyëtscañe šmochtsayaunana, y ndoñe nyë chënga tcmojtsënÿa ora, mo nda nyë entšangbe delante tšabá joquédama tojtsebošacá, ndayá chënga šmochtsayaunana nyëts ainaniñe ndegombre tšabe juabnëngaca, er tšëngaftanga Bëngbe Utabnabiamana corente respeto šmondobonna.

23 Lempe ntšamo chašmojtsamcá, nýets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nýe entsangbioycá.

24 Tšëngaftanga ya šmondétatšëmbo, ntšamo cha chabe entsanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëserveda.

25 Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entsá bacna soyënga tojamcá, er Bëngbe Bëtsabiamana nýetscanga cachcá monduámána.

## 4

1 Y tšëngaftanga, ndëmuanýengbiamana ínýenga nýets tempo imoservena, nýetsca soyënguñe tšabá šmochtsama, y nýetscangbiamana cachcá šmochtsemna, chë nýets tempo nýe tšëngaftangbiamana oservenëngaftaca, er tšëngaftanga šmondétatšëmbo celoca canýa endmëna, ndabiamana tšëngaftángnaca oservénënga šmondmëna.

### *Ošbuáchiyënga jábuayenama*

2 Nýets tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse.

3 Bëngbe Bëtsáftaca cha šmojtsencuénta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiamana entsanga jábuayenama, chë buayenana soye ndayama tempo entsanga ndoñe monjátatšëmbo. Atše chë buayenana soye entsanga abuátambaye causa, mora cárceloye sentsëtámëna.

4 Chcasna, Bëngbe Bëtsá atšbiamana šmochtseimpadana, atše chayobenama chë buayenana soyënga entsanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

5 Smochtsiyena nýetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nýets tempo ínýenga šmochtsinýanýnaye tšëngaftanga Jesucristbeñe ošbuáchiyënga bétsemnana.

6 Inýengaftaca chašmojtsencuénta ora, šmochtsama ntšamo šmojtsoyebuambnacá chëngbiamana tšabá chaotsemnana, y soyënga šmochtsichamo nýetscanga oyejuayana chamotsebomnana; y šmochtsetátšëmbo ntšamo cmojtsamna cada cánýabioye jojuana.

### *Jtadiósoftanama*

7 Jesucristbeyeca bëngbe bonshana catšata Tíquico, canýe trabajayá tšabe palabra bomná y Bëngbe Utabnabiamana bëngaftaca oservená, tšëngaftangbioye noticiënga echanjuamba ndayá átšeftaca tojopasama.

8 Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañëmuayama.

9 Cháftaca Onésimo echanjá, Jesucristbeyeca bëngbe bonshana catšata; cha canýe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsopasancá.

10 Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase.

<sup>11</sup> Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentšana, nýe chë unga átšeftaca mondëtrabája, Bëngbe Bëtsabe amëndayana entsángbioye chaóshjanguama, y chënga mondama atše ainaniñe bëts añemo chaitsebomnama.

<sup>12</sup> Epáfrasnaca cmontsacheuaná, inýe tsëngaftangbiocá y cha Cristo Jesusbiana jatrabájama endoservenana. Cha nyets tempo tsëngaftangbiama Bëngbe Bëtsábioye tša bochandbétseimpadana, tsëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojsamncá; y chca, tsëngaftanga corente šmochántsetatsšëmbo ntšamo šmojsamncá ndegombre yomna ntšamo Bëngbe Bëtsá yobošcá.

<sup>13</sup> Cach atše sënjinýe y sentsobena jayanama ntšamo cha jabuache yotrabájama, tsëngaftanga jujabuáchama, chë Laodicea puebloquënga y Hierápolis puebloca oyenëgnaca.

<sup>14</sup> Lucas, bëngbe bonshana ashnayá, cmontsacheuaná; y Démasnaca.

<sup>15</sup> Chë Laodiceoca Jesucristbeyeca catsátanga bëngbe cuenta šmochjácheuaye. Ninfábioynaca šmochjachuaye, y nyetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëgnaca.

<sup>16</sup> Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócnaca mëcha chamualiamana; y tsëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tsëngaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chë Bëngbe Bëtsá tbojabonýé trabajo sempre tsabá chaotsocumplínama.

<sup>18</sup> Atše Pablo, nýe quem palabrënga tsëngaftanga jacheuayama cach atšbe cucuátšeca sentsabiamná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tsabe bendicionënga tsëngaftangbeñe chaotsemnama.

# 1 Tesalonicenses

## *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts pueblocá Jesucristbeñe ošbuáchiyëngbiamá, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnana, y tšëngaftanga ainaniñe tšabe ebionana chašmotsebomnana.

*Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama*

<sup>2</sup> Bënga sempre Bëngbe Bëtsá fsëndëtschuaná tšëngaftangbiamá, y bënga cháftaca ftsencuénta ora, tšëngaftangbiamá fchandbétseimpadana.

<sup>3</sup> Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

<sup>4</sup> Jesucristbeyeca catšátanga, bënga fsëndëtatsëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnana.

<sup>5</sup> Bënga chë tšabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bëtsemnana. Tšëngaftanga corente šmondëtatsëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiamá nguayiñe.

<sup>6</sup> Chora, ntšamo bënga fsënjanamcá y ntšamo Bëngbe Utabná enjanियená, tšëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsatá oyejuayánaca, masque ínÿenga tmojamna tšëngaftanga puerte chašmosufrima.

<sup>7</sup> Mëntsá, tšëngaftanga uánatsanënga šmonjanobiamá ntšamo ndegombre jtсийenama, nÿetsca Macedonia y Acaya luarentša Jesucristbeñe ošbuáchiyëngbiamá.

<sup>8</sup> Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo –nÿets luarenache entságnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema –y chca, bënga tondaye más quešnátëjaboto tšëngaftangbiamá jatichámuama.

<sup>9</sup> Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama,

<sup>10</sup> y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentsána cháuatayenama, y cha šochanjátsebacaye chë uabouana castigüentsána, Bëngbe Bëtsá entsangbe bacna soyëngama chëngbiamá yobomnentšana.



## 2

*Ntšamo Pablo yojantrabája Tesalónica puebloca*

<sup>1</sup> Cach tšëngaftanga, Jesucristbeyeca catšátanga, šmondétatsëmbo bënga tcbonjánabuache ora ndoñe nÿe bonamente quenjatsmënama.

<sup>2</sup> Tšëngaftanga šmondétatsëmbo, bënga cabá tšëngaftangbioye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe noticiënga bëtscá añémoca jabuátambama.

<sup>3</sup> Er bënga entsángbioye bostero soyënga ndoñe queftsjatanabuayiyná, tšëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná.

<sup>4</sup> Bëngna inÿetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe noticiënga entsanga jabuátambama, y chca bënga fsëndoyebuambná; chíyeca bënga ndoñe nÿe entsangbe bominjíñe tšabá chaotsinÿnama queftsátama, ndayá nÿe Bëngbe Bëtsabiama, nda chë ndayá bëngbe ainaniñe yomnama yotátšëmbo.

<sup>5</sup> Ntšamo tšëngaftanga corente šmondétatsëmbcá, bënga ndocna te tšëngaftangbiama tšabe soyënga tifjánayana, tšëngaftanga bëngaftaca oyejuayënga chašmotsemnama; y ntšamo tšëngaftanga cbonjanëtsëtsnacá ndoñe quenjatsmëna nÿe tšëngaftangbentsana ba soyënga bëngbiama josháchiñama. Bëngbe Bëtsá chama yotátšëmbo.

<sup>6</sup> Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentsana, ni inÿengbentsana.

<sup>7</sup> Masque bënga, Cristbe ichmónënga bëtsemnama, matifjanobená tšëngaftanga nÿe sempre jtsamëndayana, bënga ndoñe chca chibiátanma; bënga corente jtsababuánÿeshanëse cbonjánanÿena, ntšamo canÿe mamá chabe básenga jtsabëchayana y corente bonshanánaca jtsanÿenana.

<sup>8</sup> Tša cbonjánababuanÿeshanayeca, bënga ndoñe nÿe chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiama. ¡Tša cbondábabuanÿeshana!

<sup>9</sup> Jesucristbeyeca bëngbe catšátanga, tšëngaftanga šmenabouínÿna ntšamo bënga bëtscá y jabuache fsënjantrabajama, Bëngbe Bëtsabe tšabe noticiënga abuyaiynayiñe y bëngbe vida onguayiñe, chca, tšëngaftanga ndoñe chacmondëtsamnama bëngbe ujabótama bënga jatatšatnayama.

<sup>10</sup> Cach tšëngaftanga šmondétatsëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjanियena ntšamo Bëngbe Bëtsá tšabá tbojtsinÿancá, nÿetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca.

<sup>11-12</sup> Tšëngaftanga šmondétatsëmbo, bënga bëtscá jóyebuambayëse cada ona tšëngaftanguentšá cbonjanéjabuachanama y cbonjánanëmuama, ntšamo canÿe taitá chabe básëngaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinÿancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinÿinÿanana jinÿama.

<sup>13</sup> Bënga, Bëngbe Bëtsabe tšabe soyënga cbonjanabuayiyná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nÿe entsangbe oyebuambnayancá. Y ndegombre Bëngbe Bëtsabe buayenánana endmëna, y chë palábraca,

tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yo-jtsama. Chama sempre Bëngbe Bëtsá fsëndëtschuaná.

<sup>14</sup> Jesucristbeyeca catšátanga, cach tšëngaftangbe luarentša entsanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora.

<sup>15</sup> Chë judiëngbe bëtš taitanga, Bëngbe Bëtsabe juabna oyebuamb-nayëngbioye tmojtsanëbaye, y ntšamo chëngbe bëtš taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tšábënga Bëngbe Bëtsabe bominýiñe quemátsmëna, y nyetsca entsangbe contra montsemna.

<sup>16</sup> Chë ndoñe judiëngbioye, Bëngbe Bëtsá cháuatsebacama jábuayenama fst-seboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

*Pablo tša yojánboše, Tesalónica pueblaca entsanga jányama*

<sup>17</sup> Jesucristbeyeca catšátanga, bënga tšëngaftangbentšana baseftayté jëftsebcnana šonjanotocá ora, masque ndoñe chocha tšëngaftangaftaca queftsátanmëna, sempre tšëngaftangbiana fsënjanenujabná, y tša fsënjánboše tšëngaftangbioye jtésana jautsëtsayama.

<sup>18</sup> Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama.

<sup>19</sup> Atše sentsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnana y más bëtšëtsanga fchtsemnana.

<sup>20</sup> Aíñe, ndegombre, ntšamo tšëngaftanga šmoyenama, bënga bëtscá añémoca ntšamo tšëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

### 3

<sup>1</sup> Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nýe bëndata Atenas bëtš pueblentše joquédana,

<sup>2</sup> y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiana entsanga abuayinyayíñe. Fsënjanichmó chacmañémuayama y chaotsamama tšëngaftanga Jesucristbeñe más chašmotsošbuáchema;

<sup>3</sup> y chca, ndocná Jesucristbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bëtsemnana, ínýënga imojtsama chašmotesufrínama. Er cach tšëngaftanga šmondëtatšëmbo bënga šojtsamna chca quem luarentše jëftsepadecénana.

<sup>4</sup> Y cabá tšëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondëtatšëmbcá.

<sup>5</sup> As y chë tšëngaftangbiana jtsetatšëmbuama más jatobátmanana ndoñe quetstëtsobenayeca, sënjanjuabó šojëtsemna Timoteo jíchmuana. Sënjanichmó

atše jtsetatšëmbuama aĩne bëtscá o ndoñe tšëngaftangbe ošbuáchiyana Jesucristbeñe tayojamnama, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo ton-dayama chaondëtsošservénama.

<sup>6</sup> Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nÿetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenojuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá.

<sup>7</sup> Quem sóyeca, Jesucristbeyeca catšátanga, y mora chë bënga nÿetsca chë padecena soyënga fstsebomna ora y ínÿenga bënga jasúfriama imojtsama ora, bëtš añemo fsëntsebomna, ntšamo tšëngaftanga tša Jesucristbeñe šmojtsošbuáchema jtsetatšëmbëse.

<sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama.

<sup>9</sup> Mora fchantsobena Bëngbe Bëtšá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca.

<sup>10</sup> Cada te, bnëté y ibeta, tša Bëngbe Bëtšá fsëndétseimpadana jobenayama tšëngaftanga jautsëtsayama chašualesenciana, Bëngbe Bëtšabe palabra tšabá chašmobedecema, chë buayenánana ntšamo yojtšashbencá jabuátambama.

<sup>11</sup> Bënga, Bëngbe Bëtšá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama.

<sup>12</sup> Y Bëngbe Utabná chaoma más bëtscá chašmotsenbobonshánama, y cachcá corente nÿetscángaftaca, ntšamo bënga cbondababuanÿeshancá.

<sup>13</sup> Chca, tšëngaftangbe ainaniñe bëtscá añemo šmochántsebomna; y Bëngbe Utabná Jesús cachábengaftaca chaojésabo ora, Bëngbe Bëtšá Bëngbe Taitabe delante ndocná chaodayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtšábenga, nÿe cha jt-seservénama.

## 4

### *Ntšamo jtsiyenama, Bëngbe Bëtšá oyejuayá chaotsemnama*

<sup>1</sup> Y mora inÿe palabra šmochjatspaséncia. Jesucristbeyeca bëngbe catšátanga, tšëngaftanga bëngbentšana šmonjanatsjinÿe ntšamo jtsiyenana cmojánamna, ntšamo Bëngbe Bëtšábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtsná más chca chašmotsamama.

<sup>2</sup> Tšëngaftanga šmondétatšëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca.

<sup>3</sup> Bëngbe Bëtšá endboše tšëngaftanga chašmotsiyenama mo Bëngbe Bëtšabengcá, ndocná bacna soyënga boyabása o shembásaftaca chaondëtšamama,

<sup>4</sup> y nÿetscanga chamotsobena ntšamo canÿe shema jonguanguana, chë ntšamo canÿa Bëngbe Bëtšábia yomná jamama ibomncá, y ntšamo entsangbe bominÿiñe tšabá yomncá,

<sup>5</sup> y ndoñe chabondónguango nÿe cháftaca bacna soyënga chëngbe cuérpoca jamama, ntšamo chë Bëngbe Bëtšábioye nduabuátmënga mondbetsamcá.

<sup>6</sup> Chë palabriñe ndocná chabe catsátbioye chabondëingñé, chë catsatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtsá chama tcbonjabuayená.

<sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá.

<sup>8</sup> Mëntšá, nda quem buatëmbana soyënga tojtsábotena, cha ndoñe nýe entšanga jtsëbátenana, ndayá Bëngbe Bëtsábioye, nda tšëngaftangbe ainaniñe Uámana Espíritu cháúamashënguama tojama.

<sup>9</sup> Atše ndoñe quešnátsmëna juabuábiamana ntšamo cmojtsamna ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcbonjabuatambá nýetscanga chašmotsenbobonshánama.

<sup>10</sup> Y ndegombre, tšëngaftanga chca šmondama nýetsca Macedonia luar-entše Jesucristbeñe ošbuáchiyëngaftaca. Pero cbontsaïmpadana, Jesucristbeñe catsátanga, más chca chašmotsamama.

<sup>11</sup> Nýa sempre quem soyënguiñe šmochtsentšena: natjëmbana jtsiyenana, ínýengbe soyënguiñe ndoñe ntsonremeténana, y ndoñe ntjatobatmanana nýe ínýenga tšëngaftangbiamama chamotsetrabájama, ntšamo tcbonjanëyancá tšëngaftangaftaca fsënjamna ora;

<sup>12</sup> chca šmochtsama, chë ínýenga Jesucristbeñe ndošbuáchiyënga chacmot-sarrespetánama, y ndocnábeñe ntjatobatmancá šmochantsobena jtsiyenana.

### *Bëngbe Utabná quem luaroye yochjésabo ora*

<sup>13</sup> Bëngbe catsátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë inýengcá, chë tcojóbanentsana ndoñe yontsemna jtayenama ca juabnayëngcá.

<sup>14</sup> Bënga fsëndošbuaché Jesús tojanóbana y tojtanyenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiamama yochjama chë nýetsca tescama yomna tšabe vida Jesucristoftaca chamotsebomnana, y quem luaroye cháftaca chamuatábama.

<sup>15</sup> Chë soyama bënga cbontsëtsësná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinýena tsbanánoca, más natsana chë ya obanënga chë te mochtayenëngbiamama.

<sup>16</sup> Er entšanga mochanjouena canýe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

<sup>17</sup> chentšana, chë ainënga chamojtsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nýetsca tescama cháftaca bënga mochántsemna.

<sup>18</sup> Quem palabrëngaca nýetscanga ndoñe más ngménana ainaniñe chašmondëtsebomna.

## 5

<sup>1</sup> Jesucristbeyeca catsátanga, ndoñe quenátsiyta atše jubuábiamana mocna ora chë soyënga yochjopásama.

<sup>2</sup> Cach tšëngaftanga corente šmondëtatsëmbo, Bëngbe Utabná yochjésabo chama ndocná chaondëtsejuabná ora, mo canýe atbëbanacá jashjanguana ibeta ndocná chama tonjatsjuabná ora.



<sup>3</sup> Entšanga chamojaryana: “Lempe tšabá endětsomñe y tondayama quešnátamna játauatjana ca”, chora nye ndeolpe chě entšangbiana tša jasúfriama echanjóshjango, mo canye shembása šešona jtsebomnama ora nye ndeolpe jasúfriama jontšancá; y ndegombre, entšanga chca jasúfriama quemochatotsbocá.

<sup>4</sup> Pero tšēngaftanga catšátanga, ndoñe quešmátiyena mo ibetiñcá, bacna soyēnga jtsejuabnyēse y jtsamēse; y chca, Bēngbe Utabná chaojésabo ora, tšēngaftanga ndoñe auatjanānēnga quešmochátsmēna, mo ndábioye canye atbēbaná tbojotbá ora, chábioye cuaftsauatjanacá.

<sup>5</sup> Njētsca tšēngaftanga šmondmēna entšangbe juabna binynayabe básēnga, y mo binyniñcá šmondoyena. Bēnga ndoñe chě ibetiñe mandayabe básēnga quemuátsmēna, y mo ibetiñcá ndoñe quemuátiyena;

<sup>6</sup> chíyeca bēnga ndoñe quešnátamna jtsemnana mo chě cachēngbe cuerpo jenomándama ndobenēngcá, chě mo cuaftsemangcá oyenēnga. Pero aiñe šontsamna mo chě fšnēngcá jtsiyenana, bēngbe cuerpo jtsemándayēse y njēts tempo jtseprontānēse.

<sup>7</sup> Ibeta ora entšanga jtsemangana, y cach ibeta tojtsemna ora entšanga jotmenangana;

<sup>8</sup> pero bēnga, chě binynentšēngna, šontsamna sempre bēngbe cuerpo jtsemándayana. Šontsamna Bēngbe Bētsábeñe jtsošbuáchiyana y cha jtsebobonshánana, chě uayaná Satanasbiana jenēuyanama y cha jayēnjanama, mo canye soldadcá, canye morochó soye cochaca jenáčochjatsana jtsevalentiana y ndoñe chamondēyēnjanama. Y chě castigüentšana Bēngbe Bētsá šochjátsebacamnaca puerte jtsošbuáchiyēse jtsobátmanana; y chca, bēnga mochántsemna mo canye soldadcá, cha canye casquēse juabuchētsana jenēuyanama.

<sup>9</sup> Er Bēngbe Bētsá ndoñe šonjáchembo bēnga chašotsamnama chě njētsca tescama castigo jtsebomnama. Ndayá Bēngbe Bētsá šojabacacá, Bēngbe Utabná Jesucristbeyeca bēnga chamótsbocama.

<sup>10</sup> Cha bēngbiana tojanóbana, bēnga cháftaca cányiñe jtsiyenama chamotsobenama, masque ainēnga o obanēnga chamojtsemnēse, cha chaojésabo ora.

<sup>11</sup> Chíyeca, njētscanga šmochtsenañēmuaye y šmochtsenájabuachana más jtsošbuáchiyama, ntšamo tšēngaftanga mora ya šmontsamcá.

### *Pablo choca ošbuáchiyēnga jábuayenama*

<sup>12</sup> Jesucristbeyeca catšátanga, cbontsaimpadana chašmotsarrespetana chě Bēngbe Bētsabiana tšēngaftangbeñe trabajayēngbiyoye, y chě Bēngbe Utabná tšēngaftanguentše tojábacacanga uánatsanēnga chamotsemnana y ntšamo jtsiyenama cmojtsamnama chácmabuayenama.

<sup>13</sup> Cmontsamna chēnga jtsarrespetánana y jtsababuánñēshanana, ndaye trabajo chēnga imojtsamama. Natjēmbana njētscángaftaca šmochtsiyena.

<sup>14</sup> Quem soyēnga chašmotsamámncaca cbontsaimpadana: jatrabájama ndoñe tmontsebošēngbiyoye šmochjucácana, añemo ndbomnēngbiyoye šmochjáñēmuaye, bētscá ošbuáchiyana ndbomnēngbiyoye šmochjújabuache, y uantadēnga njētscángaftaca šmochtsemna.

<sup>15</sup> Cuedado šmochtsebomna, nderado nda bacna soye tbojaborlase, ndocná ndoñe cachcá chabondētachnēnguama. Masna, nye šmochtsentšena njēts tempo tšabe soyēnga jtsamama cach tšēngaftanguentšēngaftaca y njētsca entšangaftácnaca.

<sup>16</sup> Njēts tempo oyejuayēnga chašmotsemna.

<sup>17</sup> Sempre Bēngbe Bētsáftaca šmochtsencuéntaye.

<sup>18</sup> Njetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamot-samama.

<sup>19</sup> Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama.

<sup>20</sup> Ndoñe šmattsábotena chë Bëngbe Bëtsabe juabna oyebuambnayëngbe buayenana soye.

<sup>21</sup> Yejuana šmochjájua boye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábicocana tayóbocanama, y chentša tšabe soyënga šmochjobuajo y sempre chca šmochtsama.

<sup>22</sup> Njetsca bacna soyënguentsana šmochtsojuánañe.

<sup>23</sup> Cach Bëngbe Bëtsá, chë bëngbe ainaniñe tšabe ebionana chamotse-bomnana endamá, njetsca soyiñe tšábenga chacá chacmabiamama, y njets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama.

<sup>24</sup> Nda tcmojúbuaja chábenga chašmotsemnana, cha sempre jtsamana ntšamo tojayancá, y lempe cha echanjama.

*Inye rueguënga chëngbiamama y jtadiósoftanama*

<sup>25</sup> Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

<sup>26</sup> Njetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

<sup>27</sup> Chontsamënda quem tsbuanácha njetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

<sup>28</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnana.

## 2 Tesalonicenses

### *Jacheuayama*

<sup>1</sup> Atše Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmommënga.

<sup>2</sup> Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftangbe ainaniñe tšabe ebionana chašmotsebonnama.

### *Cristo chaojésabo ora, ntšamo entšanga tmojamama Bëngbe Bëtsá echanjajana*

<sup>3</sup> Jesucristbeyeca bëngbe catsátanga, šontsamna nyets tempo Bëngbe Bëtsá tšëngaftangbiana jtsatschuanayana, ntšamo tšëngaftangbiana jamama šojtsëtocancá, er tšëngaftanga cada te más ošbuáchiyana šmontsebonna, y ntšamo tšëngaftanga nyetscanga šmojtsenbobonshana, tempscama más yojtsemna.

<sup>4</sup> Tšëngaftangbe ošbuáchiyama y bonshánama, bënga nyets tempo oyejuayënga fchandbétsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tšëngaftangbiana jóyebuambayama. Bënga fchandbétsoyebuambnaye ntšamo tšëngaftanga inÿetšá ntjatsjuabnaycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿënga tša cmécamena y chašmosufrima bëtscá imojtsama, tšëngaftanga Jesucristbeñe ošbuáchiyënga bétsemnama.

<sup>5</sup> Tšëngaftanga chca Cristo šmëstonayeca, corente entsinÿinÿena Bëngbe Bëtsá nyetsca soyënguiñe tšabá amá yomnama, y entšanga ntšamo tmojamama tšabá o ndoñe tšabá bétsemnama jayanama ora, cha chca echanjajana ntšamo entšanga tmojtsomerecencá. Y chca entsayana tšëngaftanga aiñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtsamama, ínÿënga imojtsama chašmotsesufrínama.

<sup>6</sup> Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima;

<sup>7</sup> y echanjama tšëngaftanga y bënga chë mondësufrinëngbiana, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inÿetšënga echántsemna.

<sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tšabe noticiënga Bëngbe Utabná Jesusbiana ndoñe montsuenanëngbioynaca.

<sup>9</sup> Chënga Bëngbe Bëtsá echanjácastigaye, nyetsca tescama jtsapochócase; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bétsemnama.

<sup>10</sup> Quem puerte uámana te, Bëngbe Utabná chaojésabo ora, nyetsca chabe entšanga, nyetsca chábeñe ošbuáchiyënga cha mochántatschuanaye y mochántichamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuaché bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

11 Chíyeca, chca chaotsemnama, nýets tempo Bëngbe Bëtsábioye tšëngaftangbiana fsëndëimpadana mercedo bomnënga chácmbiamama, chë vida chašmotsebmnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nýetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema.

12 Chca jtsamëse, tšëngaftanga šmochanjínñanýiye Bëngbe Utabná puerte bëtscá y uamaná bëtsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtscá y Bëngbe Utabná Jesucristo tšëngaftangbiana tšabe juabna ibobomna.

## 2

### *Chë Bëngbe Bëtsabe contra yomná*

1-2 Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninýenama ora. Básefta entšanga imojtsichamo chë bëtscá uámana te, chë Bëngbe Utabná jésabama te, ya tojóshjango ca; pero cbontsaïmpadana, Jesucristbeyeca catšátanga, bëtscá šmochtsentšena chënga ndoñe chamondobená jamana tšëngaftanga inýetšá juabna tšëngaftangbe ainaniñe chašmátsbmnama. Ndoñe šmatjóyeunaye nderado nda mëntšá chacmojtsëtsësná ora: “Canýe Bëngbe Bëtsabe juabna oye-buambnayá šonjáuyana chë Bëngbe Bëtsabe uámana te ya tojóshjango ca” o “canýa chca šonjabuayená ca” o “Páblëbiocana tsbuanácha fsënjushache y chiñe entsayana chë te ya tojóshjango ca”.

3 Bëtscá šmochtsentšena ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtsabe amëndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infiernoca pochocaná jtsemnama.

4 Cha Bëngbe Bëtsabe contra echanjóyeuambaye, chë ndëmuanýengbiana y ndaye soyëngama entšanga imojuabná diosënga imomnama contra echanjóyeuambaye. Chentšana cha echanjayana chëngbiana más obená yomna ca. Y Bëngbe Bëtsabe bëtscá yebynóyaca cha echanjámashëngo, choca echanjótscá y entšanga echantsëtsësnaye ndegombre cha Bëngbe Bëtscá yojtsemna ca.

5 ¿Chë soyama tšëngaftanga ndoñe šmondenabouínña? Atše cabá tšëngaftangta sënjamna ora, chama sënjanoyebuambná.

6 Y tšëngaftanga šmondétatšëmo, nda mora yojtsama chë Bëngbe Bëtsabe contra yomná ndoñe chaondonýnama, cabá chë tempo chca jopásama ndóshjango ora.

7 Mora ya mallajta entšanga puerte bacna soyënga tmojontsé amana, ndoñe ntšamo Bëngbe Bëtscá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nýe Bëngbe Bëtscá chca šojinýanýese; pero ntšamo tbonjayancá chë Bëngbe Bëtsabe contra yomnabiana ndoñe queochatëchnëngo, nýa nda chë soyënga ndoñe chaondëtsemnama yojtsamábioye Bëngbe Bëtscá chabojtsejuaná ora aiñe.

8 Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantse-pochóca.



<sup>9</sup> Chë Bëngbe Bëtsabe contra yomná, Satanasbe obenánaca echanjabo, y entsanga bëts obenana echanjínÿanÿiye, y chë bëts soyëngaca entsanga ingñénënga mochántsemna.

<sup>10</sup> Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entsángbioye nÿetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama.

<sup>11</sup> Chca causa, Bëngbe Bëtsá entseleséncia entsanga ingñénënga chamotsemnama, y chë ndoñe ndegombre soyënguiñe chamotsošbuáchema.

<sup>12</sup> Bëngbe Bëtsá chca echanjama, nÿetscanga chë ndegombre soyënguiñe Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nÿetsca tescama castigo chamotsebomnama jayanama.

### *Bëngbe Bëtsá šojabacacá atsebácanënga jtsemnama*

<sup>13</sup> Pero bënga šontsamna nÿets tempo Bëngbe Bëtsá jtsatschuanayana tšëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebacá er chë Uámana Espiritu Bëngbe Bëtsabe entsanga tcmojábiana, y tšëngaftanga chë ndegombre soyënguiñe šmojtsošbuaché.

<sup>14</sup> Chë tšabe noticiënga bënga cbondábuayiynayeca, Bëngbe Bëtsá tcmojúbuaja chábenga chašmotsemnama. Cha tcmojúbuaja Bëngbe Utabná Jesucristbe obenana y buashinÿinÿanánënaca chašmotsebomnama.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetsá šmatjátsjuabnaye.

<sup>16</sup> Bëngbe Bëtsá puerte tšabia endmënayeca, cha šuababuánÿeshana y tojama bënga sempre añemo ainaniñe chamotsebomnama y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana,

<sup>17</sup> chata chaboma tšëngaftanga bëtscá añemo ainaniñe chašmotsebomnama, y tšëngaftanga nÿets tempo chašmotsobena ntšamo tšabá yomncá jtsichámuama y jtsamama.

## 3

### *Bëngbiana Bëngbe Bëtsá šmochtseimpadana*

<sup>1</sup> Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nÿetsca luarenache más ba entsanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá.

<sup>2</sup> Bëngbe Bëtsánaca šmochtseimpadana cha chašotsëbuáuayayama, y chë puerte bacna entsanga ndoñe chamondobenama jamama bënga fchaisufrima, er nÿetscanga ndoñe quemochatošbuáchiye chë fsëndbuayiyná palabriñe.

<sup>3</sup> Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nÿe cachcá quecmatënÿa chë bacna soyënga mandayá nÿe ntšámnaca ndoñe chacmondáborlama.

<sup>4</sup> Y Bëngbe Utabná entsama bënga ndegombre ainaniñe fchaitsejuabnama, ntšamo bënga tchojanamëndacá mora šmojtsamama y cachcá sempre šmochtsamámna.

<sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanyanýé bonshánana jtsebomnama ntšamo Bëngbe Bëtsá endbomncá, y chašmojtsesufrina ora, corente añemo chašmotsebomnama, ntšamo Cristo tojansufrí ora yojanbomncá.

#### *Nyetscanga entsamna jtsetrabájayama*

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsaménda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye.

<sup>7</sup> Cach tsëngaftanga tsábá šmondétatsëmbo ntšamo cmojtsamna jtsiyenana, ntšamo bënga fsënjoyencá: bënga tsëngaftangbeñe fsënjaninyena ora, nýe ntjatrabajacá oyënjayënga ndoñe queftsjatsmëna,

<sup>8</sup> ni ndocnabe saná chibiáisese, tondaye ntabuenaycá. Inýetsá enjamna; cada te bnëtë y ibeta jabuache fsënjantrabája, chca, tsëngaftanga ndoñe chacmondëtsamnama bëngbe uajabótama bënga jatatsatnayama.

<sup>9</sup> Y ndegombre, bënga derecho fsënjánbomna tsëngaftanga jamëndama chašcújabuachama; pero masque chca, bënga jabuache fsënjantrabája tsëngaftanga chašmotsetatsëmbuama ntšamo yomna jtsiyenama, y chca chašmotsamama.

<sup>10</sup> Bënga tsëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá.

<sup>11</sup> Chca fsëntsichamo, er bënga fsënjátatsëmbona, báseftanga tsëngaftanguentsënga imojtsiyena tondaye ntsamcá, pero tša chë ínýengbe soyënguiñe jtsontremetënese.

<sup>12</sup> Chca oyena entsángbioye fsëntsabuayiyá y fsëntsaménda Bëngbe Utabná Jesucristbe mándoca, natjëmbana cachëngbe vida onguayíñe chamotso-trabájañama.

<sup>13</sup> Jesucristbeyeca catšátanga, ndoñe chacmondëumantšé tsabe soyënga amana.

<sup>14</sup> Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama.

<sup>15</sup> Mo canýe uayayacá ndoñe šmattsonýaye; šmochjabuayená mo canýe catšatcá, chca ndoñe chaondëtsamama.

#### *Jtadiósoftanama*

<sup>16</sup> Bëngbe Utabná fsëntseimpadana, cha, chë entsanga tsabe ebionana ainaniñe chamotsebomna iuamá, chaoma tsëngaftanga nyets tempo y nyetsca tescama chca chašmotsebomnama. Bëngbe Utabná tsëngaftangaftaca chaotsemna.

<sup>17</sup> Nýe quem palabrënga tsëngaftanga jacheuayama cach atšbe cucuátšeca sëntsabianná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

<sup>18</sup> Atše, Bëngbe Bëtsá sëntseimpadana, Bëngbe Utabná Jesucristo chaoma tsabe bendicionënga tsëngaftangbeñe chaotsemnama.

# 1 Timoteo

## *Jachuayama*

<sup>1</sup> Atše Pablo, Jesucristbe ichmoná sēndmēna. Bēngbe Bētsá bēngbe atsebacyá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiana cha yochjamama. Atše Jesucristbe ichmoná sēndmēna, er chata tbojanmandá atše chca jtsemnama.

<sup>2</sup> Timoteo, atše quem tsbuanácha cbontsabobiamná. Atše Bēngbe Bētsabe soyēngama entšanga sēnjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sēntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēnga chacotsebomnama, chata chacmolastemama y ainaniñe tšabiana ebionana chacotsebomnama.

## *Pablo chē ndoñe ndegombre soyēnga abuátambayēngbiana chēnga tojanabuayená*

<sup>3</sup> Ntšamo chē Macedonia luaroye chocana sēnjēftsanbocna ora tcbonjanimpadacá, mora cachiñe cbochtētsimpáda. Efeso puebloca cochjoquéda, básefta entšanga chácuamēndama chē ndoñe ndegombre soyēnga ndoñe chamondētsabuatambama,

<sup>4</sup> ni nyets tempo ndoñe nye chamondetsejuabná anteungbe cuentēngama, ni chē ba uabemana uabáinēnga chē tempsca bēts taitangbiana. Er nye chca yapa jesejuabnayanentšana, jóbocnana nye ínñengaftaca jabuachana enatsētsnayıñe, y chca chēngbioye tondayama ntjujabuáchana ntšamo Bēngbe Bētsá jamama yojuabnacá chaósertama. Chē soyna nye chábeñe jtsošbuáchiyēse jobenayana josértana.

<sup>5</sup> Chca mando entsemna nyetscanga chamotsenbobonshánama, y chē bonshánana endóbocana nda chabe ainanentse ndocna bacna soyēnga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana.

<sup>6</sup> Báseftanga tmojtsajbaná chca jtsemnana y inñe soyēngama tmojontsé juabnayana; chíyeca chēnga mora imojtsentšena nye ndayámna ndoservena soyēngama enatsētsnayana.

<sup>7</sup> Chēnga jtsebošana Bēngbe Bētsabe ley abuátambayēnga jtsemnama, pero chēnga ndoñe yontsósertana ni ntšamo imojtsabuatambacá, ni mo ndayánaca ntšamo chēnga tmojtsichamcá, mo chē soyēnga ndegombre cuaftsemncá.

<sup>8</sup> Pero bēnga mondētatsēmbo chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse.

<sup>9</sup> Bēngnaca mondētatsēmbo, chē leyēnga ndoñe tmonjuama chē nyetsca soyēnguiñe tšabá amēngbiana. Chē leyēnga tmonjuama quemēntša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservena ca juabnayēnga, cachabe taitá o mamá obánayēnga y ndēmuanñēnga imomna entšanga obánayēnga,

<sup>10</sup> boyabásaftaca o shembásaftaca bacna soye amēnga y boyabásēnga cach boyabásēngaftaca bacna soye amēnga, entšanga enēnga nye ínñabiana nyets tempo chamotseservénama, bosterēnga y chē nye bonamente Bēngbe Bētsabiana júrayēnga; chca entsayana, chē leyēnga yomna jácastigama

nÿetscanga ndëmuanyënga ndoñe tmonsama ntšamo chë ndegombre buatëmbana soyënguiñe iuayancá.

<sup>11</sup> Ntšamo muentše chë leyëngama tijayancá, entsebuátëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entšanga jabuátambama.

*Pablo Bëngbe Bëtsábioye tbojtanchuá, tbojanlastemama*

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjéseprontanama, y chíyeca šojanábuayana atše chabiamá chaitrabajama; y cha endmëna nda inétsama atše obenana chaitsebomnama chë trabajo jamama.

<sup>13</sup> Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanécamena, y chabiamá tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatsëmbo ndayá tsjánamama.

<sup>14</sup> Y chca, Bëngbe Utabná ba tšabe bendicionënga atšbiamá tonjanma, y chábeñe ošbuachiyá šonjábema, y tonjanma atše cha chaitsebobonshánama y ínÿengbioynaca. Cha chca bëngbiamá tojama, bënga cánÿiñe mo canÿacá Cristo Jesúseftaca bëtsemnayeca.

<sup>15</sup> Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna.

<sup>16</sup> Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mocht-sanošbuachëngbioye; chca tonjaninÿinÿé cachá átšeftaca uantado jtsemnëse, atše nÿetscangbiamá chë más bëts bacna soye amá jtsemnëse.

<sup>17</sup> ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entšanga ndoñe ntsoobenana jinÿamá y chë nÿe canÿe Bëngbe Bëtsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiamá tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatsëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inÿe buatëmbana soyënguiñe jtsošbuáchiyana.

<sup>20</sup> Chca tonjopasá Himeneo y Alejáandroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiamá ndoñe bacá ntsóyebuambnayana.

## 2

*Pablo tojanabuayená ntšamo Bëngbe Bëtsá jtsadoránama*

<sup>1</sup> Nÿetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nÿetsca soyëngama



ntšamo tojtsëjabotcá cha chamotseimpadana, nyetsca entsangbiama, y cha sempre chamotsatschuaná.

<sup>2</sup> Entsemna, nyetscangbe tšabiama Bëngbe Bëtsá jtseimpadánama, pero masna quem luarentša reyëngbiama y inye mándayëngbiama, chca, nyetscanga puerte natjëmbana jtsiyenama chamuetsobenama, y nyetsca soyënguiñe tšabá jtsamëse, Bëngbe Bëtsá jtsatschuanayama, y entsangbe juabniñe tšabá chamotsemnana.

<sup>3</sup> Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana;

<sup>4</sup> y chca jtsóyejuayana, er cha endboše nyetsca entsanga atsebácanënga chamotsemnana y chë ndegombre buayenánana chamotsábuatmama.

<sup>5</sup> Chca nyetsca entsangbiama endmëna, er nye canye Bëngbe Bëtsá nyetscangbiama endmëna, y nye canya endmëna nda yobena jamama entsanga tempcá tšabá Bëngbe Bëtsáftaca chamotsemnana; cha endmëna Jesucristo, cach entsá.

<sup>6</sup> Er Jesucristo, mo canya inyenga játsebacama cuaftopagacá, chabe derecho vida jtsobomñama cachcá tojanonyá y tojanóbana, chca, nyetsca entsanga chamotsobenama atsebácanënga jtsemnana. Chë soye cha tonjaninyanyé, nya chama tempo yojtsemna ora, chë Bëngbe Bëtsá nyetsca entsanga atsebácanënga chamotsemnana yobošama.

<sup>7</sup> Bëngbe Bëtsá chca nyetsca entsangbiama yobóseyeca, Jesucristo šojanábuayana chabe ichmoná jtsemnana, chabe soyënga entsanga jtsabuayinyayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

<sup>8</sup> Ntšamo sënjayancá, atše sëntseboše nyetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuënta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebomncá, inyengaftaca ntjatentjayanaycá, y inyengaftaca jabuachana ntjatenatsëtsnaycá chënga chamotsemna.

<sup>9</sup> Y atše sëntseboše shembásenga entsayangá chamuatíchëtjo, mo chë tšabe shembásenga mondbetsichëtjoncá, ndoñe nye entsanga chamotsëbuáuatjama y ntšamo tmojtsichëtjonama chëngna uámanënga imomna ca entsanga chamotsejuabnama. Ndoñe quenátamna jtsenóbotamnayana, nya mo chca chquëcnënga jtsemnëse, ni castellano soyëngaca o uámana fjantse ndëtšbéngaca, o yapa uámana entsayangaca, chca, nye entsanga jinýama tšabá jtsemnana.

<sup>10</sup> Pero aíne mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

<sup>11</sup> Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana.

<sup>12</sup> Atše ndoñe quichatsleséncia, canye shembása boyabásenga chaotsabuatambá, ni chaotsamënda. Canye boyabása tojtsabuatambá o tojtsamënda ora, shembása ndocá chaondëtsichamo.

<sup>13</sup> Chca chaotsemna, er Bëngbe Bëtsá natsana Adán tbojanpormá, y chentšana Eva;

<sup>14</sup> y er Satanás Adánbioye ndoñe tbonjaningñé, ndayá chë shëmbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciaca.

<sup>15</sup> Pero shembása atsbocaná echántsemna, básenga quem luaroye endbaúshejangoyeca, pero chamna, aíne nyets tempo Bëngbe Bëtsábeñe tojt-

sošbuáchese, n̄yetscanga tojtsababuán̄yeshan̄ese, cachá n̄yetsca soyēnguiñe jenomándama tojtsoben̄ese, y n̄yets tempo t̄sabe soyēnga tojtsam̄ese, nt̄samo Bēngbe Bētsabe ent̄sanga mondbetsamcá.

### 3

#### *Nt̄samo ibojtsemna ch̄e ošbuachiyēngcá enefjuanēngbeñe mandayá*

<sup>1</sup> Mēnt̄sá ndegombre endmēna: nderado nda tojtseboše can̄ye trabajo jtsebomnama, can̄yent̄se ošbuachiyēngcá enefjuanent̄se ch̄e in̄ye ošbuáchiyēnga jtsamēndayama, cha ndegombre yojtseboše can̄ye puerte t̄sabe trabajo.

<sup>2</sup> Ch̄iyeca, ch̄e ošbuachiyēngcá enefjuanēngbe mandayá bontsemna jtsiyenana ba t̄sabe soyēnga jtsam̄ese, chca, cha ndoñe t̄sabá yontsama ca ndocná chaond̄etsichamuama. Y mēnt̄sánaca cha bontsemna jtsemnama: n̄ye can̄ye shembásabe boyá; nt̄samo jtsiyenama t̄sabá juabnaya chaotsemna, cachá n̄yetsca soyēnguiñe jenomándama chaotsobena, y chaotsetát̄sēmbo ndayá ibomna t̄sabá jtsamana; chaotseprontana chabe yebnent̄se posada ent̄sanga júyent̄samiamama, y chaotsobena botamana abuatambayá jtsemnama.

<sup>3</sup> Ndoñe yapa tmoyá o penzentsero chaond̄etsemna; pero chaotsemna t̄sabá mandbomná, ent̄sanga nat̄jēmbana chamotsiyenama bošá, y ndoñe chaond̄etsejuabná n̄ye crocénana jēsebomnama.

<sup>4</sup> Chaotsetát̄sēmbo nt̄samo n̄yetsca chabe yebnent̄sa ent̄sanga botamana jtsamēndayama, y chaoma chabe básenga ch̄e nt̄samo cha tojayancá chamotsamama, ndocna te st̄et̄soye chamond̄ēquedama;

<sup>5</sup> er, nda cachabe yebnent̄sa ent̄sanga ndoñe tontsobena jtsamēndayama, chca, ¿nt̄samo nantsobena ch̄e ošbuachiyēngcá enefjuanēnga jtsan̄yēnama?

<sup>6</sup> Cha ndoñe chaond̄etsemna cabá mora cuenta Jesucrist̄beñe ošbuachiyá; aín̄e chca ch̄e ošbuachiyēngcá enefjuanēngbe mandayá tojtsemn̄ese, nderado n̄ye cachá uámana ent̄sá nantsenobiamnaye, y nt̄samo Bēngbe Bētsá Satanásbioye tbonjancastigacá, chca b̄etsemnama, cach soyama Bēngbe Bētsá ch̄e ent̄sábioye buanjacastiga.

<sup>7</sup> Chánaca bontsemna jtsiyenana jtsam̄ese, y chca chaojtsama ora, ch̄e Jesucrist̄beñe ndošbuáchiyēnga t̄sabá chabiamama chamotsichamo. Ch̄e ent̄sá ndoñe chca tontsam̄ese, chēnga chabiamama mochanjayana ndoñe t̄sabá yontsama ca, y Satanás echanjama cha chabócochēngo bacna soyēnga jamama.

#### *Nt̄samo ibojtsemna ch̄e ošbuachiyēngcá enefjuanēnga ujabuachaná*

<sup>8</sup> Cachcá, ch̄e mándayēngbe ujabuáchanēnga mēnt̄sá entsamna: uámana ent̄sangcá n̄yetscanga chamots̄etabna, uta palabra ndbomnēnga; ndoñe yapa vínoye chamond̄etsetmó, y ndoñe chamond̄etseboše n̄ye paselo becá crocénana jtsebomnama.

<sup>9</sup> Chēnga entsamna ndegombre jtsošbuáchiyana ch̄e Bēngbe Bētsá tojin̄yan̄yé soyēnguiñe, ch̄e ndayiñe bēnga mondošbuaché, chēngbe ainaniñe in̄yetsá juabnēnga nt̄jatsbomncá.

<sup>10</sup> Natsana, chēngbiamama botamana šmochjshauarrepára jtsetat̄sēmbuama chēnga aín̄e o ndoñe montsobena mo ch̄e ošbuachiyēngbeñe mándayēngbe ujabuachanēngcá joserviama. Chēnga n̄yetsca soyēnguiñe t̄sabá tmojtsemn̄ese, šmochjálesenciaye chiñe chamoservema.

<sup>11</sup> Cachcá, ch̄e shémanga mēnt̄sá entsamna: n̄yetscangbiamama mo uámana ent̄sangcá utabnēnga, ndoñe uayátsenayēnga, cachēnga n̄yetsca soyēnguiñe jenomándama obenēnga, y n̄yetscañe t̄sabe palabra bomnēnga.

<sup>12</sup> Can̄ye ujabuachaná chaotsemna n̄ye can̄ye shembásabe boyá, y chaotsetát̄sēmbo nt̄samo chabe básenga y n̄yetsca chabe yebnent̄sa oyenēnga jtsamēndayana.

<sup>13</sup> Chë uajabuáchanënga tšabá chiñe tmoservénëse, canye uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchemá.

*Ndayá Bëngbe Bëtsá bënga šojinÿanÿecá, canye bëts buatëmbana soye endmëna*

<sup>14</sup> Atše sentsobátmana pronto chjobenaye jama aca jauatsëtsayama; pero chca cbontsabobiamná,

<sup>15</sup> nderado atše betscó jama ndoñe sënjobenase, chacotsetatšëmbuama ntšamo canÿa ibojtsemna nÿetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básënga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšëna chama ínÿengbioye jáyëñjanama.

<sup>16</sup> Nÿa ndegombre endmëna, Bëngbe Bëtsá soyënga šojinÿanÿé, y chë soyëngaca bënga montsobena jtsiyenana, chë Bëngbe Bëtsabe entšanga imomnëngcá; chë soyënga bëngbiamá ndegombre bëts buatëmbana soye endmëna, y chë buatëmbana soye mëntsá endmëna:

Cristo quem luarentše cach entšacá entšángbioye tojánebëbuacna.

Chë Uámana Espíritu tonjinÿanÿé cha nÿetsca soyënguiñe tšabá amá yomnama. Angelënga cha tmojáninÿe, y chabiamá ba luarënguentsá entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinÿanÿiyëse.

## 4

*Báseftanga chë tšabe benachentsana mochtsojuánañe*

<sup>1</sup> Uámana Espíritu, nÿetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiamá mondošbuaché soyënguiñe ca. Chëngna, espíritënga entšanga áingñayënga mochántsayanana, y chë ndoñe ndegombre soyënga chë bacna bayëjënga entšángbioye mochtsabuátambaye soyënguínaca.

<sup>2</sup> Chca buatëmbana soye jtsóbocanana chë bacna entšanga ntšamo ndegombre tmojuabnacá ndinÿinÿayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nÿe chca chëngbe ainaniñe jésejuabnayana.

<sup>3</sup> Quem entšanga ndoñe ntjalesénciana ínÿënga chamotsobouamama, y jtsemándayana básefta sananga entšanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse.

<sup>4</sup> Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase;

<sup>5</sup> er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

*Jesucristbiamá trabájayiñe canÿe tšabe oservená*

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canye tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebomna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nýe quem luarentša entšangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtšamëse;

<sup>8</sup> cachabe cuérpoca ba soyënga jamana más añemo jtsebomnama, aíñe batsatema endoservena; pero jtsiyenana Bëngbe Bëtsábioye jadórama yomncá jtšamëse, puerte enduámana y juajabuáchana nýetsca soyënga tšabá chaotsemnama; chca jtšamana puerte tšabá endmëna cachabe vidama quem luarentše, y chë inýe vidócnaca.

<sup>9</sup> Ntšamo tijayancá ndegombre entsemna, y nýetscanga entsamna jtsejuabnayana chca ndegombre bëtsemnama.

<sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nýetsca entšangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

<sup>11</sup> Ntšamo quem soyëngama tcbonjauyancá entšanga cochtsamëndaye y cochtsabuátambaye.

<sup>12</sup> Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserrespetánama, chca jtšamëse icoyenama jtsonýayëse, cachcá chamotsamama: botamana jtsóyebuambnayëse, nýets tempo tšabe soyënga jtšamëse, nýetscanga jtšababuánýeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná.

<sup>13</sup> Atše choca chajashjanguëntscuana, cochtsentšena chë Bëngbe Bëtsabe uabemana palabrënga entšangbeñe jtšaláyama, y chënga jtšabuátambayama y jtšabuayiyayama.

<sup>14</sup> Acbioye Bëngbe Bëtsá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oye-ambuambnayënga acbiama tmojanoyebuambá ora, y chë ošbuachiyënguentša bëtšejémënga chëngbe cucuatšënga ábeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

<sup>15</sup> As, aca cmontsemna sempre jtšamana chë soyënga ntšamo tcbonjauyancá. Cochtsentšena chë soyënga tšabá jtšamama, chca, entšanga chamobená jinýama, aca cada te más tšabá lempe cojtsamama.

<sup>16</sup> Botamana cochtsantješna, aca chë tšabe soyënga jtšamëse cojtsiyenama, y chë tšabe buatëmbana soye inýënga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnama y chë ácbioye ouenanëgnaca játsebacama.

## 5

*Ntšamo Timoteo ibojtsemna chë inýe ošbuáchiyëngaftaca jtsemnana*



<sup>1</sup> Bëtsëjémënga ndoñe catjucácana; chca játamamna, cochjábuaenaye, chënga mo cach acbe taitá cuaftsemncá; y chë bobontséngaftaca cochjama, mo chënga acbe catsátanga cuaftsemncá.

<sup>2</sup> Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiaséngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebomncá.

*Ošbuáchiyëngbenache viudanga tmojtsemna ora*

<sup>3</sup> Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana.

<sup>4</sup> Pero canye viudá nderado básenga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobóscá, cachëngbe pamíllanga chamotsarrespetánama, chëngbioye jtsanÿenëse, y chëngbe bëtsétsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana.

<sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochuájabuachama jtsobátmanana, y nÿets tempo jtseimpadánana, bnëté y ibeta, cha chabuájabuachama.

<sup>6</sup> Pero canye viudá, nÿe quem luarentša entšángaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominiñe mo canye obanacá jtsemnana, er chábioye ndoñe ntse servénana.

<sup>7</sup> Lempe chë soyënga chamotsamama ošbuáchiyënga cocht-samëndaye, chca, ndocná ndocna bacna soye chëngbiana jatichámuama chaondëtsebomnana.

<sup>8</sup> Er, nda cachabe entšanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entšá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canye boyá ibnabomná.

<sup>10</sup> Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentse posada júyentsamiama prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nÿetsca tšabe soyënga jamama yontšená.

<sup>11</sup> Pero chë lístañe, chë viudanga chnënguana bnëtsana uata cabá ndbomnënga ndoñe catjúbiamá; er chë chëfta uata ndbomnënga, yapa nÿe cachënga tšabá jtsemnana juabnënga jtsebomnana y soyënga jtsamana. Chcase, chënga Jesucristbioye ya ndoñe ntse servénana, y chora jtsebošana cachiñe jtétóbouamayama;

<sup>12</sup> y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama.

<sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnana, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse.

<sup>14</sup> Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe

yebnënguenache jtsemándayana; y tondaye chamondétsama, chca, bëngbioye uayayënga chamuayana, chënga chca ndoñe tšabá montsama ca.

<sup>15</sup> Atše chca séntsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

<sup>16</sup> Canye shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondétsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomñëngbioye jujabuáchama.

*Ntšamo cuantsemna chë ošbuachiyëngbeñe amëndayëngaftaca*

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entsanga más chamotsarrespetánama, chca trabajo bétsamama, y más, chë sempre entsanga jtsabuayinyayama y jtsabuátambayama imontšenëngbioye.

<sup>18</sup> Er Bëngbe Bëtsabe uabemana palabrënguiñe endayana, mëntšá: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácana ca”. Chíyeca, chë bëtsëjemëngcá amëndayënga jtsomerecénana entsanga chamotsarrespetánama.

<sup>19</sup> Nderado nda tcmojáuyana canye bëtsëjema bacna soye tojama ca; pero útata o unga entsanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

*Inÿe soyëngama jábuayenama*

<sup>20</sup> Chë bëtsëjemënga nÿe bacna soyënga tmojtsamënga, nÿetsca entsangbe delante cochjucácana, chca nÿetscanga uatjana chamuishache, bacna soye amama castigo mochtsebomnama.

<sup>21</sup> Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entsá ínÿengbiana más tšabá ntjatabacacnycá.

<sup>22</sup> Ndocnabe bestšašañe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canye bëtsëjema amëndayacá joserviama yojtsobenama, nÿe betscó, juabuáyanama botamana ntjenojuaboycá. Pero nÿe ntjenojuaboycá chca tcojamëse, y cha canye bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnama.

<sup>23</sup> Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

<sup>24</sup> Entsanga mondobena tšabá jinÿana, básefta entsangbe bacna soyënga, cabá chë soyëngama chëngbioye botamana ntjåtjaye ora; pero ínÿengbe bacna soyëngama, nÿe tcojåtjajentsana entsanga chama jtsetatšëmbuana.

<sup>25</sup> Cachcá, báseftanga entsangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jama, pero masque chca, ndayénaca chë tmojanma tšabe soyëngama ínÿenga mochanjåtatsëmbona.

## 6

<sup>1</sup> Chë nÿets tempo nÿe ínÿabiana oservénënga entsamna, chëngbe nduiñëngbiana jtsejuabnayana, chënga uámana entsanga imomnama y nÿets

respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbétsabuatambaye, ínÿenga podesca ndoñe chamondëtsóyebuambnama.

<sup>2</sup> Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentsá tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

*Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana*

Quem soyënga cmontsamna entsanga jtsabuátambayana, y beca jtsëtsëtsnayana chca chacmóyaunama:

<sup>3</sup> Nderado nda inÿe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase,

<sup>4</sup> cha nÿe cachá puerte uámana entsá yojtsenobianná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnama, nÿetscanga ndoñe cachcá chamondëtsejuabnama jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiana jtsejuabnayana,

<sup>5</sup> y ínÿengaftaca nÿe sempre jtsenpenzénsiyana, er chëngbe juabniñe nÿe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservena ca.

<sup>6</sup> Ndegombre canÿe entsá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nÿe chë tojtsebomna soyëngaca tojtsemnëse.

<sup>7</sup> Er bënga tmojanonÿná ora, quem luaroye bëngaftaca tondaye tmonjáníyëbo, y quem luarentšana cach tondaye quemochatobenaye jëftsocñama.

<sup>8</sup> As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna.

<sup>9</sup> Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entsanga Satanasbe cucuatšíñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiana ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsenatjëmhcá, cachcá, chë bacna juabnënga bomnana, chëngbioye mochántsapochocaye y nÿetsca tescama mochántscastigaye.

<sup>10</sup> Crocénana jtsebomnama yapa jtsebošana, jamana entsabe ainanentšana nÿetsca bacna juabnënga y soyënga chaóbocnama; y básefta entsanga, crocénana jtsebomnama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguñe, chë bënga mondošbuaché soyënguñe, y chca cachëngbiana tmojama puerte chamosufrima y bëts ngménana jtsebomnama.

*Chë tšabe soyama jtsenojuerzánama, ošbuáchiyana sempre chaotsemnama*

11 Pero aca, Bëngbe Bëtsabiamana oservená, chca benachentšana cochtsojuánañe. Nya cochtsentšana, chë Bëngbe Bëtsabe bominiñe tšabá yomncá jtsamama, chë ndayá Bëngbe Bëtsá jadórana yomncá jtsamama, Jesucristbeñe puerte jtsošbuáchiyama, nyetscanga jtsababuányeshanama, Bëngbe Bëtsábeñe jtsobatmanëse puerte uantado padecena soyënguiñe jtsemnana, y corente jtsababuányeshanëse nyetscanga chacotsënñayama.

12 Chë tšabe soyama, ošbuáchiyana joboguiyanama cochtsenojuezana. Chë nyetsca tescama yomna tšabe vida cochjashjache; chama Bëngbe Bëtsá tcmojanchembo y bëtscá entšangbe delante tconjánayana tšabe soyënga Jesucristbiamana, ndayñe aca icošbuaché.

13 Y mora, Bëngbe Bëtsabe delante, nda endbama lempe ntšamo quem luarentše yobinñcá vida chaotsebomnana, y Jesucristbe delante, ntšamo cachabiamana ndegombre bemncá Poncio Pilatbe delante lempe tojanayaná, chatbe delante cbontsemánda,

14 lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana.

15 Y nya chë soyama chë tempo chaojóshjango ora, Bëngbe Bëtsá chca echanjínñanyie, er cha endmëna chë corente bendición bomná y chë nye canye Mandado. Cha nyetsca reyëngbiamana, chë más uámana Rey, y nyetsca amëndayëngbiamana, chë más uámana Utabná.

16 Nye cha ndoñe bondmëna ndocna te ntjóbanana, y cha canye bëtse buashinñinñayana luarentše endoyena y choye ndocná yondobena jobéconana. Cha ndocná tbonjinñe y ndocná yondobena jinñana. ¡Entšanga nyets tempo chamotsinñanñaná cha puerte bëtscá y obená bëtsemnana! Chca chaotsemna.

17 Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnana, ni lempe tšabá yochjóboconama, bëtscá soyënga bëtsebomnana ndoñe chamondëtsobatmana, er chë tcbomna soyëngama ndoñe ntsótatšëmbuana ndayëntscóñama chca mochtsebomnana; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnana.

18 Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama.

19 Mo nda bëtscá shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochantsetatšëmbo chënga bëtscá tšabe bendicionënga más chcoye mochtsebomnana. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjëftsashjache.

### *Inye soye Timotéobioye tbojanbonjë*

20 Timoteo, ndayá Bëngbe Bëtsá tcmojabonñecá, botamana cochtsinñena. Entšanga nye quem luarentša soyëngama encuéntayana, ndoñe cattsuënana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana.

21 Atše chca sentsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.



Atše, Běngbe Bětsá sěntseimpadana, ácbeñe tšabe bendicioněnga chaotsem-  
nama.

## 2 Timoteo

### *Jachuayama*

<sup>1</sup> Atše Pablo, Jesucristbe ichmoná sēndmēna, Bēngbe Bētsá chca yobóseyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē nŷetsca tescama yomna tšabe vida chamotsebomnama; y chca vida montsebomna Cristo Jesúseftaca cánŷiñe mo canŷacá bētsemnayeca.

<sup>2</sup> Atše quem tsbuanácha cbontsabobiamná, acbiamama Timoteo, aca mo atšbe bonshana uaquiñacá, Crístbeñe condošbuachema. Atše sēntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácebeñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

### *Ndoñe ntsēuatjana entšángbeñe Jesucristbiamama jóyebuambayama*

<sup>3</sup> Sempre Bēngbe Bētsáftaca stsencuēnta ora, acbiamama sēndbētsenojuabnaye, y acbiamama sēndbētsatschuanaye bnēté y ibeta; y Bēngbe Bētsá endmēna nda atše sēndēservena, ainánaca jtsejuabnaye y jtsetatšēmbēse, ntšamo atše stsamcá tšabá bētsemnama, cachcá ntšamo atšbe bēts taitanga tmojanmcá.

<sup>4</sup> Atše sēndbētētenojuaboje ntšamo aca, chocana atše sēntanabo ora shēchbuiye tconjanoperdema, y chíyeca atše tša sēntseboše aca jtētinŷama, atše puerte oyejuayá chaitsemnama.

<sup>5</sup> Bēngbe Bētsá acbiamama sēndbatschuaye, er atše sēndbátēnojuaboje aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndētātšēmbō.

<sup>6</sup> Chíyeca sempre cochtsantješna quem uámana soyama: Mo nda canŷe shinŷañe tojtsajuinŷinŷnacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsinŷena. Chē obenana aca conjanóyēngacñe, atšbe cucuatšēnga acbe bestšašñe sēnjanjajó y Bēngbe Bētsá acbiamama sēnjanimpadá ora.

<sup>7</sup> Er Bēngbe Bētsá tonjama bēngbe ainaniñe Uámana Espíritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiamama y nŷetscangbiamama chamotsebomnama, y cabēnga jenomándama chamotsobenama.

<sup>8</sup> Chíyeca, ndoñe cattseuatja entšanga jáuyanama, ntšamo tcojinŷe y cojtsetatšēmbcá Bēngbe Utabnabiamama ndegombre bētsemnama; ni atšbiamama ndoñe cattseuatja, atše cárceloye sēndutámenama, chabiamama oservena causa. Chamna, chē Bēngbe Bētsá cmochanjátsetaye obenánaca, sempre cochtseprontana jasúfriama, átseftaca y ínŷengaftaca, entšanga tšabe noticiēnga abuayiynaye causa.

<sup>9</sup> Bēngbe Bētsá endmēna nda bēnga šojatsebacá, y šojáchembo jtsiyenama mo chábēnga imomnēngcá jtsamēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóseyeca y bēngbe tšabiamama juabna bómnayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiamama jamama sóyeca.

<sup>10</sup> Y mora, Bēngbe Atsebacayá Jesucristo tojáboyeca, Bēngbe Bētsá šojinŷanjé cha bēngbe tšabiamama juabna yobomnama. Jesucristo tonjama, entšanga nŷetsca tescama obanēnga ndoñe chamondētsemnama, y tonjama bēnga

chamotsetatsëmbuama, chë tšabe noticiënga chabiamana joudenëse y joyeu-nayëse, bënga chë nyetsca tescama yomna tšabe vida mochjábomnana, ndoñe nyë jopochócama cuerpënguiñe.

<sup>11</sup> Bëngbe Bëtsá šojanábuayana tšabe noticiënga entsanga jábuayenama, Jesucristbe ichmoná jtsemnana y entsanga jabuátambama.

<sup>12</sup> Chë causa, atše mora cárceloca quem soyënga sentsesufrina; pero chama atše ndoñe quetsátëuatja, er atše sëndëtatšëmbo ndábeñe atše stsošbuáchema, y corente sëndëtatšëmbo cha yobena jtsinýenana ndayá šojabonyecá, chë ndaytë cha yochjésabëntscuana.

<sup>13</sup> Nyets tempo, chë ndegombre buayenánana, ndayá átšbentšana tconjanuencá, entsanga cochtsabuayinayë, entsanga jtsinýanýnaye aca Jesucristbeñe icošbuáchema, y Bëngbe Bëtsá y nyetscanga icuababuánýeshanama, y chca yomna aca Cristo Jesúseftaca cánýiñe mo canýacá bëtsemnayeca.

<sup>14</sup> Chë Uámana Espíritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonyecá sempre cochtsinýena.

<sup>15</sup> Ntšamo ya condëtatšëmbcá, nyetsca ošbuáchiyënga Asia luaroquënga cachcá šmonjesonýá, y chentše bontsemna Figelo y Hermógenes.

<sup>16</sup> Pero Bëngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja.

<sup>17</sup> Maska, Romoye tojabánashjango ora, cha botamana šojáanguango y šonjáninýena.

<sup>18</sup> Bëngbe Utabná lastemado cháftaca chaotsemna, ntšamo nyetscanga tmojamcá tšabá o ndoñe tšabá yontsemnana cha yochjayana ora. Aca corente condëtatšëmbo ntsachetšá Onesíforo Efeso puebloca šonjanéjabuachama.

## 2

### *Jesucristbiamana canýe tšabe soldado*

<sup>1</sup> Y aca, atšbe uaquiñá, chë Cristo Jesús acbiamana tšabe juabna yobomentšana, bëtscá añemo ainaniñe cochtsebomna.

<sup>2</sup> Ntšamo ba entsangbe delante šconjoyeunacá, cach buayenánana, boyabásenga nyetscañe tšabe palabra bomnënga cochjábanýiye, y chamotsobena ínýenga cachcá jabuátambama.

<sup>3</sup> Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entsanga abuayinayë causa, ainaniñe bëts añemo cochtsebomna, mo canýe tšabe soldadcá, cha chabe mándayabiamana jasúfriana.

<sup>4</sup> Ndocna soldado ntjátanana shjoca soyënguiñe vida jtsebomnana o crocénana juacánama. Soldado chca jtsamana, chabe mandayá, chca chaotsemnana tbojabocacá cha, oyejuayá chaotsemnana.

<sup>5</sup> Y canýe travisiayá, ínýenga jáyëñjanama, canýe soye juacánama; pero ntšamo chë uacanána jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá.

<sup>6</sup> Chë jajañe trabajayá derecho jtsebomnana chë natsaná jtsemnana, chë tmojatbaná sananguentšana ndayánaca jtsebomnana. Acaftaca cachcá echanjopása, chë trabajo tšabá chacojamëse.

<sup>7</sup> Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

<sup>8</sup> Sempre cochtsenójuabnaye Jesucristbiamana, ndabiamana Bëngbe Bëtsá tojanma cháuatayenama y enjamna canýa rey Davídbentšana entšá, ntšamo atše chabiamana sëndabuayiná tšabe noticiënguiñe endmëncá.

<sup>9</sup> Chca abuayiynaye causa, atše sentsesufrina, n̄ya caden̄juangácnaca uts-buaná, mo can̄ye b̄ets bacna soye ochjajnayacá. Pero masque atše chca s̄entsemna, ch̄e B̄engbe B̄etsabe soȳengama buayenánana ín̄yenga entšángbioye montsabuatambá.

<sup>10</sup> Ch̄iyeca atše n̄yetsca padecena soȳengaca s̄end̄etsóboyana, B̄engbe B̄etsabe bocacán̄engbe t̄sabiama, ch̄éngnaca atsebácan̄enga chamotsemnama, Crístbeñe jtsošbuáchiȳese; y Crísto Jesús b̄ets̄etsanga cháuabiamama, y cháftaca n̄yetsca tescama chamotsiyenama.

<sup>11</sup> M̄entšá ndegombre endm̄ena:

Cristo Jesús tojanóbana ora, enjamna mo b̄éngnaca cuafjobancá, er b̄enga t̄montsajbaná oyenana ntšamo tempo monjanियencá y Jesucristbeñe montsošbuaché;

y chca, b̄éngnaca cháftaca mochantsiyena;

<sup>12</sup> b̄enga ch̄e padecena soȳengaca t̄mojt̄sesufrina ora, t̄mojt̄semoroch̄ese, b̄éngnaca Jesucristoftaca mochántsemandaye.

B̄enga t̄mojayana, cha ndoñe monduabuatma ca, as cha b̄éngbiámnaca cachcá echanjayana;

<sup>13</sup> b̄enga ch̄abeñe ndoñe t̄montsošbuáchese, masque chca, cha cabá echanjama ntšamo t̄bojašebuachenacá, er cha lempe jamana, ntšamo sempre iuetsemncá jtsin̄yan̄yaȳese.

*Can̄ye trabajayá, ndáftaca B̄engbe B̄etsá jtsóyejuayana*

<sup>14</sup> Ch̄e t̄chonjauyana soȳengama, cochjama ch̄e entšanga chamot-senójuabnama, y B̄engbe B̄etsabe delante cochjábuayenaye ch̄enga ndoñe yontsamna n̄ye palab̄r̄engama jabuachana enats̄etsnayana; er chca, ndocna t̄sabe soye ntjamana, y chca t̄mojt̄senats̄etsná ora, jamana ch̄e soye ouenan̄enga más batšá chamotsošbuáchema, y jujabuáchana ch̄éngbe t̄sabe juabn̄enga jtsondbiamama.

<sup>15</sup> Lempe ntšamo icobencá cochtsama, aca chacotsemnama mo can̄ye entšá ndabiamama B̄engbe B̄etsá cháuyana n̄yetsca soȳénguiñe t̄sabá amá yomna ca; aca chacotsemnama mo can̄ye trabajayacá, nda tondaye tontsebomna ndayama jat̄uatjama; y chacotsemnama ch̄e ndegombre buayenánana corente t̄sabá buat̄embayá.

<sup>16</sup> Entšanga n̄ye quem luarentša soȳengama, ndoservena palab̄r̄enga t̄mojt̄sencuénta ora, ch̄e soye ndoñe catt̄suenana; er ch̄e soye jamana entšanga puerte ín̄yetsá chamobocanama, ntšamo B̄engbe B̄etsá ndoñe yondm̄encá, ín̄yetsá jtsejuabnaȳese y jtsam̄ese.

<sup>17</sup> Ch̄éngbe buat̄ëmbana soȳengaca puerte bacá ín̄yengbioye jáborlana, n̄ya mo can̄ye uabouana šocana chamotsebomnama cuafjamcá. Chca bu-at̄ëmbaȳenguentše Himeneo y Fileto bontsemna.

<sup>18</sup> Chata ch̄e ndegombre benachentsana t̄bojt̄sojuánañe, y ibojtsichamo ch̄e oban̄enga chámuatayenama B̄engbe B̄etsá ya cat̄enjama ca, y Jesús chaojésabo ora, n̄yetscanga chámuatayenama B̄engbe B̄etsá ndoñe yochanjama ca. Ch̄e causa, chata bontsama básefta entšanga ch̄e ntšamo Jesucristbeñe imo-janošbuachecá, mora ya ndoñe chamond̄etsošbuáchema.

<sup>19</sup> Pero B̄engbe B̄etsabe ndegombre buayenánana n̄yets tempo cachcá endesomñe, y ndocná quenátobena ch̄e soye jat̄rócama. Chca endm̄ena mo ch̄e nd̄ets̄benga ndayiñe can̄ye b̄ets yebna tojebncá, ndayiñe m̄entšá yojtsábemana: “B̄engbe Útabná end̄eubuatma ch̄e ch̄ábenga imomn̄enga”, y “N̄yetscanga ch̄e B̄engbe Útabná b̄enga imomn̄enga ca t̄mojt̄sichám̄enga, chamuajbaná n̄yetsca bacna soȳenga amana ca”.



<sup>20</sup> Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëse y fshantse soyëngnaca; chë nat-sana soyënga uámana tescama jtsebuájonana, pero chë inÿe soyëngna, nÿe nÿets tempo chauetsoservénama.

<sup>21</sup> Chca endmëna chë Jesucristbeñe imojtsošbuachéngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entšángbentsana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiana tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero aínë cochtsiyena ntšamo Bëngbe Bëtsabe bominiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nÿetscángaftaca natjëmbana cochtsomñe, chë chaújabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebomncá.

<sup>23</sup> Ndoservena soyëngama palabrënga y ndosertánentsana óbocana soyëngama ndoñe cattsuenana; aca corente condétatsëmbo chë soyënguentšana entšanga nÿe jabuachana enatsëtsnayañe jabocanana.

<sup>24</sup> Pero chë Bëngbe Utabnabiana oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsënÿayana, jtsemnana tšabe buatëmbayá y ínÿengaftaca uantadá.

<sup>25</sup> Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatsëmbuama;

<sup>26</sup> chënga botamana chamuatsjuaboma, y Bëngbe Bëtsá, Satanasbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

### 3

#### *Ntšamo entšanga mochtsemna, Cristo jésabama chaojtsobeco ora*

<sup>1</sup> Pero aca cmontsemna jtsetatsëmbuana, Cristo jésabama tempo chaojtsobeco ora, entšanga echántsamna puerte padecena soyënguiñe jtsiyenana.

<sup>2</sup> Chca echántsemna, er entšanga, cada ona nÿe cachabe tšabiana echanjësenojuabnaye, crocénana jtsebomnana tša mochántseboše, mochántsemna enábotamnayënga y ínÿengbioye mo nduamanëngcá mochantsënÿaye. Bëngbe Bëtsabiana y ínÿengbiana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiana tšabe soyënga tmojtsamëngbioye quemochtëtacheuanaye, y Bëngbe Bëtsabiana y chabe soyëngama ndoñe respeto quemochátsbomna,

<sup>3</sup> ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga.

<sup>4</sup> Chënga, uayayëngbe cucuatšinë entšanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entšangcá mochántsenobiamnaye; chënga Bëngbe Bëtsá

jatsbobonshana cuenta, cachëngbe cuerpiñe tšabá jtsomñama soyënga mochántseboše.

<sup>5</sup> Inyënga echantsinyana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínyanjiye, Bëngbe Bëtsá obená bëtsemnama chënga ndoñe mondošbuáchema.

Nya tondayama chëngaftaca cattseñcuéntaye.

<sup>6</sup> Chënguentše báseftanga mondmëna, y chëngna botamana palabrëngaca yebnënguenache jamashjana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nye cachënga tšabá jtsëmnama, ntšamo tmojtsebošcá.

<sup>7</sup> Chënga nyets tempo nye ndaye tsëm soye jatóntsana jatatsjínyan, pero ndocna te ntjobenayana Bëngbe Bëtsabe ndegombre soyënga josértama.

<sup>8</sup> Ntšamo Janes y Jambres Moisesbe contra ibojamncá, cachcá, chë ínyanjáingñama abuatambayënga nyetsca ndegombre soyëngama contra jtsëmnama. Chë entsanga chëngbe juabniñe nye bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa.

<sup>9</sup> Pero chënga ndoñe quemochatobenaye bëtscá entsanga jáyëñjanama, er nyetsca entsanga mochanjátatsëmbona chënga nye bacna soyënga juabnayënga imomnana, mo chë Israeloca entsanga tmojantatsëmboncá Janes y Jambres nye chca juabnayata bëtsemnama.

#### *Inye soye Timotéobioye tbojanbonyé*

<sup>10</sup> Pero acna, puerte tšabá condëtatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínyanjáingñayana uantado tsmëna; ntšamo atše, Bëngbe Bëtsá y ínyanjioye tsababuányëshana; ntšamo atše, Bëngbe Bëtsábeñe jtsobátmanëse,

<sup>11</sup> Inyanjáingñayana ora; y sënjansufrina ora, padecena soyënguiñe bëtš añemo tsjánbomna. Acnaca condëtatšëmbo ntšamo atše chama Antioquía, Iconio y Listra bëtš pueblëngoca tsjansufrinana. Pero masque entsanga tša smonjanacmena, atše lempe sënjanauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá.

<sup>12</sup> Ndegombre endmëna, nyetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúseftaca cányiñe mo canyáca imomnënga, puerte mochanjasúfria, chca bëtsemnama, chënga chamosufrima ínyanjáingñayana chamojtsama ora;

<sup>13</sup> pero chë bacna entsanga y chë ínyanjáingñayënga, cada te más bacna entsanga mochántsemna, más bacna soyënga jtsamëse; chënga ínyanjioye mochántsaingñayë, pero cachëngnaca ingñëñënga mochántsemna.

<sup>14</sup> Pero aca, nyets tempo cochtsejuabnaye y cochtsama lempe ntšamo tcojuatsjinycá, chë ndegombre soyëngcá cojtsošbuácheñe, er aca tšabá condëubuatma chë tmojanbuatëmbanga;

<sup>15</sup> y aca, cabá básatema conjamna orscana, chë Bëngbe Bëtsabe uabemana palabrëngama condëtatšëmbo, chë ndaye sóyeca aca contsobena juatsjínyan, Bëngbe Bëtsá chacmatsbocama, Cristo Jesúsbeñe jtsošbuáchiyëse.

<sup>16</sup> Bëngbe Bëtsá, Uámana Espiritbeyeca tonjama, lempe ntšamo Bëngbe Bëtsabe uabemana palabrënguiñe yobinyncá entsanga chamuábemama. Chë uabemana palabra endoservena, bëngbioye chë ndegombre soyënga jabuatambama; nderado ndaye soye ndoñe tšabá tmonjamama bënga

chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominiÿiñe tšabá yomna soyënga jtsamëse;

<sup>17</sup> chca, canÿe entšá Bëngbe Bëtsabiama oservená y obená chaotsemnana, tšabá chaotsetátšëmbo y sempre chaotseprontana nÿetsca tšabe soyënga jtsamama.

#### 4

<sup>1</sup> Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá,

<sup>2</sup> Bëngbe Bëtsabe palabra entšanga chacotsabuayiyayama; siempre chca jamama cochtseprontana, masque entšanga aíñe o ndoñe jouenama tmojtsebošëse. Cochjama, inÿenga bacna soyënga tmojtsamama chamotsetátšëmbo, chca tmojtsamama cochjucácana y cochjábuayenaye ndayá jamama yojtsamana. Siempre chca cochtsabuátambaye, chca ora puerte uantado jtsemnëse.

<sup>3</sup> Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsicamo soyënga nÿe ntšamo cach entšanga jouenama tmojtsebošcá.

<sup>4</sup> Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana.

<sup>5</sup> Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiama tšabe noti-ciënga entšanga abuayiyayabe trabajo cochtsama; y nÿa cochtsentšena ndayá Bëngbe Bëtsá tcmojabonÿecá tšabá jtsamama.

<sup>6</sup> Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana.

<sup>7</sup> Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché.

<sup>8</sup> Chcasna, atšbiama canÿe uacanana soye echántsemna, er Bëngbe Bëtsá tojama atše chabe bominiÿiñe tšabia chaitsemnana. Bëngbe Utabná endmëna chë ndegombre tšabá ichamuá entšanga aíñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtétatšetaye, ndayá nÿetscángbioye chca, ndëmuanÿenga puerte imo-boše cha cachiñe cháuesabama, cha imobobonshánayeca.

#### *Inÿe soyënga Timoteobiama*

<sup>9</sup> Lempe ntšamo tcojobenacá cochjama betscó jabama atše jabínÿama;

<sup>10</sup> er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica pueblöye tojtsoñe. Crescente Galacia luaroye tonjá y Tito Dalmacia luaroye.

<sup>11</sup> Nÿe Lucas, chë šmonjanájabuachanënguentsana, mora átšeftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama puerte oservená endmëna.

<sup>12</sup> Tíquico, Efesoye sënjichmó.

<sup>13</sup> Chacojabo ora, uabonjanía šochjesacñe, atše Troas bëts puebloca, Carpbe yebnoca tijésaboshjona; chë librëshangánaca, pero chë uámana uabemana tsbuanachangá ndoñe chacmondétsebnatjëmbe.

<sup>14</sup> Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama.

<sup>15</sup> Chabiamá cuedado cochtsebomna; cha tojobenase ntšámnaca cmatjabórla, er cha chë bënga mondabuayiyiná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nÿetscanga cachcá šmonjésonÿaye. Pero atše sëntsobátmana, Bëngbe Bëtsá chama chënga chaotsaperdoná.

<sup>17</sup> Pero Bëngbe Utabná aíñe šonjanájabuache y tonjanma atše bëts añemo jtsebomnama, y chcase, atše sënjanobená Jesucristbiamá nÿetsca chabe tšabe noticiënga entsanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canÿe uabouana resjuentsana šonjanatsbocá, mo canÿe león jtsosañámentšana ndábioye cuafjatsbocá,

<sup>18</sup> y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjebetše. ¡Nÿetscanga nÿetsca tescama cha chamotsatschuaná! Chca chaotsemna.

*Pablo Timotéobioye jadiósoftanama*

<sup>19</sup> Atšbe cuenta cochjácheuaye Prisca y Aquila, y Onesíforbe pamílnaca.

<sup>20</sup> Erasto, Corinto puebloca tontsoquedañe, y Tróximo Mileto puebloca šocá sënjëftseboshjona.

<sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

## Tito

### *Jachuayama*

<sup>1</sup> Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatsëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse.

<sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sëntsobátmana chë nyetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebomnama;

<sup>3</sup> y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entšangbiana yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mándoca.

<sup>4</sup> Tito, quem tsbuanácha cbontsabobiamná. Atše Jesucristbe soyëngama entšanga sënjanabuayiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácheñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

### *Titbe trabajo Creta luaroca*

<sup>5</sup> Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjftsemandacá.

<sup>6</sup> Canÿa bëtsëjemama uabuayaná mëntšá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntšobencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca.

<sup>7</sup> Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyéyeca, cha bontsemna jtseyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebomnama.

<sup>8</sup> Pero chabe yebnentše posada entšanga júyentšamiama sempre chaotseprontana, tšabe soyënga chaotsebínÿnama sempre chaotsentšena, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena.

<sup>9</sup> Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buaatëmbana soyëngaca ínÿenga añemo chaotsatšatnama, y chë soyama contra tmojtsemnënga jáyënjanama, ndoñe tšabá montsamama.



<sup>10</sup> Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna chë nÿetsca ošbuáchiyënga base bobachtema chë más delicadentše tëtšenënga jtsemnana vojtsamna ca mondbétsichamënguentše.

<sup>11</sup> Y entseyta chëngbioye jtayáchetana, er chënga jamana ba pamíllanguentše nÿetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

<sup>12</sup> Enjamna canÿa, ndabiama entšanga jtsichámuana cach Creta luar-entša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.”

<sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché;

<sup>14</sup> y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama.

<sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominÿiñe puerte bacna entšanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

## 2

### *Soyënga ntšamo chë ndegombre buatëmbánana endmëncá*

<sup>1</sup> Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá.

<sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse;

<sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana,

<sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nÿetscángaftaca tšábënga jtsemnana, cachëngbe boyángbioye jtsayaunanana, chca, ndocná

chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatsatnaye cachënga jenomándama chamotsobenama,

<sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama,

<sup>8</sup> chë ndegombre soyënga jtsóyebuambnaye; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

<sup>9</sup> Chë nÿets tempo nÿe ínÿabiana oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana.

<sup>10</sup> Ndoñe chamondëtsatbëbana, pero aíñe nÿétscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamujuabó tša botamana chë buatëmbana soyënga, Bëngbe Bëtsá bëngbe Atsebacayabiana yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiana juabnënga yobomnana, y chca, cha tojama nÿetsca entšanga chamotsobena atsebácanënga jtsemnana.

<sup>12</sup> Chë Bëngbe Bëtsabe juabna bëngbe tšabiana, šontsabuatambá jt-sajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse.

<sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora.

<sup>14</sup> Cha chabe derecho vida jtsobomñama cachcá tojanonÿá y bëngbiana tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga játsebacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatsatnaye, y jtsinÿanÿayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaodayana aca mando ndoñe condbomna ca.

### 3

#### *Ndayá Jesucristbeñe ošbuáchiyënga yojtsamna jamana*

<sup>1</sup> Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama.

<sup>2</sup> Ndocnabiana ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsënÿama entšanga jtsinÿanÿayëse.

<sup>3</sup> Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjátanama, ingñénënga y mandánënga monjamna nyetsca bacna soyënga jamama juabnëngaca y nye quem luarentše tšabá jtsemnama juabnëngaca. Bënga monjaniyena nye bacna soyënguiñe juabnaye, inyënga uantšaboše. Inyënga bënga šonjanëbuayënja y bënga nyetscanga monjanenáboyënja.

<sup>4</sup> Pero Bëngbe Bëtsá, bëngbe Atsebacayá, bëngbe tšabiamama juabna yobómnyeyca y tša šuababuányëshanama šonjaninyanýe ora,

<sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanongméyeyca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bënga mo tsmëma entšangcá chamotsemnama, ntšamo tempo yojamncá ntjatsjuabnaycá y ntjatamcá.

<sup>6</sup> Bëngbe Atsebacayá Jesucristbeyeyca, Bëngbe Bëtsá tojanma Uámana Espíritu bëngbe ainaniñe nyets tempo chaotsemándama y bënga chašotsëjabuachanama,

<sup>7</sup> chca bënga, Bëngbe Bëtsá bacna soyëngama šojaperdónanga y bëngbe tšabiamama juabna bómnyeyca tojayana chabe bominyiñe tšábënga imomnënga, chamotsobena cha yobomna soyënguentšana bënga mo ndayá cuafitsëtocancá jýyëngacñama, y chca, chábeñe jtsošbuáchiyëse, chë nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá nya ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentšena chë tšabe soyënga jtsamama. Chë buatëmbánana puerte tšabá endmëna y nyetscangbiama bëtscá endoservenana.

<sup>9</sup> Inyënga nye ndoservenana soyëngama jabuachana tmojtšenatsëtsná ora, y anteungbe cuentëngama chamojtsoyebuambná ora, ndoñe cattsonremetena; ndoñe cattsama cach tšëngaftanga ndoñe tšabá jtšenëyeunanamcá, y judiëngbe leyëngama ndoñe inyëngaftaca cattsenpéliaye. Chca jtsamana tondayama ntsošservénana, y nye bonamente chca jtsamana.

<sup>10</sup> Nderado nda tojtsama entšanga ndoñe cachcá nyetscanga chamondëtsejuabnama y chamotsenpéliama, canye o uta soye cochjabuayená ndoñe tšabá tonjamama; pero cha ndoñe tcmónjóyeunase, chentšana cháftaca ndoñe más cattsóyebuambnaye.

<sup>11</sup> Chca cochjama, er aca cochanjátatšëmbona canya chca tojtsemná, chabe juabna tojatrocá bacna soyënga jtsejuabnayama. Chë soye y chë inye bacna soyënga ntšamo cha tojtšamcá, jtsinyanynayana cha ibojtsemna castiganá chama jtsemnama.

### *Inye soyënga Titbiamama*

<sup>12</sup> Atše, Artemas o Tíquico ácbioye chaijichmó y choca chaojášhango ora, ndayánaca cochjama Nicópolis puebloye aca jama atše jinýama, er atše sënjajuabó chentše chë uaftenëntscuana jëftsemnana.

<sup>13</sup> Lempe ntšamo chacojobenacá, cochjuájabuache chë inyënga obuauyayá Zenas, y Apólosnaca; lempe ntšamo chata ibojtsëjabotcá cochjátšataye, inyoye jama jatóntšama chamobenama y benachëjana tondaye chaondëtsabuáshebenama.

<sup>14</sup> Atše sëntseboše, bëngbe entšanga, chë bëngcá Jesucristbeñe ošbuáchiyënga, chamotsentšena chë tšabe soyënga jtsamama y chë puerte ujabótënga jtsëjabuáchanama, chca, chënga tondayama ndoservenana vidënga ndoñe chamondëtsebonnama.

### *Pablo Tíbioye jadiošoftanama*

<sup>15</sup> Njetscanga chë átseftaca montsemnëgnaca cmontsechuaná. Atšbe cuenta cochjácheuaye njetscanga chë bënga imuababuanjeshanëngbioye, cach bëngcá Jesucristbeñe ošbuáchiyana bómnayeca. Atše, Bëngbe Bëtsá sëntseimpadana, cha chaoma áceñe tšabe bendicionënga chaotsemnama.

## Filemón

### *Jachuayama*

<sup>1</sup> Atše Pablo, mora utamená Cristo Jesusbiamá oservena causa, quem tsbuanácha sentsabiamná, Jesucristbeyeca bēngbe catšata Timotéoftaca, acbiamá Filemón, bēngbe bonshaná y nda bēngaftaca condētrabája Jesucristo jaserviama.

<sup>2</sup> Atše sentsacheuaná, Jesucristbeyeca bēngbe uabena Apia y Arquípnaca, nda bēngaftaca cánjiñe Jesucristbe soyēngama endenojuerzana; y nyetsca ošbuachiyēngnaca, ndēmuanjenga imuamana acbe yebnentše jēnefnama Bēngbe Bētsá jētschuayama.

<sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebomnana.

### *Filemonbe bonshánana y ošbuáchiyana*

<sup>4</sup> Bēngbe Bētsáftaca stsencuēnta ora, acbiamá sēndbētsenojuabnaye, y sempre acbiamá Bēngbe Bētsá sēndbētsatschuanaye,

<sup>5</sup> er atše sēnjátatsēmbona ntšamo aca nyetsca chē Bēngbe Bētsábenga imomnēnga icuababuánjeshanama, y ntšamo aca Bēngbe Utabná Jesúsbeñe tša icošbuáchema.

<sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canyáca fsēndmēna. Chca endmēnayeca atše Bēngbe Bētsá sēntseimpadana, tsēngaftanga chašmobená más botamana josértana nyetsca chē Bēngbe Bētsábicocana tmojóyēngacñe tsabe bendicionēnga, bēnga Cristo Jesúsēftaca cánjiñe mo canyáca bētsemnayeca.

<sup>7</sup> Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábabuanjeshanama, atše corente oyejuayá sēntsemna y bēts añemo sēntsebomna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchese.

### *Pablo, Filemónbioye Onésimbiamá tbojanimpadá*

<sup>8</sup> Y chca, atše Cristbe ichmoná quetsomñecá sēntsobena, aca nye jamándana ntšamo yomncá chacotsamama, pero atše chca ndoñe quichatsma.

<sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamá oservena causa,

<sup>10</sup> canye ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyiná. Cha Crístbeñe tonjanošbuachéyeca, cha mo atšbe uaquiñacá tonjanóbema.

<sup>11</sup> Tempo, cha ácbioye tondayama quecmēnjátanservena, pero mora cha becá entsámama, acbiamá y atšbiamá.

<sup>12</sup> Mora ácbioye sēntsatichamná, y atše sempre chabiamá sēndbētsenojuabnaye y sēndbobonshana.

<sup>13</sup> Atšbiamá puerte tsabá manmēna cha átseftaca matēnjoquedase, acbe cuenta atše chašoservema, cárceloye utamená sēntsemnēntscuana, chē tsabe noticiēnga entsānga abuayiyayeca causa.

<sup>14</sup> Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnana, atše juajabuáchama ndayánaca chacomama; y sēntseboše aca ndayánaca chacoma,



cach aca chca jamama puerte tcojtsebošëse. Chcasna, tondaye quichatsma, chë soye chca chaotsemnama aca cabá ndocá ntjayancá.

<sup>15</sup> Atše sëntsejuabná nderado Onésimo ácbentšana básefta tescama tojanoluaré, mora ácaftaca nÿets tempo jtsatsmënacá,

<sup>16</sup> y ndoñe nÿe acbiamá mo nÿets tempo canÿe oservenacá, ndayá chama más uamanacá, mo Jesucristbeyeca canÿe bonshana catšatcá. Atše puerte Onésimo sëndbobonshana, y acna cmontsemna más cha jtsebobonshánana, er cha mora ndoñe quenátsmëna canÿa nÿe acbiamá nÿets tempo oservená, ndayá Bëngbe Utabnábeyeca canÿe catšata, ntšamo cach aca condmëncá.

<sup>17</sup> Chca, aca atšbiamá condëjuabná mo ácaftaca cánÿiñe Bëngbe Utabnabiama trabajayacá; chíyecna cmontsemna cha jtojjana, mo atše šcojofjcá.

<sup>18</sup> Nderado ntšamo cha tcmojanborlá o ndayánaca tcmondebena, atše chama cbochjësëntšabuachiye.

<sup>19</sup> Atše Pablo, cach atšbe cucuátseca quem soye sëntsabiamná. Atše chama cbochanjësëntšabuachiye. Ndegombre, ndoñe quenátsiyta atše chachëyana becá šcondebena ca, ntšamo atsbocaná jtsemnama atše tcojábuanayenama.

<sup>20</sup> Chcasna, Jesucristbeyeca atšbe catšata, Bëngbe Utabnáftaca cánÿiñe mo canÿacá quetsomñecá, Diosmanda chë pavor šcochtsebema. Diosmanda cochjama atšbe ainana ngmënacá ndoñe chaondëtsemnama.

<sup>21</sup> Atše chca cbontsabobiamná, er atše tšabá sëndëtatšëmbo, ntšamo cbontseimpadancá cochjamama, y cabá más chama cochjatsmama.

<sup>22</sup> Y mora inÿe soye, Diosmanda posada šcochjabopróna, atše jányama chajábocna orscama, er atše puerte jtsošbuáchiyëse Bëngbe Bëtsábeñe sëndobátmana, cha tšëngaftangbiamá yochjama lempe ntšamo atšbiamá chašmojotjañcá, y chca, cha šochjaleséncia atše tšëngaftangbioye jésama.

### *Pablo Filemónbioye jadióšoftanama*

<sup>23</sup> Epafra, muentše átšeftaca cárceloye utamená, Cristo Jesusbiamá entšanga abuayiynaye causa, chánaca cmontsechuaná.

<sup>24</sup> Y Marcos, Aristarco, Demas y Lucas, chë bëngaftaca mondëtrabájanga Cristo jaserviama, chëngnaca cmontsechuaná.

<sup>25</sup> Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

## Hebreos

*Bëngbe Bëtsá bëngaftaca tojoyebuambá, chabe Uaquiñáftaca*

<sup>1</sup> Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyebuambnayëngaftaca.

<sup>2</sup> Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarënga tojama.

<sup>3</sup> Cha endinyanyná Bëngbe Bëtsabe corente buashinynyanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinyncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninyanýe cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jtsamëndayama.

*Bëngbe Bëtsabe Uaquiñá chë angelëngbiama más bëtsá yomna*

<sup>4</sup> Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canýe más uámana uabaina y chë angelëngbiama canýe más uámana trabajo tbojanbonýe.

<sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntsá tbonjaniana, ntšamo chabe Uaquiñábioye tbojaniancá: Aca atšbe Uaquiñá condmëna.

Mënté entsanga sënjinyanýe aca atšbe Uaquiñá comnama ca.

Ni ndocna angelbiama mëntsá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna,

y cha canýe Uaquiñá atšbiama ca.

<sup>6</sup> Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

<sup>7</sup> Y chabe angelëngbiama, mëntsá tojánayana:

Atše sëndama atšbe angelënga, chë atšbe buayiynayënga, mo binýiëngcá chamotsemnana,

y chënga, atšbe oservënënga, mo inñëjëngcá ca.

<sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

<sup>9</sup> Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nýa tondayama cmondogustana bacna soyënga jtsamana, chë ndayá

Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnana,

chë inýengbiama más oyejuayá ca —Bëngbe Bëtsá tojánayana.

<sup>10</sup> Bëngbe Bëtsá mëntsánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

11 Lempe chë soyënga nÿets tempo ndoñe queochátsmëna; aca nÿetsca tescama cochántsemna.

Lempe chë soyënga echanjopochóca, mo tojuatanguaná entsayacá.

12 Aca chë luarënga cochanjátrocaye, mo tsmëcá cuafjabiamcá.

Chca, chë luarëngaca cochanjama, mo entsayá tcojtenëjonëtse y tcojenotrocacá.

Pero aca nÿets tempo cach aca cochandesomñe,

y nÿets tempo vida cochandesóbomñe ca —cha tojánayana.

13 Bëngbe Bëtsá ndocna te ndocna ángelbioye mëntsá tbonjanियana, ntšamo chabe Uaquiñábioye tbojanियancá:

Atšbe catsbioica cochtsetbemana,

acbe uayayënga acbe cucuatšinë chamoquedama atšbe obenánaca chjamëntscuana ca.

14 Ndegombre, nÿetsca angelënga espíritënga mondmëna Bëngbe Bëtsá jaserviama, ndëmuanÿënga cha tojanichamó bënga jabújabuachama, chë atsebácanënga mochtsemnëngbe tšabiamana.

## 2

### *Canÿe bëts soye endmëna atsebácanënga jtsemnana*

1 Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentšana ndoñe chamondokuánama.

2 Ndayá Bëngbe Bëtsá tempo angelëngaca entsanga tojanamëndacá, canÿe ndegombre soye endmëna, y entsanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca,

3 bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftsashjáchama, atsebácanënga jtsemnana. Bëngbe Utabná chë natsaná yojtsemna nda entsanga tojanabuayená Bëngbe Bëtsá entsanga yochjánatsebacama; y ínÿënga bënga šonjanabuayená cachcá ntšamo chábioye tmojanoyeunacá.

4 Y Bëngbe Bëtsánaca tonjaninÿanÿé, ndayá chënga tmojanabuayenacá ndegombre bëtsemnana, chabe obenana jinÿanÿiyama soyëngaca, entsanga chamenjnaná soyëngaca, bëts soyëngaca, y entsanga chë Uámana Espiritu ainaniñe chamotsebomnana cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

### *Bëngbe Bëtsá tojanma Jesucristo entsangcá chaotsemnana*

5 Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná.

6 Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojanियancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entsanga mondmëna. ¿Ndáyeca tša chënga cuanjésanÿena?

7 Aca tcojama entsá puerte uamaná chaotsemnana, y chë angelëngna nÿe batšatema chabiamana más uámanënga mondmëna.

Aca tcojama cha puerte uamaná y respeto merecido bomná chaotsemnana,

<sup>8</sup> y cha chaotsemándama n̄yetsca ch̄e in̄ye soȳenguiñe, ch̄e quem luarentse aca tocjamiñe –chiñe can̄ya tojánayana.

Entsá lempe chaotsemándama B̄ngbe B̄tsá tojanma ora, tondaye tonjánboshjona entsáftaca nd̄emandana soye ca. Pero m̄entscoñama ndoñe n̄ya chca quem̄entin̄ye, ch̄e entsá lempe nt̄samo quem luarentse yomncá jtsemándayana.

<sup>9</sup> Pero b̄nga mond̄etat̄s̄embo y corente mondon̄yá Jesús aín̄e chca tojanmama. B̄ngbe B̄tsá tojanma cha nduamaná chaotsemn̄ama, mo can̄ye entsacá, baseftayté ch̄e angel̄engbiama más bat̄sá uamaná. B̄ngbe B̄tsá, entsangbe t̄sabiama jtsejuabn̄aȳese, yojánbōse Jesús chaóbanama, corente jasúfriase; B̄ngbe B̄tsá yojánbōse cha chca chaomama, n̄yets luarentsa entsangbe t̄sabiama. Y Jesús ya chca tojánmayeca, B̄ngbe B̄tsá ya tojin̄yan̄ȳe cha puerte b̄tsá y uamaná b̄tsemn̄ama.

<sup>10</sup> N̄yetsca soȳenga yobin̄ȳna B̄ngbe B̄tsabiama y ch̄ábeyeca. T̄sabá enjamna, B̄ngbe B̄tsá jamana Jesucristo chaotsemn̄ama lempe nt̄samo entsanga tmojtsajabotcá, nda ch̄engbe bacna soȳenguent̄sana ch̄áuatsebacama. B̄ngbe B̄tsá chca tojanma, Jesús, ch̄e entsanga atsebácan̄enga jtsemn̄ama unachayá, chaosufrima jam̄ese, chca, ba entsanga celoca, mo chabe basengcá, ch̄áftaca b̄ts̄etsanga chamotsemn̄ama.

<sup>11</sup> Er B̄ngbe B̄tsá cach Taitá n̄yetscangbiama endm̄ena: Jesús, ch̄e entsanga B̄ngbe B̄tsábenga chamotsemn̄ama iuamabiama, y ch̄e entsanga chca chamojtsemn̄engbiám̄naca. Ch̄iyeca Jesús, B̄ngbe B̄tsabe Uaquiñá, ndoñe n̄ts̄euatjana ch̄engbioye cat̄sátanga ca jtsachembuanama.

<sup>12</sup> B̄ngbe B̄tsabe uabemana palab̄r̄enguiñe B̄ngbe B̄tsábioye cha m̄entsá tbojaniana:

At̄sbe uabents̄engbeñe acbiama chanj̄oyebuambaye,  
y jacántase cbochanj̄etschuaye, ácbioye adóraȳenguent̄se ca.

<sup>13</sup> Y m̄entsánaca cha B̄ngbe B̄tsabiama tojánayana:

At̄se at̄sbe B̄tsábeñe chantsōshbuáchiye ca.

Y más chcoye m̄entsá tojánayana:

Muent̄se B̄ngbe B̄tsabe básengaftaca s̄entsemna, ch̄e at̄sbe cucuat̄siñe tojábash̄ejuan̄enga, at̄se jtsan̄ȳenama ca.

<sup>14</sup> Quem B̄ngbe B̄tsabe básenga n̄yetsca entsangcá mondm̄enayeca, Jesúsna can̄ye entsá ch̄engcá tojanóbema. Cha chca tojanma, jób̄an̄ese, ch̄e entsanga jób̄anama chaotsamn̄ama obenana bomná Satanás, jaȳenjanama.

<sup>15</sup> Y chca, cha tojama ch̄e jób̄anama y ndayá chent̄sana yochjopásama auat̄j̄enga ndoñe chamond̄etsauatjama; ch̄enga n̄yets tempo corente ngm̄enaca imnoyena, jób̄anama auatja causa.

<sup>16</sup> Er ndegombre, cha ndoñe tonjánabo ch̄e angel̄enga jabújabuachama, ndayá ch̄e Abrah̄ambent̄sana ents̄angbioye.

<sup>17</sup> Y chama cha ibojamna jtsemn̄ana n̄yetsca soȳenguiñe cachcá mo chabe uabents̄engcá, ch̄e entsanga, chca, jobenayama jtsemn̄ama ch̄engbiama mo bachnangbe can̄ye más uámana am̄endayacá, B̄ngbe B̄tsá jtseimpadánama ch̄engbioye ch̄engbe bacna soȳengama ch̄áuaperdonama, puerte lastemado m̄ená y sempre nt̄samo B̄ngbe B̄tsá tbojauyancá amá. Chca, cha jób̄an̄ese jamama entsanga chamobenama perdonán̄enga jtsemn̄ama, y chca, jobenayama B̄ngbe B̄tsáftaca t̄sabá tempcá jtsemn̄engama.

<sup>18</sup> Y mora cha entsobena, nd̄emuan̄ȳenga bacna soye jamama tojócochengūenga jujabuáchana; cha chca entsobena, er cachánaca tojansufrí, cha bacna soye chaomama Satanás t̄sa yojtsent̄sena ora.

## 3

*Cristo Moisesbiana más uamaná endmëna*

<sup>1</sup> Chiyeca, Jesucristbeyeca catšátanga, Bëngbe Bëtsábenga, ndëmuanyënga Bëngbe Bëtsá tojáchembo chabe entšanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe.

<sup>2</sup> Er Jesús nyets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema.

<sup>3</sup> Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsomerecénana Bëngbe Bëtsá cha puerte bëtsá y uamaná bëtsemnana cháuinñanyëma, nye ntšamo Moisés, canya Bëngbe Bëtsabe entšanguentšá yojanomerecénama.

<sup>4</sup> Ndëmuanyë yébnëncá canye jebuaná jtsebmomnana, pero Bëngbe Bëtsá endmëna nda tojanma lempe ntšamo yobinñcá.

<sup>5</sup> Moisés yojsama ndayá chaotsamama Bëngbe Bëtsá tbojanmandacá, tšabe oservernacá nyetsca Bëngbe Bëtsabe entšángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama.

<sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsa entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y siempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebmomnana puerte oyejuayënga tmojtsemnëse.

*Chë jóchnama uámana luare Bëngbe Bëtsabe entšangbiana*

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrënguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinñyama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnana.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinñyama ndayéntscoñe atše uantado chëngaftaca tsjannama;

chca chënga tmonjanma, masque canta bnëtsana uatëntscuana chënga chentše tmonjáninye chë atše sënjánama bëts soyënga.

<sup>10</sup> Chiyeca, atše chorsca entšángaftaca šonjánetna y sënjánayana:

‘Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,



y ndoñe šmonjábošena jtsiyenana ntšamo atše tsbošcá jtsamëse.'

<sup>11</sup> Chíyeca, atše chëngaftaca etonaná sënjánayana, mo nda cuafjajuracá, chënga ndocna te mochjëftsashjache chë átšeftaca jóchnama uámana luaroye jashjanguama ca" –cha tojánayana.

<sup>12</sup> Jesucrístbeyeca catšátanga, yejuana šmochtsantješna ndocná tšëngaftanguentsá chaondëtsebomna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentsana, chë sempre iuetsemnábentsana chaotsojuánañe.

<sup>13</sup> Chamna, nyetscanga añemo šmochtsatenatsetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguiñe "mënté ca" uabaina tempo. Chca cmontsamna, ndocná tšëngaftanguentsá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená.

<sup>14</sup> Er, ndayá Jesús chabe amëndayoca yobomnentsana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontsé ora monjanamcá.

<sup>15</sup> Ntšamo Bëngbe Bëtsabe uabemana palabrënguiñe endayancá: Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entsanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

<sup>16</sup> ¿Y ndëmuanýënga imojamna, chë Bëngbe Bëtsá tojanëyancá tmojanu-enentsana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga.

<sup>17</sup> ¿Y ndëmuanýëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanýënga entsanga ndoyena luaroca tmojanóbana y chëngbe cuerpo chentše to-janoquedá.

<sup>18</sup> ¿Y ndëmuanýënga tojanëyana, mo nda cuafjajuracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanýënga ntšamo cha tojanmandacá ndoñe tmonjanmënga.

<sup>19</sup> Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

## 4

<sup>1</sup> Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuëtsemna, puerte cuedado mochtsebomna, nderado ndánaca tšëngaftanguentsá ndoñe nanjobenaye chca jashjáchama.

<sup>2</sup> Er bëngnaca chë tsabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tsabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché.

<sup>3</sup> Pero bënga, chë Jesucrístbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá

tojánayana, chë tempo chábioye chca tmojtsanábotengbiama cha mëntśá tojánayana ora:

Chíyeca, atše chëngaftaca etonaná, sënjánayana mo nda cuafjajuracá, ndegombre chënga ndoñe mochjéftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora;

<sup>4</sup> er Bëngbe Bëtsabe uabemana palabrënguiñe cánÿentše mëntśá endayana, chë canÿsëfta tianoye ndayá cha tojanmama:

Bëngbe Bëtsá nÿetsca trabajëngama tonjanochná chë canÿsëfta tianoye ca.

<sup>5</sup> Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiama:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entsanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjéftsashjache chë Bëngbe Bëtsáftaca jóchnama uámana luaroye jashjanguama.

<sup>7</sup> Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canÿe tempo tojuinÿnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguiñe mëntśá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matënjanmëse, Bëngbe Bëtsá bayté chentšana, David yojëftsiyena ora, inÿe tempuama ndoñe matënjanoyebuambá, chë ndaye ora entsanga muanjobenaye chë cháftaca jóchnama uámana luare jashjáchama.

<sup>9</sup> Y chca, cabá endmëna canÿe uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora;

<sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora.

<sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjéftsashjache.

<sup>12</sup> Er Bëngbe Bëtsabe palabra endmëna mo canÿe aina soycá, nÿets tempo entsángbioye ndayánaca jtsabuátambayana, y bëtscá jamana corente obenánaca, y ndocna te nÿe bonamente chë palabra jóyebuambayana. Mo chë nÿets utoicajana más efšana espadëjaquëcá, jobenayana puerta jashenoye jatëtšana canÿe cuerpo tcojatëtše ora, cachcá y cabá puerta más Bëngbe Bëtsabe palábraca, cha bënga jinÿanÿiyana ntšamo bënga nÿe bëngbe ainaniñe

tmojtsejuabná y tmojtsebošcá, y chë ndocnábioye tmonjinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bétsemnana.

<sup>13</sup> Ntšamo Bëngbe Bëtsá tojamentšana tondaye quenátopodena chabiamia iytëmenana jtsemnana. Bëngbe Bëtsá lempe bominÿe iuetsequëcñá, y nÿetsca soyëngama y nÿetscangbiamia lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canÿe soye chca tmojamama.

*Jesús endmëna chë más uámana bachnangbe bëts amëndayá*

<sup>14</sup> Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiamia ibuétseimpadana, mo chë bachnangbe canÿe más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nÿetsca entšángbeñe tmojayana.

<sup>15</sup> Er chë bëngbiamia impadaná, mo bachnangbe canÿe más uámana bëngbe amëndayacá, Jesús, yobena bëngbiamia jóngmiana, bënga inÿe ora ndoñe yapa obenana tmontsebomna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabot-sontšáshjajuanama, jayënjanama bacna soye chaomama, nÿetsca juabnënga ntšamo bëngnaca mondbetsebomncá, pero Jesús ndocna te ndocna bacna soye tonjëftsema.

<sup>16</sup> As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bëts reycá; chca mochjama, bënga chášualastemama, y bëngbiamia tšabe juabna jtsebomnëse, chašújabuachama bënga chca chašojtséjaboto ora.

## 5

<sup>1</sup> Ndëmuanÿe bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuperdonama.

<sup>2</sup> Chë bachna jtsoobenana jóngmiana, chë bacna soyënga amëngbiamia chama ntsetatšëmbcá, y chë bacna soyënga jamama ingñénënga imomnënga, mo otšenëngcá imomnëngbiamia, er cachánaca inÿe ora ndoñe yapa obenana ntsebomnana, chë bacna soyënga jamama juabnëngama jtocochbuáchama.

<sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nÿe entšángbioye bacna soyëngama cháuperdonama, ndayá chábioye chaboperdonámnaca.

<sup>4</sup> Ndocná quenátobena cachá quem uámana trabajo jentsetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá.

<sup>5</sup> Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiamia impadaná, mo bachnangbe canÿe más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntšá tbojanianana:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

<sup>6</sup> Y inÿocnaca, Bëngbe Bëtsabe uabemana palabrënguiñe mëntšá tbojanianana:

Aca nÿetsca tescama canÿe bachna condmëna,

canÿe bëts bachna ntšamo Melquisedec yojamncá ca.

<sup>7</sup> Jesús quem luarentše yojěftsiyeněntscuana, cha juayebuáchěse y shěchbuíyeca Běngbe Bětsáftaca ibnécuentaye y ibnainpadana, cha chě jobanámentšana jatsbocama yojanobená; y Jesús ntšamo Běngbe Bětsá yojanbošcá tojánmayeca y tša respeto chabiana bómnayeca, chábioye tbojanoyeuná.

<sup>8</sup> Chca, Cristo masque Běngbe Bětsabe Uaquiñá inamna, jasúfriase tojanábouinye ntšamo jamana ndayá Běngbe Bětsá tojtsebošcá.

<sup>9</sup> Chca, Běngbe Bětsá chábioye tbojánbema lempe ntšamo entšanga tmojtsajabotcá, nda chěngbe bacna soyěngama cháuatsebacama; chentšana cha, Cristo, tojanma lempe ntšamo yojaniytcá, nyetscanga chě entšanga chábioye imojáněyeunaněnga chamotsobenama nyetsca tescama atsebácaněnga jtsemnama;

<sup>10</sup> y Běngbe Bětsá tbojanábuayana, chě chabe delante sempre běngbiana impadaná, mo bachnangbe canye más uámana aměndayacá chaotsemnama, canye běts bachna ntšamo Melquisedec yojamncá.

### *Resjo endmēna, ošbuáchiyana jtsajbanana*

<sup>11</sup> Bětscá entsemna quem palabrama jóyebuambayama, pero chě soyěnga jayanama ntšamo tšěngaftanga catafjosertaycá, ndoñe paselo quenátsmēna, er tšěngaftangna nya uenana Běngbe Bětsabe soyěngama jósertana.

<sup>12</sup> Tšěngaftanga ya bayté Jesucristbe soyěngama šmotátšěmboyeca, tšěngaftanga cmontsamna ya jtsobenana íněngbioye chě soyěnga jtsabuátambayana; pero tšěngaftanga cmontsějaboto ndánaca Běngbe Bětsabe soyěngama cachiñe chacmětětabuayená, chě jtsošbuáchiyama šmojontsé ora natsana jshauatsjíněyana soyěngama. Y chca, tšěngaftanga šmojobiana mo šešonateměngcá, jtsějabótana létšiyे jofšiyana y ndoñe jobenayana jasana chě jabmuánama ndoñe paselo tontsemna soyěnga.

<sup>13</sup> Chě nyetsca soyěnguiñe ntšamo tšabá yomncá jtsamama buatěmbana soyěnga ndoñe tontsabuatmá cha, jtsemnana mo canye šešonatemcá, nda vida jtsebomnana nye létšiyе jtseftmaněse.

<sup>14</sup> Pero chě tmojtsobena jajuaboyana y jtsetatšěmbuana ndayá tšabá yomna o ndayá ndoñe tšabá jamama, chca jtsaměse tmoyenamna, chěnga jtsemnana mo bětsětsangcá, nděmuaněyenga ndayánaca jasana, chě ndoñe paselo jabmuánama soyěngnaca.

## 6

<sup>1</sup> Chcasna, běnga šontsamna jtsajbanana nye jésebošana jtsatsjěndayana Cristbe buatěmbana soyěnga, chě běnga chábeñe jtsošbuáchiyama tmojanontsé ora tmojanatsjiněyе soyěnga, y šontsamna jtsatsjěndayana chabiana nyetsca soyěnga, más totcá josértama yomna soyěnga. Chca, běnga mochántsemna mo chě bětsětsangcá, ndayánaca jtsesayana. Ndoñe más nye chě natsana buatěmbana soyěngama mattsatsjěndaye, mo chě ndayá yomna bacna soyěnga jtsamana y chě běnga ndoñe vida ntsebomnama junatsana soyěnga amana jtsajbanana, y chě tšabe benache jtishachana; o ntšamo Běngbe Bětsábeñe jtsošbuáchiyana;

<sup>2</sup> chě juabáyana ndayá yomna; chě íněyabe bestšašíñe cucuatšěnga jacjayana Běngbe Bětsábioye chabiana jaimpádama; chě obaněnga jtayenama Běngbe Bětsá yochjamama; y mocna ora ntšamo entšanga tmojamama Běngbe Bětsá yochjayanama, chěnga chě nyetsca tescama yomna tšabe vida chamotsebomnama o nyetsca tescama castigáněnga chamotsemnama.

<sup>3</sup> Y běnga chca fchanjama, chě más totcá yomna josértama soyěnga jtsabuátambayana, Běngbe Bětsá chca chašojálesenciase.



4 Ndēmuanŷenga, canŷe ya chē Bēngbe Bētsabe ndegombre soyēnga tmojanóyēngacñe, y chē Bēngbe Bētsabe ba tšabe soyēngnaca, chábenga bétsemnama, y chē Uámana Espíritu chēngbe ainaniñe chaotsemándama imobomna,

5 y chē Bēngbe Bētsá ntšamo tojašebuachenacá sempre inétsamama tmojinŷe, y ndēmuanŷenga tmojáninŷe Cristo jtsamana bēts soyēnga chabe bēts obenánaca, chē ndaye obenánaca cha puerte bēts soyēnga yochjama cha quem luaroye yochjésabo ora,

6 chēnga Jesucristbeñe ošbuáchiyana lempe tmojtsajbanase, tondaye quenátsmēna ndayá jamama cachiñe Bēngbe Bētsábioye jtobéconama; er Bēngbe Bētsabe Uaquiñá chca stētsoye jaquédana, y jtsemnana mo Bēngbe Bētsabe Uaquiñábioye cachiñe chēnga tmojtsecrucificacá, y entšanga cachiñe cha chamotsáboyejuanama chēnga cuafjamcá.

7 Smochjinŷe: fshantse jamana chē ba uafténēnga chiñe chaómashēnguama, y chē chiñe trabájayēngbiamama bētscá jaja sananga tojóboconēse, Bēngbe Bētsá jamana, chē fshantsentšana bētscá tšabe soyēnga entšangbiamama chaotsebínŷnama.

8 Pero nŷe uchmašēshangá y matēnga uchmēfjangaca chiñe tojuábocnēse, chē fshantse tondaye ntsámanana; y nderado Bēngbe Bētsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chē ošbuáchiyana tmojtsajbananga castigánēnga mochántsemna.

*Bēngbe Bētsábeñe sempre chamotsobátmanama y ainaniñe bētscá añemo chamotsebomnama*

9 Pero masque chca montsoyebuambná, atšbe bonshánēnga, bēnga tšabá fsēndētatsēmbo tšēngaftangbeñe chē más tšabe soyēnga echántsemna, chē atsbocaná jtsemnama tojtsá cha yobomna soyēnga.

10 Er Bēngbe Bētsá sempre ntšamo tšabá yomncá nŷetsca soyēnguiñe jt-samana, cha ndegombre echántsejuabnaye ndayá tšēngaftanga šmojamama, y chē chabiamama šmojinŷinŷé bonshánama, chabe entšángbioye jtsējabuáchanēse, ntšamo mórncama šmojtsama.

11 Pero bēnga fsēntseboše, cada ona tšēngaftanguentšá, nŷets tempo y Jesús chaojésabēntscuana chaotsinŷanŷná corente yoboše chca jtsamama, Bēngbe Bētsábeñe chca jtsošbuáchiyēse, chábeñe sempre chašmotsobátmanama, tšēngaftangbe tšabiamama cha chaomama.

12 Ndoñe queftsátsboše tšēngaftanga oyēnjayēnga chašmotsobiamama chē Bēngbe Bētsá tcmojabanŷé trabajo jtsamama, ndayá Jesucristbeñe ošbuáchiyana bomnēngcá y padecena soyēnguiñe uantado mēnēngcá šmochtsama. Chca, chēnga mochanjóyēngacñe ndayá Bēngbe Bētsá jatšatayama tojašebuachenacá, chabe entšanga bétsemnama.

13 Bēngbe Bētsá Abrahámbioye tbojanšbuachená ora, chca tbojanियana cachabe uabaina jayanēse, er inŷa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama;

14 cha mēntšá tbojanšbuachená: “Aíñe, atše chanjama aca bētscá tšabe bendicionēnga chacotsebomnama, y chanjama acbentša pamillentšana mallajta entšanga chamotsemnama ca.”

15 Y chca, Abraham Bēngbe Bētsábeñe jtsošbuáchiyēse, puerte uantadiñe yojanobátmana ntšamo tbojanšbuachenacá Bēngbe Bētsá yochjanmama, y pronto chca tojanóyēngacñe.

16 Entšanga tmojajurá ora, chca jamana chēngbiamama canŷe puerte más uámanabe uabaina jayanēse, y chca chēngbiamama más uamanabiamama tmojajurá



ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsesnayana.

<sup>17</sup> Y chca, Bëngbe Bëtsá tojánbošena botamana jinÿanÿiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanÿé cha chca yochjanmana, cachabiana jajúrase, chë ntšamo tojanašebuachenacá yochjanmama ndegombre bëtsemnama.

<sup>18</sup> Bëngbe Bëtsabe šbuachenana soye y chama jinÿanÿiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsoberenana jatrócama; y chca tojayana ora, ndoñe ntsopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanÿenama, mo canÿe bëts resjuentsana tmojtsachetëngcá, ntšamo chentsana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šochtsanÿenama mondobátmana.

<sup>19</sup> Mo ntšamo chë béjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántssashatiyiyama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonÿana stëtšoica, Bëngbe Bëtsabe delante jtsemnama,

<sup>20</sup> ndayentše Jesús celoca, Bëngbe Bëtsabe delante tojámashëngo bëngbe tšabiana soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nÿetsca tescama, canÿe bëts bachna ntšamo Melquisedec yojamncá.

## 7

### *Jesús, canÿe bëts bachna ntšamo Melquisedec yojamncá*

<sup>1</sup> Quem Melquisedec yojamna Salem puebloca rey y bachna chë celoca Bëngbe Bëtsabiana; Bëngbe Bëtsá, chë nÿetscangbiana más uamaná. Abraham chë reyënga y chëngbe soldadëngaftaca imojentsjaná y tojanayënjaná chentsana yojsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebonnama chaomama.

<sup>2</sup> Chora Abraham chábioye tbojanatsetá, chë reyëngaftaca imojentsjaná ora, lempe tojanosháchiñentsana, bnëtsanentsana canÿe soye. Chë palabra Melquisedec endayana “nÿetsca soyënguiñe tšabá ama rey ca”; y chánaca yojamna Salem puebloca rey, y chca endayana “nÿetscanga natjëmbana chamotsiyenama ama rey ca”.

<sup>3</sup> Chabe pamíllangbiana tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonÿnama, ni ntseco tojanóbanama; chca, inÿe soyënguiñe cha yojamna mo Bëngbe Bëtsabe Uaquiñacá, y endmëna mo nÿetsca tescama bachna cuaftsemncá.

<sup>4</sup> Y mora, smochjájuaboye tša uamaná Melquisedec inamnana, er bēngbe tempsca uámana bēts taitá Abraham chábioye tbojanatsetá, chē reyēngaftaca imojentsjaná ora lempe tojanosháchiñentsana bnētsanentsana canye soye.

<sup>5</sup> Ntšamo Moisesbe leyiñe endēmandacá, chē bachnangbe más uámana amēndayá Leví, Aarónēnaca ca uabainabe pamillentšana tmomna bachnanga, jtsamnana chē Israeloca entšángbioye nyetsca chē tmobomna soyēnguentšana bnētsanentsana canye soye jtsayēngacayana; y chca jtsamnana masque chē entšanga cachēngbe pamillentšēnga tmomna y Abrahámbentšana pamillentšēgnaca.

<sup>6</sup> Pero Melquisedec, masque Aaronbe pamillentšá ndoñe yonjamna, Abraham, chē ntšamo Bēngbe Bētsá tbojansbuachenacá tojanóyēngacñabentšana, cha tojanóyēngacñe nyetsca soyēnguentšana bnētsanentsana canye soye, y Bēngbe Bētsábioye tbojanimpadá, Abraham bētsá tšabe bendicionēnga chaotsebonnama chaomama.

<sup>7</sup> Y ndocná quenátobena jayanama ndoñe ndegombre yondmēna ca, chē Bēngbe Bētsábioye impadaná ínñabiama tšabe soyēnga chaomama, más uamaná inētsemna chē chca tojóyēngacñabiama, inñya chabiama Bēngbe Bētsábioye tbojainpadá ora.

<sup>8</sup> Quem tempo, bachnanga mochjóbanēnga, entšángbioye jtsayēngacayana nyetsca chē tmobomna soyēnguentšana bnētsanentsana canye soye, pero chē Bēngbe Bētsabe uabemana palabra, Melquisedecbiama endoyebuambná cha mo canya cabá ainá totsomñcá.

<sup>9</sup> Y bēnga montsobena jayanama, Abraham Melquisedécbioye chē nyetsca soyēnguentšana bnētsanentsana canye soye tbojanoyé ora, yojamna mo Leví, chē nyetscángbioye nyetsca soyēnguentšana bnētsanentsana canye soye ayēngacayá, Melquisedécbioye chca cuaftopagacá;

<sup>10</sup> er cha Abrahambe pamillentšá inamna. Melquisedec yojtsabó ora y chábioye chē lempe tojanosháchiñentsana bnētsanentsana canye soye Abraham tbojanatsetá ora, yojamna mo nyetscanga, chē Abrahámbentšana entšanga más chcoye mochtsaniyenēnga, chēngnaca chē bnētsanentsana canye soye cuafjajajocá, masque Abraham chca tojanma ora, Leví y chē Abrahámbentšana inñye entšanga cabá ndoñe tmonjanonñná.

<sup>11</sup> Israeloca entšanga Moisesbe ley tmojanáyēngaca, chē bēts taitá Levibe pamillentšēnga bachnanga imojamnēnga Bēngbe Bētsá imojtseservena ora, y chēnga monjamna Aarónbentšana entšanga. Ntšamo chē leyiñe yomandancá imojánamēnga perdonánēnga jtsemnana y Bēngbe Bētsabe bominñiñe tšábēnga jtsemnana quem bachnanga jamama matmēnjanobenase, ndoñe manjanēyta Bēngbe Bētsá inñye bachna chabuatschembuama, nda ndoñe yonjamna mo chē bēts bachna Aaroncá, ndayá ntšamo chē bēts bachna Melquisedec yojamncá.

<sup>12</sup> Er, canye bachnanga Bēngbe Bētsábioye jtseservēnama tmojajbaná y inñye bachnanga chábioye jaserviama tmojatontsé ora, jtseytana chē natsana bachnanga imojanoservena ora mándaye leyēngnaca jtsetrócama.

<sup>13</sup> Bēngbe Utabná, ndabiama quem soyēnga jtsóyebuambnayana, ndoñe Aaronbe pamillentšá quenjatsmēna, ndayá inñye pamillentšá, y quem pamillentša entšanga ndocna te bachnangcá Bēngbe Bētsá tmonjanservé, chē altar ndirichiñe Bēngbe Bētsabe bēts yebnoca.

<sup>14</sup> Er nyetscanga mondētatsēmo Bēngbe Utabná Judabe pamillentšana bētsemnana, y chē pamíllama Moisés ndocá tonjánayana, Bēngbe Bētsá mo bachnangcá chēnga jtseservēnama.

<sup>15</sup> Y ntšamo tmojayancá montsobena más tšabá josértana, er chē tsēm

bachna Cristo yojamna canya mo Melquisedec yojamncá.

<sup>16</sup> Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca.

<sup>17</sup> Er mëntšá endmëna, ndayá Bëngbe Bëtsá chabiamá tojánayana:

Aca bachna nyetsca tescama condmëna,  
canye bëts bachna ntšamo Melquisedec yojamncá ca.

<sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiamá ndoñe bëtská yonjanoserverna.

<sup>19</sup> Er Moisesbe léyeca, entšanga ndoñe tmonjanobená Bëngbe Bëtsabe bom-inyiñe tšábenga jtsemnama, pero mora chama canye corente más uámana soye montsebonna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chásuabiamama, y chca, Bëngbe Bëtsábioye bënga jtobéconama.

<sup>20</sup> Y Bëngbe Bëtsá lempe chca tojanma, cachabiamá jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana,

<sup>21</sup> pero mo bachnëcá chaoservema Bëngbe Utabnábioye tbojanábuayana ora añe; cach Bëngbe Bëtsabiamá jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrenguiñe endayancá:

Bëngbe Utabná Bëngbe Bëtsá, Jesucristbioye tbojanianyana, cachabiamá jajúrase,  
ntšamo tojanayancá ndegombre chaotsemnama,  
y juabna ndoñe ntjatrócama:

“Aca bachna nyetsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbeyeca bënga corente mondëtatšëmbo, ndayá Bëngbe Bëtsá bëngbiamá jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entšangbiamá tojanašebuachená soyama.

<sup>23</sup> Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtse servénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana.

<sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseserverna, y ndocna te chabe trabajo inyábioye bochanjëftsinyiñiye, chë inya cachcá jtsamama chauatontšema.

<sup>25</sup> Chiyeca, cha yobena nyetsca tescama jätsebacana ndëmuanyënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamá jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamá chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna inyabe contra yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyetscangbiamá cha chaotsemnama.

<sup>27</sup> Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inye bachnangbe más uámana

amëndayënga mondbetsamcá, cachëngbiama y chë judiëngbiámnaca. Cha tojanma lempe ntšamo yojaniytcá canÿe soye y nÿetsca tescama, entšanga bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonÿná ora; y tojanóbana entšanga chamotsobenama perdonánënga jtsemnana.

<sup>28</sup> Ntšamo Moisesbe leyiñe yojanmandacá, chëngbiama mo chë bachnangbe más uámana amëndayëngcá tmojanëbuáyana entšanga inÿe ora bacna soye amënga; pero Bëngbe Bëtsá cabá chë ley entšangbe cucuatšinë tojanáboshjontšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiama jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

## 8

*Cristo, nda jóbanëse tojanma entšanga Bëngbe Bëtsáftaca mo canÿacá chamotsemnana*

<sup>1</sup> Chë más uámana soye ndayama bënga montsichamo, chë Cristo mo bachnëcá yomnana montsoyebuambná ora, entsemna: Bënga chábeñe imojtsebomna canÿa nÿetsca tescama Bëngbe Bëtsabe delante bëngbiama impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentše.

<sup>2</sup> Chë inÿe bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentše nÿets tempo Cristo mo chë bachnangbe más uámana amëndayacá yoservena, entšanga ndoñe chca tmonjanpormá, ndayá Bëngbe Bëtsá.

<sup>3</sup> Nÿetscanga chë bachnangbe más uámana amëndayënga tmojanëbuáyana, entšangbiama soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama.

<sup>4</sup> Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama.

<sup>5</sup> Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentše Jesucristo celoca yoservena luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnana, ndayentše Cristo mo bachnëcá yoservena. Y bënga mondëtatšëmbo quem luarentše chë soyënga chca yomnana, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianyana: “Cuedado cochtsebomna chë atšbiama yebniñe nÿetsca soyënga jamama, ntšamo tcbonjaninÿinÿecá chacomama, chë tjoca bonjamna ora ca.”

<sup>6</sup> Pero bëngbe bachnangbe más uámana amëndayá Cristo, tojashjache canÿe más bëts trabajo jtsebomnana, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiama jamama, bënga tempcá tšabá Bëngbe Bëtsáftaca jtsemnana jtsamëse, puerte



más tšabá endmëna, chë ndayá tempo chabe entsangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

<sup>7</sup> Chë Bëngbe Bëtsá natsana tojanašebuachená soyëngaca matëñjanopodé entsanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canye trato chauátsbemama entsangbiana.

<sup>8</sup> Pero Bëngbe Bëtsá tojáninye ntšamo yojanamncá entsanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiana mëntšá tojánayana:

Canye tempo echanjóshjango, y chora Israel y Judabe pamillentša entsangbiana básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá,

atše chënga sënjanënatse ora, Egiptó luarocana sënjesanëbuacna ora;

pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,

atše cachcá chënga sënjesanënyaye ca, Bëngbe Utabná tojánayana.

<sup>10</sup> Chë Israeloca entsangbiana ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entsanga.

<sup>11</sup> Chë tempo ndoñe queochátsiyta cányënga ínÿënga chamotsabuátambama, cachabe luariñe oyenábioye o cachabe pamillentša entsábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga, corente tšabá atšbe šmochantsábuatma.

<sup>12</sup> Chënga chanjalastemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entsangbiana mora jamama tojašebuachenama tojt-sichamo ora, chca jtsemnana, er cha tojama chë tempo entsangbiana jamama tojanašebuachená soye, mora ya ndoñe chaondëtsoervënama; ndayá mo tanguá soycá tojtsemna y ya ndoñe tontsoervëna, chë soyna nÿe batšatema más y ya jtsopochócana.

## 9

### *Bëngbe Bëtsá jadórama muentša luare y chë celoca luare*

<sup>1</sup> Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše.

<sup>2</sup> Chíyeca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerësiñe, y canye mesësha ndayiñe yojacjana chë luarentše Bëngbe Bëtsá bëtsemnama inÿinÿnaye tandëšënga.



<sup>3</sup> Inye ujonýana entsějua chentsana, inye luare inamna; inauabaina “chë más uámana luare ca”.

<sup>4</sup> Chentše inamna chë castellano altar, incienso jajuinýiyama, y chë cajontema nyetsiñe castellánoca pormánëtema. Quem cajontema yojaninýanýná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inýinýnaye cajontema ca”; y chë tsoye quem soyënga inabomna: canýe castellano jarrëtema, maná ca uabaina tandëseca, chë Bëngbe Bëtsá tojanma celocana chabe entsangbiamama chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga.

<sup>5</sup> Chë cajontema juatsboca imnamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chéntšnaca bëtsemnama. Chënga, chë juatëngmiášhangaca chë cajontémentša nyets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuéscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

<sup>6</sup> Lempe chca tmojanprontantsana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama.

<sup>7</sup> Pero nye chë bachnangbe más uámana amëndayá yojobena chë inye luaroye jamashënguana, y nye canýe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca.

<sup>8</sup> Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inye luaroye jamashjnama, chë “más uámana luaroye”.

<sup>9</sup> Chë soyëngaca jtsopodénana bëngbioye jinýanýiyana, chë tempo, chë Bëngbe Bëtsábioye jadórama yebnentše entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiamama uátšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama.

<sup>10</sup> Chënga, chë uátšëmbona soyëngaca y tmojanóba bayëngaca tmojanma nye ntšamo Moisesbe leyiñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entsangcá Bëngbe Bëtsabe delante jtsatsmënana; nyetsca mandënga nye cuerpama, pero ainanama tondaye ntjamana. Pero chë entsanga chca yojánamna jtsamana, nye Bëngbe Bëtsá inye soyënga, más tšabe soyënga jamama tojaman-dantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiamama impadaná mo chë bëngbe bachnangbe más uámana amëndayacá, chca, bëngbiamama chaotsemnama chë tšabe soyënga ntšamo

mochjoyëngacñecá. Chë luare celoca ndayentse cha Bëngbe Bëtsabe delante mo bachnecá yotrabája, puerte tšabe luare yomna, y chentse cha, ndoñe chë quem luarentse bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama inajuabnaycá. Chë luare ndoñe entsangbe cucuátseca yondëpormana, y chca jtsayanana, quem luarentša soye ndoñe yondmëna ca.

<sup>12</sup> Cha, canye y nyetsca tescama chë luaroye Bëngbe Bëtsabe delante tojanamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbanëse, chabe buiñe juabuáshanëse, cha tojanma entsanga atsebácanënga jtsemnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebmnama chamotsobenama.

<sup>13</sup> Ndëmuanyënga ndayámnaca chë leyama tmojanouedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuëscacjana, y chë altaroca tcojajuinyé ternerbe jatinýa chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentsana, chë bachnanga tmojánayana chënga imojtsobena chë inyëngaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

<sup>14</sup> Ndayá bachnanga tmojanmcá yojanámana entsanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë inyëngaftaca Bëngbe Bëtsábioye jadórama tmojanobenase, jtsachetšá más yojsámana Cristbe buiñe, ndëmuanyëye tojanábuashana bëngbiana cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canye bayá tondaye ndbemaná chë bachnanga cuafjobacá juatšëmbonama, entsangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebmnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

<sup>15</sup> Chíyeca, Cristo jóbanëse tojama entsanga Bëngbe Bëtsáftaca cányiñe mo canyáca chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entsanga chamotsemnama tojáchëmbënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebmna soyënga jóyëngacñama, ntšamo Bëngbe Bëtsá chabe entsanga tojanašebuachenacá.

<sup>16</sup> Ntšamo canye testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama.

<sup>17</sup> Canye testamento tondaye ntsámanana, chë chca jamama tojašbuachená cha cabá ainá totsomñëntscuana; nya cha tojóbana orna aíñe.

<sup>18</sup> Chíyeca chë Bëngbe Bëtsabe natsana trato, entsángbeñe tojanobojaťsé, chora tmojanóba bayëngbe buiñe jabuëscjëse.

<sup>19</sup> Moisés chë leyentša nyetsca mandënga nyetsca entsanga tojanabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshëca enajuabnyëiñe

tojanfchecuacuá, y chora chë leyënga librëshañe tojanbuéscacja, y nyetsca entsángbeñnaca.

<sup>20</sup> Y mëntśá tojánayana: “Quem buiñe entsinýinýná, ntśamo Bëngbe Bëtsá tojamandacá ndegombre yochtsemnama, y tšëngaftangbiamana puerte yochtsámanama ca.”

<sup>21</sup> Moisésnaca buiñe tojanbuéscacja chë jatsjacama opodena yebniñe, y lempe chentśa soyënguiñe, chë ndaye soyënga Bëngbe Bëtsábioye jadórama yojanoserverna.

<sup>22</sup> Er ntśamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntšopodénana entsanga bacna soyëngama perdonánënga chamotsemnama.

*Cristo jasúfriase y jóbanëse, tojanma entsanga bacna soyëngama perdonánënga chamotsemnama*

<sup>23</sup> Chíyeca jtseytana chë Bëngbe Bëtsábioye quem luarentşe jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batśatema jtsinýanýnayana ntśamo chë celoca luare yomnana Bëngbe Bëtsabe delante, ndayentşe Jesús yoserverna. Lempe ntśamo chë Bëngbe Bëtsábioye jadórama luarentşe yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentşe imnétsama soyëngama.

<sup>24</sup> Er Cristo ndoñe tonjánamashëngo canýe luarentşe Bëngbe Bëtsá jadórama nýe entsangbe pormánentşe, ndaye luare nýe batśatema jtsinýanýnayana ntśamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiamana jtseimpadánama.

<sup>25</sup> Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buiñeca, ndoñe cachabe buiñeca, chca, ndayánaca jamama entsanga bacna soyënga tmojamama perdonánënga chamotsemnama. Pero Cristo chë luaroye celoca ndoñe tonjánamashëngo, chentśana jtésebocnama, y chabe buiñe juabuáshanëse cachiñe jatóbanama, y ba soye cachcá chauétsemnama.

<sup>26</sup> Chca tojtsemnëse, Cristbiamana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntśamo tojopasacá entsemna, mora chë quem luare jopochócama tempo yojtsobeco ora, Cristo canýe y nyetsca tescama tojenonýinýé quem luarentśa entsanga bacna soyënga jabuajuánama, chëngbiamana jóbanëse, mo entsangbe bacna soyëngama canýe tmojóba bayá, Bëngbe Bëtsábioye uatšëmbonacá.

<sup>27</sup> Cachcá, ntśamo nyetsca entsanga jtsamnana nýe canýe jóbanama, y chentśana Bëngbe Bëtsá chëngbiamana jayanana chë imojëtsiyenëntscuana ntśamo tmojanmcá tšabá o ndoñe tšabá bétsemnama, y chëngaftaca jamana ntśamo chora tojajuabocá,

<sup>28</sup> cachcá, Crístnaca, nýe canýe chabe derecho vida jtsobomñama cachcá tojanonýá, chabe buiñe juabuáshanëse jóbanama, ba entsanga bacna soyëngama jáperdonama; y chentśana cachiñe yochjésabo, ndoñe bacna soyëngama entsanga jabáperdonama, ndayá chë cha cháuesabama tša tmobátmanënga jabátsebacama.

## 10

<sup>1</sup> Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinÿanÿnayana lempe chë Bëngbe Bëtsá chabe entšanga jatšatayana puerte tšabe soyënga, pero aíñe batsatema jtsinÿanÿnayana ntšamo chë soyënga yochtsemnama. Chíyeca chë mandënga, chë uátšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnama.

<sup>2</sup> Er ndayá tcojtsamama Bëngbe Bëtsabiama uátšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnama matmënjnobenase, chënga chë bacna soyënga tmojanmama ainaniñe ngmënaca ya ndoñe mamënjétsemna, y matmëntsanajbaná soyënga amana chë tmojóba bayëngaca.

<sup>3</sup> Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma;

<sup>4</sup> er chë toronga y chivënga tmojóbanëngbe buiñeca ndoñe ntsopodénana entšangbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojanianana:

Ndoñe tconjábošëna entšanga chacmátšëmbona soyënga, ni tmojobaye bayënga,

pero aíñe tcojama atše canÿe entšacá chaitsemnama.

<sup>6</sup> Ndoñe tšabá quecmátinÿana chë tmojóba y tmojajuinÿé bayënga, entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjanianana: “Bëngbe Bëtsá, muentše sëntsemna, ntšamo aca icobošcá atše chaimama,

ntšamo acbe uabemana palabrenguiñe atšbiamana endayancá, chë ndayá atše chjanmama ca.”

<sup>8</sup> Natsana, Cristo tojánayana, Bëngbe Bëtsá ndoñe tonjánbošëna, ni tšabá tbonjaninÿnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinÿé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojtsamna.

<sup>9</sup> Y chentšana, Cristo Bëngbe Bëtsábioye tbojatanianana: “Muentše sënjabo, chë ntšamo aca icobošcá atše chaimama ca.” Chca, Cristo tojinÿanÿé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninÿanÿé chë ntšamo Bëngbe Bëtsá yobošcá jtsamana, más iuámana chë inye soyënga játamama.

<sup>10</sup> Bëngbe Bëtsá tojama, bënga chabe entšanga y chabe delante tšábënga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtšobomñama cachcá jonÿayëse y entšangbe bacna soyëngama jóbanëse, canÿe y nyetsca tescama.

<sup>11</sup> Judiëngbe nyetsca bachnanga nyets tempo ba soye altarentša natsanoica Bëngbe Bëtsá jtšeservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama.



<sup>12</sup> Pero Jesucristo entsangbe bacna soyëngama tojanóbana ora, yojamna mo canÿe tmojóba bayacá, Bëngbe Bëtsá entsanga bacna soyëngama cháuperdonama; nÿe canÿe y nÿetsca tescama chca tojanma, y chentsana Bëngbe Bëtsabe catsbioica tojtánótbema, canÿe uámana puestentse, jtsemándayama.

<sup>13</sup> Chentse cha yobátmana, Bëngbe Bëtsá chabe obenánaca Cristbe uayayënga chabe cucuatšiñe chamoquedama yochjamëntscuana.

<sup>14</sup> Er nÿe canÿe, entsangbe bacna soyëngama cruzoca jóbanëse, Jesucristo lempe tojama, entsanga chë Bëngbe Bëtsábenga jtsemnama chémbonënga, chabe delante nÿetsca tescama tšabengcá chamotsemnama.

<sup>15</sup> Y Uámana Espíritnaca, Bëngbe Bëtsabe uabenana palabrënguiñe šontsinÿanÿná chca ndegombre bëtsemnama, mëntšá tojánayana ora:

<sup>16</sup> Ndayá entsangbiamá chjama, canÿe tempo chentsana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

<sup>17</sup> Y chentsana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

<sup>18</sup> Chcasna, Bëngbe Bëtsá nÿetsca tescama entsanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuafjobaycá, entsanga bacna soyëngama perdonánënga chamotsemnama.

#### *Sontsamna Bëngbe Bëtsábioye jtobéconana*

<sup>19</sup> Y chca, Jesucristbeyeca catsátanga, Jesusbe buiñe tojanábuashanama y bëngbiamá tojanóbanama, chábeñe jtsošbuáchiyëse, bënga montsobena, tondayama ntjatauatjcá Bëngbe Bëtsabe delante jamashënguama.

<sup>20</sup> Bënga montsobena jamashënguama chë tsëm benachëjana, Cristo bëngbiamá tojamëjana; cha nda inétsama chë nÿetsca tescama yomna tšabe vida chamotsebomnama. Mo chë quem luarentse chë bachnangbe más uámana amëndayacá, chë ujonÿana entsëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entsacá tojanóbanayeca, bëngnaca montsobena Bëngbe Bëtsabe delante luaroye jamashënguama.

<sup>21</sup> Bënga mondbomna canÿe bëts bachnangbe más uámana amëndayá, Bëngbe Bëtsabe entsángbeñe jtsemándayama, y cha endmëna Jesús.

<sup>22</sup> Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcaccá, Bëngbe Bëtsabe delante tšabengcá chamotsemnama cha jaserviama, cachcá, Cristbe buiñe juabuáshanëse y bëngbiamá jóbanëse, bënga ainaniñe corente montsetátšëmbo Bëngbe Bëtsá nÿetsca tescama bëngbe bacna soyëngama šojtsaperdonama. Y bënga béjayeca uabainëngnaca mondmëna; chíyeca bënga jtsobenana Bëngbe Bëtsábioye chca jobéconana.

<sup>23</sup> Bënga šontsamna nÿets tempo Bëngbe Bëtsábeñe puerte jtsošbuáchiyana, y ndocna te nÿe ndayámnaca játajbanana entsángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá.

<sup>24</sup> Bënga šontsamna janguanguana ntšamo muatjobenaye añemo jnatšetayana, nÿetscanga jtsenbobonshánana, y ntšamo tšabá yomncá jtsamana;



<sup>25</sup> pero ndoñe quešnátamna játajbanana, Bëngbe Bëtsábioye jadórama ene-fjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtsenatsetnaye Cristo nyets tempo jtseservénama, y más mora, chë ndayá imojtsonyama, Bëngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyëngama tšabá tmojátatšëmbonentšana y chë soyënga tmojoyeuná chentšana, bacna soyënga jtsamëse tmojtsiyena, nye chca jamama tmojtseboše causa, muattsaboté ndayá Cristo bëngbiamama tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama.

<sup>27</sup> Y chca, ndayá bënga muattsobena jobátmana soye nántsemna nye chë Bëngbe Bëtsábicana castigo, chë ndayama šojtsamna uatjana jtsebomnana; y nye jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñeshca yochtsapochóca.

<sup>28</sup> Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá.

<sup>29</sup> Canya, nyets ainánaca Bëngbe Bëtsabe Uaquiñábioye tbojtsaboté; y tojayana Crístbe buiñe, chë ndémuanyeye tojanábuashana bëngbiamama tojanóbana ora, tondaye yonduámana ca, ndayá nye ndaye entšabe buiñcá ca, chë buiñe chë ndémuanyeye šojtsinyänyná ndayá Bëngbe Bëtsá tbojašebuachenacá bëngbiamama jamama, y ndáyeca Bëngbe Bëtsá chabe entšanga šojábiamama, cha jaserviama; chë entšá Uámana Espíritbioye tbojóyenguango, nda inétsama bënga tšabe soyënga chamotsebomnana; y canya chca amá, ¿tšëngaftanga ndoñe šmontsejuabná cha ibojtsomerecena Bëngbe Bëtsábicana canye puerte más uabouana castigo, chë Moisesbe leyama tondaye yondovalena ca tojayanabiama?

<sup>30</sup> Bënga nyetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiamama echanjayana ntšamo tmojëftsemcá tšabá o ndoñe tšabá bétsemnana, y chëngaftaca echanjama ntšamo chora chaojajuabocá ca.”

<sup>31</sup> ¡Tša uabouana, Bëngbe Bëtsá chë nyets tempo ainabe cucuatšíñe joquédana, castigáná jtsemnana!

<sup>32</sup> Pero ntšamo tempo yojamnana šmochtsenójuabnaye, chë ndegombre soyënga Jesucristbiamama cabá chora šmonjanábuatmana ora, y chora tša jenujuérsana cmonjanotocá padecena soyënguiñe, y chë causa tša šmojansufrí.

<sup>33</sup> Báseftanga tšëngaftanguentšëngbioye entšangbe delante tcmojanoyánguango, y ínÿenga tmojanma puerte chašmotsesufrínama; y ínÿenga tšëngaftanguentšënga chca imojansufrinëngaftaca šmojanama, chënga jujabuáchama.

<sup>34</sup> Tšëngaftanga šmojánalastemana chë chënguentsënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábicana más tšabe soyënga šmojtsebomnana, chë nyetsca tescama šmochtsebomna soyënga.

<sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobátmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnana.

<sup>36</sup> Tšëngaftanga cmontsamna corente uantadënga jtsemnana, padecéniñe chašmojtsachnéjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama.

<sup>37</sup> Er Bëngbe Bëtsabe uabemana palabrënguiñe cha mëntsá tojánayana: Betsco, ndoñe bën, y chë jabama ibomná echanjabo. Ndoñe bën quebochatóbema.

<sup>38</sup> Nye chë ndabiamana atše chaijama atšbe bominyiñe tšabia chaotsemnana, átšbeñe cha betsošbuáchema, cha ndegombre chë nyetsca tescama yomna tšabe vida echántsebomna; pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyējuaye ca —cha tojánayana.

<sup>39</sup> Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnana imojtsajnënga; pero aiñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana mochjashjáchënga.

## 11

### *Bëngbe Bëtsábeñe ošbuáchiyana jtsebomnana*

<sup>1</sup> Ošbuáchiyana jtsebomnana endmëna corente jtsetatšëmbuana, ndayá tmojtsobatmancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnana.

<sup>2</sup> Bëngbe Bëtsá tojánayana bëngbe bëts taitanga tšabá imojánama ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nyetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentsana.

<sup>4</sup> Abel Bëngbe Bëtsábeñe yojanošbuachéyeca, oveshatémënga chábioye tbojanátšëmbona, y chë soye Bëngbe Bëtsabiamana más tšabá yojtsemna, chë ndayá Caín, chabe catšata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtseñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtseñe causa. Y Bëngbe Bëtsabe uabemana palabrënguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse vojyeyenama, y chentšana celoye tbojtsanámbañe.

<sup>6</sup> Pero Bëngbe Bëtsábeñe ntsošbuachiyá, ndoñe quenátopodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabuatmama tša tmobošëngbiamana bëtscá tšabe soyënga chamotsebomnana, mo chábiocana uacanana soyëngcá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamíllanga játsebacama. Cha chca tojanma ora, ošbuáchiyana bómnyayeca, cha tojaninýanýé entšanga tša bacna soyënga

tmojanmama y chë causa castigánënga jtsemnama yojtsamnama. Chabe ošbuachiyánámna Noé tojánashjache Bëngbe Bëtsabe bominyiñe tšabia jtsemnama, y chca entšá jashjáchana, nÿe Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámbioye tbojanchembo, inÿe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatšetayama luaroye, masque Abraham ndoñe yontsetátšëmbo ndëmoye yochjánama.

<sup>9</sup> Bëngbe Bëtsábeñe yojanošbuachéyeca, yojobena mo inÿe luarocana ashjanganocá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jójëngacñama ntšamo Bëngbe Bëtsá Abrahámbioye tbojanšbuachenacá.

<sup>10</sup> Er Abraham corente uantadá yojanobátmana chë canÿe luaroye celoca jamashënguama tempo; chë luare inamna canÿe bëts pueblo, puerte tšabe ucuatjoniñe pormana pueblo, canÿe luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canÿe šešona chabotsebomnama, masque chora ya bëtsanánëjema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canÿe šešona yochtsanbomnama tbojanšbuachená cha, nÿets tempo ntšamo tojayancá amá yojamna ca.

<sup>12</sup> Y chca, quem entšá Abraham, chë šešonga jtsabamnama ya ndobenábentšana, ba básenga tmojanonÿná, tša mallajta mo chë celoca estrellëngcá, y tša chëftanga mo chë mar béjayoca chëñyañentša cascajca, ndocná jacúntama ntjobenayana.

<sup>13</sup> Nÿetsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nÿe achnëjuanëngcá ca.

<sup>14</sup> Y chca tmojtsichámëngna, puerte jtsinÿanÿnayana chënga tša imojtseboše inÿe luaroca joyénanama, canÿe luare cachëngbiana.

<sup>15</sup> Chënga nÿe chë ndayentšana tmojëftsanbocna luarama manjánjuabnase, matmëñjanobená tšabá cachoye jesshéconama.

<sup>16</sup> Pero chëngna canÿe más tšabe luare inmaboše, canÿe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canÿe bëts luare, mo canÿe bëts pueblécá chëngbiana tojanprontá.

<sup>17</sup> Bëngbe Bëtsá Abrahámbioye jinÿama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená:

<sup>18</sup> “Chë ácbentšana entšanga nÿe Isaacbiajana mochanjabo ca.”

19 Abraham corente yojanjuabná y yojátatsëmbo, Bëngbe Bëtsá ndegombre obenana bomná bétsemnama, chë obanënga chámuatayenama jamama. Chíyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentsana chábioye cuaftoyëngacñécá. Y chca, ntšamo Isaácaftaca tojanopasacá, batsá yojtsinýanýnaye ntšamo Jesucrísoftaca yochjanopasacá.

20 Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiamá, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

21 Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básengbiamá, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

22 José Bëngbe Bëtsábeñe yojanošbuachéyeca, ya jóbana ora, tojánayana más chcoye chë Israeloca entšanga Egiptó luarentšana mochjëttsanbocna ca, y tojëttsanmandá ndayá jamana chabe óbana cuérpoca.

23 Moisesbe bëtsetsata Bëngbe Bëtsábeñe ibojanošbuachéyeca, cha tojanonýná ora, unga shinýëntscuana cha tmojtsaniytëme, er chata tbojáninýe cha canýe botamana básetema bétsemnama, y ndoñe tbonjanëuatjaná chë reybe mandama, chë nyetsca judiëngbe basetëmënga boyabásetemënga jtsëbáyana.

24 Moisés Bëngbe Bëtsábeñe yojanošbuachéyeca, ya bëtscá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama.

25 Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entšángaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama.

26 Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

27 Bëngbe Bëtsábeñe yojanošbuachéyeca, Moisés Egiptocana tojëttsanbocna, chë luarentša rey cháftaca chábuetnama ntjatauatjácá. Cha ainaniñe nyets tempo añemo yojtsebomna, y chca yojáninýna mo chë ndocná jinýama ton-dobenacá, Bëngbe Bëtsábioye cuaftsonýacá.

28 Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entšángaftaca yebnëngoye amashjuaniñe buiñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

29 Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñicá; chentsana, chë Egiptoca entšanga cachcá jamama tmojánbošena ora, nyetscanga chiyiñe tojtsanatajo.

30 Israeloca entšanga Bëngbe Bëtsábeñe imojanošbuachéyeca, chë Jericó bëtspueblentša tapiësënga shëconana canýsëfta tentscuama chënga imojánajnentšana, chësënga yojtsáshajaye.

31 Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínýengaftaca, chë bëtspueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentsana ichmónënga tšabá



tojanébuaja, chë jarrepárama tmojánanga ntšámose chë luarentse oyenënga jáyënjanama jobenayama.

<sup>32</sup> Atše sentsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambnayëngcá.

<sup>33</sup> Chënga Bëngbe Bëtsábeñe imojanošbuachéyeca ínÿengbe mandadëngbe entsángbioye tmojanayënjaná, bëtscá imojánama nÿetsca entsángaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

<sup>34</sup> Ošbuáchiyana bómnyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo béntsebomna ora, Bëngbe Bëtsá tojanma bëtš obenana y puerte añemo chamotsebomnama; tmojánashjache bëtš obenana jtsebomnama ínÿenga jáyënjanama, chëngaftaca imojtsentsjaná ora; y tmojanobená ínÿe mandadënga y chëngbe soldadënga jáyënjanama, chamotsachetama jamëse.

<sup>35</sup> Ošbuáchiyana bómnyeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnama.

<sup>36</sup> Ošbuáchiyana bómnyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloye cadenëjuangaca utámenënga joquédamnaca.

<sup>37</sup> Inÿengbioye ndëtšbéngaca tmojtsanatëchënganja, serruchëshaca tmojtsanëjátcacaye, espadéjaca tmojtsanëbaye. Inÿenga imojánajna cánÿentsana ínÿecnoye nÿe oveshá y chivëbe bobáchecha uichëtjonënga, ujabótënga, ainana tsetšanënga, y ínÿengbeyeca mocá borlánënga.

<sup>38</sup> Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentsana ínÿecnoye aniñe, entsanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nÿetsca quem entsanga, ndëmuanÿengbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entsanga jatšatayama tojanašebuachenacá, nÿetsca tescama jtsebomnama.

<sup>40</sup> Bëngbe Bëtsá, bëngbeñe jtsejuabnayëse, tojanjuabó canÿe más tšabe soye bëngbiana jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

## 12

### *Bënga mochtsejuabnaye ndayá Jesús tojanmama*

<sup>1</sup> Chíyeca, bënga mochtsejuabnaye ba entsangbiana, chë bëngbiana más natsana imojaniyenënga, ndëmuanÿenga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe ošbuáchiyana jtsebomnana,



mo chënga ndayá bënga tmojtsamama cuaftsonyàngcá. Chcasna, mo chë tmochamanëngcá, ínÿengaftaca jenÿeyënjanama, chë jashjanguama tojtsemna luaroye natsana jashjanguama, chënga jotjajuamna, chë chorscama nd-uaserverna entšayá jtsenátsejcana, y lempe ndayá tojtsama más uenana chamotjajuama soyëngnaca jtsenójacana; bëngnaca cachcá, ndoñe mat-jaleséncia bënga Crístbioye ndoñe tšabá ndëtsoservénama, ni chë bacna soyënga jamama juabnënga, chë bëngbioye paselo jáyënjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo.

<sup>2</sup> Jesusbiana mochtsejuabnaye, nda šuebënatsana bënga ošbuáchiyana chamotsebomnama, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiana ndoñe canÿe uámana soye yonjamna ca; y chentšana chë uámana puestentše tojtanoítbema, Bëngbe Bëtsabe catšbioica, jtsemándayama.

<sup>3</sup> Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiana oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama.

<sup>4</sup> Tšëngaftanga padecena soyënguiñe šmojachnëngo, entšanga bacna soyënga imojtsama causa, pero mentscoñama ndoñe cmontsamna jóbanama, Crístbe soyëngama enojuerzániñe;

<sup>5</sup> y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mentsá endayana:

Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canÿe nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

<sup>6</sup> Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca —chiñe endayana.

<sup>7</sup> Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canÿe uaquiñá, y chábioye chabe taitá ndocna te buanjuácacana, más tšabá chaot-samama?

<sup>8</sup> Nderado Bëngbe Bëtsá tšëngaftanga ndoñe tcmonjabuayená, ntšamo nÿetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

<sup>9</sup> Y bënga básenga monjamna ora, bëngbe bëtsëtsanga quem luarentše mon-janamana bënga jácastigana, y bënga chëngbioye ndoñe stëtšoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnama, y chca, bënga tšabe vida chamotsebomnama.

<sup>10</sup> Bëngbe bëtsëtsanga quem luarentše, nÿe básefta tescama, bënga jëftsabuayiynayana, y chca jamana chënga tšabá tojtsinÿana ora; pero Bëngbe Bëtsá bënga šojtsabuayiyná ora, siempre chca jtsamana bëngbe tšabiana,

bënga chabe entšanga jábiamama, cachacá puerte tšábenga, ntšamo cha nyëts tempo yomncá.

<sup>11</sup> Sempre bënga ndaye castigo tmojtsebmoma ora, chora bënga chama ndoñe oyejuayënga ntsemnana, pero aïñe cochtsetšenánënga. Pero bënga chë castigüentšana tmojuatsjinÿe ndayá Bëngbe Bëtsá chë sóyeca tbojtsabuayiynacá, as chentšana jóbocnana natjëmbana oyenana, nyëtsca soyënguiñe ntšamo tšabá yomncá jtsamëse.

*Bëngbe Bëtsábioye jtsabotena, entsangbiama ndoñe tšabá ntsemnana.*

<sup>12</sup> Mo nda puerte uamëntšnayacá, jatrabájama tondaye añemo ntjtsebmomncá, tsátšena buacuatšëngaca y puerte uamëntšena ntsamiasëngaca, tšëngaftangbentše báseftanga ya uamëntšnayënga šmojtsemna Bëngbe Utabnabiama trabájayiñe, y ainaniñe ndoñe añemo šmontsebmoma. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbmoma.

<sup>13</sup> Mo chë canÿe benache tšabá y ndericho chaotsemnana tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínÿama, y chë benachentšana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nÿe batsatema ošbuáchiyana y chca jatrabájama nÿe tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinÿanyÿiyëse, y ntjalesenciácá ndocna soye chaotsama chë tšabe benachentšana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyëtscángaftaca natjëmbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservënëse; er chca ntjamcá, canÿa ndoñe ntsobenana Bëngbe Utabnábioye jinÿama.

<sup>15</sup> Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entšángbioye yochjatsataye tšabe soyënga chënga ndoñe chamondashjache. Smochtsantješna, tšëngaftanguentše ndocná chaondëtsemna, mo canÿe untja tbëtëjçá, chë chcaja sayëngbioye jásocayana, nda chaotsama, ínÿenga natjëmbana ainana ndoñe chamondëtsebmomna y bacna soyënga jtsamëse chamotsiyenama.

<sup>16</sup> Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnana, ni canÿa ndabiama Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bëtsemnana, chabe uabentsábioye canÿe šcnena sanama tbojtaname ora.

<sup>17</sup> Y tšëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiama tšabe bendicionënga chaomama, chë mayor uaquiñá bëtsemnana yojanobena jtsebmomna soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binÿniñe luare, tša ibetiñe y puerte jabuache binÿiëngaca;

<sup>19</sup> ni chešmatuena chëngcá, canÿe trompetëfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnana.

<sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtsbéngaca chamotsatëchënjanga jtsóbama ca.”

<sup>21</sup> Ndegombre, ntšamo tmojaninýcá tša uabouana yojtsemna, cach Moisésnaca mëntsá tojánayana: “Tša šontsengmëmná auatjananá sëntsemna causa ca.”

<sup>22</sup> Pero tsëngaftanga Bëngbe Bëtsábioye šmojobeconá, y chca endmëna mo tsëngaftanga canye Sión ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëts puebioye, mo celoca Jerusalén cuenta; y ba uaranga angelëngbioye šmojobeconá, cánýiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama.

<sup>23</sup> Endmëna mo tsëngaftanga chë Bëngbe Bëtsabe entšángbioye cuafjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýëngacñama, ndëmuanýënga Bëngbe Bëtsá chabe librësañe tojúbiamama. Tsëngaftanga šmojobeconá Bëngbe Bëtsábioye, ntšamo nyetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tsëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsiyenëngbe espiritëngbioye, chë entšanga ndëmuanýëngbiamama Bëngbe Bëtsá tojanma chamotsemnama lempe ntšamo chabe entšangbiamama yojanjuabnacá, chca, cháftaca sempre vida jëftsebmomnama.

<sup>24</sup> Tsëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamama cha tojanóbana ora tojanábuashana buiñoye tsëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuëscacjama chë bachnanga imojuamancá. Caín chabe catšata Abébioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnama.

<sup>25</sup> Cuedado šmochtsebmomna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiy-nayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse.

<sup>26</sup> Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nyë quem luare, sinó celócnaca ca.”

<sup>27</sup> Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nyë chë nyetsca tescama yomna soyënga y ndoñe jatrócama soyënga chaoquedama.

<sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinýancá mochtsadorana, chabiamama bëts respeto jtsebmomnëse, y nyetscangbiamama más bëtsá

cha yomnama jtsejuabnayëse.

<sup>29</sup> Er Bëngbe Bëtsá puerte etonaná chë chabiamana nduauenanënga jabuache echanjácastigaye, y chca, cha jtsemnana mo canye íñeshe lempe jtse-pochocamcá.

## 13

### *Ntšamo jtsiyenama, Bëngbe Bëtsá oyejuayá bëngaftaca chaotsemnana*

<sup>1</sup> Sempre nyetscanga šmochtsenbobonshana, Jesucristbeyeca catšátanga quetsomñecá.

<sup>2</sup> Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

<sup>3</sup> Chë utámenëngbiamana sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿënga tmojtsama chamot-sesufrinëngbiamana šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nyetscanga chamotserrespetana; y chë útata chabotsama nye ndayá y nye ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.

<sup>5</sup> Ndoñe šmattsiyena jtsejuabnayëse nye mallajta crocénana jëftsebmomnama. Nye chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.”

<sup>6</sup> Y chca, bënga montsobena corente añémoca jayanama: Bëngbe Utabná endmëna nda atše šonduájabuachana; tondayama quichátauatja.

¿Ndayá canÿe entšá nanjobenaye átšeftaca jamama ca?

<sup>7</sup> Tšëngaftangbe amëndayëngbiamana, chë Bëngbe Bëtsabe buayenana soyënga tmojábuatambangbiamana, sempre šmochtsenójuabnaye. Sempre šmochtsenójuabnaye chë ntšamo chënga imojaniyenentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bétsemnana.

<sup>8</sup> Jesucristo cachá nyets tempo iuétsemna, tempo, mora y nyetsca tescama.

<sup>9</sup> Ndoñe šmatjaleséncia ínÿënga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebmomnana, Bëngbe Bëtsá tšabe juabna bëngbiamana yobómnyeyeca, y ndoñe chë sanama, chë ndayá aíñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiamana tempo tonjanoservé.

<sup>10</sup> Bënga chë Jesucristbeñe mondošbuáchënga, canÿe soye mondbomna mo chë Bëngbe Bëtsábioye jëtschuayama altaroca juinÿëna soycá, bacna soyëngama perdonánënga jtsemnana. Bënga mondbomna chë Jesucristo bëngbiamana tojanma soye, cruzoca tojanóbana ora, bëngbe bacna soyëngama; y chë nye tmojóba bayëngaca soyënga tmojtsama bachnanga ndoñe ntsebmomnana, chë Cristo tojanóbana ora, ndayá tojanmentšana tojanóbocna tšabe soyënga.

<sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe



Bëtsá entsangbe bacna soyëngama cháuperdonama, y chë bayëngbe cuerpënga jtsejuinÿiyana entsanga tmoyena luarentšana chaboca.

<sup>12</sup> Cachcá, Jesúsnaca tojansufrí y tojanóbana bëts pueblentsana chaboca, chabe buiñe tojanábuashana ora jóbanëse, entsanga Bëngbe Bëtsábenga chamotsemnana, y chabe delante mo tšabengcá chamotsemnana.

<sup>13</sup> Chíyeca bënga šontsamna Jesúsbioye jobéconana, nda entsanga tmojtsanaboté y bëts pueblentsana chaboca tojanóbana. Cha mochjuasto, y ntšamo cha tojansufricá bëngnaca mochjasúfria.

<sup>14</sup> Er quem luarentše bënga ndoñe quemátsbomna canÿe bëts pueblo bëngbiana, nÿets tempo chauesomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše.

<sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatšëmboncá. Chcasna, jtsóyebuambnayëse cha mochtsadorana.

<sup>16</sup> Sempre ntšamo tšabá yomncá šmochtsama, y chë šmobomncá inÿengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiana tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiana, ntšamo cmojánanÿenama Bëngbe Bëtsábioye jojuama yojtsamnana chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiana ndoñe nántsemna.

<sup>18</sup> Bëngbe Bëtsá bëngbiana šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse.

<sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciana tšëngaftangaftaca cachiñe jtsatsmënana.

### *Bëngbe Bëtsábioye chëngbiana jaimpádama y chënga jacheuayama*

<sup>20</sup> Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánÿena mo oveshëngbe tšabe abuajënÿacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entsanga jinÿanÿiyama ndegombre bétsemnana ntšamo Bëngbe Bëtsá chabe entsangbiana tojanašebuachenacá nÿetsca tescama jamama.

<sup>21</sup> Cha sëntseimpadana chaoma tšëngaftanga chašmotsebomnana nÿetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucristoftaca chaboma bëngaftaca ntšamo cha tšabá tbojtsinÿancá. ¡Nÿetscanga nÿetsca tescama Cristo chamotsatschuaná! Chca chaotsemna.

<sup>22</sup> Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nÿe básefta palabrëngaca chama tcbonjubuábiana.

<sup>23</sup> Atše sëntseboše tšëngaftanga chašmotsetátšëmbo, Timoteo Jesucristbeyeca bëngbe catšata, ya ndoñe utamená yontsemnana, y cha betsco átšbioye chaojtabëse, átseftaca chanjëftsbetše tšëngaftanga jányama chajjá ora.



<sup>24</sup> Tšëngaftanga ošbuachiyëngbeñe nyetsca amëndayënga šmochjácheuaye, y nyetsca Bëngbe Bëtsabe entšágnaca choca. Chë Italia luaroquënga ošbuáchiyënga tšëngaftanga cmontsacheuaná.

<sup>25</sup> Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

## Santiago

### *Jacheuayama*

<sup>1</sup> Atše Santiago, Bëngbe Bëtsá y Bëngbe Utabná Jesucristbe canye oserverná, tšëngaftanga cbontsëbuabiamná, tšëngaftanga chë bnétsana uta Israeloca bëts pamíllangbioye nyëts luarëjana ujquëshenënga. Atše cbontsacheuaná.

### *Chë Bëngbe Bëtsábiocana osertánana*

<sup>2</sup> Jesucristbeyeca atšbe catšátanga, tšëngaftanga ndaye padecena soyënguiñe chašmojtsiyena ora, chiñe šmochjájua boye mo chca tšëngaftangbe tšabiamna cwaftsemncá y šmochjóyejuaye;

<sup>3</sup> er tšëngaftanga šmondétatšëmbo, chcañe chašmojtsajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebmñese, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse.

<sup>4</sup> Pero chca chašmojtsebmñese, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsebmñama, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondétsabuashebenëse.

<sup>5</sup> Nderado nda tšëngaftanguentšana ndoñe tontsobena corente osertánana jtsebmñama, cha bontsemna Bëngbe Bëtsá jaimpádana cha chaoma aíñe chana jtsebmñama, y Bëngbe Bëtsá chana bochanjátšetaye; er Bëngbe Bëtsá nyëtscanga bëtscá endbëtsatšatnaye y ndocnábioye jatáboyënjana.

<sup>6</sup> Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cwaftsošbuachecá y inye ora ndoñe, cha entsemna mo canye olëshcá, mar béjayoca binjia nye cáatoye jtsambayana.

<sup>7</sup> Chca ama entšá ndoñe chaondëtsejuabná, Bëngbe Utabná bentšana ndayánaca jatóyëngacñama.

<sup>8</sup> Cha jtsemnana canye entšá, mora canye soye juabnayá, pero chentšana inyëtsá jatójuabnañana. Chca, cha jtsiyenana nyëtsca soyëngama uta soye jtsejuabnayëse, y chca cha ndoñe ntsobenana tondaye puerte tšabá jamama.

<sup>9</sup> Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana;

<sup>10</sup> y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaníñe uantšefjushacá, cha ndoñe nyëts tempo quem luarentše ntjëftsiyenana.

<sup>11</sup> Shinye tojábocna y becá tojojënyana ora, chë shácuana jtsebuashana, chë uantšefjúsha jtsátsatšana y chabe uabótamanana ya ndoñe más ntsebinynana. Cachcá chë bomná, echanjóbana nye cachabiamna más becá crocénana onguayiñe chaojtsemna ora.

### *Bacna soye ocochënguentšana tšabá jabocnana*

<sup>12</sup> Oyejuayá chaotsemna chë entšá chë padecena soyënguentšana tšabá tojëtšbocná, cabá Jesucristbeñe ošbuachiyá; chama Bëngbe Bëtsá chabiamna oyejuayá echántsemna y echanjama chë nyëtsca tescama yomna tšabe vida

cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye.

<sup>13</sup> Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama.

<sup>14</sup> Inÿetsá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jésejuabnayana y chë soye jtsasjayana cha chca jamama.

<sup>15</sup> Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacastíga.

<sup>16</sup> Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca.

<sup>17</sup> Nyetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábíocana. Y cha chë shinÿe, juashcona, y nyetsca chë celoca yobuashinÿinÿana soyënga tojamá, nyets tempo nÿe cachá iuesomñe y ndoñe inÿa ntjátsmënana.

<sup>18</sup> Cachá jamama tojánbošenayeca, bënga chábenga šojánabiama, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnama.

#### *Ntšamo ndegombre yomna Bëngbe Bëtsábíoye tšabá jadórama*

<sup>19</sup> Atšbe bonshana catšátanga, quem soyama šmochtsenójuabnaye: nyetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámna.

<sup>20</sup> Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nyetsca soyënguñe tšabá jtsamana.

<sup>21</sup> Chcasna, šmochtsajbaná bacna soyënga jtsamëse oyenana, y amana nyetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

<sup>22</sup> Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmotsenoíngña.

<sup>23</sup> Nda nÿe chë buayenánana tojouena, pero betscó tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuiñe tojtsenonÿacá:

<sup>24</sup> chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnama.

<sup>25</sup> Pero nda ntšamo tojouencá ndoñe tbonjebnatjëmbe, y siempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábíoye ibojtsadorana ca y chë Bëngbe Bëtsábíoye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nyetsca soyënga ntšamo tojtsamcá Bëngbe Bëtsá jadórama, chabíama tondaye ntsámanana.

<sup>27</sup> Bëngbe Bëtsá chë Taitabe bominyiñe, chë puerte tšabe y ndegombre soyënga, ndayá entsá ibojtsemna jamana endmëna: chë uajchonga y viudanga corente ngménënga tmojtsemna ora jujabuáchana, y ndoñe bacna soyënga játamana, mo chë nýe quem luarama enójuabnayënga mondbetsamcá.

## 2

### *Nýetscanga tšabá jtsatenonýayëngana*

<sup>1</sup> Tšëngaftanga, Jesucristbeyeca atšbe catsátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nýetsca entsánga cachcá jtsatenonýayëngana.

<sup>2-3</sup> Nderado tšëngaftanga cányëntse šmojnëfjna, y chora canýe bomna entsá tojáshjango castellano ntšabuchétjonëfjangaca y uámana entsáyéjuangaca bo-pormaná, cha botamana šmojúmashëngo y mëntšá šmojayuana: “Moca quëfseroca mabesótbema ca”. Pero cachca ora, canýe ndbomñëjema tojáshjango uandocuenta entsáyá uichëtjoná, y cha šmojayuana: “Acna choca tsanana cochtsemna o chafjoca mótbema ca”.

<sup>4</sup> Chca tšëngaftanga ya šmontsama cach tšëngaftanguentse báseftanga más uámanënga ínýengbiama chamotsemnama, y chca šmojtsama, ana bacna juabnënga šmojtsebomna causa.

<sup>5</sup> Atšbe bonshana catsátanga, quem soye šmochjouena: Bëngbe Bëtsá quem luarentse ndbomñënga imomñënga tojabacacá, chënga canýe puerte uámana soye chamotsebomnama, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatšatayama tojašebuachená;

<sup>6</sup> pero tšëngaftanga chë cuenta, mo ndoñe cach tšëngaftangcá entsánga bendmëncá chëngbioye jtsënyayana. Ndegombre, chë bomñënga mondmëna chë nýe sempre cmondbétsamëndayënga y chë sjojóana chë pueblentsa mandadëngbioye cmondbáunatsënga.

<sup>7</sup> Y cach bomñëgnaca mondmëna chë Cristbiama podesca oyebuamb-nayënga, ndábenga tšëngaftanga šmondmëna, y chabe uabaina tšëngaftangbiama puerte enduámana.

<sup>8</sup> Bëngbe Bëtsabe uabemana palabrënguiñe mëntšá endayana: “Ndëmua entsánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojtsamëse, tšabá šmochántsama.

<sup>9</sup> Pero tšëngaftanga ndoñe cachcá šmontsenonýase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá.

<sup>10</sup> Y mora, canýe entsá nýetsca chë leyentsa mandënga tojtsobedecena, pero ndoñe tontsama ntšamo nýe mo canýe mando ntšamo iuayancá, cha Bëngbe Bëtsabiama jtsemnana canýa ntšamo nýetsca chë leyentsa mandënguiñe ndoñe yondëlesenciancá amá.

<sup>11</sup> Cach Bëngbe Bëtsá, chë “acbe shema o boyábioye ínýaftaca ndoñe cattseíngñaye ca” tojanayaná, cachá mëntšánaca tojánayana, “ínýabioye ndoñe catjóba ca”. Chca, nda cachabe shëmbioye ínýaftaca ndoñe tbonjaingñé, pero aíñe ínýabioye tbojóba, chca, Bëngbe Bëtsabiama cha jtsemnana canýa nýetsca chë leyentsa mandënga ndocumpliná.

<sup>12</sup> Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entsangcá, er Bëngbe Bëtsá echanjayana ntšamo tmojamcá aíñe o ndoñe tšabá bëtsemnama.

<sup>13</sup> Er chë ínÿengbiamana ndoñe ngménana bomnëngbiamana, Bëngbe Bëtsá ntjong-miacá echanjayana ntšamo tmojamcá aíñe o ndoñe tšabá bétsemnana; pero chë ínÿengbiamana aíñe ngménana bomnëngbiamana, ntšamo tmojamcá aíñe o ndoñe tšabá bétsemnana Bëngbe Bëtsá chaojayana ora, chënga tšabá chentsana mochanjábocana.

*Chë ndegombre ošbuáchiyana, soyëngaca jinÿanÿiyana*

<sup>14</sup> Atšbe catšátanga, ¿ndayama cánÿabioye buanjósérvia jayanana aíñe Jesucristbeñe sëntsošbuaché ca, pero cha ínÿengbiamana tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntsopodénana cha atsbocaná chaotsemnana.

<sup>15</sup> Nderado canÿe boyabása o shembása ošbuachiyá entšayá tbojtsabuáshbena y saná chë te jasámnaca tbojtsebuáshbena,

<sup>16</sup> y canÿa tšëngaftanguentšá tbojauyana: “Diošoftá, sësnama ndoñe chacondétsepadecena y becá chacuatoshachá ca”, pero chca chaotsemnana chábioye tondaye tbonjatšetase, ¿ndayama nantsoservena chca jayanana?

<sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnana jinÿanÿiyama, nÿe chca ošbuáchiyana jtsebomnana tondayama ntsoservénana.

<sup>18</sup> Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiamana tšabe soyënga sëntsama ca.” Chora atše stjojuá: “Sminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.”

<sup>19</sup> Aca condošbuaché nÿe canÿe Bëngbe Bëtsá yomnama y chca tšabá contsama; pero chë bacna bayëjëgnaca chiñe jtsošbuáchiyana, y chë causa chënga uatjana jtsebomnana y jtsangmëmnyayana.

<sup>20</sup> Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtsošbuaché, pero tondaye tontsama chca chaotsinÿnama, chabe ošbuáchiyana tondayama ntsoservénana.

<sup>21</sup> Bëngbe Bëtsá tojánayana chabe bominÿiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaqiñá altariñe jóbama, cach Bëngbe Bëtsábioye jëtschuayama.

<sup>22</sup> Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿnama; y ndayá cha tojanmama entsinÿinÿena, cha ndegombre puerte bëtscá yojanošbuáchema.

<sup>23</sup> Chca tojanopasá ntšamo Bëngbe Bëtsabe uabemana palabrenguiñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

<sup>24</sup> Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿnama, y ndoñe nÿe ošbuáchiyana tojtsebomnana.

<sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanëyentsame, y chentsana tojanëjabuache inÿe benachëjana chamuáisebocanama, chë pueblentša soldadëngbiamana chamotsachetama.

<sup>26</sup> Lempe básefta palabrenguiñe jayanamna mëntšá entsemna: ntšamo canÿe cuerpo, espíritu ndbomna cuerpo, pronto jóbana, cachcá chë



ošbuáchiyana, ndocna soyëngaca tontsemna, chca chaotsinÿnama, ton-dayama ntsoservénana.

### 3

#### *Bichtájaca tšabá jóyebuambayama endmëna*

<sup>1</sup> Jesucristbeyeca atšbe catšátanga, ndoñe yapa buátëmbayënga tšëngaftangeñe chamondëtsemna; er tšëngaftanga ya šmondëtatšëmbo, bënga, chë entšanga abuátambayëngbiama, chë castigo más bëtská yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aíñe o ndoñe tšabá bëtsemnama cha chaojayana ora.

<sup>2</sup> Bënga nÿetscanga nÿetsca bacna soyënga mondbétsama. Nderado nda oyebuambnayıñe ni mo canÿe bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojsobena cachá sempre jtsenomádayama.

<sup>3</sup> Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nÿets chëngbe cuérpoca tmojtsamcá jtsemádayana, y ndoñe nÿe chëngbe bestšaše.

<sup>4</sup> Barquëshamnaca šmochjenójuaboje. Masque tša bëtsëtsacuemëngá y tša jabuache binÿiënga chë barco jtsëjuatsëntšnayana, chë uamanéjayënga chë barco juyambana ndayëjana tmojtsebošcá, y chca, nÿe canÿe base soyetëmaca, timón ca uabainëtëmaca.

<sup>5</sup> Cachcá, chë bichtaja cuerpiñe canÿe base soyetema endmëna, pero chë bichtájaca entšanga jtsenábotamnayana bëts soyënga tmojamama. Smochjouena, canÿe base íñeshe jtsobenana canÿe bëts tjañe juangbotjuama.

<sup>6</sup> Y chë bichtaja endmëna mo canÿe íñeshcá, mo canÿe luare ndayentše puerte bacna soyënga tobinÿncá. Chë bichtaja jtsobenana bëngbe cuerpentše puerte bacna soyënga bëngbiama jamama. Mo canÿe íñeshe becá tojtsendbiamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiama jamama nÿets tempo quem luarentše tmuet-siyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemádayana, bacna soyënga chaotsamama.

<sup>7</sup> Entšá endobena jtsamëndayana nÿetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda;

<sup>8</sup> pero ndocná tonjobená chë bichtaja jtsemádayana, chca, bacna soyënga amana chaotsajbanama. Chë bichtaja jtsamana bëtská bacna soyënga cada te chauëtsebinÿnama, y mo canÿe mëtscuaycá veneno jtsebomnana jóbama, chë bichtájaca cachcá endmëna.

<sup>9</sup> Bichtájaca bënga puerte tšabá Bëngbe Bëtsá y Taitabiama jtsichámuana, y cach bichtájaca bënga puerte bacá entšangbiama mondbétsichamo, masque Bëngbe Bëtsá cachacá enoparecënga chënga tojábiamama.

<sup>10</sup> Cach uayášentšana jtsóbocanana Bëngbe Bëtsabiama tšabe palabrenga y entšangbiama bacna palabrenga. Jesucristbeyeca atšbe catšátanga, chca ndoñe chaondëtsemna.

<sup>11</sup> Canÿe béjaye obocanentšana ndoñe ntsopodénana tšabe búyeshe chaóbocnama y cachentšana untja búyeshnaca.

<sup>12</sup> Ntšamo canÿe higo betiyentšana ndoñe ntsopodénana olivosëšënga jashacama, y canÿe uvas betiyentšana ndoñe ntsopodénana higuëbenga jashacama, cachcá, atšbe catšátanga, tamona búyeshentšana ndoñe ntsopodénana tšabe búyeshe chaóbocnama.

#### *Bëngbe Bëtsábiocana óbocana osertánana*

<sup>13</sup> Nderado tsëngaftanguentše tojtsemna canye puerte tatsëmbuá y osertaná, cha bontsemna, chca yomnama entsanga jinÿanÿiyana, tsabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama.

<sup>14</sup> Pero tsëngaftangbe ainaniñe yapa ínÿabioye šmojtšántšaboše y nÿe ínÿenga chamotjáyana soyënga šmojtšama, as ndoñe šmattsenábotamnaye osertánënga y tsábënga šmomnama, er ndegombre Bëngbe Bëtsabe osertánana tsëngaftanga ndoñe šmontsebomna.

<sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nÿe quem luarama enójuabnayëngbentsana, nÿe entsangbe juabnentšana, y canye bacna bayëjbentsana.

<sup>16</sup> Ndayentše entsanga yapa tmojtšenántšaboše, y nÿe ínÿenga chamotjáyana soyënga tmojtšama, chentše tondayama quemochátenëyeunana y nÿetsca bacna soyënga mochántšama.

<sup>17</sup> Pero chë Bëngbe Bëtsábiocana óbocana osertánana bomnënga, nÿetsca soyamna, natsana puerte tsabe vídaca jtsiyenana, bacna soyëngaca ndëmandánënga; y chënga jtsemnana chë ínÿenga ndoñe chamondëtsentsjanama amënga, tsábënga y sempre jtseprontánana ínÿenga joyaunayama. Y cach quemënga jtsemnana ínÿengbiama ngménana bomnënga, siempre tsabe soyënga jtsamana, cachcá nÿetsca entsángbioye jtšénÿayana, y ntšamo ndegombre tojtsemncá jtsichámuana y jtsamana.

<sup>18</sup> Ntšamo canye jená, botamana shajuana jtsebomnama tsabe jénaye jájena, cachcá, siempre natjëmbana jtsiyenama bošëngna, natjëmbana ínÿengaftaca jtsiyenana, chca, nÿetsca entsanga chamotsamama ntšamo Bëngbe Bëtsabe bominÿiñe tsabá yomncá.

## 4

### *Smochtsiyena Bëngbe Bëtsá tsëngaftangbeñe jtsemándayëse*

<sup>1</sup> ¿Ndayentsana chë tsëngaftanga jtsentsjanayama y jtsenpenzéntsiayama yóbocana? Endóbocana chë tsëngaftangbe bacna juabnënguentsana, nÿe cach tsëngaftanga tsabá jtsomñama; y chë soyënga tsëngaftangbe ainaniñe siempre chë tsabe juabnëngama contra jësemnana.

<sup>2</sup> Tsëngaftanga ndayánaca jtsebomnama šmojtseboše, pero chca jtsebomnama ndoñe šmontsobena, as jtseprontánana ínÿengbioye jtsëbáyama. Inÿa ntšamo tobomncá tsëngaftanga tša jtsántšabošana, y chë soye jashjáchama ndoñe šmontsobena ora, ínÿengaftaca jentjáyanaangana y jtsenpenzéntsiayana. Ntšamo šmojtsebošcá ndoñe ntjobenayana jtsebomnama, Bëngbe Bëtsá chama ndoñe šmondbotjañe causa;

<sup>3</sup> y chë soye šmojtjañe ora, tsëngaftanga ndoñe ntjójyëngacñana, ndoñe botamana chë soye šmondbotjañe causa, er tsëngaftanga chë soye jtsebošana nÿe chaoservema oyejuayënga bacna soyënguiñe jtsomñama.

<sup>4</sup> ¡Tsëngaftanga, Bëngbe Bëtsá bobonshánana šmojtšajbananga! ¿Ndoñe šmondëtatšëmbo, chë jtsebošana nÿe quem luarama enójuabnayëngbe amigo jtsemnana y nÿe quem luarentša soyënga jtsebomnama, chca, canye entsá Bëngbe Bëtsabe uayayá jtsemnana? Ndánaca tojajuabó nÿe quem luarama enójuabnayëngbe amigo jtsemnana, chca, canye Bëngbe Bëtsábioye uayayá jóbemana.

<sup>5</sup> Ndoñe nÿe bonamente Bëngbe Bëtsabe uabemana palabrënguiñe mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espíritu, puerte entseboše nÿe Bëngbe Bëtsá canya bëngbe amëndayá chaotsemnana ca.”

<sup>6</sup> Pero Bëngbe Bëtsá, bëngbe tšabíama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrënguiñe mëntsá endayana: Bëngbe Bëtsá chë nÿe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

<sup>7</sup> Asna, tšëngaftanga šmochtseprontana nÿe Bëngbe Bëtsá chacmot-samëndama; ntšamo Satanás tcmojsamëndacá ndoñe šmattsama, y cha cachora tšëngaftangbentsana echantsachá.

<sup>8</sup> Bëngbe Bëtsábíoye šmochtobeconá, y cha echanjama tšëngaftanga ntšamo cha yomnama chacmotsësertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inÿe ora jtsejuabnayana Bëngbe Bëtsá jtsebbonshánama, y inÿe orna, nÿe quem luarentša soyënga jtsebmnama, šmochtsajbaná bacna soyënga jamama bošana, chca, nÿe tšabe juabnënga tšëngaftangbe ainaniñe chašmotsebmnama.

<sup>9</sup> Tšëngaftangbe bacna soyëngama ngmënaca šmochtsemna, šmochjenóbošachna y cochtsetšenánënga šmochjóyebuambaye. Jatenbiajuayamna, šmochjenóbošachna; y joyejuayëngamna, ngmënaca šmochtsemna.

<sup>10</sup> Bëngbe Bëtsabe delante bëtsëtsanga ndoñe šmattsenobiamnaye, y cha más uámanënga cmochanjábíama.

#### *Inÿengbiamna ndoñe ntsichámuana ndoñe tšabá tmonjama ca*

<sup>11</sup> Jesucristbeyeca catšátanga, ínÿengbiamna bacna soyënga ndoñe šmattsóyebuambnaye. Nda cachabe catšatbíama bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntocumplínana y jtsichámuana chë leyentša mandënga tondayama yontsoservenana ca. Y chë leyama chca tcojtsichámëse, cach ley jocúmplia cuenta, contsobiamná canÿe ichamuá chë ley aíñe o ndoñe yondoservénama, y chca ndoñe quecmátsmëna jtsamana.

<sup>12</sup> Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entšanga tmojamcá aíñe o ndoñe tšabá bëtsemnama ichamuá, y cachánaca entsobena entšanga játsebacama o nÿetsca tescama jácastigama. Y acna, ¿ndase cmëna ndëmua entšabiámna jobenayama jatichámuama ntšamo tojamcá aíñe o ndoñe tšabá bëtsemnama?

#### *Ndayá yëfse yochjatëchnënguama ndoñe ntsótatsëmbuana*

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëts puebloye fchanjanga, y chentše canÿe uata fchanjëftsemna ba soyënguiñe trabájayiñe, y ndegombre beca fchanjónÿena ca.”

<sup>14</sup> ¡Pero ni mo ndayá yëfse tšëngaftangaftaca yochjochnënguama ndoñe quešmátstatsëmbo! Tšëngaftanga ndoñe quešmátstatsëmbo ndayëntscuana vida šmochjëftsebmna, y chca, tšëngaftanga šmondmëna mo canÿe jantšetëshcá, chëshe mora jónÿnana y nÿe ndeolpe jatenatjëmbana. Tšëngaftangaftaca cachá echanjopása.

<sup>15</sup> Tšëngaftanga mëntsá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.”

<sup>16</sup> Pero chë cuenta, tšëngaftanga bëts soyënga šmochjamama sempre jt-senábotamnayana, ndayá tšëngaftanga chašmomama Bëngbe Bëtsá yochjalesenciaca ntsetatsëmbcá; y chca jtsamana ndoñe tšabá quenátsmëna.

<sup>17</sup> Nda tojtsobena ntšamo tšabá yomncá jamama, pero ndoñe chca tonjama, cha canye bacna soye jtsamana.

## 5

### *Chë bomnënga jábuayenama*

<sup>1</sup> ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrínama šmochjenóbošachna y uatjananënga šmochtseyoye!

<sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entsáyëjuangá mejëjonga montsasá.

<sup>3</sup> Tšëngaftangbe castellano y midio tojtsengúsheshe; y chë ngúsheshna echántsinýinýnaye tšëngaftanga chë crocenánaca ndoñe šmonjanmama ntšamo ínýenga jujabuáchama yojamncá; chë causa, nýetsca tescama cmochántsapochocaye, ntšamo chë íneshesha canye soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco.

<sup>4</sup> Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nýets obenana bomná, chë trabajayëngbe chembuanana ya tojouena.

<sup>5</sup> Quem luarentše tšëngaftanga šmondoyena ba botamana soyëngaca y nýe ntšamo cach tšëngaftanga šmobošcá jtsamëse. Ntšamo canye uacná jóbana, minýicá tojtsemna ora, cachcá tšëngaftangbiama entsobeco chë te, ndaye ora Bëngbe Bëtsá echanjama castigánënga chašmotsemnana, er puerta bacna soyënga šmojama. ¡Chë castigo jtsebínýnana tempo ya entsobeco!

<sup>6</sup> Tšëngaftanga, chë puerta tšabá amëngbiama šmojayana jóbanama yojtsamna ca y šmojtsëbaye, chca ndoñe chaondëtsemnana chënga ndocá jamama ntšobencá.

### *Chë uantado jtsemnana y chë Bëngbe Bëtsáftaca jencuéntama ora*

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama.

<sup>8</sup> Tšëngaftangnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo ínýenga tmojtsamama ndoñe nýe šmattsoquejana, Bëngbe Bëtsá tšëngaftangbiama ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entsanga tmojamcá aíñe o ndoñe tšabá bëtsemnana, ya entsebeconá.

<sup>10</sup> Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanýenga entsanga tmonjanabuayená Bëngbe Utabná jótšëmbonëse, chënga bëngbioye šonjëftsaninýanýiye ntšamo tmojansufrima, ntšamo šojtsamna uantadënga jtsemnana tmojtsesufrina ora; y chca tšëngaftanga cmontsamna jtsamana.

<sup>11</sup> Bënga chëngbiama fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerta padecena soyënguiñe yojasufrina ora; y šmondëtatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entsangbiama puerta ngmená yómnyayeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inye soyama. Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe; chca, Bëngbe Bëtsá ndoñe chaondayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama.

<sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtsëjemëngcá amëndayënga jáchembuana, chënga Bëngbe Bëtsá chabiamama chamoimpadama, y Bëngbe Utabná jótšëmbonëse aceitiye chamuanëtjuama.

<sup>15</sup> Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinýena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna.

<sup>16</sup> Chíyecna, chë bacna soyënga šmojtsamama šmochjobuambaye, y Bëngbe Bëtsá nyetscangbiamama šmochtseimpadana, chca, tšabá mo shnanëngcá chašmotsemnama. Canya ndabiamama Bëngbe Bëtsá tojayana chabe bominyiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama.

<sup>17</sup> Bëngbe Bëtsabe juabna oyebuambnayá Elías, mo cach bëngcá canýe entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tsëntsañe ndoñe tonjanafté.

<sup>18</sup> Chentšana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëts cá saná yojsatsbinýna.

<sup>19</sup> Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama,

<sup>20</sup> tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nyetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.



# 1 San Pedro

## *Jacheuayama*

<sup>1</sup> Atše Pedro, Jesucristbe ichmoná, quem tsbuanácha sentsabiamná chë cachëngbe luarentse ndoñe mondoyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama.

<sup>2</sup> Sentsabiamná chë Bëngbe Bëtsá Bëngbe Taitá tojánabacacangiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënana, bacna soyënga abujuanënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebonnama.

## *Bëngbe Bëtsábeñe jtsošbuáchiyëse vida jtsebonnama, atsebácanënga jtsebonnama*

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínëngaftaca yómayeca, tojanma bënga tsëm juábnaca vida chamotsebonnama, bëngbioye bacna soyënga jabujuanase, Jesucristo cháuatayenama tonjánmayeca. Chiyeca bënga montsobena chábeñe jtsošátmanana sempre y nyetsca tescama, ndayá cha šochjátšatayama.

<sup>4</sup> Ndayá bënga šochjátšataycá ndoñe quenátsmëna jëftsopochócama opodena soyënga, ndayá nyets tempo tšabe soyënga. Y bënga mondobátmana jóyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojtsinëna.

<sup>5</sup> Chë soyënga tšëngaftangiama entsemna, Bëngbe Bëtsábeñe šmošbuáchema; cha chabe obenánaca cmondánëna, tšëngaftanga játsebacama. Cha chca jamama ya tojaprontá y echanjínyanýiye, Cristo jésabama tempo chaojóshjango ora.

<sup>6</sup> Chiyeca tšëngaftanga tša oyejuayënga šmojtsemna, masque nderado jtseytana inye ora, nyetsca padecena soyënguiñe jasúfriase chašmuachnënguama.

<sup>7</sup> Mo chë castellanama jtsetatšëmbuama aíñe o ndoñe tšabe castellano tomnama iníñe fjuchnëngcá, padecena soyënguiñe tšabá chašmojachnënguse, Bëngbe Bëtsá echanjínyanýiye tšëngaftanga ndegombre taišmošbuáchema. Chë castellano pronto endbetsopochóca, masque chca, chana puerta endbetsámana. Y tšëngaftangbe ošbuáchiyana chë castellanama puerta más enduámana. Tšëngaftanga padecena soyënguentšana bëtš ošbuachiyánaca chašmojáboçnëse, Jesucristo chaojésabo ora, entšanga mochanjinýe tšëngaftanga šmojtsomerecena chacmotsatacheuanama, más bëtšétsanga y obenënga chácmabiamama y uámanëngnaca.

<sup>8</sup> Tšëngaftanga Jesucristo šmondobonshana, y chábioye ndoñe chešmátaninýe; masque mora cha ndoñe quešmatonýá, tšëngaftanga chábeñe šmontsošbuaché, y šmontsebonna canýe puerta tšabe oyejuayana, y ntsachetšá chana yomnana ndoñe quešmátobena jayanama, tša bëtscá causa.

<sup>9</sup> Chca oyejuayana tšëngaftanga šmontsebonna, er ndayá tšëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacayana.

<sup>10</sup> Bëngbe Bëtsabe juabna oyebuambnayënga ya imojanatsjendá y imojan-guá jtsetatsëmbuama, ntšamo Bëngbe Bëtsá entšanga jätsebacama, y tmojanoye-buambá ndayá Bëngbe Bëtsá tsëngaftanga jatsatayama, tsëngaftangbiana tsabe juabna cha yobómnayeca.

<sup>11</sup> Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochñëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjábemama, Bëngbe Bëtsabe juabna oye-buambnayënga imojanjuabná y imojanatsjendá jtsetatsëmbuama chë soyënga yochjanopása ora, ndaye tempo y ntšamo chë tempo yochtsemnama.

<sup>12</sup> Pero tempo Bëngbe Bëtsá chëngbioye tojaninñanýé, chca jtsamana ndoñe cachëngbe tsabiama yonjamnama, ndayá chca jtsamana yojamna tsëngaftangbe tsabiama. Chënga tmojanoyebuambá, ntšamo chë tsabe noti-ciënga oyebuambnayënga tsëngaftanga tcmojauyancá. Y chca tcmojáuyana chë Uámana Espiritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsabá jinýama, chënga chaósertama.

### *Bëngbe Bëtsá entšanga jtsachembuanana chabe entšangcá chamotsiyenama*

<sup>13</sup> Chíyeca, botamana jtsejuabnayëse tsabá jatrabájama, y cach tsëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjatsatayama tsëngaftangbe tsabiama jtsejuabnayëse, Jesucristo quem luaroye yochjésabo ora.

<sup>14</sup> Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnënga yomncá nýe tsabá jt-somñama, ntšamo Bëngbe Bëtsábioye cabá nduabuatma ora šmonjanbomncá.

<sup>15</sup> Chamna, šmochtsiyena mo chë Bëngbe Bëtsabe entšangcá, puerte tsabe entšangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna.

<sup>16</sup> Er Bëngbe Bëtsabe uabemana palabrenguiñe mëntsá endayana: “Tsëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tsëngaftanga Bëngbe Bëtsábioye šmondbuyana “Taita ca”, šmondbótsëmbona ora. Bëngbe Bëtsabiama nýetscanga cachcá mondmëna. Chíyeca, ntšamo nýetscanga tmojamama tsabá o ndoñe tsabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nýetscangbiana más bëtsá yomnama, chë šmojtsama sóyeca chca jtsinñanýayëse.

<sup>18</sup> Tsëngaftanga šmondëtatsëmbo, Jesucristo, mo nda ínýëngbioye jätsebacama crocénana cuafjëtsjajocá, tonjanóbana tsëngaftanga jätsebacama, chë nýetsca soyënga nýe bonamente jtsamëse oyenentšana, ntšamo jtsiyenama tsëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtsjájuase, mo crocénana o castellancá,

<sup>19</sup> ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe ove-shatemcá, tondaye ndbemaná, ni tsengana ndbomná, Bëngbe Bëtsábioye jëtschuayama altaroca obaná.

<sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšangbeñe tonjábocna tsëngaftangbe tsabiama.

<sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjábema. Mëntśá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebonnama, Jesucristbeyeca catšátangbioye ndegombre jtsababuánÿeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nÿets ainánaca nÿetscanga šmochtsenbobonshana.

<sup>23</sup> Bëngbe Bëtsá tojama tšëngaftanga tsëm vida chašmotsebonnama; pero tšëngaftanga tsëm vida šmontsebonna, ndoñe nÿe quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebonnama y chë palabra ndocna te queochaisopochóca.

<sup>24</sup> Ntšamo Bëngbe Bëtsabe uabemana palabrënguiñe endayancá: Nÿetsca entšanga mondmëna mo shacuancá, y chënga imobomna tšabe soyënga, endmëna mo chë shacuanentša uantšefjushangacá.

Chë shácuana jtsanctana y chë uantšefjushangá jtsatquécjanana; entšanga cachcá, nÿets tempo quem luarentše ndoñe quemochátiyena;

<sup>25</sup> pero Bëngbe Bëtsabe palabra nÿets tempo echanjesomñe ca –chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ínÿenga tcmojabuayenacá.

## 2

<sup>1</sup> Chcáyecna, nÿetsca tescama šmochtsajbaná nÿetsca bacna soyënga amana, ínÿengbioye áingñayana, bacna entšanga chë ntšamo ndegombre šmojuabnacá ndinÿinÿayënga ntsemnana, ínÿengbioye untšabošana, y ínÿengbiana uayátsenayana.

<sup>2</sup> Mo cabá mora onÿnana šešoncá, tša jtsebošana chabe mamabe létšiyë, cachcá tšëngaftanga cmontsamna puerte jtsebošana nÿets tempo Bëngbe Bëtsabe soyënga jtsebonnama, chë soyëngaca Jesucristbeñe corente chašmotsošbuáchema, y chca, atsebácanënga chašmotsemnana;

<sup>3</sup> ntšamo Bëngbe Bëtsabe uabemana palabrënguiñe endayancá: “Tšëngaftanga šmojátatsëmbona Bëngbe Utabná puerte tšabia nÿetscángaftaca yomnama ca.”

### *Cristo, chë mo aina ndëtšbecá endmëná*

<sup>4</sup> Bëngbe Utabnábioye šmochtoconá, nda endmëna mo canÿe aina ndëtšbecá, ndëmuanyëse tojtsama entšanga tšabe vida chamotsebonnama. Báseftanga cha tmojtšaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominÿiñe cha puerte uamaná endmëna.

<sup>5</sup> Chábioye šmochtoconá, tšëngaftanga chë tšabe vida šmojóyëngacñënga, cánÿiñe mo aina ndëtšbéngcá, Bëngbe Bëtsabiana jajebuama canÿe yebnentšama chašmotsemnana; mo Bëngbe Bëtsabiana bachnangcá chašmotsemnana, nÿe Bëngbe Bëtsábioye jtseservénama jtsentšénëse, chábioye jtsatschuanayama. Ntšamo Bëngbe Bëtsábioye jtseservénama šmojtsamcá, chábioye tšabá jtsinÿanana, ndayá Jesucristo tojanmama.

<sup>6</sup> Chca ndegombre endmëna, er Bëngbe Bëtsabe uabemana palabrënguiñe, Bëngbe Bëtsá Jesucristbiana mëntśá tojánayana: Smochjinÿe, atše sënjama Jerusalemntše canÿa chaotsemna,

y cha endmëna mo chë canÿe yebna jajebuámentse chë más bëts uashacuanësentse jajona ndëtšbecá.

Cha atšbe Uabuayaná endmëna, y atšbiana puerte enduámana.

Nda chábeñe tojtsošbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiyëngbiana, nda endmëna mo chë yebna jajebuámentse más bëts uashacuanësentse jajona ndëtšbecá, cha puerte enduámana; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrenguiñe Cristbiana endayancá:

Chë yebna jebuanënga tmontsanaboté ndëtšbé,

mora chë más bëts uashacuanësentse entsejájona ca.

<sup>8</sup> Inÿoca, Bëngbe Bëtsabe uabemana palabrenguiñe mëntšánaca chabiana endayana:

Cha endmëna mo ndëtšbé ndayentse jtsojestjiyamcá;

y mo peñëscá yomna chënga chamotsótsatsama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtserverna bachnangcá, y šmondmëna Bëngbe Bëtsabe entsanga nÿe chabiana jtsetrabájayama, y chë nÿe Bëngbe Bëtsábenga šmonnënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayiyama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca.

<sup>10</sup> Tempo tšëngaftanga ni mo cánÿentša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá aíñe lastemado tšëngaftangftaca entsemna.

### *Bëngbe Bëtsá jtservernana jtseyenana*

<sup>11</sup> Atšbe bonshánënga, ndayentse tšëngaftangbe ndegombre luare yomna, celoca endmëna, y muentse quem luarentse, tšëngaftanga šmondmëna mo ínÿoicana ashjajnëngcá, y mo canÿe luarëjana nÿe achnëjuanëngcá, cach tšëngaftangbe luaroye átaiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzétsiayana, chentse jtsemándayama y Uámana Espíritu ndoñe chaondëtsemándama.

<sup>12</sup> Chë Bëngbe Bëtsábioye nduabuatmëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entsanga cuaftsemnëngcá, chë tšabe soyënga ntšamo tšëngaftanga šmojtšamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nÿetsca entsanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeyca;

<sup>14</sup> y chë tšëngaftangbeñe mandadëngbióynaca, ndëmuanÿënga cha jíchamuana chë bacna soyënga amënga jácastigama, y chë tšabe soyënga amëngbiana tšabá imojtsama ca chamuayanama.



15 Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiana podesca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

16 Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnana ndoñe šmattsejuabnaye nÿe ndaye bacna soye jamama šmojtsovena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá.

17 Nÿetscangbiana respeto šmochtsebomna, chë Jesucrístbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiama jtsejuabnayëse cha chë más bëtsá yomnana, y chë Romoca bëts mandado šmochtserrespetana.

### *Cristo chabe entsanga tojinÿanjé ntšamo yomna jasúfriana*

18 Tšëngaftanga, chë nÿets tempo ínÿabiama canÿe yebnentše oservénënga, tšëngaftangbe nduiñëngbioye šmochtsayaunana, puerte respeto chëngbiana jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbioynaca.

19 Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinÿanana.

20 Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtseufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana.

21 Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiana tonjansufri, y chca cha tcmonjaninÿanjé, ntšamo jamama cmojtsamna, tšëngaftanga chca chašmotsamama.

22 Cristo ndocna te ndocna bacna soye chenáisema, ni ndocnábioye chebnai-seingñé.

23 Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tšabá o ndoñe tšabá yonjamna ca yochjayana ora, chca echanjama nÿe ntšamo chënga tmojamcá jtsonÿayëse.

24 Cristo cruciñe tonjanóbana ora, cha tonjansufri chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnana, y bënga ntšamo Bëngbe Bëtsabe bominÿiñe tšabá yomncá jtsamëse chamotsiyenama. Er Crísbioye chënga tmonjanlisiá chaóbanama y tonjansufri jobanëntscuana, y chca, bënga šonjanatsebacá.

25 Er tšëngaftanga, tempo Bëngbe Bëtsábentsana bënoca šmonjamna, mo ótsena oveshëngcá; pero mora Cristbe benache šmojtishache, y cha cmontsanÿena, mo oveshëngbe canÿe abuaijënÿacá, y cha entsantješna tšëngaftanga tšabá chašmotsemnana.

## 3

### *Ntšamo iuamna chë bouamnëngbioye jtsiyenana*

1 Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana



soyënguiñe ndošbuáchiye boyángbioye chašmobená jáyënjanama, Jesucristbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana,

<sup>2</sup> er chënga mochanjinýe tšëngaftanga šmojtsiyena, Bëngbe Bëtsá nyëtscangbiana más bëtsá yomnama sempre jtsejuabnaye, y ntšamo šmojtsamcá chca yojtsinýinýayeca.

<sup>3</sup> Cach tšëngaftangbiana ndoñe mëntšá šmattsejuabnaye: “Entšanga atše botamaná tsmëna ca chamotsejuabnama atše nýa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”;

<sup>4</sup> ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nýe cach tšëngaftanga uámanënga jenobiamama juabnënga ntsebomncá, pero aíñe ainaniñe tšabe ebionana jtsebomnëse. Chë soyënga Bëngbe Bëtsabe bominiñe puerte enduámana.

<sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsabeñe imojtsanošbuaché y chábeñe imojanobátmana, y nyëtscanga chëngbe boyángbioye imojánayaunana.

<sup>6</sup> Chca yojamna Sara, Abrahámioye ibnayeunana y chábioye “Taita ca” ibojanábobuatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmونتsebomnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtsenýeyuanëse, y cha respeto buajoná chaotsemnana jtsamëse; pero chca, ndoñe nýe cha acbiana más batšá obenana bomná bëtsemnana, ndayá Bëngbe Bëtsá chabiana tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnana.

### *Chë tšabe soyënga amama jasúfriama yojtsamnënga*

<sup>8</sup> Y morna, nyëtsca tšëngaftanga cachcá šmochtsejuabnaye, ínýenga šmochtsalastemana, chë Jesucristbeyeca catšátangbioye šmochtsababuánýeshana, ínýengbiana chacmóngmiaye, y cada ona chaotsejuabná chë ínýenga chabiana más uámanënga imomna ca.

<sup>9</sup> Inýenga tšëngaftangbiana ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábicana tšabe bendicionënga chašmosháchiñama.

<sup>10</sup> Ntšamo Bëngbe Bëtsabe uabemana palabrënguiñe endayancá:

Nda toboše tšabe vida jëftsebomnama y puerte oyejuayá tempënga jtsebomnama, yejuana chaochtsenojuabná bacna soyëngama ndoñe chaondëtsóyebuambnama, y ndoñe chaondëtseboosterama.

<sup>11</sup> Bacna soyënguentšana chaotsojuánañe y tšabe soyënga chaotsama, natjëmbana nyëtscángaftaca jtsiyenama chaotseboše, y chca chaotsemnana sempre chaotsentšena.

<sup>12</sup> Chca bontsemna jamana, er Bëngbe Utabná, chabe bominiñe tšabe soyënga amëngbioye jtsanýenana, chëngbiana sempre jtsantjeshëse;

y sempre chëngbioye jtsayaunanana, chábioye ndayámnaca tmojtsotjanañe ora;  
pero chë bacna soyënga jamana uamanëngbe contra cha jtsemnana ca —chiñe endayana.

<sup>13</sup> ¿Nda nanjobenaye tšëngaftangbiama bacna soyënga jamama, tšëngaftanga chë tšabe soyënga jamama sempre šmojtsentšénëse?

<sup>14</sup> Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatsataye. Chë tšëngaftanga chašmosufrima amëngbiama ndoñe matauatjëngana, ni ainana tsetšenánënga ndoñe matsmënëngana,

<sup>15</sup> ndayá ainaniñe sempre šmochtsejuabnaye Cristbiama mo Bëngbe Utabnacá y chabiama respeto šmochtsebomna; y sempre šmochtseprontana jojuama ndëmuanyënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiama ainaniñe šmobátmanama.

<sup>16</sup> Pero chca šmochjama tšabe ainánaca jtsënjyayëse y Bëngbe Bëtsabiama respeto jtsebomnëse. Smochtsiyena tšabá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tšabá šmotsama ca, chca, ínÿënga tšëngaftangbiama podesca chamojtsoyebuambná ora, tšëngaftanga Crístbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama.

<sup>18</sup> Er Cristo nÿe canÿe tonjanóbana bënga bacna soyëngama jáperdonama; chë nÿetsca soyënguiñe tšabá amá, chë Bëngbe Bëtsabe bominiñe ndoñe tšabá yondmëna soyënga amëngbiama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbomnama.

<sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entsanga imonjamnëngbe espíritënga utámenënga imojamnoye, chëngbiama castigo tojtsemnëntscuana; y cha tojanayënjanama chënga tojanabuayená.

<sup>20</sup> Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entsanga, búyeshe juatsbuacá chë barquësha yojtsámnayeca.

<sup>21</sup> Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiama, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca.

<sup>22</sup> Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiama y espíritënga mando y obenana bomnëngbiama.

## 4

*Entšanga entsamna jtsiyenana ntšamo Bëngbe Bëtsáyobošcá*

<sup>1</sup> Chcasna, ntšamo Cristo tojansufricá, chabe cuerpiñe mo entšacá játsetšenese, tšëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe,

<sup>2</sup> chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entsangbe bacna juabnëngaca, nÿe quem luarentše tšabá jëftsemnana.

<sup>3</sup> Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjaniyena nÿetsca bacna soyënga jtsamëse, jenomándama ntšobencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama.

<sup>4</sup> Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntšobencá; y chë causa, chënga bacna soyënga tšëngaftangbiama jtsóyebuambnayana.

<sup>5</sup> Pero chënga echanjótocaye jayanama ndáyeca chca tmojamama, chë entsangbiama, chë ainënga y chë ya mochjóbanëngbiama, ntšamo tmojamama, aíñe o ndoñe tšabá bëtsemnana jayanama entseprontanabe delante.

<sup>6</sup> Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tšabe noticiëngama chëngbioye monjanabuayiyná, chënga chamobenama chë nÿetsca tescama yomna tšabe vida chëngbe espíritoftaca jtsebomnana, ntšamo Bëngbe Bëtsá yobomncá; masque mora quem luarentše, chëngbe cuerpo tojóbana, er Bëngbe Bëtsá tojayana nÿetsca entšanga yojtsamna jóbanama ca.

<sup>7</sup> Ndoñe bayté y nÿetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama.

<sup>8</sup> Nÿetsca soyëngama, masna, sempre nÿetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama.

<sup>9</sup> Nÿetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá.

<sup>10</sup> Nÿetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë ínÿengbe tšabiama, chë Bëngbe Bëtsá cmojatšatá nÿets obenánaca ínÿengbioye jujabuáchama, nÿets tempo tšabe soyënga jtsamëse.

<sup>11</sup> Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabiajana cuaftsoyebuambnacá; nda ínÿenga tojtsaserverna, chca chaotsama chë Bëngbe Bëtsá yojtsama cha chaotsebomnana obenánaca. Nÿetsca soyënga ntšamo šmojtsamcá chaotsinÿanÿná Bëngbe Bëtsá puerte uamaná y obená bëtsemnana, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nÿets tempo y nÿetsca tescama. Chca chaotsemna.

*Puerte tšabá endmëna, Crístbeñe tcošbuáchema, jasúfriama tbojtsemnëse*

<sup>12</sup> Atšbe bonshana entšanga, ndoñe šmattsenjananaye padecena soyënguñe šmojtsesufrínama; chiñe jtsinÿnana ntsachetšá ošbuáchiyana šmobomnana.

Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnějuanana ca;

<sup>13</sup> chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entsángbeñe chaojtonýná te, tšëngaftanga puerte chašmotsóyejuama.

<sup>14</sup> Puerte šmochtsóyejuaye, nderado nda tcmojoyánguango Cristbiana bëtsoervenayeca, er Bëngbe Bëtsabe Espíritu, chë corente bëtśá endmëná, sempre tšëngaftangbe ainaniñe iuétsemna.

<sup>15</sup> Tšëngaftanguentše ndocná chabondëtsemna jasúfriama inýa óbanaye causa, atbëbanama, bacna soyënga ínýengbiama amama, o ínýengbe soyënguñe ontremeténama.

<sup>16</sup> Pero Cristbe ustoná tomnama tojasufrí, chama ndoñe chaondëtsëuatja; chamna, Bëngbe Bëtśábioye chabotsatschuaná, cha Cristbe ustoná bëtsemnama.

<sup>17</sup> Er chë tempo ya tojobuache, Bëngbe Bëtśá jayanama, cach Crístbeñe ošbuáchiyëngbiama, chabe entsangbiama, tšabá o ndoñe tšabá tmonjamama. Cha chca bëngbiama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojayana ora.

<sup>18</sup> Y chca, chë Bëngbe Bëtsabe bominyiñe tšabá amabiama ndoñe paselo atsbocaná jtsemnama tontsemnëse, ¿ntšamo yochjopáśa chë Bëngbe Bëtśábioye ndoñe adórayënga y chë bacna soye amëngaftaca?

<sup>19</sup> Chcasna, chë imosufrínëngaftaca Bëngbe Bëtśá chca yobóseyeca, entsamna chë tšabe soyënga jtsamana y Bëngbe Bëtsabe cucuatšiñe chëngbe espíritu chamoboshjona cha chaotsinýenama, er cha chënga tojánabiama, y nýetsca soyënguñe tšabe palabra bomná cha endmëna.

## 5

### *Crístbeñe ošbuáchiyënga jábuayenama*

<sup>1</sup> Y mora, chë tšëngaftangbentše ošbuachiyëngcá enefjuanëngbeñe bëtśëjemëngcá amëndayënga chanjabuayená, atše cach tšëngaftangcá bëtśëjema, canýa ntšamo Cristo tonjansufricá tonjaninýa y chama ínýenga tonjanéyana, y canýa ndábioye cach tšëngaftangcá Bëngbe Bëtśá bochjábema más uámana y bëtśá, Cristo entsángbeñe chaojtonýná ora; tšëngaftanga cbabuayená.

<sup>2</sup> Ošbuáchiyënga šmochtsanýena; chënga chašotsanýenama Bëngbe Bëtśá chca tcmojábiana. Chca, chentša ošbuachiyëngbeñe šmochtsama ntšamo canýe tšabe abujëñýa chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtšëtocanama, ndayá chca jamama šmojtsebóseyeca. Chca ndoñe šmatjama nýe paselo crocénana juácanama, ndayá ínýengbioye jujabuáchama tša šmobóseyeca.

<sup>3</sup> Chë cmojtsamna jtsanýenama ošbuáchiyënga ndoñe nýe bëtścá šmattsamëndaye, mo chëngbe nduiñënga cuafjatsmëñëngcá, ndayá ntšamo tšëngaftanga šmojtšiyenama, chënga šmochjínýanýiye ntšamo yojtsamna jtsiyenana.

<sup>4</sup> Chca, chë bënga nýetscanga, mo chë tšabe abujëñýacá šuanýená, quem luaroye yochjésabo ora, mo canýe uabuashinýinýana coronësha ndocna te tontsandbemëshacá, tšëngaftanga canýe bëtś uacanana soye šmochanjóyëngacñe, y chë soye endmëna nýetsca tescama; Bëngbe Bëtśá uámanënga y bëtśëtsanga cmochanjábiana, cháftaca nýets tempo oyejuayënga jtsemnëse.



5 Cachcá, tšëngaftanga chë bobontsëgnaca cbabuayená, sempre šmochtsejuabnaye chë bëtsëjémënga tšëngaftangbe amëndayënga imomnana, y chca šmochtsama. Cada ona tšëngaftanguentsá bontsemna jtsejuabnayana chë ínÿënga tšëngaftangbiana más uámanënga cuaftsemncá, ínÿëngbioye šmojtsaservera ora; er ntšamo Bëngbe Bëtsabe uabemana palabrénguiñe endayanca:

Bëngbe Bëtsá chë nÿe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiana, Bëngbe Bëtsá más tšabe juabna entsebomna ca.

6 Sempre šmochtsejuabnaye Bëngbe Bëtsá chë más bëtsá nÿetscangbiana yomnana, y nÿets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora.

7 Nÿetsca soyënga ndayama šmuenócochinÿenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánÿena.

8 Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

9 Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama yojtsamnana jtsetatšëmbëse.

10 Pero tšëngaftanga baseftayté chašmojasufri chentsana, Bëngbe Bëtsá cmochanjábiana nÿetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnana; Bëngbe Bëtsá, chë bëngbiana tšabe juabna bomná, bënga nÿetsca tšabe soyënga šonjatsatá, y nda bënga šojáchembo nÿetsca tescama bëtsétsanga jtsemnana, chca echanjama.

11 Cha nÿets obenana nÿets tempo y nÿetsca tescama chaotsebomna. Chca chaotsemna.

### *Jtadiósoftanama*

12 Silvano, ndabiana sëndëjuabná atšbiana canÿe tšabe palabra bomná Jesucristbeyeca catsata yomnana, cháftaca quem base tsbuanácha tbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

13 Ošbuáchiyënga muentše átseftaca montsemnënga cmontsacheuaná. Chënga quem bëts pueblentše mondoyena bacá uamana entšángaftaca, mo chë tempo, Babilonia bëts pueblaca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiana mo uaquiñacá endmëná, chánaca cmontsacheuaná.

14 Nÿetscanga Jesucristbeyeca catsatangcá šmochjenchuaye, jtenámochëse tša šmojtsenbobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmomnënga, nÿetscanga ainaniñe tšabe ebionana chašmotsebomnana.



## 2 San Pedro

### *Jacheuayama*

<sup>1</sup> Atše Simón Pedro, Jesucristbe oservená y chabe ichmoná, quem ts-buanácha sentsabiamná tšëngaftangbiamá, ndëmuanÿenga šmojashjache jtse-bomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

<sup>2</sup> Atše sëntseimpadana, tšëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe ben-dicionënga tšëngaftangbeñe chaotsemnama y chaoma tšëngaftanga ainaniñe tšabe ebionana chašmotsebomnama.

### *Chë Jesucristbeñe ošbuáchiyëngbe tšabe soyënga*

<sup>3</sup> Bëngbe Bëtsá chabe obenánaca tojama bënga chamobená jtsebom-nama, lempe ntšamo tmojtsëjabotcá tšabe vida jtsebomnama y jtsiyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y u-a-maná bëtsemnama y bëtš soyënga jamëse, chabe entšanga chamotsemnama.

<sup>4</sup> Chca, Bëngbe Bëtsá šojatšatá ntšamo bënga jatšatayama to-janašebuachenacá, bëtš y uámana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnëngaca jtsiyenama yapa boše causa. Chánaca chë tšabe soyënga šojatšatá, tšëngaftanga cháftaca cánÿiñe mo canÿacá chašmotsemnama, cachacá jtsemnama jashjáchëse.

<sup>5</sup> Chca, ndoñe quenátšmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama;

<sup>6</sup> chora bëtscá šmochtsama cach tšëngaftanga jenomándama chašmotsobenama; y chca, tšëngaftanga masque padecena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tšëngaftanga Bëngbe Bëtsá šmojtsadoránama jinÿanÿiyama; y

<sup>7</sup> chca, nÿetsca tšëngaftanga ošbuáchiyënga chašmotsenbobonshana; y chca, nÿetsca entšanga chašmotsababuánÿeshana.

<sup>8</sup> Tšëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oservena soyënga jtsamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama.

<sup>9</sup> Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebo-juánama, y Bëngbe Bëtsabe delante cachiñe tšabá chaotsatšmënama tojamama.

<sup>10</sup> Chíyeca, Jesucristbeyeca atšbe catšátanga, nÿa šmochtsentšena chca tšabe soyënga jtsamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná.

<sup>11</sup> Chca, Bëngbe Bëtsá oyejuayá tšëngaftangbiamá echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

<sup>12</sup> Chcáyecna, atše sëntsejuabná tšëngaftangbioye sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtseyena, chë mora šmojtsetátšëmbo soyënguiñe.

<sup>13</sup> Sëntsejuabná, chajjëftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiynayëse.

<sup>14</sup> Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá;

<sup>15</sup> pero bëtscá chanjëftsema, atše chajjóbana chentsánënaca tšëngaftanga nyëts tempo chë soyëngama chašmotsenójuabnama.

### *Cristo corente uamaná y obená yojamnama tmojáninýe ora*

<sup>16</sup> Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entsangbe osertanánaca pormana cuentëngaca, er cach bënga botamana fsënjáninýe chabe uámanana y obenana.

<sup>17</sup> Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábocana oyebuambnayanana Jesúsbioye mëntšá tbonjanianya ora: “Mua atšbe bonshana Uaquiñá endmëna, atše chabiamana sëntsoyejuá ca.”

<sup>18</sup> Cach bënga chë oyebuambnayanana fsënjanuena, chë celocana tonjanóbocnana, er bënga Bëngbe Utabnáftaca fsënjánmëna, chë uámana tjoca.

<sup>19</sup> Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabréngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanëshaca canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyëtsca soyënga cmochanjínýanýiye, mo tšëngaftangbiamana canýe tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá.

<sup>20</sup> Pero natsana chacmësertá, ndocna palabra Bëngbe Bëtsabe uabemana palabrénguiñe tojayana canýe soye yochjopáca ca, cabá chca ndopáca ora, nyë cach Bëngbe Bëtsabe juabna oyebuambnayëngbe juabnentšana tojanóbocnana;

<sup>21</sup> er Bëngbe Bëtsabe juabna oyebuambnayënga ndoñe monjanoyebuambná nyë chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

## 2

### *Chë ndoñe ndegombre soyënga buátëmbayënga (Jud 4-13)*

<sup>1</sup> Chë Bëngbe Bëtsabe juabna oyebuambnayëngbe tempo, Israeloca entsángbeñe baseftángnaca imojamna, ndëmuanýënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga mochántsbuatambaye, pero ndegombre soyëngaca cánýiñe, chca, chënga chca imojtsabuátambama entsanga ndoñe chamondëtatšëmbonama. Chë

buatëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnana, cha nda chënga tojatsebacá, mo nda ínÿenga játsebacama crocénana cuafjëtsjajocá. Y chca, nÿe ndeolpe, chë Bëngbe Bëtsábiocana uabouana castigo nÿetsca tescama mochántsebomna.

<sup>2</sup> Banga chëngbioye mochantsësetona, nÿetscna bacna soye, jenomándama ntsobencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama.

<sup>3</sup> Chënga bëtscá crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nÿetsca tescama chaotsemnámna.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infernoye tojtsanatsatše y puerte ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiana nÿetsca tescama castigo chamotsebomnama yochjayana orscama.

<sup>5</sup> Y cach ndoñe quem luarentša entšángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnana, chë nduauenana y bacna entšanga jtsapochócama. Chentšana, nÿe Noébioye, tbojanatsbocá, nda entšanga yojanabuayiyná ntšamo jtsiyenana, Bëngbe Bëtsabe bominyiñe tšabá yomncá jtsamëse; cha y ínÿe canÿsëftangnaca tojanatsebacá.

<sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëts pueblentša entšanga, yapa bacna entšanga imojamnama, bëts castigo jtsebomnama yojánamnama; y íñesheca tojtsanapochocá, chë pueblënga y chentša entšanga jatinyá jtsabiamëntscuana. Y chë sóyeca Bëngbe Bëtsá tojaninÿanyé ntšamo bacna entšángaftaca yochjama, chë chentšana mochtsiyena bacna entšangbiana.

<sup>7</sup> Pero Bëngbe Bëtsá Lótbioye tbojanatsbocá, chë bëts pueblënga pochócaentšana. Cha yojamna Bëngbe Bëtsabe bominyiñe tšabá amá, y ntšamo chë luarentša entšanga imojaniyenama, nÿetscna bacna soye jtsamëse, jenomándama ntsobencá, cha puerte ngménana inabomna.

<sup>8</sup> Er quem tšabe entšá, chëngbeñe oyená, chë entšanga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasufrina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentsana y bacna soyënga jamama juabnënguentsana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nÿetsca tescama chë bëts castigo chamotsebomnama jamándama.

<sup>10</sup> Chca ndegombre endmëna, y más chë ndëmuanÿenga nÿe cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátsenanënga mondmëna y jtsebošana nÿe ntšamo cachënga tmojtsejuabnacá chaotsemnana, y ndoñe ntsauatjana chë espíritënga obenana bomnëngbiana puerte bacna soyënga jtsóyebuambnayama.

<sup>11</sup> Chamna chë angelënga, masque más añemo y obenana bomnënga mondmëna, ndoñe jenñémuana chë espíritënga obenana bomnëngbiana chca

jayanama, chëngbiama ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

<sup>13</sup> Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojttesá ora, tšëngaftangbiama ouatjca jtsemnana y chëngbe causa, ínÿenga tšëngaftangbiama podesca mochántsicamo, er chënga chentše oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsoberenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuachiyana bomnënga jtsaíngñayana, y sempre jtsentšénana nÿe más soyënga jésebošama y jésebomnana, ínÿenga tmobomnana más soyënga jashjáchama; chënga montsemna pochocánënga jtsemnana.

<sup>15</sup> Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juacánama ínÿengbiama bacna soyënga jtsamëse;

<sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsošservénana, y chca, chënga jtsemnana mo búyeshe obocantše tojtsebuashjca; y chënga mora canÿe soye jtsejuabnayana y chentšana inÿetšá; chca chënga jtsemnana mo jantšetëshënga bëtš bínÿiaca bonjnëshëngcá. Chëngbiama Bëngbe Bëtsá tojayana castigo chamotsebomnana, chë más ibetoca, tondaye binÿiñe luarentše.

<sup>18</sup> Chënga ba botamana palabrëngaca jtsenábotamnayana, pero tondayama ntsošservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntsošbencá.

<sup>19</sup> Chë abuátambayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnëngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca.

<sup>20</sup> Er ndëmuanÿënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnëngaca, chënga mora más bacá tempscama jabocanana.



<sup>21</sup> Chëngbiama más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominyiñe tšabá yomncá inétsamama, chë soye jatabuátmanana y chentsana játajbanana chë buatëmbana soyënga y chë abuayiynayëngaftaca chëngbioye Bëngbe Bëtsá tojanoyé mandënga jtsoberdecénana.

<sup>22</sup> Pero chëngaftaca tojopasá ntšamo entšanga mondëntsayancá chca ndegombre bëtsemnama: “Chë queše chabe ashconánana tojtsemnoye jeshëconana ca” y “chë cotše cabá chora bebená, ngüichetsoye jana jetsójanduouoyama ca”.

### 3

#### *Jesucristo quem luaroye jésabama ora*

<sup>1</sup> Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nýe ena tšabe soyëngaca chaotsemnama, y chca chaotsemnamna atše jtsabuayiynayëse chë tcmojanabuatambá soyëngama.

<sup>2</sup> Atše sëntseboše tšëngaftanga chašmotsenojuabná, ntšamo chë inýe tempënga ora, chë nýe Bëngbe Bëtsábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nýe cachënga tšabá jtsomñama bacna juabnéngaca, y cmochantsëbuayajuana, chë Cristo yochjésabama šmošbuáchema.

<sup>4</sup> Chënga mëntšá mochántsihamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšétsanga, ndémuanýëngbioye cha tojanašebuachená quem luaroye jésabama, ya tmonjóvana, y quem luarentše lempe cachcá endesomñe, ntšamo quem luare tojanobojatšé orscana enjamncá ca.”

<sup>5</sup> Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentsana y búyesheca;

<sup>6</sup> y cach búyeshecnaca, chë uabouana uaftenentša bėjayeca, ya bayté yojtsemna, cha lempe quem luarentše yojanbinýncá tojtsanpochocá.

<sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenátópodena chamotsepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nýetsca tescama castigo chamotsebonnama jamándama tempo candóshjanguëntscuana. Chora Bëngbe Bëtsá, celoca y quem luare íñesheca echantsepochóca.

<sup>8</sup> Pero, atšbe bonshánënga, canýe soye endmëna y chë soye ndoñe chacmondëbnëtjomba: Bëngbe Utabnabe juabnama, canýe te endmëna mo canýe uaranga uatcá, y canýe uaranga uata mo canýe tecá.

<sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betscó yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nýetsca tescama castigo chaondëtsebonnama, ndayá nýetscanga bacna soyënga amana jtsajbanase, Bëngbe Bëtsabe tšabe benache chamuashjáchama.



<sup>10</sup> Pero Bëngbe Utabná echanjésabo ndocná chama chaondëtsejuabná ora, mo canye atbëbanacá jashjanguana, ndocná chama tontsejuabná ora. Chora celoca echanjopochóca, canye jabuache shauenanánaca, y quem luare ndaye soyënguentshana yomnana íñesheca echántsefjatëjo, y ndayá Bëngbe Bëtsá y entšanga quem luarentše tmojamcá, lempe echántsejuinye.

<sup>11</sup> Lempe chca japochócama entsémnayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga,

<sup>12</sup> tšëngaftanga chë Jesucristo quem luaroye jésabama chaóshjanguama šmojtsobatmanëntscuana; y nya šmochtsentšena cha más betscó cháuesabama. Chë te íñesheca celoca echántsejuinye, y ndaye soyënguentshana quem luare yomnana cach íñesheca echántsefjatëjo.

<sup>13</sup> Pero bënga mondobátmana ntšamo cha šojašebuachenacá: canye tsëm luare, mo canye tsëm celoca y tsëm fshantscá, y chentše nyetscanga mochantsiyena ntšamo Bëngbe Bëtsabe bominyiñe tšabá yomncá jtsamëse.

<sup>14</sup> Chiyeca, atšbe bonshánënga, chë soyënga chaotsemnama šmojtsobatmanëntscuana, nya chiñe šmochtsentšena, chca, cha yochjésabo ora, chacmanýena oyeniñe tšabá Bëngbe Bëtsáftaca jtsatsmënëse, ínýengaftaca natjëmbana jtsiyenëse; chacmanýena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca.

<sup>15</sup> Quem soye šmochtsejuabnaye: Bëngbe Atsebacayá ndoñe yapa betscó tonjésabësna, chca jtsemnana cha puerte uantado nyetscángaftaca yómnyayeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnama. Cach quem soyëngámncá, Jesucristbeyeca bëngbe bonshana catšata Pablo tcmonjanëbuábiamá, chë Bëngbe Bëtsá tojanma cha chaotsebomnama oser-tanánaca.

<sup>16</sup> Chë soyëngama, Pablo nyetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínýënga, y chë mora canye soye jtsejuabnayana y chentšana ínýtšá juabnayënga, jtsejuabnayana y ínýengbiöye jtsabuayinyayana ndoñe ndegombre yondmëna ca. Y cachcá jtsamana ínýe soyëngaca, Bëngbe Bëtsabe uabemana palabrénguiñe. Chca chënga montsajna pochocánënga jtsemnama.

<sup>17</sup> Chiyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínýenga jáingñama, tšëngaftanga ndoñe chašmondëtsemna mo uambanëngcá, ndoñe chašmondétsajbanama jtsebmomnana chë Bëngbe Bëtsabe soyënga ntšamo šmojashjachcá.

<sup>18</sup> Pero atšna, Bëngbe Utabná y Atsebacayá Jesucristo sëntseimpadana, tšëngaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nyetscanga cha chamotsatschuaná, mora y nyetsca tescama! Chca chaotsemna.

# 1 San Juan

*Cristo, chë nyetsca tescama yomna tšabe vida entšanga chamotsebomnama amá*

<sup>1</sup> Bënga cbontsëbuabiamná chë Bëngbe Bëtsá ndabiajana inétsoyebuambnabiama, chë nyetsca tescama yomna tšabe vida entšanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašéngaca chabe oyeuambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo.

<sup>2</sup> Cha bëngbentše tonjanonýná y fsënjáninyë; chíyeca bënga chabiama cbontsëtsëtsná y cbontsabuayiyná, nda sempre vida yobomna y nda chë nyetsca tescama yomna tšabe vida entšanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanýé.

<sup>3</sup> Bënga tšëngaftanga cbontsabuayiyná ntšamo tifjinýe y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucrísoftaca.

<sup>4</sup> Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

*Bëngbe Bëtsá endmëna chë entsangbiama binýnayá*

<sup>5</sup> Mëntsá entsemna ntšamo Jesucrístbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna.

<sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá.

<sup>7</sup> Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buiñeca, Bëngbe Bëtsá bëngbe bacna soyënga sempre šochántsabuanayaye, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe;

<sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanýiye cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye.

<sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

## 2

*Cristo, bëngbe obuauyayá*

<sup>1</sup> Tšëngaftanga mo atšbe basengcá, er atše tcbonjanéjabuache Jesucristbe tšabe noticiënguiñe chašmotsošbuáchema, quem soyënga cbontsëbuabiamná

bacna soyënga ndoñe chašmondëtsamama. Pero ndánaca Crístbeñe ošbuachiyënguentsá bacna soye tojamëse, bënga canye obuauyayá Bëngbe Bëtsabe delante montsebmoma, y cha endmëna Jesucristo, chë nyetsca soyënguiñe tšabá amá.

<sup>2</sup> Jesucristo tonjanóbana ndoñe nye Bëngbe Bëtsá bënga chásuaperdonama bëngbe bacna soyëngama, ndayá quem luarentša nyetsca entsángnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama.

<sup>4</sup> Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjójyëngacñe.

<sup>5</sup> Pero nda ntšamo Bëngbe Bëtsá ibuamëndacá tojtsama, jtsinýanýnayana chabe ainaniñe Bëngbe Bëtsabiama corente bonshánana yomnana, y chca, mochántsetatšëmbo bënga sempre cánýiñe mo canýacá cháftaca imomnana.

<sup>6</sup> Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojéftsiyecá.

### *Canye tsëm mando*

<sup>7</sup> Atšbe bonshana entsanga, ntšamo mora cbontsëbuabiamnacá, ndoñe canye tsëm mando quenátsmëna, pero aíñe canye tempsca mando; entsemna cach tšëngaftanga Crístbe ústonënga šmonjanobiama ora šmonjanójyëngacñe mando. Quem tempsca mando entsemna ntšamo tšëngaftanga bëngbentšana šmonjouencá.

<sup>8</sup> Pero masque chca endmënëse, quem cbontsëbuabiamná soye tšëngaftangbiama echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tšëngaftángnaca cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binýnáyá ya entsebuashinýinýana.

<sup>9</sup> Nda tojayana chë binýnayáftaca yojtsemna ca, pero cha chabe catsátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá.

<sup>10</sup> Nda chabe catsátbioye tbojtsebobonshana, cha chë binýnayáftaca jtsiyenana, y tondaye queochátsmëna cha bacna soye chaotsamama.

<sup>11</sup> Pero nda chabe catsátbioye tbojtsáboyënja, cha bacna juabnënga jtsebomnëse jtsiyenana, mo canýa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca.

<sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëngnaca cbontsëbuabiamná, er tšëngaftanga ya chë nyetsca bacna soyënga mandayá Satanás šmonjayëñaná.

<sup>14</sup> Básenga, tšëngaftanga tcbonjubuábiana, er tšëngaftanga chë Taitá ya šmonjuábuatmana. Taitanga, tšëngaftanga tcbonjubuábiana, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tcbonjubuábiana, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre

tšëngaftangbe ainaniñe šmondëjuabná, y chë nyetsca bacna soyënga mandayá šmonjayënjaná.

<sup>15</sup> Ndoñe matsbošana oyejuayënga jtsemnana nye quem luarentša soyëngaca, ni nye chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábiöye bondbobonshana.

<sup>16</sup> Er chë nye quem luarama enójuabnayënga mëntsá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošcá; yapa jtsebošana nye ndayá tmojatinye soye; y yapa jtšenábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nye chë quem luarama enójuabnayëngbentsana.

<sup>17</sup> Pero quem luare echanjopochóca y nyetsca chentša soyënga, chë entšanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebomna.

### *Chë Cristbe contra yomná*

<sup>18</sup> Básënga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama.

<sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tmonjabacacá, y cha tonjama chë Uámana Espíritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondëtatšëmbo.

<sup>21</sup> Atše cbontsëbuabiamná, ndoñe chë ndegombre soyëngama ndoñe šmondëtatšëmbuama, ndayá aíñe šmotatšëmbuama; er tšëngaftanga šmondëtatšëmbo chë ndegombre soyënga y ndoñe ndegombre soyënga cányiñe jtsemnana ndoñe yondopodénama.

<sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiamna ndoñe ntsejuabnayana cha chë Taitá bëtsemnana.

<sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cányiñe mo canyácá ndoñe ntsemnana. Pero nda entšángbeñe tojayana, Cristo aíñe Bëngbe Bëtsabe Uaquiñá endmëna ca, chana aíñe chë Taitáftaca cányiñe mo canyácá jtsemnana.

<sup>24</sup> Tšëngaftanga, chë Cristbe ústonënga šmojanóbiamna orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cányiñe mo canyácá šmochántsemna.

<sup>25</sup> Y quem soye entsemna ntšamo Cristo šojëftsasëbuachená: chë nyetsca tescama yomna tšabe vida jtsebomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiamna chašmotsetatšëmbuama.

<sup>27</sup> Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebomna, y ndoñe



quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabuatambacá jtsiyenëse, Crísoftaca cánÿiñe mo canÿacá šmochtsemna.

<sup>28</sup> Y mora básenga, Crísoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnama y ndoñe chamondëtsëuatjama, bënga chabe delante chamojtsemna ora.

<sup>29</sup> Tšëngaftanga šmontsetátšëmbo Jesucristo nÿetsca soyënguiñe tšabá amá yomnama. Chcasna, cmontsamna jtsetatšëmbuana, nÿetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnama.

### 3

#### *Crístbeñe ošbuáchiyënga, Bëngbe Bëtsabe básenga*

<sup>1</sup> Menójuabonga, ntsachetšá Bëngbe Bëtsá chë Taitá šondábabuanÿeshanama. Chabe bonshánana tša bëtscá endmënyeca, bënga šondëubuabuatma chabe básenga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnama, er chënga cha ndoñe tmonjanábuatmana.

<sup>2</sup> Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnama, aíñe mondëtatšëmbo, Jesucristo chaojabáisebocna ora bënga cachacá mochtsemnama, er bënga mochanjobenaye jinÿyama ntšamo cha ndegombre yomncá.

<sup>3</sup> Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá.

<sup>5</sup> Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canÿe bacna soye ndoñe yondbomnama.

<sup>6</sup> Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnama.

<sup>7</sup> Atšbe básenga, ndocná chacmondaingñé: nda nÿetsca soyënguiñe tšabá tojtsama, cha canÿe tšabá mándbomna entšá jtsemnana, ntšamo Jesucristo yomncá;

<sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nÿa quem soyama tojabo: chë Satanásbe soyënga jabëtsepochochocama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse.

<sup>10</sup> Corente jtsotatšëmbuana ndëmuanÿyënga Bëngbe Bëtsabe básenga imomnama y ndëmuanÿyënga Satanásbe básenga; ndëmuanÿyëngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.



*Nyetscanga jtsenbobonshánana*

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiama orscana: nyetscanga šontsamna jtsenbobonshánana.

<sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucrístbeyeca atšbe catšátanga, ndoñe šmattsenjnanaye chë nye quem luarama enójuabnáyënga cmojtsébuayënjama.

<sup>14</sup> Bënga mondétatšëmbo, bënga tempo monjaniyena chë nye quem luarama enójuabnáyënga mondoyencá, y chca, Bëngbe Bëtsabiama mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnama, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbioye mondábabuanÿeshana. Nda chabe catšátbioye ndoñe tbonsebomnshana, cha cabá mo obanacá jtsiyenana.

<sup>15</sup> Nda cachabe catšátbioye tbojtsáboyënja, cha jtsemnana mo entšanga obanayacá. Y tšëngaftanga šmondétatšëmbo entšanga obanayá ndoñe ntsoberenana jtsiyenana, chë nyetsca tescama yomna tšabe vida chabe ainaniñe jtsebomnëse.

<sup>16</sup> Ndayá chë jtsenbobonshánana bëtsemnana mëntšá montsetatšëmbo: Jesucristo chabe derecho vida jtsebomñama cachcá tojanonÿá y bëngbiama tojanóbana; cachcá bënga šontsamna jtsemnana, sempre jtseprontánana chë Jesucrístbeyeca bëngbe catšátangbiama jóbanama.

<sup>17</sup> Canÿa bomnana tojtsebomna y catšátbioye uajabotá tbojtsonÿá, pero chabiama ndoñe tbonjongmé y ndoñe tbonjuájabuache, cha ndoñe ntsoberenana Bëngbe Bëtsabiama ainaniñe bonshánana jtsebomnana.

<sup>18</sup> Atšbe básenga, ndoñe quešnátamna nye bëngbe catšátanga imuababuánÿeshana ca jatichámuana, y nye chë bonshánama jatóyebuambnáyana; pero ndegombre šontsamna ndayánaca jamana, chca, jinÿanÿiyama, bënga ndegombre ínÿengbiama imuababuánÿeshanama.

*Bëngbe Bëtsabe delante natjëmbana ainánaca entšanga*

<sup>19</sup> Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinÿena, Bëngbe Bëtsábioica jtsemnana merecido ndoñe mondbuájona ca tmojtsejuabná ora; y bëngbe ainana natjëmbana Bëngbe Bëtsabe delante echántsemna.

<sup>20</sup> Bënga chca bëngbe ainaniñe tmojtsejuabná ora, bënga montsobena natjëmbana ainana jtsebomnana, er Bëngbe Bëtsá corente jtsotatšëmbñana ntšamo bëngbe ainana yomnana, y cha lempe yotatšëmbo.

<sup>21</sup> Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsobenana añémoca jtsemnana y tondayama ntsauatjcá Bëngbe Bëtsabe delante jtsemnana.

<sup>22</sup> Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibuamandacá y ndayá chabe bominÿiñe tšabá yomncá.

<sup>23</sup> Y chabe mando endmëna: bënga chabe Uaquiñá Jesucrístbeñe jtsošbuáchiyana, y bënga nyetscanga jtsenbobonshánana ntšamo Jesús šojëftsamëndacá.

<sup>24</sup> Ntšamo Bëngbe Bëtsá tojëftsemandacá amënga, Bëngbe Bëtsáftaca cánÿiñe mo canÿacá jtsemnana, y cha sempre chëngaftaca cánÿiñe mo canÿacá echanjëftsemna. Y quem sóyeca bënga montsobena jtsetatšëmbuana cha

bëngaftaca iuétsemnama: Uámana Espíritu bëngbe ainaniñe cháumashënguama cha tojama.

## 4

### *Chë Bëngbe Bëtsabe Espíritu y chë Cristbe uayayabe espíritu*

<sup>1</sup> Atsbe bonshana entsanga, nyetscanga chë Bëngbe Bëtsabe juábnaca imoyebuambná ca ichámëngbioye ndoñe šmattsayaunana; botamana šmochjuarrepára corente jtsetatšëmbuama chënga aíñe o ndoñe chë Bëngbe Bëtsabe juábnaca imóyebuambnama. Quem tempo banga Bëngbe Bëtsabe ndoñe ndegombre juabna oyebuambnayënga quem luarëjana mondajna. Chë causa tsëngaftanga cmontsamna botamana chëngbiamna juarrepárana.

<sup>2</sup> Chë Bëngbe Bëtsabe Espíritu ndegombre imobomnëngbiamna tsëngaftanga mëntsá šmontsobena jtsetatšëmbuana: nda tojayana Jesucristo quem luaroye aíñe entsacá tojánabo ca, cha ndegombre chë Bëngbe Bëtsabe Espíritu yojtsebomna.

<sup>3</sup> Pero nda ndoñe chca Jesucristbiamna tonjayana, cha Bëngbe Bëtsabe Espíritu ndoñe yontsebomna; inyetsá, chana chë Cristbe contra yomnabe espíritu yojtsebomna. Tsëngaftanga šmojouena chë espíritu yochjabama; pero ndegombre cha ya quem luarentše entsemna.

<sup>4</sup> Atsbe básenga, tsëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tsëngaftangbioye chacmaingñema, er chë nyets tempo tsëngaftangbe ainaniñe vida endbomná, chë nye quem luarama enójuabnayëngbe ainaniñe mándayabiamna más obená endmëna.

<sup>5</sup> Chë Bëngbe Bëtsabe ndoñe ndegombre juabna oyebuambnayëngna chë nye quem luarama enójuabnayënguentsana mondmëna, chíyeca chënga nye quem luarentša soyëngama jtsóyebuambnayana, y chë nye quem luarama enójuabnayënga chënga jtsayaunanana.

<sup>6</sup> Pero bënga Bëngbe Bëtsábenga mondmëna. Nda Bëngbe Bëtsábioye tbojtsabatma, bëngbioye jtsayaunanana; pero nda Bëngbe Bëtsábioye ndoñe tbontsabatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiamna, y nda chë ín'yëngbioye jáingñama ama espíritu yobomnabiámna.

### *Chë bonshánana Bëngbe Bëtsábocana yóbocana*

<sup>7</sup> Atsbe bonshana entsanga, chë bonshánana Bëngbe Bëtsábocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inye entsángbioye tojtsababuán'yeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabatmana.

<sup>8</sup> Nda ndoñe chca tontsebobonshana, cha Bëngbe Bëtsábioye ndoñe ntsábuatmana, er Bëngbe Bëtsá bonshanánaca nyetsca soyënga jamana.

<sup>9</sup> Bëngbe Bëtsá šonjin'yanyé bënga šuababuán'yeshanana, cha chë nye canye Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tescama yomna tsabe vida chamotsebomnama.

<sup>10</sup> Bëngbe Bëtsabe bonshánana mëntsá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuan'yeshanayeca, y chabe Uaquiñá tbojanichmó, cha jóbänëse, bënga bëngbe bacna soyëngama perdonánënga chamotsemnama.

<sup>11</sup> Atsbe bonshana entsanga, Bëngbe Bëtsá chca šuababuán'yeshana; chcasna, bëngnaca šontsamna nyetscanga jtsenbobonshánana.

<sup>12</sup> Ndocná ndocna te Bëngbe Bëtsábioye tbonjinýe. Bënga nyetscanga tmojtsebobonshánëse, Bëngbe Bëtsá nyets tempo bëngaftaca echántsemna, y chabe bonshánana puerte bëtsá bëngbeñe echántsemna.

<sup>13</sup> Bënga mëntsá montsobena ndegombre jtsetatšëmbuana bënga Bëngbe Bëtsáftaca imomnama y cha bëngaftaca: cha tonjanma chabe Espíritu bëngbe ainaniñe cháuamashënguama.

<sup>14</sup> Y cach bënga fsënjinye y entšanga fsëntsëtsëtsná, chë Taitá chabe Uaquiñá tbojichmoma, quem luarentša entšanga jabátsebacama.

<sup>15</sup> Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánýiñe echántsemna y Bëngbe Bëtsánaca sempre cháftaca cánýiñe mo canýacá.

<sup>16</sup> Chcase bënga montsetátšëmbo y montsošbuaché ndegombre Bëngbe Bëtsá bënga šuababuánýeshanama. Bëngbe Bëtsá nyetsca soyënga bonshanánaca jamana y nda Bëngbe Bëtsá y chë inýe entšanga sempre tojtsababuánýeshana, cha Bëngbe Bëtsáftaca cánýiñe mo canýacá jtsemnana y Bëngbe Bëtsánaca sempre cháftaca cánýiñe mo canýacá.

<sup>17</sup> Chca, Bëngbe Bëtsabe bonshánana puerte bëtsá bëngbeñe echántsemna, bënga bëts añémoca y tondayama ntsauatjá chamotsemnama, chë tšabá o ndoñe tšabá tmonjamama entšangbiama jayanama Cristo yochjésabo orscama; er bënga Jesucrísoftaca cánýiñe mo canýacá jtsemnëse, quem luar-entše mondmëna ntšamo Jesucristo endmëncá.

<sup>18</sup> Nda Bëngbe Bëtsá y chë inýe entšanga tojtsababuánýeshana, tondayama ntsauatjana; bënga corente tmojtsebobonshana ora, ndoñe ntsopodénana uatjana jtsebmomna. Canýe entšá tojtsauatja ora, jtsemnana mo chabe castigo ya cuafjobojatšecá. Chca, nda uatjana tojtsebmomna, Bëngbe Bëtsábioye y chë inýe entšanga cha ndoñe corente yondábabuanýeshana, ntšamo Bëngbe Bëtsá bënga šuababuanýeshancá.

<sup>19</sup> Natsana Bëngbe Bëtsá šojánababuanýeshana, y chíyeca bënga, cha y chë inýe entšanga imuababuánýeshana.

<sup>20</sup> Nda tojayana: “Atše Bëngbe Bëtsábioye sëndbobonshana ca”, pero cachca ora cachabe catsátbioye tbojtsáboyënja, cha canýe bostero jtsemnana. Canýa aíñe jtsobenana chabe catsáta jinýama; y cha chë catsátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinýama ndoñe ntsoobenana.

<sup>21</sup> Y bënga quem mando chábertšana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

## 5

### *Chë Jesucristbeñe ošbuachiyá endobena Satanasbe soyënga jayënjanana*

<sup>1</sup> Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canýe taitábioye tbojtsebobonshana, chë taitabe uaquiñábioynaca cha jtsebobonshánana.

<sup>2</sup> Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánýeshanama.

<sup>3</sup> Bënga Bëngbe Bëtsábioye imobobonshánama quem soyiñe jtsinýnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama.

<sup>4</sup> Nda Bëngbe Bëtsabe uaquiñá tomna, chana jáyënjanana quem luarentša entšanga y soyënga ntšamo Satanás yomandacá. Quem luarentša entšanga

y soyënga ntšamo Satanás yomandacá, Crístbeñe bënga imošbuachéyeca montsobena bënga jayënjanana.

<sup>5</sup> Nye nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jayënjanana; ndocná más.

*Bëngbe Bëtsá tojinÿanÿé ntšamo chabe Uaquiñabiama ndegombre yomncá*

<sup>6</sup> Cach Jesucristo endmëna nda quem luaroye tojánabo y mëntšá tojanenonÿinÿé: búyeshca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonÿinÿé nye búyeshca, ndayá búyeshca y buiñeca. Cach Uámana Espíritu entsobena jayanana chca ndegombre bëtsemnama Jesusbiamá, er chë Espíritu endmëna chë sempre ndegombre oyebuambnayá.

<sup>7</sup> Endmëna unga soyënga, ndayá iuinÿanÿná ntšamo ndegombre yomncá Jesusbiamá:

<sup>8</sup> Espíritu, búyeshca y buiñe; y chë unga soyënga lempe cachcá Jesusbiamá jtsinÿanÿayana.

<sup>9</sup> Bënga mondbëtsejuabnaye, ndayá entsanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá.

<sup>10</sup> Nda Bëngbe Bëtsabe Uaquiñábeñe tojtsošbuaché, cha chca nyëts tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canÿe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca.

<sup>11</sup> Ntšamo Bëngbe Bëtsá chabe Uaquiñabiama tojayancá mëntšá entsemna: Bëngbe Bëtsá bëngbiamá tojama chë nyëtsca tescama yomna tšabe vida chamotsebomnama; y quem vida chabe Uaquiñábeñe entsemna.

<sup>12</sup> Nda Bëngbe Bëtsabe Uaquiñáftaca cánÿiñe mo canÿacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánÿiñe mo canÿacá ndoñe tontsemna, cha chë nyëtsca tescama yomna tšabe vida ndoñe ntsebomnana ca.

*Inÿe soyëngama jábuayenama y jtadióšoftanama*

<sup>13</sup> Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyëtsca tescama yomna tšabe vida šmojtsebomnama.

<sup>14</sup> Bënga bëts añémoca y ndauatjca Bëngbe Bëtsabe delante mondmëna, er bënga mondëtatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama.

<sup>15</sup> nderado ndayá chca Bëngbe Bëtsábioye tmojtsotjanañe ora, cha bënga jayaunayana; bënga mondëtatšëmbo chca ndegombre yomnama, y chca, bëngnaca montsetátšëmbo, ndayánaca chábioye bënga chamojtjañcá cha šochjátatayama.

<sup>16</sup> Nda cachabe catšátbioye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyëtsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canÿe bacna soye endmëna, y chca tojamama canÿa ndoñe ntsobenana perdonaná jtsemnana, y chca, cha jabocnana canÿa nyëtsca tescama castiganá

chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca.

<sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canya tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondétatsëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onýnaná chábioye jtsinýenana, y Satanás, chë nyetsca bacna soyënga amëndayá, tondaye ntsobenana chábioye jabórlana.

<sup>19</sup> Bënga mondétatsëmbo, bënga chë Crístbeñe ošbuáchiyënga Bëngbe Bëtsábenga imomnana, y chë quem luarentša inye entšanga Satanasbe cucuatšiñe imomnana.

<sup>20</sup> Bëgnaca mondétatsëmbo Bëngbe Bëtsabe Uaquiñá tojabama, y cha iuama bënga osertánana chamotsebomnana, chë ndegombre Bëngbe Bëtsá yomná jtsabuatmama. Bënga chë ndegombráftaca cánýiñe mo canýacá mondmëna, bënga chabe Uaquiñáftaca cánýiñe bëtsemnayeca. Cha chë ndegombre Bëngbe Bëtsá endmëna, y nda chë nyetsca tescama yomna tšabe vida entšanga chamotsebomnana iuamá.

<sup>21</sup> Atšbe básenga, ndoñe šmattsadorana cach entšangbe pormana soyënga, chë ndayama ínýenga mondbétsejuabnaye diosënga yomna ca.



## 2 San Juan

### *Jtsiyenana ndegombre soyëngaca y nyëtscanga jtsenbobonshánëse*

<sup>1</sup> Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanýenga atše ndegombre sëndábabuanýeshana. Y ndoñe nyë atše chënga quetsátababuanýeshana, ndayá nyëtscanga chë Bëngbe Bëtsabe ndegombre soyënga uabuátmëngnaca.

<sup>2</sup> Atše cbontsababuanýeshana, chë ndegombre soyënga bëngbe ainaniñe mondbómnyeyeca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebmoma. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguëntše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse.

<sup>5</sup> Y mora, uámana mamá, cbontseimpadana Diosmanda nyëtscanga chamotsebmobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando.

<sup>6</sup> Bënga, Bëngbe Bëtsá y chë inýe entšanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inýe entšanga jtsababuánýeshanëse.

### *Chë entsángbioye áingñayënga*

<sup>7</sup> Quem luarëjana banga entsángbioye áingñayënga mondajna, y chënga jtsejuabnayana Jesucristo quem luaroye ndoñe mo canýe ndegombre entšacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná.

<sup>8</sup> Chëngbiama cuedado šmochtsebmoma. Ndoñe chcase, tsëngaftanga ndoñe quešmochátsbmoma chë Cristbiama cach tsëngaftangbe trabajuentsana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana.

<sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye.

<sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### *Jtadiósoftanama*

<sup>12</sup> Atše ba soyënga sëntsebmoma tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyëtscánggaftaca jencuéntama, chca, bëngbe oyejuayana puerte bëtscá chaotsemnana.

<sup>13</sup> Crístbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

### *Juan Gaybiamá puerte tšabá tojanoyebuambá*

<sup>1</sup> Atše chë bëtsëjema, quem tsbuanácha atšbe bonshana amigo Gaybiamá sentsabiamná. Chábioye atše ndegombre sëndbobonshana.

<sup>2</sup> Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguiñe chacotsemnama y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiamá bëtsá tšabe juabnënga chentše jtsebonnëse.

<sup>3</sup> Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtsá sëntsoyejuá.

<sup>4</sup> Tondaye jamana atše nyetsá oyejuayá chaitsemnama, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiamá ndayánaca tcojtsama ora.

<sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiamá trabájayënga; chcasna, chëngaftaca cochjama ntšamo chënga chama merecido imobuajoncá.

<sup>7</sup> Chca cochjama, er chënga chëngbe pueblënguentsana tmojëftsebecana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentsana.

<sup>8</sup> Chíyeca bënga šontsamna chëngbiamá jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

### *Diótrfes ndoñe tšabá tonjanma; Demetrio aíñe*

<sup>9</sup> Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiamá, pero Diótrfes ndoñe yontsuenana ntšamo atše sentsichamcá, er cha yojtseboše chë ínÿengbioye nye jtsamëndayana.

<sup>10</sup> Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnama immétsenefjuana luarentšana yojtsatëbuacana.

<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnama.

<sup>12</sup> Jesucristbeñe ošbuáchiyënga nyetscanga tšabe soyënga Demetriëbiamá montsichamo, y Jesucristbe ndegombre soyënga entsinÿna ntšamo cha

soyënga yojtsiyenama. Bëgnaca chabiamá tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

*Jadiósoftanama*

<sup>13</sup> Atše ba soyënga sëntsebomna aca jauyanama, pero ndoñe quetsátsboše tsbuanáchañe juábobemana.

<sup>14</sup> Atše sëntsejuabná betsco chjobenaye ácbioye jama jauatsëtsayama y jobenayana ácaftaca jencuéntama.

<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

## San Judas

### *Jacheuayama*

<sup>1</sup> Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanÿengbioye Bëngbe Bëtsá, chë Taitá chabe entsanga chamotsemnana tojáchembo, chabe bonshánënga, y ndémuanÿënga Jesucristo endánÿena.

<sup>2</sup> Atše, Bëngbe Bëtsá sëntseimpadana, cha puerte lastemado tšëngaftangaftaca chaotsemnana, cha chaoma tšëngaftanga ainaniñe tšabe ebionana chašmotsebomnana, y chaoma tšëngaftanga cada te más Bëngbe Bëtsábioye y ínÿengbioye chašmotsababuánÿeshanama.

### *Chë ndoñe ndegombre soyënga buátëmbayënga*

<sup>3</sup> Atšbe bonshánënga, atše tša sëndboše tšëngaftanga jubuábiamama, ntšamo Jesucristo bëngbe bacna soyënguentšana šojátsebacama, tšëngaftangbioye y bëngbioynaca; pero atše sëntsejuabná atše šojtsemna tšëngaftanga jubuábiamana, jáimpadama bëtscá chašmotsama Jesucristbe soyëngama, chë mondošbuaché soyëngama jenujuérezama, ndoñe chaondopochocama. Chë soyënga Bëngbe Bëtsá chabe entsanga canÿe tojatšatá, y nÿetsca tescama.

<sup>4</sup> Er tšëngaftanga ntšamo ínÿënga imomnana ntjatatšëmboncá, básefta entsanga tšëngaftangaftaca tmojenutaná. Chënga mondmëna Bëngbe Bëtsá ndoñe adórayënga, y chë buátëmbana soyënga tmojtsetrocá. Bëngbe Bëtsá bëngbe tšabíama juabna yobómnayeca, chënga jtsichámuana tšëngaftanga šmojt sobena nÿetsca bacna soyënga jtsamëse jtsiyenana, jenomándama ntsobencá ca; y chca, chënga montseboše jinÿanÿiyama, Jesucristo ndoñe bëngbe canÿe Nduiño y Bëngbe Utabná chëngbiamana yondmëna ca. Y bayté, Bëngbe Bëtsabe uabemana palabrenguiñe tmojanábema, chë chca amëngna jtsamnana nÿetsca tescama castigánënga jtsemnana ca.

<sup>5</sup> Masque tšëngaftanga lempe quem soyama ya šmondëtatšëmbo, atše sëntseboše jamama tšëngaftanga chašmotsenojuabná, Bëngbe Utabná, Israeloca entsanga Egiptoquëngbe cucuatšentsana tojanatsebacá chentšana, cachá chë Israeloquënguentse chábeñe ndošbuáchiyënga tojánapochocama;

<sup>6</sup> y cachcá chë angelëngbiámnaca, ndémuanÿënga ndoñe tmonjanoquedá chë tmojanóyëngacñe mándoca, pero aiñe chëngbe luarënga cachcá imojëftsonÿaye. Chë causa, Bëngbe Bëtsá tojanmandá cadenëjuangaca nÿetsca tescama chamoquedama, chë más ibetiñe, tondaye binÿiñe luarentse, chënga bacna soyënga tmojanmama nÿetsca tescama castigánënga jtsemnana yojtsamna ca, cha jayanama tescama.

<sup>7</sup> Y chë Sodoma y Gomorra, y chë béconana pueblënguentse entsangbiámnaca; chëngnaca cach angelëngcá ndoñe tšabá monjánama, y nÿetsca bacna soyënga imojánama boyabása o shembásaftaca, y ínÿëngaftaca y bayëngaftacnaca. Chíyeca chënga tmonjansufrí chë íñeshca castigo nÿetsca tescama, y chca, nÿetsca entsangbioye tmojaninÿanÿé, ndayá yochjopása chë chca Bëngbe Bëtsábioye ndoñe tbontsobedecenáftaca.

<sup>8</sup> Cachcá, chë ndoñe ndegombre soyënga buátëmbayëngnaca chë mo otjenayoquécá tmojaninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbioye jtsëbátanana, y chë espíritënga obenana bomnëngbiamana ndoñe tšabá ntsichámuana, mo chëngbioye cuafjoyanguangcá.



<sup>9</sup> Pero ni mo chë angelëngbe mandayá Miguel quem buatëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiana podesca soyënga, jóyenguanguse, ndayá nÿe mëntsá ibojauyana: “Bëngbe Utabná chacmácacana ca.”

<sup>10</sup> Pero quem buatëmbayëngna, chë ndoñe tontsësertana soyëngama podesca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtšesertancá jtsamëse, jamana chënga nÿetsca tescama castigánënga jtsemana chamotsajnama.

<sup>11</sup> ¡Tša lastema quem buatëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbioye tbojanóba. Chënga crocénana juácanama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnama Bëngbe Bëtsá tojanmcá.

<sup>12</sup> Chëngna tšëngaftangbiana jtsemnana mo canÿe ndëtsenga luarentše canÿe bëts tsengacá, tšëngaftangaftaca tmojenutaná ora, cánÿiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbiana jtsantješnana, ínÿengbiana ndoñe. Chënga tša jtsašebuachiyana, pero chëngbe buatëmbana soyënga ínÿengbiana tondayama ntsošervénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa.

<sup>13</sup> Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnama. Chca, chënga jtsemnana mo mar béjayoca oleshëngcá, chentšana espumushënga bëtská tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buatëmbayënga ntšamo tmojamamna, chë más ibetoca, tondaye binÿiñe luarentše nÿetsca tescama chënga chamoquedama.

<sup>14</sup> Adánbentšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buatëmbayëngbiana, mëntsá tojánayana ora: “Smochjinÿe, Bëngbe Utabná echanjabo bëtská uaranga angelëngaftaca,

<sup>15</sup> nÿetsca entšangbiana jabáyanama ntšamo tmojamcá tšabá o ndoñe tšabá bëtsemnama; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnama, tša bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana.

<sup>16</sup> Chënga mondmëna chë tšabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerte botamana palabrenga jtsichámuana uámanënga jtse nobiamnayëse, y tšabe soyënga

ínjengbioye jtsëtsënyana, chënga tšabá joquédama y chëngbentsana ndayánaca josháchiñama.

*Ošbuáchiyënga jábuayenama*

<sup>17</sup> Pero tšëngaftanga, atšbe bonshánënga, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntšá:

<sup>18</sup> “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnéngaca, y tšëngaftanga cmochantsëbuayajuana ca.”

<sup>19</sup> Chënga mondmëna chë ošbuáchiyënguentšë nÿetscanga ndoñe cachcá cha-mondëtsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá.

<sup>21</sup> Yējuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

<sup>22</sup> Chë inÿe ora aiñe y inÿe ora ndoñe Jesucristbeñe ošbuáchiyana bomnënga šmochtsalastemana.

<sup>23</sup> Bëtscá šmochtsama, báseftanga chë uabouana castigüentšana atsebácanënga chamotsemnama, mo chënga íñeshentšana cuaftëbuacancá. Inÿengbiama chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nÿa tondaye chacmondëtsogusetana.

*Judas, Bëngbe Bëtsá jëtschuayama*

<sup>24-25</sup> Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnama y puerte oyejuayënga cachabe delante chašmotsemnama, cha canÿe puerte uamaná y obená bëtsemnama chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

## Apocalipsis

### *Ndayá quem librěsañe yomna*

<sup>1</sup> Quemuentše entsábemana ndayá Běngbe Bětsá Jesucristbioye tbojan-injinyé, chě Běngbe Bětsabe oservéněnga cha cháuinjanyěma, ndayá jopásama yojtsobecuama chěnga chamotsetatšěmbuama. Jesucristo chama chabe ángel tbojichmó, chě soyěngama atše, Juan, chě Jesucristbe oservenábioye chašuinjinyěma.

<sup>2</sup> Y atše sěnjayana lempe ntšamo ndegombre yomncá lempe chě tinjyě soyěngama, chě Běngbe Bětsabe buayenana soyěngama y chě Jesucristo šonjaniyana ndegombre bétsemna soyěngama.

<sup>3</sup> Oyejuayá nda tojtsalía, y oyejuayěnga nděmuanjyěnga botamana tmojtsue-nana quem yochjopása soyěngama, chě muentše entsabemancá ndegombre tmojóyeunanga, er chca jopasa tempo entsobeco.

### *Asia luaroca ošbuachiyěngcá enefjuaněnga jacheuayama*

<sup>4</sup> Atše Juan, sěntsabiamná chě Asia luaroca canjyěftañe ošbuachiyěngcá enefjuaněngbiama. Atše, Běngbe Bětsá sěntseimpadana, tšabe bendicioněnga chábiocana chašmosháchifne y ainanifne puerte tšabe ebionana chašmotsebomna, Běngbe Bětsábentšana, chě canjyěfta espíritěngbentšana y Jesucristbentšana. Běngbe Bětsá, chě mora endmėná, enjamná y sempre echantsemná; chě canjyěfta espíritěnga, chabe uámana puesto natsanoica mondmėnėnga;

<sup>5-6</sup> y Jesucristo, chě ntšamo Běngbe Bětsabiama yotatšěmbcá ndegombre oye-buambnayá, chě natsaná ndabiama Běngbe Bětsá tojama obaněnguentšana cháuatayenama, y njyetsca quem luarentša mandaděngbe amėndayá. Cristo šondábabuanjyeshana y bėngbe bacna soyěnguentšana šojatsebacá, cha ton-janóbanayeca, chabe buifne juabuáshaněse. Cha tojama bėnga chamot-sobena cháftaca jtsemándayana y uámaněnga chamotsemnama, y Běngbe Bětsá chabe Taitá mo bachnangcá chamotseservėnama. ¡Njyetscanga njyets tempo chamotsinjanjyáná Cristo puerte bėtsá y uamaná bétsemnama y obenana njyetsca tescama yobomnama! Chca chaotsemna.

<sup>7</sup> Moueněnga. Cristo jantšetěshėnguiñe echanjėsabo.

Chábioye njyetscanga mochanjinjyě,

chě tmonjancrucificánagnaca;

y quem luarentša njyetsca entšanga puerte ngmėnaca mochántsemna

y mochantsošachna chábeyeca.

Ndegombre, chca chaotsemna.

<sup>8</sup> “Atše sěndmėna chě njyetsca soyěnga bojatsayá y pochocayá ca,” Běngbe Utabná Běngbe Bětsá tojayana. Cha chě sempre endmėná, enjamná, njyets tempo echantsemná, chě njyets obenana bomná.

### *Juan mo otjenayoquēcá Cristbiama tojáninjyě*

<sup>9</sup> Atše Juan, Jesucristbeyeca tšěngaftangbe catšata, cháftaca cánjyifne mo canjycá bétsemnama, cach tšěngaftangcá sěndėpadecena, tšěngaftangcá chanjěftsashjache Běngbe Bětsabe amėndayoye jamashėnguama, y tšěngaftangcá Běngbe Bětsabeñe jtsobátmaněse, uantado sěndmėna chě padecena soyěnguiñe. Běngbe Bětsabe palabra sěnjánabuayiynama y Jesusbiama ntšamo ndegombre endmėncá sěnjanojyebuambnama, atše šmonjetsanětsena mar bėjayoca canjyě fshantsentše, Patmos ca uabáinoca.

10 Y tonjanopasá, canye tmengo, chë ošbuáchiyënga Bëngbe Utabnábioye cánýiñe jëtschuayama te, atše sënjanuquedá chë Uámana Espíritbeyeca corente mandaná, mo otjenayoquécá soyënga sënjëtsonyaye, y atšbe stëtsoica canye jabuache oyebuambnayana sënjanuena, mo canye trompetéjua cuafjuajatétcá;

11 mëntšá šontsanatsëtsná: “Canye librëšañe mábema lempe ntšamo consonyácá y cochjuíchmua chë Asia luaroca canýsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

12 Sënjanobuértana jinýama nda chca šojtsanatsëtsná, y chca sënjanma ora, sënjáninýe canýsëfta castellano candelersënga;

13 y chë canýsëfta castellano candelersënguiñe tsëntsaca canya sënjáninýe, mo entsacá inýná, canye bën entsayá uichëtjoná, y cochóntscoca canye tëntša castellano uasnanëjaca.

14 Chabe stjënashana uafjantsësha, puerte uafjantsësha mo canye oveshabe boboshëshacá, y chabe fšněbenga mo iñeshcá enjëtsinýna.

15 Chabe shecuatšënga enjëtsëbuashinýinýana mo bronscá, ndaybé nat-sana iñëjana tcojuchněngo enabé chaotsemnama y chentšana entsëjuaca becá tcojajojó corente chaotsebuashinýinýanama; y chabe oyebuambnayana jabuache enjëtsenana mo bëtscá bëjaye cuaftsebuachquëcjancá.

16 Chabe catsbioica cucuatšiče enjëtsatbëna canýsëfta estrellënga, y chabe uayoicana enjëtsobocana canye espadëja, nyets utoicajana puerte efsánëja, y chabe jubiá tša enjëtsëbuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

17 Cha sënjáninýe ora, chabe shecuatšentše mo obanacá sënjánshajaye. Pero cha, chabe catsbioica cucuatšiče átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatšayá y pochocayá,

18 chë sempre vida bomná. Atše obaná sënjamna, pero mora nyetsca tescama vida sëntsebomna. Atše obenana sëndbomna, y chë obenánaca entsángbioye ndoñe quenátamna infernoca nyetsca tescama castigánënga jtsemnana, mo nyets tempo cuaftsobancá.

19 Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama.

20 Mëntšá endmëna chë atšbe catsbioica cucuatšiče tconjinýe canýsëfta estrellëngaca y chë canýsëfta castellano candelersëngaca: chë canýsëfta estrellënga montsinýinýná chë canýsëftañe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelersëngna chë canýsëftañe ošbuachiyëngcá enefjuanënga.”

## 2

### *Efesoca ošbuachiyëngcá enefjuanënga jábuayenama*

1 Mëntšánaca cha šonjaniyana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catsbioica cucuatšiče canýsëfta estrellënga entsatbëná y chë canýsëfta castellano candelersënga luarëjana entsaná:

2 Atše lempe sëndëtatšëmbo ntšamo tsëngaftanga šmoyenana; atše corente sëndëtatšëmbo tsëngaftanga jabuache šmotrabájama, y ntšamo tsëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tsëngaftanga ndoñe šmontsobena jtsëuantánana ntšamo bacna entsanga tmojtsamcá. Atšnaca



sëndétatsëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnama.

<sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservënana; y tšëngaftanga chca šmondëservena, ainaniñe añemo jtsebmomna ntjajbanacá.

<sup>4</sup> Pero canýe soye sëntsebmomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbmomna ni atšbiama ni nýetsca entšangbiama, ntšamo átšbeñe jtsošbuáchiyama šmonjanbojatsé orcá.

<sup>5</sup> Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentsana cuaftsejuanacá. Chca chanjama, tšëngaftanga juabnayana ndoñe chašmonjatrocace.

<sup>6</sup> Pero tšëngaftangbe pavor quem tšabe soye šmontsebmomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñjanayëngcá, chëngbiama chanjama chë nýetsca tescama yomna tšabe vida chamotsebmomna, y chca chënga mochántsemna mo chë nýetsca tescama yomna tšabe vida jtsebmomna betiyeshentšana cuaftsesacá, chë entšanga sempre oyejuayënga mondbetsemnoca ca” –cha šonjaniana.

### *Esmirnoca ošbuachiyëngcá enefjuanënga jábuayenama*

<sup>8</sup> Mëntšánaca cha šonjaniana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nýetsca soyënga bojatsayá y pochocayá, chë tonjanobaná y ndabiama Bëngbe Bëtsá tonjama cháuatayenama:

<sup>9</sup> Atše sëndétatsëmbo tšëngaftanga tša jabuache šmojasufrima y ndbomnjémënga šmomnana, pero ndegombre Bëngbe Bëtsábocana bëtscá tšabe soyënga šmondëtsóbomñe. Y sëndétatsëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nýe chábioye jtseservënëse y jtsatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanas echanjama tšëngaftanguentšënga báseftanga cárceloye ínýënga chacmëtámiamana, jinýama ntsachetšá Crístbeñe ošbuáchiyana šmobomnana, padecena soyënguiñe šmojtsemna ora; y entsamna baseftayté jasúfrianana. Sempre bëtscá ošbuáchiyana, y ainaniñe bëts añemo šmochtsebmomna, masque jobanámnaca chacmotsamna, Crístbiama trabájaye causa. Chca chašmojtsamëse, atše chanjama tšëngaftanga chašmotsebmomnana mo canýe uacanana soycá, chë nýetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena



soyënguentshana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

*Pérgamoca ošbuachiyëngcá enefjuanënga jábuayenama*

<sup>12</sup> Mëntsánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efsana espadëja entsatbëná:

<sup>13</sup> Atše sëndëtatšëmbo ntšamo yomna tšëngaftangbe oyententše, canye luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondëtseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, ínÿënga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

<sup>14</sup> Pero básefta soyënga sëntsebomna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿënga diosënga yojamna ca imojanajuabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama.

<sup>15</sup> Chéntšnaca ínÿënga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna.

<sup>16</sup> Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadëjaca.

<sup>17</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentshana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëše, ndayá Bëngbe Bëtsá tempo entšángbioye ndoñe tonjinÿanÿé; y canye fjantse ndëtsëtema chanjáyentšbuachiye, chënga oyejuayënga šmojábemama. Chiñe canye tsëm uabaina echantsábemana; ndocná chë uabaina quenátabatma, ndayá nye chë chamojóyëngacñënga ca” —cha šonjaniyana.

*Tiatiroca ošbuachiyëngcá enefjuanënga jábuayenama*

<sup>18</sup> Mëntsánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronze shecuatšënga bomná:

<sup>19</sup> Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetšá tšëngaftanga Bëngbe Bëtsábioye y nyetscángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínÿënga šmojuabuache y ntšamo Bëngbe Bëtsábeñe jtsobátmanëse becá šmojoboyá

padecena soyënguiñe; y sëntsetatšëmbo mora más bëtská tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatšë orscama.

<sup>20</sup> Pero canye soye sëntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórama uátšëmbona saná chamosama.

<sup>21</sup> Cha sënjuená atše chjacastíga ca, chca juabnayana ndoñe tonjatrocace, y canye boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena.

<sup>22</sup> Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiama chanjama puerte chamosufrima;

<sup>23</sup> y chë shembásabe básenga chantsëbaya. Chca, nÿetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tšëngaftangbentše, ínÿenga Tiatira pueblentše šmojtsemnënga, chë shembásabe buatëmbana soyënguiñe ndoñe šmontsošbuachenga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quechochatamënda inÿe más toto soye chašmotsamama.

<sup>25</sup> Pero nÿe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentšana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nÿetsca mándayëngbentša entšángbeñe jtsemádayama,

<sup>27</sup> ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canye hierro varëfjaquécá, y chëngbe contra chamojtsemnëngbioye mochántsapochocaye, mo nÿe matbajënga tmojtsëtsjanjncá.

<sup>28</sup> Y chë jabínÿnama ora bínÿnaye estréllnaca chanjátšataye.

<sup>29</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### 3

#### *Sardisoca ošbuachiyëngcá enefjuanënga jábuayenama*

<sup>1</sup> Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canÿsëfta espíritënga y chë canÿsëfta estrellënga bomná: Atše lempe sëndëtatšëmbo ntšamo tšëngaftanga šmoyenama; atše sëndëtatšëmbo tšëngaftangbiama ínÿenga tša jtsichámuana Bëngbe Bëtsá jasérviamá bëtská šmojtsama ca, pero ndegombre

tšëngaftanga nÿe batšatema šmontsama, y chca, chabiamama mo obanëngcá šmondmëna.

<sup>2</sup> Botamama smochjenóbobonÿe y más smochtsama chë Bëngbe Bëtsá jaserviama cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinÿe chë Bëngbe Bëtsábioye jaserviama ntšamo jtsamëse šmoyencá, atšbe Bëtsabiamama ndoñe yapa tšabá quenátsmëna.

<sup>3</sup> Asna, smochtsenójuabnaye ndayá Bëngbe Bëtsábiocana šmojóyëngacñama, y chabiamama šmojouena soyënguñnaca. Ntšamo chë soyënga yomncá smochtsiyena, juabnayana smochjatróca y smochjóntša bëtscá jtsamama Bëngbe Bëtsá jaserviama. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocasa, nÿe ndeolpe chanjá tšëngaftangbioye, mo canÿe atbëbanacá, chabiamama ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entsanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsjana uafjantsëjuangá uichëtjonënga, chënga chca mercedo montsebuajónayeca.

<sup>5</sup> Chë padecena soyënguentsana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochjónÿenëngbe uabaina enduábemana librésentsana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

<sup>6</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá ca” —cha šonjaniyana.

#### *Filadelfioca ošbuachiyëngcá enefjuanënga jábuayenama*

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsesemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntšobenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntšobenana jamama aíñe chaotsemnama:

<sup>8</sup> Atše lempe sëndëtatšëmbo ntšamo tšëngaftanga šmoyenama. Minÿënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiama canÿe bëšása cuafjatëfjáca, y chëša jtatámiamama ndocná quenátobena. Atše sëndëtatšëmbo tšëngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entsanga ndoñe šmondmëna ca.

<sup>9</sup> Atše chanjama, chë mo Satanasbe entsangcá imomnënga, nÿe chábioye jtseservënëse y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana entsangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšë, tšëngaftangbiama respeto jinÿanÿiyama, y chca, chënga chamotsetátšëmbo atše sempre cbaabuánÿeshanama.

<sup>10</sup> Atše tcbonjanamëndá, Bëngbe Bëtsábeñe jtsobátmanëse, lempe chašmotsoboyá padecena soyënguñne, y tšëngaftanga chca šmonjama. Chíyeca,

atše puerte tšabá cbochántsanjēna, chē quem luarentše oyenēnga njetscanga jasúfriama y padecena soyēnguiñe jtsemnama chaojtsemna ora, Bēngbe Bētsábeñe aīñe o ndoñe mondošbuáchema jinjānyiyama.

11 Cachiñe quem luaroye betscó chanjésabo. Sempre šmochtsama ntšamo mora šmondamcá, y Bēngbe Bētsábiocana šmojóyēngacñe soyēnga šmochtsinjēna; chca ndocná chaondobená ndayá jamana, y chē sóyeca chaoma tšēngaftanga ndoñe chašmondóyēngacñe ndayá Bēngbe Bētsá chē chábioye jtseservénama ndoñe tmontsajbanángbioye yochjatsataycá, chēngbe uacanana soye.

12 Chē padecena soyēnguentšana tšabá chamojábocana mo ayēnjanayēngcá, chēngbiamá atše chanjama sempre Bēngbe Bētsabe delante chamuesomñama, y chca, chēnga mochántsemna mo chē Bēngbe Bētsabe bēts yebnentša ucuatjoniñcá; ndocna te Bēngbe Bētsábentšana quemocháisebocana; y chēngbeñe atšbe Bētsabe uabaina chanjuábema y atšbe Bētsabe bēts pueblentša uabaina, chē tsēm pueblo Jerusalén, chē celocana yobá pueblo, Bēngbe Bētsábiocana. Y chēngbeñnaca chanjuábema atšbe tsēm uabaina. Lempe chca chanjama jinjānyiyama chēnga Bēngbe Bētsábenga mochtsemnama.

13 Chē jouenama tmojtsobenēnga, chamouena ndayá Espíritu chē ndayenache ošbuachiyēngcá enefjuanēnga yojsētsētsnacá ca” —cha šonjaniyana.

#### *Laodiceoca ošbuachiyēngcá enefjuanēnga jábuayenama*

14 Mēntšánaca cha šonjaniyana: “Laodicea bēts pueblaca ošbuachiyēngcá enefjuanēngbeñe chaotsemándama uámana ichmonábioynaca mēntšá mabobema:

Mēntšá entsichamo chē sempre Ndegombrá endmēná, chē Bēngbe Bētsabe soyēngama ndegombre oyebuambnayá, y chē ndábeyeca Bēngbe Bētsá quem luare tojanmá:

15 Atše lempe sēndētatsēmbo ntšamo šmoyenama. Atše sēntsetatsēmbo tšēngaftanga ndoñe yapa šmontseboše Bēngbe Bētsá jaserviama, pero Bēngbe Bētsabe buayenana soyēnga ndoñe lempe šmontsaboté. Y chca, nje batsatema šmojtseboše Bēngbe Bētsá jaserviama; chca, tšēngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sēntseboše tšēngaftanga chašmotsemna mo ntšniñiye o shécbaniye buyeshcá, tšabá jtsamēse o ton-daye!

16 Chca, tšēngaftanga tibiye buyeshcá šmondmēna, y ndoñe quešmátsboše bētscá jamama, pero Bēngbe Bētsabe soyēnga ndoñe lempe šmontsaboté. Chíyeca atše sēntsejuabná jtsēbatena, mo nda tibiye búyeshe tojētsbuashētjácá, chcaye ndoñe bondogustana causa.

17 Er tšēngaftanga jtsichámuana bomnēnga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátstatšēmbo Bēngbe Bētsabe soyēnga bētscá cmojtsabuáshebenama. Chca, tšēngaftanga šmontsemna nja ndoñe tšabá, ínēnga ngmēnana chacmotsabamna, mo ndbomnējemēngcá, mo jtanēngcá, Bēngbe Bētsabe soyēngama ntsoertancá, y mo enašēngcá, bētscá Bēngbe Bētsabe soyēnga ntsebomncá.

18 Chíyeca cbabuayená, átšbentšana chašmuatsjinje chē Bēngbe Bētsabe soyēnga y uámana soyēnga, mo chē ena castellano jabemama, iñējana fjēchnēnguēse castellano átšbioye šmojtsontšabuamnañcá. Tšēngaftanga Bēngbe Bētsabe delante mo enašēngcá šmondmēna, er cha endonjácá chē ba bacna soyēnga ntšamo tšēngaftanga šmojtsamcá.



Smochjaleséncia atše chacbějabuache tšëngaftanga Bëngbe Bëtsabe bominiñe tšábenga chašmotsemnama, mo juichëtjuama uafjantse entšayá átšbioye šmojtsantšabuamnañcá. Chca smochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chacbějabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átšbioye šmojtsontšabuamnañcá. Chca smochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanÿeshanënga sëndbaucácana y sëndbábuayenaye. Chíyeca, lempe ntšamo šmojobenacá smochtsama Bëngbe Bëtsá jaserviama, y juabnayana smochjatróca, y nÿets tempo puerte smochtseboše Bëngbe Bëtsá jtseservénana.

<sup>20</sup> Nderado canÿe tšabe amigo yebnoye tojabo y tojachembo, tšëngaftanga šmojouenëse y bësáša šmojebiatëfjese, cha jamashënguana, y cánÿiñe cháftaca joyejuayana y jasana. Cachcá, atše entšanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nÿets tempo cháftaca cánÿiñe mo canÿacá chanjëftsemna.

<sup>21</sup> Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsétsanga chamotsemnama ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá” —cha šonjaniyana.

## 4

*Chë Ainënga Bëngbe Utabnabe uámana tbemanentša natsana imojtsechuanaye*

<sup>1</sup> Chentšana mo otjenayoquëcá sënjáninÿe. Sënjanrrepará y sënjáninÿe celoca canÿe bësáša enjétsatëfjna, y chë natsana sënjanuena oyebuambnayana, chë enjamna mo canÿe trompetëfjua cuafjuajatëtcá, mëntšá šonjétsatsaye: “Moye másëngo, atše cbochanjinÿinÿiye ntšamo más chcoye yochjopasacá ca.”

<sup>2</sup> Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninÿe celoca enjëtsemna canÿe reybe uámana puesto, y chentše canÿa enjëtsetbemana.

<sup>3</sup> Chentše enjëtsetbemaná enjamna, puerte tëshinÿná mo jaspe ndëtsbecá, puerte buanganá mo cornalina ndëtsbecá, y chë uámana puesto shëconana canÿe tsëfcuacuatjo enjamna, y enjëtsebuashinÿinÿana mo canÿe esmeralda ndëtsbecá.

<sup>4</sup> Chë reybe uámana puesto juachajana, inÿe uta bnëtsana y canta puesto sënjáninÿe, y chiñe uta bnëtsana y canta bëtsëjëmënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtstabestšajona.

<sup>5</sup> Chë uámana puententšana enjëtsohocana tcuinÿëjënga, becá shauenanana y juesasanana; y chë uámana tbemaniñentša natsanoicna, canÿsëfta uajuinÿanëshana enjëtšangbototjuana; chë uajuinÿanëshangá entsayana chë Bëngbe Bëtsabe canÿsëfta espíritënga.

<sup>6</sup> Y chë uámana puententša natsanoica enjëtsemna mo canÿe mar bejaycá, tëshinÿniye mo canÿe cristal ca uabaina ndëtsbecá.



Chë luariñe tsëntsaca, chë uámana puesto enjésemnentse y chë shëconánëjana monjésemna canta Ainënga, nyétsañe fšněbéngaca, natsanoica y stëtsoica.

<sup>7</sup> Chë natsana Ainá enjamna mo canye leoncá, chë inye Ainá mo canye toroścá, chë inye Ainá enjábomna mo canye entsabe jubiacá, y chë inye Ainá mo canye águila tojtsongüefnacá.

<sup>8</sup> Chë canta Ainënga, cada ona chñnguana juatëngmiáša enjanábomna, y tsoicajana y shjoicajana nyétsañe fšněbenga monjábomna. Y chënga nyets tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,

Bëngbe Bëtsá nyets obenana bomná,

nda enjamná, endmëná y sempre echanjëftsemná ca!

<sup>9-10</sup> Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentse tbemaná, chë nyets tempo y nyetsca tescama oyená. Chënga puerte respeto chabiamana monjésebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtšëjëmënga amëndayënga, chë uámana puestentse tbemanabe shecuatšentse joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

<sup>11</sup> Aca nyets merecido condëtsobuájoñe, Bëngbe Utabná y Bëngbe Bëtsá, entsanga chamotsinÿanÿnama, aca puerte bëtšá comnama, y chamotsichamo

aca nyets respeto buajoná comna, y nyets obenana bomná comna ca, er aca nyetsca soyënga tcojama;

aca icnabóseyeca chë soyënga yojtsemna y aca chca tcojanma ca.

## 5

### *Chë uabemana uándmanana tsbuanácha y chë Oveshatema*

<sup>1</sup> Chë uámana puestentse enjetsetbemanabe catsbioica cucuatšinë canye uándmanana tsbuanáchanaca sënjáninÿe, y nyétsañe enjétsabemana tsoicajana y shjoicajana, y canÿsëfta tsengájaše sellëngaca enjétsajandmanana.

<sup>2</sup> Y canye ángel puerte obenana bomná sënjáninÿe, y cha mëntšá enjétsayebuache: “¿Nda merecido yobuájona, quem uándmanana tsbuanácha jutëfjonama y chë sellënga jutsécama ca?”

<sup>3</sup> Pero, ni celoca, ni quem luarentse, ni quem luarentša jashenoye, ndocná quenjatšmëna obenánaca chë uándmanana tsbuanácha jutëfjonama, ni juinÿama.

<sup>4</sup> Y atše puerte sënjánenobošachna, er ndocná ntjónÿnana merecido buajoná chë uándmanana tsbuanácha chautëfjonama, ni chauinÿama.

<sup>5</sup> Pero canÿa chë bëtšëjemënguentsá šonjaniyana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davídbentsana Entšá, tonjayënjaná; cha entsobena chë uándmanana tsbuanácha jutëfjonama, y chë canÿsëfta sellënga jutsécama ca.”

<sup>6</sup> Chora sënjáninÿe, chë uámana puesto y chë canta Ainënga y chë bëtšëjëmëngbe tsëntsaca, canye Oveshatema tsanana, pero enjétsinÿna mo cuaftsobacá. Chë Oveshatema enjábomna canÿsëfta tsëtjonëse y canÿsëfta fšněbé. Chë canÿsëfta fšněbé monjaninÿinÿná chë Bëngbe Bëtsabe canÿsëfta espíritënga, chë Bëngbe Bëtsá nyets quem luarëjana tojánichamonga.

<sup>7</sup> Chë Oveshatema tonjanobeconá y chë uándmanana tsbuanácha tonjanaca, chë uámana puestentse tbemanabe catsbioica cucuatšentsana;

<sup>8</sup> y chabe cucuatshiñe tonjanaca ora, chë canta Ainënga y chë uta bnëtsana y canta bëtsëjémënga amëndayënga chë Oveshatembe shecuatšentše tmonjanoshamentšé. Nÿetscanga monjétsëtbëna arpangá y castellano copbenga jútjena inciensiýeca; chë copbenga inciensiýeca enjamna chë Bëngbe Bëtsabe entšanga tmojayana palabrënga, cháftaca jencuéntama ora.

<sup>9</sup> Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsëcama;  
er acbe buiñe juabuáshanëse tconjanóbana, y chca enjamna mo crocénana cuafjëtsjajocá, Bëngbe Bëtsabiama chamotsemnama,  
entšanga nÿetsca cachca buiñe bomnënguentsana, nÿetsca biyana bomnënguentsana, nÿetsca canÿe entšanguentsana, y nÿetsca mándayëngbentša entšanguentsana.

<sup>10</sup> Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamot-seservénama,

y quem luarentše chënga montsemánda ca —chënga monjëtseversiaye.

<sup>11</sup> Y chca sënjetsonÿaye ora, mallajta angelëngbe oyebuambnayana sënjanuena, y chënga monjëtsemna chë uámana puestentše, chë Ainënga y chë bëtsëjémënga amëndayëngbe shëconana. Nÿetsá bëtscá angelënga monjëtsemna, corente mallajta;

<sup>12</sup> y chënga mëntšá monjétsayebuache:

¡Chë Oveshatema cuafjobacá endmëná,  
merecido endëtsobuájoñe, nÿets obenana, nÿets bomnana,  
nÿets osertánana y nÿets añemo chaotsebomnama,  
y entšanga chabiama chamotsichamo cha nÿets respeto buajoná yomna ca,  
y chamotsinÿanÿnama cha puerta bëtsá y uamaná yomnama,  
y nÿetscanga chamotsatschuanama ca! —chënga monjétsayebuache.

<sup>13</sup> Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentše, quem luarentša jashenoye y chë mar béjayoca, chëngnaca mëntšá monjétsichamo:

¡Chë uámana puestentše tbemanábioye y chë Oveshatema nÿetscanga nÿets tempo y nÿetsca tescama chamótsatacheuanaye  
y chamotsichamo chata puerta uámanata y nÿets respeto buajonata ibomna ca,  
y chamotsinÿanÿná chata puerta bëtsëtsata y obenata bëtsemnama ca!

<sup>14</sup> Y chë canta Ainëngna monjétsichamo: “Chca chaotsemna ca.” Y chë bëtsëjémënga amëndayëngna tmonjanoshamentšé y chátbioye monjétsatacheuanaye.

## 6

### *Chë Oveshatema chë canÿsëfta sellënga tonjanëtsécá*

<sup>1</sup> Chentšana más sënjáninÿe; chë Oveshatema chë canÿsëftentšana natsana sello tonjanëtsécá ora, sënjanuena canÿa chë canta Ainënguentsana puerta jabuache, mo cuafjajuesascá, mëntšá enjétsichamo: “¡Mabo ca!”

<sup>2</sup> Sënjanrrepará y sënjáninÿe canÿe fjantse couaye, y chábeñe enjetsenjaquená canÿe arquëja enjétsatbëna. Chábioye canÿe coronësha tmonjaníyë, y mo canÿe ayënjanayacá tonjëftsanbocna, y cabá más jatsyënjanámnaca.

<sup>3</sup> Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentsana mëntšá enjétsichamo: “¡Mabo ca!”

4 Y inye couaye tonjánbocna, canye buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaot-sopochocama, entsanga chamotsenóbama; y canye bëts espadëja tmonjanoyé.

5 Chë Oveshatema chë inye sello tonjanëtsëcá ora, sënjanuena chë inya chë canta Ainënguentšana mëntsá enjétsichamo: “¡Mabo ca!” Sënjanontjesé y canye ftsenga couaye sënjáninye, y chë enjetsenjaquená canye romanëša enjétsëtbëna.

6 Y chë canta Ainëngbeñe canye oyebuambnayana mëntsá sënjanuena: “Nye canye kilo trigo canye tesca trabajuama, y unga kilo cebadá canye tesca trabajuama; pero chë aceitiye y chë vínoyna ndoñe cattseepochócase ca.”

7 Chë Oveshatema chë inye sello tonjanëtsëcá ora, chë ústonoca Ainá enjétsichamo: “¡Mabo ca!”

8 Sënjanontjesé y canye shatsësiye couaye sënjáninye; chë enjetsenjaquená Obanana ca enjanabaina, y stëtsoica bonjétsëstona canya, Obanënga imomna luare ca uabainá; y chátbioye obenana tmonjanatšatá cántañentšana cányëntse quem luarentse jtseepochócase, chentša entsanga jtseepochócase, entsanga tmojtsentsjanama, bëts shëntsangaca, šocanëngaca y quem luarentša tšátjaye bayëngaca.

9 Chë inye sello tonjanëtsëcá ora, sënjáninye chë altarentša tajsoye chë tmojanóbanëngbe espíritënga, chë Bëngbe Bëtsabe palabra entsanga abuayiy-nayama tmojanóbanënga.

10 Chora chënga tmonjanontsé tša uayebuáchana: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entsangbiana cochjayana ndoñe tšabá tmonjamama, y chë bëngbioye obanayama cochjácastigaye ca?”

11 Chentšana nyetscángbioye uafjantse entsayá tmonjaníyë y tmonjanëyana batšatema más chamobatmá ca, chë cachëngcá Crístbeyeca catšátanga y oservëngca, chë cachëngcá mochjanóbanënga, nyetscanga choca chamojt-semnëntscuana.

12 Y más sënjáninye; chë inye sello cha tonjanëtsëcá ora, jabuache fshantse tontsanangmëmana; shinye tontsanftsénganga, mo chë obaná tojtsemnana juichëtjuama entsayacá, y nyets juashcona mo buiñcá enjétsinyna,

13 y estrellatëmënga celocana fshantsoye tontsantquëcjana, mo canye higo betiye jabuache bínýiaca tojtseshatíyeyna ora, chë nguëfshna higuëbenga cuafjatquëcjancá.

14 Y celoca luare tontsanenatjëmbe mo canye tsbuanácha cuafjuand-manacá, y nyetsca tjañe y béjayoca fshantsënga, chë ndayentse enjamnentšana tontsanojuaná;

15 y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nye ínýabiana oservëngca y chë cachëngbiana trabájayëngnaca, chë cuevëshënguñe y bëts ndëtšbenguenache tjañe tmontsanóitana;

16 y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uámana puestentse tbemanabe bom-inyëntšana, y chë Oveshatembe uabouana castigo, cha bëngaftaca tbojet-nama, bëngbeñe ndoñe chaondëtsemnana!”

17 Er chë uachuana te chabe castigo jtsebínynama te tojóshjango; y mora ¿nda nanjobenaye chë sóyeca ndoñe chamondëtseepochocama ca?” —chënga montsanichamo.

## 7

*Chë Bëngbe Bëtsábioye oservénënga chë uabouana castigüentšana mochántsatsebacana*

<sup>1</sup> Chca tonjanopasá chentšana, canta angelënga sënjánanýe, monjétsatsana chë quem luarentša canta opochócayenache; chënga ndoñe quemënjatanleséncia chë canta binýiënga jtsebínýnama, ndoñe chaondëtsebinýiyama, ni fshantsentše, ni mar béjayoca, ni ndocna betiyeshënguñe.

<sup>2</sup> Inýe ángelnaca sënjáninýe, shinýe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inýe canta angelëngbioye, ndëmuanýengbioye obenana tmojanatšatá chë fshantsentše y mar béjayoca lempe jtsepochócama, chëngbioye jabuache tonjánabachembo:

<sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguñe, chë Bëngbe Bëtsábiamama oservénëngbioye chë sélloca juentsaca fchayauínýnanantscuana, ndoñe chamondétsapochocama ca!”

<sup>4</sup> Y sënjanuena buétanga chë sélloca tmojánauinýnanayama: canýe patse, canta bnétsana y canta uaranga entšanga uinýnanánënga nýetsca Israeloquentša bëts pamíllanguentšana.

<sup>5</sup> Judabe pamíllentšana, bnétsana uta uaranga uinýnanánënga;

Rubenbe pamíllentšana, bnétsana uta uaranga;

Gadbe pamíllentšana, bnétsana uta uaranga;

<sup>6</sup> Aserbe pamíllentšana, bnétsana uta uaranga;

Neftalibe pamíllentšana, bnétsana uta uaranga;

Manasesbe pamíllentšana, bnétsana uta uaranga;

<sup>7</sup> Simeonbe pamíllentšana, bnétsana uta uaranga;

Levibe pamíllentšana, bnétsana uta uaranga;

Isacarbe pamíllentšana, bnétsana uta uaranga;

<sup>8</sup> Zabulonbe pamíllentšana, bnétsana uta uaranga;

Josebe pamíllentšana, bnétsana uta uaranga;

y Benjaminbe pamíllentšana, bnétsana uta uaranga entšanga.

*Chë mallajta entšanga uafjantsëjuangá uichëtjonënga*

<sup>9</sup> Chentšana, sënjanrrepará y mallajta entšanga sënjánanýe, ndocná quentaisobenaye jacúntana, nýetsca mándayënguentsana, nýetsca cachca buiñe bomnënguentsana, nýetsca canýe entšanguentsana, y nýetsca biyana bomnënguentsana; chënga monjétsatsana chë uámana puesto chë Oveshatembe natsanentše, uafjantsëjuangá uichëtjonënga y ramëshangá monjétsët bëna.

<sup>10</sup> Nýetscanga tša monjétsayebuache:

¡Bënga atsebacayana endobá, Bëngbe Bëtsá,  
chë uámana puestentše entsetbemanábentšana,  
y chë Oveshatémbentšana ca!

<sup>11</sup> Y nýetsca angelënga, chë uámana puesto y chë bëtsëjëmënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá,

<sup>12</sup> mëntsá jayanëse:

¡Chca chaotsemna!

Bëngbe Bëtsábioye nýets tempo y nýetsca tescama chamotsadorana y nýets ainánaca cha chamotsatschuaná.

Entšanga chamotsinýanýná cha puerta bëtsá y uamaná bëtsemnama;

cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentsana, canÿa chë bëtsëjemënguentsá tonjanoyebuambá y šonjantjá: “¿Ndëmuanyënga imomna chë uafjantsëjuangá uichëtjonënga, y ndëmocana tmojabo ca?”

<sup>14</sup> “Taita, aca chëngbiana cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentsana tšabá tmojábocanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buíñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša natsanoica montsemna,

y chábioye nÿets tempo chabe delante mondëserveda,

y chë uámana puestentše entsetbemaná,

chëngbenache jtsemnëse, chënga echántsanÿena, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátsbomna;

shinÿama, ni yapa jënÿama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënÿa,

y echanjunatse béjaye vida bomniye yóbocana luaroye,

y Bëngbe Bëtsá echanjama ya ndoñe más ngménana chamondëtsebomnama ca” —cha šonjanjuá.

## 8

### *Chë ústonoca sello*

<sup>1</sup> Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentëtsënëna mo tsëntsa hora nÿetsá.

<sup>2</sup> Chora sënjananÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjaniiyé.

<sup>3</sup> Chentsana inÿe ángel tonjánashjango, canÿe castellano matbëtémaca incienso jajuinÿiyama, y altar natsanoica tonjantsá; chábioye bëtská incienso tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entšanga tmojoyebuambá palabrëngaca, cháftaca jencuéntama ora.

<sup>4</sup> Y chë incienso juinÿnentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabrëngaca.

<sup>5</sup> Chentsana chë ángel chë incienso jajuinÿiyama matbëtéma tonjanca, chë altarentša chebánbengaca tonjanajutjé, y quem luaroye tonjanëtšana. Chora enjëtsemna tša juesasanana, corente shauenanana, bëtská tcuinÿënga, y quem luare tontsanangmémana.

### *Chë trompetëfjuangá*

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtšana bëntstá y íñeshe, cánÿiñe buíñeca. Ungañentsana cánÿentše quem luarentše tontsanjuinÿe, úngañentsana cánÿentše betiyeshënguiñe y nÿetsca nguëfshna shacuanënguínaca.



<sup>8</sup> Chë inye ángel chabe trompetéfjua tonjanájetëto, y chora chë mar béjayoye tmonjanëtsana canye soye mo canye bëts tjañe tojtsangbototjuancá, y chë mar béjayiñe úngañentsana cányëntse buiñe tontsanóbema.

<sup>9</sup> Chë mar béjayiñe vida imobomnëngbeñe úngañentsana cányëntse tontsanopochocá, y chë barquënguëntsnaca úngañentsana cányëntse.

<sup>10</sup> Chentsana chë inye ángel chabe trompetéfjua tonjanájetëto, y canye bëts estrella, mo canye uajuinñanëshacá enjétsangbototjuana, celocana tonjanótsatse chë úngañentsana cányëntse béjayënguiñe, y béjaye óbocanenache.

<sup>11</sup> Chë estrella enjanabaina Untjana ca; y chë úngañentsana cányëntse buyeshënguiñe untjiye tontsanóbema, y chë untja búyeshe causa ba entšanga tmonjanóbana.

<sup>12</sup> Chë inye ángel chabe trompetéfjua tonjanájetëto, y chora tontsanóndbema chë úngañentsana cányëntse shinýiñe, y chë úngañentsana cányëntse juashconiñe y chë estrellënguñnaca. Chca, nýetsca chentsa úngañentsana cányëntse ibetiñe tonjanoquedá, y chë causa ndoñe quemëntétsebinñayaye posufta horëntscuana, bnëté canta hora y ibeta canta hora.

<sup>13</sup> Chentsana, sënjanrepará y sënjanuena canye águila, tsbanánoca celoca enjetsongüefjná, jabuache mëntsá enjétsichamo: “¡Tša lastema, tša lastema, tša lastema quem luarentsa entšangbiama, chë inye trompetéfjuangá chë inye unga angelënga chamojuájetëto ora ca!”

## 9

<sup>1</sup> Chentsana chë inye ángel chabe trompetéfjua tonjanájetëto, y sënjaninye canye ángel quem luaroye jastjanguana y enjétsinña mo canye estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfjñentša llavëfja.

<sup>2</sup> Chë uabouana tboca atëfjñentse tonjánatëfjo, y chentsana becá ngona tonjanótsjua, mo bëts hornentša ngoncá; y chë uabouana tboye atëfjñentse ngona causa shinýe tontsanibétata y nýets celoca ena ngona enjétsemma.

<sup>3</sup> Chë ngonentsana ba tsátjaye chapulinga tmonjánbocana, y nýets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjuama alacranëngbe obenancá.

<sup>4</sup> Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nýe chë juentsaca chë Bëngbe Bëtsabe sëlloca nduinñanana entšangna aíñe.

<sup>5</sup> Pero ndoñe chematanalesenciá entšángbioye jobáyana, ndayá nýe jamama chënga shachna shinýëntscuana tsetšanana chamotsebomnama; y chë chënga monjánama chamotsebomnama tsetšanana enjamna mo canye alacranbe uetjoniñcá.

<sup>6</sup> Chca tempo chaojtsemna ora, entšanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinýena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

<sup>7</sup> Chë tsátjaye chapulinga monjétsinña mo couayëngcá prontánënga jama entšángaftaca jétsjama; chëngbe bestšašiñe monjanábomna mo castellano coronëshangacá, y chëngbe jubiá enjamna mo entšabe jubiácá.

<sup>8</sup> Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá.

<sup>9</sup> Chëngbe cuerpënga jenëuyanama cochaca monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná

ora, chë shauenanana bëtscá enjamna, mo ba cochëshangá couayënga cuaft-sasjojnacá, chë inyëngaftaca jéntsjava tmojëftsátjajo ora tojtseshauenancá.

<sup>10</sup> Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjábomna shachna shinjëntscuana entšanga mal chamotsepasama.

<sup>11</sup> Chë tšátjaye chapulinga canyë amëndayá monjábomna, chë uabouana tboca mándaye ángel; hebreo biyaña cha uabainá Abadón ca y grieguiña Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoye cabá inyë uta soye más pochócayana cachcá echántsemna.

<sup>13</sup> Chentsana chë inyë ángel chabe trompetëfjua tonjanájetëto, y canyë oye-buambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentsana enjëtsovocana.

<sup>14</sup> Y chë oyebuambnayana, chë trompetëfjua tonjanájetëto y enjëtsetbëna ángelbioye tbonjaniyana: “Chë canta angelënga chë Eufrates bëtš fshájaye tsachoca utsbuanënga mëjafjoná ca.”

<sup>15</sup> Y chë canta angelënga tmonjanëjafjoná; y nya chë ora, chë te, chë shinjë y chë uatama chëngbioye tmojanaprontá, chë quem luarentša entšángbeñe úngañentsana cányëntšënga jtsëbáyama.

<sup>16</sup> Atšë sënjanuena buétanga imojamna chë angelëngaftaca tmojána soldadënga, couayënguñe: uta patse millonënga ca.

<sup>17</sup> Mëntšá sënjánanyë mo otjenayoquëcá chë couayënga y chë chëngbeñe enjaquenënga: Chë enjaquenënga monjábomna morochó soyënga cochaca, jenëuyanama, y chë soye buanganana enjáninyna, mo iñcá, y fchendana mo chë uámana ndëtšbé jacintcá y tsësiyana inynana mo azufrcá; y chë couayënga monjábomna mo leonbe bestšašcá, y chëngbe uayoicana enjëtsovocana iñe, ngona y azufrana.

<sup>18</sup> Y chë úngañentsana cányëntšë entšanga tmonjanóbana quem unga uabouana pochócaye soyëngaca, chë couayëngbe uayoicana enjëtsovocanana: iñe, ngona y azufrana.

<sup>19</sup> Er chëngbe obenana entšanga japochócama monjábomna uayáshañe y uascuatšëjuañe; er chëngbe uascuatšëjuca enjuamna mo mëtšcuayëngcá, bestšašëngaca, y chëjuanga causa entšanga mal montsanpásaye.

<sup>20</sup> Pero chë inyë entšanga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinýama, ni jouenama, ni jtsanama.

<sup>21</sup> Juabna ndoñe chematantrocá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

## 10

### *Chë ángel base uándmanana tsbuanáchaca*

<sup>1</sup> Chentsana sënjáninýe inyë ángel, puerte obenana bomná; celocana enjëtstajjuana, y chabe shëconana canyë jantšëtëshe enjëtsemna; chabe bestšaše tatsëtsacá canyë tsëfcuácuatjo. Chabe jubiá shinýcá enjëtsebuashinýinýana, y chabe shecuatšënga mo úcuatjona niñëbënga cuaftsoiñcá.

<sup>2</sup> Chabe cucuatshiñe enjétsëtbëna canye base uándmanana y utëfjna tsbuanácha. Chabe catšbioica shecuátšeca chë mar béjayoca tonjantsá, y chë uañicuayóicatšecna, quem fshantsentše.

<sup>3</sup> Y jabuache tonjanoyó, mo canye león cuaftseyocá; y tonjanoyó ora, canysëfta juesasanentša jabuache shauenanana sënjanuena.

<sup>4</sup> Chë canysëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canye oyebuambnayana celocana sënjanuena, mëntsá šonjétsatsaye: “Nye aca cochtsójuabnañe ntšamo chë canysëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentše atsaná sënjaninyá, chabe catšbioica cucuatše celoye tonjanatsbaná,

<sup>6</sup> y tonjanjurá Bëngbe Bëtsabiamá, chë nyets tempo y nyetsca tescama oyenabiamá, chë celoca, quem luare, chë mar béjaye, y lempe chë luarënguifne yobinyncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá,

<sup>7</sup> er chë tempo chaojóshjango, chë ústonoye ángel chabe trompetëfjua juajätëtamá chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nyetsca entšángbioye cha ndoñe chenatinyanýé, ntšamo tempo cha chabe oservëngbioye, chë chabe juabna oyebuambnayëngbioye tojanabuayenacá ca” —cha tonjánayana.

<sup>8</sup> Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjanayana: “Motsa y mauaca chë mar béjayoca y quem luarentše ángel entsemnabe catšbioica cucuatshiñe base uándmanana y utëfjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjanayana, y cha šonjanjuá: “Quemëcha, motsásañe. Acbe uayoye uamešquënëcha mo tjouangbe meloycá echántsamna, pero acbe uafšbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentsana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafšbioyna puerte uauntjécha tontsanábema.

<sup>11</sup> Chora šmonjanayana: “Aca cmontsemna cachiñe jtëtabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entšángaftaca, ba mándayëngbentša entšángaftaca, ba biyana bomna entšanguentšëngaftaca y quem luarentša reyëngaftaca ca.”

## 11

### *Chë útata Bëngbe Bëtsabe juabna oyebuambnayata*

<sup>1</sup> Chentšana canye medídaye niñëfja šmonjanoyé, mo jatšëmbonëfjácá, y šmonjanayana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše Bëngbe Bëtsábioye imojtsadorana.

<sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiama endmëna; y chënga, chë uámana ca uabaina bëts pueblama, canta bnëtsana y uta shinýëntscuana soyënga mochántsama chiñe jtsepochoçama, mo cuaftsebotajncá.

<sup>3</sup> Pero atše, útata atšbiama tatšëmbuata y oyebuambnayata chanjichamuá atšbe cuenta entšángbioye jábuayenama, canye uaranga y uta patse y chnënguana bnëtsana tentscuana. Chatna uajojšha entšayangá

uichétjonata bochántsemna, chca, ngmena bomnama jinÿanÿiyama ca” — chata tbonjánayana.

<sup>4</sup> Quem útata atšbiama tatšëmbuata y oyebuambnayata bontsinÿinÿena chë uta olivos betíyeca y chë uta candeleréseca, ntšamo Bëngbe Bëtsá, chë quem luarentse mandayabe delante endmëncá.

<sup>5</sup> Nderado nda tojtseboše chatbiama bacna soye jamama, ndoñe quen-tatobenaye ntšámnaca jáborlana, er uayoicana íñeshe nanjóbcna y chë uayayëngbioye nantsapochócaye; nderado nda tojábosena chatbiama bacna soye jamama, cachcá cha buántsemna jóbanama.

<sup>6</sup> Chë útata obenana bondbomna celoca jtsachtama, ndoñe chaondu-aftema, entšángbioye Bëngbe Bëtsabiama chabojtsabuayiná tese; obenana béjayënga buiñe jtsebiama, y jamama quem luarentse chaotsóndbemama, nÿetscna pochócaye soyëngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiama ibotatšëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántatsjaye, echantsayëñaná y echantsëbaye.

<sup>8</sup> Y chatbe óbana cuerpo, chë corente bëts pueblentša tsáshenañe echan-joquéda, chë chatbe Utabná tmojanrucificá luarentse, y chë bëts pueblo inÿetšá juabáyamna nántsemna mo chë Sodoma y Egiptó luaroycá. Chentse endmëna mo chë bëts pueblënga Sodoma y Egiptcá, er chentse chë entšanga yapa bacna soyënga jtsamana.

<sup>9</sup> Y unga y tsëntsa tentscuana, chë obanatbe cuerpo mochantsonÿaye, nÿetsca canÿe luarentša entšanga, nÿetsca cachca buiñe bomna entšanga, ba biyana bomna entšanguentšana y ba mándayëngbentša entšanga; ndoñe quenátslesenciana chata jutabuantsama.

<sup>10</sup> Chata bochjóbanama, quem luarentse oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerte chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantješnënga tša uatjana tonjanëbuache.

<sup>12</sup> Chora canÿe jabuache oyebuambnayana tbonjanuena, celocana mëntšá enjétsëtsësnaye: “Moye mašënguata ca.” Y chatna canÿe jantšetëshiñe tbonjánstjua, y chatbe uayayënga chca monjëtsonÿaye.

<sup>13</sup> Cachora quem fshantse jabuache tontsanangmëmana, y chë bëts pueblentse bnëtsanentšana cánÿentse tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inÿe uabouana soye quem luare japochócama, mora tocjochnëngo, pero betscó chë ústonoye uabouana pochócaye soye echanjóshjango!

### *Chë ústonoye ángelbe trompetëfjua*

<sup>15</sup> Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama, y chë amëndayana echántsemna nÿets tempo y nÿetsca tescama ca.

<sup>16</sup> Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjëtsetbiamanënga, tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá,

<sup>17</sup> mëntšá jayanëse:



Bëngbe Utabná, Bëngbe Bëtsá nÿets obenana bomná,  
aca chë mora cha condmëná y chë tempo cha conjamná cbontsatschuaná,  
er nÿa mora acbe bëts obenánaca soyënga cochjama, acbe amëndayana  
jóntsama.

<sup>18</sup> Ba luarentša entsanga ácaftaca tmonjanotšatjayená;  
pero chëngaftaca cmojetnama chë uabouana castigo jtsebínÿnama te  
tocjóshjango,  
chë tempo tmojanóbanëngbiana jayanama tšabá o ndoñe tšabá  
tmonjëftsemama.

Tonjóshjango chë hora, uacanánana jtatsatayama chë acbiana  
oservénëngbioye,  
chë acbe juabna oyebuambnayëngbioye, chë acbe entsángbioye,  
y chë acbe uabaina nÿetscangbiana más bëts uabainana yomnama juab-  
nayëngbioye,  
uámanënga y nduámanënga;  
y chë tempo tonjóshjango, quem luare pochocayënga jtsapochócayama ca —  
chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjëtsebinÿna  
chë cajontema, ndayëtema yojaninÿanÿná ntšamo Bëngbe Bëtsá chabe  
entsángbioye tojanašebuachenacá; y chora enjëtsemna tcuinÿënga, tša shaue-  
nanana, juesasanana, quem fshantse tontsanangmëmana y bëtsá bëntstá  
tonjantquécjana.

## 12

### *Chë shembása y chë uabouana bayá*

<sup>1</sup> Chentšana, canÿe bëts soye celoca tonjanonÿná entsanga canÿe soye  
jinÿanÿiyama: canÿe shembása, shinÿe mo chabe uichëtjoniacá, juashcona  
chabe shecuatsëntša tajsoye, y chabe bestšašinë canÿe coronësha bnëtsana  
uta estrellëngaca.

<sup>2</sup> Chë shembása ngomamaná enjëtsemna, y chë šësona jónÿnama  
yojëtsobecuama jabuache enjëtseyoye, chë šësona jónÿnama cha puerta  
jasúfriama ibojamna causa.

<sup>3</sup> Y chora inÿe bëts soye celoca tonjanonÿná, entsanga inÿe soye  
jinÿanÿiyama: canÿe uabouana dragón buanganá, canÿsëfta bestšašëngaca  
y bnëtsana tsëtjonëšëngaca y chë bestšašënguiñe enjanábomna canÿsëfta  
coronëshangá.

<sup>4</sup> Chabe uascuatsëjuaca úngañentsana cánÿentše chë estrellatëmënga ce-  
locana tontsansjojó, y quem fshantsoye chëtëmënga tontsanëtšana. Y  
chë dragón chë šësona jtsebomnama shembásabe delante tonjantsá, chë  
šësonatëmbioye jtsósañama, cha tojonÿná ora.

<sup>5</sup> Chora chë shembása canÿe šësona boyabásetema bontsanbomna,  
nda nÿets luarenache entsángbioye yochtsamëndaye mo canÿe hierro  
varëfjaquécá. Pero chë šësona chábentšana tmontsanjuaná y Bëngbe  
Bëtsábioye, chabe uámana puestoye tmontsanámbañe.

<sup>6</sup> Chë shembásana entsanga ndoyena luaroye tontsanachá, Bëngbe Bëtsá  
canÿe luare ibojaboprónta choye, chentše saná chamocaredadoma, canÿe  
uaranga y uta patse y chnënguana bnëtsana tentscuana.

<sup>7</sup> Chentšana celoca canÿe entsjanayana enjëtsemna: Miguel, chë angelëngbe  
amëndayá, y chabe angelënga chë dragónaftaca monjëtsestsjanaye. Chë dragón  
y chabe angelënga monjëtsestsjanaye,



8 pero ndoñe chematanobená jáyēnjanama, y chēngbiama ya ndoñe más luare celoca quentétsemna.

9 Chcase, chē uabouana dragón chocana tmontanábocna, chē tempsca mētscuaye, chē Diablo y Satanás ca uabainá, y chē bētská entsángbioye aingñayá; quem fshantsoye cha tmontsantsatše, y chē cha yojanamēnda angelēgnaca.

10 Chora canye jabuache oyebuambnayana celoca sēnjanuena, mēntšá enjétsichamo:

Chē Bēngbe Bētsá entsānga játsebacama tempo ya tonjóshjango.

Mora Bēngbe Bētsá echanjínñanñiye chabe obenana y mándayana, y chabe Uámana Uabuayaná Jesucristbe obenana jtsemándayama; er chē Cristbe delante bēngbe catsátanga mal aquedayá ya tmontábocna, nda nyets tempo Bēngbe Bētsabe delante mal enjanaquedayá.

11 Bēngbe catsátanga cha tmonjayēnjaná,

er Cristo, chē mo tmojóba Oveshatemcá, Bēngbe Bētsá bacna soyēngama entsānga cháuperdonama,

tonjanóbana, chabe buiñe juabuáshanēse,

y chē ndegombre soyēngama chēnga monjanóyebuambnáyeca;

er chēngbe vida chēngbiama ndoñe quenjatámana;

Jesucristo jaserviama jóbanama chēnga monjanprontana.

12 ¡Chcasna, celoca corente oyejuayana chaotsemna,

y tsēngaftanga chē choca oyenēngbeñnaca!

¡Pero tša lastema chē fshantsoca y mar bējayoca oyenēngbiama,

er chē diablo tsēngaftangbioye tonjástjango, corente tsatjayá,

er cha entsetátšēmo ya nye batšá yojsábojamna chē chábioye mochja-castígama ca! —enjétsichamo.

13 Chē dragón quem fshantsoye tmojtsantsatsama tonjáninñe ora, chē šešona boyabásetema tbonjanēshjango shembásabioye tbontsanacmé.

14 Pero uta juatēngmiáša, chē bēts aguilbeshá, chē shembásabioye tmonjaniyé, chabiana tmojanprontá luaroye chaongüefjoma, entsānga ndoyena luaroca, chē dragónbentsana bēnoca; y chentše enjamna chē shembásabioye saná chamuájuatšema, unga y tsēntsa uatēntscuana.

15 Chora chē dragón, chabe uayoicana bēts bējaye tonjanbuashētjo chē shembásabe stētšoica, chaobuama y chabotsambama;

16 pero quem fshantse chē shembásabioye tbonjanájabuache, er chē fshantse mo uayašacá tonjantēfjo, y chē dragonbe uayoicana bējaye obocniye tontsanobmuánañe.

17 Y chē dragón chē shembásabioye tondaye jamana chenatanobená causa, corente cacháftaca tbonjánetna, y tonjána chē ínñenga, chē shembásabe basengcá mondmēnēnga játsjayama, ntšamo Bēngbe Bētsá yomandacá imobedecēnēnga, y ntšamo Jesucristo tonjanabuayená ndegombre soyēngaca sempre imoyenēnga.

18 Y chē dragón chē mar bējaye tsachañe tonjantsá.

## 13

*Chē dragón tonjanma, chē mar bējayoca uabouana bayá chabe obenana chaotsebomnana*

1 Chentšana atše sēnjaninñe, canye uabouana bayá chē mar bejayoicana tonjánbocna; enjánbomna canysēfta bestšašēnga y bnētsana tsētjonēšēnga, y chēsēnguiñe bnētsana coronēshangá, y chē bestšašēnguiñe bañe enjétsabemana Bēngbe Bētsabiama contra oyebuambnaye uabaina.

<sup>2</sup> Chë uabouana bayá sënjaninÿá enjamna mo canÿe leopardcá, mo osbe shecuásangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando.

<sup>3</sup> Canÿe chabe bestšašënguëntše enjëtsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojnánänëga monjëtsemna, y chë uabouana bayábioye montsanëyeunana.

<sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiamana chaotsóyebuambnama, y obenana tbonjanatšetá, canta bnëtsana y uta shinÿëntscuana chaotsemándama.

<sup>6</sup> Y podesca Bëngbe Bëtsabiamana tonjánayana, soyënga chabe contra, chabe bëts yebnama y chë celoca oyenëngbe contra.

<sup>7</sup> Chábioynaca tbonjanlesenciá chë Bëngbe Bëtsábenga imomnënga játsjayama, jáyënjantscuana; y obenana tbonjanatšetá chaotsemándama nÿetsca cachca buiñe bomna entšángbeñe, nÿetsca canÿe entšángbeñe, nÿetsca biyañe bomnëngbeñe, y nÿetsca mándayëngbentša entšángbeñe.

<sup>8</sup> Chë uabouana bayá nÿetsca quem luarentša entšanga mochántadorana. Chë entšanga mondmëna ndëmuanyëngbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nÿetscanga chë tšabe vida mochjónÿenëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama; chë espadējaca jobanamá, espadējaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentšana inÿe uabouana bayá sënjáninÿe, quem fshantsentšana enjëtsebocana; uta tsëtjonëse mo oveshabešcá enjánbomna, pero mo canÿe dragoncá, mo canÿa Satanásbeyeca mandanacá enjëtsoyebuambnaye.

<sup>12</sup> Y enjánama soyënga chë natsana uabouana bayabe nÿets obenánaca, chabe delante. Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá.

<sup>13</sup> Cha ba bëts soyëngnaca enjánama chabe obenana entšanga jinÿanÿiyama, entšangbe delante jamana iñe celocana fshantsoye chaótsatšamnaca.

<sup>14</sup> Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canÿe soye chamopormá, y chë soye cháotsinÿna mo chë natsana uabouana bayacá, chë espadējaca tëtšená enjamná, y chora tšabá enjetsatšmëná.

<sup>15</sup> Y chë inÿe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámna, y jamama chë chábioye ndoñe tmontsadoránënga chamóbanama.

16 Y tonjanma, nyetscángbioye, básenga y bêtsétsanga, bomnënga y nd-bomnënga, cachëngbiamá trabájayënga y nye ínÿabiamá nyets tempo os-ervénënga, catšbioica cucuatšinë o juentsaca chamuínÿnanama.

17 Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

18 Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe entšabe número endmëna. Chë número endmëna chë chnënguana patse y chnënguana bnëtsana y chnënguana.

## 14

### *Chë canÿe patse y canta bnëtsana y canta uaranga entsangbe canto*

1 Y más sentsanonÿá. Sënjáninÿe, chë Oveshatema, enjétsatsjabna Sión ca uabaina tjoca, y cháftaca monjétssemna canÿe patse y canta bnëtsana y canta uaranga entsanga, y chëngbe juentsaca enjétsabemana chë Oveshatembe y chabe Taitabe uabaina.

2 Chora sënjanuena celocana canÿe shauenanana, mo bëtscá béjayënga y bëtš juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá.

3 Chënga canÿe tsëm canto montsancánta Bëngbe Bëtšabe delante, chë chabe uámana puesto y chë cháftaca canta Ainënga y chë bëtšëjëmënga amëndayëngbe natsanentše. Y ndocná quenjátanobena chë canto juat-sjinÿana, nye chë canÿe patse y canta bnëtsana y canta uaranga quem luarentšëngbentsana atsebácanëngna aíñe.

4 Chënga monjanmëna chë shembásaftaca ndocna bacna soye tmon-janmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentša entsanguentše atsebácanënga jtsemnama, y chënga atsebácanënga imojtsemna Bëngbe Bëtšá y chë Oveshatema jtsaservénama.

5 Chënga ndocna te tmonjanobosteró; ndocná quenátobena jayanama chënga bacna soye tmojanma ca.

### *Ntšamo chë unga angelënga tmojánayana*

6 Chentšana inÿe ángel sënjáninÿe, tsbanánoca celëjana enjétsongüefjnaye. Cha enjánbomna canÿe nyets tempscama oservena buayenana soye, entsángbioye jáuyanama, nyets quem luarentše oyenënga, nyetsca mándayëngbentsa entsanga, nyetsca cachca buiñe bomna entsanga, nyetsca biyañe bomnëngbeñe y nyetsca canÿe entsangbiamá.

7 Y jabuache mëntšá enjétsichamo: “¡Bëngbe Bëtšabiamá šmochjajúaboye cha nyetscangbiamá chë más uamaná endmënama, y cha šmochtsatschuanaye, er ya tonjóshjango chë tempo ntšamo entsanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar béjaye y nyetsca chë fshantsentšana óbocana béjayënga tojamá šmochtsadorana ca!”

8 Chábentsana inÿe ángel mëntšá enjétsichamo: “¡Ya bëtš castigo, ya bëtš castigo chë Babilonia bëtš puebloca entsángbeñe echántsemna!, ndëmuanÿënga tmojinÿanÿé ntšamo puerte bacna soyënga shembása o boyabásaftaca jt-samama y inÿe corentë bacna soyëngnaca, y chentšana nyets quem luarentša entsanga mo cach Babilonioquëngcá tmojama. Chë causa, Bëngbe Bëtšá echanjama chëngbiámnaca chabe uabouana castigo chaotsemnama ca.”

<sup>9</sup> Chë útatbentsana inÿe ángel jabuache mëntśá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinÿnanana soye juentsaca o cucuatśiñe chamojajoma,

<sup>10</sup> chánaca bontsemna, chë Bëngbe Bëtsabe uabouana castigo jasúfriana. Entśanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerte mochanjatsetšená, íñeshe y azúfrecá.

<sup>11</sup> Chca chamojtsesufrina ora, becá ngona echantsóbocana, y chë ngona nÿets tempo chca echantsótsjuaye; y chënga, chë uabouana bayá y chábioye jadórama pormana soye adórayënga, y chabe uinÿnanana soye bomnëngbiama, ndocna te chë tsetśanana queochatéjbana ca” —cha enjétsichamo.

<sup>12</sup> Chíyeca quem luarentse entseyta, chë Bëngbe Bëtsabe mandënga obedecënga y Jesúsbeñe puerte ośbuáchiyana bomnënga, chë Bëngbe Bëtsabe entśanga, padecena soyënguiñe tmojtsemna ora, puerte uantana jtsemnana.

<sup>13</sup> Chentsana canÿe oyebuambnayana celocana sënjanuena, mëntśá šonjétsatsaye: “Mëntśá mábema: ‘Tśa oyejuayënga mochántsemna chë mëntescana mochjóbanënga, Bëngbe Utabnáftaca cánÿiñe mo canÿacá jtsomñëse ca.’ ”

“Aíñe ca” —chë Uamana Espíritu tonjayana—, “chënga ya ndoñe más queochátamna jatrabájana, ni jasúfriana, er chënga tmojama tśabe soyënga Jesús jaserviama, y chë soyëngama chënga tśabe bendicionënga mo uacanancá celoca mochanjóyëngacñe ca.”

#### *Ndayá chë angelënga quem luarentse tmojanatbaná*

<sup>14</sup> Chora más sënjáninÿe; sënjáninÿe canÿe fjantse jantsetëshe, y chëshiñe canÿa enjétsatbemana. Cha enjamna mo canÿe entśacá; chabe bestśašiñe enjanábomna canÿe castellano coronësha, y cucuatśiñe canÿe puerte efšana mëttá enjétsatbëna.

<sup>15</sup> Chentsana, chë celoca Bëngbe Bëtsabe bëts yebnentsana inÿe ángel tonjánbocna, y jabuache bonjétsatsaye chë jantsetëshiñe tbemanábioye: “¡Acbe mëttá machbonja y shajuanënga matbaná, er chë játbanama tempo ya tonjóshjango; chë quem luarentśa shajuana ya tonjaboche ca!”

<sup>16</sup> Y chë jantsetëshiñe enjantbemaná chabe mëttá quem luariñe tonjánachbonja, y nÿets quem luarentse atbanániñe tonjanoquedá.

<sup>17</sup> Chentsana inÿe ángel chë celoca Bëngbe Bëtsabe bëts yebnentsana tonjánbocna; chánaca canÿe puerte efšana mëttá.

<sup>18</sup> Y chë altarentśana inÿe ángel tonjánbocna, chë mando bomná íñesheca castigo entśangbiama jamama; y chë puerte efšana mëttá bomna ángelbioye jabuache tbonjaniyana: “¡Acbe mëttá machbonja y chë fshantsoca nÿetsca uvas betiyeshënguentśa uvasëšangá mátabe, er ya uabochenëšangá entsamna ca!”

<sup>19</sup> Y chë ángelna chabe mëttá quem luariñe tonjánachbonja, y nÿetsca quem luarentśa uvasëšangá tonjanátabe, y lempe chë juantśëtetjama luaroje tonjanëtsana. Chë soye entsinÿinÿná ntśamo yochtsemnana Bëngbe Bëtsabe uabouana castigo.

<sup>20</sup> Chë uvasëšangana, chë bëts pueblentsana chaboje tmonjanantsëtetje, y chë luarentśana tśa buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

## 15

### *Chë angelënga chë canÿsëfta pochócaye soyëngaca*



<sup>1</sup> Chentshana, inye bêts soye entsanga inye soyama jinyanjyama, celoca sênjâninÿe, canÿe puerte bêts soye: canÿsêfta angelenga canÿsêfta pochócaye soyêngaca, chë ústonoye pochócaye soyënga. Chë soyënga chaojtsemnentsana ya ndoñe inye pochócaye soye yochántsemna, er chéntscoñe Bëngbe Bëtsá yochjacastíga, lempe ntšamo cha jamama tojanjuabocá.

<sup>2</sup> Canÿe mar béjaynaca sênjâninÿe, mo cristalcá enjétsinÿna íñeca enájuabniye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjânnadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtsatá arpangá.

<sup>3</sup> Chënga, canÿe canto monjétsacantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntsá monjétsacantaye:

Puerte bêts soyënga y tšabe soyënga entsemna lempe ntšamo aca tcojanmcá, Bëngbe Utabná Bëngbe Bëtsá nÿets obenana bomná;

lempe ntšamo jtsamëse aca icoyena, acbe bominjyíñe puerte tšabe y ndegombre soyënga yomna,

nÿets luarënguenache entsangbe Rey.

<sup>4</sup> Bëngbe Utabná, ¿nda nanjájuaboye aca nÿetscangbiama ndoñe más bëtsá condmëna ca,

o ndoñe cmantsatschuanaye?

Nÿe aca uamaná condmëna;

nÿetsca mándayëngbentsá entsanga ácbioye mochanjabo,

ácbentse mochanjoshamentšiye aca jadórama,

er ntšamo tcojamcá lempe entsángbioye mora tcojinÿanÿé,

y lempe ntšamo aca tcojamcá tšabá jtsemnana ca –monjétsacantaye.

<sup>5</sup> Chca chentshana sênjanontješé y sênjâninÿe chë celoca Bëngbe Bëtsabe bêts yebna tonjantëfjo, chë Bëngbe Bëtsá Moisésbioye tbojaníyé leyënga uajajóntse.

<sup>6</sup> Y Bëngbe Bëtsabe bêts yebnentsana tmonjânbocna chë canÿsêfta angelenga, chë canÿsêfta pochócaye soyënga uambayënga, uafjantse lino entsëjuangá uabuashinÿinÿanëjuangá uichëtjonënga, y tëntsa castellano uasnanëjëngaca cochóntscoñe.

<sup>7</sup> Chentshana, canÿa chë canta Ainënguentsá chë canÿsêfta angelëngbioye tonjanoyé canÿsêfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nÿets tempo y nÿetsca tescama vida bomná.

<sup>8</sup> Chorna, chë Bëngbe Bëtsabe bêts yebna celoca becá ngónaca tonjanojutjé, y chë ngona enjétsobocana Bëngbe Bëtsábentsana, chabe buashinÿinÿanana y obenana jtsinÿanÿnayëse; y Bëngbe Bëtsabe bêts yebnoye ndocná quenjâtanobena jamashënguana, chë canÿsêfta angelëngbe canÿsêfta pochócaye soyënga candochnënguentscuana.

## 16

### *Chë castígoca copbenga*

<sup>1</sup> Chentshana, canÿe jabuache oyebuambnayana sênjanuena, chë celoca Bëngbe Bëtsabe bêts yebnentsana enjétsobocana, y chë canÿsêfta angelëngbioye mëntsá enjétsëtsësnaye: “Motsajna y quem canÿsêfta copbenga, chë Bëngbe Bëtsábiocana endóbocana uabouana castígoca, fshantsoca šmochjabuashcja ca.”



<sup>2</sup> Chora chë natsana ángel tonjána y chabe copbé quem luariñe tonjanbuashcja, y nyetsca entsanga chë uabouana bayabe uinñanana soye bomnënga y chë chábioye jadórana pormana soye adórayëngbe cuerpiñe bañe bacna nguayanana tonjanóbocna, puerta tsetsénana.

<sup>3</sup> Chentsana, chë inye ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canye entsá obanabe buiñcá, y nyetscanga chë mar béjayoca vida bomnënga tmontsanóbana.

<sup>4</sup> Chora chë inye ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiama.

<sup>5</sup> Chentsana sënjanuena, chë béjayënguiñe mando bomna ángel mëntsá enjétsichamo:

Aca nyetsca soyënguiñe tšabá amá condmëna,

er aca tcojayana chë quem luarentša entsanga chca castigánënga chamotsemnama.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entsanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nyets mercedo imobuájona chca japásama ca —cha enjétsichamo.

<sup>7</sup> Altarocánënaca canye oyebuambnayana sënjanuena, mëntsá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entsanga contsacastigacá, ndegombre y tšabá entsemna ca.”

<sup>8</sup> Chentsana, chë inye ángel chabe copbé shinýiñe tonjanbuashcja; chë shinýe corente tontsanobonýaná y chíyeca entsángbioye íñesheca tontsanajuinýé.

<sup>9</sup> Y nyetscanga uabouancá juinýnënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

<sup>10</sup> Chentsana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa;

<sup>11</sup> pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinýe bocanoica luarënguentsá reyënga y chëngbe soldadënga chëjana chámuachnëjnama.

<sup>13</sup> Atše sënjáninýe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinýna.

<sup>14</sup> Chënga monjamna bayëjëngbe espíritënga; bëts soyënga monjánama obenana jinýanýiyama, y montsanbocana nyets luarentša reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entsangbiama jabáyanama ntšamo chënga tmojamama, chë te chënga chabe contra chamotsetsjama.

<sup>15</sup> Bëngbe Utabná Jesucristo mëntsá tojayana: “Smochjinýe, atše nýe ndeolpe chanjabo, mo canye atbëbanacá, chabiama ndocná tontsejuabná

ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsáyá totsaboprontañacá, nýe enasá ndoñe chaondëtsemnama, y entsànga chca tmojinýe ora ndoñe chaondëtsëuatjama ca.”

<sup>16</sup> Y chë bacna espíritëngna chë reyëngbioye tmonjanënatse canýe luare, hebreuñe Armagedón ca uabáinoye.

<sup>17</sup> Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canýe jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

<sup>18</sup> Chora enjëtsemna tcuinýënga, shauenanana y juesasanana, y quem luariñe tontsanangmëmana, yapa jabuache quem luare tontsanëbanjó causa; quem luarentše entsànga imobinýna orscana, ndocna te nýa chca quem luare tontsanëbanjó.

<sup>19</sup> Chë puerte bëts pueblo úngañe tontsanojatá, y nýets luarentša bëts pueblënga tontsanáshajaye, y Bëngbe Bëtsá tojanenujabó chë puerte bëts pueblama, Babilonia ca uabaina pueblama, chentša entsànga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá.

<sup>20</sup> Mar béjayoca nýetsca fshantsënga y quem luarentša nýetsca tjañe tontsantenatjëmbe.

<sup>21</sup> Celocana bëtsëtsa bëntstbenga entsángbeñe tonjantquécjana, chëbenga canta bnëtsana kilama más utbenga; y entsànga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

## 17

### *Chë puerte bacna vida bomna shembásabe castigo*

<sup>1</sup> Canýa chë canýsëfta angelënguentsá, chë canýsëfta copbenga monjanatbënënguentsá, tonjánabo y šonjanianana: “Mabo; cbochanjinýinýiye ntšamo yochtsemna chë puerte bacna vida bomna shembása, chë béjayënguiñe entsetbemanabe castigo.

<sup>2</sup> Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

<sup>3</sup> Chentsana chë ángel, atše chë Uámana Espíritbeyeca corente mandaná jtsemnëse, šonjanánatse entsànga ndoyena luaroye. Choca sënjáninýe canýe shembása, canýe uabouana buángana bayábeñe enjaquená; chë bayabe cuerpiñe nýëtsañe Bëngbe Bëtsabiana puerte bacá oyebuambnaye uabaina enjétsabemana, y enjánbomna canýsëfta bëtsaše y bnëtsana tsëtjonëse.

<sup>4</sup> Chë shembása enjanichëtjona uámana shbuenda uafjatsenga y buángana entsáyá, y entsanbotamana castellánoca, uámana botamana ndëtšëtëmëngaca y pérlica. Chabe cucuatšínë canýe castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca.

<sup>5</sup> Y chabe juentsaca canýe uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entsànga chentše, mo

chë puerte bacna vida bomna shembásengbe bebmá cuaftsemncá; chentsana tojanóbocna quem luarentša nýetsca puerte uaboyënja soyënga ca.”

<sup>6</sup> Atše sënjáninýe chë shembása tēmiá, er cha tojanofsé chë Bëngbe Bëtsábenga imojamnëngbe buiñe, ndëmuanýengbioye tmojanëbaye Jesusbiana oyebuambnaye causa.

Chca sënjáninýe ora, tša sënjanenjaná.

<sup>7</sup> Chora chë ángel šonjaniyana: “¿Ndáyeca tcojenjaná ca? Atše cbochanjauyana ntšamo yojtsayana chë shembása y chë chábioye bontsambá uabouana bayá, chë canýsëfta bestšaše bomná y bnëtsana tsëtjonëse; chë soye ndocná quenátstatšëmbo.

<sup>8</sup> Chë tconjinýe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanýengbe uabaina quem luare jobojátšama orscana ndoñe yonduábemana, chë tšabe vida mochjónýenëngbe uabaina iuábemana librëšañe, chënga mochanjenjaná, chë bayá chë tempo enjaniená y mora ya ndoñe, pero cachiñe yochjésabama chamojinýe ora.

<sup>9</sup> “Muentše canýe soye entsemna chë chca josértama chamojobenangbiana: chë bayabe canýsëfta bestšaše endmëna canýsëfta tjañe ndayiñe chë shembása entsetbemana; chë bestšašëngnaca mondmëna canýsëfta mandadënga.

<sup>10</sup> Chentsana, shachnëngbe amëndayana ya tonjochnëngo, canýa mora entsetbemana jtsamëndayama y chë inýa cabá ndoñe tonjášhango. Y cha chaojášhango ora, ndoñe bënama cha queochaisemánda.

<sup>11</sup> Chë tempo enjanienana uabouana bayá pero mora ya ndoñe, endmëna chë canýsëfta mandadënguentsana inýe mandado, pero chánaca chë inýe canýsëftangcá endmëna y lempe pochocaná jtsemnama entsá.

<sup>12</sup> “Chë tconjinýe bnëtsana tsëtjonëse mondmëna bnëtsana mandadënga, jamëndama cabá ndoñe tmonjójayenga; pero básefta tescama cánýiñe chë uabouana bayáftaca, mando mo reyëngcá mochanjóyëngacñe.

<sup>13</sup> Quem bnëtsanënga nýetscanga cachcá mochántsejuabnaye, y chë uabouana bayábioye chëngbe obenana y mando mochanjátšetaye.

<sup>14</sup> Chë Oveshatembe contra mochántsestsjanaye; pero chë Oveshatema echantsayëñaná, er chë Oveshatema endmëna nýetsca amëndayëngbiana chë más uámana Utabná y nýetsca reyëngbiana chë más uámana Rey. Chë bnëtsana mandadënga cháftaca mochántsestsjanaye ora, cha chentše chabe entšángaftaca cánýiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntšánaca šonjaniyana: “Chë tconjinýe béjayënga, ndayiñe chë bacna vida bomna shembása entsetbemana, mondmëna nýetsca canýe luarentša entsanga, enutanana entsanga, nýetsca biyañe oyebuambnayënga y nýetsca mándayëngbentša entsanga.

<sup>16</sup> Y chë uabouana bayábeñe tcojinýe bnëtsana tsëtjonëse y chë uabouana bayá, chë bacna vida bomna shembásabioye mochantsáboyënja; enasá cachcá mochanjesonýaye; chabe cuerpentša mëntšena mochantsósañe y iñesheca mochántsejuinýiye, chaopochocantscuana.

<sup>17</sup> Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana.

<sup>18</sup> Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniana.

## 18

### *Babilonia japochócama*

<sup>1</sup> Chentšana inÿe ángel sënjaninÿe, celocana enjétsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna.

<sup>2</sup> Chë ángel jabuache mëntšá enjétsichamo:

¡Ya mochantsepochóca, ya mochantsepochóca chë uámana pueblo Babilonia!

¡Chentše tojtsóbema diablëngbe oyeniñe,

nÿetsca bacna espíritëngbe oyeniñe,

y ndoñe tšabe y uaboyënja shloftšëngbe oyeniñe!

<sup>3</sup> Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama,

mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayíñnaca ntsejuabnaycá gástaye causa ca —cha enjétsichamo.

<sup>4</sup> Chentšana, celocana inÿe oyebuambnayana sënjanuena, mëntšá enjétsichamo:

¡Chë bëts pueblentšana maisebocana!, tšëngaftanga chë atšbe entsanga šmomnënga,

chë chentša entsanga mondbétsama bacna soyënga ndoñe

chašmondëtsamama,

ni chë chëngbioye japochócama soyënga tšëngaftangbiamama cach ndoñe

chaondëtsemnama.

<sup>5</sup> Chënga tša bacna soyënga tmojama, tša bëtscá nÿa mo celóntscoñe cuafjojut-jecá,

y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

<sup>6</sup> Ntšamo chentša entsanga ínÿengbiamama ndoñe tšabá tmonjamcá,

chë entsangbiámna cachcá chaotsemna;

ntšamo tmojamama, cabá uta soye más cachca soye chëngbiamama chaotsemna;

ntšamo chentša entsanga ínÿënga chamosufrima tmojamcá,

chëngnaca cachcá uta soye más chamosufrí.

<sup>7</sup> Chënga corente jtšenábotamnayana y yapa crocénana nÿe ndayíñnaca ntsejuabnaycá jtsegástayana;

chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbiámama.

Viudacá ngménaca ndoñe quemuátsmëna; tondayama quemochátssufrina ca.”

<sup>8</sup> Chíyeca, canÿe ora pochócaye soyënga chëngbiamama echanjóshjango:

jóbanama šocanënga, puerte ngménana y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebomnama tojayaná ca —cha enjétsichamo.

<sup>9</sup> Quem luarentša mandadënga, chentša entsãngaftaca puerte bacna soyënga tmojamënga, y chëngaftaca nÿe ndayíñnaca yapa crocénana, ntsejuabnacyá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora.

<sup>10</sup> Chentšana bënoca mochanjoquëda antješna, chë uabouana castiguama auatja causa, y chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binÿnentše!

Canÿe ora tšëngaftangbe castigo tojóshjango ca —mochántsicamo.

<sup>11</sup> Chë quem luarentša obuámnañënga y enëgnaca mochanjošachna y ngmenánaca mochántsemna chë pueblentša entsangbiama, er chora ya ndocná queochátsmëna chë chënga tmojúshjango soyënga chamobuámiñama:

<sup>12</sup> tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsenga entsayá y sedëjua y uámana uabuángana entsayá; nÿetsca botamana uanguëtše betiyënga, marfíloca pormana soyënga, uámana niñëšëngaca pormana soyënga, bronce soyënga, hierro y marmol soyënga;

<sup>13</sup> bëtscá canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnayënga, oveshënga, couayënga, cochëshangá y entsanga nÿets tempo nÿe ínÿabiama oservenëgnaca.

<sup>14</sup> Y chë pueblentša entsangbiama mochanjayana:

¡Chë tša cmonjanogúsetana jtsebomnama soyënga, mora ya ndoñe quešmátsbomna;

chë uámana y buashinÿinÿana soyënga y tša bomnana lempe šmojobuetše, y ndocna te más cachca soye quešmochátsbomna ca!

<sup>15</sup> Chë soyënga enënga, chë bëts pueblentša entsãngbeyeca bomnënga tmojanobiamënga, bënoca mochanjoquëda antješna, chë bëts pueblentša entsangbiama tša bëts castiguama auatja causa; mochanjošachna, puerte ngmenánaca mochántsemna.

<sup>16</sup> Y mëntšá chentša entsangbiama mochanjayana:

¡Tša lastema, tša lastema tšëngaftanga chë uámana bëts pueblentše oyenëngbiama!

Chë enjáninÿna mo canÿe shembasacá, uámana lino entsëjua uichëtjoná, uámana shbuenda uafjatsenga y uabuángana entsayá uichëtjoná, botamananá castellanoca, perlënga y uámana botamana ndëtšbéngaca.

<sup>17</sup> ¡Y canÿe ora chabe tša bomnana lempe tojtsopochocá ca! —mochanjayana.

Nÿetsca chë barquënguentsa mándayënga, chentša entsanga inÿe luaroye ajnënga y chentša trabájayënga, y nÿetscanga chë vida onguayiñe mar béjayoca trabájayëgnaca, chentšana bënoca mochanjoquëda antješna,

<sup>18</sup> y chë bëts pueblo chaojtsangbototjuanentša ngona chamojinÿe ora, jabuache mochanjayana: “¡Quem uámana bëts pueblëcá ndocna inÿe pueblo cachcá quenátsmëna ca!”

<sup>19</sup> Chca chamojinÿe ora, ngménama bestšašifne polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tšëngaftanga chë uámana bëts pueblentše oyenëngbiama!

Chentša bomnánaca bomnënga tmojanobiamana nÿetscanga chë mar béjayoca barco bomnënga.

¡Canÿe ora lempe tojtsopochocá ca! —chënga mochántseyona.

Chora chë ángel tonjánayana:



20 ¡Celoca oyenënga móyejuanga  
 chë pueblo chca tojapasama;  
 y tsëngaftángnaca móyejuanga, Bëngbe Bëtsabe entsanga, Jesucristbe  
 ichmónënga y Bëngbe Bëtsabe juabna oyebuambnayënga,  
 er chca jacastígase, Bëngbe Bëtsá tojama chënga chamosufrima,  
 ntšamo tsëngaftanga chašmosufrima chënga tmojanmcá ca! —cha tonjánayana.

21 Chentšana, canye ángel puerte obenana bomná, canye ndëtsbé tonjanats-  
 baná, mo canye bëts nantsnëbé ndëtsbecá, mar béjayoye tonjanashbuetše y  
 mëntšá tonjánayana:

Mëntšá, nye ndeolpe y jabuache, Babilonia chë uámana bëts pueblo  
 mochántsetsatše,

y ndocna te más quem pueblo queochátsmëna.

22 Chentše, ndocna te más quemochátuenana  
 arpangá uabuástoyana, ni cantayana, flautëfjënga y trompetëfjuangá cach  
 ndoñe;

ndocna te más quemochátsmëna obrerënga,  
 ni chë nantsnëbeñe trabájayana quemochátuenana.

23 Chentše, ndocna te más ndocna uajuinýanësha queochátsbinýnaye,  
 ni casamento fiestentša enbouenanana quemochátuenana.

Er chë bëts pueblo chca mochantseepochóca,  
 masque chentša obuámnañënga y enënga nyets quem luarentše chë más  
 bomnënga monjamna,

y chentša bocjuanáncaca nyetsca luarënguentsa entsanga ingñénënga mon-  
 jamna ca —cha tonjánayana.

24 Bëngbe Bëtsá chca chë bëts pueblentše echanjama, er chentše tmojínýena  
 chë Bëngbe Bëtsabiamana trabájaye causa tmojanóbanëngbe buiñe; chë chabe  
 juabna oyebuambnayënga, chabe entsanga, y chë chábioye oservénama nyets  
 quem luarentše tmojtsëbayëngbe buiñe.

## 19

1 Chentšana celoca sënjanuena mo mallajta entsanga cuaftsayebuachcá,  
 mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá;  
 cha puerte uámanana, buashinýinýana y mando endbomna,

2 er ndayama cha tojayancá ndegombre jtsemnana,  
 y ntšamo tsabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa,  
 nyets luarentša entságnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservénënga chë shembásabeyeca tmojóbana causa ca —chënga  
 monjétsichamo.

3 Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša ngona nyetsca tescama  
 chca echanjótjuaye ca!

4 Y chora, chë uta bnëtsana y canta bëtsëjëmënga amëndayënga y chë  
 canta Ainënga tmonjanoshamentšé, y Bëngbe Bëtsá, chë uámana tbemanentše  
 enjëtsetbemanabioye tmonjanadorá, mëntšá jayanëse: “¡Chca chaotsemna!  
 ¡Bëngbe Utabná matschuanga ca!”

5 Y chë uámana puestentsana canye oyebuambnayana tonjanóbocna, mēntśá:  
 Bēngbe Bētsá matschuanga, n̄yetsca chabe oservénēnga  
 y chë n̄yetscangbiana cha chë más uamaná yomnama juabnayēnga,  
 básenga y bētsētsanga ca.

### *Chë Oveshatembe casamento fiesta*

6 Y sēnjanuena mo mallajta entsāngbe oyebuambnayancá, mo bētscá bėjaye cuaftsobonjnacá y mo bēts juesasanana shauenanancá; mēntśá monjétsichamo:

¡Bēngbe Utabná matschuanga!

Er Bēngbe Utabná, Bēngbe Bētsá n̄yets obenana bomná tojontśé jamándana.

7 Puerte móyejuanga y mochjín̄yan̄yiye

Bēngbe Bētsá puerte bētsá y uamaná bétsemnama,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

8 tmojalesenciá cha chauatíchētjo uámana, nduatsenga uafjantse y uabuashin̄yin̄yana lino entsáyá.

Chë shema entsin̄yin̄ná chë Bēngbe Bētsabe entsāngbe;

y chë lino entsáyá jtsichētjonana entsin̄yin̄ná

chēnga lempe ntśamo tśabá yomncá jtsamēse imoyena ca —chēnga monjétsichamo.

9 Chentsana chë ángel šonjaniyana: “Mēntśá mábema: ‘Oyejuayēnga chë Oveshatembe casamento fiestama ófjanēnga ca.’ ” Y mēntśánaca šonjaniyana: “Chca, ndegombre Bēngbe Bētsabe palabrenga endmēna ca.”

10 As chabe shecuatśentśe sēnjanoshamentśé cha jadórana, pero cha šonjaniyana: “Ndoñe, átseftaca ndoñe chca mátamana, er atśe Bēngbe Bētsabe canye oservená sēndmēna, ntśamo aca condmēncá, y chë Crístbeyeca acbe catśátanga, ntśamo chabiama motatsēmbcá y chabe ndegombre palabrenga n̄yets tempo imabuayiyanga mondmēncá. Aca cmontsemna Bēngbe Bētsá jadórana ca.”

Ndayá Jesús tojanma y tojanayancá, endama chë Bēngbe Bētsabe juabna oyebuambnayēnga chēngbe ainaniñe osertánana y añemo chamotsebomnama, chë soyēngama entsāngbioye jábuayenama.

### *Chë fjantse couayñe enjaquená*

11 Chora sēnjánin̄ye celoca atēfjniñe; canye fjantse couaye enjésemna y chë chábeñe enjaquená enjanabaina “Ntśamo tojašebuachenacá amá” y “Ndegombre oyebuambnayá ca”, er ntśamo tśabá yomncá cha tojanjuabó y tojanma entsāngaftaca; y chca chabe uayayēngaftaca monjánentsjanaye.

12 Chabe fšnēbenga mo iñeshcá enjánin̄yana, bestśašñe ba uabuashin̄yin̄yana coronēshangá enjanábomna, y canye uabaina chábeñe enjanábemana; n̄ye cha chë uabaina yojanábuatma.

13 Cha enjanichētjona buñeca unētjona entsáyá y chabe uabaina enjamna “Bēngbe Bētsabe palabra ca”.

14 Y chabe ústonoye monjétsajna mallajta soldadēnga celoquēnga, nduat-senga uafjantse y uámana lino entsáyá uichētjonēnga, fjantse couayēnguiñe enjaquenēnga.

15 Chë enjétebnatsanabe uayoicana enjanóbocana canye puerte efšana espadēja, chë Bēngbe Bētsabeñe ndošbuáchiyēnga játatsetśama. Cha puerte obenánaca echántsamēndaye, mo canye hierro varēfjaquēcá. Cha echanjama

entsángaftaca mo nda uvasëshangá juantsétetjiana tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nyets obenana bomná tbojetna causa.

<sup>16</sup> Chabe uabonjaníyañe y chabe mëntjoca canye uabaina enjanábemana: “Nyetsca reyëngbiana chë más uámana Rey, y nyetsca amëndayëngbiana chë más uámana Utabná ca”.

<sup>17</sup> Chentšana canye ángel sënjáninye, shinýiñe enjétsatsana, chë celoca tsbanánoca nyetsca monjanongüefná shloftšënga jabuache mëntsá enjétsétsétsnaye: “¡Mabënga, menefjna chë Bëngbe Bëtsá tojaprontá bëts saná jasama;

<sup>18</sup> chašmosama reyëngbe mëntsëna, soldadënga amëndayëngbe mëntsëna y valente entsangbe mëntsëna, couayënga y chëngbeñe enjaquenëngbe mëntsëna, y nyetsca entsangbe mëntsëna, cachëngbiana trabájayënga y nyë inyabiana nyets tempo trabájayënga, básesenga y bëtsétsanga ca!”

<sup>19</sup> Chora atše sënjáninye chë uabouana bayá y quem luarentša reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jétsjama.

<sup>20</sup> Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñé chë uabouana bayabe uinýnanana soye chamuayentšjajoma tmojanlesencianga, y chë chábioye jadórana pormana soye adórayënga. Y chë úatbioyna ainata tmontsanatmetše chë íñesheca uafjónayoye, chë azufre endëjuinýinýanentše.

<sup>21</sup> Chë inýëngbioyna tmontsanapochocá chë fjantse couayiñe enjaquenabe uayoicana enjanóbocana espadéjaca, y nyetsca shloftšënga chëngbe mëntsënaca yapa tmontanoshachá.

## 20

### *Chë uaranga uata*

<sup>1</sup> Chentšana canye ángel sënjáninye celocana entsanastjajuana chë corente asentoye tboca llavéjaca, y canye bëts cadenëjua entsanëtbená.

<sup>2</sup> Chë ángel tbontsantbá chë dragónbioye, chë tempsca mëtscuaye, chë Diabla y Satanás endmëná, y canye uaranga uatama tbontsanbátsëca.

<sup>3</sup> Chë corente asentoye tboye tbontsantsatše, chentše tbontsanëtame, y chentše bësháša tsengájašëca tonjaninýnaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjétsboshjona.

<sup>4</sup> Uámana puestënga sënjáninye, y chiñe tmonjanotbiana chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjánanýe. Chënga chca tmojanóbana, Jesús tojánayana soyënguiñe y chë Bëngbe Bëtsabe buayenana soyënguiñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórana pormana soye, y ndoñe tmonjanlesenciá chë bayabe uinýnanana soye juentsaca o cucuatšinë chamuayentšjajoma. Y sënjáninye chëngna tmontanayena y Crístoftaca canye uaranga uatama montsanmánda.

<sup>5</sup> Chë entsanga mondmëna chë natsanënga jtayenama, pero chë tempo chë inye obanënga ndoñe chemëntétanayena, ndayá nyë chë canye uaranga uata chentšana.

<sup>6</sup> ¡Oyejuayënga y Bëngbe Bëtsabe entšanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseserverna, y Crísoftaca chë uaranga uatama mochántsemandaye.

### *Satanás japochócama*

<sup>7</sup> Chë uaranga uata chaojochnëngo ora, Satanás chabe utámenocana mochanjëtshboshjona;

<sup>8</sup> y cha echanjábocna nyets luarentša entšángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entšanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nya mo chë mar béjaye chënyoca cascajca mochántsemna.

<sup>9</sup> Chënga nyetscanga nyets luarëjana mochanjátsjua, y chë Bëngbe Bëtsabe entšanga oyenentše y chabe bonshana entšangbe bëts pueblo shéconana mochanjotsaye. Pero celocana iñe echanjatquécjana y chë Bëngbe Bëtsabe contra imomnënga lempe echántsjuinje.

<sup>10</sup> Y Satanás, chë aingñayá, mochántsatmetše chë iñeshe y azúfrecu uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nyets tempo, bnëtë y ibeta mochanjasufrina.

### *Chë obanëngbiama tmonjánayana ntšamo chëngaftaca jamama yojtsemnana*

<sup>11</sup> Chentšana sënjaninje canje bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmba, y ndócnentše más chenatanobinýná.

<sup>12</sup> Y chë obanënga sënjaninje, bëtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inje librëšanaca, ndëmuanýenga nyetsca tescama tsabe vida mochjónýenëngbe uabaina uabemana librëša. Chë obanëngbiama tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá.

<sup>13</sup> Chë mar béjayoye tmojanóbanënga choicana tmontanbocna, y chë obanënga tmojanoqueganga luarënguentsana tmontanbocna, y cada cánýabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca.

<sup>14</sup> Chentšana ya ndoñe más obenana quentëtsemna entšanga chamóbanama chaomama, mo chë obenana chë iñesheca uafjajónayoye cuaftsëtšencá; quem iñesheca uafjajónayoye endmëna chë nyetsca tescama castigo jtsebomnana luare; chë choca castigánënga jtsamnama yojtsamnëngbiama entsemna mo chënga cachiñe cuafjatobancá;

<sup>15</sup> y ndëmuanýengbe uabaina chë tsabe vida mochjónýenëngbe uabaina iuábemana librëšañe ndoñe yonjanabemana, chë iñesheca uafjajónayoye tmontsanatmetše.

## 21

### *Celoca tsmiñe y fshantse tsmiñe*

<sup>1</sup> Chentšana atše sënjaninje canje celoca tsmiñe y canje fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye.

<sup>2</sup> Sēnjáninýe chē “uámana ca” uabaina bēts pueblo, chē tsēm bēts pueblo Jerusalén, Bēngbe Bētsábiocana celocana enjétsostjajuana, puerte botamaniñe, mo canýe shembása puerte botamananacá, chabe boyá jábocnabiamá.

<sup>3</sup> Y chora canýe jabuache oyebuambnayana Bēngbe Bētsabe uámana puestentšana sēnjanuena, mēntsá: “Mouena. Bēngbe Bētsá entšángaftaca echántsemna y cha chēngbeñe echantsiyena. Chēnga chabe entšanga mochántsemna, cach Bēngbe Bētsá chēngaftaca echántsemna, y cha chēngbe Bētsá echántsemna.

<sup>4</sup> Cha echanjama chēnga ndocna te más ngménēnga chamondētsemnama, y ndoñe más chamondóbanama, ndoñe más chamondošachema, ni ngménaca ndoñe chamondētsóyebuambnama y ndoñe más tsetšanana chamondētsebomnama; er ntšamo chēnga entšangcá fshantsoca tempo imojétsiyena ora enjamncá, chora ya ndoñe chca queochátsmēna ca.”

<sup>5</sup> Chē uámana puestentše enjantbemaná šonjaniyana: “Atše lempe mo tsēm soyēngcá sēndbama ca.” Y mēntsánaca tonjánayana: “Chē soyēnga mábema, er chē palabrēnga endmēna ntšamo ndegombre yomncá, y nyetscanga mondobena chiñe corente jtsošbuáchiyana ca.”

<sup>6</sup> Chentšana šonjaniyana: “Lempe tonjochnēgo. Atše sēndmēna chē nyetsca soyēnga bojatšayá y pochocayá, chē natsaná y chē ustonoyá. Mo nda tša uajuendayana tojtsebomná canýe bėjaye fshantsiñe obocanentšana cuafjofšecá, cachcá nda tša tojtseboše atšbe soyēnga jtsebomnama, atše chanjama cha chē soyēnga chaotsebomnama, y chē nyetsca tescama yomna tšabe vídnaca, chca jtsebomnama chábioye tondaye ntsotjañcá.

<sup>7</sup> Nda nyetsca soyēnguentšana tšabá chaojabocná mo ayēnjanayacá, lempe echanjóyēngacñe ntšamo atšbe entšángbioye jatšatayama tijašebuachenacá, y atše chabe Bētsá chántsemna y cha atšbe uaquiñá.

<sup>8</sup> Pero chē auatja causa Crístbioye ndoñe mondēservénēnga, chábeñe ndošbuáchiyēnga, chē bacna soyēnga causa Bēngbe Bētsabiamá puerte uaboyēnjanēnga imomnēnga, chē ínýēngbioye obánayēnga, chē shembása o boyabásaftaca bacna soye amēnga, chē bocjuana soyēnga amēnga, chē soyēnga adórayēnga diosēnga yomna ca jtsejuabnayēse, y nyetscanga bosterēnga imomnēngbiamna, chēnga entsamna chē íñesheca uafjajónayoca jasúfriana, chē azufre yojuínyinýanentše. Chentše puerte castigánēnga sempre mochánjéftsemna, mo uta soyama cuafjobancá ca.”

### *Chē tsēm bēts pueblo Jerusalén*

<sup>9</sup> Chentšana canýa chē angelēnguentšá, chē canýsēfta copbenga bomnēnga jútjena chē canýsēfta ústonoye pochócaye soyēngaca, átšbioye tonjánabo y šonjaniyana: “Mabo, cbochanjinýinýiye chē tojobouamá shembása, chē Oveshatembe shema ca.”

<sup>10</sup> Y atše chē Uámana Espíritoftaca corente mandaná jtsemnēse, chē ángel šonjanánatse canýe bēts y tsbanana tjoye, y šonjaninýinýe chē tsēm bēts pueblo Jerusalén, chē “uámana ca” uabaina pueblo, celocana Bēngbe Bētsábiocana enjétsostjajuana.

<sup>11</sup> Chē bēts pueblo enjétsebuashinýinýana Bēngbe Bētsabe buashinýinýanánaca; enjétsebuashinýinýana mo canýe uámana botamana ndētsbecá, mo jaspe ndētsbecá, pero mo cristalcá tēshínýiñe.

<sup>12</sup> Chē bēts pueblo shēconana canýe bēts y tsbanana tapiēse enjamna, chē tapiēsiñe bnētsana uta bēšashangá y cada bēšashentše canýe ángel, y chē bēšashangañe enjanábemana chē Israeloca bnētsana uta bēts pamíllangbe uabaina.



13 Shinÿe bocanoica unga bëshashangá, shinÿe uenatjêmbambanoica ungashá, tsjuanoica unga bëshashangá, y tsmanoica ungashá.

14 Chê tapiêse enjanêcuatjona bnêtsana uta ndêtsbenguiñe, y chêbenguiñe enjanábemana Jesucristo chê Oveshatembe bnêtsana uta ichmónêngbe uabaina.

15 Chê ángel átseftaca oyebuambnayá canÿe castellano juinÿnanêšéfja enjánatbêna jamedídama chê bêts pueblo, chentša bëshashangá y chentša tapiêse.

16 Chê bêts pueblo cach medida enjánbomna nÿets cantoica, cach medida têtsoye y nÿanêjoye. Chê ángel chabe juinÿnanêšéfjaca chê bêts pueblo tonjanmedidá: enjánbomna uta uaranga y uta patse kilómetrênga; têtsoye, tsbanánoye y nÿanêjoye cach medida enjánbomna.

17 Chentšana chê tapiêse tonjanmedidá, enjánbomna chnênguana bnêtsana y shachna metrênga; ntšamo entsanga chca soyênga jamedídama mondêtatšêmbcá chê ángel tonjanmedidá.

18 Chê tapiêse enjanpormana jaspe ndêtsbeca, y chê bêts pueblo ena castellánoca, tša chca nÿa mo cristalchá têshínÿniñe enjáninÿna.

19 Chê ndêtsbenga ndayiñe chê tapiêse enjanêcuatjona enjánbotamanana nÿetsca uámana botamana ndêtsbéngaca: canÿebé jaspe ndêtsbeca, chê inÿebé zafíroca, chê inÿebé ágata ndêtsbeca, chê inÿebé esmeráldaca,

20 chê inÿebé ónice ndêtsbeca, chê inÿebé cornalina ndêtsbeca, chê inÿebé crisólito ndêtsbeca, chê inÿebé berilo ndêtsbeca, chê inÿebé topácioca, chê inÿebé crisoprasa ndêtsbeca, chê inÿebé jacíntoca y chê inÿebena amatista ndêtsbeca.

21 Chê bnêtsana uta bëshashangá enjuamna bnêtsana uta perlênga; cada bëshásha nÿe canÿe pérlica uapormanêsha. Y chê más bêts tsáshenêjana enjamna ena castellánoca; mo cristalchá têshínÿniñe enjáninÿna.

22 Chê bêts pueblentše ndocna Bêngbe Bêtsabe bêts yebna chiyátaninÿe, er Bêngbe Utabná, chê Bêngbe Bêtsá nÿets obenana bomná y chê Oveshatema chentše bonjamna, y chata nÿetscangbiana chê bêts pueblentše ndayêntšnaca adoránata bonjêtsamna.

23 Chê bêts pueblentše ndoñe quenjatsiyta shinÿe o juashcona chaotsebinÿnaye, er Bêngbe Bêtsabe buashinÿinÿanana chentše enjêtsbinÿnaye, y chê Oveshatembe buashinÿinÿanana mo uajuinÿanêshacá enjamna chê bêts pueblama.

24 Chentša binÿnayánaca, entsanga nÿetsca mándayêngbentše mochantsiyena, y quem luarentša mandadênga chêngbe uámana y bêts soyênga chê bêts puebløye mochanjiyêbo.

25 Chê bêts pueblentša bëshashangá ndocna te quemochtêtatame, y chentše ndocna ora íbeta queochátsmêna.

26 Chê bêts puebløye mochanjiyêbo chê nÿetsca luarênguentša entsangbe uámana y bêts soyênga, y chê nÿetsca luarênguentša entsángbeñe bêtsêtsanga y uámanênga iuabiamná soyêngnaca.

27 Pero ndocna te queochatómashêngo ndayánaca, y chê soye chaotsama entsanga ndoñe tsábenga chamotsemnama Bêngbe Bêtsá jadórama; ni ndocná queochátamashêngo, Bêngbe Bêtsabiana nÿa tondayama ogustana soyênga amá o ínÿengbioye jáingñama soyênga amá. Chøye mochanjámashjna nÿe chê ndêmuanyêngbe uabaina yojtsábemana chê Oveshatembe librêšañe, chê nÿetsca tescama tsabe vida mochjónÿenêngbe uabaina uábemanentše.

## 22

1 Chê ángel šonjaninÿinÿé chê enjanobêjna bójaye vida bomniye. Chê

búyeshe enjamna ndëtsenguive y tëshínÿniye mo cristalca. Enjanóbocana chë Bëngbe Bëtsá y chë Oveshatembe uámana puestocana,

<sup>2</sup> y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nÿetsca tescama yomna tšabe vida jtsebomnama, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josérviana nÿetsca mándayëngbentša entšanga jáshnama.

<sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana.

<sup>4</sup> Chënga mochanjinÿe Bëngbe Bëtsabe jubiá, y chabe uabaina chëngbe juentsaca mochantsambaye.

<sup>5</sup> Chentše ndocna ora ibeta queochátsmëna, y chentša oyenënga ndoñe queochátëjaboto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiana echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

### *Jesucristo jésabama entsobeco*

<sup>6</sup> Chentšana chë ángel šonjaniyana: “Quem palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oye-buambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

<sup>8</sup> Atše Juan, chë soyënga sënjanuena y sënjáninÿe. Y chca sënjanuena y sënjaninÿentšana, chë chca šonjaninÿinÿé ángelbe delante atše sënjanoshamentšé, cha jadórama.

<sup>9</sup> Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuamb-nayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco.

<sup>11</sup> Cachcá monÿá chë bacna entšá bacna soyënga chaotsama; chë puerte bacna soyënguiñe jtсийenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nÿets tempo nÿets ainánaca chábioye chabotseserverna ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentsábioye chanjoyiye ndayá tojamama ntšamo tbojtsomere-cencá.

<sup>13</sup> Atše sëndmëna chë nÿetsca soyënga bojatšayá y pochocayá, chë natsaná y ustonoyá, chë ndábeyeca y ndabiana lempe yomna ca” —šonjaniyana.

14 Oyejuayënga chë bacna soyëngama perdonánënga imojtsemnënga, mo chënga chëngbe entšayá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebomnama uacanánana jashjáchama, mo chë nyetsca tescama yomna tšabe vida jtsebomnama betiyeshentšana cuaftsesacá, y mochanjobenaye chë tsëm bëtš puebloye bësásajana tšabá jamashjnana.

15 Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

16 Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentšana Entšá. Atše sëndmëna mo chë bínÿanoye puerta bínÿnaye estrellcá ca.”

17 Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bėjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

18 Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtšá echanjama cha chaosufrí chë quem librëšañe entsábemana pochócaye soyënga.

19 Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtšá chábioye bochantsebojuána ntšamo chabiamá yomncá chë nyetsca tescama yomna tšabe vida jtsebomnama betiyeshentšana y chë tsëm bëtš pueblentšana, chë ndayama quem librëšañe entsábemana.

20 Quem soyënga oyebuambnayá, chë lempe ndegombre echantsemnana tonjayaná, atše, Jesús sëntsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

21 Bëngbe Utabná Jesús chaoma tšabe bendicionënga tšëngaftangbeñe chaotsemnana.